


Diidz ne rdeed
guielmban



New Testament in Zapotec, Mixtepec (MX:zpm:Zapotec,
Mixtepec)

Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files dated 29 Jan 2022
5317ca58-7555-5e4c-a420-e1e9210e2df2

Contents

MATEO	1
MARCOS	39
LUCAS	63
JUAN	104
HECHOS	134
ROMANOS	170
1 CORINTIOS	186
2 CORINTIOS	203
GALATAS	214
EFESIOS	221
FILIPENSES	227
COLOSENSES	231
1 TESALONICENSES	235
2 TESALONICENSES	239
1 TIMOTEO	241
2 TIMOTEO	246
TITO	250
FILEMON	253
HEBREOS	254
SANTIAGO	266
1 PEDRO	271
2 PEDRO	276
1 JUAN	279
2 JUAN	284
3 JUAN	285
JUDAS	286
APOCALIPSIS	288

XTIIDZ NDZON DIOS MIÑE PQUIAA MATEW

¹ Jesús men ne pxeel Dios ga, lo xtii Abraham, lo xtii David, ga brieequia me. Lëë grë xmengoldoo me nu:

² Abraham goc pxoz Isaac, Isaac goc pxoz Jacob,

Jacob goc pxoz Judá (bio zla xpëed Jacob),

³ Judá goc pxoz Far ni Zar (Tamar brieelë tsiel Judá),

Far goc pxoz Srom,

Srom goc pxoz Aram.

⁴ Aram goc pxoz Minadab,

Minadab goc pxoz Naasón,

Naasón goc pxoz Salmon.

⁵ Salmóngoc pxoz Booz (Rahab brieelë tsiel Salmon),

Booz goc pxoz Obed (Rut brieelë tsiel Booz),

Obed goc pxoz Isái.

⁶ Isái goc pxoz rey David,

David goc pxoz Salomón (lëë Salomón ga gop tsiel Urí wnaa ne bonie David).

⁷ Salomón goc pxoz Roboam,

Roboam goc pxoz Abí,

Abí goc pxoz Asá,

⁸ Asá goc pxoz Josafat,

Josafat goc pxoz Joram,

Joram goc pxoz Uzí.

⁹ Uzí goc pxoz Jotam,

Jotam goc pxoz Acaz,

Acaz goc pxoz Ezequí.

¹⁰ Ezequí goc pxoz Manasés,

Manasés goc pxoz Amón,

Amón goc pxoz Josí,

¹¹ Josí goc pxoz Jeconí (bio zla xpëed Josí).

Leñ dze ne nac Jeconí mëed, leñ dze co güeybee zhoo zha Babiloin grë zha Israel, beynie zho zho Babiloin.

¹² Babiloin, ga gol tib xpëed Jeconí brieelë Salatiel,

Salatiel goc pxoz Zorobabel.

¹³ Zorobabel goc pxoz Abiud,

Abiud goc pxoz Liaquim,

Liaquim goc pxoz Azor.

¹⁴ Azor goc pxoz Sadoc,

Sadoc goc pxoz Aquim,

Aquim goc pxoz Liud.

¹⁵ Liud goc pxoz Leazar,

Leazar goc pxoz Matán,

Matán goc pxoz Jacob.

¹⁶ Jacob co nagon goc pxoz José, men ne ptsieelnia Marí.

Marí goc xníaa Jesús, Men ne nacle diidz ga cxeel Dios guíaa lo guidzliu.

¹⁷ Zig choopchop bdziñ lo dii co, dzigoraa brieequia Jesús. Tsiida zho wban desde

Abraham haxta David; stsiida zho wban desde Salomón haxta leñ dze ne bey zho Babiloin; stsiida zho wban desde leñ dze co haxta bdziñ dze ne goc me mëed.

Gol Jesús

(Lc. 2:1-7)

¹⁸ Znu bzhaac Marí grop José leñ dze ne ziaadyob gal Jesús. Gard ctsieelnia Marí loxaque xtiidz me no ne laa me ycaa José, zeene bnabey Espiritu Sant pquialo tib mëed zdoo me.

¹⁹ Zeene bien Joséw, miñe been me gocladz me mazd nsaan me Marí; sac sca rnabey ley ni zienalpaa me miñe rnabey ley; per laa me gocladz zhlianse nzoizit me, sacne racladz me nríee xquieñto Marí.

²⁰ Zhgab co no me, tibaque blulo tib xanjl Dios lo me lo mcaal.

—José (xiag David) —rëb anjl co—, peet tsienied guic luu, pcaania Marí gac me tsiel luu; sac gon mëdyeen ne zoney me ga, Espiritu Sant bnabey pquialo win zdoo me.

²¹ Zeene gal dze ne laa win gal, JESUS cueelë luu win, sca grieelë win sac win csilaa grë menladz win lo dol.

²² Ga brieequia miñe bnee Dios padzeela, zeene bzeet zha ne biadne xtiidz mew, rëb zho:

²³ Bii zan to ganle zeene laa tib mëedbgui yquíaaalo zdoo tib wnaayeen ne gard gnee ngui lo.

Zeene laa win gal, Emanuel grieelë win.

(Emanuel nac zig nacne rnee ne: Dioszhal ziaad lo ne.)

²⁴ Zeene bna José laa guic me goc tibli; bin me xtiidz anjl co laa me ptsieelnia Marí.

²⁵ Laa me wban tipse grop me per ib bgaald me Marí, haxta bded dze ne laa mëdyeen co gol. Bdziñ dzew, laa win gol, dzigo bleelë José win JESUS.

2

Güeygan bla zha rac Jesús

¹ Tib guiedz win ne ndxie xtan Judé lë Belén, ga gol Jesús. Lëetse leñ dze co zob men ne lë Herod nac me rey ne rnabey dan co.

Goc palal dzew, laa bla zha ne runbey lo mel ziaad nëz ne rlan ngbidz bdziñ Jerusalén,

² bnabdiidz zho rëb zho:

—¿Pa lo dien no mëed ne gac men ne gnabey ladz to nu, mëed ne griñ gol ga? Bdziñ no tib mel nëz ne no no, mel co blu lo no laa win gol-le, miñ co ne ziaad no nu ziaaddzian no win.

³⁻⁴ Grë menguedz Jerusalén, zeene bin zhow bzee zdoo zho. Laa Herod, riendraa me zha guñ me, bnabey me pcaalsa grë zha ne nac pxoz non, grë zha ne rseed miech ley, bnabdiidz me lo zho dien pa lo nac diidz

gal Men ne nole diidz cxeel Dios guiaad lo guidzliu ga.

⁵ Dzigo rëbchaa zho lo me:

—Belén, guiedz ne ngab Judé ga none gal men co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho:

⁶ Tel Belén,

niicle ne winraaw lo grë guiedz ne ngab Judé, per nroob nona; sac gon ga grieequia tib men ne gnabey, men ne so yquiaanap grë men Israel, ne nac zho zha ne ngab lo naa.

⁷ Nacne zhlianse bnabey Herod gocredz gza zha rac co, bnabdiidz me lo zho dien blapaa dze rac psilo gon zho blan mel co.

⁸ Blozhse ga, dzigo pxeel me zho Belén, rëb me lo zho:

—Ga goltsie goltsieguib mëed co. Zigne gdziel to win, goltëniegash diidz lo naa nu, zeena ye naa ga gagan naa win.

⁹ Blozhse sca pso me diidz lo zho, laa zho bio nëz stib laa zho zie. Laa mel ne gon zho brieequia nëz ne ziaad zho ga, laa ma neraque lo zho; haxta bdziñ ma ngali guic yu ne no mëdeeen co, gataa laa ma blëz.

¹⁰⁻¹¹ Zeene gon zho laa mel co blëz ga, per nli rley zho. Bzëeb zho len yu co, gon zho laa mëdeeen co no ga grop xniaa win, dzigo pquiitsgzhib zho lo win, bnee zho tib xtiidz zho lo win. Blozh ga blee zho ncuuane zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgdz zho lo win.

¹² Zeene laa gza zha rac co wbi Belén, laa ne nieted zho Jerusalén, stible nëz bzhen zho zey zho; sac bnee Dios lo zho lo mcaal, rëb me tsienied zho diidz lo Herod.

¹³ Laa gza zha rac co zey, zeene güeylulo tib xanjl Dios lo José lëetse nixguies me, rëb anjl co lo me:

—José, na zeena guche i pcaanie mëdeeen qui nëz grop xniaa win, golsé nëz Egipt, sac laa Herod yquiaguib win gut me win. Egipt, ga cuëznie to win, na naaque guialnie diidz lo to zeene laa to ghi ga.

¹⁴ Guiel cogazh guche José, pcaanie me mëdeeen co nëz grop xniaa win, laa zho ziese nëz Egipt;

¹⁵ ga blëz me haxta bdziñ dze ne laa Herod gut. Ga brieequia mine bnee zha ne biadteed xtiidz Dios padzeela, zeene znu bnee zho: “Nëz Egipt no xpëed naa, zeene bredz naa me.”

Bnabey Herod gut grë mëedlas

¹⁶ Laa zeene gon Herod wbiredraa gza men rac co nienie zho diidz lo me, per ni blëe me. Ntseeb rac me, pxeel me zha ne güey Belén ni grëaa guiedz ne ndxie gax ga, güeygut zho grëse mëedbgui yeen ne no grë guiedz co, desde win ne golnëz, haxta win

ne rap chop iz. Tibaque nan me sca ngaa mëdeeen ne nac Jesús ga niet win, sac blee me cuent zhile gac chop iz psilo gon gza zha rac co blan mel co.

¹⁷ Guiel nëdox ne bio grë miech co, ga brieequia mine bzeet Jeremí men ne biadteed xtiidz Dios padzeela, zeene znu rëb me:

¹⁸ Tib redz nroob ne zëeb len guiedz Ramá.

Grë wnaa Judá, zha ne ziaad lo xtií Raquel, mbanse rac zho, roon zho no zho xquielnë xpëed zho;

zha rna zha ne choobladz zdoo zho, sac laa xpëed zho gut.

¹⁹ Goc palal dzew laa Herod gut, dzigo pxeel Dios tib xanjl me güeynee lo José lo mcaal zaatne no José nëz Egipt, rëb me lo José:

²⁰ —José, guche i, pcaanie mëdeeen qui nëz grop xniaa win, golbire nëz Israel stib; laa zha ne quiaal win ga gutle.

²¹ Dzigo brieenie José mëdeeen co ga grop xniaa win, bio me nëz laa me wbire zeynie win nëz Israel.

²² Per zeene bin José lëeque tib xpëed Herod men ne lë Arquelá, men co biaan xlugar Herod zobnabey xtan Judé, bdzieb José ndziñnie me mëdeeen co nëz co. Dzigo bneeque Dios lo me lo mcaal tsie me nëz Galilé.

²³ Gol zho Galilé, bdziñaque zho guiedz Nazaret, ga wbannie zho mëdeeen co. Ga brieequia mine bzeet grë zha ne biadteed xtiidz Dios padzeela, zeene rëb zho: men Nazaret guiab miech nac Jesús.

3

Psilo Juan Bautist noseed me miech

(Mr. 1:1-8; Lc. 3:1-9, 15-17; Jn. 1:19-28)

¹ Len dze ne psilo Juan Bautist noseed Juan miech xtan zha Judé, dan zit ne no me ga;

² rnee me lo zho:

—iGolsaan xquielntseeb to, golnab lo Dios gun me to perdon grëtaa dol ne ziyun to; sac gon laa dze bdziñle laa me csilo gnabey!

³ Lëe Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi men zëeb tib dan zit, rnee me:

“Golzhixcuua nëz ne ted mee ne rnabey,

golsaan grë guielntseeb ne run to.”

⁴ Niapse guits lad camell niaa xab Juan, guid nac ncuuane ndxie len me, ni niapse nguzhanch ni dzin dan row me.

⁵ Nzian grë men guiedz Jerusalén, grë men Judé, grë men ne no gax ro guiubee Jordán, rreee zho riequiaadiag zho zhiwseed me.

⁶ Grë zha ne rxobdol grëse xtol zho, dzigo rchoobnis me zho ro guiubee co.

⁷ Laa zeene ran me grë zha farisé, zha saducé ne rdziñ lo me ga racladz zho ye zho chobnis, dzigo rnee me lo zho:

—iMiech ngoopdol, masaque nac to zig nac mee! Nañ to na lëe, loxaque chobnis to laa to laale lo grë guieñdōx ne ziaadyob.

⁸ Led scada goñ, none zaacse gban to zeena glu nli dib zdoo to psaan to grë xquieñtseeb to.

⁹ Ni gacniatsde to guiab to loxaque por nace to xtií Abraham, laa Dios csilaale to; sac gneli naa lo to ganle telne gacladz Dios, haxta grë quie zac gnabey me tsaalow miech ne gac zha xtií Abraham.

¹⁰ Nanle to ganle, grë yag nex, zeene rquiad nex low led rruga, rlozh ga rliaala lo gui, ga reca. Scadaa nagon gdzieelo miech ne gband zigne racladz Dios, sac rrieequia laa me nzhenle xquiiyag me cchug me yag ne sca nac.

¹¹ Nli tib wrobnisse nu rnedz naa lo to, nacew zig tib señ, sac lëe gdib rluw laa to psaan xquieñtseeb to, laa to bzëeb xnëz Dios. Sangue meñ ne no guiaad ga, mesi Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa tib meñ non nac me, tel naa peet nond naa, per ni par tib ngundziin ne glit lab me raguiald naa gac naa.

¹² Laa me guiaad zig tib zha ne rbeeguizh zhoxtil, sac zha co rlozhse runmbe zho zho, rgotsow zhow, laa paj rielaal zho lo gui, ga reca. Per gui ne gzëeg grë paj ne guiadbee me ga, gdziñd dze guiuuw.

Brobnis Jesús

(Mr. 1:9-11; Lc. 3:21-22)

¹³ Len dze co briece Jesús nëz Galilé zie me nëz ro guiubee Jordán, laa me zie par cchoobnis Juan me. Bdziñ me

¹⁴ nëd Juan cchoobnis Juan me, rëb Juan lo me:

—Lëda i goñ, naa none guial lo luu cchoobnis luu naa.

¹⁵ Dzigo rëb me lo Juan:

—Nli scaw, per mazd pchoobnis naa, sac goñ ib nonguiela dziuuñ ne miñe rnabey Dios.

Dzigoraa pchoobnis Juan me.

¹⁶ Laa me zieriee lo nis zeene laa zhan gbaa bzhial, gonpaa me zig rlu tib palom rlu Espiritu Sant laa me ziad-zëeb bdziñ me guic me,

¹⁷ ni blu zëeb tib tsi meñ co nëz gbaa rnee me:

—Xpëed naa goñ nac meñ qui, rleynie naa me, meñ nziuu nac me lo naa.

4

Gocladz mendox niungüet ma Jesús
(Mr. 1:12-13; Lc. 4:1-13)

¹ Zeene blozh brobnis Jesús, dzigo güeynie Espiritu Sant me tib dan zit, zaatne guieñd miech; ga gocladz mendox niungüet ma me niun me miñe racladz ma.

² Zeene goc choo ngbidz choo guieel no me dan co ni tib lë peet rowd me, laa me pcaabedz

³ hor co bdziñ mendox zaatne no me ga, rëb ma:

—Telne nli Xpëed Dios nac luu, bnabey tsaalo grë quie rii ncuaañe gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guieñwagwe.”

⁵ Blozh ga güeynie ma me Jerusalén, blep ma me glaa guic yadoo nroob ne zob lad guiedz co,

⁶ rëb ma lo me:

—Telne nli Xpëed Dios nac luu, bringaa nu, benque led znu zhobnee lo Xtiidz Dios: “Znabey Dios grë xanj l me yquiaanap luu, zha queedz luu, zeena ni tib quie ycaand ni luu.”

⁷ Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bien, Dios nac meñ ne rnabey luu, nodne quitnie luu me gnab luu lo me ncuaañe nod gun me.”

⁸ Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaañ ndaan ne rap tib tib guiedz co,

⁹ rëb ma lo me:

—Bui ganle, grëse ncuaañ qui goñ gnedz naa lo luu telne squitsgzhib luu lo naa nina, gunnon luu naa.

¹⁰ Horco pquiab me rëb me lo ma:

—iBiche lo naa nu mendox! Znu gon zhobnee lo Xtiidz Dios: “Diosse nac meñ ne rnabey, mese none gunnon luu, lo me rieguial yquitsgzhib luu; ni miñe rnabey me miñ co none gun luu.”

¹¹ Dzigoraa biche ma lo me, dzigo bdziñ bla anjl bdeed zho ncuaañe dow me.

Psilo Jesús pseed me miech nëz Galilé

(Mr. 1:14-15; Lc. 4:14-15)

¹² Zeene bin Jesús laa Juan biab ladzguiib, dzigo briece me ga güey me nëz Galilé, guiedz ne lë Nazaret.

¹³ Zhisaque goca, brieque me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtií Zabulón ni zha xtií Neftalí.

¹⁴ Ga briequia miñe bzeet Isá (meñ ne pxeeñ Dios padzeela biadnee xtiidz me), zeene psiaab Dios guic Isá rëb Isá:

¹⁵ Grëse menzit ne ndxie xtan Galilé, nëz dan ro guiubee Jordán, gax ro Nisdoo Galilé, zaatne goccheñ Zabulón ni Neftalí;

16 miech ne no lo ncow nac zho, per niina tib biini nroob biab lo zho. Ladzniale guielgut no zho, per laa biini co biab lo zho par greee zho ga.

17 Ga psilo Jesús pseed me miech, rnee me lo zho csaan zho xquieIntseeb zho, gbig zho lo Dios, sac laa dze ne csilo gnabey Dios ziaadgaxle.

*Bredz Jesús tap ngoozmel
(Mr. 1:16-20; Lc. 5:1-11)*

18 Len dze co, tib dze zieded Jesús gax ro Nisdoo Galilé gon me chop ngoozmel, tib zho lè Simón Pedr, stib zho lè Ndrés; grop bets zho lèetse laa zho noron guie x ne rgaa mel lo nis.

19 Dzigo bredz me zho, rëb me lo zho: —jGoltë goltënał zhiits naa! jLaa naa cxel to tsie to stib gooz, tsietop to grë miech ne sëëb xnëz Dios!

20 Horcogazh psan zho guie x ne rgaa mel ga, laa zho zienal zhiits me.

21 Zhisaque bzë me ro nis co, gon me laa Jacob ni Juan (lëë grop xingan men ne lë Zebedé ga) no tib len barcw gza pxoz zho, noquiaabdie zho guie x ne rgaa mel; dzigo bredz me zho.

22 Zigne bredz me zho biaannieque pxoz zho barcw ga, laa zho zienal zhiits me.

Zëëb diidz grëtaa milagr ne run Jesús

23 Dipse xtan zha Galilé, guiedz ne rdziñtaa Jesús rie me grë yadoo ne zob lad guiedz co rseed me miech Xtiidz Dios, rnee me lo zho zha racladz Dios gban zho, ni runguiaac me grë men rzacné, tel pe guielguidztaa rzac zho.

24 Tel pa lotaaw zëëb diidz scataa run me grë milagr, haxta nëz Siria bin miecha. Nzian grë men co briece ga bdziñnie zho grë zhinguidz zho lo me; no grë men rzacné co noguitnie mendox, no zho rlan guielguidz gutye, no zho gutoo dipse xcuerp, no zho rlan grë pe stib guielguidz, nogaa zho rlan grë pe yoob; grëse zho beenguiac me zho.

25 Zaatne zieetaa me, miech guizhiu ne nał zhiits me, grë zha Galilé, grë zha Decápolis, grë zha Jerusalén, grë zha Judé, haxta grë zha ne no stib nëz ro guieube Jordán.

5

*Cho nac zha ne wen zie
(Lc. 6:20-23)*

1 Tib dzew, gon Jesús laa grë miech guizhiu co bdziñ lo me, dzigo bzoquia me glaa tib guic gui win. Ga zob me, bdziñ grë xpëëdsuel me lo me,

2 dzigo psilo me pseed me zho, rëb me:

3 —jWen zie zha ne rien ib none gbig zho lo Dios, sac ib zdziñ zho zaatne rnabey me!

4 jWen zie zha ne mban rac roon niina, sac schoobladz Dios zdoo zho!

5 jWen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

6 jWen zie zha ne racladz gun grë mine rnabey Dios, rzac zhow zigne rzac zha ne rcaabedz, zha ne rnabgaa zhis, sac ible zancie Dios zho parne grielo gun zhow!

7 jWen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

8 jWen zie zha ne mbele zdoo, zha ne biaanmbele lo xtoł, sac zanlo zho Dios!

9 jWen zie zha ne noxco zaacse gban miech, tild zho, sac masaque mëed gac zho lo Dios!

10 jWen zie zha ne loxaque porne quiayun zho mine rnabey Dios, rquianał miech zho, sac ible zdziñ zho zaatne rnabey me!

11 Zig nac to, zeene csilo grë miech yquiaago zho to, ctsidil zho to, yquiadiidzguizh zho to loxaque ne riladz to naa, jwen zie to ga!

12 jNley golco zdoo to, nguieel golgac, sac gon tib guieInzaac nroob ne gneedz Dios lo to! Golsoladz ganle, scaque been zho grë zha ne pxeel me padzeela biadnee xtiidz me.

*Nac to zig nac zed, zig nac biini
(Mr. 9:50; Lc. 14:34-35)*

13 Masaque nac to lo guidzliu rii zig nac zed. Nanle to ganle pa lotaa rquien zed, per telne nzhida, ¿pa dieñ rquiina? jLëë gdib rliaała lo guizh, zaatne rded rzë miech rzëëni zhow!

14 Nac to zig tib biini ne noziini lo guidzliu. Grieeled tsongueets to, sac tib guiedz ne ndxie glaa tib guic gui, grieeled tsongueetsa.

15 Golguen ganle nacd biini parne tsolana, sinque parne gziiniw lo grë miech ne no len yu.

16 Zaacse sca golgac, mine rquien min co golgun, masaque lëew gac zig tib biini; zeena zeene gan miech biini co zien zho ganle pa lotaa men nroob nac Pxo to men ne no gbaa.

17 Guiabde to togo bod laa naa zial zialtichee naa ley ne psan Moisés, o grëgaa mine bnee zha ne biadteed xtiidz Dios padzeela; sac led mincod zial naa, sinque laa naa zial gun naaw zigne no gaca.

18 Gneli naa lo to ganle: Laga niaa guidzliu rii, laga niaa gbaa, ib none gac mine zhobnee lo ley, mine bneegaa zha ne biadteed xtiidz Dios, ni tib lë paat gdzëëda.

19 Gacxe waa zha ne quuits tib ley niicle mine mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo grë zha ne yгаа zaatne rnabey Dios. Sangue zha ne gūna zigne rnabeya, ni cseed zho miech scaque

tsienal zhow, zha cosi nroob gacnon zho lo grè zha ne gdziñ zaatne rnabey Dios.

²⁰ 'Rso naa diidz lo to sca, zaacse golgac gunde to zigne run grè maistr ley, grè zha farisë; sac telne tsoxcode to gban to zigne racladz Dios, grielod gdziñ to zaatne rnabey me.

*Nodne gut miech
(Lc. 12:57-59)*

²¹ 'Led nanle to ganle, no tib ley ne biaan lo xmengol to padzeela, rneew: "Gute luu samiech luu"; rnabeya zha ne gut samiech, ib none guetaque zho, quizhgazh zho dol co.

²² Sca rnee ley co, per zig nac zha ne gon nè rac zdoo ran samiech, rreequia beetle zho ga, ye zho rieguial quizh falt co. Zig nac zha ne gnee pe tib diidznè lo samiech, none gacredz zho lo wxtis zeena gunquizh zho zho dol co; zha ne quieгаа samiech, lèèque zha rguib guey zho gabil ga.

²³ 'Gacxe waa tel ziesan to tib gon, per lo pcoogle zo to rsoladz to rdilnie to tib samiech to,

²⁴ gase golsan gon co, goltsie goltsienabgazh perdon lo zha ne rlèe to lo ga, gbireraa to dzigo gdeed to gon co.

²⁵ Zha ne sca rlèenie to, goltsoxco pront golguiaan wen; zeena tsiezod zho to lo wxtis, sac tel laa zho tsiezo to lo wxtis ib znabey wxtis tso to ladzguib.

²⁶ Gneli naa lo to ganle grieede to ga, haxtaque lozh quizh to grè dimi ne gnab wxtis lo to.

Nodne tsonie miech zha ne led tsieeld zho

²⁷ 'Nanlaque to ganle zha rnee stib ley ne biaan lo xmengol to, rneew: "Zha ne nole tsieel, zigtaa mguiw zigtaa wnaaw, nodne tsonie zho zha ne led tsieeld zho."

²⁸ Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹ 'Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib lèque xcuerp to, lèdle dib nacsew tsietosobe gabil.

³⁰ Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, lèdle nitlo to len gabil dib nacse xcuerp to.

*Nodne csèbtsieel miech
(Mt. 19:9; Mr. 10:11-12; Lc. 16:18)*

³¹ 'No stib ley znu rnee: "Mgui ne racladz csaan tsieel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa."

³² Per gni naa lo to ganle: telne quiangobd tsieel zho stib mgui, ni rsèbtsieel zho, lèèque zha rguib ga yquianie tsieel zho stib mgui.

Mgui ne ctsieelnia wnaa co, dol ga gun zho, sac gon nole tsieel wnaa co.

Nodne yquidie miech

³³ 'Ziyon to ganle zha nac stib ley ne biaan lo xmengol to rneew: "Zha ne gzeet lè Dios par glu zun zho mine bnee zho, yase zeene gdeed zho tib gona, gungaa zho pe tib dziina, ib none gun zhow."

³⁴ Per gni naa lo to ganle: nodne sca gzeet to lè Dios, per ni gbaa nodne ne sca gzeet to, sac gon ga nac zaatne zob Dios;

³⁵ per ni guidzliu, sac lo guidzliu nac zaatne zo ni me; per ni Jerusalén, sac ga nac guiedz nroob ne rnabey me;

³⁶ guiaabgaa to gzeet to guic to. Gunscade to, sac gon zig nac guic to, per ni tib guits-guic to grielod csaan nquits to, grielodgaa csaan ngas tow.

³⁷ Gacxe waa ncuaane rgobey to zriello gun to, golguiab: "zun naaw", togo riengaa to grieloda, golguiab: "grieloda"; tso to dieen cho gzeet to, sac gon led Diosdraa rnabey min co.

*Nodne ctsire miech guielnè
(Lc. 6:27-36)*

³⁸ 'No stib ley znu rnee: "Tel cuee zho tib bziaalo luu, guiaan luu scase bleecue stib bziaalo zho, tel cueegaa zho tib lay luu, scaque been blee stib lay zho."

³⁹ Sangue naa laa naa rso diidz lo to gon, gunscade to; zha ne gacntseeb lo to, gacndaande to lo zho. Tel cap zho lo to, tiblise golgac, ib gunde to glisaaque nia to.

⁴⁰ 'Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnal to goldeed lo zho.

⁴¹ Zeene grieequia zha ne gnabey to güey to xyo zho tib grol hor, golgüeya, haxta tib hor goltsie güey tow.

⁴² Zha ne gnabtaa pe cos lo to, goldeeda; zig nac zha ne ziadtiin, goldeed ncuaane ziadtiin zho, ctsirede to zho scase.

⁴³ 'Ziyonle to ganle no zha ne znu rnee: "Zha ne rdzieel xtiidz luu bleyne zho, scagaa zha ne rlèe lo luu, blèenie zho."

⁴⁴ Per led scada gon, jnone zaacse gac to lo zha ne rlèe lo to! jZha ne rgodee to, golnab lo Dios gunlay me zho!

⁴⁵ Zeena sca glu nli xpèed men ne zob gbaa nac to. Golgan ganle tel me rnabey me rziini ngbidz lo grèse miech, zigtaa lo zha wena, zigtagaa lo zha ntseeba; scaque nisguie me rsiaaba rquiin zho grèse zho, rbed me dien cho ngable lo me, chogaa ngabd lo me.

⁴⁶ jGase nasca golwi! Tel loxaque zha ne ndzieeldiidz to zha cose rleyne to, jniacxe zgaa to guielnzaac ne gdeed Dios? Haxta zha ne mazdraa ntseeb run min co.

⁴⁷ Tel loxaque zha ne nacse menlidz to, lo zha cose zaacse rnee to, jpe lèè guielwen ga

na rlu to? Haxta zha ne runbeyd Dios run min co.

⁴⁸ Goltsoxco sca ndzinli golgac, zigne rleynie PxoZ to (men ne zob gbaa) grëse miech, scaque none gun to.

6

Zha ne run xyudar samiech

¹ Zeene gun to xyudar samiech to, ib gunde to zaatne ndxiepa miech ga so to glu to xquielwen to, par gan zho mine run to. Telne sca gun to, ygaade to guielnzaac ne gdeed PxoZ to men ne zob gbaa.

² Gacxe waa, zeene gun to xyudar zha ne guieñd pe yquini, gooldide tow zigne run grë zha ne rquiaalo rquia zdoos samiech; sac zha co tel pe ncuane rgad zho, rzo zho len yadoo, rzo zho ro nëz rlozhd yquiaabdzie zhow par gacnanpaa miecha, zeena zha ne gona guiab zho: jZha wentaa zha qui! jGneli naa lo to ganle ne sca rianzniu zho lo miech, lëele gdib guielnzaac ne yгаа zho ga!

³ Golguien sca, zeene gun to xyudar zha ne no tib liaadz, choot lo gzodiidzde tow, per ni zha ne mazdraa ndzieeldidz to nodne gacnaa.

⁴ Dzigo scagaa PxoZ to nroob guielnzaac ne gneedz me lo to, sac tel me grësew ran me.

Zha gzodiidznie miech Dios

(Lc. 11:2-4, 34-36; 12:22-31, 33-34; 16:13)

⁵ Scaque zeene gzodiidznie to me, gunde to zigne run grë zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganpaa miech zho, zig nac len yadoo, zig nac len guiedz zaatne rded rzë miech. Gneli naa lo to ganle lëele guielnzaac ne yгаа zho ga.

⁶ Golguien zeene gzodiidznie to me, golsëeb len lidz to dziits golsioog ro yu, ga golzodiidznie me. Ible tedsod nroob guielnzaac gneedz me lo to, sac niicle ncuane mazdraa ngeets zhliana, ran mew.

⁷ Ni zeene nozodiidznie to me, gunde to ncuane nonee to lëew rlozh, lëew rsilo zigne run grë zha ne runbeyd me. Sac zha co rzac zho por nroob didz gnee zho, por nzian vuelt gnee zhow dzigo squiaadiag mew.

⁸ Gunscade to, sac me ne nac me PxoZ to gardle gnee to xliaadz to lo me laa me nanle pe nac ncuane rquini to.

⁹ Gacxe waa zeene gzodiidznie to me, znu golnee:

Dios, luu ne nac luu PxoZ no, zob luu gbaa; luuse nac men ne mazdraa ndzon.

¹⁰ Luu nac men ne gnabey no, mine gnabeyta luu zigne raca gbaa, scaque none gaca lo guidzliu nu.

¹¹ Been guielnzaac bneedz ncuane dioow no nadze.

¹² Bzhiguiel been ne perdon grëse dol ne ziodziuuñ no lo luu,

zigne rdziuuñ no samiech no perdon grë falt ne run zho lo no.

¹³ Gdeete luu diidz yquii men dox no, been guielnzaac bla no lo ma.

Luu nac men ne rnabey, men ne rap poder, men ne mazdraa nroob. Mine rnab no nu, ndionpaa no zun luuw.

¹⁴ Sca nagon none gnee to. Ni golgona ganle, zha ne gon gun samiech zho perdon tel pe nactaa falt ne been zho lo zho, scaque PxoZ to men ne zob gbaa, zun me zho perdon.

¹⁵ Zha ne gund samiech zho perdon, niicle megaa gund me perdon xtol zho.

¹⁶ Stiba, zeene nocuan to nozodiidznie to me, gunbande to lo to. Sac grë zha ne rquiaalo miech wen nac zho, sca run zho; zeene nocuan zho xtsiinpaa run zho runmban zho lo zho par gan miech laa zho nocuan. Gneli naa lo to ganle, zha ne sca run lëele guielnzaac ne yгаа zho ga.

¹⁷⁻¹⁸ Gunscade to, nguieel golgac ine golzëe biegw guic to, golquib lo to, zeena ni tib choot guieñd laa to nocuan, loxaque PxoZ to gacnaa, sac grëse ncuane rac ngeuets ran mew. Grëse ncuane rac, me raña, me nac men ne gneedz tib guielnzaac nroob lo to.

¹⁹ Tsienalde to loxaque dien zha gapchen to lo guidzliu rii, sac nac ncuane lo guidzliu rii rban ngbaana, rnitlo mxila, haxta noxtseeb guioochena.

²⁰ Mazd goltsoxco yгаа to guielnzaac ndzon ne no gbaa, sac mine no gbaa, led yed min co guioochen, led yed min co cuan ngbaan, led yedgaaw gnitlo mxil.

²¹ Golgona ganle, guielnzaac ne gon gunlo to, ga glu pa gdziñ xalm to, sac zaatne gunlo to guielnzaac co ga nac zaatne gdziñ xalm to.

²² Rriequia nac bziaalo to zig nac tib biini. Telne niapse lo grë ncuane ndzinli rwi to, dzigo gdipse xcuerp to no lo guielbiini.

²³ Laa telne loxaque lo grë ncuane nonguieñd rwi to, dzigo gdipse xcuerp to no lo guielcow ga. jZha rnazhe lo guielcow co, tel lëeque biini noyac guielcow!

²⁴ Golgona ganle, grielod gon gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

²⁵ Gacxe waa, gni naa lo to ganle: Tsoode to zhgab dien zha gban to lo guidzliu rii, pa griepe pe gow to, pe guie to, pe gacwxabgaa to. Stiba, znacxe mazdraa non guielwagw lo xquielmban to? Xabgaa tow, znacxe mazdraa nona lo xcuerp to?

²⁶ Golwi lo grë mguin ganle, led yed ma rquia gon, led yed ma rquia wlaap, led yed ma rgotsow pe guielgon, per row ma, sac PxoZ to men ne zob gbaa, men co rdeed

ncuaane row ma. jTel to gon, mazdraa non to lo gre mguin co!

²⁷ Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, zniacxe zrieelo to gunnool tow?

²⁸ 'Zig nac lar, zpe nacne tant tso to zhgab dien pe gacwxab to? Pe rwide to lo gre guiee ne ganle zeeb dan, zha rrooba, led yeda rio zhgab dien zha gacwxaba, per niow rnaw;

²⁹ gni naa lo to ganle, per ni rey Salomon con gre xab niazh me, blud me scataa niow.

³⁰ 'Gase na ganle golwi, niicxe gre guiee dan co na, zna dze zob nguiaw, gzhe widz laaw bidzle, laaw tsecle, ni scataa niow rgacwxab Diosa, zpe lel to dzigo ygacwxabd me, niicle ne squi gard guien to dib zdo to gnalo to me?

³¹ 'Tsoe to zhgab sca guiab to: "zBay pa griee pe diioow ne, pa griee pe dio ne, pa griee pe dziaacwxab ne?"

³² Gre miech ne runbeyd Dios, tibaque zhgab co rio zho. Sangue to golsoladz ganle, Pxoz to men ne zob gbaa, nanle me pe nac gre xliaadz to,

³³ me nac men ne gneedz ncuaane yquiin to, per ib none glo tsoxco to gban to zigne rnabey me.

³⁴ Golguien sca tsoe to zhgab dien zha ted to gzhe widz, sac gzhe widz co zhaalae xco ne ziaad. Tib tib dze zhaase zhaase zhgab ne ziaadniew.

7

*Nodne gzee zdoe ne cho zha rac
(Lc. 6:37-38, 41-42)*

¹ Blozh ga rebchaa me lo zho:

—Golguien, ib gunde to ne gac zdoe to zeene ran to ncuaan nonguield ne run stib miech, sac to tozhal gunquizh zhow; zeena scagaa Dios, gunscad me to.

² Sac gon tel zha rzac to samiech to, scasaque sac Dios to.

³ jLeda ga gon tso to lozhd gzee zdoe to dien cho pe run, ni nenda mazdraa mine run to!

⁴ zPe ro to glisqui to mine run stib zho, ni tel mazdraa nac mine run to?

⁵ jGolguien sca glude to ncuaane nacde to! Glo goltsoxco ndzinli gac to, dzigo lozh ga zac tsiene to lo stib zho zha gacndzinli zho.

⁶ 'Ndzon nac Xtiidz Dios, gdeete tow lo zha ne rleeniew, sac gon rriequia lo mecw ga gdeed tow, ib zun zho mine run mecw zactseeb zho lo to. Naca zig nac quie perl, gdeete tow lo zha ne rleynieda, sac gon rriequia lo nguts ga gdeed tow, tel ngutsa niicle ncuaane mazdraa non glaal zho lo ma, loxaque gzeeni maw.

Ncuaane gnabtaa ne zгаа new

(Mr. 1:22; Lc. 6:31, 43-44, 47-49; 11:9-13; 13:24-27)

⁷ 'Ncuaane rquiin to, golnaba lo Dios, sca-gaa me zneedz mew. Golguib tel pe racladz to, me nac men ne gacnie to gdziel tow. Golcuedzle me, scagaa me scaania me to.

⁸ Sac grese zha ne rbig lo me rnab zho ncuaane rquiin zho, rdeed mew. Zha ne rguib ncuaane racladz, racnie me zho rdziel zhow. Zha ne rbedzle me, rcaania me zho.

⁹ 'Golwi ganle, zig nac to zeene rnab xpeed to guiet gow win, zniacxe ziazh to co to tib quie nia win?

¹⁰ Zeene rnabgaa win mel, zniacxe zdeed to tib meel lo win?

¹¹ Led rioxco to lee niapse ncuaane wen rdeed to lo xpeed to, niicle ne miech ntseeb nac to. Telne sca rioxco to xpeed to, pelej Pxoz to dzigo, men ne zob gbaa, tsoxcod me to. Ib tedsod grese zha ne gnab lo me gdeed me ncuaane rquiin zho, zdeed mew.

¹² 'Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisesa, zigtagaa mine bnee gre zha ne biadteed xtiidz Dios padzeelaw, sca rnabeya.

¹³⁻¹⁴ 'Goltsoxco sca tsienal to mine rnabey Dios, niicle ne nac guielmban co zig nac zeene rzé ne tib nez nia. Zhis zha ne rzeeb nez co, per nez co zгаа miech guielmban ndzon ne rdeed Dios. Sac gon zha ne mban zigne notaa guic zho, rriequia tib nez nzhen ga zie zho; ndal miech ne zie nez co, per nez ne nitlo zho ga zie zho.

¹⁵ 'Nsin golso lo zha ne gacladz yquidie to gne zho xtiidz Dios noteed zho, niicle ndooladz rlu zho pale cho gre mecwxil yeen, per zha ntseeba, masaque nac zho zig gre coyot ble.

¹⁶ Zigne runbey miech tib yag por nex ne rquia low, scaque wen wen golwi zha nac ncuaane run zho, dzigo ga gunbey to cho nac zho. Sac gon zig nac uv, rquiada lo yag guiets; niicle guigwgaaw rquiada lo gre lbé guiets.

¹⁷ Tib tib yag nex rdeedsew xnexa. Tib yag wen, nex wen rquia low; scagaa yag ncuaana, nex ncuaan rquia low.

¹⁸ Grielod yquia nex ncuaan tib lo yag ne rquia nex wen, ni grielodgaa yquia nex wen tib lo yag ncuaan.

¹⁹ Gacxe waa gre yag ne rquia nex ncuaan, paat rquiinda, lee gdib rruga, rlozh ga rzeeg zhow.

²⁰ Min co nagon rne naa lo to, zha ne sca guiaad, por ncuaane run zho ga gunbey to cho nac zho.

²¹ 'Gre zha ne rnee noxco zho mine rnabey Dios, no zho lega rneesew. Nenda haxta rnee zho, naa nac men ne rnabey zho, per gdzind zho zaatne rnabey Pxoz naa. Sac

zha ne nli-paa run minē rnabey me, zha cose gdziŋ ga.

²² Gaḷ dze co, nzian zha ne grieequia gnē lo naa: “Conque rdziunbey no luu, blactaa name bio no bionee no Xtiiḏz luu lo miech, nzian milagr ne bdziun no, haxta menḏox bdziunxoon no zeene bzeet no lē luu.”

²³ Niicle sca gnē zho, ib ycaaniad naa zho, sonēz naa zho; sac ni lalnu beend zho ncuuane ndzinli.

²⁴ ‘Zha ne rquiaadiag minē rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie.

²⁵ Niicle riab guiedox per peet racd lidz zho, niicle rriee medox, nis naal ne raclo rded zaatne zoba ga, per rbixcheda.

²⁶ ‘Laa grē zha ne rquiaadiag xtidz naa, ni rioxcod zho gban zhow zigne naca, ziaad gag zho ga zig tib zha nxen ne güeyzoob lidz zaatne nac tib lo yuzh.

²⁷ Znuse bnitlo lidz zho, sac zeene biab guiedox, lo medox ne brieē, lo nis naal ne goclo bded zaatne zoba, znuse bixchew, ni stib lēw biaand.

²⁸ Zeene blozh bnee Jesús, grē miech ne noquiaadiag ga, per nli rzee zdoo zho gon zho zha rseed me,

²⁹ sac rlu men rnabey nac me, led yed me rseed miech zig rseed grē maistr ley.

8

*Biac tib mgui ne rlan lepr
(Mr. 1:40-45; Lc. 5:12-16)*

¹ Laa Jesús ziad-zēb cho gui win co, miech guizhiu ne naḷ zhits me,

² tibaque brieequia tib mgui ne rlan guiedzdox ne lē lepr, wbig me pquitsgzhib me lo Jesús, rēb me:

—Tebaa siguiēl luu guŋguiaac luu naa.

³ Dzigo pxobnia Jesús guic mgui, rēb Jesús: —Zuŋguiaac naa luu. ¡Niinagazh laa luu guiaanmbel!

Horcogazha laa grē guiedz co bnitlo.

⁴ Dzigo rēbchaa Jesús lo me:

—Bina ganle, choot lo gzodiiḏz luu gon zha biac luu; sinque güey lo pxoz güeyan gon ne rieguiaḷ gdeed luu zigne rnabey ley ne psan Moisés, zeena gan zho ganle laa luu biacle.

*Biac tib zha ne rquia dziin tib lo menguiib
(Lc. 7:1-10)*

⁵ Loxaque bdziŋ Jesús guiedz Capernaum, laa tib men ne rnabey lo xmenḡuiib zha Roma bdziŋle lo me, rnab men co guŋguiaac Jesús tib zha ne quia xtsiin me, rēb me:

⁶ —Been tib guielnzaac beenguiac tib zha ne rquia xtsin naa, laa zho nix lidz naa ib gacd griaḷ zho, mban rac zho yoobdox ne rquia zho.

⁷ Dzigo rēbchaa Jesús:

—Peet nacda, na sē naa guio ne guŋguiaac naa zho.

⁸ —Coo —rēb menḡuiib co—, rieguiaḷd csodziin naa luu sēē luu haxta lidz naa. Nanpaa naa zrieelo luu nugazh gnabey luu guiaac zho.

⁹ Sac zig nac naa no zha ne rnabey lo naa, ni ron naa minē rnabey zho; scagaa telḡ guiep naa tib lo zhaguiib ne rnabey naa: “Güey nu”, rie zho; rnegaa naa: “Dē nu”, riaad zho; zha ne runгаа dziin lo naaw, minē rnabeytaa naa zho, run zhow. Scaque luu nagon nanpaa naa zrieelo sca gnabey luu guiaac xmoz naa.

¹⁰ Zeene gon Jesús sca rnee men co, rley me, rēb me lo grē zha ne zienal zhits me ga: —Lo grē zha Israel, gard gon gan naa tib zha ne squitaa dib zdoo rnalō Dios.

¹¹ Ni golquiaadiaga ganle, zdziŋ dze grēle zha zit ne squi gnalo Dios, zha co ygaa sobnie Abraham, sobnie Isaac ni Jacob zaatne rnabey Dios.

¹² Laa grē zha Israel, niicle nac zho zha ne nac diidz gdziŋ ga, lel lo ncow nēz ley guiaan zho, ga tso zho goonnē zho, haxta gow lay zho lo guielnēdox co.

¹³ Blozh ga rēbchaa me lo menguiib co:

—Bzē nasca, gocnan ganle zigne bliladzse luu guiaac xmoz luu, sca gaca.

Horcogazha laa moz co biac.

*Biac xniadzoop Pedr
(Mr. 1:29-34; Lc. 4:38-41)*

¹⁴ Laa zeene bdziŋ Jesús lidz Pedr, gon me laa xniadzoop Pedr nix rlan xlēē.

¹⁵ Dzigo bded me zaatne nix zhuz co, zigne bzheŋ me nia zhuz laa xlēē co blēz. Horcogazh guche zhuz beenlo zhuz ncuuane dow zho.

¹⁶ Ziedzele dzew, laa ngbidz rzēēblew, zeene bdziŋ grē miech co, nzian grē zha ne nosacsi menḏox bdziŋnie zho lo me. Grēse zho beenguiac me, goctox me lo grē menḏox ne nosacsi zho ga, benḡxoon me ma; ni zha ne rlangaa pe stib guielḡuidz, grēse zho beenguiac me.

¹⁷ Ga brieequia minē bzeet Isá, men ne biadteed xtidz Dios lo miech padzeela, zeene rēb me: “Grēse xquielnē ne, grēse guielḡuidz ne rziac ne, me biw.”

*Zha ne racladz sēēb xnēz Jesús
(Mr. 4:35-41; Lc. 8:22-25; 9:57-62)*

¹⁸ Zeene gon Jesús scataa ndal miech ne goclo lo me ga, dzigo bnabey me xpēēdscuel me gzhixcuuaa zho, sac laa zho no tedquia stib nēz ro nisdoō co.

¹⁹ Dzigo wbig tib men ne nac maistr ley lo me, rēb maistr co:

—Zaatne tsietaa luu gon, sēnal naa zhits luu.

²⁰ Dzigo rēbchaa me:

—Gocnana ganle, naa ne nac naa Mgui ne pxeel Dios, peet rapd naa nu, mazd zig nac grè mèz, grè mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

²¹ Wbigaque stib zha ne rzènal le zhits me, rëb zho:

—Ye naa gon sènal naa zhits luu, per bzhiguie l bneedz diidz bey cuèz naa gangazh naa tsoliu pxoz naa.

²² Pguiab me rëb me:

—Dènal zhits naa. Psaan, nzian grè zha gut no, tsow tsiequeets zho samengut zho.

²³ Dzigo laa me bzèëbnie xpèèdscuel me tib len barcw, laa zho zie.

²⁴⁻²⁵ Laa zho zie lo nis co, tibaque zeene psilo brieet tib medox, masaque rlis me lo nis co, laaw psilo rzèeb len barcw. Dzigo lèèlèd güey zho güeycuaan zho me, sac lèètaque nixguies me.

—Ligier ganle —rëb zho—, blee mcaal lo luu. ¡Bui ganle laa ne nitlo lo nis rii, csaand luu guet ne nu!

²⁶ Dzigo rëbchaa me lo zho:

—¿Pe nacne squitaa rdzieb to? ¡Gardaque dzigo lèè gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blèz me co, niicle nis cow laaw bredze.

²⁷ Zeene gon zhow, bzee zdoo zho.

—Bay chozhe waa nac men rii —rnee zho—. ¿Zha nac ne haxta me, haxta nis ron xtiidz me?

Men Gadar ne nosacsi mendox
(Mr 5:1-20; Lc 8:26-39)

²⁸ Laa zho bdziñdze stib nèz ro nisdo co, zaatne nac xtan zha Gadar, zeene brieequia chop mgui ne nosacsi mendox, bdziñ lo Jesús ga. Zha ntseeba, rdzieb miech zho, choot rdete nèz co. Len baa brieet grop mgui co bdziñ zho ga,

²⁹ nguiedz roptsie zho rnee zho:

—¡Peet gund luu no Jesús, psaan no! Rdziunbey no luu, Xpèèd Dios nac luu. Ne nli-gaa been guie l nzaac csacsid luu no niinaga.

³⁰⁻³¹ Zitlaaque ga ndxie tib dzoon nguts notop lag, dzigo bnaab grè mendox co lo Jesús rëb ma:

—Telne cuee luu no nu, bzhiguie l bneedz diidz lose grè nguts qui gdziin no.

³² —Niinaga sca go ltsie —rëb me.

Zigne psaan mendox co grop mgui co, güey ma bdziñ ma lo grè nguts co. Horco psilo grè nguts co, rquiaa ma corr güeypix ma tib ro yeedox ne quia ro nisdo co, bliiaal ma lo nis, grèse ma gut.

³³ Zha ne quianap grè nguts co, gzase zho bzhooñ. Güey zho lad guiedz güeyzodiidz zho zha goc grè nguts co, ni bzodiidz zho zha biac grop mgui ne nosacsi mendox ga.

³⁴ Grèse miech co, brieet zho zieso zho. Zeene bdziñ zho gon zho laa Jesús zo ga, dzigo bnaab zho lo me siguie l me gbi me xtan zho.

9

Biac tib men ne gutoo
(Mr 2:1-12; Lc 5:17-26)

¹ Dzigo whiireque bzèeb zho len barcw, bdziñ zho guiedz Capernaum stib, sac ga nac zaatne rbèz Jesús len dze co.

² Zhisaque goc bdziñ me, laa zho bdziñniele tib men rzacné lo me, dipse men co gutoo, ib gacd sé me. Lo yag zhoob me bdziñnie zho me ga.

Zeene gon Jesús dib zdoo grè zha co rnalo zho ne me gunguiaac men rzacné co, rëbchaa me lo men rzacné co:

—¡Nley bloo zdoo luu xin! ¡Laa naa benle perdon grèse xto l luu!

³ Ga zob blalaa maistr ley, zeene gon zho sca bnee me, bza zdoo zho rëb zho: “¡Quia-guitnie men qui Dios gon squi rzé xtiidz me!”

⁴ Bienga Jesús sca rza zdoo zho, dzigo rëbchaa me:

—Lèda i gon squi rza zdoo to.

⁵ Nli nganda guiab ne lo miech: “Laa naa benle perdon grèse xto l luu”; per grieelod lega guiab ne laa ne gunguiaac zho.

⁶ Gacnan to sca ganle naa ne nac naa Mgui ne pxeel Dios, ible rap naa poder par gun naa miech perdon.

Dzigo rëbchaa me lo men rzacné co:

—¡Niinagazh guche i, bi yag ne bzhoob luu i, zeen bzé!

⁷ Zigne sca bnee me, laa mgui co bzoli, laa me zey.

⁸ Grè miech guizhiu ne ndxie ga, zeene gon zho sca beenguiaac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

Bredz Jesús Matew
(Mr 2:13-17; Lc 5:27-32)

⁹ Blozh ga laa Jesús brieet ga. Ro nèz zieded me gon me tib men lè Matew, lèetaque laa men co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

¹⁰ Bded ga güeynie me Jesús tib wagw lidz me. Grè zha ne rcaania dimi ne razh lo zha Roma, grè zha ne zèeb diidz nac zha ntseeb, tipse brenie Jesús zho grè xpèèdscuel me.

¹¹ Blalaa zha farisé, gon zho sca tipse zobnie me grè zha co, bded ga, rëbchaa zho lo xpèèdscuel me:

—¡Mod scataa na rownie xmaistr to grè zha ngoopdol, grè zha beed ne nac recaudador!

¹² Bin Jesús sca quianee zho, dzigo rëbchaa me lo zho:

—Nanle to ganle, zha ne run rmed, zaatne no zha rzacné ga rquuin zho, zniacxe squuin zho zaatne no zha ne ndip ndaan?

¹³ Golsoladz ganle znu rnee Dios: “Laa naa racladz gacndooladz miech, yquia zdoo zho samiech zho, racladzaxe naa waa guiaad zho dieen peraa guiaadlogon zho lo naa.” Mazd ganle goltsie, tswogol sob golguien dien zha nacne sca rnee me. Tel naa, zialguibd naa miech wen, sinque laa naa zialguib gré zha ngoopdol.

*¿Pe nacne rcuand xpëëdsuel Jesús?
(Mr. 2:18-22; Lc. 5:33-39)*

¹⁴ Bdzinaque xpëëdsuel Juan Bautist, bn-abdiidz zho lo Jesús, rëb zho:

—¿Pe nac waa ib rcuand xpëëdsuel luu? Ni no gré no zha farisé, zhiga zhiga laa no rcuanle.

¹⁵ Pquiab me rëb me lo zho:

—Zaatne nadien noyac tib guieltsieel, ¿pe niacxe lega csilo gré zha ne ndxie lo lni tso zho guielné, ycuan zho, ni ran zho laa mgui ne notsieelnia zo lo zho? Per zdziñ dze zeene laa mgui co gliche, ni zeene laa dze co gdziñ, dzigosi nagon rieguial tso zho guielné, rieguial ycuan zho.

¹⁶ Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca guñ paat yquuind wquiaabdie co. Zeene laa lar cub gbe, lëëque lëëw gunnat zaatne nriez lar gox.

¹⁷ Scaque tsod zha ne cotsow vin cub tib len guid ne padzeela noquiin, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, tel nziu cuba none len guid cubaque tsotsowa.

*Brieban tib mëdwnaa yeen
(Mr. 5:21-43; Lc. 8:40-56)*

¹⁸ Lëëtaaque sca quianee Jesús lo xpëëdsuel Juan Bautist, zeene bdziñ tib mgui ne nac zha non yadoo. Zigne bdziñ me pquiitsgzhib me lo Jesús, rëb me:

—Been tib guielnzaac sè luu guio ne lidz naa. Laa tib xpëdwnaa naa blozh niina, per nanpaa naa telne cxobnia luu guic win, zbeeban luu win.

¹⁹ Dzigo bio Jesús nëz zienal me zhits men co, gza xpëëdsuel me.

²⁰ Lad gré miech ne zienal ga, lad co no tib men wnaa, gocle tsiipchop iz rlan me tib guielguidz, rzac me zigne rzac gré men wnaa gzob mëë, tibaque rlan mew ib rbëzda.

Ga zie me, zeene wbig me nëz zhits Jesús, bzhen me ro lar ne mbix Jesús,

²¹ sac tibaque güeynie guic me, ziac me totsaque ygaa xab Jesús nia me.

²² Dzigo wbire lo Jesús, dze bui Jesús lo me.

—Xin —rëb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guielguidz co.

²³ Laa zeene bdziñ Jesús lidz men rnabey co, laa zha ne rool ndxiele, noquiaa zho gré di ne rac lo ngutoo, grëraa zha ne ndxie ga, nguiedz zëëb tsi zho roon zho, tib ruid ne rac.

²⁴ Dzigo rëbchaa me lo zho:

—Golree nëz ley, sac gon gute mëëd qui, nixguiesse win.

Zha ne rlëë, zha ne rzhidzniegaa me, laa zho brieë ley.

²⁵ Dzigo laa me bzëëb len yu zaatne nix mëëd co, bzhen me nia win. ¡Horcogazha laa win guche!

²⁶ Grëse guiedz ne ndxie dib gax ga, gocnan miech scataa milagr nroob ne been me, bleeaban me mëëd co.

Biac chop zha ne rold lo ni tib zha ngop

²⁷ Zeene laa Jesús wbi ga, nëz zie me brieenal chop zha ne rold lo zhits me, nguiedz rbedz zho rnee zho:

—¡Jesús, xingan David, pquia zdoo no!

²⁸ Bdziñ Jesús yu ne rbëz me, laa zho wbig lo me. Dzigo rëbchaa me lo zho:

—¿Dib zdoo to dzigo lëë rililadz to zrieelo gunguiac naa to?

—Dib zdoo now —rëb zho.

²⁹ Dzigo pquiaania me zhits bziaalo zho, ni rëb me:

—Mine bliladz to i nasca, laaw gac niina zigne bliladz tow.

³⁰ ¡Horcogazha laa lo grop zha co biac!

Dzigo pso Jesús diidz lo zho choot lo gzodiidz zho zha biac zho,

³¹ ni zigne brieë zho ga, laa zho bzodiidzlew. Blozh ga, grëse guiedz ne ndxie dib gax ga, gocnan miech scataa nac milagr ne run me.

³² Loxaque wbi grop zha ne biac lo ga, laa bla zho bdziñlaque, bdziñnie zho tib men ne nosacsi mendox, psanngop ma men co.

³³ Dzigo benxoon Jesús mendox co, zeene laa ma bzhoon laa men co psilo bnee. Gré miech guizhiu ne ndxie ga, per nli rzee zdoo zho, rnee zho:

—¡Waltaa gard dzian ne tib men ne squitaa guñ gré milagr qui!

³⁴ Laa gré zha farisé rnee:

—Ma ne rnabey lo mendox nacie men qui, gane rrieelo runxoon me mendox.

³⁵ Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdziñtaa me, rie me xyadoo zho rnee me lo zho zha racladz Dios gban zho, ni runguiac me zho tel pe nactaa guielguidz ne rzac zho.

³⁶ Zeene ran me gré miech guizhiu ne rcaalsa lo me, rquia zdoo me zho, sac ran me mban rac zho guien cho tib zha ne gacnie zho, rac zho zig gré mëcwiil yeen ne guien dxaxtor.

37-38 Tib vuelte haxta rëb me lo xpëedsuel me:

—Golnab lo Dios cxeelraa me zha ne gun xtsiin me. Golwi ganle pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho niina, zig tib giuelgon ne gollë gliiap.

10

Bzo Jesús zha ne tsienee xtiidz me

(Mr. 3:13-19; Lc. 6:12-16)

¹ Blozhse sca bnee Jesús, dzigo bredz me gza tsiipchop zha ne nac xpëedsuel me ga, bzo me zho tsienee zho Xtiidz Dios lo miech, bdeed me poder lo zho gunxoon zho mendox zaatne nosacsi ma miech, ni gunguiac zho grë men rzacnë.

²⁻⁴ Znu lë gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadé),

Simón (zha ne no lo partid ne racladz griee zha Roma Israel),

ni Judas Iscariot (zha ne güeyto Jesús).

Pxeel Jesús zha ne tsienee xtiidz me

(Mr. 6:7-13; Lc. 9:1-6)

⁵ Blozhse ga, pso me diidz lo zho zha tsie zho, rëb me lo zho:

—Nanle to nagon, tsiede to zaatne no grë zha ne nacd zha Israel, niicle sëebde to grë guiedz ne ndxie xtan zha Samar.

⁶ Zaatne no grë zha Israel, gase goltsie; lëë grë mëcwxiil ne nonziaab ga.

⁷ 'Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

⁸ 'Grëse zha ne rzacnë, golgunguiac zho; zha ne rlan guiedz lepr, golsanmbe zho; zaatne nix zha ne gutle, golcueeban zho; grë zha ne nosacsi mendox, golgunxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

⁹⁻¹⁰ 'Peet güeyde to, xab tow, lab tow, minë nacwse to, minë quiase ni to, mincose goltsienie. Güeyde to dimi, per ni tib quiet güeyde to; sac zaatne tsiegun to dziin rii, ib ga none gneedz zho ncuuane gow to.

¹¹ 'Guiedz ne gdziintaa to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co.

¹² Zeene noguib to pa cuëz to, yu ne tsie to, zaacse golgac, golquiaabdiuzh zha ne no yu co,

¹³ golnab gunlay Dios zho. Telne wen gac zho lo to, zunlay me zho, togo guncasdgaa zho to, dzigo toque gunlay me.

¹⁴ Zha ne sca siguield ycaania to, golriiegazh lidz zho; guiedz ne siguield zho yquiaadiag zho minë nonee to, golbigazh guiedz co; gollit grë yudie co ni to, gollu lo zho ganle led xtoldraa to ga tel laa zho nitlo.

¹⁵ Gneli naa lo to ganle zeene gal dze ne laa Dios gun xquielwxtis me, bii lëëtaa gac guielnë ne yгаа grë miech ne bio guiedz Sodom, guiedz Gomorr, lëdle guielnë ro ne yгаа grë miech ne sca siguield ycaania to.

¹⁶ 'Nsin golso, golguien ganle rriequiaa tib mëcwxiil yeense nac to, ni laa naa rxel to zaatne no grë coyot dox. Ndooladz golgac, niowse golgac lo miech zig rac grë palom, per scagaa con cuidad goltsie, golgan ganle zha rzë meel.

¹⁷ Nligaa nsin golso, sac gon ib ziezo miech to lo wxtis, ni lëëque len yadoo ga quin zho to,

¹⁸ haxta ziezo zho to lo grëraa zha nroob ne rnabey. Laa zho guna, loxaque ne nac to zha ne no xnëz naa, ni gagaa nagon gdeeda diidz gnee to xtizd naa lo grë zha co, ni lo grëragaa miech ne nacd zha Israel.

¹⁹ 'Zeene sca tsiezo zho to lo grë zha rnabey co, tsode to zhgab dien pe gnee to, dien zhagaa gnee tow; sac zeene sca tsiegala, Dios gneedz diidz ne gnee to.

²⁰ Led tod gnee, sinque, jzhiEspiritu Pxoz to men ne zob gbaa, men co gnee ga!

²¹ 'Zlëniendox miech zha ne no xnëz naa. Zio zha ne lëëque bets zho, zha ne lëëque pxoz zho, zha ne lëëque xpëed zho ctsidil zho, tsielo zho zho ladznia zha ne gut zho.

²² Tel to, guiets yag gan miech to, per telne dziits so to tel pe nactaa lo guielnë ne ted to, ib zgaa to tib guielmban ndzon ne gdziindraa dze lozh.

²³ Guiedz ne no to, zeene laa miech csilo yquiaana lo, golriee ga, goltsie stib guiedz. Gneli naa lo to ganle, niicle stib guiedz stib guiedz tsie to, gardaque lozh tsieted to grë guiedz ne ndxie Israel zeene gal dze ne laa Mgui ne pxeel Dios guiaad stib.

²⁴ 'Golwi ganle zha ne nac mëedsuel, tsod zha ne ndziibraa non lo maistr; zha ne rquiagaa dziin, tsod zha ne nonraa lo zha ne rree zho.

²⁵ Tel zha gun miech maistr, scaque gun zho mëedsuel; tel pe cteed zho bizhuan dziin, mincoque cteed zho zha ne quia dziin. Gacxe waa peet tsienied guic to, tel pe nactaa ncuuane gnee miech to, sac gon niicxe naa name ne nac naa Dad, mendox rnee zho nac naa.

²⁶ 'Gdziebde to, zdziin dze ne glu ganle cho zienal minë nac diidzli, chogaa zienal guielntseeb, gal dze co grësew xoobnen.

²⁷ Grèse mine rne naa lo to zeene nese rziodiidza, golneew lo miech, haxta glaa guic yu golso, nguiedz golneew.

²⁸ Gdziebde to miech, golguien ganle no tib men nroobraa, lëe men co nac Dios. Tel miecha, loxaque cuerpse zrieelo zho csacsi zho, sangue Dios, zrieelo me gnitlo me miech dib xcuerp zho, dib xalm zho len gabil.

²⁹ Nligaa gdziebde to, csaand Dios lega pe gac to. Golwi ganle, zig nac grë mguin niicle ne rzac miech peet nond ma, haxta chop ma rdeed zho por tib gaay centav; per PxoZ to gon men ne zob gbaa rsaanladz me ma, ni tib ma guete telne gdeete me diidz.

³⁰ Pelel to dzigo csaan me, haxta guits guic tow, grësew ngaba lo me.

³¹ Gdziebde to sca, golguien ganle nonraa to lo tib dzoon mguin.

³² Gneli naa lo to ganle, zha ne glu lo miech nacie zho naa, scaque naa zeen gal dze co zlu naa lo PxoZ naa men ne zob gbaa, nacie naa zho.

³³ Sangue zha ne ctoladnie naa lo miech, scaque naa ziep naa lo me runbeyd naa zho.

³⁴ Guibde to togo laa naa zial loxaque par cuin wense miech! Lëda gon, ye zial naa zialgunctil naa zho.

³⁵ Sac zha ne sëeb xnëz naa, zlëenie xpëed zho zho, tel mëedgaaw, zlëenie pxoz zho zho; scaque men wnaaw, zlëenie xinzhizh zho zho, zha ne nacgaa nguzhizha, zlëenie xniaa tsiel zho zho.

³⁶ Lëeque menlidz miech gac zha ne glëe gan zho!

³⁷ Zha ne mazdraa rquia zdoo glëenie pxoz zho zho, glëenie xniaa zho zho, glëeniegaa xpëed zho zho, porne gun zho mine rnabey naa, peet xtsiind zha co par ygab zho xnëz naa.

³⁸ Scaque zha ne yquia zdoo cueeladz zho zho guiaadnal zho zhits naa, grieelod ygab zho lo naa.

³⁹ Sac grëse zha ne rquia zdoo guielmban ne rap zho lo guidzliu rii, ygaad zho guielmban ndzon ne gneedz Dios; sangue zha ne cueeladz xquielmban, niicle tel csacsi miech zho loxaque ne no zho xnëz naa, ib zgaa zho guielmban ndzon co.

⁴⁰ Niina gon ne squi tsie to, grëse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia men ne pxeelle naa ga sca ycaania zho.

⁴¹ Zha ne cuëzlo tib men ne noteed xtiidz Dios lo miech, guielnzaac ne gdeed Dios lo men co, ye zho yгаа guielnzaac co. Zha ne cuëzlo tib miech ndzinli, guielnzaac ne gdeed Dios lo zha co, ye zho yгаа.

⁴² Ni zha ne gneedz maase tib zhigaque nis yag lo cho tib zha win ne nac to ne

nac to xpëedscuel naa, ib tedsod zdeed Dios guielnzaac ne tsieguial zho.

11

*Zha ne pxeel Juan Bautist
(Lc. 7:18-35)*

¹ Zeene blozh pso Jesús diidz lo gza tsiip-chop zha co, dzigo laa zho zie. Blozh ga laa me brieaque, güey me grë guiedz ne ndxie gax ga, güeyseed me grë miech co.

²⁻³ Len dze co no Juan Bautist ladzguuib, ga no Juan bin Juan zha nactaa grë milagr ne run Jesús, dzigo pxeel Juan bla xpëedscuel Juan güeynabdiidz zho lo me, dien pe lëele Men ne zëëble diidz cxeel Dios lo guidzliu ga nac me, te dzigoraа gdzin men co ye.

⁴ Dzigo rëbchaa me lo zho:

—Grë ncuaañe bin to rne naa, grëgaa ncuaañe gon to run naa, goltsie golzodiidza lo Juan.

⁵ Ran to ganle grë zha ne rold lo, grë zha ne gacd së, grë zha ne rlan guiedz lepr, grë zha ne rcuaat, laa zho riac; haxta grë zha ne gutle, laa zho rrieaban. Xtiidz Diosa, laaw quiagaaz lo grëse zha ne rquina. Grësew, golzodiidza.

⁶ Ni golguiab lo me, dichos zha ne rachopd guic, sinque tiblrique rac zho rililadz zho cho nac naa.

⁷⁻⁸ Zeene laa xpëedscuel Juan zey, dzigo psilo me bzeet me Juan lo miech guizhiu ne ndxie lo me ga, rëb me:

—Zeene güey to dan ngan co, güey to lo Juan, z zha dien güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, te rëb to ye masaque grë lar niazh ne racw zha non nacw me? Per nanle to ganle zha ne scataa racwxab riod zho dan.

⁹ Nligaa cho dien güeynie guic to nac me, zte rëb to ye tib men ne noteed xtiidz Diosa? Gacnan to ganle tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co.

¹⁰ Me ga raquiet lo Xtiidz Dios zaatne znu rnee:

Sxel naa tib zha ne tednerga lo luu, zha co gzhixcuaa nëz ne ted luu.

¹¹ Ne nligaa lo grëse mgui ne zieded lo guidzliu gard grieequia tib zha ne mazdraa non lo Juan Bautist; per zha ne gon winraa zatne rnabey Dios, nonraa zha co lo me.

¹² Desde psilo Juan noseed me miech zha-paa racladz Dios gban zho, ni rchoobnis me zho, hor co psiloque brieequia zha ne rlëenie zhiwseed Dios, gacxe waa zha ne nlipaa rdziebd, zha cose rcaaniaaw, rzëeb zho xnëz me.

¹³ Mazd glo tibaque raquiet ne laa men ne cxeel Dios ga guiaad, zigtaa lo leya, zigtagaa grë zha ne biadteed xtiidz Diosa, bzeet

zhow. Ni niina ne laa Juan biaad, laa men co blanso.

¹⁴ Juan gon biaad niina zig no diidz guiaad Li; golgacnan sca ganle cho nac me.

¹⁵ Zha ne racladz guien zho zha nac grē mine none naa nu, ijquaadiag zhow!

¹⁶⁻¹⁷ 'Nac grē miech rii, rienz zho pe racladz zho. ¿Cho ganle run zig run zho? Lēē zho run mine run mēēdlas ne rio wguut ro nēz, niicle rool xcompañer win di nguieel rieved win, niicle roolga zho di ngan, roond win.

¹⁸ Sca gon biaad Juan, ran zho rowd me tel pe ncuane row zho, ried me ncuane rie zho, dzigo laa zho rnee mendox nacie me.

¹⁹ Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, ib rienz me cho rtsielsa me, haxta grē zha ngoopdol, haxta grē zha yozh ne rtop dimi ne razh lo zha Roma rzēnie me. Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

Miech ne bzhiguiel ncaania xtiidz Jesús (Lc. 10:13-15, 21-22)

²⁰ Blozhse ga, dzigo psilo Jesús bzeet me mine ygaa grē zha ne pcaaniad xtiidz me; sac nzian guiedz ne güey me niicle gon zho grētaa milagr ne been me, per ib psaand zho xquielntseeb zho, rēb me:

²¹ —iProbsaxe grē men guiedz Corazín, grē men guiedz Betsaid! Sac gon gonpaa zho grē poder ne rap Dios, per ib psaand zho xquielntseeb zho. Tel niaca mine nian grē men guiedz Tiro, grē men guiedz Sidón, grē milagr ne gon zho ben naa, ib ndedsod mban niac grē zha co nio zho guielnē, zēēb nsaan zho xquielntseeb zho, mbig zho lo Dios.

²² Gacnan zha Corazín, gacnan zha Betsaid sca ganle, gal dze ne gun Dios guielwxtis, lēētaa caxtigw ne ygaa zha Tiro ni zha Sidón, mazdraa mine ygaa zho.

²³ Scaque zha Capernaum, masaque rzac zho niina zha nziurraa lo Dios, per gacnan zho ganle haxta quiet lo ncowdoo ne guey mendox ga guey zho; sac gon tel niaca mine nian zha Sodom grē milagr ne ran zho noyun naa, ible nsaan zha co xquielntseeb zho, nitlod zho.

²⁴ iGacnan zha Capernaum ganle gal dze ne gun Dios guielwxtis, lēētaa caxtigw ne ygaa zha Sodom, mazdraa mine ygaa zho!

²⁵ Dzigo bzodiidznie Jesús Dios, rēb me:

—Dios luu ne nac luu Pxoaz naa, luu rnabey gbaa luu rnabey guidzliu, rnedz naa xquizh lo luu sac grē mine noyun luu nu niina bdeete luu diidz niacnan grē zha raca, sinque laaw blu luu lo grē zha ne nac zig grē mēēdlas.

²⁶ Sca quiaayun luu, sac ib scale racladz luu gaca.

²⁷ Blozh ga rēb me lo grē miech ne ndxie ga:

—Grēse ncuane ran to quiaayun naa, Dios men ne nac Pxoaz naa, me bneedz poder rii lo naa; sac ib laa me bzo naa, naa guña. Xpēēd me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

²⁸ Grēse to ne nac to zha ne nē noded, rdib rdzag to quiaquib to dien zha guiaanwen zdoz to, goltē lo naa, naa gneedz tib wdziiladz ndzon lo to.

²⁹ Nligaa golbig lo naa, goltēnal zhiwseed naa, golgac tib miech tibliladz, tib miech ndooladz zigne nac naa; zeena gap to descans co.

³⁰ Nacda ncuane ngan, nacda ncuane guiab to glēbde to gun tow.

12

Dze ne rdziiladz zha Israel lo dziin (Mr. 2:23-28; Lc. 6:1-5)

¹ Len dze coquew, tib dze lēētaque dze ne rdziiladz zha Israel lo dziina, bded Jesús zaatne zēēb zhubxtil grē xpēēdscuel me. Ga zie zho rcaabedz zho, dzigo psilo zho ptop zho mzion co dow zho zhubxtil co.

² Gon bla zha farisew, dzigo rēb zho:

—iLēda i gon noyun to, noguities to ley i! Goluquien ganle dze nda nac dze rii.

³ Pquiabchaa me rēb me lo zho:

—iPe gard glab to zaatne ziaad ganle zha been rey David, tib dze zeene pcaabedz me grē me zha ne ziegza me, ni zienied zho pe gow zho?

⁴ Rneew, bzēēb me len yadoo güey nab me quietxtil ne nac gon, downie me grē zha ne ziegza me ga, ni loxaque zha ne nace pxoz row quietxtil co, ipe led bdiitsd me ley ga?

⁵ Lo xley Moisés name zhubnee ganle zha haxta dze ne rdziiladz to lo dziin run grē pxoz dziin len yadoo, ni rneeda dol ga sca run zho.

⁶ Golwi ganle zha rats ley par gac dziin len yadoo, ni yadoose ga, gacnan to ganle lo to nu zo men ne mazdraa non lo yadoo.

⁷ Rnee Dios lo Xtiidz me, quiambēzd me dien peraa gun miech, dien peraa cogon zho lo me, sinque mine racladz me guien zho yquia zdoz zho samiech zho. Tel niaca mine nli rien to min co, zien to gdziibdolde to zha ne rapd dol.

⁸ Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia (Mr. 3:1-6; Lc. 6:6-11)

⁹ Bded ga, goḷ stib dze ne rdziiladz zho lo dziina, güey Jesús len yadoo win ne zob lad guiedz co.

¹⁰ Lad grë miech ne ndxie len yadoo co, no tib mgui ne mband tib nia; porque laa zha farisé bñabdiidzlaque lo me dien pe nonguiela guñguaiac me miech dze ne rdziiladz zho lo dziin. Sca bñabdiidz zho, sac quiaguib zho dien pe yquiaaqui zho me tsiezo zho me lo wxtis.

¹¹ Dzigo pquiab me rëb me lo zho:
—Togase dien, zha ruṅ to zeene lëëtse dze rii rietsobe tib xpëcwxiiil to tib len blë nroob, çléd zëëb lëë rie to riebee to ma?

¹² Teḷ sca rquia zdoo to mëcwxiiil, jgolguien ganle mazdraa gon non miech lo tib mëcwxiiil! Gacxe waa ible nonguiela guñ ne xyudar samiech ne, niicle maase dze nda nac dze co.

¹³ Dzigo rëbchaa me lo mgui ne në nia ga:
—jBzigaa nia luu!
Zigne bzigaa mgui nia mgui, biacgazha, biaana zig nac stib mine ndaantaque ga.

¹⁴ Grë zha farisé co, zigne briece zho ga laa zho psilo bñediidz dien zha gdeeda diidz gut zho Jesús.

¹⁵ Bien Jesús sca no guic zho, dzigo mazd briece me ga. Miech guizhiu ne zienal zhits me, grëse men rzacnë ne zienal ga, beenguiac me zho;

¹⁶ per pso me diidz lo zho, choot lo gzodiidz zhow.

¹⁷ Ga briecequia mine pquiaa Isá, tib men ne biadteed xtiidz Dios padzeela, zeene rëb me:

¹⁸ Lëë men rii bzooblo naa guñ xtsin naa, rleynie naa me, rzac zdoo naa grë ncuaaṅe ruṅ me.

Zded naa zhiEspiritu naa gacnie me, me nac men ne cxobnen xtidz naa lo grëse miech.

¹⁹ Tilnied me miech, sedzd yaṅ me lo zho, sod me ro nëz goptsie me.

²⁰ Grë zha ne gzhe gzhele rac, zig tib goobgui ne quiaxweele, zig tib lë guier ne noyüdiele,

csand me zdoo zho;
zha ne mban rac lo xliaadz zho, csaand me zho.

Min co tsoxco me, haxta gaṅ me grëse miech gacnaṅ mine nac diidzli, ni tsienal zhow.

²¹ Haxta zeene gaṅ me ye grë zha ne nacdraa zha Israel, laa zho gnalo me.

*Rëb zho mendox nacie Jesús
(Mr. 3:20-30; Lc. 6:43-45; 11:14-23;
12:10)*

²² Dzigo güeynie zho tib mgui lo Jesús roḷd lo mgui ni gacdaque gnee mgui, sac nosacsi

mëndox mgui. Znuse beenguiac me mgui, gagazh psilo gon mgui, psilo bnee mgui.

²³ Grë miech ne ndxie lo me ga, per nli bzee zdoo zho, rnee zho:

—jBay pe lëë men qui naye nac Men ne zëëble diidz ga cxeel Dios!

²⁴ Zeene gon zha farisé sca rnee grë miech co, rzachaa zdoo zho rnee zho: “Pe Dios nazho cxeel me, ma ne rnabey lo mendox ma co nacie me, gane rrieelo ruṅcxooṅ me mendox.”

²⁵ Bien Jesús sca rza guic zho, dzigo rëbchaa me lo zho:

—jNcuaaṅe gacd gon rnee to! Teḷ tib wxtis nadien lëëque zha ne nacie zho csilo tilnie zho, çniacxe zac gnabey zho? Tib guiedza, teḷ lëëque zha guiedz co tilnie menladz zho, led znuse lozh guiedz co; tib diigaa miecha, teḷ lëëque zha tilnie menlidz zho, çniacxe nitlod dii co?

²⁶ Scaque mendox nagon, telne lëëque lëë ma guṅcxooṅ samëndox ma, ipe nale na britlo ma!

²⁷ Nana ne squi rnee to Beelzebú nacie naa gane rrieelo ruṅcxooṅ naa mendox, çzha ne nacgrë to dzigo, cho nacie zho ne ye zho ruṅcxooṅ ma? Gase naganle rlu doḷdoh i quiayuṅ to, squi rnee to.

²⁸ Sangue teḷ naa zhiEspiritu Dios nacie naa gane ruṅcxooṅ naa mendox, ni ga rlu ganle laa Dios psilo quianabeyle nu.

²⁹ jMasaque nac mendox zig tib zha ne no xfuers, zha ne gacladz cuee grë ncuaaṅe no lidz zha co, none cxidoogazh zho zho!

³⁰ Teḷ mendoxa rlëënie ma naa, ni nanle to ganle zha ne rlëë lo ne, gacnied zho ne.

³¹⁻³² Gacnaṅ to ganle, grëse dol ne ruṅ miech, grë teḷ zha rguie zho, rdzibdee zho, niicle teḷ haxta gneenë zho naa, bii zuṅ Dios zho perdon min co; sangue zha ne gneenë zhiEspiritu me, ib guṅdraa me zho perdon.

³³ Nanle to ganle zig nac yag nex, mine nac yag, min co nac nex ne rdeeda. Teḷ yag wena nex wen rquia low, togo yag ncuangaaw, nex ncuanaaque rquia low.

³⁴ jScaque to nagon zhin mendox! çZha nan to nadien gac to miech wen, teḷ desde zdoo to ntseeb? Miech ntseeb to gane squi rzë xtiidz to, sac gon, jgrëse diidz ne rriece ro miech, zdoo zho rzaw!

³⁵ Gacxe waa, zha ne mbe zdoo, niapse diidz wen, diidz ndooladz nac xtiidz zho. Sangue zha ne ntseeb zdoo, niapse diidz ntseeb, niapse diidznë rriece ro zho.

³⁶ Ni gaḷ dze ne gon guñ Dios guieḷwxtis, ib tedsod zunquizh me miech tib tib diidz ntseeb, tib tib diidznë ne sca rriece ro zho.

³⁷ Sac gon zigne rzë xtiidz zho niina, min co cueequia zho gaḷ dze co, o mincogaa cteedquie zho.

Racladz zha farisé gan zho milagr

(Mr. 3:31-35; 8:12; Lc. 8:19-21; 11:24-26, 29-32)

³⁸ Tib dze wbig zla zha farisé lo Jesús gza zho zla maistr ley, rëb zho lo me:

—Maestro, racladz no dzian no gun luu tib milagr, milagr ne glu nli Dios pxeel luu.

³⁹ Pquiah me rëb me lo zho:

—Nazdpaa ntseeb to, squitaa gocndip zdoo to nëz lo Dios, zha nacraa milagr ne racladz to gan to?

⁴⁰ Stibaque milagr gon gan to, lëë min co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel.

⁴¹ Ni gal dze ne gon gun Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grëse zho psaan xquielntseeb zho wbig zho nëz lo Dios, laa to nëde to gon to diidz niicle ne lo to nu zo tib men ne mazdraa non lo Jonás.

⁴² Scaque rein ne bzob nëz Sabá, steedquie me to gal dze co, sac tel rein co golwi ganle pa lo guidzliu ne brie me biaadgan me rey Salomón, biadquiaadiag me grë xtiidz Salomón. Ni to lo to nu zo men ne mazdraa non lo Salomón, ni ib ronde to xtiidz me.

⁴³ Telne csaande to xquielntseeb to i gon, low lozh to. Sac to zig bzhaac tib zha ne psaci menodox. Zeene brie me zdoo zho, güey ma güeyquianzë ma grë dan zit güeyguib ma dien pa cuëz ma. Gonse ma rdziel zaatne cuëz ma,

⁴⁴ rëb ma: “Mazd laa naa gbireque guia naa zaatne brie naa ga.” Zeene biire ma bdziñ ma zdoo zha co, gon ma nroob lugar no, pale tib yu dets,

⁴⁵ nacne güeyaque ma güeyxi ma zgadz samenodox ma, ma ne mazdraa ntseeb blëznie ma zdoo zha co. jDzigole mazdraa mban biaan zha co, lëdlegaa zigne goc zho glo! Scadaa nagon gdzieelo to.

⁴⁶ Laa me bii noneeque, zeene laa xniaa me ni zha bets me bdziñ, racladz zho gzodidznie zho me. Per brieelod nzëëb zho haxta len yu, sac scataa miech guizhiu ne ndxie lo me ga.

⁴⁷ Dzigo rëb tib zho lo me:

—Laa xniaa luu gon ni zha bets luu quiambëz luu nëz ley, racladz zho gzodidznie zho luu.

⁴⁸ Pquiah me rëb me:

—zXnia naa ye, bets naa ye?

⁴⁹ Blis nia me, blu me grë xpëëdsuel me, dzigo rëbchaa me:

—Zha ne gon nac zig zha rii, lëë xnia naa ga, lëë bets naa ga.

⁵⁰ jSac grëse zha ne run mine rnabey Pxoza naa men ne zob gbaa, grëse zha co nac bets naa, nac bzian naa, nac xnia naa!

13

Nac Xtiidz Dios zig zhobxtil

(Mr. 4:1-20; Lc. 8:4-15)

¹ Blozh ga brie Jesús güey me ro nisdoo. Ga zob me,

² zeene gon me nzian miech ne nocaalsa lo me ga, nacne biepe me güeysob me tib len barcw zo gax ro nis co, psilo me pseed me zho.

³⁻⁴ Ndal grë ncuaañe pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

—Tib zha name güey gon zhobxtil. Zeene laa zho quialaal zhob co, now bliaal gax ro nëz, now bliaal lad quie, now bliaal len yag guiets. Mine bliaal gax ro nëz ga, güey grë mguin znuse dow maw.

⁵ Mine bliaal zaatne nac lad quie, znuse znuse blana,

⁶ per zeene laa lo ngbidz brie, znusaque bgoolá, bidzgw; sac guien nroob low.

⁷ Mine bliaal zaatne nac len yag guiets co, zeene laa yag guiets pxii, bnitlogaw.

⁸ Sangu mine bliaal zaatne nac lo liu naal, blana, brooba ni goca; lo tib tib zhob co no zhimziona brie galptsii zhob, now brie tsongalá, nogaaw brie haxta tib gayoow.

⁹ Blozh ga, rëbchaa me:

—Zha ne racladz guien mine rne naa nu, yquiaadiag zhow.

¹⁰ Zeene laa grë miech co zey, zey wbig xpëëdsuel me bnabdiidz zho lo me dien pe nac ne sca niapse con cuent rseed me grë miech.

¹¹ Pquiah me rëb me:

—Tel to, Dioszhal rlu lo to zha rnabey me, niicle ncuaañe mazdraa ngeetsa; laa grëraa miech ne gard gbig lo me, grieelod guien zhow.

¹² Sac zha ne noxcole dien zha rnabey me, zeedraa me guielbiini lo zho guien zhow, laa zha ne noxcoda, mine riense zho, stiche mew.

¹³ Sca rseed naa zho parne tsoguc zho zha rnabey Dios, per nac zho niicle nzhial lo zho rwi zho, per peet rand zho; niicle nzhial diag zho per peet rond zho; ib peet riend zho.

¹⁴ Lëë mine nac zho i bzeet Isá, zeene znu rëb me:

Nac miech qui, niicle peraa ron zho, per peet riend zho;

niicle rwiraa zho, per peet rand zho.

¹⁵ Ne nlipaa miech nad, miech ndip zdoo nac zho,

rrieequia ntse zho diag zho, ntse zho lo zho; parne peet gond zho, peet gand zho.

Ib rienḡ zho zha gbig zho lo naa, ygab zho xnēz naa, parne csilaa naa zho.

¹⁶ 'Sanguē to —rēb Jesús lo zho—. ¡Dichos to porne rienḡ to pe ranḡ to, ni rienḡaa to mine ron to!

¹⁷ Blactaa zha ne biadteed xtiidz Dios padzeela, blactaa zha ne güeynalḡ mine nac diidzli, bzoobladz zho nianḡ zho grē ncuaaḡe ranḡ to niina, per bgaad zho nianḡ zhow; bzoobladz zho nquiaadiag zho grē ncuaaḡe noquiaadiag to, per bgaad zho nion zhow.

¹⁸ 'Golḡquiaadiag sca ganle zha nac xcuent zha ne güey gon ga.

¹⁹ Ro nēz ne sca bliaaḡ zhow co, sca nac palal miech ne riepaā zha ne rienee Xtiidz Dios lo zho, per rioguicd zhow, rlozh ga rdziḡaque menḡox, rietiche ma telḡ palalse mine rienḡ zho.

²⁰ Lad quie ne bliaaḡ spalal zhow co, sca nac grē zha ne rley rcaania Xtiidz Dios;

²¹ per led dib zdood zho rcaania zhow, gane zeene laa miech rsilo riēē lo zho, laa miech rtsidilḡ zho porne riladz zhow, rsaanga zhow.

²² Nogaa zho nac zig nac lenḡ yag guiets co. Rquiaadiag zho Xtiidz Dios, per rsilo zho lelḡ grē ncuaaḡe no lo guidzliu rii mazdraa rionie guic zho, rquidie grē dimi zho. Grē ncuaaḡ co rioxcoraa zho, laa ne tsonie Xtiidz Dios guic zho, miḡ co rquiaqui ib runḡ zho miḡe rnabey me.

²³ Laa liu naaḡ ne bliaaḡ miḡe scataa goc ga, sca nac grē zha ne dib zdoo rquiaadiag Xtiidz Dios, rienḡ zho zha naca, ni rban zhow zigne rnabeya. Rrieequia grē ncuaaḡe runḡ zho, no zho nac zig mzion ne brieē galḡpsii zhow ga, no zho nac zig miḡe brieē tsonḡala, nogaa zho nac zig miḡe brieē tib gayoow ga.

*Zha nac xquielḡrnabey Dios
(Mr. 4:30-34; Lc. 13:18-21)*

²⁴ Biire pcaalsa miech lo me stib, dzigo psiloque me pseed me zho con stib cuent, rēb me:

—Ziaad gac xquielḡrnabey Dios lo guidzliu rii zig bzhaac tib meḡ ne gon zhowxtil. Niapse zhow wen, zhow nal gon me,

²⁵ per no tib zha ne riēē lo me, golḡ tib pcow liu, horne grēse miech nixguies, güey zho güeylaaḡ zho xmidz guizh ncuaaḡn zaatne gon me.

²⁶ 'Zeene laa zhowxtil co psilo blan mzion, hor coraa blu laa guizh ncuaaḡn co no lada.

²⁷ Grē zha ne quia xtsiinḡ me, zeene gon zhow güey zho rēb zho lo me: "Tebaa ganḡ luu ganḡ, dipse lad xoob luu zēēb guizh ncuaaḡn, ¿dieenḡ pa brieewḡe gocbniw ga?"

²⁸ Dzigo rēb me: "Rienḡ naa no cho tib zha ne riēē lo naa, zha co beenḡ dziin co."

'Gocladz zho, hor cogazh nielaadz zhow per bzhiguielḡ me,

²⁹ rēb me lo zho: "Tsielaadzde tow, sac telḡ glaadz tow niina ye zhowxtil gliaadzniew.

³⁰ Golḡsaan sca zēēba ga, na zeene laa wlaap gac, hor co gnabey naa zha ne quiits zhow, ctopgazh zhow gdziinḡ zhow tib lad tseca; lozhraa ga quiits zho zhow, tsasa ga, glansow ro yu."

³¹ Blozh ga bzeet me midz moxtaz, rēb me:

—Nac xquielḡrnabey Dios zig nac tib midz moxtaz ne ran miech dan rii. Nanḡ to ganle midz moxtaz nac midz ne mazdraa win,

³² ni telḡ gacbniw, rrooba ni lēēw rroobraa lo grē guizh ne ran zho ro yu, raca lal tib yag nex, haxta rdziḡ grē mguinḡ rzhixcuua ma zhiptsieez ma lo grē zhicwa.

³³ Rēbaque me:

—Nac xquielḡrnabey Dios zig nac ncobi ne rquiaa meḡ wnaa lad ncob ne riiaa guietxtil. Niipaque ncobi riots tsonḡ lmuḡ rin, ni dib nacse ncob co rzibe.

³⁴ Grēse miḡe pseed Jesús grē miech co, niapse con cuent bnee mew lo zho.

³⁵ Ga brieequia miḡe bzeet zha ne biadteed xtiidz Dios padzeela, zeene rēb zho: "Niapse con cuent cseed naa miech, sca gnee naa lo zho grētaa ncuaaḡe gard gancaḡn miech wlal ne bre guidzliu."

Zha nac xcuent guizh ncuaaḡn co

³⁶ Blozhse bnee Jesús lo grē miech co guey zho, yeque me laa me zey gza xpēēdsuel me. Bdziḡ zho ro yu, ga bnab zho lo me siguilḡ me gnee me lo zho dienḡ zha nac xcuent guizh ncuaaḡn ne bzeet me ga.

³⁷ Dzigo rēbchaa me lo zho:

—Golḡona sca, znu gonḡ nac cuent co. Rrieequia gonḡ naa ga nac meḡ ne gon zhow co.

³⁸ Liu ne bniaaw ga, nac lo guidzliu, zhowxtil co nac grē miech ne nole xnēz Dios, laa guizh ncuaaḡn co nac grē zha ne no ladzniā menḡox.

³⁹ Zha ne güeygan guizh ncuaaḡn co, lēē menḡox ga. Dze lo wlaap co, gac dze ne gonḡ Dios xquielḡwxtis me, zha ne tsie wlaap ga, lēē anjl ga.

⁴⁰ Ni zigne sca cuee zho guizh ncuaaḡn co lad zhowxtil, gzēēg zhow, scapaa nagonḡ galḡ dze ne gac xquielḡwxtis Dios,

⁴¹ sxelḡ naa grē xanjl naa tsie zho tsiebee zho grē zha ntseeb, zha ne sca runḡctal xtolḡ grēraa miech, lad zha ne no xnēz naa.

⁴² 'Grēse zha ntseeb co, hor co laa zho guey lo guidox ne rieguiaḡ zho! Ga tso zho goonnē zho, haxta gow lay zho lo guielḡnēdox co.

⁴³ Laa grē zha ne güeynalḡ mine nac diidzli, zha co gdziḡn zaatne rnabey Pxoḡ naa, masaque zig xbiini ngbidz glu zho ga. ¡Zha ne racladz guieḡa yquiaadiag zhow!

⁴⁴ 'Ziaad gac xquielḡrnabey Dios zig tib ncuaaḡn non ne noliu tib lo xcuaa miech.

Zha ne gdziel tib ncuaaṅe sca non, ib ted-sod zie zho sto zho grēse ncuaaṅe rap zho grieedimi si zho liu co, parne guṅchen zho ncuaaṅ non co.

⁴⁵ Zha ne rzēēb lo xquieṅnabey Dios ziaad gac zho zig tib zha ne rzi quie perl miṅe mazdraa niazh.

⁴⁶ Zeene ron zho pa no tib perl co, rto zho grēse ncuaaṅe rap zho, rie zho rzi zhow.

⁴⁷ Nacaque xquieṅnabey Dios, zig tib guieṅ nroob ne rḡaa meṅ niina, zeene rsēēb ngooz meṅa lo nis grē lose meṅ rtopa.

⁴⁸ Rlozhse riodzēw, dzigo rbeequia zhow ro nis, garaa rzob zho rbe zho grē meṅ co; ma ne rquini laa tib chicuid zole rio ma, laa ma ne rquini rsēēb zho.

⁴⁹ Scapaa nagon gac miech gaṅ dze ne guṅ Dios xquieṅwxtis me, ziaad grē xanjṅ me cuee zho grē zha ntseeb lo zha ne no xnēz me,

⁵⁰ tsieron zho zho lo guidox ne rieguiaṅ zho. Ga tso zho goonnē zho, haxta gow lay zho lo guieṅnēdox co.

⁵¹ Blozhse ga, rēb me lo zho:

—¿Pe biēṅ to na zha nac grē miṅe blozh bne naa lo to nu?

Grēse zho pquiab rēb zho:

—Biēṅ now.

⁵² Dzigo rēbchaa me:

—Tib zha ne rienṅe zha nac grē ley ne psan Moisés, ni squi guieṅ zho zha nac zhiwseed Dios miṅe zialnie naa niina, masaque nac zho zig tib zha gol ne quianie chop lo ncuaaṅ non lidz zho, quianie zho grē miṅ gol-le ni quaniequegaa zho miṅ cub.

Güey Jesús ladz me

(Mr. 6:1-6; Lc. 4:16-30)

⁵³ Blozhse sca bzodiidz me grē cuent co lo zho, laa me brieē ga zie me nēz ladz me.

⁵⁴ Bdziṅ me ga güey me yadoo, psilo me pseed me grē miech co. Per nli rzee zdoo zho ron zho grē miṅe rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guieṅbiini ne squitaa rap me i, ne rnee miech ndal grē milagr ne ruṅ me?

⁵⁵ Tib zhinse ngurēyag name nac me. Led lēē xingan Mari i, bets me name nac Jacob, nac José, nac Simón ni Judas;

⁵⁶ grē bzian mew, nu no zho grē zho. ¿Pa dzigo güey me wseed qui?

⁵⁷ Ib beencasd zho me, haxta rlēē zho lo me. Zeene gonṅ me sca rac zho, rēbchaa me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lēdle ladz zho ni menlidz zho ni menladz zho nēd guṅbey zho.

⁵⁸ Beēṅd me nzian milagr ga, sac sca ndip zdoo grē miech co ib nēd zho niladz zho cho nac me.

14

Gut Juan Bautist

(Mr. 6:14-29; Lc. 9:7-9)

¹ Leṅ dze co bin rey Herod (meṅ ne rnabey Galilé) grē ncuaaṅe ruṅ Jesús, sac telṅ pa lotaaw zēēb xtiidz me;

² dzigo rēb Herod lo grē zha ne ruṅ dziin lo me:

—Rienṅ naa lēē Juan Bautist ga quiayun grē miṅ co, segur brieēban me.

³ Sca rnee Herod sac nanwen me zha been me Juan. Me rnabey bḡaa Juan bzoob zho Juan caden bio Juan ladzguib,

⁴ loxaque ne rnee Juan lo me nonguiēṅda ga lēēque Herodí ptsieelnia me, sac tsieelpaa bets me Lip nac Herodí.

⁵ Gocladz Herod niut me Juan, per bdzieb me menguedz, sac rleynie zho Juan, rienṅ zho xtiidz Dios ziadteed Juan lo miech.

⁶ Laa tibtaa dzew, lēētaque noyac zhilni Herod dze ne bloozh me stib iz, bded tib xindzooṅ Herodí squi ndxie grē zha ne zobnie me psilo ndzooṅ bieē ndzooṅ. Bdziladz me gonṅ me zha bieē ndzooṅ,

⁷ haxta brieē ro me rēb me: “Ncuaaṅe gacladztaa luu gnab luu, znedz naaw.”

⁸ Per glole pquiiṅ Herodí ndzooṅ, nacre rēb ndzooṅ lo me: “Miṅe racladz naa, xoob guic Juan tib leṅ bandej gneedz luuw lo naa niinagazh.”

⁹⁻¹⁰ Zeene bin Herod sca rēb ndzooṅ, mbanse rac me; per rdeetraaw diidz niab me grieloda, sac grēse zha ne zobnie me ga, bin zho rēb me zdeed me ncuaaṅe gnabtaa ndzooṅ. Dzigo racse me pxeel me zha ne güeychug guic Juan leṅ ladzguib.

¹¹ Zeene wbre zho, zhoobse guic Juan tib leṅ bandej bdeed zhow lo ndzooṅ, dzigo güey ndzooṅ güeydeed ndzooṅa lo xnīaa ndzooṅ.

¹² Zeene gocnanṅ xpēēdsuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bḡuaan Jesús gaay mil miech

(Mr. 6:30-44; Lc. 9:10-17; Jn. 6:1-14)

¹³ Zeene bin Jesús sca bzhaac Juan, dzigo brieē me ga bzēēb me barcw zie me tib zaatne guieṅd miech. Per znuse biēṅ diidza, nzian grē guiedz co zha ne gocnaṅa, tib ro nis güey zho, glole zho bdziṅ zaatne no gdziṅ me ga.

¹⁴ Laa me noyē leṅ barcw, zeene blis lo me gonṅ me laa grē miech guizhiu co ndxiele ga; pquia zdoo me zho, beēṅguiac me grē mguidz ne zienie zho.

¹⁵ Laa dze ziedzelew, wbig xpēēdsuel me rēb zho lo me:

—Mazd gudz lo grē miech qui guey zho na, zeena guiob tsie zho grē guiedz win ne

ndxie gax i tsiesi zho ncuuaane gow zho; sac gon laa dze bdzele.

¹⁶ Pquiab me rëb me lo zho:
—¿Pe nacne guey zho squise? To none guede ncuuaane gow zho.

¹⁷ Rëbchaa zho:
—¿Per pe dien yguiaan no zho? Pe rnase gaay quietxtil ni chop mel ne ziaadnie no nu, lo grëtaa miech qui.

¹⁸ Dzigo bnabey me zho güeynie zho gutxtil co, güeynie zho mel co lo me,

¹⁹ ni bnabey me grë miech co bzob zho lo grë guizh nguia ne zëëb ga. Horco bzhen me gza quietxtil co ni grop mel co, blis lo me nëz gbaa, bdeed me xquizh lo Dios. Blozhse bdeed me xquizh, beengrol me gza quietxtil co, mel co ne, zigse rdeed mew lo xpëëdsuel me scase scase bdiiz zhow lo grë miech co.

²⁰⁻²¹ Grëse zho dow zho haxta zaatne bieltaa zdoo zho. Miech tafa, zha bguise rgaa zig gaay ml, nandragaa grë men wnaa, grë mëëdla; ni zeene blozh dow zho, scase ncuuaane nroob biaan, biodzë tsiipchop chicuid bio grë quietxtil co, bio grë mel co.

Rzë Jesús lo nisdo

(Mr 6:45-56; Jn 6:16-21)

²² Zeene blozh ga, bnabey Jesús xpëëdsuel me bzëëb zho len barcw, zeena zienerga zho tedquia zho stib nëz ro nis co; laa me bli blëz ga, nozonëz me grë miech co.

²³ Blozhse bzonëz me zho, dzigo güey me tib guic gui zob gax ga, güeyzodiidznie me Dios, tipse me zo ga laa liu pcow.

²⁴ Horco laa barcw ne zie xpëëdsuel me ga no lo nis co, ib gacd csëëniob zhow, sac rrie me nt sire mew, nëzrii nëzrec raca lo nis.

²⁵ Merle guini liuw, tibaque zeene laa me bdziñ zaatne zie zho ga, tib lo nis co ziezë me.

²⁶ Zeene gon zho laa men co sca ziaad-zë lo nis co, bdzieb zho, broptsie zho rnee zho:

—¿Tib ndziin i gon ziaad i!

²⁷ Dzigo bnee me lo zho rëb me:

—¿Gdziebde to, naa zial nu!

²⁸⁻²⁹ Pquiab Pedr rëb Pedr:

—Telne luu i ziaad i, bneedz diidz së naa lo nis glanso naa lo luu i.

—¿Dë sca! —rëb me.

Lëëled biet Pedr len barcw, laa Pedr ziezële lo nis co

³⁰ zeene gon Pedr scataa rlis me low, bdzieb Pedr. Tibaque zeene bien Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

³¹ Dzigo wbig me bzhen me nia Pedr, bzoli me Pedr lo nis co.

—¿Aque luu gon Pedr! —rëb me—. ¿Pe nacne gocchop guic luu? ¿Gard gon gilladz wen luu cho nac naa?

³² Zeene laa me biepnie Pedr len barcw, laa me co blëz.

³³ Grëraa zha ne no len barcw ga, rleynie zho me, rzee zdoo zho rnee zho:

—¿Nasi nagon ndion no nli Xpëëd Dios nac luu!

³⁴ Zeene bdziñ zho stib nëz ro nis co, zaatne rnee zho Genesaret, ga biet zho barcw.

³⁵ Grë miech co zeene gocnan zho laa me bdziñ ga, znuse znuse pxoon zho diidz grëraa guiedz ne ndxie gax ga. Dzigo brie grë miech co, güeynie zho grë men rzacnë lo me,

³⁶ rnab zho lo me siguiel me maase ni xabse me xen grë men rzacnë co. Grëse zha ne bzhen ni xab me, biac zho.

15

Ncuuaane runctal xtol miech

(Mr 7:1-23)

¹ Tib dze, bdziñ bla zha farisé ni zla maistr ley ne ziaad nëz Jerusalén, lo Jesús; rëb zho lo me:

² —¿Pe nacne dien zienald xpëëdsuel luu mine blu xmengol ne, pe nacne zeene laa zho row, ib rguiibd zho nia zho zigne nopaa tsara?

³ Pquiab me rëb me lo zho:

—¿To waa, pe nacne quiaguiits to xley Dios? Golguien ganle laa ne gun to mine rnabey Dios zigne naca, lel ncuuaane blu xmengol to, min co zienal to.

⁴ Led znu gon rnee lo xley Dios: “Gon pxoz luu, gon xniaa luu”, ni rneew: “Zha ne quie pxoz, quiegaa zho xniaa zho, ib none guet zho.”

⁵ Laa to gon rnee to: “Peet nacda gund zho xyudar xmengol zho niicle no me liaadz, totsaque gdeed zho gon.”

⁶ Tib lad rsan to xley Dios, mine blu xmengol to min co noxcoraa to.

⁷ ¿Loxaque guielwquide qui no to! Rquiaalo to miech wen nac to, per lëëpaa mine run to i ga bzeet Isá zeene rëb me:

⁸ Grë miech rii, rquiaalose zho runnon zho naa,

rond zho diidz gun zho mine rnabey naa.

⁹ Zhlëse nac grë ncuuaane run zho, rnee zho laa zho riaadgan naa;

sac niapse guicle zho riab grë wseed ne quialu zho lo miech.

¹⁰ Dzigo bnee me lo grë miech ne ndxie lo me ga, rëb me:

—Golquiaadiag mine gni naa lo to nu, ni goltsoxco guien to zha naca.

¹¹ Golgacnan ganle, grë ncuuaane rdziñ zdoo miech, led mincod runctal xtol zho; sinque grë ncuuaan ntseeb ne rza guic zho, diidz ntseeb ne rrie ro zho, min co runctal xtol zho.

¹² Horco wbig xpëëdsuel me, rëb zho:

—¿Pe bien luu ganle blëë zha farisé gon zho sca rëb luu lo zho?

13 Pquiab me rëb me:

—Grëse yag ne squi beenbnid Pxož naa men ne zob gbaa, ib none laaw gliaadz zolo zolow.

14 Golsaan zho, nli zha noseed mieh per nac zho zig nac zha ne rold lo. Ni nanle to ganle, tel tib zha ne sca roldle lo ni xenaque zho nia stib zha ne ranđ, zaatne nac tib len blë, ib tedsod grop xcuaa zho tsietsoebe ga.

15 Bđedse ga, wbig Pedr lo me rëb Pedr: —Bzhiguieł bnë lo no dien zha nac diidz ne në luu ga, ne rnee luu led ncuaaņe rowd mieh runctal xtol zho.

16 Pquiab me rëb me:

—¿Pe niicle to rienđaquew dzigo lëë?

17 ¿Pe rienđe to grë ncuaaņe row mieh, led mincod runctal xtol zho? Sac grë ncuaaņe row zho rdziņa leņ zdoomban zho, zhaa zaatne rdziņa; tib rietedsew xcuerp zho, rlozh ga rrieeagaw.

18 Sangue grë diidznë ne rriee ro zho, zdoomban zho ga rzaw, ni lëë min co nac mine runctal xtol zho.

19 Zdoomban zho nac zaatne rza grë ncuaaņ nseeb ne ruņ zho, zig nac:

zeņe rio zho grë zhgab yozh,
zeņe rut zho samiech zho,
zeņe rionie zho zha ne nole tsiel,
zeņe rionie zho zha ne nacd tsiel zho,
zeņe ruņ zho guielgbaan,
zeņe lega rnexuu zho samiech zho,
zeņe rmeenë zho samiech zho.

20 Grë ncuaaņ nseeb co nagon nac mine runctal xtol mieh, gunctald zho xtol zho niicle tsard nia zho zigne nacpaa grë zhiwseed menđol.

*Biac xpëëd tib wnaa zit
(Mr. 7:24-30)*

21 Ga briece Jesús, güey me haxta nëž Tiro ni nëž Sidón.

22 Nëž co no me güey tib wnaa ne ziaad lo xtiı zha Canaán lo me, nguiedz zëëb tsi wnaa co rnab me lo Jesús siguiel Jesús tsiegunguiac tib xpëđwnaa me nosacsi menđox.

23 Per ib pquiabd Jesús lo xtiidz wnaa co, dzigo wbig xpëëdscuel me, rëb zho:

—Mazd bzhiguieł pquiadaiađ mine rnee wnaa qui, bui ganle zha ncuëtaa zëëb tsi me nał me zhıts ne.

24 Pquiab Jesús rëb me:

—Ziałd naa par guņ naa xyudar zha zit, sinque laa Pxož naa pxeel naa par guņ naa xyudar grë zha Israel ne rzac zig grë mëcwxıil ne zonziaab lo xbaxtor.

25 Scaque nonee me laa wnaa co wbig pquıtsgzhib lo me.

—Bzhiguieł —rëb me—, beņ tib guiełnaac beņ xyudar naa.

26 Rëbchaa Jesús lo me:

—Nonguielđa goņ, cob ne guiet ne no nia mëëd gdeed new lo mëcw.

27 —Nliw, scaw —pquiab wnaa co—, per niicle mëcwa name rsaanaque bizhuan ma rbig ma row ma mine rrieeagaa nia mëëd.

28 Horco pquiab Jesús rëb me:

—¿Squiw nagon! ¿Rlu nli dib zdoo luu rnaloo luu naa! Gacxe waa mine rnab luu i guņ naa, niınagazh laaw ga.

Horcogazh biac xpëëd wnaa co.

*Nzian mieh ne beenguiac Jesús
(Mr. 8:1-10)*

29 Nëž co wbi Jesús bđziņ me ro Nisdoos Galilë.

Ro nis co no me, mieh guizhiu ne pcaalsa lo me. Tib dze goņ me scataa nzian mieh co, dzigo güey me güeysob me tib guic gui win zob gax ga.

30 Ga zob me rdziņ grë mieh co rdziņnie zho grë zhimguidz zho lo me, no zho zienie grë zha ne në ni, no zho zienie grë zha ne rold lo, grë zha ne guieņd tib nia, grë zha ne guieņd tib ni, grë zha ngop, ni grëragaa zha ne rlan pe stib guielguidz; grëse zho beenguiac me.

31 ¿Ncuaaņe gzee zdoo ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guieņd tib ni, guieņd tib nia, laa ni zho laa nia zho biaan zigne no gaca; grë zha ne rgob ni, haxta rias zho laa ni zho goc-wen; grë zha ne rold lo, rlozhđ gzee zdoo zho grë ncuaaņe ran zho. Grëse mieh ne ndxie ga, rzee zdoo zho, rley zho roolnie zho Dios.

32 Dzigo bredz me xpëëdscuel me rëb me lo zho:

—Rquia zdoo naa grë mieh rii. Nadzele rac tsoņ ngbidz blanso zho lo ne nu, ni na quianiedraa zho pe gow zho. Telne squise gzonëž naa zho, nend pa lo zie zho nëž ycow zho.

33 Pquiab zho rëb zho:

—¿Per pe yguiaan ne zho? ¿Pa guioxi ne guielwagw ne yquiin grëtaa mieh qui dan rii, naca zaatne guieņd mieh?

34 Dzigo bñabdiidz me lo zho, rëb me:

—¿Bla guietxtıl ziaadnie to i?

—Gadzaquew no —rëb zho—, ni chop tsoņ meł win.

35-36 Dzigo bñabey me grëse mieh co bzob zho lo liu. Blozh bzheņ me gza gadz guietxtıl co, ni gza meł co, bdeed me xquızh lo Dios; blozhse bdeed me xquızh, zigse runđol me guietxtıl co scase scase rdeed mew lo xpëëdscuel me rguıiz zhow lo grë mieh co; scaque beņ me gza meł co.

37-38 Grëse mieh co dow zho haxta zaatne bieltaa zdoo zho. Mieh guizhiuw, zha bguise rgaa zho maase tap mil, nanđragaa grë men wnaa, grë mëëđas; ni zeņe blozh ga bii biodzë gadz chicuid bio grë mine biaan.

³⁹ Blozhse bnee me lo grë miech co, blozhse bzonëz me zho, dzigo laa me bzëëb len barcw zie ne nëz xtan zha Magdal.

16

*Gocladz zha farisé niungüet zho Jesús
(Mr. 8:11-21; Lc. 12:54-56)*

¹ Magdal no Jesús, bdziñ bla zha farisé ni zla zha saducé lo me, gocladz zho niungüet zho me dien pe nxind me tib diidz, pe tib ncuaañe nonguieldgaa niun me. Rquiaalo zho rñab zho lo me gun me pe tib milagr, zeena gliladz zho nli Dios pxeel me.

²⁻³ Dzigo pquiab me rëb me lo zho:

—jPe nlipaa rnee to riende to zha nac grë ncuaañe noyac len dze rii! Zha zëëb dzigo runbey to pe rlu lo xcow. Zeene ran to rquia xcow nizhnie bdze dze, riende to quiet stib dze co zriee lo ngbidz. Sil ne rangaa to quia xcow nizhnie, quia xcow nlaan zhan gbaa, riende to guixoo quiaab dze co.

⁴ Nazdppaa ntseeb to, squitaa gocndip zdoo to nëz lo Dios, ¿zha rnaraa milagr ne racladz to gan to? Stibaque milagr gon gan to, tib miñe gac zigne bzhaac Jonás.

Blozhse sca rëb me lo zho, zoque zho ga, ziega me.

⁵ Zeene briece zho ga, zoladzd xpëëdsuel me ney zho quietxtil ne niow zho.

⁶ Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

⁷ Zeene gon zho sca rëb me, rneechaa zho: —Porne nagon ziaadnied ne quietxtil, gane squi rnee me lo ne.

⁸ Bien me sca nonee zho, dzigo rëb me lo zho:

—jGardaque lëë guien to cho nac naa! ¿Pe nacne tso to zhizhgab quietxtil?

⁹ Ni lalnu lëë peet riende to! ¿Pe rsoladzde to zeene gaayaque quietxtil bguiaañ ne gaay mil miech, bla chicuida biaan?

¹⁰ Scaque zeene gadzaque quietxtil ni bgaaw dow tap mil miech, ¿pe niicle min co rsoladzdraa to?

¹¹ ¿Zha nac dzigo rzac to quietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidppaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

*Bnee Pedr cho nac Jesús
(Mr. 8:27-30; Lc. 9:18-21)*

¹³ Bdziñ Jesús nëz xtan zha Cesarea de Filipino grë xpëëdsuel me, nëz co no me bnabdiidz me lo zho rëb me:

—¿Cho dien ron to rnee miech nac naa?

¹⁴ Pquiab zho rëb zho:

—No zho rnee Juan Bautista, no zho rnee Lív, no zho rnee Jeremíw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa zig biaad zha ne biaad padzeela.

¹⁵ Dzigo rëb me lo zho:

—¿To waa? ¿Cho rzac to nac naa?

¹⁶ Pquiab Pedr, rëb Pedr:

—jLuu nac Men ne zëëble diidz ga cxeel Dios! jXpëëd Dios nac luu!

¹⁷ Dzigo rëbchaa me:

—Dichos luu Simón (xingan Jonás) briece diidz qui ro luu, sac gon Pxoaz naa men ne no gbaa, men co bneedz guielbini qui lo luu, nacca ncuaañe cho miech nëw lo luu.

¹⁸ Ye naa gon niina laa naa gni ganle cho nac luu, luu nac zig tib que, ni que ne gon squi nac gzhixcuua naa xyadoo naa; tsod zha ne grieele gnitlo yadoo co, per ni guielgut gnitloda.

¹⁹ Laa naa rzo luu, luu gnee Xtidz naa lo miech zeena gacnañ zho zha grieele ygaa zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

²⁰ Dzigo pso me diidz lo zho choot lo gneed zho, me nac Men ne zëëble diidz ga cxeel Dios.

*Bzeet Jesús zha gun miech me
(Mr. 8:31-9:1; Lc. 9:22-27)*

²¹ Len dze co psilo Jesús bzeet me lo xpëëdsuel me zha csacsi miech me. Rëb me nroob ncuaañe cteed zho me, zeene laa me tsie Jerusalén; grë zha non lo menguietz, grë pxoz ne rnabey, grë maistr ley, ible stsidil zho me ni haxta zut zho me; per zeene gac tson ngbidz gut me, laa me grieeban.

²² Gon Pedr zha rnee me, dzigo bredzaque Pedr me blisqui Pedr lo me dien pe nacne rnee me laa me guet.

²³ Zeene bin mew, zoque Pedr ga, biecw me rëb me:

—jBiche lo naa nu mendox! jLoxaque no luu par gungüet luu naa! Zienied guic luu miñe rnabey Dios, sinque miñe rleynie miech, min co zienie guic luu.

²⁴ Dzigo bnee me lo zho, rëb me:

—Zha ne racladz seëb xnëz naa, none cueeladz zho zho, none lëb zho guiaadnañ zho miñe rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho,

²⁵ sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ndzon ne gdziñd dze lozh.

²⁶ Zha ne zienie guic loxaque gapchen, ¿pa dien yquiina lo zho, tel lëew yquiaaqui guey zho gabil? ¿Niacle zrieele gdziib zho dimi, laa zho len gabil?

²⁷ Naa ne nac naa Mgui ne pxeel Dios, zdzin dze ne gbiire guial naa stib, guialnie naa grë xanj1 naa, glu naa ganle pa lotaa men nroob nac PxoZ naa; dze co gded naa mine tsieguial tib tib miech, tel zha wban zho.

²⁸ Ib tedsod lo grë zha ne ndxie nu niina, bii no zha ne gan ganle, zeene laa naa csilo gnabey lo guidzliu rii.

17

Bdzëëlo Jesús

(Mr. 9:2-13; Lc. 9:28-36)

¹ Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

² Guic gui co no zho, zeene gon zho laa me bdzëëlo. Masaque biinidoo rriee lo me, pale lo ngbidz; xab mew, per nli rquiabniw, masaque biini ne rroņa.

³ Tibaque zeene gon zho laa Moisés ni Lí men ne biadteed xtiidz Dios padzeela, nozodiidznie me.

⁴ Rdzieb zho, lo dzeb co brieer ro Pedr rëb Pedr:

—Maestro, jtebaa zha grieelo guiaan ne nu! Telne racladz luu, na maase gzaa no tson yu yag xiid nu, tiba cuëz luu, tiba cuëz Moisés, siba cuëz Lí.

⁵ Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëëb tsi tib men co, rnee me:

—Lëë xpëëd naa i gon, rleynie naa me, rzac zdoon naa mine quiayun me. Mine rnee me, golgona.

⁶ Mazdraa bdzieb zho bin zho sca rnee men co, lëëld pquitsgzhib zho haxta bdzin lo zho lo liu.

⁷ Dzigo wbig Jesús, pcaannia me zho, rëb me:

—Golsoli, gdziebde to.

⁸ Zeene blis lo zho bui zho, mese zo ga, gon draa zho schop men co.

⁹ Blozhse ga, laa zho wbi ga. Cho gui co ziad-zëëbnie me zho, pso me diidz lo zho mine gon zho ga, choot lo gzodiidz zhow, nïeeda gal dze ne laa me brieaban.

¹⁰ Dzigo bnabdiidz zho lo me, rëb zho:

—;Bay zha nacne rnee maistr ley, glo Lí no guiaad stib, dzigoraa guiaad Men ne zëëble diidz ga cxeel Dios?

¹¹ Rëbchaa me:

—Nliw, ible nacle diidz ne glo Lí guidseed miech gon zho xtiidz Dios.

¹² Ni gacnan to ganle laa me biaadle, per beenbeyd miech me, lel psacsi zho me been zho me mine gocladztaa zho; ni ib tedsod gon, scaque csacsi zho Mgui ne pxeel Dios.

¹³ Zeene blozh sca rëb me, dzigo bien zho Juan Bautist ga rzeet me.

Biac tib mëëd ne nosacsi men dox

(Mr. 9:14-29; Lc. 9:37-43)

¹⁴ Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieer tib mgui, wbig me lo Jesús, pquitsgzhib me lo Jesús, rëb me:

¹⁵ —Laa naa rnab lo luu, bzhiguiel beenguiaac xpëëd naa, nrooble nosacsi guidz gutye win. Blactaa ziyobe win lo gui, ziyobe win lo nis ne.

¹⁶ Blansonie naa win lo xpëëdscuel luu nu, per rrieelod zho gon guiaac zho win.

¹⁷ Dzigo rëbchaa Jesús lo xpëëdscuel me:

—iPe naa squitaa miech ntseeb nac to, ib nëde to gnalo to Dios! ;Palal tiemp ne so naa gne naa lo to? ;Ncuane cxeewdraa naa lo to squi nac to! ;Goltënie mëëd qui nu!

¹⁸ Dzigo goctox Jesús lo men dox ne nosacsi mëëd co, benccoön me ma, hor cogazh laa mëëd co biac.

¹⁹ Haxta wbiraa zho ga, wbig zho lo me bnabdiidz zho dien pe nacne brieelod zho niunccoön zho men dox ne nosacsi mëëd co.

²⁰⁻²¹ Dzigo rëbchaa me:

—Brieelode to niunccoön to ma, sacne rnalode to Dios. Tel niaca mine rnalode to Dios siquier palal yeen, gzoob ne siquier lal tib midz moxtaz, niicxe ncuane mazdraa ngan gnab to lo me, zun mew; tsod ncuane grieelod gon to.

Bzeet Jesús laa miech csacsi me

(Mr. 9:30-32; Lc. 9:43-45)

²² Xtan zha Galilé no zho, tib dzew rëb me lo zho:

—Naa ne nac Mgui ne pxeel Dios, ib znaaz miech naa,

²³ haxta zut zho naa; per zeene gac tson ngbidz gut naa, zriebaan naa.

Zeene bin zho sca rnee me, bio zho guielnë, mbanse sac zho.

²⁴ Bdzin me guiedz Capernaum, loxaque bzëëb me lad guiedz, laa zha ne rtop dimi ne razh yadoo wbigle lo Pedr, bnabdiidz zho dien pe rguizh me dimi co. Pquiab Pedr rëb Pedr lo zho:

²⁵ —Rguizh mew, ;pe nacne quizhd mew?

Zeene bdzin zho len yu ne rbëz me, gardle guiab Pedra lo me, glome bnabdiidz rëb me lo Pedr:

—Zig nac dimi ne razh lo men ne nac rey dien, ;pe ye xpëëd me rguizha, te loxaque zha zit rguizha ye?

²⁶ Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëëd nodne quizh zho,

²⁷ per par guiabd zho rdziond ne diidz, güey güeyron xanzuel luu lo nis. Mel ne glopaa ygaa low, bzheñ ma pxal ro ma, ga gdziel luu dimi; dimi co güeynie bdiizh mine no dizh ne grop ne.

18

¿Cho nonraa?

(Mr. 9:33-37, 42-48; Lc. 9:46-48; 15:3-7; 17:1-3)

¹ Len dze co bnabdiidz xpëedsuel Jesús lo me, dien cho tib zho gac zha ne mazdraa gacnon lo grè zha ne no xnèz Dios.

² Dzigo bredz me tib mèèdbgui win, bzo me win glowtaa lo zho,

³ rëb me:

—Gneli naa lo to ganle, telne csaande to xquielntseeb to, telne gacnguudzladzde to, gac to zig mèèdwin rii, per ni xnèz Dios grielod sëëb to.

⁴ Zha ne racladz gac zho zha non, none gac zho tib miech ndooladz, none gac zho zig tib mèèdlas.

⁵ Miech ne gacnie zha ne sca nac, zha ne rielnie naa, rrieequia naale ga racnie zho.

⁶ Per miech ne yquuil zho guncfal zho xtol zho, jprobsaxe zha co! Mazd zhi guielnëw lo zho ygadoo tib quie molin zhoxtil yan zho tsieron zho zho nisdoos.

⁷ jNac lo guidzliu rii, runfalte guielntseeb low! Runfalte ncuuaane guncfal xtol miech, jper probsaxe zha ne yquuil zha ne nole xnèz naa, guncfal zho xtol zho!

⁸ Golguien telne tib nia to, tib nigaa to rquiaqui runctal to xtol to, goltichegazha. Peet nacda maase tibaque ni to, tibaque nia to zob totsaque yгаа to guielmban ndzon ne gdziñd dze lozh, lëdle zob gropa ni laa to guey gabil, lo beldox ne gdziñd dze guuu.

⁹ Scaque bziaalo to, mine rquiaqui runctal to xtol to, goltichegazha, peet nacd maase tibaque lo to zob totsaque yгаа to guielmban ndzon ne gdziñd dze lozh, lëdle zob gropa ni laa to guey lo beldox ne nac gabil.

¹⁰ Ib gunde to csañwin to grëraa zha ne no xnèz naa, zha ne nac zha mban, sac gon non zho lo Dios, anj ne quianap zho, tibaque zo me lo Pxoza naa men ne zob gbaa.

¹¹ Nziiu miech lo Dios, tel naa ne nac naa Mgui ne pxeel me, ib laa naa zial zialsilaa naa grè zha ne zonziaab lo me.

¹² Rzac Dios miech zig tib men ne rquiane zdoos xpëcwxii. Telne quianie zho tib gayoo ma, ni gziaab tib ma, led zëëb lëë rsañ zho stagal tsiimtap ma ne zo lo zho, rbire zho rieguib zho ma ne bziaab ga.

¹³ Zeene rdziel ma lo zho, rlozhd gleynie zho ma, lëë ma rac guielbley que grëraa xcompañer ma.

¹⁴ Scadaa nagon rzac Pxoza naa miech, grè zha ne nole xnèz me, ib racladz me gziaab zho.

¹⁵ Golguien sca, tib tib to zeene cho tib zha ne nacgrè to gun pe tib falt lo to, goltie goltsienee lo zho; gropsa to golzodidz pe nac mine pxin zho. Telne siguiel zho guiaan to mpas, laa to beenle gan ga gneewen to stib.

¹⁶ Laa telne nëd zho, dzigo golguib tib zha ne së, chopgaa zha ne së gan ganle zha rac zho.

¹⁷ Tel niicle scaw nëdaque zho guiaan to mpas, dzigo mazd golguiab lo grëse zha ne nacgrè to gnee zho lo zho. Telne niicle xtiidz zha co nëd zho gon zho, dzigotaa mazd golsaan zho, sacdraa to bets to ga, golcuae zho lad to, golsac zho zig rzac miech grè zha ne zienal guielntseeb.

¹⁸ Gneli naa lo to ganle, grëse zha ne gon xtiidz to zeene rnee to lo zho gac-wen zho, scagaa Dios scaania me zho; per zha ne gonda, ycaaniad me zho.

¹⁹ Ni racladz naa gacnañ to ganle, grè zha ne no xnèz naa, niicle tib nëzaque zho, per telne tipse rac zho, ncuuaane gnabtaa zho lo Pxoza naa men ne zob gbaa, zdeed mew.

²⁰ Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

²¹ Dzigo wbig Pedr rëb Pedr lo me:

—Zha ne sca dzigo gun falt lo naa, ¿blataa vuelt no gun naa zho perdon? ¿Gadztaaw lëë?

²² Pquiab me rëb me:

—Lëda gon Pedr, led loxaque gadzde vuelt. Tel blataa vuelt gun zho falt lo luu, none gun luu zho perdon.

Zha ne beenpardon

²³ Grè zha ne no xnèz Dios, ib none gun zho perdon samiech zho.

Tib rey name, tib dzew bredz me grè zha ne rquia dziin lo me, par dien zha quiayun zho dziin.

²⁴ Loxaque psilo me, zeene laa xcuent tib zha co blozh brie, nroob brieequia zho lo me;

²⁵ par quizh zhow, peet nzhend zho. Dzigo bnabey me to zho grop tsiel zho, xpëed zho ne, ni grëse ncuuaane rap zho, parne griello gazh xquielqui zho.

²⁶ Zeene gon zho sca rëb me, pquitsgzhib zho lo me, rëb zho: “jBeen guielnzaac, gop tib paciens, na dien zha gun naa quizh naa xquielqui naa lo luu!”

²⁷ Gon me zha rac zho, pquia zdoos me zho, psilaa me zho, beenquizhdaque me zho xquielqui zho.

²⁸ Loxaque brie zho ga, bdziel zho tib zha ne nzëëb palal yeen dimi lo zho, tib zha ne rquiaque xtsiin rey cow. Zigne gon zho zha co, zolinëz wbig zho bdie zho yan zho, rnab zho gagazh quizh zho xtimi zho.

²⁹ Dzigo pquitsgzhib zha co lo zho, rnab zho siguiel zho gap zho paciens, dien zha gaclo dimi co quizh zhow.

³⁰ Pe nquiaadiag zho ga, bnab zho bio zha co ladzguib, haxta bdiizh zho dimi ne zëëb zho ga.

³¹ Grëraa zha ne rquia dziin lo rey co, zeen gocnañ zhow, bdeednë zho, güey zho güeyzodiidz zhow lo me.

³² Zeene bin mew, bnabey me gocredz zho, goctox me lo zho rëb me: “iPe clas miech nac luu! Pe rsoladzd luu zha rac luu bnab luu pquia zdoo naa luu, haxta beenquizhd naa luu guielquidox ne zëeb luu ga.

³³ iPe nacne pquiad zdoo luu zha co, zigne pquia zdoo naa luu?”

³⁴ Blëe me gon me sca been zho, bnabey me bio zho ladzguuib, haxta blozh bdiizh zho grëse xquielqui zho.

³⁵ Scadaa nagon guñ Pxoze naa to, telne gunde to samiech to perdon, tel pe nac falt ne guñ zho lo to.

19

Zha ne rsëbtsieel

(Mr. 10:1-12; Lc. 16:18)

¹ Blozhse sca bnee Jesús lo zho, brieenie me zho ga güeyted zho grë guiedz ne ndxie xtan zha Judé, grë mine riaan nëz dan ro guibee Jordán, nëz ne rlan ngbidz.

² Miech guizhiu ne rrie grë guiedz co, rdziñ lo me; grë men rzacnë ne rdziñnie zho, beenguiaic me zho.

³ Ga no me, bdziñ bla zha farisé gocladz zho niungüet zho me, par dien pe nxind me tib diidz; bnabdiidz zho lo me rëb zho:

—Pe gnë luu dien, ipe wena csëbtsieel zha bgui ne gacladztaa csëbtsieel?

⁴ Pquiab me rëb me:

—iMod rande to zha zhonee lo Xtiidz Dios? Lo co zhonee ganle zeene psañ me miech, tib nëz zho psañ me, tib mgui ni tib wnaa.

⁵ Ni rneew, ib none greezhaa mgui lo pxoz zho, lo xnгаа zho par gbannie zho wnaa ne nac tsieel zho, gac zho tibaque miech grop zho.

⁶ Nligaa nacdreaa zho chop miech, sinque laa zho rac tibaque. Dios nac men ne psañ ycatsieel miech, cho dzigo nac miech par quiits zho mine rnabey me.

⁷ Dzigo rëb zho lo me:

—iPex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, totsaque yquia tib guits gdeed zho lo wnaa zaatne raquiet laa zho psaan wnaa.

⁸ Pquiabchaa me rëb me:

—Ne squitaaxe waa miech nad, miech ndip zdoo goc xmengol to, gane bdeed Moisés diidz csëbtsieel zho; sangue Dios psañ me diidz csëbtsieel miech.

⁹ Gacnañ to ganle, zha ne csëeb wnaa ne nac tsieel zho, ni tel peet guielyozh beend wnaa co, dol ga guñ zho csëeb zho tsieel zho ycaa zho stib wnaa. Scaquegaa mgui ne

ycaa wnaa ne psëeb zho ga, dol ga guñ zho sac gon no tsieel wnaa co.

¹⁰ Dzigo rëbchaa xpëedscuel me:

—Tel scataa nac xcuent guieltsieel, mazd lëequew dzigo ctsieelniad ne.

¹¹ Pquiab me rëb me:

—Nligaa no mgui ne rtsieelniad, per zhis zho, ni no pe nacne sca riaan zho.

¹² No zho desde rac zho mëed, nacd zho zha ne grieelo tsonie wnaa; no zho ib miech sca rsañ zho. Nogaa zha ne ib zha rbeeladz zho ctsieelniad zho, parne grieelo tsoxco-raa zho guñ zho xtsiñ Dios. Zha ne sca rquiabladz ctsieelniad, maase ctsieelniad zho.

Beenlay Jesús mëedlas

(Mr. 10:13-16; Lc. 18:15-17)

¹³ Ga no Jesús, ndal zha ne bdziñ bdziñnie zho xpëedlas zho lo me, parne cxobnia me guic win gunlay me win. Grë zha ne nac xpëedscuel me, lel psilo zho rtsidil zho pe nacne nodziñnie zho grë mëedlas co lo me.

¹⁴ Zeene gon me sca quiayun zho, rëbchaa me lo zho:

—Ctsirede to grë mëedlas yeen qui, gołsaan guiaad win lo naa. Sac gon grë mëedlas yeen, ni zha ne nac zig nac win, zha co nac zha ne sëeb ygab lo Dios.

¹⁵ Dzigo psilo me pxobnia me guic grë mëedlas yeen co, beenlay me win. Blozhse ga, laa me briece ga.

Bzodiidznie tib zha ricw Jesús

(Mr. 10:17-31; Lc. 18:18-30)

¹⁶ Laa me zieriee ga, zeene bdziñ tib mgui nguieg, tib zha ricwa, rëb zho lo me:

—Nañ naa luu nac tib men ne noseed miech, ni tib men wen nac luu. Bnë dien, ipe nac mine guñ naa parne grieelo ygaa naa guielmban ndzon ne gdziñd dze lozh?

¹⁷ Pquiab Jesús rëb me:

—Rnee luu lëe tib men wen nac naa. iNli-gaaw, Diosse nac men wen! Telne nli racladz luu ygaa luu guielmban co, none tsoxco luu gban luu mine rnabey Dios.

¹⁸ Pquiab zho rëb zho lo me:

—iPa min waa?

Rëbchaa me:

—Mine rnee:

Gute luu samiech luu, telne nole tsieel luu, tsonied luu zha ne led tsieeld luu,

cuand luu samiech luu,

yquiadiidzguizhd luu samiech luu,

¹⁹ gon pxoz luu, gon xnгаа luu, cued luu xquielto me.

Bleynie samiech luu, zigne rleynie luu luu.

²⁰ Dzigo rëbchaa zho:

—Ni tib mine rnee luu i gard quits naa, grësew zanañ naaw zigne naca. Racladz naa gacnañ naa, dien peraa no guñ naa.

²¹ Horco rëb me lo zho:

—Tel racladz luu gac luu tib zha ne gban grëse miñe nrabey Dios, güey sca güeyto grëse ncuaañe rap luu, dzigo güeytiiz dimi co lo grë zha ne guiñd pe yquiin. Lozh ga, dë dëñal zhits naa. Miñ co nagon guñ luu, dzigo zgaa luu guieñmban ndzon co; ni scagaa nroob guieñnzaac ne ygaa luu nëz lo Dios.

²² Zeene bin zho sca rëb me, mbanse rac zho laa zho zey, sac nroob ncuaañe quianie zho.

²³ Dzigo rëbchaa Jesús lo xpëëdsfuel me: —Gneli naa lo to ganle, grë zha ne squi rapchen rzacxuu zho par sëëb zho xnëz Dios gnabey me zho.

²⁴ ÿNe nligaa ngan rzac zhow! Mazd ngandse rded tib camell guieer guzh lëdle sëëb tib zha ne squi rapchen xnëz Dios.

²⁵ Zeene bin zho sca rëb me, rzee zdoz zho, rnee zho:

—Bay, ÿchösezhe dzigo waa nac zha ne zrieelo sëëb xnëz Dios?

²⁶ Dze bui me lo zho, dzigo rëbchaa me:

—Nligaa par miech zootle tsod zha ne grielo sëëb xnëz me; sangue me nan me no zho. Sac tel me, tsod ncuaañe grielod guñ me.

²⁷ Horco pquiab Pedr rëb Pedr lo me:

—No dzigo waa, ÿpe nac miñe ygaa no? Nanle luu ganle, tel no grëse ncuaañe rdzi-aap no, laa no psana, ziaadnal no zhits luu.

²⁸ Pquiab me rëb me:

—Golgona ganle, dze ne gacncub grëse ncuaañe no, zeene laa Mgui ne pxeel Dios zob lo xcan ne zo zaatne nac lo guieñndzon ne no me, dze co lo gza to ne nac to zha ne biaadnal zhits naa, sob to lo gza tsiipchop xcan ne rieguial to. To gac zha ne guñ guieñwxtis lo gza tsiipchop dii ne nac zha Israel.

²⁹ Grëragaa zha ne psan lidz, psan zho bets zho, bzian zho, xniaa zho, pxoz zho, tsiel zho, xpëed zho, liun zho porne noyun zho xtsin naa, na lo guieñmban riique laa zho gana stib tib gayoogaw tib tiba; ni ib tsodsd zgaa zho tib guieñmban ndzon ne gdziñdraa dze lozh.

³⁰ Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grë zho.

20

Lalga nac grë zha ne no xnëz Dios

¹ Grë zha ne no xnëz Dios, zac zho lo me zig bzhaac grë zha ne güey xtsiin tib men co.

Tib men co name nroob dziin quianie me, tib dzew zigne biini liu brieem me güeyguib me zha ne tsielaap xuv me.

² Bdzuel me palal zho, biaan zho diidz palal quizh me zho dze, laa zho bzëëb lo dziin.

³ Glaale ngbidza brieem me güeyted me len guiedz, lëëtse güeytsib me lo bla zha ne zob ga racladz dziin.

⁴ Dzigo bree me zho, rëb me: “Goltsie xtsin naa, na quizh naa to miñe non xtse to.”

⁵ Rwe ngbidza, biire me güey me güeyguib me spalal zho. Maase las treza güeyaque me stib.

⁶ Zhile sëëb ngbidza, biire me güey me len guiedz. Ga bdziel me zla zho, gon me scase zob zho ga. Dzigo rëbchaa me lo zho: “ÿPe nacne squise noded dze to?”

⁷ Pquiab zho rëb zho: “Choot rneedzdaxe dziin waa yquiaa no.” Rëbchaa me: “Nasca zeena tsie to lo xtsin naa, maase quizh naa xtse to.” Dzigo laa zho zie.

⁸ Zeene laa dze blozh bdze, bnee me lo zha ne zo lo xtsiin me, rëb me: “Bredz grë zha qui na, bdiizh xtse zho grëse zho. Zha ne bza bzëëb lo dziin, zha co glo bdiizh, lozhraa ga quizh luu zha ne glo bzëëb.”

⁹ Dzigo bded zha ne bdzele dze bzëëb lo dziin ga, tib tib zho pcaase zho miñe non zho tib dze.

¹⁰ Grë zha ne glo bzëëb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

¹¹ Zeene gon zho lalga pcaa zho grë zho, blëe zho, güey zho güeylisqui zhow lo men ne nacchen dziin ga, rëb zho:

¹² “Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, ÿzha nac dzigo lalga quizh luu no grë no zha qui, ni niipyeenaque been zho dziin?”

¹³ Pquiab me rëb me: “Bets, nosacsid naa to, biaanle ne diidz name palal quizh naa xtse to.

¹⁴ Nana sca golgüey xtimi to i, zeena golsë. Ib zdoz naa rala lalga quizh naa to grëse to.

¹⁵ ÿStiba, xtimi naaw, zrieelo gundziin naaw zigne racladz naa! ÿTe në rac zdoz to ye, ran to rquia zdoz naa miech?”

¹⁶ Scapaa nagon gac zha ne no xnëz Dios. Lal gacnon zho, zigtaa zha ne glo bzëëb xnëz mew, zigtagaa zha ne sëëb bzaw.

Bzeet Jesús stib laa miech csacsi me

(Mr. 10:32-45; Lc. 18:31-34)

¹⁷ Nëz no Jesús zie me nëz Jerusalén, tibaque bredz me gza tsiipchop xpëëdsfuel me,

¹⁸ bzeet me lo zho zha guñ miech me zeene laa zho gdziñ Jerusalén, rëb me:

—Ib ziaab naa ladznia grë pxoz ne nrabey grë zho maistr ley, zha gnab guet naa.

¹⁹ Zha co naa ladznia zha zit, parne guñguzee zha co naa, parne quin zho naa, ni haxta squiaa zho naa lo cruz. Per zeene gac tson ngbidza, zriebaan naa.

²⁰ Tibaque zeene wbig tsieel Zebedé wbig-
nie me grop xingan me Jacob ni Juan, pqui-
itsgzhib me lo Jesús rnab me gun Jesús tib
favor ne racladz me.

²¹ Dzigo bnabdiidz Jesús lo me, pe nac
favor ne racladz me. Pquiab me rëb me:

—Racladz naa gneedz luu diidz sob tibga
xpëéd rii naa cue luu zeene gdziñ dze ne laa
luu zob zobnabey luu; tib zho nëz derech,
stib zho nëz revés.

²² Pquiab Jesús rëb me lo wnaa co:

—Ni luu gon riend pe rnab luu! ¿Niácwe
zlëb zho gan zho grë guielnë ne gan naa,
tedгаа zho grë mine teed naa?

Pquiab zho rëb zho:

—Zlëeb no.

²³ Rëbchaa me lo zho:

—Ni nenda zan to grë guielnë ne gan naa,
ni zdedгаа to mine teed naa; per ne gnedz
naa diidz sob to cue naa nëz derech, nëz
revésgaa, led naad raguial min co; sac laa
lugar co biaanle par zha ne tsieguiala, ni
Pxoz naa men ne zob gbaa men cose nan
dien chow.

²⁴ Grëraa xpëédscuel me, zeene bin zho pe
nac mine rnab Jacob grop Juan, blëe zho lo
zho.

²⁵ Dzigo bredz Jesús zho grë zho, rëb me lo
zho:

—Ran to ganle zha run grë zha ne rn-
abey grë guiedz ne ndxie lo guidzliu, ni grë
zha ne nac zha non, masaque rnabey zho
samiech zho zigne racladzttaa zho.

²⁶ Sangue to gon gunscaed to. Zha ne
racladz gac zho zha non lo to, laa ne glu zho
zha non zho, none glo zho guiaanwin, gac
zho zig tib ngundziin lo to.

²⁷ Scaquegaa zha ne racladz gnabey zho
lo to, none glo cseed zho gun zho mine
gnabey to zho.

²⁸ Golgan ganle, niicle naa ne nac naa
Mgui ne pxeel Dios, ziald naa par gnabey
naa miech, sinque laa naa zial par gac naa
tib ngundziin lo zho, ni gded naa xquielmban
naa zeena laa zho lo grëtaa nuaane ngadoo
zho. Ni nanpaa naa miech guizhiu ne laa.

Biac chop zha ne rold lo

(Mr. 10:46-52; Lc. 18:35-43)

²⁹ Miech guizhiu nal zhits Jesús, laa me
zieriee guiedz Jericó.

³⁰ Ro nëz co zob chop zha ne rold lo, zeene
bin zho laa me ziaad ga, psilo zho nguiedz
rbedz zho rnee zho:

—Jesús, men xtií rey David, pquia zdoo
no!

³¹ Blalaa zha ne zie ga, psilo zho ndox zho
lo grop zha co parne guioog ro zho, per lel
hor cole nguiedzraa rbedz zho me.

³² Nacne zeene bdziñ me zaatne zob zho,
blëz me, bnabdiidz me lo zho rëb me:

—¿Pe nadien gun to naa?

³³ Pquiab zho rëb zho:

—iRacladz no guiac lo no!

³⁴ Pquia zdoo me zho gon me sca rac
zho, dzigo pquiaania me zhits guidlo zho.
Horcogazh laa lo zho biac, laa zho zianal
zhits me.

21

Bdziñ Jesús Jerusalén

(Mr. 11:1-11; Lc. 19:28-40; Jn. 12:12-19)

¹ Sca no Jesús nëz grë xpëédscuel me, laa
me bdziñ guiedz Betfagé. Gaxle ga riaan
Jerusalén, nëz danse squi riaan Gui Oliv.
Dzigo pxeel me chop xpëédscuel me, rëb me
lo zho:

²—Goltsie guiedz win ne ndxie danse lo ne
i. Ga gdziñ to zaatne quiadoo tib burr gus
grop xpëéd, dzigo golxadz ma goltënie ma nu.

³ Tel cho gnabdiidz pe nacne noxadz to
ma, golguiab lo zho: Men ne rnabey ne,
men co rquiin ma, na zigne lozh xtsiin ma
guiaadsan no ma.

⁴ Ga brieequia mine bnee tib men ne bi-
adteed xtiidz Dios lo miech padzeela, zeene
rëb me:

⁵ Golguiab lo men Jerusalén:

“Golwi ganle, laa men ne nac zhirey to ziaad
i.

Tib men ligase rlu me, zob me lad tib burr
win,

tib ladse ma ne rey yo zob me.”

⁶ Laa zho zie, zigne bnabeyse me zho ga,
scase been zho.

⁷ Zeene wbiere zho, laa zho bdziñnie burr
co grop xpëéd ma. Pxob zho lar ne rbix zho
lad xpëéd ma, laa me bzob ma.

⁸ Zigse zie me, no grë miech guizhiu co,
rta zho lar ne rbix zho ro nëz rded burr ne
zob me ga; nogaa zha ne rchoo nia grë yag
nguaia, rdziin zhow ro nëz rded me.

⁹ Grëse zho, zigtaa zha ne nera, zigtaa zha
ne nala, nguiedz roptsie zho rnee zho:

—iGolgotasaa co ne xviv xingan David!
iGolgotasaa gleynie ne me! iZha ndzontaa
Dios, pxeel me men nroob qui lo ne!

¹⁰ Zeene bdziñ me Jerusalén, rlozhd gzee
zdoo grë miech ne ndxie ga, rnabdiidzla
zho rnee zho:

—iBay cho nac men qui?

¹¹ Rquiab grë zha ne nal zhits me ga, rnee
zho:

—iLëe Jesús i! iLëe men Galilé qui, noteed
xtiidz Dios lo miech!

Blee Jesús miech len yadoo

(Mr. 11:15-19; Lc. 19:45-48; Jn. 2:13-22)

¹² Biini liu co, zeene bdziñ Jesús Jerusalén
stib, güey me yadoo nroob ne zob lad guiedz
co. Bdziñ me gon me nzian miech ne ndxie
ga, masaque tib lgui quiaayun zho, zha ne no
wto, zha ne no wzi. Nacne güey me ptiixche
me xmezha zha ne notsëe dimí, ptiixche me

xmez h zha ne no wto palom; blee me zho ga grêse zho,

¹³ rëb me lo zho:

—Led znu gon zhubnee lo Xtiidz Dios: “Zaatne nac lidz naa nu, nu none guiaad grêse miech sodiidznie zho naa.” Laa to gon, quaiyun to lugar rii zig tib zhibliee ngbaan.

¹⁴ Ga no me bdziñ bla zha ne rold lo, zla zha ne nê ni, wbig zho lo me. Gzase zho beenguiaac me.

¹⁵ Nzian mēēdlas yeen ne ndxie len yadoo ga, psilo win nguiedz rnee win: “iZha ndzon-taa xingan rey David!”

Grê zha ne nac pxoz ne rnabey, ni grê maistr ley, zeene gon zho milagr ne been me ga, ni gon zho zha rnee grê mēēdlas co, rlēē zho,

¹⁶ rëb zho lo me:

—iPe ib rond luu ganle pe nonee grê mēēdlas qui?

Pquiab me rëb me:

—Ron naaw. iTo waa, pe rande to ganle zha zhubnee lo Xtiidz Dios, zaatne raquiet mine noyac nu? Led rneew lēē: Haxta grê mēēdlas ne bii radz, ye win rley win roolnie win me.

¹⁷ Blozhse sca rëb me, zoque zho ga, laa me bio nêz zie me nêz Betain. Ga blēz me wdze co.

Wbidz tib yag guigw

(Mr. 11:12-14, 20-33; Lc. 20:1-8)

¹⁸ Sil co zeene no me nêz gdziñ me Jerusalén, pcaabedz me.

¹⁹ Gon me zob tib yag guigw gax ro nêz, dzigo güey me güeyso me low dieñ pe ndziel tib nex low niow me. Bdziñ me gon me loxaque zhiblagsew zēēb, nacne rëb me low:

—iLēē blozh xtse luu nu gon! iGdziñdraa dze ne yquia nex lo luu!

²⁰ Biini liu, zeene laa zho zie Jerusalén stib, gon xpēēdsuel me, laa yag guigw co bidzle. Bzee zdoo zho, bnabdiidz zho lo me rëb zho:

—iBui ganle, bay zha nacne squi znuse wbidz yag guigw qui?

²¹ Pquiab me rëb me:

—Gneli naa lo to ganle, telne dib zdoo to rnalo to Dios, niicle ncuane mazdraa ngan gnab to lo me, zun mew. Lēēraasi none dib zdoo to gliladz to zaca, ni palal gacchopd guic to.

²² Grêse ncuane gnab to zeene rzodidznie to me, zneedz mew, totsaque dib zdoo gliladz to laa to ycaaniaw.

²³ Bdziñ me Jerusalén, wbiire güey me len yadoo. Ga noseed me miech, zeene bdziñ bla zha ne nac pxoz ne rnabey ni zla zha ne nac men non lo menguiedz, bnabdiidz zho lo me rëb zho:

—iCho dzigo nac luu ne squitaa zi-aadnabey luu len yadoo? iCho rnabey luu?

²⁴ Pquiab me rëb me lo zho:

—Ye naa laa naa gon tib wnabdiidz lo to. Telne stsiro to low, dzigo gni naa lo to ganle cho rnabey naa ne laa naa noyun grê ncuane noyun naa.

²⁵ Golnē dieñ, iCho pxeel Juan Bautist bi-aad me pchoobnis me miech? iPe Dios pxeel me, te miechsew ye?

Psilo zho rnabdiidzlsa zho dieñ zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnē: “iPex nac dzigo waa biladzde to mine bnee me?”

²⁶ Tel na dzieetsгаа ne, miechse pxeel Juan, grieequiadaque ne.

Rdzieb zho niab zho miechse pxeel Juan, sac nan menguiedz nli Dios pxeel Juan biadteed Juan xtiidz me lo miech.

²⁷ Dzigo mazd mine been zho rëb zho lo me:

—Ndiond no dieñ cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rnabey naa quaiyun naa grê min rii.

Zha nac zha ne rond diidz

²⁸ iGolquiaadiaga ganle. Tib mgui, quianie me chop mēēdbgui. Tib dzew, bredz me tib zho rëb me lo zho: “Xin, none gon tsie luu nadze, tsietop luu uv xcuua ne.”

²⁹ Pquiab zho rëb zho: “iGad naa!” Wdzee-laaw, bien zho nonguielda ga sca gun zho, dzigo bio zho nêz güey zho.

³⁰ Laa stib zho, zeene bredz me zho bnabey me zho tsie zho lo dziin, rëb zho: “Peet nacda, na maase ga naa.” Blozh ga pasē zho nie.

³¹ iGolnē dieñ, lo grop mēēd co, iCho nac zha ne bin xtiidz pxoz?

Pquiab zho rëb zho:

—Zha glo cow.

Dzigo rëbchaa me:

—Gneli naa lo to ganle, mincodaa quaiyac nu niina: Grê zha ne rzac to mazdraa ngoopdol, zig nac grê zha ne rtop dimi ne razh lo zha Roma, zig nac grê wnaa ro nêz, mazd glole zha co nozēēb xnêz Dios, lēdle to.

³² Biaadpaa Juan Bautist name biadseed me miech csaan zho xquielntseeb zho, gban zho zigne racladz Dios, ni pe liaadz to nion to mine rnee me. Mazd grê wnaa ro nêz, grê zha ne rtop dimi ne razh lo zha Roma, znuse psaan zho xquielntseeb zho. Laa to, niicle ran to nosaan grê zha co xquielntseeb zho, per ib rsaande to mine nac to.

Xcuent zha ne pquianap liu

(Mr. 12:1-12; Lc. 20:9-19)

³³ Dzigo bzodiidz me stib cuent lo zho rëb me:

—Tib meñ name, nroob lbë uv beebni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieë, laa me zey zit.

³⁴ Zeene goł meë ne laa nex co goł, pxeel me bla zha ne quia xtsiin me zie lo zha ne quianap liun me ga, parne gdeed zha co uv ne rieguial me ycaa me.

³⁵ Per leł bnaaz zho zho, zha ne blooquie zho, zha ne bdeedgolp zho, haxta beet zho tib zho.

³⁶ Wbiire pxeel me zla zho, hor cole nzian-
raa zho pxeel me, per niapse sca psacsi zha co zho.

³⁷ Tibaque zeene pxeelaque me xpëed me, bza guic me rëb me: “Ganse zho xpëed naaw, zon zho miñe gnee me.”

³⁸ Pex nion zho diidz, zeene gon zho xpëed me, rëbcha zho: “İLëë zha qui nagon guiaannie liu rii! İGolgotsaa dziut ne zho, zeena guiaana lo ne!”

³⁹ Dzigo bnaaz zho xpëed me, güeynie zho me zaatne nac tib lad lo liu co, ga güeygut zho me.

⁴⁰ ¿Zha sca dien rzac to gun bizhuan liu co ga zha co, zeene laa me gbire?

⁴¹ Pquiab grë zha ne nac pxoz ne rnabey, ni zha ne nac zha non lo meñguiedz ga, rëb zho:

—Ni lalnu yquiad zdoo me zho, znitlogazh me zho. Lozhe ga, cuediinga me liun me lo zla zha ne gundziina, zha ne guien gdeed nex ne rieguial me ycaa me.

⁴² Dzigo rëbcha zho me lo zho:

—Haxta lo Xtiidz Dios no tib zaatne znu rnee, ¿pe gard ganle glab tow? Rneew: Quie ne psëeb zha ne nozaa yu, ni nand zho lëepaa quie co nac miñe rnazdizits yu.

İNcuanañe gzee zdoo new! Sac Dios bnabey sca goca.

⁴³ Gacnañ to ganle, scadaa nagon grieë to lad grë zha ne ngab lo Dios, parne gbig zha ne tsoxcopaa gun xtsiin me, zha cole guiaana xlugar to.

⁴⁴ Zha ne tsietsohe lo quie ne raquiet ga, zac zho zig tib ncuanañe rac tson tap lë; laa tel lëegaaw tsohe lad zho, zac zho zig tib ncuanañe die die rac.

⁴⁵ Grë zha ne nac pxoz rnabey ga, ni grë zha farisé, zeene blozh pquiaadiag zho cuent ne bzodiidz me lo zho ga, bien zho zha ga rzeet me.

⁴⁶ Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

¹ Bzodiidz Jesús stib cuent lo zho, rëb me:

² —Grë zha ne rbedz Dios ygab zho xnëz me, none tsoxco zho gon zho miñe rnee me; sac nenda gdzieelo zho zig bdzieelo zha ne bredz tib rey co nie zho lo zhilni xpëed me.

³ Tib rey name, ziaadyob tsielnie xpëed me, nzian zha ne bredz me tsie lo İni. Zeene laa dze co bdzin, pxeel me zha ne quia dziin lo me zietsedz grë zha ne bredz me lo İni ga, per nëd zho nianał zho.

⁴ Wbiire gon me zla zho rëb me: “Gołtsietsedz zho, gołguiab, laa guielwagw ne yquin goclole, siguiel zho na guiaad zho.”

⁵ Per ib beencasd zho zha ne pxeel me ga, no zho brieë zie lo xcuaa, no zho brieë zie zhiwto,

⁶ nogaa zho leł bnaaz zho zha co, psacsi zho zho, beet zho zho.

⁷ Zeene gon me sca been zho, blëë me, bnabey me grë xmenguiib me güey zho güeygut zho grë zha ntseeb ne psacsi xmandad me ga, ni bnabey me bzëeg zho guiedz co.

⁸⁻⁹ Blozh ga biire pxeel me zla zho, rëb me: “Laa guielwagw rii goclole, miñe naca gołtsie tib nëz yu, zha ne gdzieeltaa to, gołcuedz zho guiaad zho lo İni; sac grë zha ne bredz naa ga niaad, laa zho blule ganle rieguiald zho guiaad zho nu.”

¹⁰ Dzigo brieë zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grëse zho bredz zho bdzinie zho zho lo İni. Goł hor wagw, biodzëse len yu ndxie miech.

¹¹ Zeene laa rey bzëeb zienee me lo zho, gon me lad co no tib zha co nacwxabd zho zigne rieguial gacwxab zha ne sca rie tib lo guieltsieel.

¹² Dzigo rëbcha zho me lo zho: “Bets, ¿pe nacne squire luu bzëeb luu nu, bui ganle nacwd luu lar ne nzedz zho niacw luu?”

Dzese zob zho, rdziel zho pe guiab zho lo me. Gonse me sca rac zho,

¹³ bnabey me zha ne nodziib lo mezh rëb me: “Gołzobdoo zha rii, gołxidoo grop nia zho, grop ni zho, gołcuee zho nu gołtsieron zho lo ncow nëz ley, İga nac zaatne rieguial zho, ga gan zho guielnëdoo ne no ted zho, goonnë zho, haxta goy law zho!”

¹⁴ Mincodaa nagon rac len dze rii —rëb Jesús—, ndal zha ne racredz sëeb xnëz Dios, per zhis nac zha ne rioxco rzëeb.

*Pe nonguiel quizh miech contribucion
(Mr. 12:13-17; Lc. 20:20-26)*

¹⁵ Blalaa zha farisé ne ndxie ga güey zho bnediiz zho dien zha gungüet zho Jesús cxin me tib diidz, zeena miñ co yquiaaqui tsiezo zho me lo wxtis.

¹⁶ Dzigo pxeel zho bla zha ne nacgrë zho, ni güey zla zha ne racnie Herod gocgza zho. Bdzin zho rëb zho lo me:

22

Zha ne nëd sëeb xnëz Dios

—Maestro, ndion no niapse diidzli zienal luu, ni scagaa zeene rseed luu miech, rdziebd luu miñe nac diidzli miñ co rnee luu lo zho.

¹⁷ Gane niina, racladz no gnë luu dien pe nonguiëla ga rdeed no dimi ne razh lo rey ne zob Roma, te nonguiëlda ye.

¹⁸⁻¹⁹ Bienga me racladz zho gungüet zho me, dzigo rëbchaa me lo zho:

—¿Pe nan to na rienð naa pe no guic to? Masaque rëb to na lëë, znuse gungüet to naa. Golneedz tib pes ne rguizh to nu ganle.

Dzigo bdeed zho tib pes plat lo me.

²⁰ Blozh ga, rëbchaa me lo zho:

—¿Cho nu, cho lë nu quia lo pes rii?

²¹ Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Miñe rieguial sca ycaa rey, goldeeda lo rey; scaqueega miñe rieguial ycaa Dios, lo Dios goldeeda.

²² Zeene gon zho sca ptsire me lo xtiidz zho, bzee zdoo zho, mazd miñe been zho laa zho wbigchese ga, laa zho zey.

¿Pe nli zrieeban miech?

(Mr. 12:18-27; Lc. 20:27-40)

²³ Dze coquew, güey bla zha saducé lo Jesús. Nac zha saducé rliadzd zho zdziñ dze grieeban miech. Dzigo bdziñ zho,

²⁴ rëb zho lo me:

—Maestro, znu psan Moisés diidz: Telne glo mgui guet lo wnaa ne nac tsieel mgui, ni gopd wnaa mëéd, dzigo none betsaque zho ctsieelnia wnaa co stib, zeena gap wnaa mëéd ne guiaan xlugar xpëéd zha ne gut ga.

²⁵ Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut biaanð xpëéd zho. Dzigo ptsieelnia stib bets zho wnaa co.

²⁶ Blozh ga gataque zha co, pa së zho nsan mëéd. Ptsieelniaque me stib zho, goc zho tson, niicle zha co psandaque mëéd. Sca sca haxta bza gza gadzse zho ptsieelnia me,

²⁷ tibaque zeene yequ me laa me gut.

²⁸ Miñe racladz no gacndion no, ¿chopaa dzigo gac tsieel wnaa co zeene laa zho grieeban? Sac gza gadzse zho ptsieelnia me.

²⁹ Pquiab Jesús rëb me lo zho:

—I nagon laa to rxin, miñe naca rienðe to zha nac Xtiidz Dios, niicle rliadzde to zrieele me gun me ncuuan ro ne gard gan miech.

³⁰ Sac gon zeene gal dze ne laa grë miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grë anj ne no gbaa.

³¹ Stiba, ib nli zrieeban mengut. Mod ranðe to zha zhubnee zaatne raquiet zeene rëb Dios:

³² “Naa nac Dios ne rliadz Abraham, naa nac Dios ne rliadz Isaac, naa nac Dios ne rliadz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, inacd me xDios mengut, sinque xDios zha mban nac me!

³³ Grë miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

Xley Dios miñe mazdraa non

(Mr. 12:28-34)

³⁴ Grë zha farisé ne ndxie ga, gon zho sca psioog Jesús ro grë zha saducé co.

Horco biire grë zha farisé co bzodiidz zho stib.

³⁵⁻³⁶ Lad zho no tib maistr ley, dzigo wbig maistr ley co lo Jesús, rëb zho:

—Maestro, lo grë xley Dios, bzhiguiel bnë lo naa dien, ¿pa miñ nac miñe mazdraa non?

Sca rëb zho, sac gocladz zho niungüet zho me.

³⁷⁻³⁸ Pquiab me rëb me lo zho:

—Lëë miñe mazdraa non nu znu rnee: “Dib zdoo luu, dib xalm luu, dib guielbiini ne no guic luu, bleynie Dios, meñ nroob ne rnabey luu.” Lëew nac miñe mazdraa non, ni lëew glopaa raquiet lo grëse ley.

³⁹ No stib miñe rnee: “Bleynie samiech luu zigne rleynie luu luu.” Ye miñ rii nona, meraque lala con miñ glo.

⁴⁰ Zha ne gban zigne rnabey grop ley rii, lëele grë ley ne psan Moisés ga, lëele grë zhiwseed zha ne biadteed xtiidz Dios ga, zienal zho.

¿Cho xpëéd nac Crist?

(Mr. 12:35-37; Lc. 20:41-44)

⁴¹⁻⁴² Gon Jesús nzian farisé ndxie lo me ga, nacre bnabdiidz me lo zho rëb me:

—¿Zha dien rzac to guiaad Meñ ne zëëble diidz ga cxeel Dios? ¿Cho lo xtiï grieequia me?

Pquiab zho rëb zho:

—Lo xtiï David grieequia me.

⁴³ Dzigo rëbchaa me lo zho:

—¿Pe scaw sca? Zha nac waa zeene bdeed Espíritu Sant guielbiini lo David bzeet David meñ co, rëb David me nac meñ ne rnabey David. Golgan ganle znu bnee David:

⁴⁴ Rëb Dios lo meñ ne rnabey naa:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csañ naa zho ladzna luu.”

⁴⁵ Gase nagon telne nli zha xtiï David gac Meñ ne cxeel Dios ga, ¿zha nac dzigo rnee David meñ co rnabey David?

⁴⁶ Ni tib zho ib bdzielð zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

23

Mine nac maistr ley grë zho zha farisé

(Mr. 12:38-40; Lc. 11:37-54; 13:34-35; 20:45-47)

¹ Dzigo psilo Jesús bnee me lo grë miech co, ni lo xpëédscuel me,

² rëb me lo zho:

—Grë maistr ley ni grë zha farisé ib lëë xtsiin zho ga, nac cseed zho miech zha nac ley ne psan Moisés.

³ Golguien golgon xtiidz zho, i per nsin golso, ib gunde to mine run zho! Nac zho, ni lalnu rund zho mine rseed zho miech.

⁴ Rio zho rnee zho lo miech, min rii, min rii rnabey ley gun to, ni per ni zha rioxcd zho siquier csilo zho gun zhow.

⁵ 'iGrë ncuaañe run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rriba.

⁶ 'iZeene rbedz miech zho tib wagw nroob, rdziladz zho zhapaa rzob groj mezh, niicle len yadoogaaw, zaatne glupaa zha non nac zho, ga rzob zho!

⁷ Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸ 'Sangue to gon yguibde to dien zha gnee miech “zha rac” nac to, sac tibaque men rac no, lëë me ga zëëble diidz cxeel Dios; golguien ganle tel to lalga nac to, rrieequia bies to grë to.

⁹ Ib gunde to zig run grëraa miech, runnon zho tib samiech zho rnee zho lëë pxoz zho ga, sac tibaque men ne nac Pxoz to, lëë men co no gbaa.

¹⁰ Yguibde to sac miech topaa gunctsin zho lo Dios, sac loxaque Men ne nolë diidz ga cxeel me, men cose zrieelo gunctsin zho lo me.

¹¹⁻¹² Nodne gacglaa lo to samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

¹³ 'iProbsaxe to maistr ley, probsaxe to zha farisé! Lëda i gon noyun to, rzac to noxco to sëëb miech xnëz Dios, per lel noca to sëëb zha ne racladz sëëb. Ni stiba, per ni to nod xnëz me.

¹⁴ [iProbsaxe to! Guielntseeb i gon run to, rio to rlozhd gool to xlay to rzo to ro nëz, ni noque to rla to ncuaañe rapse grë wnaa viud; ib tedsod gon guielndëdox ne yгаа to.]

¹⁵ 'iProbsaxe to, rzac to na lëëw ga run to! Rio to gui dan rbix to, haxta rded to nisdoo, rquiaguib to dien cho sëëb xnëz to ni rlozh

ga laa ne ygab zho nëz lo Dios, lel nëz len gabil zienie to zho.

¹⁶ 'iProbsaxe to, nac diidz name to noseed miech, ni per ni to riend pe rnee to! Rnee to lo miech: “Zha ne rzeet yadoo ni tel gunđ zho mine rnee zho, peet nacd ga, per tel gzeet zho grë or ne no len yadoo ni gunđ zhow, dol ga gun zho.”

¹⁷ 'iNadzpaa nxen to, nadzpaan cow nac guic to! 'iNiacxe mazdraa non or lo yadoo? Golguien ganle por yadoo, naclay grë or co.

¹⁸ Rneequie to: “Zha ne gzeet lo pcoog, led dolda telne gunđ zho mine rnee zho; per tel gzeet zho gon ne ndziib lo pcoog ni gunđ zhow, dol ga gun zho.”

¹⁹ 'iPe nliipaa rnee to peet riende to! 'iNiacxe mazdraa dzigo non gon que lo pcoog? 'iPe rande to por lo pcoog co raclay gon?

²⁰ Golguien ganle, zha ne rzeet lo pcoog, yele grë ncuaañe ndziib low ga quiazeet zho;

²¹ zha ne gzeetгаа yadoo, haxta Diosle ga gon rzeet zho, sac ga rbëz me.

²² Scasaque zha ne gzeet gbaa, zaatne rzoble Dios ga nozeet zho, masaque rrieequia me ga rzeet zho.

²³ 'iProbsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grë guizh bitxtil, guizh nizh, guizh comin run to tsii lal, rdeed to tib lala mine rieguial tsiesan to yadoo, laa ley ne mazdraa non zienie guic to gun to mine rnabeya. Nli rieguiala gdeed to grë gon co, per none scaque soxco to gun to mine nac diidzli, none yquia zdoo to samiech to, none dib zdoo to gnalo to Dios. Min rii nac mine mazdraa non.

²⁴ 'iNe nliipaa ib riende to pe quiayun to! Rzac to na noxco to gunctalde to xtol to, masaque ni tib ngurudz rsaande to tso lo ncuaañe row to, ni riende to rrieequia haxta tib camell rab to.

²⁵ 'iProbsaxe to, masaque nac to zig tib plat, zig tib tas ne nëz zhitssew mbe rna, laa nëz lena rnaadraa! Laglaase rquiaalo to miech wen nac to, per tibaque noban to, tibaque nosacsi to samiech to.

²⁶ Golguien none glo csaan to xquielntseeb to, none gac to zig tib plat zig tib tas ne zigtaa mbe nëz zhitsa, scagaa mbe nëz lena.

²⁷ 'iProbsaxe to, nac to gon zig grë baa ne dieen paraa nquitsbie rna! Niow rlu nëz zhitsa, laa nëz lena loxaque grë ncuaañ biodz, loxaque grë dzit ngutoo nodzë.

²⁸ Sca gon nac to, ne rac to zootxe luu waa nli miech ndzinli nac to, per nëz len zdoo to loxaque zhab ne dien zha yquidie to miech, zha csacsi to miech no to.

²⁹ 'iProbsaxe to maistr ley, probsaxe to farisé! Ni lalnu guielto guiend lo to, rio to rzhixcuua to ro xpaа grë zha ne biadteed xtiidz Dios, ni lëëpaa grë pxozgol to beet zho.

Dieen peraa run to rquiaalo to rsoladz to zho.

³⁰ Rnee to: "Telne niaca mine nole ne len dze co, ndeete ne diidz nsacsi xmengol ne grë men rii."

³¹ ¡Lëëque to gon nobeero ga, zha nactaa lo dii ntseeb ne ziaad to!

³² ¡Scaque nasca golgun! ¡Goltisial grë mine been pxozgol to ga!

³³ ¡Miech ngoopdo! ¡zhin mendox! Telne csaande to xquie!ntseeb to i, ib tedsod gon gabil guey to.

³⁴ Grë zha ne cxel naa, zig nac zha ne guiadteed xtidz naa, zha ne nacie Espiritu Sant, zha ne yгаа guie!biini yquiaa zho mine gnabey Espiritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho lëëque len xyadoo to gdeed yag to zho, ib gandzede to zho, stib guiedz, stib guiedz tso to ctsidil to zho.

³⁵ Blactaa grë miech ne sca peet xtold ziyut to grë xmengol to, psilow desde Abel haxta Zacari xingan Berequi, men ne beet xmengol to zaatne nac gax lo pcoog len yadoo. Ni ye to gon zëëb xchen grëse zha co.

³⁶ ¡Gneli naa lo to ganle, grë miech ne gon mban len dze rii, grë to zho yгаа guie!nedox ne tsieguial to por grëtaa guie!ntseeb co!

³⁷ ¡Aque tow men Jerusalén! ¿Pe nacne squitaa nac to, rut to zha ne ziadteed xtidz Dios lo to, rgoquie to grë zha ne rxeel me lo to? Blactaa gocladz naa, niacnie naa to, nquianaap naa to, zig run nguid rgueedz ma xpëéd ma, per bzhiguiel de to.

³⁸ Gacnan to sca ganle, nadzetaa gon laa lidz to nu guiaan ngan,

³⁹ sac gandraa to naa, haxta gal dze ne guiab to: "Zha ndzontaa men qui pxeel Dios lo ne!"

24

¡Nsin go!so!

(Mr. 13:1-23; Lc. 17:22-24; 21:5-24)

¹ Laa Jesús zieriee len yadoo grë xpëédsuel me, zeene pceuëdzde zho me, rëb zho:

—Gotsaa gwi ne ganle zha niaataa yadoo rii.

² Blozhse bui zho low, rëbchaa me lo zho:

—Niicle squitaa nagon niaaw, per zdziñ dze ne nitlow dib nacsew. Ni stib quie qui guiaan draa zigne squi zhobxcuaaw i.

³ Brie me len yadoo ga grë me zho, laa zho zie nëz Gui Oliv. Bdziñ zho cho gui co, ga bzob me grë me zho. Dzigo wbig gax bla zho lo me, bnabdiidz zho rëb zho:

—Bzhiguiel bnë lo no dien, ¿pa hor dzigo gac mine bzeet luu ga? ¿Zha glu zeene laa luu ziaadyoble guiaad? Zeene nitlogaa guidzliu, ¿zha gacndion no laa dze co ziaadyoble?

⁴ Pquiab me rëb me lo zho:

—Nsin golso, zeena choot yquidiede to.

⁵ Sac nzian zha ne grieequia guiab zho zha nac Men ne zëëble diidz cxeel Dios; ni nzian miech ne yquidie zho.

⁶ Zeene gon to nëzii nëzrec noxtseeb csilo dil, guiabde to togo lëële dze ne guial naa ga bdziñ; sac niicle noyacle dila, noxtseebraa pa csilo gaca, led lëdle ne nitlo guidzliu ga.

⁷ Garaa csilo grë dilox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzii nëzrec csilo gni grë zhodox, nzian zaatne gan miech bin.

⁸ Ni lega loxaque mine rsilosew ga, sac nroobraa guie!në ne gan miech lozh ga.

⁹ Zeene laa grë ncuuan rii noyac, ¡nsin golso! Sac hor co laa miech tsielo to ladznia zha ne csacsi to, haxta zut zho palal to, grëse miech stsidil zho to loxaque ne nac to zha ne no xnëz naa.

¹⁰ Nzian zha ne nole xnëz naa, len dze co laa zho gbiche, laa zho csilo lëëque zha glëënie zha ne nacgrë zho, haxta ziolo zho zho ladznia zha ne gut zho.

¹¹ Len dze co zrieequia nzian zha ne yquidie miech guiab zho xtidz Dios noteed zho, ni nzian zha ne giiladza.

¹² Grë zha ne nole xnëz naa, zeene gan zho grëtaa guie!ntseeb, grëtaa dol ne quiayun miech len dze co, ndal zho gleyniedraa zho Dios dib zdoo zho.

¹³ Per zha ne tiblique gac, gbiched zho lo Dios, niicle tel petaa gan zho noyac, zha co gac zha ne gdziñ lo me.

¹⁴ Niicle scaata noyac grë ncuuan co, ib none yгаа Xtidz Ndzon Dios lo grëse miech, grëtaa zaatne ndxie miech laa zho gacnana; lozhraa ga dzigo laa guidzliu rii nitlo.

¹⁵ Zeene gan to zaatne nac Lugar Nda len yadoo, zo tib ncuane rieguiald so ga, tib ncuane ziaad gnitlo, zigne bzeet Daniel men ne biadteed xtidz Dios (zha ne glaba, none guien zho zha naca), hor co golguib dien zha xoon to.

¹⁶ Zha ne no grëaa guiedz ne ngab Judé, none xoon zho tsie zho dan, ga tsietsolan zho.

¹⁷ Zha ne lëëtaque hor co no glaa guic lidz, none lëëled xoon zho, ib guabd zho sëëb zho len yu tsiebee zho ncuane rap zho.

¹⁸ Zha ne quiaaga lo dziin dan, ib gund zho tsie zho lad guiedz tsixi zho xab zho.

¹⁹ ¡Prob grë men wnaa ne lëëtse len dze co zoney xpëéd, men ne quianiegaa mëdyeen ne bi radz!

²⁰ Golnab lo Dios gande to guie!në co len mëe ne rac nal, dze ne rdziiladzga lo lo dziin.

²¹ Ne nligaa guieḷnēdoxa. Wlal ne biaan guidzliu haxta lo nadze, gard gaḷ miech tib guieḷnēdox sca, ni gandragaa zhow ted ga.

²² Teḷne csaan Dios nroob dze gac guieḷnē co, ni stib miech rii guiaandraa; per na por grē zha ne bzooblo me sēēb xnēz me, gdeete me diidz gaca nroob dze.

²³ Zigne rne naa ga, leḅ dze ne scataa gaḷ miech grē diḷ co, zha ne gnē lo to: “Goltē nu gaḷle, lēē Meḅ ne nole cxeel Dios ga blanso nu”, gnēgaa zho: “Goltsie nec gaḷle, laa me bdziḅ ga”, gliladzde tow.

²⁴ Sac zrieequia zha ne yquidie guiab zho zha nac meḅ co, zrieequia zha ne guiab xtiidz Dios ziadteed zho lo miech, zuḅ zho grē milagr nroob, parne yquidie zho miech, haxta zha ne nole xnēz Dios, zguib zho dien zha gdeeda diidz yquidie zho zho.

²⁵ ḷNsin sca goḷso! Beḅque laa naa nilew lo to.

²⁶ Nligaa zha ne gnē lo to laa meḅ ne pxeel Dios ga blansole, gliladzde tow. Nenda cxeel zho to tib dan zit, gnē zho: “Goltsie gaḷle laa me no ga”, gnēgaa zho pa tib leḅn yu ne no me, ni tib xtiidz zho gliladzde to.

²⁷ Sac zeēḅ gaḷ dze ne guiaad me stib, gacda ncuaaḅ nguētes zhliaaḅ, grēse miech gaḷ me. Zig teḷ guiab tib belye nroob ne glu zhan gbaa, desde nēz ne rlan ngbidz haxta nēz ne rzēēb ngbidz, ḷniacxe gand grēse miecha?

²⁸ Zlupaa zeēne laa me guiaad; naḅle to gaḷle zaatne nix ma gut, ga rcaalsa pech.

Ziaad Jesús stib

(Mr 13:24-37; Lc 12:41-48; 17:26-30, 34-36; 21:25-33)

²⁹ Zeēne lozhse gaḷ miech grē guieḷnēdox co, laa lo ngbidz ycow, gziimidraa mēē. Grē mel ne ndziib gbaa, laa ma gliaal; grēraa ncuaaḅ no gbaa, masaque nēzrii nēzrec gaca.

³⁰ Horco zlu gaḷle zeēne laa Mgui ne pxeel Dios ga, ziad-zēēb lo xcow con grē guieḷndzon, con grē poder ne rap me, grēse miech mban gac zho, zoon zho gaḷ zho me.

³¹ Grē xanjḷ Dios, hor co laa Dios cxeel zho tsiecuedz zho zhitrompet zho parne ycaalsa grēse zha ne ngab xnēz me, teḷ pa lotaa lo guidzliu no zho.

³² Golzoob cuidad zha nac yag guigw. Led naḅle to gaḷle, zeēne laa grē zhicwa racnieēḅ, ni rsilo rdzib zhiblaga, gase rlu ne laa mēē nēēg ziaadgaxle.

³³ Scaque nagon zeēne gaḷ to laa grē mine rne naa lo to nu rsilo noyac, dzigo naḅle to laa dze ne guiaad meḅ co ziaadgaxle.

³⁴ Gnēli naa lo to gaḷle, nzian miech ne mban niina bii zaḅ zho zeēne laa grē ncuaaḅ co csilo gac; sac ible ncuaaḅ gaca.

³⁵ Zdziḅ dze ne nitlo gbaa, nitlo guidzliu, saḅgue miḅe rne naa lo to nu, nitloda; ible laaw none gac.

³⁶ Lēēraasi choot nand dien pa dzew, dien pa horgaaw, per ni grē anḷ ne no gbaa, per ni naa naḅa, loxaque Pxoze naa naḅa.

³⁷⁻³⁹ Naḅle to gaḷle zha bzhaac miech leḅ dze ne wban Noé, ib bliladzd zho xtiidz me. Guxt no zho lo zhilni zho, zha ne notsieelnia, zha ne nobediingaa xpēēd, laa dze bdziḅ laa Noé bzēēb leḅ barcw; tibaque zeēne biala zho biini laa guiedox co nonitole zho. Scadaa nagon sac grē miech nad rii, tibaque zeēne tsaā zho biini laa Mgui ne pxeel Dios ga ziaadle.

⁴⁰ Horco zaatne quia chop mgui lo dziin dan; tib zho tsienal zhits me, stib zho guiaaḅ.

⁴¹ Zaatne quia yot chop wnaa, tib zho tsienal zhits me, stib zho guiaaḅ.

⁴² ḷNsin sca goḷso, sac gon nande to dien pa horpaa guiaad me, beḅque laa vis racle lo to!

⁴³ Golgan gaḷle, teḷ niaca miḅe gacnaḅ miech laa ngbaan tsieban lidz zho guieel, per naḅ zho dien pa horpaa; ḷniacxe zagauiies zho? Led sobna zho lēē, nsin nsin so zho.

⁴⁴ Scaque to nagon, none nsin so to, sac gon lega naclew zeēḅ gaḷ to laa me ziaadle.

⁴⁵ Golgan gaḷle, masaque laa to gac nagon zig tib ngundziin ne riaaḅnie ro lidz meḅ ne rquia zho xtsiin.

Ngundziin ne ndzinli, zeēne laa meḅ ne quia zho xtsiin ga griee, iḅe niowse guiaaḅ zho guiaaḅnie zho grēraa zha ne no lidz me.

⁴⁶ Zha ne sca guḅ, iwen tsie zho, sac zeēne gbire me gaḷ me scataa noxco zho dziin ne pso me zho, ziaḅnziiu zho lo me

⁴⁷ haxta so me zho, zha yquiaanap grēse ncuaaḅ rap me!

⁴⁸ Teḷ ngundziin yozhgaaw, miḅe tsienie guic zho guiab zho gbireniobd meḅ ne quia zho xtsiin ga,

⁴⁹ csilo zho csacsi zho grēraa zha ne nac ngundziin, csilo zho ctsieelsa zho grē ngonziu tso zho loxaque gzudz zho, loxaque gowoch zho,

⁵⁰ tibaque zeēne gaḷ zho laa me bdziḅle.

⁵¹ Zha ne sca guḅ, per peraa dien guḅ me, ib tedsod nroob caxtigw ne cteed me zho, sonēz me zho guey zho zaatne no grēraa zha ne rond diidz, ga tso zho grē zho zha co goonnē zho, haxta gow lay zho lo guieḷnēdox ne ted zho.

25

Zha bzhaac tsii wnaa nguieg

¹ Blozh ga rēbchaa Jesús lo zho:

—Par sēēb miech zaatne rnabey Dios, masaque naca zig rzēēb miech tib lo lni zaatne noyac tib guieḷtsieel.

"Tsii wnaa nguieg name, briece zho zixinêz zho mgui ne ctsieelnia, tib tib zho bise zho psin win ne rec nceit ne rziini.

²⁻⁴ Gaay zho goc ligier pcodzêê zho zhipsin zho nceit, ni zhaaque bi zho zniipa; laa zgaay zho gocnroladz, zigne bzhense zho psin co scase bi zhow, bid zho nceit ne niodzêraaw.

⁵ 'Goc pa hora rio zhimcaalo zho, ni rdzindaque mgui ne zixinêz zho ga, tibaque zeen laa zho pquia mcaal.

⁶ Gol grōl guieela, zeen laa vis rac, laa mgui co ziaadle, zha ne zixinêz me ga, zac griee zho tsiedziel zho me.

⁷ Lëëlêd briece mcaallo gza wnaa nguieg co, psilo zho nozhixcuaa zho zhipsin zho.

⁸ Zeene gon gza zha nroladz co ygaadraa zhinceit zho, dzigo bnab zho lo zgaay zha co, gdeed zho niip nceit yquiin zho, sac laa zhipsin zho noyuule.

⁹ Pquiab zho rëb zho: "Grieeeloda, sac mine yquinese zhipsin no ziaadnie no, Mazd goltsie zaatne rto zhow, ga goltsixiw."

¹⁰ Per lo lal ne zixi zho nceit, laa mgui co bdzin. Zeene wbiere zho, laa ro yu nioogle, loxaque gza zha ne nsinle zo ga, zha cose bzëeb len yu.

¹¹ Dzigo psilo zho, rcaan nia zho ro yu, rbedz zho mgui co cxal me ro yu sëeb zho.

¹² Per bdeete me diidz nzëeb zho, rëb me: "Runbeyd naa to gon, nannd naa dien cho nac to."

¹³ 'iNsin sca golso! —rëb Jesús—. Sac gon nande to pa dzepaa, pa horpagaa gbiire guiaad Mgui ne pxeel Dios.

Zha ne biaanñie dimi

¹⁴ 'Mgui ne pxeel Dios ga, ziaad gac me zig tib men ne no griee tsie tib viaj zit.

"Tib men name no griee me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow len dze ne guiend me ga.

¹⁵ Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me mine rgobey me griee lo zho gundziin zho, dzigo laa me briece laa me zie.

¹⁶ 'Zha ne biaanñie gaay mil pes plat co, güey zho bloonon zhow, beena gan zgaay mila.

¹⁷ Zha ne biaanñie chop mila, ye zho güey zho bloonon zho dimi co, scaque beena gan schop mila.

¹⁸ Laa zha ne pcaania tib mila ga, lel güey zho güeyteen zho tib guieer güeyloliu zhow.

¹⁹ 'Goc bla iza laa men co bdzin, dzigo bredz me zho tib tib zho, tsie zho gzodiidz zho dien yo dimi ne biaanñie zho ga.

²⁰ 'Bdzin zha ne pcaania gaay mil pes plat co, bdzinñie zho xtimi me, rëb zho: "Laa xtimi luu nu gon, lëe gaay mil pes ne psan

luu lo naa nu, laa zgaay mil min rii nac mine bdziniaaw."

²¹ Rley me rëb me lo zho: "iZha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. iNa bded, zeena yгаа luu grë guiebley ne quaiyac nu!"

²² 'Blozh ga, bdzinaque zha ne biaanñie chop mila ga, ye zho laa zho bdzinñie xtimi me, rëb zho: "Laa xtimi luu nu gon, lëe chop mil pes ne psan luu lo naa nu, laa schop mil min rii nac mine bdziniaaw."

²³ Pquiab me rëb me: "iSquiw nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. iNa bded, zeena yгаа luu grë guiebley ne quaiyac nu!"

²⁴ 'Zeene bdziintaa zha ne biaanñie tib mila ga, rëb zho lo me: "Ni bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana;

²⁵ gane mazd bialoliu naaw. Tib mil naca bneedz luuw, ledaaw nu."

²⁶ Blëe guic me, rëb me lo zho: "iBiche nu, paat rquiind naa miech yozh, miech nroladz ne squi nac! Conque nanle luu sca nac naa,

²⁷ ipep nac dzigo waa bioxcod luu maase mbediin luu dimi qui, ndziniaaw palal ncaania naaw niina?"

²⁸ Dzigo rëbchaa me lo zha ne ndxie ga: "Niinagazh golcob tib mil pes qui lo zha qui, goldeeda lo zha ne ziaadnie tsiwi i.

²⁹ Sac zha ne rioxco rundziin ncuane rcaania zho, zacnroobraa ncuane yquianie zho. Laa zha ne squi nac, haxta mine pcaaniale zho, zdiooba lo zho.

³⁰ 'Golxen zha yozh qui, goltsiesan zho lo ncow nêz ley. Ga gon zho guieledox ne tsieguial zho, ga goon zho haxta gow lay zho."

Zha gun Jesús guielextis

³¹ Blozhse bzodiidz Jesús cuent co lo zho, rëbchaa me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa grë xanj naa, zlu grëtaa guieledzon ne rap naa, laa naa sob lo xcan ne raguial naa soob naa.

³² Grëse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiil zho.

³³ Zha ne no xnëz naa, zha co gdziñ naa cue naa nëz derech, laa zha ne nod xnëz naa, cue nëz revés.

³⁴ 'Lozhse ga, naa ne nac naa men ne rnabey, hor co laa naa cuedz zha ne no xnëz naa, guiep naa lo zho: "Goltë grëse to, to ne nac to zha ne nziuu lo Pxoaz naa. Golted zeena ycaania to zaatne cuëz to, ible par to bzaa mew desde zeene bzaa me guidzliu.

³⁵ Sac zeene pcaabedz naa, bneedz to ncuuaane dow naa; zeene bnab zhis naa, bneedz to ncuuaane go naa; zeene bial naa ladz to, bneedz to lidz to blëz naa;

³⁶ zeene gon to guiend xab naa, bgacwxab to naa; zeene bzhacnë naa, zeene bio naa ladzguiib, biaad to biaadgan to naa."

³⁷⁻³⁹ See zdoo zho gnë zho: "¿Per pa hor bneedz no ncuuaane doow luu, ncuuaane go luu, pa hor bneedz no zaatne blëz luu, pa horgaa bneedz no lar ne gotxab luu, ib bdziond no nzhaacnë luu, bdziond no nio-gaa luu ladzguiib?"

⁴⁰ 'Dzigo guiep naa lo zho: "Gzobtaa hor ne gon been to xyudar zha ne nacgrë to, güeygan to zho, pcaaniagaa to zho, niicle zha ne bzoob miech peet nonda, rrieequia xyudar naa ga been to, rrieequia naa ga biaadgan to."

⁴¹ 'Laa zha ne ndxie nëz revés, hor co laa naa gzonëz zho, guiep naa lo zho: "¿Golbiche lo naa nu, miech ndziibdee! ¿Golsë lo guidox ne rieguial to, zaatne no guey mendox grë xanj! ma!

⁴² Sac gon, bio dze pcaabedz naa ni bneedzde to ncuuaane niow naa; bnab zhis naa, ni bneedzde to pe nie naa.

⁴³ Bial naa ladz to, ni bneedzde to zaatne mbëz naa; gon to guiend xab naa, ni ni tib lë lar bneedzde to niacw naa. Bio naa ladzguiib, bzhacnë naa, ni pe liaadz to niaadgan to naa."

⁴⁴ 'Squiab zho gnë zho lo naa: "Per pa hor bdzion no luu rcaabedz luu, rnabgaa zhis luu; pa hor bdzion no guiend pa cuëz luu, guiend lar ne gacw luu; pa horgaa bdzion no no luu ladzguiib, nixgaa luu rzacnë luu."

⁴⁵ 'Dzigo guiep naa lo zho: "Grëse vuilt ne bzoliaadz to niuñ to xyudar zha ne no xnëz naa, bzoliaadz to niegan to zho niicle zha ne mazdraa wina, rrieequia naa ga sca been to."

⁴⁶ 'Horco grëse zha co laa zho guey lo guidox ne gdzindraa dze griee zho; laa zha ne bioxco wban zigne rnabey naa, grëse zho laa zho ygaa tib guielmban ndzon ne gdzindraa dze lozh.

¹ Zeene blozh sca bnee Jesús lo grë miech co, dzigo rëbchaa me lo xpëëdsuel me:

² —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa ladznia zha ne yquiaa naa lo cruz.

³ Grë zha ne nac pxoz ne rnabey, grë maistr ley ni grë zha ne nac men non lo men guiedz Israel, lëëtaque hor co laa zho ndxie lidz Caifás, men ne nac pxoz nroob.

⁴ Laa zho ndxie ga, nonediidz zho dien zha grielo gnaaz zho Jesús, gut zho me, per tib mod ne grielod glistqui men guiedza.

⁵ Rnee zho: "Lëëraasi choot gnabeyd ygaa me merpaa dze lni, zeena gacntseebd menguedz."

Pchoob tib wnaa nceit nex guic Jesús

(Mr. 14:3-9; Jn. 12:1-8)

⁶ Betain ga no tib men ne biac lo guiedz lepr, lë Simón. Lëëtaaque no Jesús lidz men co,

⁷ zeene bdziñ tib wnaa bdziñnie tiblo nceit nex, noseb tib len ncuuañ win niaa niapse quie rbehni, tiblo nceit niazha. Squi zob Jesús lo mezh, güey wnaa co güeychoob me nceit co guic Jesús.

⁸ Zeene gon xpëëdsuel Jesús sca been wnaa co, blëë zho, rnee zho:

—¿Pa rieguiala squi pxin zhlë wnaa qui nceit qui!

⁹ Tel niaca mine ndow, pe zhidaa dimi ne nguizh zhow, nquinnpaa dimi co ngaaza lo grë zha ne guiend pe yquini.

¹⁰ Gon Jesús sca rac zho, dzigo rëbchaa me lo zho:

—¿Pe nacne rlëë to lo wnaa qui? Golsaan me. Par naa nroob non mine been me l.

¹¹ Tel nli lëë racladz to gon to xyudar zha ne guiend pe yquini, zac ygad to lo zho stib dze, sac tibaque ran to zho; sangue naa zhile laa naa gbiche lo to.

¹² Led pxin zhlëd wnaa rii zhinceit me, sac gon rrieequia laa me bzhixcuuale xcuerp naa nu gañ dze ne ygueetsa.

¹³ Gneli naa lo to ganle, dipse lo guidzliu zaatne cseedtaa miech Xtiiidz Dios, ible so-ladz zho wnaa rii, seet zho mine been me nu.

Güeyto Judas Jesús

(Mr. 14:10-11; Lc. 22:3-6)

¹⁴ Lo gza tsiipchop zha ne nac xpëëdsuel Jesús ga, briee zha ne lë Judas Iscariot güeyzodiidznie Judas grë zha ne nac pxoz ne rnabey,

¹⁵ rëb Judas lo zho:

—¿Palal quizh to naa telne gun naa Jesús ntegar lo to?

Dzigo biaan zho diidz quizh zho Judas galpsii pes plat.

26

Bnediidz zho dien zha gnaaz zho Jesús
(Mr. 14:1-2; Lc. 22:1-2; Jn. 11:45-53)

¹⁶ Nacne psilo Judas noguib Judas dien zha gdeeda diidz csañ Judas me lадznia zho.

Dowxtseenie Jesús xpëédscuel me

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Mer dze ne rsilo lni Pascwa, leñ dze ne sca row zho guietxtil ne riotsd ncobi ga, bnabdiidz xpëédscuel Jesús lo me dien pa lo racladz me tsiegunlo zho ncuuaane gowxtseenie me zho wdze co.

¹⁸ Dzigo rëbchaa me lo zho:

—Nanle to ganle cho lidz zrieelo gdzin ne. Goltsie Jerusalén golguiab lo zho: “Znu nê xmaistr no: Gneedz luu lidz luu me dioow no xtsee Pascw rii. Niinataa laa xtse me bdzin, gane racladz me lidz luu nu diowxtsee no nawdze grê no me.”

¹⁹ Dzigo laa zho zie. Güey zho zaatne pxeel me zho ga, ga beenglo zho xtsee co.

²⁰⁻²¹ Wdze co, laa me no xtsee grê me zho, zeene bnee me lo zho rëb me:

—Gacnan to ganle, lëëque tib to gon tsielo naa ladznia zha ne gnaaz naa nawdze rii.

²² Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnê dien, ¿cho gon min co? ¿Pe naaw?

²³ Pquiab me rëb me lo zho:

—Zha ne gan to csëëb xcuun leñ xquien naa, lëë zho ga.

²⁴ Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, jprobsaxe zha ne tsielo naa ladznia zho! jMazd wen nie zho, ib niacd zho miech lo guidzliu!

²⁵ Yeze Judas rnabdiidz lo me rnee Judas:

—Maestro, ¿pe gon naaw ye?

Rëbchaa me lo Judas:

—Luu gon Judas, luu güeyto naa.

²⁶ Laa zho noyow, zeene bzhen Jesús tib guietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquiina, lëë xcuerp naa i gon.

²⁷ Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Golguie vin qui,

²⁸ sac lëë xchen naa i, mine no gzhiee par guiaanmbe grê miech lo xtol zho sëëb zho xnêz Pxoze naa, sac lëë stib mod cub nu psan me parne sëëb miech xnêz me.

²⁹ Lëë lultm vuelt nu guie naa vin rii, sac zhaale stib vin cub ne guie naa gal dze ne guenie naa tow zaatne rnabey Pxoze naa.

Dzigo psilo me biilnie me Dios gza me zho.

Bzeet Jesús zha gon Pedr

(Mr. 14:26-31; Lc. 22:31-34; Jn. 13:36-38)

³⁰ Blozhse biilnie zho Dios, laa me briege gza me zho, laa me zienie zho nêz Gui Oliv.

³¹ —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nêzrii nêzrec gliiaal mëcwxii!”

³² Mincopaa nagon gon miech naa, per zeene laa naa grieeban glole naa ga Galilé, ga cuëz naa to.

³³ Dzigo rëbchaa Pedr lo me:

—Niicle telne saan grê zha qui luu, sangue naa gon csaand naa luu.

³⁴ Pquiab me rëb me lo Pedr:

—Gneli naa lo luu ganle, guieel riigazh, gardle ycuedz gall, laa luu csale tson vuelt guiab luu runbeyd luu naa.

³⁵ Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per guncscad naa. ¿Pe nacne guiep naa runbeyd naa luu?

Scaque rnee grëraa xpëédscuel me.

Bzodiidznie Jesús Pxoze me Getsemani

(Mr. 14:32-42; Lc. 22:39-46)

³⁶ Zeene bdzinie Jesús zho zaatne lë Getsemani, dzigo rëbchaa me lo zho:

—Nuse nagon golsob, laa naa ga gazodiidznie naa Pxoze naa.

³⁷ Horco psilo mban rac zdoo me, riabguieinë me, dzigo bredz me Pedr, ni grop xingan Zebedé, bzënie me zho palal

³⁸ dzigo rëbchaa me lo zho:

—Mban rac zdoo naa, zootle zig zet naa lo guieinë rii. Nuse nagon golguiaan, per golsobna.

³⁹ Bzë me spalal, dzigo pquiitsgzhib me haxta bdzin lo me lo liu; psilo me bnaab me lo Dios, rëb me:

—Papá, laa naa rnab lo luu, telne zala zdoo luu, bzhiguiel psilaa naa lo grê guieinë rii. Min rii rnab naa lo luu, per telne grieeloda, mine gnëtaa luu, min co gac.

⁴⁰ Zeene guso me, güey me zaatne biaan gza tson zha co, gon me laa zho nixguesles; dzigo rëbchaa me lo Pedr:

—¿Pe ni palal blëbde to nzobna to?

⁴¹ Golsobna, golnab lo Dios zeena yquuild mendox to. Niicle ne squi lëbdraa xcuerp to sobna to, per golnab lo Dios, sac gon min co nac mine racladz zhiespíritu to.

⁴² Dzigo güey me stib, güeyzodiidznie me Dios; scaque mine bnaab me glo mincoque bnaab me.

⁴³ Zeene wbiire me bdzin me lo zho, gon me laa zho nixgueslaque, sac lëbdraa zho mcaal.

⁴⁴ Wbiire güey me güeynab me lo Dios, scaque mincoque bnaab me.

⁴⁵ Zeene laa me wbiretaa bion vuelt co, rëbchaa me lo zho:

—Lëëw nagon, zacle naa gagueis to, zacle gdziiladz to. Naa ne nac naa Mgui ne pxeel

Dios, laa hor nagon bdziñ zeene laa grë miech ntseeb rii guiadnaaz naa.

⁴⁶ Gołtsieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mr. 14:43-50; Lc. 22:47-53; Jn. 18:2-11)

⁴⁷ Laa Jesús bii quianeeque, zeene laa Judas (tib zha ne nac xpëedsuel me) bdziñ, bdziñnie Judas tib dzoon zha ne pxeel grë pxoz ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag.

⁴⁸ Biaanniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëe me ga, ligier so zho gnaaz zho me.

⁴⁹ Zigne bdziñ Judas pquiaabdiuzh Judas me, blozhse ga wbig Judas dow Judas bzhid cuas me.

⁵⁰ Dzigo rëbchaa me lo Judas:

—Judas, ¿pe ziaadgun luu nu?

Lëelëd wbig be grë zha co, bzhen zho me.

⁵¹ Horco biet tib zha ne rzënie me ga, bdob zho zhispad zho psilaa zho tib niaw, bliengaa zho diag tib zha ne rquia xtsiin men ne nac pxoz nroob.

⁵² Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho.

⁵³ ¿Niacxe nan to na grielod gnab naa lo Pxoaz naa niina cxeel me tsiipchop partid xanj l me guiaadla ne nu?

⁵⁴ Per telne sca gun naa, ¿zha dzigo gac mine zhonee lo Xtüidz Dios, zaatne raquiet mine noyac nu?

⁵⁵ Dzigo rëbchaa me lo grë zha ne bdziñ ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacne bnaazde to naa ga?

⁵⁶ Per ible laa grë ncuaan rii gon noyac, zeena grieequia grë mine bzeet grë zha ne biadteed xtiidz Dios lo miech padzeela.

Horco grëse zha ne nac xpëedsuel me laa zho bzhoon, tipse me psan zho ga.

Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ga brienie zho Jesús bdziñnie zho me lidz Caifás, men ne nac pxoz nroob. Grë zha ne rnabey lo mengüiedz Israel, laa zho ndxie ga.

⁵⁸ Ye Pedr maase zit zit nal Pedr laa Pedr bdziñ xley men co. Bdziñ Pedr güeysobga Pedr lo grë zha ne ndxiemap, quiambéz Pedr dien zha gun zho Jesús.

⁵⁹ Grë pxoz ne rnabey, grë zha ne nac zha non lo mengüiedz, grëse zha ne nac wxtis, laa zho ndxie nëz len yu co, quiaguib zho zha

ne gzhixcuua maase diidzguizh ycaadz zho Jesús, parne gdeeda diidz gnab zho guet me.

⁶⁰ Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho,

⁶¹ rëb zho:

—Bdzion no gon rnee me laa me ctixche yadoo ne zob lad guiedz nu, zaatne riodzian ne Dios, lozh ga tsonaque ngbidz gzaalo me stiba.

⁶² Dzigo hor co bzoli men ne nac pxoz nroob, rëb me lo Jesús:

—¿Pe nacne rquiabd luu? ¿Pe nli sca rnee luu, te nlida ye?

⁶³ Gon pxoz nroob co rquiabduque Jesús, rëbchaa me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

⁶⁴ Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

⁶⁵ Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëtaa xtiidz me noguitnie me Dios.

⁶⁶ Nana waa, ¿pe gnë to zha dziuum ne me?

Pquiab be zho rëb zho:

—¡ib rieguial guet me!

⁶⁷ Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me,

⁶⁸ rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

Rëb Pedr runbeyd Pedr Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Horco laa Pedr bii zob nëz ley. Ga zob Pedr, güey tib ndzoop ne quia dziin lidz men rnabey co; rëb ndzoop lo Pedr:

—¿Ye luu lëe rzënie Jesús, men Galilé ne bdziñnie zho i?

⁷⁰ Per bneelid Pedr. Squi zob grë zha co, rëb Pedr:

—Riend naa dien cho men rnee luu.

⁷¹ Laa Pedr ziele nëz ro puert ne quia ro nëz, zeene gon stib ndzoop ne rquia dziin ga Pedr, rëb ndzoop lo zha ne ndxie ga:

—Ye mgui qui gon nacgrë men Nazaret ne bdziñnie zho i.

⁷² Scaque bneelid Pedr, haxta rzeet Pedr Dios rëb Pedr runbeyd Pedr me.

⁷³ Wdzeepaaw, rëb zha ne ndxie ga lo Pedr:

—Ne nligaa ye luu rzënie meñ ne bdziñ i. ¡Rlupaa name zig rnee zha nêz Galilé rnee luu!

⁷⁴ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca brieer ro Pedr zeene laa tib gall pcedz.

⁷⁵ Horco psoladz Pedr xtiidz Jesús zeene rëb me lo Pedr: “Gardle ycuudz gall, tsonle vuelt rëb luu runbeyd luu naa.” Dzigo mbanse rac Pedr. Brieer Pedr ga, psilo Pedr biin Pedr guielnê co.

27

¹ Ziadyiinile liuw, wbiire pcaalsa grê pxoz rnabey, grê zha non lo menguedz, bnediidz zho dien zha gnabey zho guet Jesús.

² Blozhse bzodiidz zho, dzigo laa zho bzobdoo me blee zho me ga ziesan zho me lo Pilat, meñ ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³ Laa Judas Iscariot zha ne pto Jesús ga, zeene bin Judas laa zho rnabey guet me, lëëlêd güey Judas lo grê pxoz rnabey co, lo grê zha non lo menguedz ga, zietsire Judas dimi ne bdiizh zho Judas ga. Mban rac Judas,

⁴ bdziñ Judas rëb Judas lo zho:

—Naraa rien naa lëda nu ben naa. ¡Tib do! nrooble nu, znu bialto naa tib meñ ne peet xtold!

Pquiab zho rëb zho:

—¡Mincotaa gon ndiond no! ¡Xcuentzhe luu ga!

⁵ Horco pchel Judas dimi co len yadoo. Lo guielnê co brieer Judas ga güey Judas lëêque Judas pxiiyan Judas.

⁶ Grê zha ne nac pxoz rnabey ga, güey zho ptop zho dimi co. Per blozh ga, rienð zho dien zha gun zhow.

—¿Zha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëew.

⁷ Dzigo bzodiidz zho dien zha gaca, nacre mazd pquinn zhow bzhii zho tib lë liu, zaatne rdieen yu ne riaa grê ncuuan psin ne rquinn; parne lo liu co ygueets grê zha zit ne guet Jerusalén.

⁸ Nacre brieelê liu co “Liu ren”, ni sca runbey zhow len dze rii.

⁹⁻¹⁰ Ga brieequia mine bzeet zha ne biadteed xtiidz Dios padzeela, zeene rëb zho: “Galptsii pes plat ne bzhii zha Israel meñ nziuu co, dimi co bzhii zho tib lë liu, zaatne rdieen yu ne riaa grê ncuuan psin ne rquinn. Sca nê Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹ Bdziñnie zho Jesús lo Pilat, ga bnabdiidz Pilat lo Jesús rëb Pilat:

—Bnê dien, ¿pe nli luu nac zhirey zha Israel?

Pquiab me rëb me:

—Nliw.

¹² Grê zha ne nac pxoz rnabey ga, ni grê zha ne nac zha non lo menguedz, rzadraa ncuuane rquiaqui zho me; per ni tib diidz rtsired me lo zho.

¹³ Dzigo rëbchaa Pilat lo me:

—¿Pe nacre rquiabd luu? ¿Pe ib rond luu grêtaa ncuuane rquiaqui zho luu i?

¹⁴ Bzee zdoo Pilat gon Pilat, ible rquiabd me.

¹⁵ Gzobse iz, zeene ral lni Pascw rnabey Pilat rlaa tib zha ne non ladzguiib, zha ne gnabtaa menguedz laa.

¹⁶ Len dze co no tib zha ntseeb ladzguiib lë Barrabás, zëeb xtiidz zho.

¹⁷ Nacre rëb Pilat lo grê zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, meñ ne nac diidz pxeel Dios lo to?

¹⁸ Sca rëb Pilat sac bien Pilat loxaque porne ndal miech nobig lo Jesús min co ne rlëenie zho me, bnabey zho bgaa me.

¹⁹ Laa Pilat zob lo xcan ne run me guielwxtis, zeene bdziñ tib mandad rëb lo me:

—Znu nê tsieel luu: bzhiguiel me peet gund luu meñ qui, rlu peet xtold me; sac nieewdze me nroob ptseb mcaal tsieel luu.

²⁰ Grê zha rnabey co, bio zho pquill zho menguedz gnab zho csilaa Pilat Barrabás, ni gnab zho guet Jesús.

²¹ Zeene wbiire Pilat bnabdiidz Pilat stib, dien chopaa racladz zho laa, grêse zho nguiedz pquiab be zho, rëb zho:

—¡Barrabás psilaa!

²² Dzigo rëbchaa Pilat:

—Meñ ne waa nac diidz pxeel Dios lo to nu, ¿zha gun naa me?

Pquiab zho rëb zho:

—¡Bnabey yquia me lo cruz!

²³ —¿Per pe nacre yquia meñ rii lo cruz? —rëb Pilat—. ¡Ni tib do! rapd me!

Biireque zho nguiedz roptsie zho rnabey zho yquia me lo cruz.

²⁴ Gonse Pilat rquiaadiagd zho xtiidz me, lel mazdraa rac zho, dzigo bnab me nis, squi ndxie zho bdiib me nia me, rëb me lo zho:

—¡Nanle to nasca, led xtoldraa naa nu ne laa xchen meñ rii gzhiee, sac nanpaa naa peet falt rapd me!

²⁵ Pquiab be zho rëb zho:

—¡Peet nacd ga! ¡Zhits no grê xpëed no cuib do! co, na no guiotizha!

²⁶ Dzigo bnabey Pilat blaa Barrabás, laa Jesús race me bnabey me zha ne bdiñ Jesús, blozhse ga laa me psan Jesús ladznia menguiib ne tsieequiaa me lo cruz.

²⁷ Biire grë men̄guib co bzëëbnie zho me nêz len̄ yulow, ga pcaalsa grëraa menguib ne nacgrë zho, brin̄ zho igose me.

²⁸ Blee zho xab me, bgacw zho me tib lar nizhnie nlaan, zig rna lar ne racw grë rey, ²⁹ bzieecw zho bla lê yag guiets, bzoob zhow guic me zig rzob coron guic zha ne nac rey, ni bloo zho tib lê goobgui nia me. Run̄guzee zho me, rquitsgzhib zho lo me, rnee zho:

—¡Golwi gan̄le zha ractaa zhirey zha Israel!

³⁰ No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

³¹ Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz.

³² Nêz zienie zho me bdziel zho tib men̄ Ciren lê Simón, bnabey zho men̄ co bi me zhicruz me.

³³ Zeene bdzin̄ zho zaatne nac “Gui Beer-guic Ngutoo” (Gólgota),

³⁴ ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnêd me nie mew.

³⁵⁻³⁶ Blozhse pquiaa zho me lo cruz, bzhen zho tib xab me pchug zhow biaan̄nie zho tib lëgaw, laa stiba bio zho rif; dzigo laa zho bzob ga, bzobnap zho.

³⁷ Guic zhicruz me, ga pquiaa zho bla lan diidz zaatne rnee: “LËË JESUS NU, MEN̄ NE NAC ZHIREY ZHA ISRAEL.” Sca pquiaa zho, sac min̄co pquiaqui sca pquiaa zho me lo cruz.

³⁸ Ye chop ngbaan pquiaagza zho me lo cruz, tibga zhicruz zho bzo tib nêz cho zhi-cruz me.

³⁹ Grëse miech ne rdedtaa ran̄ zho laa me quia ga, rzhidznie zho me, haxta rdzi zho guic zho

⁴⁰ rnee zho lo me:

—Led rëb luu lëë laa luu ntsil̄ yadoo, ni tsonaque ngbidz nzaalo luu stiba, ¿pe nac dzigo rrieelod luu guiet luu i? Te!ne nli Xpëéd Dios nac luu, biet lo qui.

⁴¹ Scaque grë pxoz rnabey, grë maistr ley, grë zha farisé ni grë zha ne nac zha non lo men̄guiedz, rzhidznie zho me, rnee zho:

⁴² —Stib miech scataa beenguiac me, stib miech scataa bla me, ¿pe nac dzigo rrieelod me gla me me? ¡Goon̄ me name nac zhirey ne, guiet me i sca zho; zeena dziuun̄bey ne men̄ rnabey nac me!

⁴³ ¡Conque tant rnaló me Dios, haxta rnee me Xpëéd Dios nac me, guiaadsilaa Dios me i nazho!

⁴⁴ Ye ngbaan ne quiazga me lo cruz ga, min̄coque rbidzgo zho lo me.

Gut Jesús

(Mr. 15:33-41; Lc. 23:44-49; Jn. 19:28-30)

⁴⁵ Zig gro! dzew, tibaque zeen̄ goc tib ncow dipse lo guidzliu, haxta las tres biao biini stib.

⁴⁶ Horco nguiedz zëëb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nacne psaan luu naa?

⁴⁷ Zha ne ndxie ga, zeene bin zho sca rbedz me, no zho rëb Lí, men̄ ne biadteed xtiidz Dios padzeela, men̄ co rbedz me.

⁴⁸ Dzigo rias tib zho güeygadz tib lê zhiil lo nziu bla, bzoob zhow tib guic goobgui pquiaa zhow ro me.

⁴⁹ Laa zla zho rnee:

—Psaan, nu dzian̄ ne dien̄ pe ziaad Lí guiaadlit Lí me i.

⁵⁰ Tibaque zeene pquiaa me stib redz nroob, znuse blozh me.

⁵¹ Horne nolozh me ga, hor co briez nzoli lar nroob ne quia len̄ yadoo, gro!ta goca; psilo bni tib zhodox, grë quie masaque wbi!a,

⁵² nzian ro baan̄ grë zha ne bnalo Dios mazd padzeela bzhi!al.

⁵³ Zeen̄ go! dze ne brieeban me, ye zho laa zho brieeban, brieie zho len̄ baa, bzëëb zho lad guiedz; nzian miech ne gon̄ zho.

⁵⁴ Grë men̄guib ne quianap me ga, ni zha ne rnabey lo zho, zeene gon̄ zho bni zho co, ni gon̄ zho grë ncuaañe goc ga, per nli bdzieb zho.

—¡Ne nlipagaa —rnee zho—, Xpëéd Dios nac men̄ qui!

⁵⁵ Nzianlaa men̄ wnaa, zit zo zho rwi zho. Lëë grë men̄ wnaa co güeynal̄ zhits Jesús, been̄ zho xyudar me dipse len̄ dze ne pseed me miech, desde dze ne psilo me nêz Galilé.

⁵⁶ Lad co no Marí Magdal, Marí tsiel Zebedé, ni Marí ne nac xniala Jacob grop José.

Bgueets Jesús

(Mr. 15:42-47; Lc. 23:50-56; Jn. 19:38-42)

⁵⁷⁻⁵⁸ Zhile sëëb ngbidza, zeene bdzin̄ tib mgui lê José lo Pilat, bnab me diidzbeey tsielit me xcuerp Jesús lo cruz; tib zha ricwa, men̄ guiedz Arimaté nac me, ye me zianal̄ zhiwseed Jesús. Nacne pxeel̄ Pilat diidz lo zha ne quianap Jesús ga, parne siguiel̄ zho glit José me lo cruz.

⁵⁹ Dzigo güey José. Blozhse blit José me lo cruz, laa José neyle tib lê lar cub, pchel̄ José me lar co,

⁶⁰ güeyxob José me tib len̄ baa ne nacchen̄ José ndieen̄ tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey.

⁶¹ Laa Marí Magdal bii biaan ga, grop me stib Marí ne nacgrop me ga; zobse zho gax ro baa co.

⁶² Biini liu co, pcaalsa grë pxoz rnabey, grë zho zha farisé, güey zho lo Pilat,

⁶³ rëb zho:

—Güñ luu dispensar, laa no ziaadaque lo luu stib. Naraa rsoladz no, len dze ne bii mban men ntseeb ne sca baaadquidie miech ga, rëb me, zeene gac tson ngbidz guet me laa me grieeban.

⁶⁴ Gane ziaad no lo luu, bzhiguiel pxeel zha ne yquiaanap ro baan me haxta gac tson ngbidz co; sac nend tsie zha ne nac xpëëdsuel me tsiebee zho me, lozh ga guiab zho laa me brieeban. Nanle luu ganle, tel gac min co, cho gnë peraa gzhixcuaa zho.

⁶⁵ Dzigo rëbchaa Pilat lo zho:

—Telne sca racladz to, laa tib partid menguiib ndxie i. Goltsienie zho, golguiab lo zho yquiaanap zhow tel zha racladz to.

⁶⁶ Dzigo laa zho zie zienie zho grë menguiib co. Bdzin zho bloo zho tib bey cho quie ne niog ro baan Jesús ga, par glu tel cho zha ne tsiegaala, ni biaan grë menguiib co yquiaanapa.

28

BRIEBAN JESUS

(Mr. 16:1-8; Lc. 24:1-12; Jn. 20:1-10)

¹ Zna dze goc dze ne rdziiladz zho lo dziin ga, biini liu, dze ne rsilo zhamal, silgaw zie Mari Magdal grop me stib Marí co zieso zho ro baan Jesús.

² Lëëtaaque hor co bni tib zhodox, lo zho co biet tib xanjl Dios gbaa bdob me quie nroob ne niog ro baa co, bdiux mew tib lad, bzobga me lada.

³ Masaque rlu me zigne rlu belye, xab mew, nquitsbie rnaw, zig rlu zaatne ndxie guieg.

⁴ Grë menguiib ne quianap ro baa ga, zeene gon zho anjl co, per nli bdzieb zho, rzhidz zho. Lo dzeb co, pcowgazh zho, grëse zho biab liu.

⁵ Zeene laa grop wnaa co bdzin, rëbchaa anjl co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguib to.

⁶ Per guiendle me nu, jlaa me brieebanle zigne bneele me ga! Golwi ganle nu nac zaatne pxob zho me.

⁷ Niinagazh goltsie goltsienie diidz lo xpëëdsuel me, golguiab lo zho laa me brieebanle. Galilé me cuéz me zho, ga gan zho me. Laa to nanlew nasca.

⁸ Lëéléd brieegrop wnaa co ga, rias zho laa zho zienie diidz lo xpëëdsuel me; lala rdzieb zho, ni lala rley zho.

⁹ Laa zho zie, tibaque zeene gon zho laa Jesús zole lo zho, ine pquiaabdiuzh me zho.

Horco wbig zho pquitsgzhib zho lo me, bdeedz zho ni me.

¹⁰ Dzigo rëbchaa me lo zho:

—Gdziebde to. Goltsie goltsienie diidz lo grë zha bets naa, golguiab lo zho tsie zho Galilé, ga gan zho naa.

¹¹ Horcoraa laa bla zhaguiib ne pquianap ro baan Jesús ga bdzin lad guiedz. Güey zho lo grë pxoz rnabey, bzodiidz zho zha gon zho bzhial ro baa co.

¹²⁻¹³ Dzigo pcaalsa grë pxoz co grë zho zha ne nac zha non lo menguiidz, dien zha gun zho. Nacne biaan zho diidz, mazd gneed zho dimi lo grë menguiib co, parne gneelid zho, sinque guiab zho, segur xpëëdsuelaque me güeybee me len baa, per biend zhow sac nixgues zho. Nroob dimi bdeed zho lo grë menguiib co,

¹⁴ rëb zho:

—Peet tsienied guic to, niicle telne gon gubernadora na no guionee lo me, zeena peet gund me to.

¹⁵ Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina len dze co, masaque bililadz zho nli sca goca, jni haxta lo nadze sca zienie guic zho!

¹⁶ Zeene bdzin dze ne gdzieelo Jesús xpëëdsuel me nëz Galilé, brieegza tsiptib zha ne bzo gaxpaa lo me ga, güey zho nëz co; bdzin zho guic gui ne rëble me ga gdzieelo me zho.

¹⁷ Zeene gon zho me pquitsgzhib zho liu.

Lo grë zha ne ndxie ga, no zho rienpaa lëë me ga, nogaa zha ne bii racchop guic.

¹⁸ Dzigo wbig me lo zho, rëb me:

—Laa to gonle nasca naa rnabey. Grëse ncuane no gbaaw, nogaa guidzliuw, ladz-nia naa psan Pxoz naaw.

¹⁹ Niina nagon, laa naa rsan diidz lo to: goltsie dipse lo guidzliu, goltsieseed miech gac zho zha ne sëëb xnëz naa, golchoobnis zho, golguiab lo zho lëë min co rnabey Pxoz naa, rnabey naa ne nac Xpëëd me, ni rnabeygaa Espiritu Sant.

²⁰ Golseed zho gban zho, grëse mine nabey naa to gun to. Min co rsan naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.

XTIIDZ NDZON DIOS MIÑE PQUIAA MARCW

¹ Nu ganle laa naa csilo gzodiidz naa, miñe been Jesús, Men ne bneele Dios cxeel me lo guidzliu.

² Lo guits ne pquiaa Isá, tib men ne biadteed xtiidz Dios padzeela, lo co zhobnee ganle ible laa Dios no cxeel me. Rneew, glo cxeel me tib zha ne tedner, guiaadnie diidz. Znu zhobnee lo guits co:

Sxel naa tib zha ne tedner lo luu, zeena zha co gzhixcuaa nēz ne ted luu.

³ Dan tso zho,

zon miech zeene laa tsi zho zēeb gnee zho: “Golzhixcuaa nēz ne ted men ne rnabey, golsaan grē guiełntseeb ne ruł to.”

⁴ Ni nligaa scase goca, zeene laa Juan Bautist biaad, dan bio me rchoobnis me miech; rnee me lo zho csaan zho xquiełntseeb zho gbig zho lo Dios, ni chobnis zho, zeena csilaa Dios zho lo grētaa xtol zho.

⁵ Dzigo rriee miech grē guiedz ne ngab Judé, dib lad guiedz Jerusalén, riequiaadiag zho zhiwseed me; ni rxobodł zho grē xtol zho, dzigo rchoobnis me zho len guubee Jordán.

⁶ Guits lad camell niaa xab me, ncuaane rzhidoo len me guid niaaw ni niapse nguzhanch ni dzin dan row me.

⁷ Zeene rseed me grē miech co, rnee me lo zho:

—Iraa ziaad men ne mazdraa non lo naa. Tel naa peet nond naa, tib guiełnzaac nroob ga ygaa naa telne niaca miñe grieelo maase lab me glit naa; per na ni miñ co rdziñd naa.

⁸ Laa naa rchoobnis to niina con nis; sangue me con Espiritu Sant cchoobnis me to.

Brobnis Jesús

(Mt. 3:13-17; 4:1-17; Lc. 3:21-22; 4:1-15)

⁹ Len ngbidz coquew, laa Jesús briece guiedz Nazaret xtan zha Galilé, güey me pchoobnis Juan me len guubee Jordán.

¹⁰ Laa me norieedze lo nis, zeene gon me laa zhan gbaa bzhal, laa men ne nac Espiritu Sant biet gbaa zig tib palom laa me ziad-zēeb guic me.

¹¹ Ni lēetaque zēeb tib tsi men co gbaa, rnee me:

—Xin, rleynie naa luu gon, nziuu luu lo naa.

¹² Zeene blozh brobnis me, dzigo güeynie Espiritu Sant me tib dan ngan, zaatne no grē ma ntseeb;

¹³ bio me ga choo ngbidz. Ga no me güey Satanás (ma ne rnabey lo grēse menđox), gogladz ma niungüet ma me.

Bdedse ga, güey grē xanjł Dios güeygan zho me.

¹⁴ Len ngbidz co bnabey Herod bio Juan ladzguuib. Ladzguible no Juan zeene briece Jesús güeyted me grē guiedz ne ngab Galilé güeyseed me miech Xtiidz Ndzon Dios,

¹⁵ rnee me lo zho:

—Laa dze ne gnabey Dios ziaadgaxle, laaw bdziñ dzele. ĩGolsaan grē xquiełntseeb to, gołnab perdon lo Dios; dib zdoo to gołłladz Xtiidz me!

Tap zha ne quia gooz mel

(Mt. 4:18-22; Lc. 5:1-11)

¹⁶ Tib dze zieded Jesús ro Nisdoo ne lē Galilé, gon me laa Simón grop Ndrés quia gooz mel lo nis co; sac ible dziin co nac xtsiñ zho. Grop bets zho laa zho noron guiełx ne rgaa mel lo nis.

¹⁷ Dzigo bredz me zho, rēb me lo zho:

—ĩGoltē, goltēnal zhits naa! ĩLaa naa cxel to tsie to stib gooz, tsietop to grē miech ne sēeb xnēz Dios!

¹⁸ Horcogazh psan zho guiełx ne rnaaz zho mel ga, laa zho zienal zhits me.

¹⁹ Zhisaque bzē Jesús ro nis co, gon me laa Jacob ni Juan no tib len barcw noquiaabdie zho guiełx ne rnaaz zho mel, lēē grop xingan Zebedé ga;

²⁰ dzigo bredz me zho. Zigne bredz me zho, zoque Zebedé lo barcw ga grē xmoz Zebedé, laa zho zienal zhits me.

Tib mgui ne nosacsi menđox.

(Lc. 4:31-37)

²¹ Laa zho bdziñ guiedz ne lē Capernaum. Zeene goł dze ne rdziiladz zho lo dziin nēz Israel, güey Jesús yadoo win ne zob lad guiedz co güeyseed me miech.

²² Grē miech ne ndxie len yadoo ga, rzee zdoo zho ran zho zha rnee me, sac rlu men rnabey nac me; led yed me rseed zigne rseed grē zha ne nac maistr ley.

²³ Lad grē miech co no tib mgui ne nosacsi menđox, tibaque zeene nguiedz pcooptsie ma mgui,

²⁴ rnee ma:

—ĩPe gun luu no Jesús Nazaren? ĩZiaad luu lēē par gnitlo luu no? Runbey naa luu, tib men peet xtolđ nac luu ni Dios pxeel luu.

²⁵ Dzigo goctox Jesús lo ma, rēb me:

—ĩPsiog ro luu! ĩNa zeena psaan men qui!

²⁶ Horco masaque beencxidz ma mgui co, ni rquiaadan ma redz laa ma psaan mgui.

²⁷ Grēse miech ne ndxie ga, bzee zdoo zho rnabdiidzlsa zho rnee zho:

—ĩBay cho nac men qui? ĩWseed cub i gon ziaadnie me! ĩRlu zha rnabey nac me, zha haxta menđox rdzieb zeene ractox me lo ma!

²⁸ Znuse brieets bliaal diidz zha beenguiac Jesús mgui co; grēse guiedz ne ngab Galilé gocnañ miecha.

*Biac xniadzoop Simón Pedr
(Mt. 8:14-17; Lc. 4:38-41)*

²⁹ Ga brieë Jesús güey me lidz Simón grop Ndrés gza me Jacob ni Juan.

³⁰ Bdzin zho, lëëtaque laa xniadzoop Simón nix rlan xlëë, nacne rëb zhow lo me.

³¹ Dzigo bded me zaatne nix zhuz co, bzheñ me nia me, blische me me. Horcogazh laa zhixlëë me blëz, guche me ga psilo me beenlo ncuuaane dow zho.

³² Ziedzele dzew, laa ngbidz rzëëblew, zeene psilo grë miech co zo z rdzinnie zho grë meñ rzacnë, grë zha ne nosacsi men̄dox ne; bioogse ro yu co ndxie miech.

³³ Zootle zig grëse miech ne no lad guiedz co pcaalsa ga.

³⁴ Ndal grë meñ rzacnë co zhaase zhaase guielguizd ne rzac zho, per beenguiac Jesús zho; zha ne nosacsi men̄dox, beñcxoon me grë men̄dox ne nosacsi zho. Goctox me lo ma, ib bdeete me diidz nee ma cho nac me, sac runbey ma me.

*Pseed Jesús miech Galilé
(Lc. 4:42-44)*

³⁵ Silgaw, scase bii ncow rnaw guche Jesús brieë me lad guiedz co, güey me zaatne guien̄draa miech, güeyzodiidznie me Dios.

³⁶ Zeene rnit me choot guien̄d; dzigo brieë Simón ni zla zha ne nacgza Simón güeyguib zho me.

³⁷ Zeene bdziel me, rëbchaa zho lo me laa grë miech co quiaguible me.

³⁸ Dzigo pquiab me rëb me lo zho:

—¡Sca ye! Per ib laa ne none gon grëraa guiedz ne ndxie dib gax nu, zeena ye grë guiedz qui gnee naa Xtiidz Dios lo miech; sac ible min co pxeel me naa zial naa lo guidzliu.

³⁹ Dzigo güey zho grëse guiedz ne ngab Galilé. Zaatne rdzintaa zho, rie me grëse yadoo win ne zob lad guiedz rseed me grë miech co Xtiidz Dios, ni run̄cxoon me grë men̄dox ne nosacsi miech.

*Biac tib mgui ne rlan lepr
(Mt. 8:1-4; Lc. 5:12-16)*

⁴⁰ Tib vuelt, wbig tib mgui ne rlan guiedz-dox ne lë lepr lo Jesús (masaque riaal dipse guid lad mgui), pquiitsgzhib mgui lo me, rëb mgui:

—Tebaa siguieel luu gunguiac luu naa.

⁴¹ Pquia zdoo Jesús mgui, pxobnia me guic mgui rëb me:

—Zuñguiac naa luu. ¡Niinagazh laa luu guiaan̄mbe!

⁴² Zigne sca bnee me laa mgui co biac, mbese biaan̄ xcuerp mgui.

⁴³ Blozh ga bzonëz me mgui, ni pso me diidz lo mgui

⁴⁴ rëb me:

—Bina gan̄le, choot lo gzodiidz luu gon zha biac luu. Bzë, güey lo pxoz, güeysan gon

ne rnabey xley Moisés gdeed luu; zeena gan zho gan̄le laa luu biacle.

⁴⁵ Ni zigne brieë mgui ga, psilo mgui grë lo miech bzodiidz mgui zha biac mgui. Grëse miech gocnaña, nacne brieelodraa nen̄lo ndzin Jesús grë lad guiedz co. Mine been me, blëz me zaatne choot miech guien̄d; per niicle scaw, miech guizhiu ne rrieë grë guiedz co rdzin lo me.

2

*Biac tib meñ ne gutoo
(Mt. 9:1-8; Lc. 5:17-26)*

¹ Goc bla dzew, laa Jesús biire bdzin lad guiedz Capernaum stib. Zeene bin zho laa me bdzin ro yu,

² miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtiidz Dios.

³ Laa grë miech co ndxie ga, zeene bdzin tap zha bgui ney zho stib meñ bgui, zhoobse me lo yag, ib gacd së me sac dipse me gutoo.

⁴ Ni ne scataa miech guizhiu ne ndxie, gacd ted zho nëz ro yu gdziñnie zho me lo Jesús, nacne biepaque zho guic yu. Pخال zho ngali zaatne zob Jesús, dzigo ga pteed zho meñ co dib yag ne zhoob me ga.

⁵ Zeene gon Jesús ne nli dib zdoo zho rililadz zho me gunguiac meñ rzacnë co, dzigo rëbchaa me lo meñ co:

—Xin, niinagazh laa naa gun̄ perdon grëse xtol luu.

⁶ Blalaa zha ne nac maistr ley zob ga, zeene bin zho sca rëb me lo meñ rzacnë co, bzachaa zdoo zho:

⁷ “¡Lëda i gon squi rnee meñ qui! Quiaguitnie me Dios i squi rzë xtiidz me. ¡Tibaque meñ ne run̄ perdon xtol miech, ni lëë men̄ co nac Dios!”

⁸ Bienga Jesús sca rza zdoo zho, dzigo rëbchaa me:

—¿Pe nacne rlëë to ron to mine rne naa?

⁹ Parga nli, cholze zha ne zac guiab: “Laa naa gun̄ perdon grëse xtol luu.”

¹⁰ Per laa naa glu lo to gan̄le, naa ne nac naa Meñ ne pxeel Dios zial naa lo guidzliu, ible naa no gun̄ miech perdon.

Dzigo bnee me lo meñ rzacnë co, rëb me:

¹¹ —¡Guche i, bi yag ne bzhoob luu i, zeen bzë!

¹² Zigne sca bnee me laa mgui co bzoli, blis me yag co, grop lo grë miech co gon zho laa me brieë ga, laa me zey. Grëse zho rzee zdoo zho, rleynie zho Dios rnee zho:

—¡Nasi laa ne nodzian̄ ncuuaane gard dzian̄ ne!

*Bredz Jesús Levi
(Mt. 9:9-13; Lc. 5:27-32)*

¹³ Blozh ga, laa Jesús brieë ga laa me zie nëz ro nisdoo stib; nzian miech ne pcaalsa lo me ga, dzigo pseed me zho.

¹⁴ Ro nis co ziezë me goṇ me Leví, xingan Alfé, zob Leví zaatne rietizh zho contribution, dzigo bredz me Leví tsienal Leví zhits me. Guso Leví ga, laa Leví zienal.

¹⁵ Bded ga, bredz Leví me güey me tib wagw lidz Leví. Grë zha ne nac recaudador, grë zha ne zëëb diidz nac zha yozh, tipse lo mezh bzobnie me zho grë xpëëdsuel me; sac ndal grë zha co zienal zhits me.

¹⁶ Blalaa maistr ley ne nacgrë zha farisé, goṇ zho sca tipse noyownie Jesús grë zha co; bded ga, rëbchaa zho lo xpëëdsuel me:

—iMod sca na rownie xmaistr to grë zha ngoopdol, grë zha beed ne nac recaudador!

¹⁷ Dzigo rëbchaa Jesús lo zho:

—Nanle to ganle, men ne ruṇ rmed, zaatne no zha ne rzacnë, ga rquiin zho, ðniacxe squiin zho zaatne no zha ne ndip ndaan? Ni min co rac niina, tel naa zialguibd naa miech wen, sinque laa naa zialguib miech ngoopdol.

¿Pe nacne rcuand xpëëdsuel Jesús?

(Mt. 9:14-17; Lc. 5:33-39)

¹⁸ Lëëtaaque dze co nocuan xpëëdsuel Juan Bautist, grë zho zha farisé. Dzigo bdzin bla zha ne bnabdiidz lo Jesús, rëb zho:

—¿Pe nac waa ib rcuand xpëëdsuel luu? Zha grë xpëëdsuel Juan Bautist ni grë zha farisé, rcuan zho.

¹⁹ Pquiab Jesús, rëb me:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuan zho ni ran zho laa mgui ne notsieelnia mban?

²⁰ Per dzin dze zeene laa mgui co gbiche; ni zeene laa dze co gdzin, dzigosi nagon rieguial tso zho guielnë, rieguial ycuan zho.

²¹ Ranle to ganle, zha ne rquiaabdie tib lë lar, rquiaad zho lar cub lad lar gox, sac zha ne sca guṇ paat yquiind rquiaabdie co. Zeene laa lar cub gbe, lëëque lëew gunnat zaatne nrizez lar gox.

²² Scaque tsod zha ne cotsow vin cub tib len guid ne padzeelale noquin, sac stsiez vin cuba; dzigo niicle guid cow, niicle vingaaw laaw nitlo ga. Gacxe, tel vin cuba none len guid cubaque tsotsowa.

Ttop xpëëdsuel Jesús mzion zhoxtil

(Mt. 12:1-8; Lc. 6:1-5)

²³ Tib dze ne rdziiladz zho lo dziin nëz Israel, bdednie Jesús xpëëdsuel me zaatne zëëb zhoxtil, dzigo zigse zieded zho pchoo zho palal mzion zhoxtil co.

²⁴ Goṇ zha farisew, dzigo rëbchaa zho:

—iLëda i goṇ noyunt to! iGolguien ganle dze nda nac dze rii!

²⁵ Dzigo pquiab Jesús, rëb me:

—¿Pe gard glab to zaatne ziaad ganle zha been rey David tib dze zeene pcaabedz me grë me zha ne ziegza me, ni zienied zho pe gow zho?

²⁶ Rneew, bzëëb me len yadoo güey nab me quietxtil ne nac gon, downie me grë zha ne ziegza me ga, ni loxaque zha ne nacse pxoz row quietxtil co. Len iz co nac men ne lë Abiatar pxoz nroob.

²⁷ Golgacnan sca ganle, biaand dze rii par csacsi miech xcuerp zho, sinque ne rleynie Dios miech gane psan mew.

²⁸ Naa ne nac naa Men ne pxeel Dios zial naa lo guidzliu, naa nabey dze rii, nanpaa naa pe nac mine nonguiel gac.

3

Biac tib mgui ne mband tib nia

(Mt. 12:9-14; Lc. 6:6-11)

¹ Gol stib dze ne rdziiladz zho lo dziin, güey Jesús len yadoo win ne zob lad guiedz co. Lad grë miech ne no len yadoo co, no tib mgui ne mband tib nia.

² Nzian zha ne ndxie ga, quialeets zho Jesús dien pe zunguiac me nia mgui co dze ne rdziiladz zho lo dziin. Quiambëz zho dien pe guṇ me, par gdziel pe yquiaaqui zho me.

³ Dzigo bredz me mgui co, bnabey me bzo mgui groltaa lo grë zha ne ndxie ga;

⁴ blozh ga rëbchaa me lo zho:

—¿Pe nadien rzac to nonguiel guṇ ne dze rii? ¿Pe nonguiela guṇ ne ncuaañe yquiin, te nonguiela guṇ ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

Ni tib zho pquiabd.

⁵ Dze bui me lo zho grëse zho, wbinladz guic me, ni mban goc zdoo me goṇ me scataa ntseeb zdoo zho; dzigo rëb me lo mgui co:

—Bzigaa nia luu.

Zigne bzigaa mgui nia mgui, laaw biac.

⁶ Grë zha farisé, ni grë zha ne nacnie rey Herod, zigne brieë zho ga laa zho psilo bnediidz dien zha gdeeda diidz gut zho Jesús.

⁷ Len dze co, tib vuelte bdzin Jesús ro nis-doo grë xpëëdsuel me. Miech guizhiu ne nal zhits zho, ga zie grë zha ne ziaad nëz Galilé, grë zha ne ziaad nëz Judé,

⁸ grë zha Jerusalén, grë zha ne ziaad nëz Idumé, grë zha no dib nëz dan ro guibee Jordán, grë zha ne no dib gax guiedz Tiro ni guiedz Sidón. Miech guizhiuw, sac ron zho grëtaa milagr ne ruṇ me.

⁹ Dzigo bnabey Jesús xpëëdsuel me, yguib zho tib len barcw zaatne gac so me zeena ctaagwd grë miech co me.

¹⁰ Zëëble diidz ndal miech ziyunguiac me, dzigo grëse zha ne rlan pe guielguidz, rbigbe zho dien zha grielo maase lad xab me xen zho.

¹¹ Grë men̄dōx ne noguitnie miech, zeene ran ma me, ruṅquitsgzhīb ma zha ne noguitnie ma lo me ni rḡuaadan ma redz rnee ma:

—jxpëed Dios nac luu!

¹² Per ractox me lo ma, rsaand me gnee ma parne xoobneṅd cho nac me.

*Ble Jesús gza tsiipchop xpëedscuel me
(Mt. 10:1-4; Lc. 6:12-16)*

¹³ Blozh ga bieṅ me tib guic gui win zob ga, ga bredz me zha ne gocladzse me. Zeene pcaalsa zho grë zho,

¹⁴ dzigo lad co ble me tsiipchop zha ne séné me, zha ne cxeel me tsieseḡ miech Xtiiḡ Dios. Lëe zha co bleelë me poxtl,

¹⁵ ni bdeed me poder lo zho guṅcxooṅ zho men̄dōx.

¹⁶⁻¹⁹ Znu lë gza tsiipchop zha ne ble me ga: Simón (lëe Simón co bleelë me Pedr), Jacob ni Juan (xingan Zebedé, zha ne bleelë me “Zhin Nguzi” “Boanerj”).

Ndrés,

Lip,

Bartol,

Matew,

Mazh,

Jacob (xingan Alfé),

Tadé,

Simón (zha ne nacgrë zha ne racladz cuee zha Roma xtan zho)

ni Judas Iscariot (zha ne güeyto me).

Rëb zho men̄dōx nacie Jesús

(Mt. 12:22-32, 46-50; Lc. 8:19-21; 11:14-23; 12:10)

²⁰ Wbire Jesús ga, laa me bdziṅ ro yu grë me zho. Scasaque ndal miech ne pcaalsa ga stib, ni rdeetew diidz gownie me zho.

²¹ Zeene bin men̄lidz mew, dzigo brieḡ zho zixi zho me, sac rëb zho bod rzhinle guic me.

²² Haxta grë maistr ley, zha ne brieḡ nëz Jerusalén bdziṅ ga, rnee zho:

—Beelzebú, ma ne rnabey lo men̄dōx, ma co nacie me gane rrieelo ruṅcxooṅ me men̄dōx.

²³ Dzigo bredz me zho bzodiidz me tib cuent lo zho, rëb me:

—¿Pa nan̄ to na grielo lëëque men̄dōx guṅcxooṅ samen̄dōx ma?

²⁴ Teḡ tib guiedz nadien̄ gac miech chop dii, csilo zho tiḡsa zho, ¿niacxe nitlod guiedz co?

²⁵ Tib diigaa miecha, teḡ csilo zho lëëque zha tiḡnie men̄lidz zho, ¿niacxe nitlod zho?

²⁶ Scaquegaa men̄dōx nagon, telne lëëque lëe ma tiḡnie samen̄dōx ma, jpe nale na bnitlo ma!

²⁷ Masaque nac men̄dōx zig tib zha ne no xfuers, zha ne gacladz cuee grë ncuaaṅe no lidz zha co, none cxidoogazh zho zho.

²⁸ ‘Gneli naa lo to ganle, grëse doḡ ne ruṅ miech, grë teḡ zha rḡuie zho, rdzibdee zho, bii zuṅ Dios zho perdon min̄ co;

²⁹ sangue zha ne gneenë Espiritu Sant, doḡ nroob ga ruṅ zho, gdziṅd dze ne guṅ Dios zho perdon.

³⁰ Sca rëb me lo zho, sac sca quianee zho rëb zho men̄dōx nacie me.

³¹ Horco laa xniaa me ni zha bets me bdziṅ, per leyse blëz zho; dzigo pxeel zho zha ne zietsedz me.

³² Blalaa zha ne zob gaxpaa lo me, zha co been̄ vis rëb zho:

—Laa xniaa luu gon, ni zha bets luu zi-aadguib luu.

³³ Pquiab me rëb me:

—¿Xnia naa ye, bets naa ye?

³⁴ Dze bui me lo grë zha ne ndxie ga, dzigo rëbchaa me:

—To gon nac xnia naa, to nac bets naa.

³⁵ Sac grëse zha ne ruṅ miṅe racladz Dios, lëe bets naa ga, lëe bzian naa ga, lëe xnia naa ga.

4

Xcuent zha ne güey gon

(Mt. 13:1-23; Lc. 8:4-15)

¹ Dze coquew, laa Jesús psilo quiaseed miech zaatne nac ro Nisdoo Galilé ga. Miech guizhiu ne pcaalsa lo me, nacie güeytsep me tib len̄ barcw ne zo ro nis co, ga bzob me laa grë miech co bre tib ro nis.

² Ndal grë ncuaaṅe pseed me zho, per niapse con cuent rnee mew lo zho. Lëe tib cuent ne bzodiidz me ga nu, rëb me:

³ —¡Goḡquiaadiaga ganle! Tib mḡui name, brieḡ me güey me gon zhoḡxtil.

⁴ Zeene laa me quialaal zhob co, miṅe bliaal gax ro nëz; znuse güey grë mḡuin güeytow maw.

⁵ Laa miṅe bliaal zaatne nac lo quie, znuse znuse blana;

⁶ per zeene laa lo ngbidz brieḡ, znusaque bgooḡa blozh ga bidzgaw; sac guien̄d nroob low.

⁷ Laa miṅe bliaal zaatne nac len̄ yag guiets, zeene laa grë yag guiets co broob znuse bnitlo yag guietsa, pasëw niac.

⁸ Sangue grë miṅe bliaal zaatne nac lo liu naal, blana, brooba ni goca; lo tib tib zhob co no mzion co brieḡ galptsii zhob, now brieḡ tsonḡala, nogaaw brieḡ haxta tib gayoow.

⁹ Blozh ga, rëbchaa me lo zho:

—Zha ne racladz guien̄ miṅe rne naa, yquiaadiag zhow.

¹⁰ Zeene laa grë miech co zey, laa gza tsiipchop xpëedscuel me, ni zla zha ne rzënie me, laa zho bnabdiidz lo me dien̄ zha nac cuent co.

¹¹ Dzigo rëbchaa me lo zho:

—Tel̄ to, Dioszhal rlu lo to zha rnabey me, niicle ncuuaane mazdraa ngueetsa; laa lo grēraa miech ne gard gbig lo me niapse con cuent rzodiidz naaw lo zho parne guien zhow.

¹² Per niicle scaw, nzhal diag zho ron zho, per peet rien̄d zho; nzhal lo zho rwi zho, per peet ran̄d zho; ib nēd zho gbig zho lo Dios, gnab zho gūn me zho perdon.

¹³ 'Nana to, tel̄ne biende to zha nac cuent co, ¿zha guien to grēraa mīne gne naa dzigo? Gol̄quiaadiaga gan̄le, znu gon̄ naca:

¹⁴ Mgui ne güeylaal zhub ga, rreeequia lēē zha ne rienee Xtiīdz Dios lo miech ga, laa zhubxtil̄ co nac Xtiīdz Dios.

¹⁵ No miech nac zig nac ro nēz ne bliaal palal zhub co: rquiaadiag zho Xtiīdz Dios, rlozh ga lēl̄ēd rdzīn men̄dox rquuil ma zho, rsaanga zhow.

¹⁶ Nogaa zho nac zigne nac lo quie co: zeene rquiaadiag zho Xtiīdz Dios, ine rley zho rcaania zhow,

¹⁷ per led dib zdood zho rcaania zhow; gane zeene laa miech rsilo rlēē lo zho, laa miech rtsidil̄ zho porne rililadz zhow, rsaanga zhow.

¹⁸ Zzhisгаа zho nac zigne nac len̄ yag guiets co: nli rquiaadiag zho Xtiīdz Dios,

¹⁹ per rsilo zho lel̄ grē ncuuaane no lo guidzliu rii mazdraa rionie guic zho, rquidie grē dimi zho, rzoobladz zho yquianie zho grēse ncuuaane racladz zho. Grē ncuuaan̄ co rioxcora zho, laa ne tsonie Xtiīdz Dios guic zho, mīn̄ co rquiaqui ib rūnd zho mīne rnabey me.

²⁰ Laa nogaa zho nac zigne nac liu naal̄ co: rquiaadiag zho Xtiīdz Dios, dib zdoo zho rililadz zhow, ni rban zhow zigne naca. Grē zha co, no zho nac zig mzion ne brieē gal̄ptsii zhub ga, no zho nac zig mīne brieē tsongala, nogaa zho nac zig mīne brieē tib gayoow ga.

Xcuent biini ni midz moxtaz

(Mt. 13:31-32, 34-35; Lc. 8:16-18; 13:18-19)

²¹ Blozh ga, biire pcaalsa miech lo me, dzigo rēb me lo zho:

—¿Pa dien̄ rquiin̄ biini? ¿Pe rquiaguiv̄ par tsolana tib len̄ gūn̄ o soogaaw tib zhan lon? Led zeene rquiaguiv̄ lēē, zaatne grieelo gzi-iniw ga rzoob zhow.

²² Scaque nagon̄ grēse ncuuaane rac ngueetsa, grēse ncuuaane rnee miech zhliaana, ib none xoobneña.

²³ 'Tel̄ne racladz to guien̄ to mīne rne naa, gol̄quiaadiaga;

²⁴ ni zigne ron tow scagaa gol̄tsoxco gol̄gūna. Tel̄ne tsoxco to gūn̄ tow, scagaa zioguicraa tow.

²⁵ Sac zha ne tsoxcow, zdedraa Dios guiel̄biini lo zho; sangue zha ne tsoxcoda,

haxta tel̄ palalse guiel̄biini ne bdeed me lo zho stiche mew.

²⁶ Ni rēb me lo zho:

—Znu gon̄ nac zha ne ngab lo Dios; nac zho zig bni ne ran̄ miech.

²⁷ Zha ne rielaal̄ bni co, liu rcow, liu riini, laa zho raaguies, laa zho rieche. Sca sca laa dze zie, laa bni co ratslo, laaw rlan, laaw rroob, per rien̄d zho zha nacne laaw rroob.

²⁸ 'Zhal̄ guidzliu rdeeda guiel̄nzaac co, guizh nac zhub co zeene rлана, rac palal dzew laaw rlan mzion.

²⁹ Laa zeene laaw ral, dzigo laa zho rieti-itsa, sac laa dze bdzīn̄le ne laaw tsas.

³⁰ ¿Zha gan̄le gni naa lo to zeena guien̄ to zha nac xquiel̄rnabey Dios? —rēb Jesús—. ¿Pa tib cuent gan̄le gzodiidz naa lo to zeena guien̄ to zha naca?

³¹ Naca gon̄ zigne nac tib midz moxtaz ne ran̄ miech dan̄ rii. Midz moxtaz nac midz ne mazdraa win,

³² ni tel̄ gacbniv̄, rooba, ni lēēw rroobraa lo grē guizh ne ran̄ zho ro yu, haxta grē mguin̄ riezaa zhiptsieez ma low sacne ncala.

³³ Nzian grē cuent rii pquiin̄ me par cseed me grē miech co, ni laa me bnee mīne rgobey me guien̄ zho.

³⁴ Niapse sca rseed me zho, laa zha ne nac xpēēdsuel me, zeene zhasew rnee mew lo zho zigne naca.

Pcuēēz Jesús tib medox

(Mt. 8:23-27; Lc. 8:22-25)

³⁵ Zeene bdze dze co, rguetsle liuw rēbchaa me lo xpēēdsuel me:

—Gol̄gotsaa diedduia ne stib nēz lo nis rii.

³⁶ Blozhse bnee me lo grē miech co, laa zho biep len̄ barcw ne zob me ga grē me zho, laa zho zie. Ye blalaa barcw ne zob lo nis co zianal̄.

³⁷ Laa zho zie, tibaque zeene laa tib medox psilo brieē, masaque rlis me lo nis co; zeene riasoli low riechoona len̄ barcw, laa barcw psilo noyodzēle nis.

³⁸ Dzigo güey zho güeycuuan̄ zho Jesús, sac lēētaque laa me nixguies nēz zhan barcw ncoogse me tib lmad.

—¡Maestro! —rēb zho—. Bui gan̄le, ¿pe znuse csaan luu nitlo ne nu?

³⁹ Dzigo guche Jesús, bnee me lo me co, bnee me lo nis co, rēb me:

—¡Lēēw ga na! ¡Gol̄cuedzel!

Zigne sca bnee me, laa me co blēz, niicle nis cow laaw bredze.

⁴⁰ Dzigo rēbchaa me lo zho:

—¿Pe nacne squitaa rdzieb to? ¡Gardaque dzigo lēē gliladz to cho nac naa!

⁴¹ Rien̄draa zho zha gūn̄ zho lo dzeb co, ni rnabdiidzlsa zho rnee zho:

—¿Bay cho nac me, zha nacne haxta me, haxta nisdoow ron xtiīdz me?

5

Men Gadar ne nosacsi mendox
(Mt. 8:28-34; Lc. 8:26-39)

¹ Bdzin̄ Jesús n̄z dan̄ ro nisdoo co gza xp̄ēēdsuel me, ga nac xtan zha Gadar.

² Laa me bieldze len̄ barcw, zeene laa tib mgui ne nosacsi mendox bdzin̄ lo me. Len̄ baa brie me mgui co bdzin̄ me ga,

³⁻⁴ sac len̄ baa nac zaatne rb̄z me. Miech ne lēbd zho low, nzian vuelt ziezoob zho caden nia me, ni me ne, per znuse rchug mew, rzhoonga me. ¡Choot rlēbd lo me!

⁵ Dze, guieel quianz̄e me gr̄e dan co, rietso me gr̄e len̄ baa. Roptiedan me, ni lēēque me rzhen̄ quie rchug me guidlad me.

⁶ Laa dze co, zitraa gon̄ me Jesús, rias me bdzin̄ me pquitsgzh̄ib me lo Jesús.

⁷⁻⁸ Dzigo goctox Jesús lo mendox ne noguitnie me, rēb Jesús:

—¡Mendox, psaan men̄ qui!

Horco pcooptsiedan mendox co mgui co, ni rnee ma lo Jesús:

—¿Pe gun̄ luu naa Jesús? Runbey naa luu, Xp̄ēēd Dios ne no gbaa nac luu. ¡Ne nlipagaa been̄ guiel̄nzaac csacid luu naa!

⁹ Dzigo bnabdiidz Jesús lo ma dien̄ cho lē ma. Pquiab ma rēb ma:

—Legion lē no, sac nzian nac no.

¹⁰ Rnab gr̄e mendox co lo Jesús, gzonēzd me ma zit.

¹¹ Gaxaque zhan̄ gui co ndxie tib dzoon nguts noyow,

¹² dzigo bnab ma lo Jesús, rēb ma:

—Bzhiguiel̄ lose gr̄e nguts qui bzonēz no.

¹³ Bdeed Jesús diidz. Dzigo laa gr̄e mendox co psaan mgui co, laa ma zie bzēēb ma zdoos gr̄e nguts ne ndxie ga; psilo gr̄e nguts co rquiaa ma corr̄ güeypix ma glaa tib ro yee ne quia ro nisdoo co, bliiaa ma haxta lo nis. Ga biep ma nis, gr̄ese ma gut. Rгаа ma zig chop mil.

¹⁴ Zha ne quianap gr̄e nguts co, gzase zho bzhoon̄ güeyzodiidz zhow lad guiedz, ni gr̄eraa yu ne zob gax ga. Brie gr̄e miech co, zieso zho.

¹⁵ Zeene bdzin̄ zho, per nli bdzieb zho, sac gon̄ zho laa mgui ne sca bdziitnie mendox ga zobse lo Jesús, laa mgui nacwxable, rlu ndzinlile nac guic mgui.

¹⁶ Psilo gr̄e zha ne gon̄ zha biac mgui co, ni zha goc gr̄e nguts co, psilo zho rzodiidz zhow lo gr̄e zha ne bdzin̄ ga.

¹⁷ Min̄ co bin̄ gr̄e zha co, mazd bnab zho lo Jesús siguiel̄ me gbi me xtan zho.

¹⁸ Zeene laa Jesús zie sēeb me len̄ barcw, dzigo laa mgui co wbigaque lo me, nan̄ mgui nziguiel̄ me nienal̄ mgui zh̄its me.

¹⁹ Per bdeete me diidz, rēb me:

—Wbire, güey güeyzodiidz lo gr̄e men̄lidz luu gan̄le pa lotaa pquia zdoos Dios luu, zha

nactaa milagr nroob ne been̄ me beenguiac me luu.

²⁰ Dzigo wbire mgui. Güey mgui dib xtan zha Decápolis, güeyzodiidz mgui lo gr̄e miech co zha beenguiac Jesús mgui. Gr̄ese zha ne rona, rzee zdoos zho.

Brieaban xp̄ēēdwnaa tib men̄ lē Jair
(Mt. 9:18-26; Lc. 8:40-56)

²¹ Zeene laa Jesús biire brieequia stib n̄z ro nisdoo co, miech guizhiu ne pcaalsa lo me ga.

²² Ga zo me zeene laa tib men̄ ne nacgr̄e zha ne rnabey yadoo lē Jair bdzin̄. Zigne bdzin̄ me lo Jesús pquitsgzh̄ib me,

²³ rēb me:

—Been̄ tib guiel̄nzaac gotsaa guio ne gunguiac luu xp̄ēēd naa. Laa win rlozhle; nan̄paa naa tel̄ne cxobnia luu guic win, ziac win.

²⁴ Dzigo laa Jesús zie n̄z lidz men̄ co. Ndal miech ne zienal̄ zh̄its me, haxta rtaagw zho me.

²⁵ Lad gr̄e miech co zienal̄ tib wnaa, gocle tsiipchop iz rlan me tib guiel̄guidz, rzac me zigne rzac men̄ wnaa gzob mēē, tibaque rlan mew ib rb̄zda.

²⁶ Nzianle lo men̄ ne run̄ rmed ziye me, gr̄ese ncuaaane rap me bloozh me lo rmed; per laa ne cuēz guiel̄guidz co, lel̄ znu rzhizhooraaw.

²⁷⁻²⁸ Ziyonle me gr̄e milagr ne run̄ Jesús. Bza zdoos me rēb me: “Totsaque yгаа maase lad lar ne mbix me xeen̄ naa, ziacle naa.” Dzigo bded me lad gr̄e miech co, wbig gax me n̄z zh̄its Jesús, bzhen̄ me lad lar ne mbix Jesús.

²⁹ Nligaa hor cogazh laa guiel̄guidz co blēz, bien̄ me laa me biac.

³⁰ Zeene bien̄ Jesús ne laa me beenguiac wnaa co, dzigo ptsire lo me rwi me lo gr̄e miech co, rēb me lo zho:

—¿Cho ga bzhen̄ lad xab naa?

³¹ Rēbchaa xp̄ēēdsuel me:

—¿Zha nan̄ luu glu dien̄ cho bzhen̄ lad xab luu, ni squitaa ndaagw ziaad luu lad gr̄e miech qui?

³² Per laa me rwi lo gr̄e miech co dien̄ chow.

³³ Nan̄paa wnaa co ne me ga, rdzieb me, rzhidz me laa me wbig pquitsgzh̄ib me lo Jesús bneeli me zha nacne sca been̄ me.

³⁴ Dzigo rēbchaa Jesús lo me:

—Xin̄, laa luu biac sacne bliladz luu naa. Bzē na, peet tsieniedraa guic luu, laa guiel̄guidz co bichele.

³⁵ Laa Jesús hii quianeeque, zeene laa bla zha ne ziaad n̄z lidz Jair bdzin̄, rēb zho lo Jair:

—Csodziindraa luu lo men̄ qui, laa xp̄ēēd luu gutle.

³⁶ Zeene gon Jesús sca rëb zha co, dzigo bnee me lo Jair rëb me:

—Peet tsienied guic luu. Dib zdoe luu bliladz naa.

³⁷ Psaandraa me cho grë miech co nienal zhits me, loxaque Pedr; Jacob ni Juan bets Jacob; zha cose zienie me.

³⁸ Zeene bdziñ zho lidz men co, tib ruid ne rac, nguiedz zëëb tsi zho roon zho no zho xquielnë mëed co.

³⁹ Dzigo bzëëb Jesús len yu, rëb me lo zho:

—¿Pe nacte squitaa roon to? Goonde to, gon led gute ndzooop win rii, nixguies ndzooop.

⁴⁰ Leñ rzhidznie grë miech co me, bin zho sca rëb me. Dzigo bnabey me brieë zho ley grëse zho, loxaque pxoz mëed co, xniaa win ni gza tson xpëëdsuel me zha ne nal zhits me ga bzëëbnie me len yu ne nix win.

⁴¹ Wbig me bzheñ me nia win, rëb me lo win:

—¡Guche i na, ndzooop yeen! (Talita, cumi.)

⁴² Zigne sca bnee me laa mëed co guche, laa win bzë. Tib mëed tsiipchop iza. Grëse miech co per nli rzee zdoe zho.

⁴³ Dzigo pso me diidz lo zho choot lo gneed zhow; blozh ga bnabey me bdeed zho ncuane dow mëed co.

6

Güey Jesús ladz me

(Mt. 13:53-58; Lc. 4:16-30)

¹ Ga brieë Jesús grë xpëëdsuel me, laa me bdziñ Nazaret zaatne nac ladz me.

² Laa zeene gol dze ne rdziiladz zho lo dziin, laa me bdziñ len yadoo, psilo me pseed me grë miech co. Per nli rzee zdoe zho ron zho grë mine rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me?

³ Tib ngurëëyagse name nac me. Led lëë xingan Marí i, bets me name nac Jacob, nac José, nac Judas ni Simón, grë bzian mew, nu no zho grë zho.

Ib beençasd zho me.

⁴ Zeene gon me sca rac zho, dzigo rëb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho, ni menlidz zho ni menladz zho nëd gunbey zho.

⁵ Brieelod niun me nzian milagr ga, blase zha rzacnë pxobnia me guic, beenguiac me.

⁶ Bzee zdoe me gon me scataa ndip zdoe zho, ib bliladz zho cho nac me.

Blozh ga mazd güey me grë guiedz ne ndxie gax ga, güeyseed me miech.

Pxeeñ Jesús xpëëdsuel me tsieseed zho miech

(Mt. 10:5-15; Lc. 9:1-6)

⁷ Tib dze, bredz me gza tsiipchop xpëëdsuel me, bnabey me zho tsieseed zho miech. Pxeeñ me zho chopga chopga zho, ni bdeed me poder lo zho par goncxoon zho mendox.

⁸ Pso me diidz lo zho güeyd zho pe yquuin zho nëz, lëë gdib tib lë yag ne gzoxca zho güey zho. Zig nac ncuane gow zho, zig nac dimi, pe tib bzuiudgaa, güeyd zhow.

⁹ Lab zho, mine quiaise ni zho; xab zho, mine nacwse zho minçose tsienie zho.

¹⁰ Ni rëb me lo zho:

—Guiedz ne gdziñ to, zha ne gneedz zaatne cuëz to, lidz zha co golcuëz haxta gdziñ dze ne gbi to guiedz co.

¹¹ Laa zaatne ne ib gneedz zho pa cuëz to, niicle nëdga zho yquiaadiag zho mine gnee to, dzigo gollit grë yudie co ni to, golriiegazh ga, zeena guien zho ganle lëda ga been zho.

¹² Dzigo laa zho brieë, laa zho zie. Güey zho, güeynee zho lo grë miech csaan zho xquielntseeb zho, gbig zho lo Dios.

¹³ Nzian zha ne nosacsi mendox, beñcxoon zho mendox co; grë zha ne rzacnë, bdëëb zho nceit guic zho, beenguiac zho zho.

Gut Juan Bautist

(Mt. 14:1-12; Lc. 9:7-9)

¹⁴ Bin rey Herod rzeet zho Jesús, sac tel pa lotaaw zëëb diidz grëtaa milagr ne run me. Grë miech co, no zho rzac brieëban Juan Bautist lëë me ga nac Jesús, gane run me grëtaa milagr co;

¹⁵ nogaa zho rnee Líw, men ne biaad pteed Xtiidz Dios padzeela; zzhisgaa zho rnee, no cho stib men ne ziaad noteed Xtiidz Diosa, zig biaad grë zha ne biaad padzeela.

¹⁶ Zeene ron Herod sca rnee miech, dzigo rnee me:

—Nligaa Juan ga. Naa bnabey pchug zho yan me, per lëë me ga brieëban.

¹⁷⁻¹⁸ Sca rnee Herod sac rsoladz me zha been me Juan. Me bnabey bgaa Juan bio Juan ladzguib, loxaque ne rnee Juan lo me nonguiel da ga lëëque Herodí ptsieelnia me; sac tsieelpaa bets me Lip nac Herodí.

¹⁹ Blëënie wnaa ne nac Herodí ga Juan, rzac me tebaa zha gut me Juan; per rdeetew diidz,

²⁰ sac rdzieb Herod lega pe gon me Juan, rien me tib zha ne zienal mine nac diidzli, tib zha ne peet xtold nac Juan; dzigo ib rdeete me diidz pe gon wnaa co Juan. Niicle ne cadque zeene rnee Juan lo me, rio me zhgab riend me dien zha gon me, per rdziladz me rquiaadiag me grë mine rnee Juan.

²¹ Laa tibtaa dze laa mine no guic Herodí ga goc. Dze ne bloozh Herod stib iz, bnabey

Herod goc tib lni nroob, bredz me grè zha ne nacnie me dziin, grè zha ne zo lo menğuuib, ni grè zha non lo zha Galilé.

²²⁻²³ Laa zho no mezh noyow zho, zeene bzèeb xindzooop Herodí psilo ndzooop biee ndzooop. Bdziladz Herod gon me zha biee ndzooop, grè zha ne zob lo mezh ga ne. Dzigo rëb Herod lo ndzooop, tel petaa gnab ndzooop zdeed mew; haxta brieer ro me rëb me:

—Ncuuaane gacladzttaa luu gnab luu, niicle zig groļ grè ncuuaane rap naaw, znedz naaw.

²⁴ Rias ndzooop güeynabdiidz ndzooop lo xnıaa ndzooop. Dzigo rëbchaa me lo ndzooop:

—Bnab lo me gnabey me tsiechug zho guic Juan gneedz zhow lo luu.

²⁵ Bdzın ndzooop lo Herod rëb ndzooop:

—Racladz naa xoob guic Juan Bautist tib len plat, gneedz luuw lo naa niinagazh.

²⁶ Zeene bin Herod sca rëb ndzooop, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuuaane gnabtaa ndzooop.

²⁷ Dzigo racse me pxeel me tib menğuuib ne tsiechug guic Juan.

²⁸ Güey menğuuib co len ladzgiuib pchug zho guic Juan. Bdzın zho, zhoobsew tib len plat bdeed zhow lo ndzooop, dzigo güey ndzooop güeydeed ndzooopa lo xnıaa ndzooop.

²⁹ Zeene bin xpëedscuel Juana, dzigo güey zho güeylis zho me ga güeyqueets zho me.

Bguiaan Jesús gaay mil miech

(Mt. 14:13-21; Lc. 9:10-17; Jn. 6:1-14)

³⁰ Zeene laa gza xpëedscuel Jesús bdzın lo me stib, psilo zho bzodiidz zho lo me grëse tel zha güey zho, grëse tel zha güeyseed zho miech. Per miech guizhiu ne ndxie lo me, zha ne rbi, zha ne rdzın; haxta ni riobd gow me grè xpëedscuel me. Dzigo rëb me lo zho:

³¹ —Mazd goļgotsaa guio ne tib zaatne zit-laa lo grè miech rii, zeena grieloda gdziiladz to niip.

³² Dzigo bzèeb me tib len barcw grè me zho, laa zho zie.

³³ Nzian zha ne gon zie me, beenbey zho ne mew. Dzigo ndal miech ne no grè guiedz gax co brieer, rias zho zie zho glole zho bdzın zaatne no gdzın me.

³⁴ Zeene biet me len barcw, gon me laa grè miech guizhiu co ndxiele ga. Pquia zdoo me zho gon me scataa ndxie zho zootle grè mëcwxiil yeen ne guienđ xbaxtor, dzigo psilo me nzian grè ncuuaane pseed me zho.

³⁵⁻³⁶ Goļ bdze dze co, wbig xpëedscuel me lo me rëb zho:

—Mazd gudz lo grè miech qui guey zho na, zeena guioob tsie zho grè guiedz ne ndxie dib gax i, tsiesi zho ncuuaane gow zho; sac gon laa dze bdzele, ni choot miech guienđ nu.

³⁷ Pquiaab me rëb me lo zho:

—To goļdeed ncuuaane gow zho.

Rëbchaa zho lo me:

—¿Pe zhizhe dimi ne yquuin gziuu guietxtil ne gow grëtaa miech qui?

³⁸ Dzigo bnabdiidz me lo zho, rëb me:

—¿Bla guietxtil ziaadnie to? ¿Goļwi dien!

Zeene biire zho güeyso zho, rëbchaa zho lo me:

—Loxaque gaay guietxtil ziaad, ni ziaad chop mel.

³⁹ Dzigo bnabey me bzob grè miech co, wdzeepaaw bioogse lo guizh nguia ne zèeb ga ndxie zho. Tib dzoonga tib dzoonga zho bre,

⁴⁰ zaatne bre tib gayoo zho, zaatne bree-gaa groļ gayoo zho.

⁴¹ Dzigo bzhen me gza gaay guietxtil co, ni grop mel co, blis lo me bui me nëz gbaa, bdeed me xquizh lo Dios. Blozh ga, beengroļ me guietxtil co, zigse rdeed mew lo xpëedscuel me, scase scase noguiiz zhow lo grè miech co. Scaque been me grop mel co.

⁴² Grëse miech co, dow zho haxta zaatne bieltaa zdoo zho.

⁴³⁻⁴⁴ Miech tafa, zha bguise rgaa zig gaay mil; ni zeene blozh dow zho, scase ncuuaane nroob biaan, biodzë tsiipchop chicuid bio grè guietxtil co, bio grè mel co.

Rzë Jesús lo nisdo

(Mt. 14:22-27, 34-36; Jn. 6:16-21)

⁴⁵ Zeene blozh ga, bnabey Jesús xpëedscuel me bzèeb zho len barcw, zeena zienerga zho tedquia zho stib nëz ro nis co, gdzın zho guiedz ne lë Betsaid; laa me bii blëz ga, nozonëz me grè miech co.

⁴⁶ Blozhse bzonëz me zho, dzigo güey me tib guic gui zob gax ga, güeyzodiidznie me Dios.

⁴⁷ Zig rguets liuw, laa barcw ne zie xpëedscuel me ga no lo nis co. Laa me zo ga tipse me,

⁴⁸ ran me rlu ib gacd csëeniob zhow, sac rrieer me rtsire mew. Merle guimbe liuw, tibaque zeene gon zho laa me bdzın zaatne zie zho ga; tib lo nis co ziezë me, rac me zig nac zeene tibted me lo zho.

⁴⁹ Zeene gon zho laa men co sca ziaad-zë lo nis co, bdzieb zho, broptsie zho rnee zho:

—¿Tib ndziin i gon ziaad i!

⁵⁰ Sac grëse zho ran lo zho laa me sca ziezë lo nis co. Dzigo bnee me lo zho rëb me:

—¿Gdziebde to, naa ziaal nu!

⁵¹ Zeene laa me biep len barcw ne zie zho ga, laa me co blëz; dzigo mazdraa bzee zdoo zho.

⁵² ¿Per ib rienđ zho cho nac me, niicle ne gonle zho been me milagr nroob co bguiaan me miech guizhiu co!

⁵³ Zeene laa zho bdzın stib nëz ro nis co, zaatne nac xtan zha Genesaret, dzigo laa zho pxidoo xbarcw zho ro nis ga.

⁵⁴ Loxaque biet me leñ barcw laa grë miech co beenbeyle me.

⁵⁵ Rias zho güey zho grë guiedz co, güeynie zho diidz laa me bdziñ ga. Dzigo psilo grë miech co rxob zho zhimguidz zho lo yag, rdziñnie zho zho lo me zaatne rontaa zho no me.

⁵⁶ Zaatne gdziñtaa me, niicle guiedz nrooba, niicle guiedz lasa, rbee grë miech co zhimguidz zho rienie zho zho zaatne nac leñ guiedz; ga rnab zho lo me siguiel me maase ni lar ne mbixse me xen grë men rzacñe co. Ni grëse zha ne rzhen xab me, riac zho.

7

Ncuaane runctal xtoł miech (Mt. 15:1-20)

¹ Tib dze, bdziñ bla zha farisé, ni zha maistr ley ne ziaad nēz Jerusalén, lo Jesús.

² Dzigo gon zho blalaa zha ne nac xpëēdsuel Jesús, zeene laa zho row rguuibd zho nia zho zigne nacpaa grë zhiwseed xmengol zho.

³ (Nac zha farisé, ni grësegaa zha Israel telne tsard nia zho zigne nac xcostumbr xmengol zho, ible rowd zho; sac zienaldox zho mine nac costumbr.

⁴ Zeene rbire zho lo lgui, ib no mod ne riar nia zho dzigoraa rzob zho row zho. Nzian grë wseed co psan xmengol zho zienal zho, zig nac zha riar grë tas, grë cant, grë xtsiñ rotie zho mine niaa guuib, ni grë lo bangw ne rzob zho row zho.)

⁵ Dzigo rēb zho lo Jesús:

—¿Pe nacne zienald xpëēdsuel luu mine blu xmengol ne? ¿Pe nacne squize nia beed zho i row zho?

⁶ Pquiab Jesús rēb me lo zho:

—Nlipaa mine bnee Isá, men ne biaad pteed Xtiidz Dios, zeene znu pquiiaa me: Grë miech rii, rquiaalose zho runnon zho naa,

rond zho diidz gon zho mine rnabey naa.

⁷ Paat rquiind riaad zho riaadgan zho naa; sac niapse guicle zho riab grë wseed ne quialu zho lo miech.

⁸ Sac tel to gon, nosaan to grë mine rnabey Dios, lel grë xcostumbr miech zienal to.

⁹ Xcostumbr to nac mine mazdraa rioxco to, laa mine rnabey Dios quiasan to tib lad.

¹⁰ Led znu gon rnee ley ne bdeed Dios lo Moisés: “Gon pxoz luu, gon xniala luu”, ni no stib mine rnee: “Zha ne quie pxoz, quiegaa xniala, ib none guet zho.”

¹¹ Laa to lel rnee to, zac guñd miech xyudar xmengol zho, telne bloogonle zho pe nac ncuaane rieguial gdeed zho lo me.

¹² Tole rdeete diidz ga gon zho xyudar pxoz zho, xyudar xniala zho.

¹³ Tib ladle gon rsan to Xley Dios ga sca run to, lēēpaaze grë costumbr ne biaañnie to,

ni quiasangaa to lo zha ne ziaadquia, min co noxcoraa to. Ni nzianraa grë falt ne squi quiaayun to.

¹⁴ Dzigo bnee me lo grëraa miech ne ndxie ga, rēb me lo zho:

—Golquiaadiag mine gni naa lo to nu, ni goltsoxco guien to zha naca.

¹⁵⁻¹⁶ Golgacnan ganle: Grë ncuaane rdziñ zdoos miech, led mincod runctal xtoł zho; sinque grë ncuaane ntseeb ne rza zdoos zho, min co nac mine runctal xtoł zho.

¹⁷ Laa zeene laa me bdziñ ro yu grë xpëēdsuel me, dzigo bnabdiidz zho lo me dien zha nac diidz ne sca rēb me lo grë miech co.

¹⁸ Rēbchaa me lo zho:

—¿Pe niicle to riendaqew dzigo lēē? ¿Pe riende to, grë ncuaane row miech, led mincod runctal xtoł zho?

¹⁹ Sac grë ncuaane row zho rdziñda leñ zdoomban zho, zhaa zaatne rdziña. Grë guielwagw, leñ bzuiud zdoose zho, leñ zhitripse zho rieteda, rlozh ga rrieegaw xcuerp zho.

Ga blu me lo zho ganle, grëse ncuaane nac guielwagw lēda runctal xtoł miech.

²⁰ Ni rēb me lo zho:

—Mine rza zdoomban miech, min co nac mine runctal xtoł zho.

²¹ Sac zdoomban zho rza grë ncuaane ntseeb ne run zho, zig nac:

zeene rio zho grë zhgab yozh,

zeene run zho grë guielyozh,

zeene rban zho,

zeene rut zho samiech zho,

²² zeene rionie zho zha ne nacd tsieeld zho, zeene rzoobladz zho ncuaane rap stib miech,

zeene run zho grë guielntseeb,

zeene rquidie zho,

zeene rien zho run zho grë ncuaane ndzinlid,

zeene ne rac zdoos zho ran zho cho zha ne stibnoded,

zeene rzhixcuaa zho diidzguizh,

zeene racniats zho,

zeene run zho grëraa ncuaane paat rquiind.

²³ Grëse ncuaane ntseeb rii, zdoomban miech rzaw, ni lēēw nac mine runctal xtoł zho.

Biac xpëēd tib wnaa zit

(Mt. 15:21-28)

²⁴ Ga briece Jesús, laa me zie nēz Tiro. Zeene bdziñ me nēz co ga bdziel tib yu ne blēz me, gocladz me choot niacnañd ne laa me no ga; per brieeloda, znuse bien diidza.

²⁵⁻²⁶ Zeene bin tib wnaa Sirofenis laa Jesús bdziñ ga, dzigo güey me, sac noguitnie mendox tib xpëēd me. Zigne bdziñ me pquitsgzhib me lo Jesús, rnab me tsiegunxoon Jesús mendox co. Tib wnaa zit nac wnaa co;

²⁷ dzigo rëbchaa Jesús lo me:
—Blëz niip dien. None glo mëéd gow, nonguiel da cuee ne quiet nia mëéd gdeed new lo mëcw.

²⁸ Pquiab wnaa co, rëb me:
—Nli scaw, zigne rnee luu i; per niicle mëcwa led rio ma zhan mezh rtop ma grë mine rriengaa nia mëéd.

²⁹ Dzigo rëbchaa Jesús:
—jSquiw nagon! Lëégazha i rnee luu. Peet tsieniedraa guic luu naa sca; bzë, laa mendox ne nosacsi xpëéd luu bichele.

³⁰ Laa wnaa co zey. Zeene bdziñ me lidz me, gon me ine laa xpëéd me nixse lo lon, per laa mendox co psaanle win.

Biac tib men ne rcuaat

³¹ Ga brieë Jesús, güeyted me nëz Sidón. Sidón brieë me bdziñ me ro Nisdoo Galilé stib, zaatne nac xtan zha Decápolis.

³² Ga bdziñnie zho tib mgui lo me, rcuaat mgui ni nca rnee mgui; bnaab zho lo me cxobnia me guic mgui gunguiac me mgui.

³³ Dzigo bleë me mgui lad grë miech ne ndxie ga. Zitlaa güeynie me mgui, ga psëéb me mzhugnia me gropse len diag mgui ni bdëéb me zhinzuc me lo ludz mgui.

³⁴ Blozh ga, blis lo me bui me nëz gbaa, bneeladz zdoo me, dzigo rëb me:

—jBzhial! (jEfata!)

³⁵ Zigne sca bnee me, laa diag mgui co bzhial, niicle ludz mguiw laaw wban, laa mgui psilo bneenal.

³⁶ Dzigo pso Jesús diidz lo grë miech co, choot lo gzodiidzd zho zha biac mgui co.

Per laa ne rso me diidz lo zho, dzigole nëzrii, nëzrec rzodiidz zho;

³⁷ sac rzeedox zdoo zho gon zho mine been me ga.

—jNcuaañe gzee zdoo ne i been men qui! —rnee zho—. Zha haxta nguuaat, haxta ngop, runguiac me.

8

Bguiaan Jesús tap mil miech

(Mt. 15:32-39)

¹ Len dze co, miech guizhiu ne biire pcaalsa lo Jesús stib. Zeene goc tson ngbidza, guiendraa ncuaañe gow zho. Dzigo bredz me xpëédscuel me, rëb me lo zho:

² —Rquia zdoo naa grë miech rii, tsonle ngbidz ga rac blanso zho nu, ni na quianiedraa zho ncuaañe gow zho.

³ Telne squise zho gzonëz naa zho, glëbd zho, scow zho nëz, sac no zho zit brieë zho ziaad zho nu.

⁴ Pquiab zho rëb zho:

—jPer pe yguiaan ne zho? jPa guioxi ne quietxtil ne gow grëtaa miech qui dan rii, naca zaatne guiend miech?

⁵ Dzigo bnaabdiidz me lo zho, rëb me:

—jBla quietxtil ziaadnie to i?

—Gadzaquew —rëb zho.

⁶ Dzigo bnaabey me grëse miech co bzob zho liu. Blozh ga bzhen me gza quietxtil co, bdeed me xquizh lo Dios; blozhse bdeed me xquizh lo Dios, zigse noyungrol mew, scase scase rdeed mew lo xpëédscuel me rguiz zhow lo grë miech co.

⁷ Zienie zho zla mel las; bzhen me gza mel co bdeed me xquizh lo Dios, blozh ga bnaabeyaque me zho bdiiz zho ma.

⁸⁻⁹ Grëse miech co, dow zho haxta zaatne bieltaa zho dzigo laa me bzonëz zho. Rгаа zho maase tap mil, ni zeene blozh dow zho bii bdop gadz chicuid mine biaan.

¹⁰ Blozh ga, laa me bzëéb len barcw grë xpëédscuel me, laa zho zie nëz xtan zha Dalmanut.

Racladz zha farisé gan zho milagr

(Mt. 16:1-12; Lc. 12:54-56)

¹¹ Blalaa zha farisé ne no nëz co, zeene bin zho laa me bdziñ ladz zho, güey zho rzadraa ncuaañe rlisqui zho lo me. Rnab zho glu me cho nac me, rëb zho lo me:

—Racladz no dzianlo no gun luu tib milagr; telne nli gbaa ziaad luu.

¹² Zeene gon me sca rac zho, bio me guielnë; dzigo haxta bneeladz zdoo me, rëb me lo zho:

—jZha rnaraa milagr ne racladz to gan to? Gneli naa lo to ganle, ni stib milagr gon gandraa to.

¹³ Blozhse sca rëb me lo zho, ndxieque zho ga laa me bzëéb len barcw laa me zie stib nëz ro nis co.

¹⁴ Zeene brieë zho ga, zoladzd xpëédscuel me ney zho ncuaañe niow zho, lëë gdib tib quietxtil zienie zho len barcw.

¹⁵ Laa zho zie, tibaque zeene rëb me lo zho:

—Golguien gon, napaa noyac-wet to lo zhincobi zha farisé, lo zhincobigaa rey Herod.

¹⁶ Zeene bin zho sca rëb me, bza zdoo zho rnee zho:

—Ne gon me nagon ziaadnied ne quietxtil gane squi rnee me.

¹⁷ Bien me sca rnee zho, dzigo rëbchaa me lo zho:

—jPe nacne rnee to ziaadniede to quietxtil? jRiende to lëë zha rne naa? Ndip nac zdoo to gane riende tow.

¹⁸ jPa rquiin lo to, pa rquiin diag to ne laaw zob?

¹⁹ jPe rsoladzde to zeene gaayaque quietxtil ni bgaaw bguiaan naa gaay mil miech? jBla chicuid biodzë mine biaan hor co?

Pquiab zho rëb zho:

—Tsiipchopa.

²⁰ Dzigo rëbchaa me:

—Zeeṇe waa gadzaque guietxtil co, ni bguian naa tap mil miech, ¿bla chicuida biaan?

—Gadz chicuida —rëb zho.

²¹ Dzigo rëb me lo zho:

—¿Pe niicle nana riendaque to pe rne naa?

Biac tib meṇ ne rcow lo

²² Bdzin Jesús guiedz ne lë Betsaid, ga güeynie zho tib mgui ne rcow lo me, bñab zho cxobnia me guic mgui gunguiac me mgui.

²³ Dzigo bzheṇ me nia mgui güeynie me mgui zaatne nacle ro guiedz co. Ga bdëëb me zhinzuc me leṇ bziaalo mgui, ni pquiaania me zhits guidlo mgui; blozh ga bñabdiidz me lo mgui dieṇ pe ranle mgui palal.

²⁴ Zeeṇe laa mgui bui, rëbchaa mgui:

—Ranle naa niina nagon laa miech ziezë; per masaque ran naa zho zig rlu grë yag.

²⁵ Dzigo biire pquiaania me zhits lo mgui. Zeeṇe laa mgui bui stib, ndiple rwi mgui laa lo mgui biacle. Grëse ncuaaṇe ran mgui, niicle zittraaw niini ran mguiw.

²⁶ Dzigo bzonz Jesús mgui nëz lidz mgui, pso me diidz lo mgui tib nëz guey mgui, choot lo tsiezodiidz mguiw lad guiedz.

Bnee Pedr cho nac Jesús

(Mt. 16:13-20; Lc. 9:18-21)

²⁷ Blozhse ga, laa Jesús brieë ga grë xpëëdsuel me laa zho zie nëz Cesarea de Filipino, zieted zho grë guiedz las ne ndxie nëz co. Laa zho no nëz, tibaque zeeṇe bñabdiidz me rëb me lo zho:

—¿Cho dieṇ ron to rnee miech nac naa?

²⁸ Pquiab zho, rëb zho:

—No zho rnee Juan Bautista, no zho rnee Liw, meṇ ne biadteed xtiidz Dios padzeela; nogaa zho rnee no cho stib meṇ ne ziadteed xtiidz Diosa.

²⁹ Dzigo rëb me lo zho:

—¿To waa, cho rzac to nac naa?

Pquiab Pedr, rëb Pedr lo me:

—¿Luu nac Meṇ ne zëëble diidz ga cxeel Dios guiaad lo guidzliu!

³⁰ Dzigo pso me diidz lo zho choot lo gneed zhow.

Bzeet Jesús zha guṇ miech me

(Mt. 16:21-28; Lc. 9:22-27)

³¹ Bded ga, psilo Jesús bzeet me lo grë xpëëdsuel me zha csacsi miech me. Rëb me nroob grë ncuaaṇe cteed zho me; grë zha non lo menguedz, grë pxoz nroob, grë zha ne reseed miech ley, ible stsidil zho me, ni haxta zut zho me; per zeeṇe gac tson ngbidz gut me laa me grieeban.

³² Grëse miṇe ted me, laaw nozodiidz me lo zho.

Goṇ Pedr sca rnee me, dzigo bredz Pedr me, blisqui Pedr lo me dieṇ pe nacne rnee me laa me guet.

³³ Zeeṇe goṇ me zha rzë xtiidz Pedr, zoque Pedr ga biecw me bui me lo grëraa xpëëdsuel me, goctox me rëb me:

—¿Biche lo naa nu meṇdox! Zienied guic luu miṇe rnabey Dios, sinque laa guic luu zienie miṇe racladz luu.

³⁴ Dzigo blunia me lo grë miech ne ndxie ga, yquiaadiag zho miṇe gnee me; rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho miṇe rnabey naa, niicle tel miṇ co yquiaaqui csacsi miech zho. Nodne yquia zdoos zho xquieṇmban zho.

³⁵ Sac zha ne yquia zdoos xquieṇmban, lel znu nitlo zho; sangue zha ne sca cueeladz xquieṇmban porne rleynie zho naa, porne rleynie zho grë Diidz Ndzon rii, zha co ygaa tib guieṇmban ne mazdraa ndzon.

³⁶ Nana, tel zha ne guṇlo grëse ncuaaṇe no lo guidzliu rii. ¿Pa yquiiṇ grë ncuaaṇ co lo zho, tel lëw yquiaaqui laa zho guey gabil?

³⁷ ¿Niacle zrieelo gdziib zho dimi co laa zho leṇ gabil?

³⁸ Naa ne nac naa Meṇ ne pxeel Dios zial naa lo guidzliu, zha ne ctoladz guiab zho lo grë miech ngoopdol rii laa zho no xnëz naa, o ctoladzniegaa zho xtudz naa, scaque naa stoladznie naa zho gal dze ne laa naa guial stib. Dze ne guialnie naa grë anjl, ni glu naa grë guieṇndzon ne rap Dios.

9

¹ Ni rëb me lo grë miech co:

—Gneli naa lo to ganle, nzian grë zha ne ndxie nu niina ibe tsod gardaque guet zho, bii zan zho ganle zeeṇe laa Dios glu ne nli meṇ rnabey nac me.

Bdzëëlo Jesús

(Mt. 17:1-13; Lc. 9:28-36)

² Goca xoop ngbidz, brieë Jesús gza me Pedr, Jacob ni Juan, güey zho bzoquia zho tib guic gui glaa.

Bdzin zho glaa guic gui co, tibaque zeeṇe goṇ zho laa me bdzëëlo.

³ Masaque rquiabni xab me, nquitsbie rnaw; ni tib miech grieelod scataa mbe quiih lar.

⁴ Goṇlo zho zeeṇe laa Lí ni Moisés (grop zha ne biadteed xtiidz Dios glo) bdziṇaque, laa zho nozodiidznie me.

⁵ Dzigo rëbchaa lo me:

—Maestro, ¿ne nligaa wena guiaan ne nu! Laa no gzaa tson yu yag xiid win nu tso to: tiba tso luu, tiba tso Moisés, stiba tso Lí.

⁶ Rdzieb Pedr gza Pedr schop zha co, lo dzeb co niicle riendaque Pedr pe rnee Pedr.

⁷ Tibaque znuse bdoṗ tib xcow pquia ngali zaatne zo zho ga; dzigo bin zho zëëb tib tsi men co lo xcow co, rnee me:

—Lëë xpëëd naa i gon, rleynie naa me. Golgon miñe rnee me.

⁸ Lëëled biecw lo zho rwi zho, choot gonṑraa zho, Jesússe zo lo zho ga.

⁹ Blozhse ga, laa zho wbique ga. Laa zho ziezëëb dan noyot zho cho gui co, zeene rëb me lo zho:

—Miñe gon to gon, choot lo gneede tow. Golcuëz haxta gal dze ne grieëban Men ne pxeel Dios.

¹⁰ Nacne choot lo bneed zhow, per psilo zho gza tson zho rñabdiidzlsa zho, zha mod grieëban tib zha ne gutle.

¹¹ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigoraa guiaad Men ne zëëble diidz ga cxeel Dios?

¹²⁻¹³ Pquiab me rëb me lo zho:

—Nliw, ible nacle diidz ne glo Lí guiaad-seed miech gon zho xtiidz Dios, per laa me biaadle; ni zigne bzeetse grë zha ne biadteed xtiidz Dios ted me, scase been miech me. Scaque Men ne cxeel Dios ga, rnee lo Xtiidz Dios nroob csacsi miech me, ible ganṑzed zho me.

Biac tib niib ngop

(Mt. 17:14-21; Lc. 9:37-43)

¹⁴ Zeene bḑziñ Jesús zaatne biaan grëraa xpëëdsuel me ga, gza me Pedr Jacob ni Juan; gon zho miech guizhiu ne ndxie lo zho; blalaa zha ne nac maistr ley zo lo zho ga, nodiḑdiidznie zho.

¹⁵ Grë miech co, zeene gon zho Jesús, rley zho, rias zho güeydzieelo zho me güeyquiaa bḑiuzh zho me.

¹⁶ Dzigo bnabdiidz me rëb me:

—¿Pe nadien squitaa nodiḑdiidz to?

¹⁷ Lad grë miech co pquiab tib zho, rëb:

—Maestro, lo luu zialñie naa tib xpëëd naa guñguiaac luu win; ib gacḑ gnee win sac noguitnie menḑox win.

¹⁸ Teḑ pataa zo win, zeene laa ma rzëëb zdoṑ win rron ma win liu; ga nix win rdzib mtsiñ ro win, ni row lay win; nrooble noyo win lëbḑraa win së win. Blansonie naa win nu, dzigo bnab naa lo xpëëdsuel luu guñcxoon zho menḑox co, per brieelod zho.

¹⁹ Dzigo rëbchaa Jesús lo zho:

—¿Pe na squitaa miech nad nac to, ib rnalod to Dios! ¿Palal tiemp ne so naa gne naa lo to? ¿Ncuaañe cxcwdraa naa lo to squi nac to! ¿Goltënie mëëdwin qui nu!

²⁰ Güey zho güeynie zho mëëdwin co lo me. Zigne gon menḑox co me, psilo beenḑxidz ma win, znuse biab win liu, rtiibxto win ni rdzib mtsiñ ro win.

²¹ Dzigo bnabdiidz me lo pxoz win, goc palal dze psilo sca rac win.

Rëbchaa pxoz win:

—Bii mëdeyen win psilo squi rac win.

²² Pe zhidaa vuelṑ zieron menḑox qui win lo gui, zieron ma win lo nis ne, racladz ma gut ma win. Bzhiguiel telne zrieelo guñguiaac luu xpëëd naa, ¿quia zdoṑ naa, been tib guielñzaac beenguiaac win!

²³ Rëbchaa Jesús lo me:

—¿Zha rnee luu “telne zrieelow”? ¿Zha ne dib zdoṑ rnalod Dios, grëse ncuaañe racladz zho, zaca!

²⁴ Lëëled pquiab pxoz mëëd co, rëb me:

—Rnalod naa Dios, per bzhiguiel been xyudar naa, ¿dib zdoṑ naa gnalo naa me!

²⁵ Zeene gon Jesús laa grë miech co rbigberaa, dzigo goctox me lo menḑox ne noguitnie mëëd co, rëb me:

—Menḑox, luu gon psañ ngop mëëd rii, luu psañ nguaat win. ¿Niinagazh psaan win, ib gbiiredraa luu ygaal luu win!

²⁶ Horco biire beenḑxidz ma mëëd co stib, masaque roptsiedan ma laa psaan win, nixtaque win ga, zootle gutle win. Nzian grë miech co, tibaque nan zho gutle win.

²⁷ Laa zeene bzhen Jesús nia win, blis me win ga, laa win bzoli.

²⁸ Zeene bḑziñ Jesús len yu ne rbëz me grë xpëëdsuel me, bnabdiidz zho lo me rëb zho:

—¿Bay pe nacne brieelod no ndziunḑoon no menḑox co?

²⁹ Dzigo rëbchaa me lo zho:

—Grë menḑox ne sca nac, rquini dib zdoṑ ne gnab ne lo Dios dzigo zrieelo guñcxoon ne ma.

Bzeet Jesús laa miech csacsi me

(Mt. 17:22-23; Lc. 9:43-45)

³⁰⁻³¹ Brieë Jesús ga grë xpëëdsuel me, laa zho wbiire nëz xtan Galilé stib. Racladz me cho gacnan pa lo no me; sac len dze co nzian grë ncuaañe noseed me zho. Haxta bzeet me zha csacsi miech me, rëb me:

—Naa ne nac naa Men ne pxeel Dios, ible ziaab naa ladznia miech, ni zut zho naa. Per zeene gac tson ngbiḑz gut naa, laa naa grieëban.

³² Per ib riend zho pe nacne sca rnee me, niicle gnabdiidzga zho rdzieb zho gnabdiidz zhow lo me.

¿Cho nonraa?

(Mt. 18:1-5; Lc. 9:46-50)

³³ Bḑziñ zho guiedz ne lë Capernaum; grëse zho laa zho ndxie len yu ne blëz zho, tibaque bnabdiidz Jesús lo zho, rëb me:

—Golñë dien, ¿pe scataa nodiḑdiidz to zeene ziaad ne nëz?

³⁴ Ni tib zho ib pquiabd, sac zeene ziaad zho nëz quianeelsa zho dien cho nac zha ne nonraa.

³⁵ Dzigo zbob me, bredz me zho gza tsiipchop zho rëb me lo zho:

—Zha ne racladz gac zho zha non, none guiaanwin zho gac zho zig tib ngundziin lo samiech zho.

³⁶ Dzigo bzo me tib mēēdbgui win glowtaa lo zho; blozh ga bdeedz me win ni rēb me lo zho:

³⁷ —Zha ne ngab xnēz naa, ni gleynie zho tib mēēdwin zig mēēdwin rii, guñ naa cuent naa ga rleynie zho; ni zha ne sca rleynie naa, ye le men ne pxeel naa ga rleynie zho.

³⁸ Blozh ga, rēbchaa Juan lo me:

—Maestro, bdzion no gon bzeet tib zha co lē luu zeene benxoon zho menox; nacne nli blisqui now lo zho, sac gon, led yed zho nacgrē ne.

³⁹ Dzigo pquiab me rēb me lo zho:

—iGuñscade to! Sac gon zha ne sca rzeet lē naa zeene run zho milagr; niacxe lēēque zha glēē lo naa.

⁴⁰ Zha ne nacnie ne, glēēd zho lo ne.

⁴¹ Golgacnañ sca ganle, grēse zha ne gdeed maase tib zhigaque nis guie zha ne ngab lo naa, ib tedsod stsire Dios mine been zho ga.

⁴² Sangue zha ne yguib gunctal zho xtol zho ne nac zho zig tib mēēdlas yeen; mazd lēētaa mine ted zha co sobdoo tib quie molin zhoxtil yquiaw yan zho tsieron zho zho nisdoo.

Choot gdeete diidz guiab lo dol

(Mt. 18:6-9; Lc. 17:1-2)

⁴³⁻⁴⁴ 'Zha ne rien nia zho nac mine rquiaqui runctal zho xtol zho, mazd chuggazh zho nia co zho. Peet nacd maase tibaque nia zho zob totsaque yгаа zho guiełmban ndzon ne gdziñd dze lozh, lēdle zob gropa ni laa zho guey gabıl, lo beldox ne gdziñd dze guuu.

⁴⁵⁻⁴⁶ Telne riengaa zho ni zho nac mine rquiaqui runctal zho xtol zho, mazd chuggazh zho ni co zho. Peet nacd maase tibaque ni zho zob totsaque yгаа zho guiełmban ndzon ne gdziñd dze lozh, lēdle zob gropa ni laa zho guey gabıl, lo beldox ne gdziñd dze guuu.

⁴⁷ Tel tib logaa zho nac mine rquiaqui runctal zho xtol zho, mazd cueegazh zho bziaalo co zho. Peet nacd maase tibaque bziaalo zho zob totsaque yгаа zho guiełmban ndzon co, lēdle zob gropa bziaalo zho ni laa zho guey gabıl.

⁴⁸ Zaatne nac gabıl, ib gdziñd dze ne guuu lo bel co; grē mziog ne ndxie ga, gdziñd dze ne nitlo ma.

⁴⁹ Grēse zha ne gdziñ ga, masaque cuib gui lad zho zig rbib zed lad bēel.

⁵⁰ 'Zig nac zed, rquiindoxa zeene nzhiw, per zeene nzhida, ĩpa dien yquina? Scaque-gaa to nagon golgac zig zed ne nzhi, zeena yquini to lo guidzliu rii; niowse golbannie samiech to, glēēlsade to.

10

Zha ne rsēbtsieel

(Mt. 19:1-12; Lc. 16:18)

¹ Brieē Jesús Capernaum güeyted me grē guiedz ne ndxie nēz xtan zha Judé, grē guiedz ne ndxie nēz dañ ro guiubee Jordán. Miech guizhiu ne rcaalsa lo me, dzigo rsilo me rseed me zho zigne runtaque me.

² Tib vuelteł bdziñ bla zha farisé gocladz zho niungüet zho me, par dien pe nxiñd me tib diidz; bnabdiidz zho rēb zho:

—Maestro, mgui ne racladz csēbtsieel, ĩpe gnē luu pe zrieelo csēbtsieel zho?

³ Pquiab me rēb me lo zho:

—ĩZha zho psañ Moisés diidz lo to?

⁴ Pquiab zho rēb zho:

—Tel Moisésa, bdeed me diidz csēbtsieel zha ne racladz csēbtsieel, lēēraasi none yquia tib guits gdeed zho lo wnaa zaatne raquiet ne laa zho psaan wnaa.

⁵ Dzigo rēbchaa me lo zho:

—Ne squicxe waa miech nad nac to ib ronde to diidz, miñ co nacne biaan ley co.

⁶ Per ib nodne csēbtsieel miech; sac gon, zeene psañ Dios grētaa ncuuañe no, tib nēz miech bzaa me: tib mgui ni tib wnaa.

⁷⁻⁸ Gacxe waa, mgui ne rtsieelnia ib none griezhaa zho lo pxoz zho, lo xnıaa zho, par gbannie zho wnaa ne nac tsieel zho; laa zho gactipse grop zho. Nacdraa zho chop miech, sinque laa zho rac tibaque.

⁹ Dios nac men ne psañ ycatsieel miech, cho dzigo nac miech par quiits zho mine rnabey me.

¹⁰ Laa zeene bdziñ me len yu ne rbēz zho, dzigo bnabdiidzaque xpēēdscuel me miñ co lo me stib.

¹¹ Dzigo rēbchaa me lo zho:

—Mgui ne rsēbtsieel ni rbannie zho stib wnaa, noguitnie zho wnaa ne gocpaa tsieel zho ga, ni dol ga run zho.

¹² Niicle wnaagaaw, wnaa ne rsēbtsieel ni rbannie zho stib mgui, lēēque dołaque ga run zho.

Beenlay Jesús mēēdlas

(Mt. 19:13-15; Lc. 18:15-17)

¹³ Tib vuelteł nzian men ne bdziñnie zho xpēēdlas zho lo Jesús, par cxobnia me guic win gunlay me win. Grē zha ne nac xpēēdscuel me, lēł psilo zho ndox zho lo grē zha ne bdziñnie grē mēēdlas co.

¹⁴⁻¹⁵ Zeene gon me sca quiauyñ zho, wbiñladz guic me, dzigo rēb me lo zho:

—Ctsirede to grē mēēdlas yeen qui, golsaan guiaad win lo naa. Sac gon grē mēēdlas yeen, ni zha ne nac zigne nac win, zha co nac zha ne sēēb ygab lo Dios.

¹⁶ Blozhse sca bnee me, dzigo psilo me bdeedz grē mēēdlas co, ni pxobnia me guic win beenlay me win.

*Bzodiidznie tib zha ricw Jesús**(Mt. 19:16-30; Lc. 18:18-30)*

17 Laa Jesús nole nëz tsie me stib guiedz, zeene rias tib niib nguieg bdiiz pquits-zhib lo me, rëb niib lo me:

—Nan naa luu nac tib meñ ne noseed miech, ni tib meñ wen nac luu; ÷bnë dieñ pe nac miñe guñ naa zeena yгаа naa guielmban ndzon ne gdziñdraa dze lozh?

18 Rëbchaa Jesús lo niib:

—Rnee luu lëe tib meñ wen nac naa. ¡Nli-gaaw, Diosse nac meñ wen!

19 Nanle luu ganle zha nac Xley Dios, rneew:

Gute luu samiech luu, telne nole tsieel luu, tsonied luu zha ne led tsieeld luu,

cuand luu samiech luu, yquadiidzguizhd luu samiech luu, yquidieed luu samiech luu, gon pxoz luu, gon xniaa luu; bin miñe rnabey me luu.

20 Dzigo pquiab niib rëb niib lo me:

—Maestro, grësev zigne bzeetse luuw i, ni tiba gard quits naa wlal ne nac naa zha nguieg.

21 Dze rwi Jesús lo niib, rleynie me niib.

—Stibaque miñe rquini guñ luu —rëb me—, güey, güeyto grëse ncuaañe quianie luu, dzigo bdiiz dimi co lo grë zha mban ne guieñd pe yquini; sca nroobraa guielnzaac ne yгаа luu gbaa. Lozh ga, bleeladz xquielmban luu dënal zhits naa.

22 Zeene bin niib co sca rëb Jesús, biab guielnë niib, mbanse rac niib laa niib zey; sac ne nligaa nroob ncuaañe quianie niib.

23 Dze rwi me gon me laa zha nguieg co zey, dzigo rëb me lo xpëëdsuel me:

—¡Grë zha ne squi rapchen, rzacxuu zho par sëeb zho xnëz Dios gnabey me zho!

24 Zeene bin zho sca rëb me, rzee zdoo zho. Dzigo biire me bnee me rëb me lo zho:

—Xin, ¡ne nligaa tib miech ne ndziib rap chen, rzacxuu zho sëeb zho xnëz Dios gnabey Dios zho!

25 Mazd znuse rded tib camell guieer guzh, lëdle sëeb tib zha ricw xnëz Dios.

26 Zeene bin zho sca rëb me, mazdraa bzee zdoo zho, rnabdiidzlsa zho rnee zho:

—Bay, ÷chose dzigo nac zha ne zrieelo sëeb xnëz Dios?

27 Dze rwi me lo zho, dzigo rëbchaa me:

—Par miech zootle tsod zha ne grieelo sëeb xnëz me. Sañgue me, nan me no zho; sac tsod ncuaañe grieelod guñ me.

28 Dzigo rëb Pedr lo me:

—Tel no, grëse ncuaañe rdziaap no laa no psana, laa no ziaadnal zhits luu.

29 Pquiab me rëb me:

—Grëse zha ne psan lidz, psan zho bets zho, bzian zho, xniaa zho, pxoz zho, xpëëd

zho, liun zho, porne riladz zho naa ni riladz zho Xtiiidz Ndzon Dios;

30 nli nroob guielnë gan zho, per gneli naa lo to ganle: grëse ncuaañe sca psan zho ga, lo guielmban riique laa zho gbiire gana stib tib gayoogaw tib tiba; ni ib tedod zgaa zho tib guielmban ndzon ne gdziñdraa dze lozh.

31 'Nli zig nac niina, no zha ne rzac zha non nac zho, per zeene gal dze co peet gacnond zho; laa zha ne rzac zho peet nond, gal dze co lalga gac zho grë zho.

Biire bzeet Jesús laa miech csacsi me
(Mt. 20:17-28; Lc. 18:31-34)

32 Brieet Jesús ga laa me zie Jerusalén. Nzian grë zha ne zienal zhits me, nerse me lo zho laa zho zie. Grë zha ne nac xpëëdsuel mew, rzee zdoo zho; laa grëraa miech co per nli rdzieb zho. Dzigo bredz me gza tsiipchop zha ne nac xpëëdsuel me ga, psilo me bzeet me grëse tel zha ziaadyob ted me, rëb me lo zho:

33 —Bii zan to ganle, naa ne nac naa Men ne pxeel Dios, niina ne laa ne gdziñ Jerusalén ible zielo zho naa lадznia grë zha ne nac pxoz nroob ni grë zha ne rseed miech ley. Grë zha co gnab guet naa, ni san zho naa ladznia grë zha ne nacdraa zha Israel.

34 Xidznia zho naa, stsuc zho lo naa, zgüin zho naa, ni haxta zut zho naa; per dze ne gac tson ngbidz gut naa laa naa grieeban.

35 Dzigo wbig gax Jacob grop Juan (xingan Zebedé) lo me, rëb zho:

—Maestro, laa no gnab tib favor lo luu, per racladz no siguiel luu guñ luuw.

36 Dzigo rëb me:

—¿Pe favor ne racladz to guñ naa lo to?

37 Rëbchaa zho:

—Laa no racladz, siguiel luu zioob no cue luu gal dze ne laa luu nac rey rnabey luu, tib no nëz derech stib no nëz revës.

38 Pquiab Jesús, rëb me lo zho:

—¡Ni to gon riend pe rnab to! ¿Pe zlëb to gan to grë guielnë ne gan naa, pe zlëb to ted to grë miñe teed naa?

39 Rëbchaa zho:

—¡Zlëeb no!

Dzigo rëbchaa me lo zho:

—Nli zan to guielnë ne gan naa, ni zded to miñe teed naa;

40 per ne gnedz naa diidz sob to cue naa nëz derech o nëz revësgaa, led naad raguial miñ co; laa lugar co biaanle par zha ne nole diidz ygaaw.

41 Grëraa zha ne nac xpëëdsuel me, zha ne nacgza Jacob ga grop Juan, zeene bin zho zha rzë xtiiidz Jacob grop Juan lëë zho lo zho.

42 Dzigo bredz Jesús zho grëse zho, rëb me lo zho:

—Ran to ganle zha run grë zha ne rnabey grë guiedz ne ndxie lo guidzliu, ni grë

zha ne nac zha non, masaque rnabey zho samiech zho zigne racladztaa zho.

⁴³ Sangué to gon, gunscade to. Lo gza to, zha ne racladz gac zho zha non lo to, laa ne glu zho zha non zho, none glo zho guiaaⁿwin nac zho zig tib ngundziin lo to.

⁴⁴ Scaquegaa, zha ne racladz gnabey lo to, none glo cseed zho gun zho mine gnabey to zho.

⁴⁵ Golgan ganle, niicle naa ne nac naa Men ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmⁿbaa naa zeena laa zho lo grêtaa ncuane ngadoo zho. Ni nanpaa naa miech guizhiu ne laa.

*Biac tib men lë Bartimé
(Mt. 20:29-34; Lc. 18:35-43)*

⁴⁶ Sca no grê miech guizhiu co nêz, laa zho bdziñ guiedz Jericó. Laa zeene laa grê miech taf co zierree ro guiedz co, laa tib mgui ciegw lë Bartimé zob ga rtop gon (xin-gan tib men lë Timew).

⁴⁷ Zeene bin Bartimé ye Jesús (Nazaren) ziaad ga, psilo me nguiedz rbedz me, rnee me:

—¡Jesús, men xtií rey David, pquia zdoo naa!

⁴⁸ Nzian grê miech co ndox lo me nan zho guioog ro me, per dzigole mazdraa nguiedz roptsie me, rnee me:

—¡Jesús, pquia zdoo naa!

⁴⁹ Dzigo pcuêêzni Jesús, bnabey Jesús güeytsedz zho me. Bdziñ zho lo me, rêb zho:

—¡Ligier guso! Dê ganle laa me rbedz luu.

⁵⁰ Zeene bin mew, haxta squi bron me lar ne mbix me, guso me ga laa me bdziñ lo Jesús.

⁵¹ Dzigo rêbchaa Jesús lo me:

—Bnê nadien, ¿pe racladz luu gun naa?

Pquiab me rêb me:

—Maestro, racladz naa guiac lo naa.

⁵² Dzigo rêbchaa Jesús:

—¡Niinagazh laa lo luu gan! Laa luu biac, sacne dib zdoo luu bnalo luu naa. Ligier na bzê.

Horcogazha laa lo men co psilo bui, laa me zianañ zhits Jesús.

11

*Bdziñ Jesús Jerusalén
(Mt. 21:1-11, 18-19; Lc. 19:28-40;
Jn. 12:12-19)*

¹ Zhile gdziñ zho Jerusalén, laa zho zie gax zaatne riaan guiedz Betfagé ni guiedz Betain, nêz dan squi riaan Gui Oliv, zeene bredz Jesús chop xpêêdsuel me

² rêb me lo zho:

—Goltsie guiedz win ne ndxie danse lo ne i. Zigne sêeb to lad guiedz, laa tib burr quiadoo ga, ni tib miech gard sob lad ma; dzigo golxadz ma, goltên^e ma nu.

³ Tel cho gnabdiidz pe nacne noxadz to ma, dzigo golguiab: men ne rnabey ne men co rquin ma, na zigne lozh xtsiin ma guiaadsan no ma.

⁴ Laa zho zie, nligaaw laa zho güeydziel burr co quiadoo ma tib ro nêz, gax tib ro yu.

⁵ Blalaa zha ne zo ga, zeene gon zho laa zho noxadz ma, rêbchaa zho:

—¿Pe gun to burr qui dzigo na, ne noxadz to ma?

⁶ Dzigo pquiab zho zigne rêbse Jesús lo zho ga, nacne bdeed men co diidz laa zho zienie ma.

⁷ Bdziñnie zho ma lo Jesús lëêque lar ne rbix zho pxob zho lad ma, bzobga me ma.

⁸ Nzian grê miech co zigse zie Jesús, scase scase ner zho rta zho lar ne rbix zho rded me, nogaa zho rchoo nia grê pe yag rdziin zho zaatne rded me.

⁹ Grêse zho, niicle zha ne ner lo mew, niicle zha ne nal zhits mew, rley zho nguiedz roptsie zho, rnee zho:

—¡Zha ndzontaa men qui pxeel Dios lo ne!

¹⁰ ¡Zha wentaa ziaad me gac me zhirey ne! ¡Me gnabey zigne bnabey pxozgol ne rey David! ¡Zha ndzontaa Dios ne zob gbaa!

Sca nguiedz roptsie zho rleynie zho me, laa me bdziñ Jerusalén.

¹¹ Bdziñ me Jerusalén, güey me güeyso me len yadoo. Blozhse bui me dipse len yadoo, laa me brieaque ga laa me zie nêz Betain grê xpêêdsuel me, sac bdzele dzew.

¹² Biini liu, loxaque zierree zho Betain laa me psilo rcaabedz.

¹³ Zitlaa ziaad me gon me tib zhan yag guigw, nxii nac low zêeb zhiblaga; dzigo zie me zieso me dien pe gdziel tib guigw tib gow me. Bdziñ me zaatne zoba, ni tib guigw guien^d low loxaque zhiblagsew scataa zêeb, sac gardpaa gdziñ mêe ne rquia guigw.

¹⁴ Dzigo rêb me lo yag guigw co:

—¡Squitaa nagon guiaan luu! ¡Gdzindraa dze yquia nex lo luu gow miech!

Grêse xpêêdsuel me, bin zho sca bnee me lo yag co.

Blee Jesús miech len yadoo

*(Mt. 21:12-17, 20-22; Lc. 19:45-48;
Jn. 2:13-22)*

¹⁵ Bdziñ zho Jerusalén, bzêeb me len yadoo. Psilo me blee me grêse miech ne quiaayn lgui ga, zigtaa zha ne no wto^w, zigtaa zha ne no wziw. Grê zha ne no wto palom, grê zha ne notsêê dimi, ptiixche me xmez zho.

¹⁶ Blozh ga, pso me diidz choot nodraa sêebnie grê ncuaan co len yadoo,

¹⁷ rêb me lo zho:

—Led znu gon rnee lo Xtiidz Dios: “Zaatne nac lidz naa nu, nu guiaad grêse miech ne ndxie lo guidzliu sodiidznie zho naa.” Laa

to gon quaiyūn to lugar rii zig tib zhibliee ngbaan.

¹⁸ Grē zha ne nac pxoz nroob ni grē zha ne rnabey lo maistr ley, bin zho sca rēb me, dzigo psilo zho rguib zho dien zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me.

¹⁹ Zeene laa liu pcow, laa me wbique Jerusalén stib grē xpēēdsuel me.

²⁰ Biini liu co, laa zho zieded zaatne zob yag guigw ne sca güeyguib me nex lo ga, gon zho laaw bidzle dib low.

²¹ Dzigo beencsoladz Pedr mew, rēb Pedr: —Maestro, bui ganle laa yag guigw ne bdzibdee luu ga bidzle.

²² Pquiab me rēb me:

—Zha ne dib zdoo rnalō Dios,

²³ gneli naa lo to ganle: Niicle ncuaañe mazdraa ngan gnab zho lo me, zun mew; lēeraasi none dib zdoo zho gliladz zho zac mine rnee zho, ni palal gacchopd guic zho.

²⁴ Golgona sca ganle, grēse ncuaañe gnab to lo Dios, dib zdoo to golliladz ne zneedz mew, dzigo sca zac mine rnab to.

²⁵ Ni zeene gnab to lo Dios, golsoladz dien pe no cho rlēēnie to, dzigo golgun zho perdon; zeena scagaa, Pxoz to men ne zob gbaa zun me to perdon tel pe nactaa xtōl to.

²⁶ Sac telne gunde to samiech to perdon, dzigo niicle megaa, gund me to perdon.

Cho rnabey Jesús

(Mt. 21:23-27; Lc. 20:1-8)

²⁷ Blozh ga, laa zho bdziñaque Jerusalén stib. Lēētaaque laa Jesús quaiyūn dib len yadoo, zeene bdziñ bla zha ne nac pxoz nroob, bla zha ne nac maistr ley ni zha ne nac men non lo menguedz,

²⁸ rēb zho lo me:

—¿Cho dien nac luu ne squitaa ziaadnabey luu len yadoo? ¿Cho rnabey luu?

²⁹ Pquiab me rēb me lo zho:

—Laa naa gun tib wnabdiidz lo to. Telne stsiro to low, dzigo gni naa lo to ganle cho rnabey naa ne laa naa noyūn grē ncuaañe noyūn naa.

³⁰ Golnē dien, ¿cho pxeel Juan biaad me pchoobnis me miech? ¿Pe Dios pxeel me, te miechsew ye?

³¹ Psilo zho rnabdiidzlsa zho, rnee zho:

—Telne dzieets ne Dios pxeel Juan, dzigo laa me gnē: “¿Pex nac dzigo waa bliladzde to mine bnee Juan?”

³² Tel na dzieetsgaa ne: “Miechsew pxeel Juan, grieequiadaque ne.”

Rdzieb zho niab zho miech pxeel Juan, sac grēse menguedz nan ne nli Dios pxeel Juan biadteed Juan xtiidz Dios lo miech.

³³ Dzigo mazd mine been zho, rēb zho:

—Ndiond no dien cho pxeel Juan.

Dzigo rēbchaa me lo zho:

—Niicle naagaa nagon, grieelod gni naa lo to cho rnabey naa quaiyūn naa grē ncuaañe rii.

12

Xcuent zha ne pquianap liu

(Mt. 21:33-46; Lc. 20:9-19)

¹ Dzigo psilo Jesús bzodiidz me tib cuent, rēb me:

—Tib mgui name, nroob lbē uv beenbni me lo liūn me. Psilo me ptse me igose liu co, bzaa me zaatne gzhii grē uv co, ni bzaa me tib yu glaa zaatne sob zha ne yquiaanapa. Blozh ga, blediñ me liu co lo bla zha ne ran liu, dzigo laa me briece ga, laa me zey zit.

² Zeene gol mēē ne ral uv, pxeel me tib xmoz me lo zha ne quianap liu co, parne gdeed zho uv ne rieguiañ me ycaa me.

³ Per lel bnaaz zho moz co, bdñ zho zho; blozh ga, scase bzonēz zho zho.

⁴ Dzigo biire men ne nacchen liu co pxeel me stib moz, scasaque been zho: gocntseeb zho lo moz co, pquiaago zho zho, bdñ zho zho, blē zho guic zho.

⁵ Biireque me pxeel me stib zho, zha cole beet zho. Ni bii pxeel me nzianraa zho, no zho psiwee zho, nogaa zho beet zho.

⁶ Tibaque zeene loxaque xinganse me rian. Rleyniedox me xpēed me, per laa me pxeel me, bza guic me rēb me: “Ganse zho xpēed naaw, zon zho mine gnee me.”

⁷ Zeene gon zho laa xpēed me bdziñ, rēbchaa zho: “¡Lēē zha qui nagon guiaannie liu rii! ¡Golgotsaa dziuut ne zho zeene guiaaña lo ne!”

⁸ Dzigo bnaaz zho men co, beet zho me, güeyga zho güeyron zho me tib lad lo liu co.

⁹ Sca nagon —rēb Jesús—, been zha ne quianap liu co. Golnēse nadien, ¿pe nac mine gun bizhuan liu co? Ib tedsod zeene laa me guiaad, znitlo me zha co; zhaale lo zha ne csañ me liūn me.

¹⁰ Golsoladz ganle znu rnee lo Xtiidz Dios: Quie ne psēeb zha ne nozaa yu, ni nanđ zho lēēpaa quie co nac mine rnazdziits yu.

¹¹ ¡Ncuaañe gzee zdoo new! Sac Dios bnabey sca goca.

¹² Zeene gon zho sca bnee me, gocladz zho naazgazh zho me ga; sac bien zho mine run zho ga bzeet me. Per bnaazd zho me, sac rdzieb zho grē miech guizhiu ne ndxie ga, nacne zeyga zho.

Pe nonguiel quizh miech contribucion

(Mt. 22:15-22; Lc. 20:20-26)

¹³ Zhisaque goca, laa zho pxeelaque zla zha farisé, ni zla zha ne nacie Herod, zie zho ziegungüet zho Jesús par dien zha cxin me tib diidz; zeena sca gdeeda diidz tsiezo zho me lo wxtis.

¹⁴ Bdziñ zho lo me, rēb zho:

—Maestro, ndion no niapse diidzli rnee luu, led lega gund luu mine rnee tib miech, sac tibeyse nac miech lo luu, ni laa luu zienal cseed zho mine nac diidzli zeena sëëb zho xnëz Dios. Min co nagon, nacne racladz no gnë luu lo no dien, çpe nonguielaga rdeed no dimi ne razh lo rey te nonguielada ye? çPe zdizhraa no dimi co, te mazd dizhdraa now ye?

¹⁵ Bienga Jesús racladz zho gungüet zho me, dzigo rëbchaa me lo zho:

—çPe nacne racladz to gungüet to naa? Golguiid tib xpes to nu ganle.

¹⁶ Dzigo bdeed zho tib pes lo me. Blozh ga, rëbchaa me lo zho:

—Golnë lo naa dien, çcho nu quia lo pes rii? çCho lë nu quia low?

Pquiab zho rëb zho:

—Lëë rey Roma i, lëë lë me i quia low.

¹⁷ Dzigo rëb me lo zho:

—Mine nonguiel ycaa rey, goldeeda lo rey; scaquegaa mine nonguiel ycaa Dios, lo Dios goldeeda.

Zeene gon zho sca ptsire me lo xtiidz zho, rdzieldraa zho zha gun zho.

çPe nli zrieeban miech?

(Mt. 22:23-33; Lc. 20:27-40)

¹⁸ Bdzinaque zla zha saducé, rëb zho lo me:

¹⁹ —Maestro, znu pquiaa Moisés lo libr ley ne psan Moisés lo no: tel glo mguì guet lo wnaa ne nac tsiel mguì ni godp wnaa mëëd, dzigo none betsaque zho ctsieelna wnaa co stib, zeena gap wnaa mëëd ne guiaan xlugar xpëëd zha ne gut ga.

²⁰ Bio tib dii zha co znu bzhaac, gadz bets nac zho. Ptsieelna zha ne nac zha gol, zeene laa zho gut, biaan xpëëd zho.

²¹ Dzigo ptsieelna stib bets zho wnaa co, blozh ga gutaque zha co, pasë zho nsan mëëd. Ptsieelnaque me stib zho, goc zho tson, niicle zha co psandaque mëëd.

²² Sca sca haxta bza gza gadzse zho ptsieelna me, per ziese zho ni tib zho psand mëëd; tibaque zeene yeque me, laa me gut.

²³ Mine racladz no gacndion no, çchopaa dzigo gac tsiel wnaa co gal dze ne laa zho grieeban; sac gza gadzse zho ptsieelna me?

Sca bnabdiidz zho, sac nac zha saducé riladzd zho ne nli zdziñ dze grieeban zha ne ret.

²⁴ Dzigo pquiab Jesús rëb me lo zho:

—I nagon laa to rxin. Mine naca riende to zha nac Xtiidz Dios, niicle riladzde to zrielo me gun me ncuuan ro ne gard gan miech.

²⁵ Sac gon, zeene gal dze ne laa grë miech grieeban, niicle mguiw niicle wnaaw led yedraa hor co dien cho ctsieelna zho; sac hor co laa zho gac zig nac grë anjl ne no gbaa.

²⁶ Stiba, ible nli zrieeban mengut. çPe gard ganle glab to lo guits ne pquiaa Moisés, zaatne ziaad zeene bin Moisés tsi Dios tib lo yag zarz nguia ne noyazbel? Rëb Dios lo Moisés: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.”

²⁷ Niicle ne gutle gza zha co hor co, per zeene sca bnee Dios, gase rlu ne mban zho no zho lo me. Sac tel Dios, nacd me xDios mengut sinque xDios zha mban nac me. Ise nagon rlu, peet riende to gane squi rnee to.

Xley Dios mine mazdraa non

(Mt. 22:34-40)

²⁸ Zeene sca nozodiidznie Jesús zha saducé co, gon tib maistr ley niapse diidzli ptsire me lo xtiidz zho. Dzigo wbig maistr ley co, bnabdiidz me lo Jesús, rëb me:

—Bzhiguiel bnë lo naa dien, lo grë xley Dios, çpa min nac mine mazdraa non?

²⁹ Pquiab Jesús rëb me:

—Min rii nac mine mazdraa non, znu rneew: “Grëse to men Israel, golquiaadiaga ganle: men ne nac Dios ne riladz ne, tibaque me ni me nac men ne rnabe ne.

³⁰ Dib zdoo to, dib xalm to, dib guielbiini ne no guic to, dipse xfuers to golleynie me.” Lëë tiba nu,

³¹ laa stiba znu rnee: “Bleynie samiech luu zigne rleynie luu luu.” Tsodraa stib ley ne mazdraa non lo grop ley rii.

³² Dzigo rëbchaa maistr ley co lo Jesús:

—Diidzli rnee luu maestro, tibaque Dios no.

³³ Ni none dib zdoo ne, dib guielbiini ne no guic ne, dipse xfuers ne gleynie ne me; ni gleynie ne samiech ne zigne rleynieque ne ne. Min co nac mine mazdraa non, lëdle gzëg ne pe cos cogon ne lo me o dien peragaa gun ne.

³⁴ Zeene gon Jesús sca niini rzë xtiidz me, rëbchaa Jesús lo me:

—Zhile runfalt sëëb luu xnëz Dios, gnabe y me luu.

Blozh ga, grëse zha ne ndxie ga, ni stib zho biazhdraa zho pe nabdiidz zho lo me.

çCho xpëëd nac Crist?

(Mt. 22:41-46; Lc. 20:41-44)

³⁵ Sca noseed Jesús miech len yadoo ga, zeene bnabdiidz me lo zho, rëb me:

—çBay zha nacne rnee grë maistr ley, lo xtiï rey David ga grieequia Men ne nacle diidz ga cxeel Dios?

³⁶ Sac zeene bdeed Espiritu Sant guielbiini lo rey David, znu bnee David:

Bnee Dios lo men ne rnabe y naa, rëb Dios lo me:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csan naa zho ladzna luu.”

³⁷ Gase nagon telne nli zha xti David gac Men ne nole diidz cxeel Dios ga, zha nac dzigo ne lëëque David rnee ne me rnabey David?

Grë miech guizhiu ne ndxie ga noquiaadiag zhiwseed me, per nli rley zho ron zho zha rnee me.

*Zha run grë maistr ley
(Mt. 23:1-36; Lc. 11:37-54; 20:45-47)*

³⁸ Laa me noseed grë miech co, zeene pso me diidz lo zho rëb me:

—Ible tsienalde to mine run maistr ley gon. Sac grë zha ne nac maistr ley, rdziladz zho racw zho lar nool haxta zhits ni zho rbiba, rdziladz zho ndooladz yquiaabdiuzh miech zho zeene gdzieel zho zho dib ro nëz.

³⁹ Zig nac len yadoow, zha nac zha ne rzob lo xcan zaatne rzob grë zha non, zeene tsiegaa zho tib lni lidz miech, lëëpaaze zha nac zha ne rzob grol mezh zeene laa wagw gac.

⁴⁰ Ni rlozh ga, rio zho rla zho tel pe ncuaañe rapse grë wnaa viud; ni parne peet guiabd miech lo zho, xtse rzo zho rzadraa pe lay ne gool zho.

'Sca gon nac zho, per ib tedsod zeene laa grë miech ngoopdol quizh xfalt, zha nac zha ne mazdraa nroob caxtigw yгаа.

*Gon ne bdeed tib wnaa viud
(Lc. 21:1-4)*

⁴¹ Blozh ga, güey Jesús güeysob me gax zaatne zhoob grë alcanci. Dzese rwi me ran me zha riesan miech gon len grë alcanci co; ndal grë zha ricw rdzin, nroob dimi rsan zho.

⁴² Tibaque zeene bdzin tib wnaa viud, tib men prob nac me, ye me laa me psan chop gaay win len alcanci co.

⁴³ Dzigo bredz Jesús xpëedscuel me, rëb me lo zho:

—Gneli naa lo to ganle, mazdraa gon nroob non gon ne bdeed wnaa viud qui, lëdle gon ne bdeed grëraa zha qui.

⁴⁴ Sac zha, dimi ne riaañle lo zho i rgogon zho; sangue wnaa prob qui gon, centav yeen ne quianiese me mine rnalopaa me gziuu pe gow me, per laa me bloogona.

13

*jNsin golso!
(Mt. 24:1-28; Lc. 17:22-24; 21:5-24)*

¹ Laa Jesús zieriee len yadoo nroob co grë xpëedscuel me, zeene rëb tib zho lo me:

—Maestro, jbu ganle zha niaataa yadoo riil! jzha rnataa grë quie ngol ne niaaw!

² Pquiab me rëb me lo zho:

—Nligaa lëë zha niaataaw. Per niicle squitaa gon ran tow niina, dzdzin dze ne nitlow dib nacsaw. Ni stib quie qui guiaandraa zigne squi zhoxcuaaw i.

³ Brie me ga, laa me zie gza me zho. Bdzin zho cho Gui Oliv, ga bzob zho grë zho. Nieenpaa ro yadoo co zaatne zob zho ga; dzigo wbig Pedr, Jacob, Juan ni Ndrës lo me, gza tap zho bnabdiidz lo me rëb zho:

⁴ —Bzhiguiel bnë lo no dien, zpa hor dzigo gac mine bzeet luu ga? zZha nac señ ne tso zeene laaw csilo gac?

⁵ Dzigo psilo me bnee me lo zho, rëb me:

—Nsin golso! zeena choot yquidiede to.

⁶ Sac nzian zha ne griequia gnë zho zha nac Men ne zëëble diidz cxeel Dios; ni nzian miech ne yquidie zho.

⁷ 'Zeene gon to nëzrii nëzrec noyac dil, ib gdziebde to; sac ible none gac grë min co, ni lëdsew ga.

⁸ Sac garaa csilo grë dillox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin. Ni lega loxaque mine rsilosew ga, sac nroobraa guielnë ne gan miech lozh ga.

⁹ 'Zeene laa grë ncuaañ rii rsilo noyac, jnsin golso! Sac hor co laa miech tsiezo to lo zha ne rnabey yadoo, ni lëëque len yadoo ga quin zho to; ziezo zho to lo grë zha non, lo grë zha rnabey, loxaque ne no to xnëz naa. Ga nagon gdeeda diidz gnee to Xtidz naa lo grë zha co,

¹⁰ sac ib none briets bliaallew lo grëse miech zeene gal dze ne laa guidzliu nitlo.

¹¹ Zeene tsiezo zho to lo wxtis, tsode to zhgab dien pe guiab to lo wxtis; sac Espiritu Sant nac men ne gacniën to, ni mine csiaab me guic to min co gnee to.

¹² Len dze co, zio zha ne lëëque zha tsielo bets zho ladznia zha ne gut zho; zio zha ne lëëque zha tsielo xpëed zho ladznia zha ne gut zho; scaquegaa mëëda, zio zha ne lëëque zha gut pxoz zho, lëëque zha gut xnïaa zho.

¹³ Ible gandzed miech to, grëse zho glëë lo to sacne riladz to naa; per scagaa, grëse zha ne dziits so haxta lozh grë guielnë co, ible scaania Dios zho.

¹⁴ 'Zeene gan to laa ncuaañe ziaad gnitlo zo zaatne rieguiald sow, zigne bzeet profet Daniel (zha ne glaba, none guien zho zha naca), hor co golguib dien zha xoon to. Zha ne no grëraa guiedz ne ngab Judé, none tsie zho dan, ga tsietsolan zho.

¹⁵ Zha ne no glaa guic yu, none lëëled xoon zho, ib guiabd zho sëëb zho len yu tsiebee zho ncuaañe nacchen zho.

¹⁶ Zha ne zogaa dana, ib gund zho ne laa zho tsie ro lidz zho tsixi zho xab zho.

¹⁷ jProb grë men wnaa ne lëëtaque len dze co zoney xpëed, men ne quianiegaa mëdyeen ne bii radz!

¹⁸ Golnab lo Dios gande to guielnë co len mëë ne rac nal, sac ne nligaa guielnë nrooba.

¹⁹ Wlal ne biaan guidzliu haxta lo nadze, gard gan miech tib guielnëdox sca, ni gdziñdragaa dze ne gan zhow stib.

²⁰ Telne csaan Dios nroob dze gac guielnë co, ni stib miech rii guiaandraa; per na por grë zha ne bzooblo me sëëb xnëz me, gdeete me diidz gaca nroob dze.

²¹ Len dze co, tel cho zha gnë lo to: "Golwi ganle, lëë men rii nac Men ne nole diidz gac xceel Dios", gnëgaa zho: "Golwi nec ganle, lëë me i", gliladzde tow.

²² Sac ndal grë zha ne greeequia guiaadquidie miech, no zho gnë zha nac men co, nogaa zho gnë zha ziadteed Xtiidz Dios lo miech; ni zun zho grë milagr parne yquidie zho miech, parne yquidie zho haxta grë zha ne ngable lo Dios.

²³ Nsin sca golsol! Ib cxende to, benque laa naa nilew lo to.

Ziaad Jesús tib

(Mt. 24:29-35, 42, 44; Lc. 21:25-36)

²⁴ Zeene lozhse gan miech grë guielnëdox co, laa lo ngbidz ycow, gziinidraa mëë.

²⁵ Grë mel ne ndziib gbaa, laa ma gli-aal; grëraa ncuuaane no gbaa, masaque nëzrii nëzrec gaca.

²⁶ Horco bii zan zho ganle, zeene laa Men ne pxeel Dios ziad-zëëb glaa lo xcow con grë guielndzon con grë poder ne rap me.

²⁷ Lozh ga laa me gnabey grë xanj me, tsie zho tsietop zho grëse zha ne ngab lo me, niicle zaatne mazdraa zit lo guidzliuw, mazdragaa zit gbaav.

²⁸ Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëë nëëg ziaadgaxle.

²⁹ Scaquegaa nagon, zeene gan to laa grë mine rne naa lo to nu rsilo noyac, dzigo nanle to lëë dze co ziaadyoble.

³⁰ Gneli naa lo to ganle, nzian miech ne mban niina bii zan zho zeene laa grë ncuuaan co csilo gac; sac ible ncuuaane gaca.

³¹ Zdziñ dze nitlo gbaa, nitlo guidzliu, sanque mine rne naa lo to nu, nitloda, ible laaw none gac.

³² Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda; loxaque Pxoze naa nana.

³³ Gaxe waa, nsin golsol, golnab lo Dios; sac gon nande to dien pa hora.

³⁴ Nac cuent rii zig nac tib zha ne rriee zie tib guiedz zit. Zeene laa zho rriee, rsanse zho diidz dien pe gun tib tib moz ne guiaan ro lidz zho, ni rso zho diidz lo zha ne rquianap ro puert nsin so zho, ib gagueiesd zho.

³⁵ Scadaa to nagon nsin golsol, sac zig bizhuan yu co scaquegaa naa nande to pa hor guial naa, yase glanso naa tib bdze dze,

tib groj guieel, wxingaa horne rcuedz gall, o ziaadyunmbegaa liu.

³⁶ Nsin golsol, zeena ine zobna to zeene laa naa glanso.

³⁷ Mine rne naa lo to nu, laaw rne naa par grëse miech.

14

Bnedidz zho dien zha gnaaz zho Jesús (Mt. 26:1-5; Lc. 22:1-2; Jn. 11:45-53)

¹ Schop ngbidz runfalt csilo lni Pascw, lni ne row zho guietxtil ne riotsd ncobi; grë pxoz nroob ni grë maistr ley, laa zho noguib dien zha ngeueetsse gnaaz zho Jesús gut zho me,

² rnee zho:

—Laa me no yгаа, per lëëraasi gnaazd ne me mer dze lni, sac miech guizhiu ne ndxie lo lni dze co; zrieequia nzian zha ne glisquiw.

Pchoob tib wnaa nceit nex guic Jesús (Mt. 26:6-16; Lc. 22:3-6; Jn. 12:1-8)

³ Len dze co, laa Jesús no guiedz Betain. Lëëtaaque laa me no mezh lidz Simón ne blan guiedz lepr; zeene bdziñ tib wnaa bdziñnie tiblo nceit nex, nosew tib len ncuuaan win niiaa niapse quie rbebni, tiblo nceit niazha. Dzigo blë wnaa co ncuuaan win co, blozh ga pchoob me nceit co guic Jesús.

⁴ Blalaa zha ne zobgrë Jesús ga, zeene gon zho sca beeg wnaa co, blëë zho, rëb zho:

—ZPa rieguiala squi pxin zhlë wnaa qui nceit qui?

⁵ Telne niaca mine ndow, nguizhpaa zhow tson gayoo pes plat, nquiinpa dimi co ngaaza lo grë zha mban ne guieñd pe yquiin.

Laa zho nolisquiw lo wnaa co,

⁶ dzigo rëbchaa Jesús lo zho:

—Golsaan me. ZPe nacne rlisqui tow lo me? Led lega pxind mew, tib guieñzaac nroob i been me lo naa.

⁷ Telne nli rquia zdoos to zha ne guieñd pe yquiin, zac ygad to lo zho stib dze, sac tibaque ran to zho; sanque naa zdziñ dze ne gbiche naa lo to, gandraa to naa.

⁸ Laa wnaa qui been mine brieelo lo me, laa me pchoob nceit nex rii guic naa zeena nzhixcuuale xcuerp naa gal dze ne laa naa ygueets.

⁹ Gneli naa lo to ganle, dipse lo guidzliu zatne cseedtaa miech Xtiidz Dios, ible soladz zho wnaa rii, seet zho mine been me nu.

¹⁰ Lo gza tsiipchop zha ne nac xpëëdsuel Jesús ga, brieë zha ne lë Judas Iscariot güeyzodiidznie Judas grë zha ne nac pxoz nroob, rëb Judas laa Judas gun me ntragar.

¹¹ Zeene bin zhow, per nli rley zho ni rëb zho zdeed zho dimi lo Judas. Dzigo psilo Judas noguib Judas dien pa hor gdeeda diidz gun Judas me ntragar.

Dowxtseenie Jesús xpëëdsuel me

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Mer dze ne rsilo lni Pascw, dze ne rowxtsee zho tib carner, ni rsilo zho row zho guietxtil ne rquiad ncobi lad, dze co bn-abdiidz xpëëdsuel Jesús dien pa lo racladz me tsiegunlo zho ncuaañe gowxtseenie me zho wdze co.

¹³ Dzigo pxeel me chop zho Jerusalén, rëb me lo zho:

—Goltsie Jerusalén. Ga gan to tib mgui nzobyan tib re nis, dzigo goltsienal zhits me.

¹⁴ Yu ne gan to sëeb me, golguiab lo bizhuan yu co: “Znu në maestro: ¿Pa len yu me gneedz luu gac zaatne gowxtseenie me xpëëdsuel me wdze rii?”

¹⁵ Dzigo ga glu me tib len yu nroob ne riaan glaa, nzhixcuaale lena, grële ncuaañe yquini no ga; dzigo ga golgunlo zhixtsee ne.

¹⁶ Laa grop zha co brieë, laa zho zie. Bdziñ zho lad guiedz Jerusalén, nligaa laa zho bdziel yu co zigne rëbse me lo zho ga, dzigo psilo zho beenlo zho xtsee co.

¹⁷ Bdze dzew, laa me bdziñ len yu co grë xpëëdsuel me.

¹⁸ Laa me no mezh noyownie me zho, zeene rëb me lo zho:

—Laa naa gni lo to ganle, lëëque tib zha ne gon noyownie naa nu tsielo naa ladznia zha ne gut naa.

¹⁹ Zeene bin zho sca rëb me, mban rac zho, dzigo psilo zho tibga tibga zho rnabdiidz lo me, rnee zho:

—¿Pe naaw?

²⁰ Pquiab me rëb me lo zho:

—Ladaque to no zho, zha ne nosëeb xcuun len xquien naa, lëë zho ga.

²¹ Naa ne nac naa Men ne pxeel Dios, niina laa miech gut naa zigne raquietsew lo Xtiidz Dios; per, jprobsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

²² Laa zho noyow zeene bzheñ Jesús tib guietxtil, bdeed me xquizh lo Dios, blozh ga beengroñ mew dzigo bdiiz mew lo zho, ni rëb me:

—Golquiina, lëë xcuerp naa i gon.

²³ Ni bzheñ me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grëse zho go vin co.

²⁴ Ni rëb me lo zho:

—Lëë xchen naa i, miñe gzhiee par grëse miech ne sëeb xnëz Dios, sac lëë stib mod cub nu psañ Dios parne sëeb miech xnëz me.

²⁵ Lëë lultm vult nu guie naa vin rii, sac zhaale stib vin cub ne guie naa zeene laa naa gdziñ zaatne rnabey Pxoç naa.

Dzigo psilo me biñ me bla salm gza me zho.

Bzeet Jesús zha gun Pedr

(Mt. 26:30-35; Lc. 22:31-34; Jn. 13:36-38)

²⁶ Blozhse biñnie me Dios grë me zho, dzigo laa me brieenie zho ga zienie me zho nëz Gui Oliv.

²⁷ —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxii!”

²⁸ Sca gun zho naa, per zeene laa naa grieëban glöle naa ga Galilé, ga cuëz naa to.

²⁹ Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

³⁰ Pquiab me rëb me lo Pedr:

—Gneli naa lo luu ganle, guieel riigazh, gardle grop gall tsonle vult rëb luu runbeyd luu naa.

³¹ Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa zho.

Bzodiidznie Jesús Pxoç me Getsemani

(Mt. 26:36-46; Lc. 22:39-46)

³² Bdziñ Jesús zaatne lë Getsemani gza me zho, dzigo rëbchaa me lo zho:

—Nuse nagon golsob, laa naa ga gazodidznie naa Pxoç naa.

³³ Horco psilo mban rac zdoe me, ri-abguieñe me, dzigo bredz me Pedr, Jacob ni Juan, bzënie me zho palal

³⁴ dzigo rëbchaa me lo zho:

—Mban rac zdoe naa, zootle zig zet naa lo guieñe rii. Nuse nagon golguiaañ, per golsobna.

³⁵ Bzë me spalal, dzigo pquitsgzhib me haxta bdziñ lo me lo liu; psilo me bnab me lo Dios ne telne zrieelow mazd tete me grë guieñe ne no gan me,

³⁶ rëbchaa me:

—¡Papá, par luu grëse cos zrieelo gun luuw! ¡Bzhiguieñ psilaa naa lo guieñe rii! Per telne grieeloda, miñe gnëta luu, sca gaca.

³⁷ Zeene biire me bdziñ me zaatne biaan gza tson zha co, gon me gzase zho nixguies; dzigo rëbchaa me lo Pedr:

—Simón, ¿nixguies luu lëë? ¿Pe ni palal blëëbd luu nzobna luu?

³⁸ Golsobna, golnab lo Dios zeena yquild mendox to. Niicle ne squi lëëbdraa xcuerp to sobna to, per golnab lo Dios, sac gon min co nac miñe racladz zhiespiritu to.

³⁹ Dzigo biire güey me stib, güeyzodiidznie me Dios; scaque miñe bnab me glo mincoque bnab me stib.

⁴⁰ Zeene bdziñ me lo zho, gon me laa zho bii nixguies. Ni rdziel zho pe guiab zho lo me.

⁴¹ Laa zeene goc tsoņ vuell biire me güey nab me lo Dios, rëbcha me lo zho:

—Lëew nagon, zacle na gagues to, zacle gdziiladz to. Naa ne nac naa Men ne pxeel Dios, naataa laa hor bdziņ zeene laa grë miech ntseeb rii guiadnaaz naa.

⁴² Goltieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mt. 26:47-56; Lc. 22:47-53; Jn. 18:2-11)

⁴³ Laa Jesús bii quianeeque, zeene laa Judas (tib zha ne nac xpëēdsuel me) bdziņ, bdziņnie Judas tib dzoon zha ne pxeel grë pxoz ne rnabey, grë maistr ley ni grë zha non lo menģuiedz Israel. No zho nzhen spad, nogaa zho nzhen yag.

⁴⁴ Biaanniele Judas zho diidz zha glu Judas cho nac Jesús, rëb Judas lo zho:

—Nanle to gon, zha ne gow naa bzhid cuas, lëe me ga; ligier golso golxen me, ib csaande to xoon me.

⁴⁵ Nligaaw, zigne bdziņ Judas bredz Judas Jesús; blozh ga dow Judas bzhid cuas me.

⁴⁶ Horco wbig grë zha ne zienal zhits Judas ga bzhen zho me.

⁴⁷ Lo grë zha ne nacgza Jesús ga, hor co biasaque tib zho bdoz zho zhispad zho pchug zho tib diag xmoz men ne nac pxoz nroob.

⁴⁸ Dzigo rëbcha Jesús lo grë miech co:

—¿Niace naa cho ngbaan, zha nac ne squitaa nzhen to spad, nzhen to yag ziadnaaz to naa?

⁴⁹ Blactaa dze name gon to noseed naa miech len yadoo, ¿pe nacre bnaazde to naa ga? Per ible laa grë ncuaañ rii gon noyac zeena gac grë miņe raquiet lo Xtiidz Dios.

⁵⁰ Grë zha ne nac xpëēdsuel me ga, grëse zho bzhoon, tipse me psan zho ga.

⁵¹ Tibaque mgui nguieg bii güey nal zhits me, tib lëse lar nguits mbix mgui; dzigo bnaaz zho mgui gocladz zho ye mgui nienie zho;

⁵² per znuse briece mgui len lar co, bzhoon mgui coletse mgui.

Güeynie zho Jesús lo zhiwxtis zha Israel

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Ga brieenie zho Jesús bdziņnie zho me lidz men ne nac pxoz nroob. Grë pxoz rnabey, grë zha ne rnabey lo maistr ley ni grë zha non lo menģuiedz, laa zho pcaalsa ga.

⁵⁴ Ye Pedr, maase zit zit nal Pedr laa Pedr bdziņ xley men co. Bdziņ Pedr, güeysobga Pedr lo grë zha ne ndxienap, lëetaque laa zho quiazdëe lo gui.

⁵⁵ Grë pxoz co, grë zha ne nac zhiwxtis zha Israel, laa zho ndxie nëz len yu co, quiaguib zho dien pe yquaaqui zho gnab zho guet Jesús, quiaguib zho dien pe doļ ne ycaadz zho me; per rdzielz zho dien pew.

⁵⁶ Nzian zha ne pquidie rëb zho znu nac ncuaañe noyūn me, per rrieequiad xtiidz zho; sac zhaase zhaase rnee zho.

⁵⁷ Tibaque zeene guso blalaa zho, bnexuu zho rëb zho:

⁵⁸ —Bdzion no gon rëb me laa me ctixche yadoo, lozh ga tsonaque ngbidz gzaalo me stiba; per led miechdraa nzaaw.

⁵⁹ Niicle scaw, rzëdaque xtiidz zho tipse.

⁶⁰ Dzigo hor co bzoli men ne nac pxoz nroob, bzo me glowtaa lo grë miech co, bnabdiidz me lo Jesús rëb me:

—¿Pe nacre rquiabd luu? ¿diidzli dzigo lëe nac grë miņe rnee zho i!

⁶¹ Dzese zo Jesús ib rquiabd me. Biireque men co bnabdiidz me stib rëb me:

—¿Nligaa cho nac luu? Bnë teļ nli Xpëēd Dios nac luu, Men ne nacle diidz ga cxeel me lo guidzliu.

⁶² Dzigo pquiab Jesús rëb me:

—Nliw, naa nac men co. Naa ne nac naa Men ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

⁶³ Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—,

⁶⁴ laa to binle ganle zha rzëtaa xtiidz me noguitnie me Dios. ¿Pe gnë to na zha gac me?

Grëse zho pquiab rëb zho, ib rieguiala guet me.

⁶⁵ Dzigo hor co blalaa zho laa zho psilo notsuc lo me. Pxidoo zho lo me ni rdeed puñet zho me, lozh ga rnee zho:

—Bnë dien, ¿cho ga bdiņ luu?

Ye grë zha ne quianap ga, rgap zho lo me.

Rëb Pedr runbeyd Pedr Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Laa Pedr bii zoque ley. Ga zo Pedr, zeene laa tib wnaa ne nac zhicriad men rnabey co bdziņ;

⁶⁷ gon me laa Pedr zob gax lo gui nodzëe Pedr. Dze rwi me lo Pedr, tibaque zeene rëb me:

—¿Ye luu lëe rzënie Jesús, men Nazaret ne bdziņnie zho i?

⁶⁸ Per bneelid Pedr.

—Dien pe rooļ luu —rëb Pedr—. Runbeyd naa men co.

Brieega Pedr zie Pedr nëz ro zawan, lëetaque hor co pcedz tib gall.

⁶⁹ Dzeque rwi wnaa co lo Pedr, dzigo rëbcha me lo grë zha ne ndxie ga:

—¿Lëew, zha ne rzënie me nac mgui qui!

⁷⁰ Biire Pedr rëb Pedr runbeyd Pedr me. Wdzeepaa goca, biire zha ne ndxie ga rëb zho lo Pedr:

—Ne nligaa, ye luu rzënie men co. jZha Galilé name nac luu!

⁷¹ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—jDios zobwi ganle, telne rned naa diidzli, maase cuibdee nar!

⁷² Lëëtaaque hor co laa gall pcuedz stib. Dzigoraa psoladz Pedr xtiidz Jesús zeen rëb me lo Pedr: “Gardle grop gall, tsonle vuelt rëb luu runbeyd luu naa.” Dzigo mbanse rac Pedr, psilo Pedr biiin Pedr guielnë co.

15

Güeynie zho Jesús lo Pilat

(Mt. 27:1-2, 11-14; Lc. 23:1-5;

Jn. 18:28-38)

¹ Ziadyiinile liuw, scase bii nchool rnow, wbiire pcaalsa grë pxoz non grë zho zha ne rnabey lo maistr ley, grë zha non lo menquiedz ni grë zha ne nac zhiwxtis zho. Blozhse bnediidz zho, laa zho pxidoo Jesús güeyšan zho me lo Pilat men ne nac gober-nador.

² Bdzin me lo Pilat, bnabdiidz Pilat rëb Pilat lo me:

—jPe nli na luu nac zhirey zha Israel?

Pquiab me rëb me:

—Nliw.

³ Tibaque quia grë zha ne nac pxoz non, rzadraa grë ncuaañe rcaadz zho me.

⁴ Nacne wbiire Pilat bnabdiidz Pilat lo me, rëb Pilat:

—jPe nacne rquiabd luu? Bui ganle zha nactaa grë ncuaañe rcaadzdoj zho luu.

⁵ Bzee zdoo Pilat gon Pilat ible pquiabd me.

Bnab zho guet Jesús

(Mt. 27:15-31; Lc. 23:13-25; Jn. 18:38-19:16)

⁶ Gzobse lni Pascw rsilaa Pilat tib zha ne no ladzguuib, tel cho zha ne gnabtaa menquiedz laa.

⁷ Len dze co no tib mgui lë Barrabás ladzguuib, ni zla zha ntseeb ne naczga me, laa zho no ga sac nzian zha ne beet zho zeene gocntseeb zho lo gobiern.

⁸ Nacne psilo grë miech co, rnab zho lo Pilat csilaa Pilat tib zha ne no ladzguuib zigne runtaque Pilat grëraa iz.

⁹ Dzigo bnabdiidz Pilat lo zho, rëb Pilat:

—jCho racladz to csilaa naa? jPe silaa naa men ne rnee zho zhirey to nu?

¹⁰ Sca rëb Pilat lo zho, sac nanle me niapse por rlëë grë pxoz non co ran zho Jesús gane bnabey zho bgaa me güeyšan zho me ga.

¹¹ Per lel psilo grë miech co rnab zho csilaa Pilat Barrabás; ni lëëque grë pxoz co pquuil zho.

¹² Dzigo rëb Pilat lo zho:

—jZha dzigo racladz to gac men rnee zho zhirey to nu?

¹³ Pquiab be grë miech co, roptsie zho rnee zho:

—jBnabey yquia me lo cruz!

¹⁴ —jPe nac falt ne been me? —rëb Pilat—.

jPe nacne racladz to yquia me lo cruz?

Biiire zho roptsie zho rnee zho:

—jBnabey yquia me lo cruz!

¹⁵ Gon Pilat zha rac zho ni racladzaque me guianziuu me lo zho, nacne mazd bzoob me xtiidz zho, bnabey me blaa Barrabás; laa Jesús, blozhse bnabey me bdiñ zho Jesús laa me been Jesús ntregar lo grë menquuib ne tsiequiaa me lo cruz.

¹⁶ Biiire grë menquuib co bzëëbnie zho Jesús nëz len yulow, ga pcaalsa grëraa menquuib ne nacgrë zho.

¹⁷ Psilo zho rguitnie zho me, bgacw zho me tib lar morad zig rna lar ne racw grë rey, ni bzieecw zho bla lë yag guiets bzoob zhow guic me, zig rzob coron guic grë rey.

¹⁸ Dzigo psilo zho nguiedz roptsie zho rnee zho:

—jGolwi ganle zha ractaa zhirey zha Isra-rael!

¹⁹ Bzhen zho tib goobgui, rdeed zhow guic me, rtsuc zho lo me, rquiaalo zho rquits-gzhib zho lo me zig rquitsgzhib zho lo zha non.

Güeyquiaa zho Jesús lo cruz

(Mt. 27:32-44; Lc. 23:26-43; Jn. 19:17-27)

²⁰ Blozhse sca bdziitnie zho me, laa zho blee lar morad ne nacw me ga, biiire zho bgacw zho me miñe nac xab me; dzigo laa zho brieenie me ga zienie zho me zaatne yquia me lo cruz.

²¹ Nëz zienie zho me, bdzieel zho tib mgui Ciren lë Simón (lëë pxoz Lejandr ga grop Ruf), znu ziaad me wbire me dan. Dzigo bnabey zho me bi me zhicruz Jesús.

²² Zeene bdzinnie zho Jesús zaatne lë Gólgota (nac diidz co zig nac ne rnee ne “Gui Beerguic Ngutoo”);

²³ ga bdeed zho nziuu notsa guizh rmed ne lë mirr, nan zho nie mew, per god mew.

²⁴ Dzigo laa zho pquiaa me lo cruz.

Blozhse pquiaa zho me lo cruz, bzhen zho tib xab me pchug zhow, biaanñie zho tib lëgaw tib tib zho, laa stiba bio zho rif.

²⁵ Zig hor wxereen ga pquiaa zho me lo cruz.

²⁶ Glaa guic cruz ne pquiaa zho me ga, ga pquiaa zho bla lan diidz zaatne rnee pe nacne sca psacsi zho me, rneew: “LËË MEN RII QUIA NU, PORNE NAC ME ZHIREY ZHA ISRAEL.”

²⁷ Ye chop ngbaan pquiaagza zho me lo cruz, tibga zhicruz zho bzo tib nëz cho zhi-cruz me.

²⁸ [Ga brieequia miñe raquiet lo Xtiidz Dios, zaatne rnee: “Bloo zho me lad zha ntseeb.”]

²⁹ Grè miech ne rded zaatne quia me lo cruz ga, runguzee zho me, rzhidznie zho me, haxta rdzi guic zho rnee zho lo me:

—iPe led rëb luu lëë, laa luu ntsil yadoo ni tsonaque ngbidz nzaalo luuw stib!

³⁰ Nana zho, ipe gacd lëëque luu bla luu lo caxtigw qui, biet lo cruz qui!

³¹ Scaasque grè pxoz non ni grè maistr ley, rzhidznie zho me; rnee zho:

—Stib miech scataa bla me, pe nac dzigo rrieelod me gla me me.

³² iTelne nli me nac Men ne zëëble diidz ga cxeel Dios, telne nli me nac zhirey ne, niinagazh quiet me lo cruz; zeena gliladz ne me!

Ye zha ne quiagza me lo cruz ga, rbidzgo zho lo me.

Gut Jesús

(Mt. 27:45-56; Lc. 23:44-49; Jn. 19:28-30)

³³ Gol grol dzew, tibaque zeene goc tib ncow dipse lo guidzliu, haxta las tres biaa biini stib.

³⁴ Horco nguiedz zëëb tsi Jesús, rnee me:

—iEloi, Eloi! ¿Lama sabactani?

(Diidz co nac zig nacne rnee ne: iLuuse name nac xDios naa! ¿Pe nacne psaan luu naa?)

³⁵ Grè zha ne ndxie ga, zeene bin zho sca rbedz me, no zho nan Lí, men ne biadteed xtiidz Dios padzeela, men co rbedz me.

³⁶ Dzigo rias tib zho güeygad z tib lë zhiil lo nziiu bla, bzoob zhow tib guic goobgui pquiaa zhow ro me.

—iGotsaa csaan —rnee zho—, nu dzian ne dien pe ziaad Lí guiaadlit Lí me lo cruz!

³⁷ Tibaque zeene pquiaa me stib redz nroob, znuse blozh me.

³⁸ Lëëtaaque laa me nolozh, zeene briez nzoli lar nroob ne quia len yadoo, groltaa goca.

³⁹ Gax lo me ga zo men ne rnabey lo grè menguiib co, zeene gon men co zha gut me, rëbchaa me:

—iNe nligaa, Xpëed Dios nac men qui!

⁴⁰ Ye blalaa men wnaa güeyso ga, zit zo zho rwi zho; lad co no Mari Magdal, Salomé ni Mari ne nac xniaa Jacob niab grop José.

⁴¹ Nzianlaa nac zho, lëë grè wnaa co been xyudar me len dze ne güeyt me dib xtan zha Galilé; ni zlagaa zha ne güeynal zhits me zeene bdziñ me Jerusalén.

Bgueets Jesús

(Mt. 27:57-61; Lc. 23:50-56; Jn. 19:38-42)

⁴²⁻⁴³ Lëëtaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnab me diidzbezy tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac

me lad zhiwxtis zha Israel, ye me quiambëz gdziñ dze ne gnabey Dios.

⁴⁴ Bzee zdoo Pilat zeene bin me laa Jesús gutle. Bnabey me gocredz zha ne rnabey lo menguiib ne quiapan Jesús;

⁴⁵ haxta bdzinraa men co rëb nliw, dzigo-raa bdeed me diidz tsielit José Jesús lo cruz.

⁴⁶ Nacne güey José, güeyi me tib lë lar nroob. Zeene blozh blit me Jesús lo cruz pcheł me Jesús lar co, dzigo güeyxob me me tib len baa ne ndieen tib cho quie. Blozh ga, psodan me tib quie nroob psioog me ro baa co.

⁴⁷ Ga zo Mari Magdal ni Mari xniaa José, gon zho pa lo bgueets me.

16

BRIEEBAN JESUS

(Mt. 28:1-10, 16-20; Lc. 24:1-53;

Jn. 20:1-23)

¹ Bdze dze dze ne rdziiladz zho lo dziin, güey Mari Magdal, Salomé, ni Mari xniaa Jacob güeyi zho grè nceit nex ne tsietëëb zho lad xcuerp Jesús.

² Laa zeene biini liu, dze ne rzobni zhmal, silgaw loxaque ziaadlan ngbidza laa gza wnaa co brieë laa zho zie ro baan Jesús.

³ Nëz no zho, rnabdiidzlsa zho dien zha gdioob quie nroob ne nioog ro baa, cho siguieł coba.

⁴ Ni zeene bdziñ zho, gon zho laa quie co bdiooble.

⁵ Laa zho bzëëb len baa, zeene gon zho nëz derech laa tib mgui nguieg zob ga, nacw me tib lar nool, dib nquitsbiese rna lar co. Bdzieb zho gon zho me;

⁶ dzigo rëbchaa me lo zho:

—Gdziebde to. ¿Jesús lëë, men Nazaret ne pquiaa zho lo cruz, men co ziaadguiib to? Guiendle me nu, i!laa me brieëbanle! Golwi ganle nu nac zaatne pxob zho me.

⁷ Goltsie, golguiab lo Pedr ni lo grëraa xpëëdsuel me tsie zho Galilé, ga tsiedzieel zho me zigne rëble me lo zho glo.

⁸ Rias gza wnaa co laa zho brieë ga, masaque rzhidz zho rdzieb zho. Lo dzeb co ni par gnee zho gacd.

⁹ [Dze ne rzobni zhmal ga, sil co brieëban Jesús, ni Mari Magdal nac zha ne glopaa gon me; lëë Mari co ga beenguiaac me zeene benxoon me gadz menox ne nosacsi Mari.

¹⁰ Dzigo güey Mari güeynie Mari diidz lo grè zha ne bzënie me ga. Lëëtaaque laa zho ndxie mban rac zho, roon zho no zho xquiełnë me.

¹¹ Niicle bin zho rëb Mari laa me brieëbanle, gonlo Mari me; per bliladzd zhow.

¹² Bded ga, brieëquia me lo schop xpëëdsuel me lëëtaque no zho nëz zie zho dan.

¹³ Dzigo güey zho güeynie zho diidz lo grëraa zha ne nacgza zho; per niicle xtiidz grop zha co bliladzd zho.

¹⁴ Laa stibtaa vuel, lëëtaque ndziib zho lo mezh no zho wagw gza tsiiptib zho, tibaque zeene laa me brieequia; dzigo goctox me lo zho sac goṅ me ib bliladzd zho xtiidz me; ni goṅ me scataa nad zdoo zho, sac niicle güey zha ne goṅ me güeynie zho diidz ne nli brieeban me, ni bliladzd zhow.

¹⁵ Ni rëb me lo zho:
—Goṽsie dipse lo guidzliu, goṽsieseed miech Xtiidz Ndzon Dios.

¹⁶ Grëse zha ne dib zdoo gliladza ni chobnis zho, scaania Dios zho; sangue zha ne gliladzda, laa zho bnitole ga.

¹⁷⁻¹⁸ Grë zha ne sca dib zdoo gliladz naa: znee zho stib diidz ne rneed zho. Niicle xen zho grë meel ntseeb, concuaangaa miech zho, ib peet gacd zho. Ni zeene cxobnia zho guic grë meṅ rzacnë, zunguiac zho zho; grë mendox ne noguitnie miech, zeene gzeet zho lë naa zuncxooṅ zho ma.

¹⁹ Blozhse sca bnee me lo zho, laa me zey gbaa bzob me cue Dios nëz derech.

²⁰ Dzigo grëse xpëëdscuel me laa zho brie, brieets bliaaṽ zho zieseed zho miech Xtiidz Dios. Ni me nac meṅ ne noyacnieṅ zho ruṅ zho grë milagr nroob, zeena glu ne nli Xtiidz me nac miṅ noseed zho miech.]

XTIDZ NDZON DIOS MIÑE PQUIAA LUC

¡Diuzh Tiofl!

¹ Nanle luu ganle, nole bla zha ne bioxco pquiaa zho grë ncuuañe goc zeñe biaad Jesús meñ ne pxeel Dios ga.

² Ncuuañe nlipaa goca, grë ncuuañe pquiaa zho ga, laaw pquiaa zho zigne rzodiidzse miecha len dze rii, zigne rzodiidzsegaa zha ne bzëñepaa mew, zha ne pso me noneew lo miech.

³ Yeque naa pquiaa naa wen wen bnabdiidz naa, bleeni naa diidz grëse dien zha psilo grë ncuuañ co; ni niina laa naa rquiaw zigne gocsew laaw rxel naa lo luu. Sac rien naa ib nonguiela gacnañ luu;

⁴ zeena lozh gacnañ luu zha nac diidzli rii, wseed ne blu zho lo luu i.

⁵ Len dze ne nac Herod rey rnabey me dib xtan zha Judé, len dze co no tib pxoz lé Zacarí, me nac tib zha ne nacgrë “Zha Abí”. Niicle tsiel mew, zha xtií pxoz Aarón ziaad wnaa co, lé me Lisabet.

⁶ Zigtaa Zacaríw, zigtaa Lisabeta, noxco me miñe rnabey Dios, mban mew zigne naca, ni tib xley Dios rguitsd me.

⁷ Meñ gol-le nac me grop me, per ni tib mëed quianied me, sac niaad Lisabet gapd me mëed.

⁸ Laa tib dzew bgaa grë zha ne nacgrë Zacarí guñ zho dziin len yadoo.

⁹ Nac xcostumb grë zha ne nac pxoz, rio zho tib rif dien chopaa yгаа tsielaadz goxyaal len yadoo, dzigo bgaa Zacarí.

¹⁰ Goxyaal co nolaadz me len yadoo, laa grë miech ne ndxie néz ley nonabgaa lo Dios,

¹¹ tibaque zeene brieequia tib xanjl Dios bzo cue pcoog néz derech, zaatne nozëég me yaal ga.

¹² Zeene gon me anjl co bdzieb me, rdziel-draa me zha guñ me lo dzeb co.

¹³ Dzigo rëb anjl co lo me:

—¡Gdzieebd luu! Diidzse zialnie naa lo luu, gacnañ luu ganle miñe bnab luu lo Dios ga, pquiaadiag mew; gane niina laa tsiel luu gap tib mëedbgui. Zeene gal win, Juan cueelë lo win.

¹⁴ Tib guielbley nroob gac win lo to, niicle lo grëragaa miecha,

¹⁵ sac tib meñ nziuu gac win lo Dios. Zeene gac win zha broob, ni tib ro nziuu guied win, per ni vin yquiaarod win; ansraa gal win, laa Espiritu Sant nacniele win.

¹⁶ Win gac meñ ne co guic nzian grë zha Israel, gbiire gbig zho lo Dios, meñ ne rnabey zho.

¹⁷ Zigne goc Lí, meñ ne biaad pteed xtiidz me padzeela, sca gac win tedner win lo me, nroob poder ne gap win. Win gnee lo grë miech rii, gbiire gleynie zho me zigne goc xmengol zho zha ne bleynie me; csaan zho grë xquielntseeb zho, gban zho zigne racladz me; zeena niowse gac zho ycaania zho me.

¹⁸ Pquiab Zacarí rëb Zacarí lo anjl co:

—¡Ncuuañe gacd i gon rnee luu! Zigtaa naaw, zigtaa tsiel naaw, mengol-le nac no.

¹⁹ Rëbchaa anjl co:

—Bien ganle anjl Gabriel nu quianee lo luu, anjl ne tibaque zo lo Dios. Me pxeel naa zialnie naa diidz rii.

²⁰ Per ne squi riladzd luuw, na laa luu guiaañ ngop, haxta gal dze ne gac miñe rne naa lo luu nu, dze co glan xtiidz luu stib.

²¹ Grë miech ne ndxie quianab lo Dios ga, quiambëz zho Zacarí, rnabdiidzlsa zho pe goc me, sac ran zho rrieed me zaatne ziezëég me yaal ga.

²² Zeene brieed me, gon zho gacdraa gnee me, dzigo bien zho no pe blu Dios lo me ga. Tel pe racladz me gnee me, niapse señ rlu me.

²³ Bzase dze ne been me dziin len yadoo, dzigo laa me zey lidz me.

²⁴ Goca bla ngbidz, laa mëed co pquiaa zdoos tsiel me.

Dipse len gaay mëe bio zhuz co ro yu, ib briede me, rley me rnee me:

²⁵ —¡Zha wentaa Dios, bneedz me diidz bdziñ dze yquianie naa mëed rii, zeena gzhidzniedraa miech naa!

Güeynie tib anjl diidz laa Jesús gac mëed

²⁶ Goc xoop mëe zoney Lisabet mëed, pxeel Dios anjl co stib güey me Nazaret, guiedz ne ndxie xtan zha Galilé.

²⁷ Ga no tib ndzoop nguieg lë Marí, len dze co no xtiidz ndzoop co ctsieelna ndzoop tib zha xtií rey David, lë José.

²⁸ Bdziñ anjl co zaatne no ndzoop, pquiaabdiuzh me ndzoop, rëb me:

—¡Dichos luu gon, sac tib zha nziuu nac luu lo Dios! Me quianap luu.

²⁹ Zeene gon Marí anjl co, ni gon Marí zha rnee me, bzee zdoos Marí, riend Marí dien pe nac scataa rzë xtiidz me.

³⁰ Dzigo rëbchaa me lo Marí:

—¡Gdzieebd luu! Laa Dios gon bzooblo luu yгаа luu tib guielnzaac nroob.

³¹ Zdoos luu yquiaalo tib mëedbgui, zeene laa win gal, JESUS cueelë luu win.

³² Tib meñ nroob gac win, zien miech ganle Xpëed Dios ro ne no bgaa nac win; ni so me win gnabey win zig bnabey xmengol win David.

³³ Win gnabey lo grëse zha Israel, ni gdziñ dze ne lozh xquielrnabey win.

³⁴ Pquiab Marí rëb Marí lo anjl co:

—¿Mëed ye? ¿Per zha grieelo gap naa mëed, ni tib naa zo nu?

³⁵ Rëbchaa anj co:

—Niapse por poder ne rap Dios gac min co. Zeene laa Espiritu Sant guiaad gacnie luu, hor co laa poder co gacnie luu, laa mëed co yquiaalo zdoo luu; gacxe waa Xpëed Dios gunbey miech win, mine rnabey Dios min co gun win.

³⁶ Ye belyeen luu Lisabet, niina lo guie|gol-le laa tib mëed pqualo zdoo me; zëeb diidz ib grieelod gap me mëed, per na racle xoop mëe zoney me mëed,

³⁷ sac par Dios tsod ncuaañe grieelod gac.

³⁸ Dzigo rëb Marí:

—Te| scaw, mine rnee luu i, maase gaca. Laa naa zo nu par gun naa mine gnabeytaa Dios naa.

Blozhse ga, laa anj co zey.

Güeygan Marí Lisabet

³⁹⁻⁴⁰ Goc bla dzew, brieer Marí ga zie me ziegan me Lisabet tib guiedz win ne ndxie gui glaa ne nac xtan zha Judé.

⁴¹ Bdzin me, wbig me pquaabdiuzh me Lisabet. Bdiuzh co bnee me, zeene biasoli xpëed Lisabet zdoo Lisabet; dzigo hor co bdeed Espiritu Sant guie|biini lo Lisabet,

⁴² nguiedz bnee Lisabet rëb me lo Marí:

—¡Dichos luu Marí bгаа luu guie|nzaac qui! Sac gon, lo grëraa no nac no men wnaa, luu bzooblo Dios. Mëed ne zoney luu i, zha nziuu nac win lo me.

⁴³ ¡b guiaanladz naa dze rii, znu biaad luu nac luu xniaa men ne rnabey naa, biaan|gan luu naa!

⁴⁴ Haxta mëed ne zoney naa nu, rley win biasoli win zdoo naa, zeene pquaabdiuzh luu naa.

⁴⁵ ¡Dichos luu, bin luu mine në Dios, ni bliladz luu zun mew!

⁴⁶ Dzigo hor co bnee Marí rëb me:

¡Men nroob nac Dios! ¡Gdib zdoo naa roolnie naa me!

⁴⁷⁻⁴⁸ Rleynie naa me nac me men ne psilaa naa,

sac gon niicle peet nond naa, tib ngundziin winse nac naa lo me,

per laa me bzooblo naa.

Grë miech, zigtaa len dze riiw, zigtaa len dze ne ziaadragaaw,

ziab zho naa nac tib wnaa ne mazdraa dichos.

⁴⁹ Ne nligaa zha nactaa guie|nzaac rii bneedz me lo naa.

Men ro, men nroob nac me, ¡guiend|raa cho zig me!

⁵⁰ Grëse miecha, zha ne rioxco rquiaadiag mine rnabey me,

tibaque racnie me zho, ib rsaand me zho.

⁵¹ ¡Golwi ganle zha nactaa grë ncuaañe run me!

Grë ncuaañe no guic zha niats gun zho, bnitlo mew,

⁵² ptiche me grë zha ne zob rnabey.

Laa grë zha ndooladz, zha ne rzac miech peet nond,

beennon me zho.

⁵³ Grë zha mban ne guiend pe yquiin, nroob guie|nzaac ne bdeed me lo zho,

laa grë zha ne rapchen, scase bzonëz me zho.

⁵⁴ ¡Pe zhidaa ziyacnie me grë zha ne nac xtií Israel, mengol ne goc zig tib ngundziin lo me ga! ¡Tibaque rlu me rleynie me zho!

⁵⁵ Ib biaanladz me xtiidz me mine bnee me lo pxozgol ne Abraham,

zeene rëb me gdziñd dze ne csaan me Abraham, ni grëraa zha ne grieequia lo xtií Abraham.

⁵⁶ Maase tson mëe biaan Marí ga blëz me lo Lisabet, dzigorraa wbi me ga bdziñ me lidz me stib.

Gol xpëed Lisabet

⁵⁷ Bdzin dzew, laa xpëed Lisabet bza mëe, laa me gop win.

⁵⁸ Grë zha ne no gax lidz me, grë zha ne nac menlidz me, zeene bin zho scataa pquia zdoo Dios me bdeed Dios mëed co lo me, rley zho güeygan zho me.

⁵⁹ Dze ne goc mëedbgui yeen co xon ngbidz, blalaa zha ne güeynal zhits pxoz win, zhits xniaa win güeynie zho win bio win bey ne rio xpëedbgui zha Israel, parne glu lo Dios ngab win. Tibaque nan zho Zacarí nrieelë win, zigne lëque pxoz win, haxta scale nonee zho lo win,

⁶⁰ per hor co rëb Lisabet, led scad gac lë win, Juan grieelë win.

⁶¹ Dzigo pquiab zho rëb zho:

—¿Pe nacne sca grieelë win? Ni tib menlidz to lëd Juan.

⁶² Bnabdiidzaque zho lo pxoz win, blu zho señ lo me dien zha racladz me gac lë win.

⁶³ Dzigo bñab me bdeed zho tib lë lo zatne yquiaa me; bzee zdoo zho zeene blozh pquiaa me gon zho rnee lo co: “Juan grieelë win.”

⁶⁴ Loxaque blozh dze sca pquiaa me, zeene laa me wbiire bnee stib, psilo me rdeed me xquizh lo Dios.

⁶⁵ Grë zha ne zo ga, zha ne runbey me, zeene gon zhow, per nli rzee zdoo zho.

(Nëzrii nëzrec bzhoon diidz laa mëed co gol, grëse guiedz ne ndxie gui glaa co gocnan miecha.

⁶⁶ Zha ne rona, rza zdoo zho rnee zho: “¿Bay cho gac mëdyeen co?” Sac nligaa rlu nacnie Dios win.)

⁶⁷ Horco bdeed Espiritu Sant guie|biini lo Zacarí, psilo me bnee me rëb me:

68 ¡Xquizh xquie! Inzaac meñ nroob ne rnabey, meñ ne nac xDios ne nac ne zha Israel!

Sac gon laa me ziaad, ziaadgan me ne, ziad-bee me ne lo xquie!né ne.

69 Nasi laa me pxeel meñ nroob ne ziaadsi-laa ne,

lëë meñ co ga no grieequia lo zha xtii David, meñ ne beëñ xtsiin me ga.

70 Padzeelale bzeet me cxeel me meñ co, grë zha ne biaad pteed xtiidz me, bzeet zhow.

71 Rëb zho, ib sxeel me meñ ne guiaadsilaa ne ladznia zha ne nosacsi ne, zha ne rlëë lo ne.

72 Sac ib gdziñd dze csaan me grë zha xtii pxozgol ne, rquianëpaa zdoo me zho.

Ib guiaanladz me mine rëb me lo Abraham, 73 zeene rëb me laa me cxeel meñ ne csilaa ne,

74 zeena dziodzebdræa ne lo zha ne rlëë lo ne, lo zha ne rsacsi ne;

sinque ine tibli gac ne dziuun ne mine rnabey me.

75 Gzataa dze ne gneedz me guie!mban lo ne, ine mbe zdoo ne, dziuun ne mine rleynie me.

76 Luu gon xin, bzooblo Dios ro ne zob gbaa, cteed xtiidz me lo miech, luu tedner tsienee luu lo zho, laa meñ co no guiaad.

77 Luu gnee lo grë zha Israel, guien zho ganle zha gun Dios zho perdon, parne ycaania me zho.

78 Ne nligaa rleynie me ne, rquia zdoo me ne,

gane laa me cxeel Xpëed me, meñ co gac zig tib biini,

79 Biini co gziini lo grë zha ne mban lo guie!cow,

zeena biini co glu nëz lo ne, guio ne nëz ne peet zhgab, peet dzeb guiend.

80 Zigse zie dzew, scase scase zieroob mëdyeen co, ni scaquegaa dib zdoo win rleynie win Dios. Zeene laa win broobpaa, dzigo güey win bio win tib dan zit, haxta bdziñ dze ne laa win psilo pseed miech laa win blulo lo zho.

2

Gol Jesús
(Mt. 1:18-25)

1 Lëëtaaque leñ dze co, laa August, rey nroob ne zob Roma, bnabey top lë grëse miech ne no dib dan ne rnabey me, par gacnan me dien palal zho.

2 Lëë primer vuelt ga ptop zho lë miech, lëë iz co zob meñ ne lë Cirein zobnabey me gieldz Siria.

3 Bnabey August grëse miech zha ne no stib ladz beñ, laa zho no tsie zaatne nacpaa

ladz zho tsiedeed zho lë zho, parne ga ygab zho.

4 Min co nagon nacne brieë José guiedz Nazaret (xtan Galilé) grop me Marí zie me Belén (xtan Judé). Laa me zie ga, sac ga goc ladz xmengol me rey David.

5 Gard ctsieelnipaa me Marí, per nole xtiidz me grop me. Leñ dze co ziaadyobpaa gal xpëed Marí.

6-7 Bdziñ me Belén, bgaadraa me zaatne nrieelo mbëz me leñ yu, lega nac ti leñ lidz ma bdeed zho blëz me. Lëëtaaque bdziñ me ga, laa mëed co gol. Racse Marí pche! me win lar, bdix me win tib leñ yag ne row ma guizh; lëë mëedglo ga lo me.

8 Guieel co, blalaa zha ne nac baxtor, laa zho ndxie quianap zho xpëcwxiiil zho dan,

9 tibaque zeene brieequia tib xanj! Dios lo zho, dipse zaatne ndxie zho ga biab tib biini nroob. Zeene gon zho anjl co, gon zho biini nroob co, per nli bdzieb zho.

10 Dzigo bnee anjl co, rëb me lo zho:

—¡Gdziebe to! ¡Golgon diidz cub ne ganle zialnie naa lo to nu! ¡Tib guie!bley nroob gac diidz rii lo grëse miech!

11 Meñ ne gon quiambëz to ga guiaad csilaa to, laa me blansole lo guidzliu. Me nac Meñ ne zëëble diidz ga cxeel Dios, me nac meñ ndzon ne rnabey. Belén, zaatne goc ladz rey David, ga gol me naguieel.

12 Goltsie, zaatne tsiedziel to tib mëedbgui yeen, nrielse win lar zhoob win leñ yag ne row ma guizh, lëë me ga.

13 Tibaque zeene gon zho laa stib dzoon anjl brieequia gocgrë anjl ne quianee lo zho ga, psilo grë anjl co roolnie zho Dios, rnee zho:

14 ¡Haxta zaatne glaaraa gbaa, nozhoobnen ganle pa lotaa meñ nroob nac Dios!

¡Nasi, grëse miech zrieelo guiaanwen zho lo me; zdoo me rala laa me nobedz zho!

15 Zeene laa grë anjl co zey gbaa stib, psilo grë baxtor co rnee zho:

—¡Niinaga golgotsaa guio Belén! ¡Gotsaa guiowi ne dien, zeena dzian ne mine biaadnie anjl co diidz lo ne nu!

16 Lëëled bio zho nëz laa zho zie. Bdziñ zho zaatne blëz José ga grop Marí, nligaa laa mëdyeen co nix ga, nixse win tib leñ yag ne row ma guizh.

17 Dzigo bzodiidz zho grëse zha rëb anjl co lo zho, zeene güeynie me diidz laa win gol.

18-19 Grë zha ne bina, per nli rzee zdoo zho; laa Marí nosew zdoo me, tibaque rso-ladz mew.

20 Blozh ga, laa zho bio nëz ziequianap zho xma zho stib. Ine roolnie zho Dios, rdeed zho xquizh lo me sca pxeel me xanj! me güeynie diidz lo zho, rley zho sac brieelo gon zho mëdyeen co.

21 Dze ne goc xon ngbidz gol win, dze co bio win bey ne rio xpëedbgui zha Israel, par

glu xnëz Dios ngab zho; dze coquew bleelë zho win JESUS, zigne rëb xanj| Dios zeene güeynie me diidz ne laa win gac mëed lo Marí.

Güeynie zho Jesús yadoo

²²⁻²⁴ Nac ley ne psan Moisés lo zha Israel, wnaa ne sca rap mëéd|bgui, zeene rac zho tap zhma|, none tsienie zho chop ma cogon zho len yadoo; yase tsienie zho tib nëz coc, tib nëzga| palom. Ni rnabeya: “Grëse mëéd|bgui ne rac mëéd|glo, ib none gdeed zho win gac win tib zha ne gun xtsiin Dios.” Nacne zeene bza dze co, dzigo brie| Marí zie me Jerusalén grop me José, zienie me mëdeyen co yadoo csa| me win ladznia Dios; lë nëzle ga zienieque me gon ne no gdeed me ga.

²⁵ Lëëtaaque dze ne bdzi|nie zho win len yadoo, laa tib men lë Simeón no ga. Men Jerusalén nac men co, rleynie me Dios, rioxco me mban me zigne rnabey Dios, ni nacnie Espí|ritu Sant me. Quiambëz me gan me Men ne nole diidz ga cxe| Dios csilaa zha Israel,

²⁶ sac rëble Espí|ritu Sant lo me ible laa me no gan men co.

²⁷ Laa dze co, Espí|ritu Santaque psiaab guic me zie me yadoo. Nacne lëëtaque no me len yadoo, laa zho bdzi|nie mëdeyen co ga, ziesan zho win ladznia Dios zigne rnabey ley.

²⁸ Dzigo me wbig bdeedz win, rdeed me xquizh lo Dios, rëb me:

²⁹ Xquizh xquie|nzaac luu Dios, mine në luu lo zhingundziin win luu nu, laaw goc. jNasi zac|e nagon| guiaad-xi luu naa, haxta gley naa gbi naa lo guidzliu rii!

³⁰⁻³¹ jMen ne nac|e diidz cxeel luu guiaadsi-laa miech lo xtol zho, grop lo naa laa naa ran me niina!

³² jGrëse miech ne ndxie lo guidzliu, me nac biini ne gziini lo zho!

jMe csa|nziiu zha Israel, ne nac zho zha ne ngab lo luu!

³³ Zeene gon| Marí grop José scataa rzë grë diidz ne rnee Simeón rzeet Simeón mëdeyen co, bzee zdo me.

³⁴ Dzigo bna| Simeón lo Dios gacnie| Dios me gza me mëdeyen co. Blozh ga, rëbcha| Simeón lo xniaa win:

—Tib guie|bley nroob ne gac mëed rii lo zha Israel, por win ndal zho grie|e lo guie|cow ne no zho, laa zho gbig lo Dios. Ni scagaa zrieequia zha ne glëënie win, per lëëque zha csacsi zho ga. Mban gac zdo luu, nroob guie|në ne tso luu gan| luu zha sac miech win.

³⁵ Ga glu gan|e zha nac zdo tib tib miech.

³⁶⁻³⁷ Ye tib zhuz gol lë An zo ga hor co. Tibaque no me yadoo, dze guieel roolnie me Dios, rcuan me ni rzodiidznie me Dios. Tib zhuz gola, len dze co rac tapga| tap iz

biaan me viud. Nguieg me ptsieelna me, per loxaque gadz iz wbannie me tsieel me. Lëë pxoz me ga brieelë Fanuel, lë zhey co ga nac zha xtii Aser. Tib men ne rteed xtiidz Dios lo miech nac me,

³⁸ dzigo wbigaque me, psilo me rdeed me xquizh lo Dios; ni bzodiidz me lo grë zha ne ndxie ga, rëb me lëë mëdeyen co ga nac men ne quiambëz zho ga guiaadsi|aa zho.

³⁹ Blozhse been José mine rnabey xley Dios grop me Marí, dzigo laa me wbi ga. Bbedraa ga, beynie me mëed co Nazaret, zaatne nac ladz me.

⁴⁰ Ga broob win, zigse zieroo| win scase scase rac macis win, scase riabiiniraa win. Tibaque nacnie Dios win.

Biaan Jesús len yadoo

⁴¹⁻⁴² Zeene bloozh Jesús tsiipchop iz, dzigo güey José grop me Marí güeynie me win lni Pascw, lni nroob ne run zho Jerusalén. Gzobse iz rie me grop me, per iz cotaa laa me güeynie win, sac nac zhiwseed zha Israel, mëéd|bgui ne rap lalga iz, zrieelele tsie zho lo lni co.

⁴³ Zeene laa lni co bded, laa me bio nëz grop me laa me wbi ga. Ib biend me biaan win Jerusalén,

⁴⁴ tibaque güeynie guic me lad grëraa miech ne wbi|e lni, lad co ziena| win. Laa me no nëz, zeene bdzetaa dzew, laa me psilo rguib win, bnabdiidz me lo grë zha lidz me, lo grë zha ne runbey me,

⁴⁵ per ni tib zho choot rdeete win didz. Nacne wbi|eque me nëz Jerusalén stib, zieguib me win.

⁴⁶ Dze ne rac|e tso| ngbidz blozh lniw, dzigoraa güeydzied me win len yadoo, laa win zob lo grë zha ne nac maistr ley, no-quaiaadiag win grë zhiwseed zho ni nzian grë ncuaa|ne rnabdiidz win lo zho.

⁴⁷ Rzee zdo zho ran zho scataa nixbiini win, niic|e zeene rnee wina, zeene rtsiregaa win lo xtiidz zho.

⁴⁸ Zeene gon| me laa win zob lad grë men co, bzee zdo me; dzigo rëbcha| xniaa win lo win:

—Xin, ¿pe nacne squi been luu? Ptseeb luu no gon, quia no grop no pxoz luu noguib no luu.

⁴⁹ Pquiab win rëb win:

—Nguibde to naa. ¿Pe ran|e to ib none gun| naa xtsiin Pxoz naa?

⁵⁰ Ib biend me pe nacne sca rëb win.

⁵¹ Dzigo laa win ziena| zhits me, laa me zeynie win Nazaret; nose grë min| co zdo xniaa win.

Tib mëéd nguzobdiidz nac win, ron win xtiidz me.

⁵² Zigse zie dzew, laa win riabiiniraa, laa win noroobraa; rleynie Dios win, niiclegaa miecha rleynie zho win.

3

Psilo Juan Bautist noseed me miech

(Mt. 3:1-12; Mr. 1:1-8; Jn. 1:19-28)

¹⁻² Bdzin dzew, laa Juan psilo pseed miech. Lëë leñ iz co rac tsiin iz zob meñ ne lë Tiber nac me rey, rnabey me grë guiedz ne ngab lo zha Roma. Leñ dze co zob Pilat rnabey me grë guiedz ne ndxie nêz Judé, laa Herod zob rnabey grë guiedz ne ndxie nêz Galilé. Leñ dze coque zob bets Herod, meñ ne lë Lip rnabey me grë guiedz ne ndxie nêz Iturê ni nêz Traconit; laa Lisian rnabey grë guiedz ne ndxie nêz Abilin. Zha ne nac zhipxoz nroob zha Israel leñ dze co, nac Anás ni Caifás. Leñ dze copaa nagon güeynee Dios lo Juan (xpëéd Zacarí) dan ngan ne no Juan ga.

³ Nacne hor co psilo Juan güeyted me grë guiedz ne ndxie ro guiubee Jordán, rnee me lo grë miech co, csaan zho xquieñtseeb zho gbig zho lo Dios ni chobnis zho, zeena csilaa Dios zho lo grë xtol zho.

⁴ Ga briequia miñe bnee Isá, meñ ne baaad pteed xtiidz Dios, zeene znu pquiaa me:

Bii zon miech ganle zeene laa tib tsi meñ zëëb tib dan ngan, rnee me:

“Golzhixcuua nêz ne ted meñ ne rnabey,

golsaan grë guieñtseeb ne run to.

⁵ Zaatne nac leñ blé, golcodzëew,

grë gui glaa, grë gui las, golsiaablow.

Nêz ne niecw, nêz ne quiaa quiaquiet nac, golzhixcuuaa.

⁶ Grëse miech, laa zho gan meñ ne pxeel Dios ga ziaadsilaa zho.”

⁷ Zeene ran Juan laa miech rdzin lo me cchoobnis me zho, rnee me lo zho:

—iMiech ngoopdol, masaque nac to zig nac meel! Nan to na lëë, loxaque chobnis to laa to laale lo grë guieñdëdox ne ziaadyob guiaad.

⁸ Led scada gon, none ndzinli gban to zeena glu nlipaa psaan to xquieñtseeb to. Ni gacniatsde to guiab to, loxaque por nace to zha xtií Abraham, laa Dios csilaale to; sac gneli naa lo to ganle, telne gacladz Dios, haxta grë quie zac gnabey me tsaalow miech ne gac zha xtií Abraham.

⁹ Nanle to ganle, grë yag nex ne rquiad nex lo, zeene ran zho sca naca, rchug zhow, rzëëg zhow; scadaa nagon sac grë zha ne gband zigne racladz Dios, ib tedlaad zho lo gui; sac rreequia laa me nzhenle xquibiyag me, cchug me grë yag ne sca nac.

¹⁰ Dzigo rnabdiidz zho lo Juan, pe no gun zho parne ygaad zho grë guieñé co.

¹¹ Dzigo rquiab me rnee me lo zho:

—Telne quianie to chop lar ne racw to, none gdeed to tiba lo zha ne guieñd xab; telne quianiegaa to ncuaañe gow to, none gdeed to palala yquín zha ne quianieda.

¹² Wbigaque bla recaudador ne zie chobnis, rnabdiidz zho dien pe gun zho.

¹³ Pquiaab Juan, rëb Juan lo zho:

—Cuandraa to samiech to, miñe rieguiañse zho quizh zho, miñ co golnab lo zho.

¹⁴ Ye zla menguiib wbig, rnabdiidz zho rëb zho:

—¿Telzhe no waa, pe nac miñe dziuun no?

Rquiaab Juan rnee Juan lo zho:

—Ndzinli golgac, ib ctsebde to samiech to par dien pe gla to lo zho; zha ne peet xtold, ib yquiaaquide to zho ncuaañe beend zho. None sac zdoo to dimi ne quiaayazh to.

¹⁵ Nzian grë miech co quiambëznë zho gacnan zho dien pe lëële Meñ ne bzooblo Dios ga cxeel me nac Juan.

¹⁶ Dzigo rëb Juan lo zho:

—Tib wrobnisse nu rnedz naa lo to, sangue meñ ne no guiaad ga Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa meñ non nac me, tel naa peet nond naa, per ni par tib ngundziin ne glit lab me ni me, raguiañd naa gac naa.

¹⁷ Laa me guiaad zig tib zha ne rbeeguizh zhoxtil, sac zha co, rlozhse rbeeguizh zho zho rgotsow zhow, laa paj rlaañ zho lo gui, ga reca. Per gui ne gzëëg grë paj ne guiadbee me ga, gdzind dze guiuuw.

¹⁸ Sca rnee me lo zho, par guien zho zha nac Xtiidz Dios.

¹⁹ Tib vuelt haxta lo rey Herod goctox me, sac lëëque Herodí, wnaa ne nac tsiel bets Herod nonie Herod; grë guieñtseeb ne quiaayun Herod, blisqui mew.

²⁰ Per laa ne nion Herod diidz, lel been me stib guieñtseeb, bnabey me bgaa Juan bio Juan ladzguuib.

Brobnis Jesús

(Mt. 3:13-17; Mr. 1:9-11)

²¹ Leñ dze ne nochoobnis Juan miech ga, tib dzew laa Jesús bdzin lo Juan ga, ye me bnab cchoobnis Juan me. Blozhse brobnis me, laa me quiazodiidznie Dios, tibaque zeene bzhiäl zhan gbaa,

²² laa meñ ne nac Espiritu Sant biet, rlu me zig rlu tib palom, laa me bdzin guic Jesús, hor co blu zëëb tib tsi meñ co nêz gbaa, rnee me:

—Xin, rleynie naa luu gon, nziuu luu lo naa.

Xmen gol Jesús

(Mt. 1:1-17)

²³ Galptsiiz rap Jesús, laa me psilo xtsiin me pseed me miech. Zha ne runbey me, rzoob zho xpëéd José nac me,

²⁴ José co goc xpëéd Elí,

Elí goc xpëéd Matat,

Matat goc xpëéd Leví,

Leví goc xpëéd Melqui,

Melqui goc xpëéd Jan,

Jan goc xpëed José,
²⁵ José goc xpëed Matatí,
 Matatí goc xpëed Amós,
 Amós goc xpëed Nahúm,
 Nahúm goc xpëed Esli,
 Esli goc xpëed Nagai,
²⁶ Nagai goc xpëed Maat,
 Maat goc xpëed Matatí,
 Matatí goc xpëed Semei,
 Semei goc xpëed José,
 José goc xpëed Judá,
²⁷ Judá goc xpëed Joan,
 Joan goc xpëed Resa,
 Resa goc xpëed Zorobabel
 Zorobabel goc xpëed Salatiel,
 Salatiel goc xpëed Neri,
²⁸ Neri goc xpëed Melqui,
 Melqui goc xpëed Adi,
 Adi goc xpëed Cosam,
 Cosam goc xpëed Lmodam,
 Lmodam goc xpëed Er,
²⁹ Er goc xpëed Josué,
 Josué goc xpëed Liezer,
 Liezer goc xpëed Jorim,
 Jorim goc xpëed Matatí,
³⁰ Matatí goc xpëed Leví,
 Leví goc xpëed Simeón,
 Simeón goc xpëed Judá,
 Judá goc xpëed José,
 José goc xpëed Jonán,
 Jonán goc xpëed Liaquim,
³¹ Liaquim goc xpëed Melé,
 Melé goc xpëed Mainán,
 Mainán goc xpëed Matata,
 Matata goc xpëed Natán,
³² Natán goc xpëed David,
 David goc xpëed Isai,
 Isai goc xpëed Obed,
 Obed goc xpëed Booz,
 Booz goc xpëed Salmon,
 Salmon goc xpëed Naasón,
³³ Naasón goc xpëed Minadab,
 Minadab goc xpëed Aram,
 Aram goc xpëed Srom,
 Srom goc xpëed Far,
 Far goc xpëed Judá,
³⁴ Judá goc xpëed Jacob,
 Jacob goc xpëed Isaac,
 Isaac goc xpëed Abraham,
 Abraham goc xpëed Taré,
 Taré goc xpëed Nacor,
³⁵ Nacor goc xpëed Serug,
 Serug goc xpëed Ragau,
 Ragau goc xpëed Peleg,
 Peleg goc xpëed Heber,
 Heber goc xpëed Sala,
³⁶ Sala goc xpëed Cainán,
 Cainán goc xpëed Rfaxad,
 Rfaxad goc xpëed Sem,
 Sem goc xpëed Noé,
 Noé goc xpëed Lamec,
³⁷ Lamec goc xpëed Matusalén,

Matusalén goc xpëed Enoc,
 Enoc goc xpëed Jared
 Jared goc xpëed Mahalaleel,
 Mahalaleel goc xpëed Cainán,
³⁸ Cainán goc xpëed Enós,
 Enós goc xpëed Set,
 Set goc xpëed Adán.
 Adán goc zig tib xpëed Dios.

4

*Gocladz mendox niungüet ma Jesús
 (Mt. 4:1-17; Mr. 1:12-15)*

¹ Zeene blozh brobnis Jesús guiubee Jordán ga, nacie Espiritu Sant me, dzigo güeynie me Jesús tib dan ngan, zaatne choot miech guien.

² Ga bio Jesús, ni tib lë peet dowd me; gzase dze pquiana mendox niungüet ma me niun me miñe racladz ma. Zeene goc choo dze no me ga, gon ma lëbdraa me rcaabedz me,

³ dzigo rëbchaa ma lo me:

—Telne nli Xpëed Dios nac luu, bnabey tsaalo grë quie rii ncuaañe gow luu.

⁴ Dzigo pquiab me rëb me lo ma:

—Znu zhoobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me glaa tib guic gui, ga znuse blu ma grëse guiedz ne ndxie dib lo guidzliu lo me,

⁶ rëb ma:

—Bui ganle, grëse guiedz ne gon ran luu i, chen naaw, zrieelo gded naaw lo zha ne racladztaa naa. Grësew, dib guielndaan ne no low, znedz naaw lo luu

⁷ telne squitsgzhib luu lo naa, gunnon luu naa.

⁸ —iBiche lo naa nu mendox! —rëb me lo ma—. Znu gon zhoobnee lo Xtiidz Dios: “Diosse nac meñ ne rnabey, mese none gunnon luu, lo me rieguial yquitsgzhib luu; ni miñe rnabey me miñ co none gun luu.”

⁹ Blozh ga güeynieque ma me lad guiedz Jerusalén, ga blep ma me zaatne mazdraa glaa guic yadoo noob ne zob lad guiedz co, rëb ma lo me:

—Telne nli Xpëed Dios nac luu, bringaa nu,

¹⁰ henque led znu rnee lo Xtiidz me: “Znabey Dios grë xanjl me yquiaanap luu,

¹¹ zgueedz zho luu, zeeña ni tib quie ycaand ni luu.”

¹² Dzigo rëb me lo ma:

—Psoladz ganle noque stib zaatne znu rnee lo Xtiidz Dios: “Bien, Dios nac meñ ne rnabey luu, nodne quitnie luu me gnab luu lo me gun me ncuaañe nod gun me.”

¹³ Gonse ma rdziel zha gunüet ma Jesús, dzigo biche ma lo me palal dze.

¹⁴ Blozhse ga, dzigo laa Jesús wbi ga bdzin me nëz Galilé, scaque nacie Espiritu Sant

me. Znuse beebey miech me por grëtaa ncuuañ ro ne ruñ me, grëse guiedz ne ndxie nëz co, rzeet zho me.

¹⁵ Zaatne rdziñtaa me, rie me xyadoo zho, rseed me zho Xtiiðz Dios, rleynie zho me, rley zho ron zho grë miech rnee me.

*Güey Jesús Nazaret
(Mt. 13:53-58; Mr. 6:1-6)*

¹⁶ Tib dzew, laa me bdziñ Nazaret, zaatne broob me. Goł dze ne rdziiladz zha Israel lo dziin, güey me xyadoo zho zig ruñaque me grëraa zaatne ziye me. Zeene goł horne rlab zho Xtiiðz Dios, dzigo bded me,

¹⁷ bdeed zho miñe pquiaa Isá glab me. Pخال me low, lëetse zaatne znu rnee blab me:

¹⁸ ZhiEspiritu Dios nacie naa, ible Dios bzooblo naa, gnee naa Diidz Ndzon ne nac xtiidz me lo grëse zha ne rquiinnëw.

Laa me pxeel naa gne naa lo grë zha ne ngadoo lo ncuuañe nosacsi zho, zeena guien zho zha griece zho lo grë ncuuañ co.

Laa me pxeel naa gziini naa lo grë zha ne no lo guielcow,

grë zha ne rzac guien draa zha griece zho lo zhizhgab zho, laa me pxeel naa, naa cuee zho lo zhgab co.

¹⁹ Laa naa zialnie diidz lo miech, gacnan zho pa lotaa noxco Dios gunlay me grëse zha ne gbig lo me.

²⁰ Blohse blab me lo co, ptibëd mew bdeed mew lo zha ne quianapa, dzigo laa me bzob. Grëse zha ne no leñ yadoo ga, dze rwi zho lo me,

²¹ dzigo bnee me lo zho, rëb me:

—Grë diidz ne blozh blab naa lo to nu, leñ dze rii gon laaw noyac cumplir.

²² Grëse zho rleynie zho me, rlozhd gzee zdoos zho ron zho grëtaa diidz ndzon ne rnee me. Rnabdiidzlsa zho rnee zho:

—¿Bay zha squitaa pseed meñ qui? ¿Led lëë xingan José i!

²³ Dzigo rëb me lo zho:

—No tib diidz ne rnee: “Zha ne racnie stib miech, none guien zho glo menladz zho gacnie zho.” Rienpaa naa gon, miñ co racladz to gnë to lo naa; quiambëz to gan to grë milagr ne ziyon to beñ naa guiedz Capernaum.

²⁴ Gneli naa lo to ganle: Zha ne riaad rteed xtiidz Dios, ible znu ranzed menladz zho zho; gane rrieelod pe gun zho.

²⁵⁻²⁶ Gołsoladz ganle zeene biaad Lí, bio tib tiemp ne biabd guie tson iz groł, tib gbindox ne gon miech Israel nu. Ndal wnaa viud ne nac menladz me mban bded zho, guien pe nquiin zho, per briee lod niu me xyudar zho; leł xyudar tib wnaa Sarept pxeel Dios me güeygun me, guiedz ne ndxie gax Sidón.

²⁷ Scaque zeene biaad Liséw, ndal zha Israel rlan guiedz dco ne nac lepr; per ni

tib zho beenguiacd me; leł tib zha Siria lë Naamán, meñ co beenguiac me.

²⁸ Zeene gon zho sca rnee me, blëë zho.

²⁹ Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co. Laa zho nole par ctiix zho me ga,

³⁰ zeene znuse bded me lad zho, ziega me.

*Biac tib mgui ne nosacsi mendox
(Mr. 1:21-28)*

³¹ Ga wbi Jesús, bdziñ me guiedz Capernaum stib, guiedz ne ndxie nëz Galilé. Gzobse dze ne rdziiladz grë miech co lo dziin, rie me xyadoo zho rseed me zho.

³² Rzee zdoos zho ron zho grë zhiwseed me, grëse miñe rnee me, rlu zha rnabey nac me.

³³ Tib vuelt, lad grë zha ne noseed me ga no tib mgui ne nosacsi mendox; roptsie mendox co rnee ma lo me:

³⁴ —¿Psaan no! ¿Pe gun luu no Jesús Nazaren? ¿Ziaad luu lëë par gnitlo luu no? ¿Runbey naa luu, luu nac meñ ndzon ne pxeel Dios!

³⁵ Dzigo goctox me lo ma, rëb me:

—¿Psoog ro luu! ¿Na zeena psaan meñ qui!

Horco, squi ndxie grë miech co bron ma mgui co liu, mincose been ma, laa ma briece laa ma zie.

³⁶ Rlozhd gzee zdoos grë miech co, rnabdiidzlsa zho rnee zho:

—¿Zha nac xtiidz meñ qui, zha nacie haxta mendox rdzieb ma me, rzhoon ma zeene laa me ractox lo ma?

³⁷ Grëse guiedz ne ndxie gax ga, zigse zie dze rzhoon diidz scataa milagr ne ruñ me.

*Biac xniadzoop Pedr
(Mt. 8:14-17; Mr. 1:29-39)*

³⁸ Briece Jesús leñ yadoo, zie me nëz lidz Simón. Bdziñ me lëëtaque laa xniadzoop Simón nix rlan xlëë, nzhoos rac me; dzigo wbig zha ne been vis laa zhuz co rzacné, bnab zho lo me gunguiac me me.

³⁹ Nacne bded me zaatne nix zhuz co, goctox me lo xlëë co. Horcogazha laaw blëë, guche zhuz co ga, beenlo me ncuuañe dow zho.

⁴⁰ Laa ngbidz rzëëblew, zeene bdziñ grë miech co lo Jesús, bdziñnie zho grë zhimguidz zho. Zhaase zhaase guielguidz ne rzac tib tib mguidz co, per grëse zho zigne rxobnia me guic zho laa zho riac.

⁴¹ Nzian zho beñcxoon me mendox ne nosacsi zho, zeene laa ma rriece, nguiedz roptsie ma rnee ma lo me:

—¿Rdziuñbey no luu, Xpëed Dios nac luu!

Dzigo ractox me lo ma, rsaand me gnee ma cho nac me, sac wen wen nan ma me nac Meñ ne nacle diidz ga cxeel Dios.

⁴² Biini liu co, silgaw briece Jesús lad guiedz co güey me tib zaatne choot miech

guiend. Zeene bnit me lo grè miech co, briece zho güeyguib zho me haxta bdziel me lo zho; rnab zho lo me Capernaumse ga cuöz me, paat tsiedraa me.

⁴³ Dzigo rëbchaa me lo zho:

—Grieeeloda, ib none ga naa grëraa guiedz, gaseed naa miech gacnan zho zha racladz Dios gban zho; sac ible min co pxeel me naa zial naa.

⁴⁴ Nligaaw, grëse guiedz ne ndxie nëz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grè miech co.

5

Nroobdox mel bgaa

(Mt. 4:18-22; Mr. 1:16-20)

¹ Tib vult miech guizhiu ne pcaalsa lo Jesús ro Nisdoo Genesaret, haxta rtaagw zho me; grëse zho racladz yquiaadiag zho Xtiiidz Dios.

² Gax ga zo chop barcw, blalaa ngooz mel biet leña, laa zho no lo nis ga noguuiib zho guix ne rnaaz zho mel.

³ Nacne güey me biep me tib leñ barcw co, bnabey me Simón psëë Simóna bzëëba lo nis palal; sac lëë xbarcw Simón ga. Dzigo leen co bzob me pseed me grè miech co.

⁴ Zeene blozh bnee me lo zho, rëbchaa me lo Simón:

—Nana ganle zeeynie barcw rii guionie new zaatne guietlaa nis, zeena gron to guix ne rgaa mel i gnaaz to palal ma.

⁵ Pquiab Simón rëb Simón:

—Dib guieel-le bdzio no lo nis rii, per ni tib mel bnaazd no; per lega ne luu rneew, na dien laa no grona stib.

⁶ Bron zho guix co lo nis, zeene laa zho cueew, ya zig zrieza, biodzëse leña no mel.

⁷ Horco blunia zho lo grëraa zha ne nacgrë zho no stib leñ barcw co, parne tsie zho gun zho xyudar zho. Bdziñ zha co gogza zho, gropse leñ barcw co pcodzëë zho grè mel co; ya zig zdedquiew lo nis.

⁸ Zeene gon Simón scataa mel taf ne bgaa, pquitsgzhib me lo Jesús, rëb me:

—Bzhiguiel mazd psaan naa, tib miech ngoopdol nac naa, rdzieeld so luu lo naa nu.

⁹ Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac milagr ne gon zho ga.

¹⁰ Scasaque rac Jacob ni Juan (xingan tib men lë Zebedé), zha ne nacgza Simón.

—Gdziebd luu —rëb Jesús lo Simón—. Zigne squi gon rioxco luu riaad luu gooz mel niina, desde nadze laa luu tsoxco gun luu stib gooz; laa naa cxel luu tsietop luu grè miech ne sëëb xnëz Dios.

¹¹ Zigne bdziñnie zho barcw co ro nis, bzo zhow ga, laa zho zienal zhits me.

Biac tib zha ne rlan guiedz lepr

(Mt. 8:1-4; Mr. 1:40-45)

¹² Laa Jesús no tib guiedz co, tib dzew, bdziñ tib mgui ne rlan guiedzdox ne lë lepr lo me, pquitsgzhib mgui haxta bdziñ lo mgui liu, rëb mgui lo me:

—Tebaa siguiel luu gunguiac luu naa.

¹³ Dzigo pxobnia me guic mgui, rëb me:

—Zunguiac naa luu. ¡Niinagazh laa luu guiaanmbel!

Horcogazha laa mgui biaanmbe lo guiedz co.

¹⁴ Dzigo pso Jesús diidz lo mgui, choot lo gzodiidzd mgui zha biac mgui; ni rëb me lo mgui:

—Bzë, güey lo pxoz, güeyson gon ne rnabey xley Moisés gdeed luu; zeena gan zho ganle laa luu biacle.

¹⁵ Niicle sca nëd me gacnan miecha, per znuse znuse rliaal diidz grëtaa milagr ne run me; miech guizhiu ne rdziñ lo me, zha ne zie yquiaadiag zhiwseed me, zha ne zieegaa gunguiac me zho tel pe guielguidz ne rzac zho.

¹⁶ Zhiga, zhiga rbiche me lo miech, rie me zaatne choot guieñd riezodiidznie me Pxoos me.

Biac tib zha ne gutoo xcuerp

(Mt. 9:1-8; Mr. 2:1-12)

¹⁷ Stib dzew, miech guizhiu ne ndxie lo Jesús noquiaadiag zho zhiwseed me. Nzian grë zha farise, grë maistr ley, zha ne briece dib nëz Galilé, dib nëz Judé, zha ne brieegaa Jerusalén, ye zho laa zho no lad co noquiaadiag zho grë minë rnee me.

¹⁸ Laa grë miech co ndxie ga, zeene bdziñ bla zha bgui, ney zho stib men bgui, zhoobse me lo yag, ib gacd sé me sac dipse me gutoo. Gocladz zho nzëëbnie zho me len yu ne no Jesús ga, ndziñnie zho me lo me.

¹⁹ Per ib gocd nded zho lad grë miech co. Nacne biepaque zho guic yu, pxal zho tiblë guic co, ga pteed zho men rzacné co dib yag ne zhoob me ga, bdziñ me lo Jesús.

²⁰ Zeene gon Jesús ne nli dib zdoo zho rnalo zho me, me gunguiac men rzacné co, rëbchaa me lo men co:

—Peet tsienied guic luu, niinagazh laa naa gun perdon grëse xtol luu.

²¹ Zeene bin grë zha farise co, grë maistr ley co sca rëb me, rneechaa zho gza zho: “¿Cho dzigo rzac mgui qui nac me? ¡Falt i gon noyun me lo Dios! ¡Tibaque men ne run perdon xtol miech, ni lëë men co nac Dios!”

²² Bienga Jesús sca quianee zho, dzigo rëbchaa me:

—¿Pe nacne rzac to laa naa quiyun falt?

²³⁻²⁴ Nli cholze zac guiab laa zho gun perdon xtol miech, per grieeelod gunguiac zho zho. Gołwi ganle laa naa gunguiac mgui rii, zeena gacnan to naa ne nac naa Mgui ne

pxeeł Dios, ible rap naa poder par guñ naa miech perdon.

Dzigo bnee me lo meñ rzacnë co, rëb me:

—jNiinagazh guche i, bi yag ne bzhoob luu i, zeen bzë!

²⁵ Zigne sca bnee me, laa mgui co bzoli, squi ndxie grë miech co laa me blis yag co, iñe roolnie me Dios laa me zey.

²⁶ Psilo zho grëse zho, roolnie zho Dios; lala rzee zdoo zho, lala rdzieb zho, rnee zho:

—jNadzesi, laa ne bdzian ncuane gard dzian ne!

Bredz Jesús Levi

(Mt. 9:9-13; Mr. 2:13-17)

²⁷ Blozh ga, laa Jesús brieë ga. Ro nëz zieded me gon me tib meñ lë Levi, zobse meñ co lo mezh ne rietizh zho dimi ne razh lo zha Roma, sac me rtop dimi co. Dzigo bredz Jesús me tsienal me zhits Jesús.

²⁸ Biaanque xmez h me ga, guso me ga, laa me zienal.

²⁹ Bded ga, güeynie me Jesús tib wagw lidz me. Grë zha ne ruñ dziin co, ni grëragaa zha ne bdziñ ga, tipse brenie Jesús zho grë xpëëdsuel me.

³⁰ Blalaa zha farisé, ni zla maistr ley, rlëë zho gon zho sca zobnie Jesús grë zha co, bded ga rëbchaa zho lo xpëëdsuel me:

—jLëda i gon ruñ to! jPe nacne sca tipse rownie to grë zha ngoopdoł co, grë zha beed ne nac recaudador ga?

³¹ Dzigo rëbchaa Jesús lo zho:

—Nanle to ganle, zha ne ruñ rmed, zaatne no zha rzacnë ga rquiin zho, žniacxe squiin zho zaatne no zha ne ndip ndaan?

³² Scaque naa nagon, zialguibd naa zha wen, sinque laa naa zialguib grë zha ngoopdoł, zeena gbzig zho lo Dios.

jPe nacne rcuand xpëëdsuel Jesús?

(Mt. 9:14-17; Mr. 2:18-22)

³³ Bdzinaque bla zha ne bnaabdiidz, rëb zho lo Jesús:

—jPe nac waa ib rcuand xpëëdsuel luu, tibaque quaiyaw zho, tibaque quaiye zho? Zha xpëëdsuel Juan, zha xpëëdsuel farisé, rdzian no tibaque nocuan zho, tibaque nonab zho lo Dios.

³⁴ Pquiab Jesús rëb me lo zho:

—Zaatne nadien noyac tib guieltsieel, žniacxe znabey to ycuand grë zha ne ndxie lo lni, ni ran to laa mgui ne notsieelnia zo lo zho?

³⁵ Per zdziñ dze zeene laa mgui co gbiche, ni zeene laa dze co gdziñ, dzigosi nagon rieguial ycuand zho.

³⁶ Blozhse sca bnee me, rëbaque me lo zho:

—Zha ne rquiaabdie lar, tsod zha ne ctiez xab cub cuee zho tib lë lar ne yquiaabdie zho tib xab gox zho. Sac tiba, zniło zho xab cub zho ga, ni stiba rdzieeld yquia tib lë lar cub lad lar gox.

³⁷ Scaque zha ne rgotsow vin, tsod zha ne cotsow vin cub tib leñ guid ne padzeelale noquiin, sac stsiez vin cuba; lozh ga zigtaa vina, zigtaa guid cow, laaw nitlo ga.

³⁸ Gacxe waa, tel vin cuba none leñ tib guid cubaque tsotsowa.

³⁹ 'Nac cuent rii zig rzac miech vin, zha ne bienle rie vin ne padzeelale notsow, rdzladzd zho guie zho vin cub; sac biaanle guic zho rnee miech: "Vin ne padzeela notsow, miñ co nizhraa rdioow."

6

Dze ne rdziiladz zha Israel lo dziin

(Mt. 12:1-8; Mr. 2:23-38)

¹ Tib vuel, lëëtse dze ne rdziiladz zho lo dziina, bded Jesús zaatne zëëb zhobxtil grë xpëëdsuel me; psilo zho pchoo zho mzion zhobxtil co, zigse ruñbe zho zhob co, scase row zhow.

² Gon blalaa zha farisé sca no zho, dzigo rëbchaa zho:

—jLëda i gon noyun to! Golguien ganle dze nda nac dze rii.

³ Pquiab Jesús rëb me lo zho:

—jPe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho?

⁴ Rneew, bzëëb me leñ yadoo güeynab me grë guietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row guietxtil co.

⁵ Ni rëb me lo zho:

—Gacnan to ganle naa ne nac naa mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia

(Mt. 12:9-14; Mr. 3:1-6)

⁶ Gol stib dze ne rdziiladz zho lo dziin, güey Jesús leñ yadoo win ne zob lad guiedz co, psilo me noseed me miech. Lad grë miech ne no leñ yadoo ga, no tib mgui, mband nia derech me.

⁷ Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo miñ co yquiaaqui zho tsiezo zho me lo zhiwxtis zho.

⁸ Bien Jesús sca no guic zho, dzigo bredz me mgui co, bnabey me bzo mgui grołtaa lo grë zha ne ndxie ga;

⁹ Blozh ga rëbchaa me lo zho:

—jPe nadien rzac to nonguiel guñ ne dze rii? jPe nonguiela guñ ne ncuane yquiin, te nonguiela guñ ne guielntseeb ye? Zig nac samiech ne zha ne noxtseeb xquielmban, jpe maase csaan ne guet zho?

¹⁰ Dze rwi me lo zho tib tib zho, dzigo rëbchaa me lo mgui co:

—jBzigaa nia luu!

Zigne bzigaa mgui co nia mgui, laaw biac.
¹¹ Zeene gon zho sca beenguiac me nia mgui, per nli rlëë zho, psilo zho quianediidz zho dien zha gun zho me.

*Bzo Jesús zha ne tsienee xtiidz me
 (Mt. 4:23-25; 10:1-4; Mr. 3:13-19)*

¹² Tib vuel, güey Jesús tib guic gui, dipse guieel blëz me ga bzodiidznie me Dios.

¹³ Biini liu co, bredz me grëse zha ne nac xpëëdsuel me, dzigo lad co ble me tsiipchop zho, zha ne tsiepaa tsienee xtiidz me lo miech.

¹⁴⁻¹⁶ Znu lë gza tsiipchop zha co:

Simón (zha ne bleelë me Pedr),

Ndrës (bets Pedr),

Juan,

Jacob,

Lip,

Bartol,

Matew,

Mazh,

Jacob (xingan Alfé),

Simón (zha ne no lad grë zha ne racladz cuee wxtis Roma Israel),

Judas (bets Jacob),

ni Judas Iscariot (zha ne güeyto me).

¹⁷ Cho gui co biet me grë xpëëdsuel me, bdziñ zho tib ro lets. Loxaque bdziñ zho ga, laa stib dzoon xpëëdsuel me bdziñaque lo me ga; zhiits co nal stib dzoon miech, no zho racladz yquiaadiag zhiwseed me, no-gaa zho zie ga par gunguiac me zho. Miech guizhiuw, zha ne ziaad nëz Judé, zha ne ziaad nëz Tiro, zha ne ziaad nëz Sidón, zha ne brieegaa Jerusalén.

¹⁸ Nzian grë zha co nosacsi mendox, grëse zho beenguiac me zho.

¹⁹ Rbig be grë miech co racladz zho xen zho lad xab me, sac ran zho, zha ne rzhen lad xab me, tel pe guielguidztaa rzac zho, runguiac me zho por grëtaa poder ne rap me.

*Cho nac zha ne wen zie
 (Mt. 5:1-12, 38-48; 7:1-5, 12)*

²⁰ Dzigo dze bui Jesús lo grëse zha ne nac xpëëdsuel me, rëb me lo zho:

—jWen zie zha ne rien none gbig zho lo Dios, sac ib dzin zho zaatne rnabey me!

²¹ jWen zie zho! Sac niicle telne noyan zho gbin, per me gdeed ncuaañe yquini zho; niicle tel no hor mban rac zho roon zho; per dzin dze ne gdeed me tib guielbley nroob lo zho.

²² Zig nac to, zeene csilo miech glëënie zho to, guncxoon zho to, yquiaago zho to, gneenë zho to, sac zho haxta ni lë to gondraa zho, loxaque ne nac to zha ne no xnëz Mgui ne pxeel Dios nu, jwen zie to ga!

²³ jNley golco zdoo to dze co, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been pxozgol

zho grë zha ne pxeel me padzeela biadnee xtiidz me.

²⁴ Sangue grë zha ne rzac grëse ncuaañe rquini zho quianie zho, ib rquiind zho gbig zho lo Dios, jprobsaxe zho, sac lo guidzliu riise gac ncuaañ co guielbley lo zho!

²⁵ jProbsaxe zho, sac niicle ne grëw quianie zho niina, per dzin dze gan zho ganle zha nac gbin; rlozhd gzhidz zho, rlozhd gley zho niina, per dzin dze laa zho gan ganle zha nac guielnë!

²⁶ Padzeela, biaad bla zha ne pquidie rëb zho Dios pxeel zho, bio pxozgol to bleynie zho zho, jprobsaxe to telne yguib to sca gleynie miech to!

²⁷ Golquiaadiaga ganle: Zha ne rlëë lo to, golleynie zho, tel pe nac xliaadz zho golgacnie zho.

²⁸ Zeene rdzibdee zho to, golnab lo Dios gunlay me zho; zeene rsacsigaa zho to, golnab lo Dios yquia zdoo me zho.

²⁹ Tel gneedz zho tib puñet lo to, gzoobd nia to, golsaan zho maase yquiaa zho stiba.

'Zha ne gla xabnal to, golsaan maase ye biaagw güey zho.

³⁰ Zha ne gnabtaa pe cos lo to, goldeeda; tel scasegaa xen zhow, ib gnabde tow lo zho.

³¹ None zaacse gac to lo miech, zeena scagaa zha, zaacse gac zho lo to.

³² Sac gon, tel loxaque zha ne ndzieeldidz to, zha cose rleyne to, jled ncuaañ nroobd ga run to! Haxta grë zha ntseeb run min co.

³³⁻³⁴ Tel loxaque zha ne runsegaa favor lo to, lo zha cosegun run to favor; zeene rungaa to tib pexad, lo zha ne rgobeyse to zguizh lo to, lo zha cose runxtad to, jni lalnu peet nond ncuaañe run to ga! Sac gon haxta grë zha ntseeb run min co.

³⁵ Golguien sca, none gleyne to zha ne rlëë lo to, none gacnie to zho lo xliaadz zho. Zha ne guiaad tib pexad lo to, goldeed ncuaañe rnab zho, ib guiabde to nend lega scase gun to favor co lo zho. Zha ne gun grë min rii, nroob guielnzaac ne gdeed Dios lo zho, ni ga glu zho ganle nli xpëëd me nac zho; sac gon tel me wen me lo grëse miech, niicle zha ne run falt lo mew, niicle zha ne riendgaa gdeed xquizh lo me, rsaand me zho.

³⁶ Ndzinli sca golgac, zigne sca wen Pxoz to lo grëse miech, scaque none wen gac to lo zho.

³⁷ 'B gunde to në gac zdoo to, zeene ran to ncuaañe nonguield ne run stib miech, sac to tozhal gunquizh zhow; zeena scagaa Dios gunscad me to. Golguien none gun to samiech to perdon, zeena scagaa Dios zun me to perdon;

³⁸ sac grëse ncuaañe run miech, mincoque rcaania zho. Grëse ncuaañe gun to, scaania tow, ni haxta ndziibraa mine ycaania to.

Sac ncuaaṅe guṅ to lo samiech to, miṅcoque guṅ Dios to.

³⁹ Blozh sca bnee me, dzigo rëbchaa me:

—Golwi ganle, zig nac zha ne rold lo, ḷniacxe zrieeelo glu zho nēz lo stib zha ne rold lo? Zha ne sca guṅ, tel griel ni tib zho zaatne nac tib ro blē, ib tedsod grip xcuaa zho tsietsobe ga.

⁴⁰ 'Grē zha ne nac mēēdscuel, tsod zha ne racraa lo zha ne noseed zho; haxta csiaalraa zho zhiwseed zho, ni telne tsoxco zhow, zdziṅ zho medid co.

⁴¹ 'ḷLēda ga goṅ tso to lozhd gzee zdoo to dien cho pe ruṅ, ni nenda mazdraa miṅe ruṅ to!

⁴² 'Pe ro to glisqui to miṅe ruṅ stib zho, ni tel mazdraa nac miṅe ruṅ to? 'ḷGolguien sca glude to ncuaaṅe nacdē to! 'ḷGlo goḷtsoxco ndzinli gac to, dzigo lozh ga zac tsienee to zha gacndzinli stib zho!

Nex rlu zha nac tib tib yag

(Mt. 7:17-20, 24-27; 12:34-35)

⁴³ 'Tib tib yag rdeedsew xnexa. Grieeelod yquia nex ncuaaṅ tib lo yag ne rdeed nex wen; grieeelodгаа yquia nex wen tib lo yag me rquia nex ncuaaṅ.

⁴⁴ Tel zha nac nex ne rquia lo yag, gase rlu zha nac yag. Tsod yag güets ne yquia guigw lo; ni tsodгаа lbē zarz ne gdeed uv.

⁴⁵ Scadaa nagon nac miech, zha ne wena, ncuaaṅ wen ruṅ zho, diid wen rnee zho, sac desde zdoo zho no guielwen co; laa zha ne ntseeb, niapse ncuaaṅ ntseeb ruṅ zho, niapse diid dox rnee zho, sac desde zdoo zho no guielntseeb co. Gacxe waa, tel zha rzē xtiidz tib miech, gase rlu zha nac zdoo zho.

⁴⁶ 'Grieeelod lega gnee to, naa rnabey to, sac zha ne rneew ib none guṅ zho miṅe rnabey naa. Nzian zha ne rnee, naa rnabey zho, ni ruṅd zho miṅe rne naa.

⁴⁷ 'Zha ne rquiaadiag miṅe rne naa, ni rioxco zho rban zhow zigne naca,

⁴⁸ rrieequia nac zho ga zig tib zha ndzielguic ne guiet blee xcimient lidz, psilo zhow haxta zaatne bgaa lo quie. Niicle riab guiedox, peet racd lidz zho, nis naal ne raclo rded zaatne zoba ga, per rbixcheda.

⁴⁹ Laa zha ne rquiaadiag xtiidz naa, ni rioxcod zho gban zhow, ziaad gac zho zig tib zha nxen ne güeyzooḅ lidz laglaase lo liu. Znuse bnitlo lidz zho, sac zeene biab guiedox, lo nis naal ne goclo bded zaatne zoba, znuse bixchew, ni stib lēw biaaṅd.

7

Biac tib zha ne rquia dziin tib lo menguiib
(Mt. 8:5-13)

¹ Zeene blozh bnee Jesús lo grē miech co, dzigo laa me wbi ga, bdziṅ me Capernaum.

² Lēētaaque len dze co rzacnē tib zha ne ruṅ dziin lo tib men ne rnabey lo xmenguiib

zha Roma, no guiedz co; nzho rac zho zootle laa zho guetle. Rleyniedox men co zho,

³ zigne bin me laa Jesús bdziṅ, lēēlēd pxeel me bla zha ne nac zha non lo menguiedz Israel, güey zho güeynee zho lo Jesús siguiel Jesús tsiegunḡuiac Jesús zhingundziin me.

⁴ Bdziṅ zho bnaḅ zho lo Jesús siguiel me tsie me.

—Bzhiguiel been xyudar me —rëb zho—. Tib zha wen nac me,

⁵ rleynie me menladz ne, haxta bzaa me tib xyadoo no lad guiedz nu.

⁶ Dzigo zienaḷ Jesús zhits zho. Zhile gdziṅ zho lidz men rnabey co, zeene bdzieelo zho bla zha ne ndzieeldiidz me, zienie tib xtiidz me lo Jesús. Rzē xtiidz me, rëb me:

—Bzhiguiel mazd guiaate luu. Naraa rien naa choot nacd naa, par csodziin naa lo luu guiaad luu haxta ro lidz naa.

⁷ Nligaa rien naa tib zha winse nac naa par gbig naa lo luu, gane niicle biald naa nialdziel naa luu. Nanpaa naa, zaatne ziaad lu i, con tib lan xtiidz luu zac gnabey luu guiac zhingundziin naa.

⁸ Sca rnee naa, sac tel naa no zha ne rnabey lo naa, zeene rnabey zho naa none gon naa miṅe rnee zho; scaque zhaguiib ne rnabey naa, zeene rne naa tib lo zho: "Güey nu", rie zho; zeene rnegaa naa: "Dē nu", riaad zho; zha ne nacгаа zhingundziin naaw, miṅe rnabeytaa naa zho, ruṅ zhow.

⁹ Zeene bin Jesús sca rzē xtiidz men co, bzee zdoo me, ptsire lo me, rëb me lo grē zha ne zienaḷ zhits me:

—Golwi ganle pa lotaa rnalo men qui Dios. Lo grē zha Israel gon, ni tib zho gard gan naa squitaa dib zdoo gnalo Dios.

¹⁰ Grē zha ne güey mandad ga, zeene bdziṅ zho goṅ zho laa ngundziin co biacle.

Rrieeban xpēēd tib wnaa viud

¹¹ Bded ga, güey Jesús tib guiedz lē Nain grē xpēēdscuel me, miech guizhiu ne zienaḷ zhits zho.

¹² Zeene bdziṅ zho gax ro guiedz co, lēētaque bdzieelo zho tib dzoon miech ziequeets xpēēd tib wnaa viud; lēēse mēēd ga lo wnaa co.

¹³ Goṅ Jesús zha rac me, pquia zdoo Jesús me, wbig Jesús rëb Jesús lo me:

—jGoondraa luu!

¹⁴ Dzigo bzhen Jesús yag ne zhoob ngutoḅ co. Zeene goṅ gza zha ne nxobyan yag cow, hor co bzodze zho; dzigo bnee me lo mēēd co rëb me:

—Xin, iguche i!

¹⁵ Horcogazha brieeban niib co, bzobli niib, laa niib psilo bnee.

Rley xniaa niib, pcaania me niib.

¹⁶ Zeene gon grē miech co sca brieaban mēed co, lala rdzieb zho, lala rdeed zho xquizh lo Dios, rnee zho:

—jTib men nroob ne gon ziadteed xtiidz Dios i, ziaad lo ne! jLaa ne bdziañ niina ganle, laa Dios ziaadgan ne, ziadbee me ne lo xquielnē ne!

¹⁷ Gdipse nēz Judé, ni grēraa guiedz ne ndxie dib gax ga, gocnan miech milagr nroob ne been Jesús ga.

*Zha ne pxeel Juan Bautist
(Mt. 11:2-19)*

¹⁸ Bin Juan Bautist grētaa milagr ne run Jesús ga, sac rie xpēedsuel Juan riezodiidz zhow lo Juan. Dzigo pxeel Juan chop zho,

¹⁹ zienabdiidz lo Jesús, dien pe me nac Men ne nole diidz ga cxeel Dios, te dzigoraa gdziñ men co ye.

²⁰ Bdziñ zho lo Jesús, wbig zho lo me, rēb zho:

—Laa Juan pxeel no ziaadnabdiidz no lo luu, dien pe lēēle Men ne nacle diidz ga cxeel Dios i nac luu, te naraa guiaad me ye.

²¹ Lēētaaque ndal miech ndxie lo me ga, quiayunguiac me grē men rzacnē. Nzian zho, tel pe guielguiidztaa rzac zho, no zho nosacsi mendox, no zho rold lo, grēse zho runguiac me zho.

²² Dzigo rēbchaa me lo zha ne pxeel Juan ga:

—Grēse mine bin to rne naa, grēgaa ncuaañe gon to quiayun naa, goltsie golzodiidza lo Juan. Ran to ganle, grē zha ne rold lo, zha ne nē ni, zha ne rlan guiedz lepr, zha ne rcuat, grēse zho laa zho riac, haxta grē mengut, rrieaban. Grēsew golzodiidza lo me, golguiab lo me ganle blactaa zha ne rquiin dib lo Dios, laa zho noquiaadiag xtiidz Dios;

²³ ni golguiab lo me: dichos zha ne tiblque rililadz cho nac naa.

²⁴ Zeene laa xpēedsuel Juan zey, dzigo psilo me bzeet me Juan lo grē miech guizhiu ne ndxie ga, rēb me lo zho:

—Zeene dien güey to dan ngan ne bio Juan ga, ¿zha güeynie guic to nian to me? ¿Pe rēb to rlu me zig tib goobgui ne nēzrii nēzrec rey me,

²⁵ te rēb to ye masaque grē lar niazh ne racw zha non nacw me? Per nanle to ganle, zha ne scataa racwxab, len grē yu ne rzob zha rnabey, ga rio zho.

²⁶ Nligaa cho güeynie guic to nac me, ¿te rēb to ye tib men ne noteed xtiidz Dios?

‘Gacnan to ganle, tib men ne noteed xtiidz Dios gon nac me, ni me nac tib zha ne mazdraa nroob lo grē zha ne ziyun dziin co.

²⁷ Me ga raquiet lo Xtiidz Dios, zaatne znu rnee: “Sxel naa tib zha ne tednerga lo luu, zha co gzhixcuaa nēz ne ted luu.”

²⁸ Ne nligaa lo grēse mgui ne zieded lo guidzliu, gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

²⁹ Len dze ne nochoobnis Juan miech ga, ndal zha ne bin zhiwseed me, haxta grē zha ne rtop dimi ne razh lo zha Roma, bien zho nonguiela gon zho mine rnabey Dios, güey zho pchoobnis Juan zho.

³⁰ Sangue grē maistr ley ni grē zha farisé, pe liaadz zho nion zho mine rnabey Dios, ib güeyd zho nchoobnis Juan zho.

³¹ Blozhse sca bnee me, rēbchaa me:

—Nac grē miech rii, ib riend zho pepaa racladz zho. ¿Cho ganle run zigne run zho?

³² Lēē zho run mine run grē mēēdlaa ne rio wguic dib ro nēz. Niicle roolxcompañer win di nguiel, rieved win; niicle roolga zho di ngan, round win.

³³ Sac gon, ziaad Juan, ran zho rowd me grē ncuaañe nac xquielwagw zho, niicle vina ried mew; dzigo rnee zho mendox nacnie me.

³⁴ Blozh ga, ziaad Mgui ne pxeel Dios, ran zho row me, rie me, laa zho rneeque lega rowcho me, lega riecho me vin; ib riend me cho rtsieelsa me, haxta grē zha yozh ne rtop dimi ne razh lo zha Roma, haxta grē zha ngoopdol rzēnie me.

³⁵ Sca rnee zho, sangue zha ne rgaa guielbiini ne rdeed Dios, riend zho cho nac zha ne ziaadgun xtsiñ me.

Güey Jesús lidz tib zha farisé

³⁶ Tib dze bredz tib zha farisé Jesús güey me tib wagw lidz zho. Bdziñ me, bded me bzob me lo mez.

³⁷ Lad guiedz co no tib wnaa ro nēz, bin me laa Jesús bdziñ lidz zha farisé co, dzigo bi me tib bot nceit nex, tiblo nceit niazha, brie me zie me nēz lidz zha co.

³⁸ Bdziñ me ga, wbig me zaatne zob Jesús, psilo me roon me. Zigse roon me, lēēque nis ne riet lo me ga, bdiib me ni Jesús, ni pcutidz mew con guits guic me. Dzigo ptsielro mew, blozhse ga blee me nceit co bdēeb mew.

³⁹ Zeene gon zha farisé co sca been wnaa co, bza zdoo zho rēb zho: “Telne niaca mine nli men ne ziadteed xtiidz Dios nac men qui, nien me ganle tib wnaa ngoopdol i, ndeete me diidz squitaa nguēēbnia zho zhits ni me.”

⁴⁰⁻⁴¹ Dzigo bnee Jesús lo zha farisé co yquiaadiag zho chop lan xtiidz me, rēb me:

—Pquiaadiaga ganle Simón: Chop mgui name, quia zho guielqui lo men ne blediñ dimi lo zho. Tib zho zēeb gaay mil pes plat, stib zho zēeb gaay gayoow.

⁴² Gonse men co ni tib zho rdzielz zha quizh zho dimi co, dzigo mazd pquia zdoo me zho, beenquizhd me zho xquielqui zho.

Bnë nasca dien, lo grop zha co, ¿cho mazdraa sac zdoo miñe been men co?

⁴³ Dzigo pquiab Simón, rëb Simón:

—Par naa, zha ne nroobraa xquielqui ga, zha co sacraa zdoo miñe been me.

—Scaw gon —rëb Jesús—.

⁴⁴ ¡Miñcopaa nagon squi rac wnaa prob qui! Gon ganle zeene bzëeb naa lidz luu, bneedzd luu nis niar ni naa; mazd me gon bdiib me ni naa, maase niicle con nis ne biin me bdiib mew, ni haxta pcuiidz mew con guits guic me.

⁴⁵ Zeene blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me nu tibaque quiet-sieelro me ni naa.

⁴⁶ Nac costumbr none nchoob luu nceit guic naa, per been luuw; mazd mele gon bbaad biadtëeb me nceit nex rii zhits ni naa.

⁴⁷ Laa me noyun min rii, sacne nlipaa rzac zdoo me beñ naa me perdon grëtaa dolldox ne nzëeb me. Zigne rneeque ne ga, tel zha ne zhits xtoła, zhi rzac zdoo zho zeene laa zho rac perdon.

⁴⁸ Dzigo bnee Jesús lo wnaa co, rëb Jesús peet tsienied guic me, laa Jesús beenle perdon grëse xtoł me.

⁴⁹ Zha ne zobgza Jesús lo mezh ga, zeene gon zho sca rëb Jesús psilo zho rnaabdiidzla zho, rnee zho:

—¿Cho dzigo rzac mgui qui nac me? ¿Zha nacne guiab me laa me been perdon xtoł wnaa qui?

⁵⁰ Horco biire Jesús bnee me lo wnaa co, rëb me:

—Laa naa psilaa luu lo xtoł luu, sac dib zdoo luu bnalo luu naa. Bzë naa, peet tsieniedraa guic luu.

8

Güeyseed Jesús miech dipse Galilé

¹ Bded ga, brieë Jesús grë xpëedscuel me güey me grëraa guiedz ne ndxie nëz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

²⁻³ Ye blalaa men wnaa güeynal zhits zho, tel pe ncuuaane quianie grë men wnaa co, rdeed zhow run zho xyudar me; sac rzac zdoo zho beñguiac me zho. No zho beñguiac me lo guielguidz, nogaa zho beñcxoon me menox ne nosacsi zho. Ga güeynal tib wnaa lë Mari Magdal (lëe wnaa co beñcxoon Jesús gadz menox ne nosacsi me), ga güeynal stib men lë Zhuan (lëe tsieel Chuz ga, men ne quianap grë lo xtsiin rey Herod) ni stib men lë Susan.

Nac Xtiidz Dios zig zhoxtil

(Mt. 13:1-23; Mr. 4:1-20)

⁴ Tib dzew, miech guizhiu ne pcaalsa lo Jesús; nzian guiedz ne brieë zho bdziñ zho

lo me. Laa me noseed zho, zeene bzodiidz me tib cuent rii lo zho, rëb me:

⁵ —Tib mgui name, brieë zho güey zho gon zhoxtil. Zeene laa zho quialaal zho co liu, now bliaal gax ro nëz, now bliaal lad quie, nogaaw bliaal len yag guiets. Miñe bliaal ro nëz ga, zha ne bded bzëni zhow, blozh ga güeyaque grë mguin dow maw.

⁶ Miñe bliaal zaatne nac lad quie, blana per znuse bidza sac guieñd gop ga.

⁷ Miñe bliaal len yag guiets co, zigne blana blanaque stib dzoon yag guiets, znuse bnitlo yag guietsa.

⁸ Sanguë miñe bliaal zaatne nac niapse lo liu, blana, brooba, ndzon goca, tib tib zhoz ne biab liu ga now goc haxta tib gayoo zhoz.

Blozhse bzodiidz me cuent co, nguiedz bnee me lo zho rëb me:

—¡Zha ne racladz guieñ miñe rne naa, yquiaadiag zhow!

⁹ Dzigo wbig grë zha ne nac xpëedscuel me, bnaabdiidz zho lo me dien zha nac cuent co.

¹⁰ Rëbchaa me lo zho:

—Tel to, Dioszhal rlu lo to ganle zha rnabey me, niicle ncuuaane mazdraa nguetsa; sañgue grëraa zha ne squi gard gbig lo me, niapse con cuent rzodiidz naaw lo zho, parne guieñ zhow; per niicle scaw, ib rzoobdiag zhow, ib rioguidz zho zha naca.

¹¹ Znu gon nac cuent co: Zhoxtil co nac Xtiidz Dios.

¹² Ro nëz ne sca bliaal zhoz co, ga rlu ganle zha rzac zha ne rquiaadiag Xtiidz Dios, per znusaque rdziñ menox rquuil ma zho gliladz zhow, zeena laad zho lo dol.

¹³ Lad quie ne bliaal spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdoo zho. Nli riladz zhow palal dze, per zeene ran zho zha run miech zho, zha rnee miech lo zho, rsaanga zhow.

¹⁴ Nogaa zho nac zig len yag guiets co. Rquiaadiag zho Xtiidz Dios, per laa ne tsoniew guic zho, lel rsilo zho grë zhgab ne dien zha gapchen cho, dien zha gdeedgux xcuerp zho lo guidzliu rii, min co rionie guic zho; pa së zho gban zigne rnabey Dios.

¹⁵ Laa lo liu naal co, ga rlu ganle zha rzac zha ne nguudz zdoo. Zeene rquiaadiag zho Xtiidz Dios, dib zdoo zho rcaania zhow, dib zdoo zho riladz zhow. Grëse ncuuaane run zho, ndzinli rreeequiaw; sac tiblique rac zho.

Xcuent biini

(Mt. 12:46-50; Mr. 3:31-35; 4:21-25)

¹⁶ Blozh ga, bnee me lo grë miech ne ndxie ga, rëb me lo zho:

—Tsod zha ne yquiaagui tib biini, lozh ga ctoos zho pe cos low, gzolanga zhow tib zhan lon. Sac biini ne rquia, glaa rzoba par

gziiniw leŋ yu, zeena guiab biini lo grëse zha ne sëëb leŋ yu.

¹⁷ Scaque nagon, grë ncuaaŋe rac ngueets, grë ncuaaŋe rnee miech zhliaan, none xoobneŋa.

¹⁸ Wen wen goŋquiaadiag miŋe rne naa, ni goŋtsoxcow. Sac zha ne tsoxcow, zeedraa Dios guielbiini lo zho; sangue zha ne tsoxcoda, haxta teŋ palalse guielbiini ne rzac zho quianie zho, stiche mew.

¹⁹ Dze co, scaque noseed me miech, zeene bdziŋ xniaa me ni zha bets me ziegan zho me. Per brielod ndziŋ zho haxta lo me, sac miech guizhiu ne ndxie lo me ga.

²⁰ Dzigo rëb tib zho lo me:

—Laa xniaa luu goŋ, ni zha bets luu bdziŋ ley ziaadguib zho luu.

²¹ Pquiab me rëb me:

—¿Xnia naa ye, bets naa ye? Grëse zha ne goŋ rquiaadiag Xtiiidz Dios ni rioxco zho mban zhow, lëë zha co nac xniaa naa, zha co nac bets naa, zha co nac bzian naa.

Pcuëëz Jesús tib medox

(Mt. 8:23-27; Mr. 4:35-41)

²² Tib bdze dze, bzëëbnie Jesús xpëëdsuel me tib leŋ barcw, rëb me lo zho, tedquia zho stib nëz ro nis co.

²³ Laa zho zie lo nis co zeene laa me gootgues. Tibaque zeene psilo brieë tib medox, masaque riasoli lo nis co, zootle laa barcw ne no zho ga yguiitsle leŋ nis.

²⁴ Zeene goŋ zho scataa ntseeb rac lo nis co, lëëlëd güey zho güeycuuan zho me.

—¡Maestro! —rëb zho—. ¡Blee mcaalŋo luu ganŋe, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co.

²⁵ Dzigo rëbchaa me lo zho:

—¿Pe nacne rdzieb to? ¿Niacxe rililadzde to Dios dib zdo to?

Ne nligaa rdzieb zho, ni lala rzee zdo zho, rnabdiidzlsa zho rnee zho:

—¿Bay cho nac me? ¿Zha nacne haxta me, haxta nis ron xtiidz me?

Men Gadar ne nosacsi mendox

(Mt. 8:28-34; Mr. 5:1-20)

²⁶ Bdziŋ zho stib nëz ro nis co, ga nac xtan zha Gadar. Zo zho ga, nëz dan squi riaan xtan zha Galilé.

²⁷ Laa Jesús bietdze leŋ barcw, zeene laa tib mgui ne no nëz co bdziŋ lo me. Mban rlu mgui co nosacsi mendox me, niicle xab me nacwdraa me; ib rbëzd me lidz me, niapse grë leŋ xpaan ngutoo rio me.

²⁸ Zeene goŋ me Jesús, masaque roptsie me bdziŋ me pquitsgzhib me lo Jesús, zëëb tsi me rnee me:

—¡Psaan naa Jesús! Nanpaa naa goŋ Xpëëd Dios nroob ne zob gbaa nac luu. ¡Bzhiguiel csacsid luu naa!

²⁹ Per mendox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew; dzigo rienie mendox co me rquianzé me grë dan ngan, zaatne choot miech guieŋd.

³⁰ Dzigo bnabdiidz Jesús lo ma dieŋ cho lë ma. Pquiab ma rëb ma:

—Legion lë no.

Sca rëb ma sac nzian nac ma no ma zdoomgui co.

³¹ Ni bnab ma lo Jesús gzonëzd me ma lo ncowdoo ne noraa ma ne nacgrë ma.

³² Gaxaque ga ndxie tib dzoon nguts notop lag, bnab ma gdeed me diidzbeyle lose grë nguts co gdziŋ ma. Dzigo bdeed me diidz.

³³ Horco laa grë mendox co psaan mgui co, güeyseëb ma zdoom grë nguts co. Psilo grë nguts co rquiaa ma corr, güeypix ma tib ro yeedox ne quia ro nis co, bliaal ma haxta lo nis; grëse ma gut.

³⁴ Grë zha ne quianap nguts co, bzhoon zho, rias zho güeyzodiidz zhow lad guiedz, ni grëraa yu ne zob gax ga.

³⁵ Nacne brieë grë miech co ziewi zho. Zeene bdziŋ zho, per nli bdzieb zho goŋ zha laa meŋ co zob gax lo Jesús, laa me nacwxable, rlu niinile nac guic me.

³⁶ Psilo grë zha ne goŋ zha biac me rzodiidz zhow lo grë zha ne bdziŋ ga.

³⁷ Mazdraa bdzieb grë miech co bin zhow, dzigo mazd bnab zho lo Jesús siguiel me ghi me xtan zho.

³⁸ Zeene laa Jesús zie sëëb me leŋ barcw par ghi me ga, dzigo wbig mgui co rnab me lo Jesús siguiel Jesús tsienal me zhits Jesús; per bzhiguiel Jesús nienal me, rëb Jesús lo me:

³⁹ —¡Biaan! Güey, güeyzodiidz lo grë menlidz luu ganŋe zha nactaa milagr ne been Dios beŋnguiac me luu.

Dzigo wbiere meŋ co. Güey me lad guiedz, grëse lo miech güeyzodiidz me zha nactaa guielnzaac ne been Jesús ga, beŋnguiac Jesús me.

Brieëban tib xpëëdwana tib men lë Jair

(Mt. 9:18-26; Mr. 5:21-43)

⁴⁰ Zeene laa Jesús biire bdziŋ stib nëz ro nis co, miech guizhiu ne quiambëz me ga, rley zho goŋ zho laa me bdziŋ.

⁴¹ Loxaque bdziŋ me, laa tib men ne rnabey yadoo lë Jair wbigle pquitsgzhib lo me. Rnab Jair siguiel me tsienal me lidz Jair tsiegunguac me tib xpëëdwana win Jair.

⁴² Nzoo rac mëëd co, tib mëëd tsiipchop iza, ni lëëse mëëd ga lo me.

Dzigo laa Jesús zie nëz lidz meŋ co. Miech guizhiu ne zienal zhits me, haxta rtaagw zho me.

9

⁴³ Lad grë miech co zianał tib wnaa rza-
cnë, gogle tsiipchop iz rlan me tib guielguidz,
rzac me zigne rzac grë men wnaa gzob mëë;
tibaque rlan mew ib rbëzda. Grële ncuaañe
rap me bloozh me lo grë men ne ruñ rmed,
per ni tib zho ruñguaciad me.

⁴⁴ Laa me no lad co, tibaque wbig gax me
nëz zhits Jesús, bzhen me ni lar ne mbix
Jesús; hor cogazha laa me biac.

⁴⁵ Biën Jesús sca bzhen wnaa co lad xab
me, dzigo rëbchaa me:

—¿Cho ga bzhen lad xab naa?

Grëse zho rnee led zhada. Dzigo rëbchaa
Pedr lo me:

—Maestro, wi ganle zha ndaagwtaa ziaad
luu lad grë miech rii, haxta rcheep zho luu,
¿zha nañ luu choot xend lad xab luu?

⁴⁶ —Per no cho bzhen lad xab naa —rnee
me—, sac bienpaa naa beënguaciad naa zho.

⁴⁷ Zeëne gon wnaa co bien Jesús sca bzhen
me lad xab me, rdzieb me laa me wbig
pquitsgzhib me lo Jesús. Squi ndxie grë
miech co, bzodiidz me zha nacne sca been
me, ni zha zigne bzhen me lad xab Jesús laa
me biac.

⁴⁸ Dzigo rëbchaa Jesús lo me:

—Xin, laa luu biac sacne dib zdoe luu
bnalo luu naa. Bzë na, peet tsieniedraa guic
luu.

⁴⁹ Laa Jesús bii quianeque lo wnaa co,
zeëne laa tib zha ne nac mandad ziaad nëz
lidz Jair bdziñ, rëb zho lo Jair:

—Csodziindraa luu lo men qui, laa xpëed
luu gutle.

⁵⁰ Zeëne gon Jesús sca rëb zha co, rëbchaa
me lo Jair:

—Peet tsienied guic luu. Dib zdoe luu
bnalo Dios, zeëna peet gacd xpëed luu.

⁵¹ Bdziñ zho lidz Jair, psaandraa Jesús nał
grë miech co zhits me ndziñ zho zaatne nix
mëed co. Loxaque Pedr, Jacob, ni Juan, pxoz
win ni xniaa win bzëëbnie me leñ yu ne nix
win.

⁵² Grë miech ne ndxie ga, roon zho no zho
xquielnë win; dzigo rëbchaa Jesús lo zho:

—Goonde to; sac gon nixguiesse mëedwin
rii, gute win.

⁵³ Psilo zho leł rzhidznie zho me, sac
nanpaa zho gutle win.

⁵⁴ Dzigo wbig me, bzhen me nia win,
nguiedz bnee me lo win, rëb me:

—¡Guche i na, ndzoop yeen!

⁵⁵ Zigne sca bnee me, laa mëed co brie-
ban, laa win guche ga; dzigo bnabey me
bguiaan zho win.

⁵⁶ Zigtaa pxoz wina, zigtaa xniaa wina,
per nli rley me. Dzigo pso Jesús diidz lo me,
choot lo gzodiidz me zha brieëban win.

*Pxeel Jesús xpëedscuel me güeyseed zho
miech*

(Mt. 10:5-15; 14:1-12; Mr. 6:7-29)

¹⁻² Tib dze bredz Jesús gza tsiipchop
xpëedscuel me, pxeel me zho tsienee zho lo
miech gacnañ zho zha racladz Dios gban
zho; bdeed me poder lo zho guñcxoon zho
grë men dōx ne nosacsi miech, ni guñguaci
zho grë men rzacnë.

³ —Goltsie —rëb me lo zho—. Per ib güeyde
to ncuaañe yquini to nëz. Zig nac dimi, zig
nac ncuaañe gow to, pe bziuid, pe baxton-
gaa, güeyde tow; xab tow, mine nacwse to
mincoze goltsienie.

⁴ Guiedz ne gdziñ to, zha ne gneedz za-
atne cuëz to, lidz zha co golcuëz, haxta gdziñ
dze ne gbi to guiedz co.

⁵ Per telne gdziñ to tib guiedz, nëd miech
yquiaadiag zho mine zienee to, dzigo gollit
grë yudie co ni to, golriiegazh ga, zeëna guien
zho ganle dol ga been zho lo Dios, nëd zho
ycaania zho xtiidz me.

⁶ Dzigo laa zho brieë, laa zho zie. Grëse
guiedz ne ndxie dib gax ga, güey zho güeynee
zho Xtiidz Dios lo miech, ni beënguaci zho
grë men rzacnë.

⁷ Bin rey Herod rzeet zho Jesús, sac tel pa
lotaaw zëëb diidz grëtaa milagr ne ruñ me.
Grë miech co, no zho rzac Juan Bautist ga
brieëban, lëë me ga nac Jesús;

⁸ nogaa zho rnee bod Líw, men ne biad-
teed xtiidz Dios padzeela, me ziaad stib;
zzhisgaa zho rnee no cho stib men biadteed
xtiidz Dios padzeelaw, sinque brieëban me
gane ziaad me stib.

⁹ Zeëne ron Herod rnee grë miech co lëë
Juan ga, rio me zhgab, rnee me:

—¿Bay cho nac men co? Per gacda Juan;
naazhal name bnabey pchug zho yan Juan.
Racladz Herod tebaa zha gan me Jesús.

Bguiaan Jesús gaay mil miech

(Mt. 14:13-21; Mr. 6:30-44; Jn. 6:1-14)

¹⁰ Goc bla dzew, laa grë zha ne pxeel Jesús
ga wbiere bdziñ lo me. Blozhse bzodiidz zho
lo me grëse tel zha güey zho, dzigo güeynie
me zho tib lugar riaan gax guiedz Betsaid.

¹¹ Zeëne bin grë miech co laa me brieë,
dzigo brieënal zho me, bdziñ zho lo me ga.
Zeëne gon me zho, rley me pcaania me zho,
bnee me lo zho zha racladz Dios gban zho,
ni beënguaci me grë zha ne rzacnë.

¹² Laa dze rdzelew, wbig gza tsiipchop
xpëedscuel me rëb zho lo me, mazd gnee me
lo grë miech co gbi zho ga; zeëna guiob tsie
zho grë guiedz las, grë yu ne riaan gax ga,
yguib zho dien pa cuëz zho, yguib zho dien
pe gow zho; sac choot miech nod ga.

¹³ Dzigo rëbchaa me lo zho:

—To goldeed ncuaañe gow zho.

Pquiab zho rëb zho:

—Gaayaque guietxtil ni chop mel ziaadnie no nu, ipe mase ncuuan co lo grëtaa miech qui! Niicle niaca mine gziuu ncuuaane gow zho, pe zhidaa dimi yquuin, çpa guioxi now?

¹⁴⁻¹⁵ Nligaa miech tafa, zig gaay mil rgaa loxaque zha bguise. Dzigo bnabey me zho güey zho, güeynee zho lo grë miech co sob zho, cue zho grol gayooga, grol gayooga zho tib lugar.

¹⁶ Laa grë miech co bzob, dzigo bzhen Jesús gza gaay guietxtil co ni grop mel co, blis lo me nëz gbaa, bdeed me xquizh lo Dios. Blozhse ga, beengrol me gza guietxtil co, mel co ne, dzigo zigse rdeed mew lo xpëedsuel me, scase scase rguiz zhow lo grë miech co.

¹⁷ Grëse zho dow haxta zaatne bieltaa zdoos zho; ni zeene blozh dow zho, biodzë tsiipchop chicuid bio grë mine biaan.

Bnee Pedr cho nac Jesús
(Mt. 16:13-19; Mr. 8:27-30)

¹⁸ Tib dze biche Jesús lo miech palal, güey me tib zaatne güeyzodiidnie me Dios; loxaque xpëedsuelse me güeynal zhits me. Ga bnabdiidz me lo zho rëb me:

—ÇCho dien ron to rnee miech nac naa?

¹⁹ Pquiab zho rëb zho:

—No zho rnee Juan Bautista, nogaa zho rnee Lîw (men ne biadteed Xtiidz Dios padzeela); nogaa grol zho rnee no cho stib men ne biadteed Xtiidz Dios padzeelaw, sinque brieban me gane ziaad me stib.

²⁰ —ÇTo waa? —rëb me lo zho—. ÇCho rzac to nac naa?

Horco pquiab Pedr, rëb Pedr lo me:

—jLuu nac Men ne zëëble diidz ga cxeel Dios!

²¹ Dzigo pso me diidz lo zho choot lo gneed zhow.

Bzeet Jesús zha gun miech me
(Mt. 16:21-28; Mr. 8:31-9:1)

²² Tib vuelt bzeet Jesús lo grë xpëedsuel me zha csacsi miech me. Rëb me, nroob grë ncuuaane cteed zho me; grë zha non lo menguedz, grë pxoz rnabey, grë zha ne rseed miech ley, ible tsidil zho me, ni haxta zut zho me; per zeene gac tson ngbidz gut me laa me grieban.

²³ Ni rëb me lo grë miech ne ndxie lo me ga:

—Zha ne racladz sëëb xnëz naa, none cueeladz zho zho, none lëb zho gzataa dze guiaadnal zho mine rnabey naa, niicle tel min co yquiaaqui csacsi miech zho. Nodne yquiaa zdoos zho xquielmban zho,

²⁴ sac zha ne yquiaa zdoos xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ne gdziind dze lozh.

²⁵ Zha ne zienie guic loxaque gapchen, çpa dien yquuina lo zho, tel por lëëw rsacsi zho zho, tel lëëw yquiaaqui guey zho gabil?

²⁶ Naa ne nac naa Mgui ne pxeel Dios, zha ne ctoladz guiab zho laa zho no xnëz naa, ctoladzniegaa zho xtudz naa; scaque naa stoladznie naa zho gal dze ne laa naa guial stib. Dze ne guialnie naa grë xanjil Pxoz naa, guiallu naa guielndzon ne rap me.

²⁷ Blozhse sca bnee me, rëbchaa me lo grë miech co:

—Ni gni naa lo to ganle, nzian grë zha ne ndxie nu niina, ib tedsod bii zan zho zeene laa Dios glu zha rnabey me.

Bdzëëlo Jesús
(Mt. 17:1-8; Mr. 9:2-8)

²⁸ Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidznie me Dios.

²⁹ Laa me nozodiidznie Dios, zeene laa me bdzëëlo. Masaque biinidoo ne rrieed lo me, xab mew, nquitsbie rnaw, haxta rquiabniw.

³⁰⁻³¹ Tibaque brieequia Lí grop Moisés bdiin lo me ga, psilo zho nozodiidznie zho me grë guielne ne cteed miech me Jerusalén, zeene laa me gbi lo guidzliu. Masaque biinidoo ne riab, ncuuaane gzee zdoos.

³² Laa zha ne zienal zhits me, rcow zho mcaal zob zho ga; per zeene biab biini nroob co, hor co bzhal lo zho gon zho zha rlu me gza me Lí ni Moisés.

³³ Laa grop men co ziebiche lo Jesús, zeene rëb Pedr lo me:

—Maestro, jwena gon tebaa gbiaaz ne nu! Na maase gzaa no tson yu zag xiid win, tiba cuëz luu, tiba cuëz Moisés, stiba cuëz Lí.

Per niicle Pedr riendaque dien pe nacne sca rnee Pedr.

³⁴ Laa Pedr bii quianeeque, zeene bre tib xcow zaatne zo zho ga; per nli bdzieb zho gon zho laa zho biaan len xcow co.

³⁵ Dzigo bin zho zëëb tib tsi men co lo xcow co, rnee me:

—Lëë Xpëed naa i gon, rleynie naa me. Golgon mine rnee me.

³⁶ Zeene blozh bin zho tsi men co, gon zho loxaque Jesússe zo ga.

Grëse mine gon zho ga, ib choot lo bneed zhow len dze co.

Biac tib mëed ne nosacsi mendox
(Mt. 17:14-21; Mr. 9:14-29)

³⁷ Biini liu co, laa Jesús wbi guic gui co gza me zha ne güeynie me ga. Miech guizhiu ne güeydzieelo me.

³⁸ Lad grë miech co briee tib mgui, wbig me lo Jesús rëb me:

—Maestro, bzhiiguiel bui ganle zha rac xpëed naa. Tibaque mëëdbgui rii nac mëëd lo naa,

³⁹ ni na laa men^odox nosacsi win. Zeene rdziñ ma rcoptsiedan ma win, rron^o ma win liu, ga nix win run^ocxidz ma win, ni masaque rdzib mtsiin ro win; nen rsaan ma win.

⁴⁰ Blansonie naa win nu, bna^ob naa lo xpëëdsuel luu guñ^ocxoon^o zho men^odox co, per brielod zho.

⁴¹ Dzigo rëb^ochaa Jesús:

—jPe nac squitaa miech ntsee^ob nac to, ib nëde to gnalo to Dios! ¿Pa lal dze ne so naa gne naa lo to? jNcu^oaa^one cxe^ocxwdraa naa lo to squitaa nac to! Dënie xpëëd luu nu —rëb me lo men^o co.

⁴² Zeene laa mëëd co ziegax lo Jesús, hor co bron^o men^odox co win liu, nix win ga masaque rzhidz win. Dzigo goctox Jesús lo ma, ben^ocxoon^o me ma. Horcogazh biac mëëd co, laa me bdeed win lo pxoz win.

⁴³ Grë miech ne ndxie ga, per nli rzee zdoo zho gon^o zho scataa nroob poder ne rap Dios. Grëse miech ne ran^o grë^otaa milagr ne run^o Jesús, rzee zdoo zho.

*Bzeet Jesús stib laa miech csacsi me
(Mt. 17:22-23; Mr. 9:30-32)*

⁴⁴ Biire Jesús bzeet me lo xpëëdsuel me zha guñ miech me, rëb me:

—Wen wen gol^oquiaadiag mine gni naa lo to nu ganle. Naa gon^o ne nac naa Mgui ne pxeel Dios, ible ziolo zho naa ladznia miech.

⁴⁵ Per ib riend zho zha nacne sca rnee me, sac gard gdeed Dios diidz^obey hor co guien^o zho zha naca; niicle par gnabdiidz^ogaa zho, rdzieb zho gnabdiidz zhow lo me.

*¿Cho nonraa?
(Mt. 18:1-5; Mr. 9:33-40)*

⁴⁶ Horco psilo zho noneelsa zho dien^o cho tib zho gac zha non.

⁴⁷ Bien Jesús sca no zho, dzigo bnee me lo zho, bredz me tib mëëd^ogui win,

⁴⁸ rëb me:

—Grë zha ne no xnëz naa, zha ne guñ^ocas tib mëëdwin zig mëëd rii, gleynie zho win, rrieequia naa ga rleynie zho. Ni zha ne gleynie naa, rrieequia men^o ne pxeelle naa ga rleynie zho. Telne racladz to gacnañ to dien^o cho nac zha non, gacnañ to ganle, zha ne tsoxco gac zig tib ngundziin lo samiech, zha co nac zha non.

⁴⁹ Blozh ga, rëb^ochaa Juan lo me:

—Maestro, bdzion no tib zha co gon^o bzeet zho lë luu zeene ben^ocxoon^o zho men^odox, nacne nli blisqui now lo zho, sac led yed zho nacgrë ne.

⁵⁰ Dzigo pquiab me, rëb me:

—jGuñ^oscade to! Sac gon^o zha ne racnie ne, grielod lëëque zha glëënie ne.

*Ndox Jesús lo Juan grop Jacob
(Mt. 8:19-22)*

⁵¹ Len^o dze ne ziaadyob gbi Jesús lo guidzliu rii, len^o dze co bio me nëz laa me zie nëz

Jerusalén. Tiblique bio guic me, ib pquiab zdoo me, laa me zie.

⁵² Zeene bdziñ me xtan Samar, pxeel me bla zho bdedner zie zho tib guiedz win ne ndxie nëz co, par dien^o pa lo gdeed miech co cuëz me.

⁵³ Bdziñ zho guiedz co, choot bzhiguiel^od ndeed zaatne mbëz me; sac bien zho nëz Jerusalén tie me. Nac zha Samar, rlëënie zho zha Israel.

⁵⁴ Zeene bin Jacoba grop Jacob Juan, blëë guic zho, rëb^ochaa zho lo me:

—Maestro, jmazd tiba^oque gotsaa gnab ne gliaal^o gui lad grë miech rii, zeena nitlogazh zho!

⁵⁵ Bie^ocwaque me, goctox me lo zho rëb me:

—Riende to lëë zhapaa nac men^o ne nacnie to.

⁵⁶ Gol^oguien ganle, naa ne nac naa Mgui ne pxeel Dios, ziald naa par gnitlo naa miech, sinque laa naa zial^o csilaa naa zho lo dol.

Ga brie^oe zho güey zho stib guiedz.

⁵⁷ Nëz zie zho, zeene wbig tib mgui co rëb me lo Jesús, laa me racladz tsienal^o me zhits Jesús, tel^o pa lotaa nac zaatne tie Jesús.

⁵⁸ Dzigo pquiab Jesús rëb Jesús lo me:

—Gocnaña ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

⁵⁹ Laa zha ne bredz me tsienal^o zhits me, pquiab zho rëb zho:

—Sënal^o naa zhits luu, per bzhiguiel^o bneedz diidz^obey cuëz naa, gangazh naa tsoliu pxoz naa.

⁶⁰ Rëb^ochaa me lo zho:

—Nzian grë zha gut no, psaan tso^ow tsie samengut zho tsiequeets zho. Sangue luu zhits naa dënal^o, zeena tsie luu tsienee luu lo miech, gacnañ zho zha racladz Dios gban zho.

⁶¹ Pquiab stib zho rëb lo me:

—Maase sënal^o naa zhits luu, per bneedz diidz^o ganiegazh naa diidz lo grë men^olidz naa.

⁶² Dzigo rëb^ochaa me:

—Zha ne xen^o nia rad ni csilo zho gwi zho nëz zhits zho, niacxe zriee^olo ygan zho ngon. Scaque zha ne sëëb xnëz Dios, grielod sëëb zho telne mazdraa rleynie zho grë ncu^oaan lo guidzliu rii.

10

*Güey tsongaltsii zha ne güeynee Xtiidz Dios
(Mt. 11:20-24)*

¹ Tib dze, ble Jesús stsongaltsii zha ne rquiaadiagle zhiwseed me, bnabey me tedner zho lo me tsie zho grë guiedz ne no ted me, pxeel me zho chopga chopga zho.

² —Golnab lo Dios —rëb me—, cxeelraa me zha ne gun xtsiin me. Sac ne nligaa ndaldoo miech ne quiambëz yquiaadiag Xtiidz me, zha ne gneelew lo zho rgaad.

³ Goltsie sca, per nsin nsin golso. Golguien ganle rrieequia nac to zig cho mëcwiil yeen, ni laa naa rxel to zaatne no grë coyot dox.

⁴ Peet güeyde to, güeyde to dimi, güeyde to ncuaañe gow to, lab tow, mine quiase ni to mincose goltsienie.

⁵ Miech ne yquiaabdiuzh to nëz, sode to dieen zharaa yquiaabdiuzh to zho.

⁶ Zeene yguib to zaatne cuëz to, yu ne gdziñtaa to, golnab gunlay Dios grë zha ne no yu co.

⁷ Telne squiaadiag zho mine rnee to, zunlay me zho; telne nëdgaa zho yquiaadiag zhow, dzigo toque gunlay me.

⁸ Zha ne gneedz zaatne cuëz to, lidzse zha co golcuëz, tsiede to stib yu stib yu; guielwagw ne gneedz zho lo to, ctoladzde to golgowa; sac gon zha ne run dziin, ib none ycaa zho mine non xtsiin zho.

⁹ 'Güedez ne yquiaadiag miech mine zienee to, zaacse golgac lo zho, tel pe guielwagw ne gneedz zho, golquiina;

¹⁰ golgunguiac grë men rzacnë ne no ga. Golguiab lo zho, laa dze ne nolu Dios zha sëëb miech xnëz me, laa dze co bdziñle.

¹¹ Sanguë güedez ne siguield miech yquiaadiag zho mine zienee to, golrieë grë ro xnëz zho,

¹² ganlo zho glit to grë yudie co ni to, zeena guien zho ganle nëz ne nitlo zho ga zie zho. Golguiab lo zho, zha bguiba, sac binpaa zho zha grieelo sëëb zho xnëz Dios ni nëd zho gon zho diidz.

¹³ Gacnañ zho ganle, gal dze ne gun Dios xquielwxtis me, lëëtaa gac guielnë ne tsieguial zha Sodom, mazdraa nac guielnë ne tsieguial zho.

¹⁴ Scadaa nac zha Corazín ni zha Betsaid. jProbsaxe zho, sac gon gonpaa zho grë milagr ne run Dios, per ib psaand zho xquielntseeb zho! Tel niaca mine ngaa grë men Tiro, grë men Sidón, nian grë milagr ne gon zho, ib ndedsod mban niac grë zha co nio zho guielnë, zëëb nsaan zho xquielntseeb zho mbig zho lo Dios.

¹⁵ Gacnañ zho ganle, gal dze ne gun Dios guielwxtis, lëëtaa caxtigw ne yгаа zha Tiro ni zha Sidón, mazdraa mine yгаа zho.

¹⁶ Scaque zha Capernaum, masaque rzac zho niina zha nziuuraa lo Dios, per gacnañ zho ganle haxta guiet len gabil ga guey zho.

¹⁷ Blozhse sca bnee me, rëbchaa me lo zho: —Grëse zha ne yquiaadiag mine gnee to, rrieequia naa ga rcaania zho. Zha ne nëdgaa ycaania to, rrieequia naa ga nëd zho ycaania zho; ni zha ne nëd ycaania naa, rrieequia men ne pxeel naa ga nëd zho ycaania zho.

Wbire tsongaltsii zha ne pxeel Jesús ga (Mt. 11:25-27; 13:16-17)

¹⁷ Zeene laa gza tsongaltsii zha co wbire, rley zho bdziñ zho lo Jesús. Rëb zho haxta grë mendox bdzieb ma zho, zeene bzeet zho lë me.

¹⁸ Dzigo pquiab me rëb me lo zho:

—Haxta ma ne rnabey lo ma, gonpaa naa gon bringaa ma, biab ma zig riabse tib belye.

¹⁹ Laa naa bneedz poder qui lo to, parne gdeete to diidz gun ma mine racladz ma; grë meeldox, grë meegu ntseeb, niicle gzoobni to ma, peet gadce to.

²⁰ Nli laa to runxoon mendox niina, per gleyde to por min co, sinque mazd golley porne laa lë to zhooble lo Dios, laa to ngable lo me.

²¹ Horco biaad tib guielbley nroob zdoos Jesús, bnee me lo Dios, rëb me:

—Papá, luu nac men ne rnabey gbaa, luu nac men ne rnabey guidzliu, rneedz naa xquizh lo luu, sac grë mine noyul luu nu niina, bdeete luu diidz niacnañ grë zha raca, sinque laaw blu luu lo grë zha ne nac zig grë mëëdas. Sca quiaayun luu, sac ib scale racladz luu gaca.

²² Blozh ga rëb me lo grë miech ne ndxie lo me ga:

—Grëse ncuaañe ran to quiaayun naa, Dios men ne nac Pxoz naa, me bneedz poder rii lo naa; sac ib laa me bzo naa, naa gūa. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa diidz gunbey me, zunbey zho me.

²³ Dzigo rëbchaa me lo xpëedscuel me:

—Dichos to bgaa to noyañ to grë min rii.

²⁴ Sac gon blactaa zha ne biadteed xtiidz Dios padzeela, haxta grë zha ne bnabey len dze co, bzoobladz zho nian zho grë ncuaañe noyañ to, bzoobladz zho nquiaadiag zho grë ncuaañe noquiaadiag to.

Xcuent tib zha Samar

²⁵ Tib dze wbig tib zha ne nac maistr ley lo Jesús, bnabdiidz zho lo me, rëb zho:

—Maestro, bnë lo naa dieñ, ¿pe nac mine gun naa parne grieelo yгаа naa guielmban ndzon ne gdziñd dze lozh?

²⁶ Pquiab Jesús rëb me:

—¿Zha dieñ zhoobnee lo ley? ¿Pe rnabeya?

²⁷ Rëbchaa maistr ley co:

—Znu rneew: “Dib zdoos luu, dib nacse luu, dib guielbiini ne no guic luu, dipse xfuers luu, bleynie Dios; ni bleynie samiech luu, zigne rleynie luu luu.”

²⁸ —jMin qui nagon bioxco gun luu —rëb Jesús—, zeena yгаа luu guielmban ndzon ne gdziñd dze lozh ga!

²⁹ Per par glud ne noxcd me gun me mine rnabey ley, dzigo pquiaalo me rëb me lo Jesús:

—¿Chopaa dzigo nac samiech naa, zha ne no gleynie naa?

³⁰ Dzigo bzodiidz Jesús tib cuent lo me, rëb Jesús:

—Tib men wladz name brieë me Jerusalén zie me guiedz Jericó. Nëz zie me brieëquia ngbaan, bdiñ ngbaan me, mer niut ngbaan me; grëse ncuaañe ney me, haxta xab me blan ngbaan.

³¹ Laa me nix ga, zeene laa tib pxoz bded. Zigne gon pxoz me, biecwga pxoz bded pxoz tib lad.

³² Wdzeepaaw, zeene laa tib zha ne runaque dziin len yadoo ziaad ga; scaque zigne gon zho me, tib tib bded zho.

³³ Sca nix me ga, zeene laa tib zha Samar bdziñ. Zeene gon zho me, wbig gax zho lo me; pquia zdo zho me gon zho zha rna me.

³⁴ Gagazh been zho me rmed, blee zho vin bdiib zho lo grë rid ne ney me, bdëëb zho nceita, pxidoo zhow. Blozhse ga, blis zho me bzoob zho me lad xcuay zho laa zho zienie me, haxta bdziñnie zho me tib yu ne rbëz miech ne zo nëz; ga blëznie zho me, pquiapan zho me.

³⁵ Biini liu, zeene laa zho brieë ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me men co, rëb zho: “Peet tsienied guic luu, telne nroobraa gun luu gaxt, na zeene gbire naa dzigo quizh naaw.”

³⁶ Blozhse bzodiidz me cuent co, rëbchaa me lo maistr ley co:

—Lo gza tson zha ne nadien bded zaatne nix men co, ¿cho tib zho bien samiech zho ga nac me?

³⁷ Pquiab maistr ley co rëb me:

—Zha ne bion bded gaw, sac zha co pquia zdo me.

Dzigo rëbchaa Jesús lo me:

—Sca nagon none gun luu.

Blëz Jesús lidz Mart ni Mari

³⁸ Laa Jesús no nëz gza xpëëdsuel me. Bdziñ me tib guiedz win, ga no tib wnaa lë Mart, dzigo men co bdeed zaatne blëz zho.

³⁹⁻⁴⁰ Bdziñ zho lidz Mart, lëëlëd bzëëb Mart ro tie. Zhixco ro tie no Mart, laa tib bel Mart lë Mari zob noquiaadiag grë zhiwseed Jesús. Gon Mart rgaadraa nia Mart, dzigo wbig Mart rëb Mart lo Jesús:

—Bzhiguiel bnee lo bel naa guiaad me gun me xyudar naa. Bui ganle tipse naa psan me ro tie.

⁴¹ Pquiab Jesús rëb Jesús lo me:

—Aque luuw nli Mart, squitaa noxco luu dien zha gac xtsiin ro tie luu.

⁴² No tib ncuaañe mazdraa none tsoxco luu, ni lëë min co nu gon noyun Marí; gane grieelod ycaa naa mine quiaayun me.

11

Zha none gzodiidznie ne Dios

(Mt. 6:9-15; 7:7-11)

¹ Tib vuelt, loxaque blozh bzodiidznie Jesús Dios, wbig tib xpëëdsuel me rëb lo me:

—Maestro, bzhiguiel blu lo no dien zha gzodiidznie no Dios, zigne been Juan Bautist pseed me xpëëdsuel me zha gzodiidznie zho Dios.

² Dzigo rëbchaa Jesús:

—Zeene gzodiidznie to Dios, golguiab:

Dios, luu nac Pxo z no, zob luu gbaa; luuse nac men ne mazdraa ndzon.

Luu nac men ne gnabey na, mine gnabeytaa luu, zigne raca gbaa, scaque none gaca lo guidzliu nu.

³ Been guielnzaac bneedz ncuaañe dioow no nadze.

⁴ Bzhiguiel been no perdon grëse dol ne ziodziun no lo luu,

zigne rdziun no samiech no perdon grë falt ne run zho lo no.

Gdeete luu diidz yquii mendox no, been guielnzaac bla no lo naa.

⁵ Sca nagon gnee to —rëb Jesús—. Ncuaañe gnab to lo me zneedz mew. Samiechse to name, gzoob ne wxina, lega nacle glansog tib zha ne ndzieeldiidz to ni guien pe gdeed to gow zho. Dzigo tsie to lidz stib zha ne ndzieeldiidz to guiab to lo zho: “Bzhiguiel beenxtad tsonaque xcuun luu lo naa.

⁶ Lega nacle blanso tib zha ne runbey naa, na guien pe gded naa yquii zho.”

⁷ Segur znë zho: “Gunneete luu naa nu, dziitsle niog ro lidz naa, nataa nixguies grë xpëëd naa; grieelod gache naa gnedz naa ncuaañe racladz luu.”

⁸ Per telne sonaad to ga, ganse zho tibaque quianee to, gnid naa zho tsieched zho gneedz zho ncuaañe racladz to. Per gneedz zhow porne ndzieeldiidz to zho, sinque laa zho gneedza porne gon zho tibaque quianab tow.

⁹ Scaque nagon none gun to, zeene pe gnab to lo Dios. Ncuaañe rquiiñ to, golnaba lo me, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzle me, scagaa me scaania me to.

¹⁰ Sac grëse zha ne rbig lo me rnab zho ncuaañe rquiiñ zho, rdeed mew. Zha ne rguib ncuaañe racladz zho, racnie me zho rdziel zhow. Zha ne rbedzle me, rcaania me zho.

¹¹ Golguien ganle, zig nac to, zeene rnab xpëëd to tib mel gow win, ¿niacxe ziazh to co to tib meel nia win?

¹² Zeene rnabgaa win tib dzit, ¿niacxe zgo to tib meegu nia win?

¹³ Led rioxco to lëe niapse ncuuañe wen rdeed to lo xpëed to, niicle ne miech ntseeb nac to. Telne sca rioxco to xpëed to, pelel Pxoꝝ to dzigo, men ne zob gbaa, tsoxcod me to. Ib tedsod grëse zha ne gnab lo me gdeed me ncuuañe rquuin zho, zdeed mew; haxta zha ne gnab cxeel me Espiritu Sant gacnie zho, zun me mine gnab zho.

*Rëb zho mendox nacie Jesús
(Mt. 12:22-30, 43-45; Mr. 3:20-27)*

¹⁴ Tib vuel t beñcxoon Jesús mendox ne nosacsi tib mgui co. Ib gacd gnee mgui, sac psañ ngop ma mgui. Dzigo zigne beñcxoon Jesús ma, laa mgui psilo bnee. Grë miech ne ndxie ga, bzee zdoo zho gon zhow.

¹⁵ Nogaa zho rnee, Beelzebú ma ne rnabey lo mendox, ma co nacie me gane rrieelo runcxoon me mendox.

¹⁶ Brieequia spalal zho, rnab zho lo me gon me pe stib milagr, parne gliladz zho nli Dios pxeel me.

¹⁷ Bien Jesús zha rza guic zha ne noneenë me ga, dzigo rëbcha me lo zho:

—jNcuuañe gacd gon rnee to! Tel tib guiedz nadien, csilo miech, lëëque zha tilnie menladz zho, ¿niacxe nitlod guiedz co? Tib diigaa miecha, tel lëëque zha tilnie menlidz zho, led znuse lëe nitlo dii co.

¹⁸ Scaque mendox nagon, telne lëëque lëe ma guncxoon samendox ma, ipe nale na bnitlo ma! Laa naa rne min rii lo to, porne rnee to ma ne rnabey lo mendox nacie naa, gane rrieelo runcxoon naa ma.

¹⁹ Nana telne sca rzac to, ¿zha ne nacgrë to dzigo, cho nacie zho ne ye zho runcxoon ma? Gase naganle rlu dollox i quiayun to squi rnee to.

²⁰ Sangue tel naa, Dios nacie naa runcxoon naa mendox, ni ga rlu ganle laa Dios pxeelle men ne gnabey lo to.

²¹ ¡Masaque nac mendox zig tib zha ne no xfuers! Tib zha ne no xfuers, tel tibaque ney zho xquiib zho, ¿cho dien lega sëeb lidz zho gla ncuuañe quianie zho?

²² Per zeene rrieequia stib zha ne mazdraa no xfuers, zha cole rtiche zha co, runcxoon zho zho, riaañie zho grë ncuuañe gopchen zho.

²³ Golgacnan sca ganle, zha ne rlëe lo naa, ga rlu racnied zho naa; ni zha ne racnied naa lo xtsin naa, paat yquiind zho.

²⁴ Mendox ne rsacsi miech, zeene laa ma rsaan zho, rie ma riequianzë ma dan zaatne choot miech guiend, rguib ma dien pa cuéz ma; ranse ma rdziel zaatne cuéz ma, rnee ma: “Mazd gbire naa guia naa lidz naa stib.”

²⁵ Dzigo rbire ma, zeene rdziñ ma lo zha ne psacsi ma ga, masaque rzac ma zho zig rzac miech tib yu ne griin blioob, tib yu ne ine nzhixcuaa len.

²⁶ Dzigo rie ma riexi ma zgadz samendox ma, ma ne mazdraa ntseeb, rdziñ ma gza ma rzëeb ma zdoo zha co, rsilo ma rsacsi ma zho. ¡Horcole mazdraa mban run ma zho!

²⁷ Sca quianee Jesús, zeene nguiedz bnee tib wnaa ne no lad grë miech ne ndxie lo me ga, rëb wnaa co:

—jDichos wnaa ne gop luu, wnaa ne bgadz luu!

²⁸ Pquiab Jesús rëb me:

—jMazdraa dichos zha ne gon, yquiaadiag Xtiidz Dios ni tsoxco zho gban zhow zigne naca!

*Zha ne rililadz cho nac Jesús
(Mt. 5:15; 6:22-23; 12:38-42; Mr. 8-12)*

²⁹ Miech guizhiu ne quiazdiziñraa lo me ga, dzigo bnee me rëb me:

—Nadzpaat ntseeb zdoo to nac to miech ne mban len dze rii. Tibaque quia to racladz to gan to pe stib milagr, parne gliladz to Dios pxeel naa, ¿zha rnaraa milagr ne racladz to gan to? Gacnan to ganle, stibaque milagr gon gan to, tib mine csoladz to zha goc Jonás.

³⁰ Haxta dzigoraa nagon guien to nli Dios pxeel naa. Sac tel Jonás, zeene gocnan zha Nínive zha bzhaac me, dzigo bililadz zho nli Dios pxeel me.

³¹ Ni gacnan to ganle, zeene gal dze ne laa Dios gon xquielwxtis me, zieso wnaa ne goc rein nëz Sabá, steedquie me to. Sac gon pa lo ga brie me, biaad me biadquiaadiag me grë xtiidz Salomón; ni to, lo to nu zo men ne mazdraa non lo Salomón, ni néd to gon to xtiidz me.

³² Scaque grë zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquielntseeb zho wbig zho lo Dios; ni to, lo to nu zo men ne mazdraa non lo Jonás, ni ib runcasde to me.

³³ Tsod zha ne yquiaagui tib biini, lozh ga ctoos zho pe cos low, gzolanga zhow zaatne ngeuets. Sac biini ne rquia, glaa rzoba par gziiniw len yu, zeena guiab biini lo grëse zha ne sëeb len yu.

³⁴ Rrieequia nac bziaalo miech zig nac tib biini. Telne niapse lo grë ncuuañe ndzinli rwi zho, dzigo gdipse xcuerp zho no lo guielbiini. Laa telne loxaque lo grë ncuuañe nonguielgaa rwi zho, dzigo gdipse xcuerp zho no lo guielcow ga.

³⁵ Golguien sca pa lo rwi to, napaa laa ne tso to lo biini, lel lo guielcow no to.

³⁶ Sac gon, tel dipse xcuerp to no lo guielbiini, ni tib lëw nod lo ncow, zlupaa to; sac masaque nac to ga zig tib zha ne zo gaz tib lo biini nroob.

*Güey Jesús lidz tib zha farisé
(Mt. 23:1-36; Mr. 12:38-40; Lc. 20:45-47)*

³⁷ Zeene blozhse bnee Jesús lo grë miech co, dzigo bredz tib zha farisé me güeynie zho me tib wagw lidz zho.

Bdziñ me lidz zho, bded me bzob me lo mezh,

³⁸ psilo me dow me, per bdiibd me nia me zigne nacpaa xcostumbr grë zha Israel. Zeene gon zha farisé cow, rlozhd gzee zdoos zho;

³⁹ dzigo rëbchaa me:

—Grë to ne nac to zha farisé, laglaase rlu to miech wen nac to, per zdoos to ntseeb to, sac niapse guielntseeb, niapse guielgbaan run to; masaque nac to gon zig tas, zig plat ne nëz zhitse mbe rna, laa nëz leña rna draa di beed.

⁴⁰ ¡Nadzpaa ncow nac guic to! ¿Pe riende to racladz Dios ne laglaase glu miech wen nac to, sinque racladz me desde zdoos to gac to miech wen? Sac dib nacse to psañ me to.

⁴¹ Laa ne squi no to noban to, mazd goldeed ncuuaane nac henpaa to lo grë zha ne guien pe yquiin, zeena gac to miech ne nlipaa wen.

⁴² ¡Probsaxe to! Rzac to demas nguzobdiidz to lo Dios, rio to haxta grë guizh bitxtil, grë guizh rud, ni grëragaa guizh ne ran to, rreed to xdiezm to yadoo; per rioxcodes to gban to zigne rnabey Dios, ib rioxcodes to gleynie to samiech to. Ible none tsoxco to min rii, ni bii scaquegaa tsoxco to gdeed to xdiezm to.

⁴³ ¡Probsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdzieel zho to dib ro nëz.

⁴⁴ ¡Probsaxe to, lëetaa rdzieel to grë to maistr ley! Masaque nac to zig nac grë baa ne rludraa pa nac. Tel baa cow, zeene rded zho zaatne niaaw, ib riend zho lad grë ncuuaan noyodz ga, noded zho.

⁴⁵ Horco pquiab tib maistr ley, rëb zho lo me:

—Maestro, ¿ye no dzigo lëe rzoob luu squi nac?

⁴⁶ Pquiab Jesús rëb me:

—Ye to gon. ¡Probsaxe to! Rio to rzadraa ley ne rnabey to gun miech, ni per ni to rioxcodes to siquier csilo to gun tow.

⁴⁷ ¡Probsaxe to! Paat rquiinda gon squi rio to, rlozhd dieen paraa rzhixcuua to ro xpaa grë zha ne biadteed xtiidz Dios padzeela.

⁴⁸ ¡Igualee ntseeb to grë pxozgol to! Sac gon, zha beet grë zha co, laa to no rzhixcuua to ro baa.

⁴⁹ Nanle Dios squitaa ntseeb zdoos to, mine run to ga bnee me, zeene rëb me: “Sxel naa grë zha ne tsieteed xtidz naa lo zho, sxel naa zha ne tsieneew lo zho, per nanle naa gandzed zho zho, haxta zut zho grol zho.”

⁵⁰ Gacnañ to sca ganle, grë to miech ne mban len dze rii, grë to gunquizh Dios xchen grë zha ne pxeel me biadteed xtiidz me wlal ne ndxie guidzliu,

⁵¹ desde Abel haxta Zacarí men ne beet pxozgol to len yadoo zaatne nac gax lo pcoog. ¡Ne nligaa grëse dol co gon, to quizha!

⁵² ¡Probsaxe to maistr ley squi nac to, ib rneede to diidzli lo miech! Nac diidz to cseed miech guien zho zha nac Xtiidz Dios, per nede to gliladz tow, ni niicle nëedgaa to gliladz zha ne racladz ycaaniaw.

⁵³⁻⁵⁴ Blozhse ga, laa me brie ga. Grë zha farisé, grë maistr ley, per nli rlëe zho bin zho sca rëb me. Psilo zho nzian grë ncuuaane rnabdiidz zho lo me, rguib zho dieñ zha gunglëe zho me, par dieñ pe cxind me pe tib diidz, zeena min co yquiaaqui zho tsiezoob zho xdemand me.

12

*Grë ncuuaane rac ngueets zhliaan
(Mt. 10:19-20, 28-33; 12:32)*

¹ Miech guizhiu ne pcaalsa lo Jesús, haxta rcheeplsa zho. Dzigo bnee me lo xpëedscuel me, rëb me:

—Golguien gon, gunde to mine run zha farisé, tel zha rquiaalose zho miech wen nac zho.

² Sac grëse ncuuaane sca ngueets rac, grëse ncuuaane rlud miech, zdziñ dze ne xoobneña.

³ Zig nac grë ncuuaane zhliaanse rnee to lo ncow niina, zdziñ dze ne gon miecha zobna ngbidz; grë ncuuaane rnee to len yuse, zdziñ dze ne dib lad guiedz gacnañ miecha.

⁴ Golgona ganle bets: Ib gdziebde to zha ne gacladz gut to. Nli zrieelo gut zho xcuerp to, per peet grielodraa zho gun zho.

⁵ Golguien, Dios nac men ne mazdraa nroob, mine rnabey me min co none gon to. Sac tel me, zrieelo me gnitlo me miech dib xcuerp zho, ni lozh ga zrieelo me gzonëz me zho nëz len gabil.

⁶ Nligaa gdziebde to miech, csaand Dios lega pe gac to. Golwi ganle, zig nac grë mguin, niicle ne rzac miech peet nond ma, haxta chop ma rto zho por tib gaay centav; per tel Dios, ib rsaanladz me ma.

⁷ Pelel to dzigo csaan me, haxta guits guic tow, grësew ngaba lo me. Gdziebde to sca, golguien ganle nonraa to lo tib dzoon mguin.

⁸ Ni gni naa lo to ganle, zha ne glu lo miech nacie zho naa, scaque naa ne nac naa Mgui ne pxeel Dios, zeen gal dze co zlu naa lo grë xanjl Dios, nacie naa zho.

⁹ Sangue zha ne ctoladznie naa lo miech, scaque naa ziep naa lo grë anjl co runbeyd naa zho.

¹⁰ No zha ne rneenë naa, per zun Dios zho perdon dol co; sangue zha ntseeb ne gneenë Espiritu Sant, ib gundraa me zho perdon.

¹¹ Zeene tsiezo miech rii to lo grë zha ne rnabey xyadoo zho, tsiezogaa zho to lo grë zha ne nac wxtis, tsoode to zhgab dien pe gnee to;

¹² sac zeene sca tsiegala, Espiritu Sant csi-aab guic to pe nac miñe gnee to lo zho.

Zha ne loxaque rapchen

¹³ Horco wbig tib zha ne no lad grë miech co, rëb zho lo Jesús:

—Maestro, bzhiguiel bnee lo bets naa glë zho ncuaañe psañ pxoz no, gneedz zho mine ragual naa yca naa.

¹⁴ —Aque luuw nli —rëb Jesús—, ¿cho në lo luu laa naa noyūñ guielwxtis co? Ziald naa gon par quiz naa ncuaañe rap miech.

¹⁵ Dzigo bnee me lo grë miech co, rëb me:

—¡Golguien gon, gozobladzde to demas gapchen to! Sac niicle ndziibraa gapchen miech, grieelod por grë ncuaañ co ndzon gac lo xquielmban zho.

¹⁶ Znu gon bzhaac tib men ne nroob gopchen. Nat liu quianie me, zeene rlaap me grë ncuaañe ran me, nroob ncuaañe rlis me low.

¹⁷ Bdzin tib dze rgaadraa pa tsotsow grë ncuaañ co, dzigo bzob me dien zha guñ me.

¹⁸ Tibaque zeene rëb me: “Mine naca laa naa gon nroob grë yu qui, zeena zigtaa grë guielnzaac quiw, grëragaa ncuaañe rap naa, ga tsotsowa grësew.

¹⁹ ¡Pe zhidaa iz ne lëb grë ncuaañ co! Peet tsieniedraa guic naa, ine guxt sob naa, gow naa, guie naa ncuaañe gacladztāa naa.”

²⁰ Miñ co rza guic me, tibaque zeene rëb Dios lo me: “Nadzpaa nxen luu. Guieel riigazh gon laa luu guet. ¡Zhaale zha ne guiaañie grëtaa ncuaañe beenlo luu i!”

²¹ Zeene blozh bzodiidz Jesús cuent co, rëbchaa me:

—Sca nagon rzac grë zha ne loxaque dien zha gapchen zho zienie guic zho. Ncuaañ cose rionie guic zho, ib rioxcod zho guñ zho ncuaañe non nëz lo Dios.

Rsaand Dios zha ne no xnëz me

(Mt. 6:19-21, 25-34)

²² Blozh ga, rëbchaa me lo xpëëdsuel me:

—Gacxe waa, gni naa lo to ganle: Tsode to zhgab dien zha gban to lo guidzliu rii, pa griee pe gow to par gban to, pa gdzielgaa ncuaañe gdze xcuerp to.

²³ Mazd golconie guic to dien zha gac xquielmban to, dien pa tsiebanie to xcuerp to.

²⁴ ‘Golwi lo grë nga ganle, led yed ma ran, led yed ma rlaap, led yed ma rgotow pe guielgon, per row ma; sac Dios rdeed ncuaañe row ma. ¡Te! to gon, mazdraa non to lo grë nguñ co!

²⁵ Ni lalnu paat rquiinda tant tso to zhgab. Telne guiab to tso to zhgab dien zha

gacnool xtse to spalal yeense, ¿niacxe zrieeol to gunnool tow?

²⁶ Nanle to ganle led ncuaañe grieelod ga. ¿Pe nac dzigo tant tso to zhgab ncuaañe mazdraa nroob?

²⁷ Zig nac lar, ¿pe nacne tant tso to zhgab dien pe gacwxab to? Pe rwide to lo grë guiee dzil ne ganle zëëb dan, zha rrooba, niow rluw, ni led yeda rio zhgab dien zha gacwxaba; ni gni naa lo to ganle, per ni rey Salomón con grë xab niazh me, blud me scataa niow.

²⁸ Gase na ganle golwi, niicxe grë guiee dan co na, zna dze zob nguiaiw, gzhe widz laaw bidzle, laaw tsecle, ni scataa niow rgacwxab Diosa; ¿pe lel to dzigo ygacwxabd me, niicle ne squi gard guien to dib zdoe to gnalo to me?

²⁹ ‘Tsodraa to zhgab sca, guiab to: “¿Pa griee pe dioow ne, pa griee pe dio ne?”

³⁰ Grë miech ne runbeyd Dios, tibaque zhgab co rio zho. Sangue to, golsoladz ganle Pxoz to men ne zob gbaa, nanle me pe nac grë xliaadz to.

³¹ Me nac men ne gneedz ncuaañe yquiin to, per ib none glo tsoxco to gban to zigne rnabey me.

³² ‘Nli zhis to, pale tib dzoon win mëcwxiil yeen, per gdziebde to. Sac niicle zhis to, per rley Pxoz to men ne zob gbaa, laa me rneedz grëse ncuaañe rap me lo to.

³³ Gacxe waa, laa ne tsonie guic to dien zha gacnroob ncuaañe rap to, miñe quianie to goltoiw, dzigo goldeed dimi co yquiin zha ne rappaa liaadz; zeena sca nroobraa guielnzaac ne yгаа to gbaa. Guielnzaac cosi, led yeda nitlo, led yeda grë, led yeda tsoxtseeb lo ngbaan, tsoxtseebgaa lo mxil.

³⁴ ‘Sca golgun, sac gon guielnzaac ne gunlo to, zaatne gunlo tow, ga gdzin to.

¡Nsin golso!

(Mt. 5:25-26; 10:34-36; 16:1-4; 24:45-51; Mr. 8:11-13)

³⁵ ‘Nsin sca golso —rëb me lo zho—.

³⁶ Golgac zig tib ngundziin ne rquiambëz gbire men ne rnabey zho zeene pa rie me tib lo guieltsieel. Nsin rzo zho, zigne rdzin me, rxal zho ro yu rzëëb me.

³⁷ ‘Dichos zha ne nsin zo zeene laa men ne rnabey zho glanso. Ib tedsod, steed me zho nëz len yu, soob me zho lo mezh, csilo me mezhaldz guidziib ncuaañe gow zho.

³⁸ Nligaa dichos zha ne sca nsin so, horne glansotaa me; niicle tel wxiña, ziadyinigaa liuw.

³⁹ Golgan ganle, tel niaca miñe gacnan miech laa ngbaan tsieban lidz zho guieel, per nanñ zho dien pa horpaaw, ¿niacxe zaguiies zho? Led sobna zho lëë, nsin nsin so zho parne csaand zho sëëb ngbaan lidz zho.

⁴⁰ Scaque to nagon, none sca nsin so to, sac gon lega naclew zeene gan to laa Mgui ne pxeel Dios ziaadle.

⁴¹ Zeene blozh sca bnee me, rëbchaa Pedr lo me:

—Maestro, mine blozh bnee luu i, ¿pe par nose naca, te ye par grëraa miecha ye?

⁴² Pquiab me rëb me:

—Laaw rne naa, par grëse zha ne zienie guic zaacse gun zho mine rnee men ne rnabey zho. Nligaa nsin none so zho, sac laa zho guiaannie zha ne nacgrë zho, zig riaannie tib ngundziin sangundziin zho parne gdeed zho ncuuane gow zho.

⁴³ 'Dichos zho, telne ine niowse noyung zho dziin co zeene laa men ne rnabey zho glanso.

⁴⁴ Zeene gan mew, ib tedsod so me zho, zha gnabey grëse ncuuane quianie me.

⁴⁵ Per tel tsienie wguic guic zho guiab zho gbireniobd me, csilo zho lel csacsi zho grë zha ne biaannie zho, tso zho loxaque gowcho zho, loxaque gzudz zho,

⁴⁶ tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonëz me zho guey zho zaatne no grëraa zha ne rond diidz. Nroob caxtigw ne ceed me zho.

⁴⁷ 'Sac gon zha ne sca nanle pe nac mine racladz men ne rnabey zho, ni tsoxcod zho gun zhow; ible nroob nac caxtigw ne ted zho.

⁴⁸ Mazd lëetaa caxtigw ted zha ne peet nand, niicle gund zho mine rnabey me. Grëse zha ne nanle pe nac mine no gun zho, ib none gan zhow; nac cuent rii zig tib zha ne rcaania pe cos, tel palal mine pcaania zho, none haxta nroobraaw ctsire zho.

⁴⁹ 'Niina ne laa naa zial, rrieequia zialzobgui naa lo guidzliu. ¡Ni zoot naa gon, tebaa ranle naa laaw quiaayazbel! ¡Tebaa psiaalle naa lo dziin ne zialgun naa!

⁵⁰ Per na naraa none teed naa tib guielnë nroob, ni mbanse gon rac zdoo naa quiambëz naa gdziin dze co.

⁵¹ ¿Masaque nan to na lëë, laa naa zial loxaque par cuiñ wense miech? Lëda gon, ye zial naa zialgunctil naa zho.

⁵² Sac desde len dze rii, yu ne no gaay miech, laa zho ctsolsa. Tel sëëb chop zho xnëz naa, laa stson zha ne guiaan ga, ctsidil zho; tel sëëbgaatson zho, scaque grop zha ne guiaan ga, gandzed zho zho.

⁵³ Mëed ne gan laa pxoz zho, laa xniaagaa zho bzëëb xnëz naa, gandzed zho pxoz zho, gandzed zho xniaa zho; scaquegaa zha ne quianie mëda, zeene gan zho laa xingan zho, laa xindzoopegaa zho bzëëb xnëz naa, gandzed zho zho. Zha ne nac nguzhizha, zliënie xniaa tsieel zho zho; tel xniaagaa tsieel zhow, zliënie zho me.

⁵⁴ Blozhse sca bnee me, rëbchaa me lo grë miech ne ndxie ga:

—¡Pe nliipaa rnee to riende to pe nac grë ncuuane noyac len dze rii! Zha zeene ran to rquia xcow nëz ne rzëëb ngbidz, znuse rien to laa guie quiab.

⁵⁵ Zeene rangaa to ziaad me nëz ne rzë ngbidz len mëë nal, nanle to laa nëëg gac.

⁵⁶ ¡Guielwquiaalo i lo gon! Zha zëëb dzigo runbey to grë señ ne rlu zhan gbaa, rlugaa lo guidzliu, laa grë mine quiaayan to len dze rii riende to.

⁵⁷ ¡None guien to tozhal cobey dien pe nac mine nonguiel gun to!

⁵⁸ Gzooob ne bdiñnie to tib samiech to, laa to nole nëz zie to lo wxtis grop to. None guien to, laga no to nëz mazd golguiaan mpas, lëdle tsiezo zho to lo wxtis; sac tel laa to gdziin lo wxtis, ib znabey wxtis zha ne co to ladzguuib.

⁵⁹ Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

13

Grëse miech, ngoopdol nac zho

¹ Len dze co, bdziñ bla zho lo Jesús bzodiidz zho lo me zha bnabey Pilat gud bla zha Galilé, lëëtse zeene no zho len yadoo noyut zho ma ne nogogon zho lo Dios.

² Dzigo rëbchaa Jesús lo zho:

—Segur na lëë, rëb to mazdraa ngoopdol grë zha co lo grëraa zha ne no nëz Galilé, gane sca bdzieelo zho.

³ ¡lëda gon! Zigtaa ngoopdol zha co, scaque to ngoopdol nac to; telne csaande to xquielntseeb to gbig to lo Dios, ye to znitlo to.

⁴ Scaque tsiimtson zha ne bgaadz yuglaa ne bixche Siloé, masaque rëb to nagon mazdraa ngoopdol zho lo grëraa zha Jerusalén, gane sca gut zho.

⁵ Per gacnan to ganle, ¡lëda! ¡Zig rne naa ga, ye to miech ngoopdol nac to, ni telne csaande to xquielntseeb to gbig to lo Dios, ye to zdziñ dze ne nitlo to!

⁶ Dzigo bzodiidz me tib cuent lo zho, rëb me:

—Tib men name, zob tib zhan yag guigw lo xcuaa me zaatne quianie me lbë uv. Cad rdziñ mëë ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex,

⁷ dzigo bnabey me zha ne quianap liu co cchuggazh zhow, rëb me: “¡Pchuggazh yag yozh qui, zhlëse zoba i! Nale rac tson iz ziyal naa rguib naa nex low, ni peet nex rneedzda.”

⁸ Dzigo pquiab zha ne quia dziin lo me ga, rëb zho: “Psaan dien guiaana stibtaa iz rii, na laa naa glë zhana, na laa naa gdziñ beeba.

⁹ Teŋe yquiadaque nex low iz ne ziaad, maase cchug new dzigo.”

*Biac tib zhuz ne nosacsi mendox
(Mt. 13:31-33; Mr. 4:30-32)*

¹⁰ Tib dze ne rdziiladz zha Israel lo dziina, bdziñ Jesús leñ yadoo, psilo me noseed me miech.

¹¹ Lad grē zha ne noseed me ga, lad co no tib meñ wnaa nleŋgw nac zhits, gocle tsiimtson iz sca nosacsi mendox me, ib gacd gacnli me.

¹² Zeene goñ Jesús me, dzigo bredz me me, pxobnia me guic me, rēb me lo me:

—jNiinagazh goñ, laa luu guiac!

¹³ jHorcogazh laa zhits me ga gacnli, rley me, psilo me rdeed me xquizh lo Dios!

¹⁴ Laa zha ne rnabey yadoo, zeene goñ zho sca beenguiac Jesús me dze co, blēē zho, rēb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho leñ dze ne rac dziin, jled tsod zho guiaad zho guiac zho dze nda rii!

¹⁵ Dzigo pquiab Jesús rēb me:

—jNazdpaa ntseeb to! Rquiaalo to ib peet dziin runde to dze rii. jPezhe ga waa run to zeene rsilaa to xcon to, rsilaa to xpurr to dze rii rieguie to ma nis?

¹⁶ Zha nac dzigo rzac to, nonguiel da nu beñ naa beenguiac naa wnaa rii, dze rii. Golwi ganle zha xtii Abraham nac me, leñ tsiimtson iz goc sca nosacsi mendox me.

¹⁷ Zha ne rlēē ga, zeene bin zho sca rēb me, ptoladz zho; laa grēraa zha ne ndxie ga, rley zho ran zho grētaa milagr ne run me.

¹⁸ Blozh ga, bnee me rēb me:

—jZha ganle racnroob lo xtsiñ Dios lo guidzliu rii?

¹⁹ Racnrooba goñ zig roob tib midz moxtaz ne ran zho dan rii. Teŋ midz moxtaza niicle tib midz winsew, zaatne racniw, rooba, raca tib yag nroob; haxta rie grē mguñ riezhixcuaa ma zhiptsieez ma low.

²⁰ jZiaadaque goñ gaca, zig ncobi.

²¹ Sac teŋ ncobiw, niipaquew rcots meñ wnaa tson lmud rin, ni dib nace ncob co rzibe.

*Zha ne ycaania Dios
(Mt. 7:13-14, 21-23)*

²² Laa Jesús no nēz zie me nēz Jerusalén. Guiedz ne rdedtaa me rseed me miech; zig-taa guiedz nrooba, zigtaa guiedz wina.

²³ Tib vult bnabdiidz tib zho lo me, dien pe zhis nac miech ne ycaania Dios. Dzigo pquiab me rēb me:

²⁴ —Nligaa zhis zho, sac masaque naca zig tib puert niase. Goltsocxo sca niinasraa goŋsēēb xnēz me ycaania me to, sac zdziñ dze ne nzian zho gacladz sēēb, per grieelodraaw.

²⁵ Deque laa meñ ne rnabey csioog ro yu, teŋne biaan to nēz ley, niicle cuedzraa to me

gnab to siguiel me cxal me ro yu sēēb to, per cxaldrāa mew. “Runbeyd naa to”, gnē me, “nand naa dien cho zha to.”

²⁶ Niicle guiab to runbey me to, biaadpaa me ladz to pseed me miech, haxta downie to me.

²⁷ “Laa naa nile”, gnē me, “runbeyd naa to. jGunneetraa to naa, ib rdziguiend naa grē miech yozh, miech ngoopdoŋ ne nac to!”

²⁸ jMban gac to zeene gan to laa Abraham, laa Isaac, laa Jacob ni grēraa zha ne biadteed xtiidz Dios, laa me pcaania zho, laa to bi-aanse nēz ley. Nligaa mbandox gac to, zoon to, haxta zow lay to lo guielne co.

²⁹ Ni mazdraaw goñ, zeene gan to pa lo guidzliu briece grē miech ne bdziñ ga, ine zobnie me zho lo xmez h me noyownie me zho.

³⁰ Grē zha ne rzac to niina peet nond, lēētse zha co yгаа guielnzaac co; laa grē zha ne rzac non zho niina, peet ygad zho.

*Bzeet Jesús zha nac zha Jerusalén
(Mt. 23:37-39)*

³¹ Dze coquew, bdziñ bla zha farisé rēb zho lo Jesús grieeniob me ga, sac laa Herod racladz gut me.

³² Dzigo rēbchaa me lo zho:

—Goltsie golguiab lo mēz win co cxcw me spalal, nadzese ni gzhe gunguiac naa miech nu, zigtaa zha ne rzacnēw, zigtagaa zha ne nosacsi mendoxa; gal widz guiende naa nu.

³³ jNligaa nadzesew ni gzhe, widz laa naa gdziñle Jerusalén zhatne za naa! Sac ible Jerusalén, ga rut zho grēse zha ne riadteed xtiidz Dios lo miech.

³⁴ jAque tow meñ Jerusalén! jPe nacne squitaa nac to, rut to zha ne ziadteed xtiidz Dios lo to, rgoquie to grē zha ne rxeeŋ me lo to? Blectaa gocladz naa niacnie naa to, nquianaap naa to zig run nguid rgueedz ma xpēēd ma, per bzhiguielēde to.

³⁵ Gacnañ to ganle, nadzetaa goñ laa lidz to guiaan ngan, sac gandraa to naa, haxta gal dze ne guiab to: “jZha ndzontaa meñ qui pxeeŋ Dios lo ne!”

14

Biac tib meñ ne rrieē gui

¹⁻² Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdzinaque tib meñ bgui, rzacnē me, gdipse me no gui. Grēraa zha farisé ne ndxie ga, quialeets zho Jesús quiambēz zho dien pe zunguiac me mgui co.

³ Dzigo rēbchaa Jesús lo zho, ni lo grē maistr ley ne ndxie ga:

—Golnē dien, jpe nonguiel a gunguiac naa miech dze rii, te nonguiel da ye?

⁴ Ni tib zho pquiabd. Horco pxobnia me guic mgui co, beenguiac me mgui. Blozhse bzonëz me mgui,

⁵ rëbchaa me lo zho:

—¿Pe nli na peet dziin runde to dze rii? Tel zha tsietsobe tib xpëed to, tib xmagaa to tib len guuuu dze rii, ¿niacxe tsiebeegazhde to xpëed to, tsiebeegazhdgaa to xma to ga?

⁶ Loxaque lo zho rac, ib bdziel zho pe nquiab zho.

⁷ Grëraa miech ne nodziñ ga, no zho rguib zho dien zha yгаа zho zaatne nzhixcuaraa sob zho. Goñ Jesús zha rac zho, dzigo bnee me lo zho, rëb me:

⁸ —Golguien goñ, zeene znu cuedz miech to, zig nac tsie to tib wagw zaatne noyac tib guieltsieel, ib gunde tsiesob to zaatne nzhixcuaraa. Sac goñ, nenda glanso tib zha ne nonraa lo to,

⁹ lozh ga, laa zha ne bredz to lo lni guiaadliso to ga, gnë zho: “Guso i dien sob men rii.” Led tib guielto ga par to, racse to laa to tsieso ga, tsiesob to zaatne rialle ro beel.

¹⁰ Mazd ganle, zeene sca pa lo tsie to tib lo lni, ndooladz golgac, tib lad gol sob. Zha ne bredzle to lo lni, zeene gan zho laa to zob ga, ziaad zho ziaad-xi zho to tsiesobnie zho to zaatne nzhixcuua. Zha ne zoble lo mezh ga, zeene gan zhow, ziañzuiu to lo zho.

¹¹ Gol soladz ganle: grë zha ne lëëque zha runnon zho, leñ riaañwin zho; laa zha ne riaañwin, runnon miech zho.

¹² Blozh ga, rëbchaa me lo men ne nac lidz ga:

—Scaque luu goñ, zeene cuedz luu miech guiaad zho tib wagw lidz luu, tsod luu loxaque zha ne ndzieeldiidz luu, loxaque zha bets luu, zha lidzse luu, lo grëгаа zha ne no gax lidz luu zha ne rapchense, zha cose cuedz luu; sac goñ ib tedsod zbedzaque zho luu lo zhilni zho, stsire zho mine been luu ga.

¹³ Mazd bredz grëse miech, zig nac zha ne guienñ pe yquuin, zig nac zha ne guienñ tib nia, zha ne guienñ tib ni, zha ne roldgaa lo;

¹⁴ zeena gal dze ne grieeban grë zha ne bioxco wban zigne racladz Dios, ine gley luu yгаа luu guielnzaac ne tsieguial luu gneedz me lo luu.

¹⁵ Lad zha ne zobgrë me lo mezh ga, pquiab tib zho rëb:

—¿Dichos grë zha ne sca yгаа tsiesob lo mezh, tsietownie zho Dios zaatne rnabey me!

¹⁶ Pquiab Jesús rëb me:

—Tib men name, nzian zha ne bredz me tsie tib wagw lidz me.

¹⁷ Zeene gol dze ne laa guielwagw co gac, pxeel me tib zhingundziin me xiexi grë zha co.

¹⁸ Per pasë zho nie, zhaase zhaase ncuuaane pquiaqui zho. Tib zho rëb: “Grieelod së naa, sac laa naa pca tib lë liu, ni lëëtse nadze no gaso naa low; bzhiguiel gudz lo me gun me naa dispensar.”

¹⁹ Stib zho rëb: “Niina wriin pca naa gaay nëz ngon, laa naa no ganie ma dien zha run ma dziin, gudz lo me yquiambëzd me naa.”

²⁰ Laa stib zho rëb: “Grieelod së naa, sac niina wriin ptsieelnaa naa, bzhiguiel gudz lo me gac guial naa.”

²¹ Bdziñ ngundziin co bzodiidz zho lo me zha rzë xtiidz grë zha co. Zeene bin mew, wbinlad guic me, rnabey me zho güey zho dib lad guiedz güeyxi zho grë zha ne guienñ pe yquuin, grë zha ne guienñ nia, zha ne guienñ ni, zha ne rold lo, grëse zho bdziñnie zho ga.

²² Blozh ga, rëbchaa zho lo me: “Laa naa wbirole xmandad luu goñ, per scase noraa zaatne cue miech.”

²³ Dzigo pxeel me zho stib, rëb me: “Güey dib ro guiedz, zha ne gdzieeltaa luu, dënie zho nëz rii, bloo guic zho guiaad zho; ib none tsodzëse miech lidz naa.

²⁴ Sac grë zha ne bredz naa glo ga, ni lalnu racladzdraa naa yгаа zho guielwagw rii.”

*Zha ne racladz sëeb xnëz Jesús
(Mt. 10:37-38)*

²⁵ Laa Jesús no nëz zie me nëz Jerusalén, miech guizhiu ne nal zhits me. Tibaque ptsire lo me bui me lo grë miech co, rëb me lo zho:

²⁶ —Lo grë to ne ziaadnal to zhits naa, gacnal to ganle zha ne racladz ygab xnëz naa, ib none gleynie zho mine rnabey naa. Sac zha ne mazdraa rleynie pxoz, mazdraa rleynie xnïaa, mazdraga rleynie zho tsieel zho, xpëed zho, bets zho, bziangaa zho, xquielmban zhow, rquia zdoos zhow, peet xtsiinñ grë zha co par sëeb zho xnëz naa.

²⁷ Sac ni tib zha ne sca yquia zdoos cueeladz zho zho guiaadnal zho zhits naa, grieelod ygab zho lo naa.

²⁸ Antes ne yquiabladz to sëeb to xnëz naa, none wen wen sob to dien pe zleb to ted to mine rieguial to. Zig nacsë tib zha ne gzaa tib yu glaa ne gac chop tson xcuaa, led rzobgazh zho rbee zho cuent dien pe zгаа xtimi zho tsaalow.

²⁹ Sac goñ nenda loxaque cueeze zhow, ni lozh ga grieelod gzaalo zhow. Miech ne gana laa zho gzhidznie zho,

³⁰ guiab zho: “Golwi lo zha qui ganle, loxaque bleeze zho lidz zho, na blëbd zho nzaalo zhow.”

³¹ Scaque rey ne no tilnie stib rey, led none sobgazh zho gan zho dien pe zleb tsii mil xmenguiib zho tsietilnie gal mil xmenguiib stib rey co.

³² Telne rgobey me lëbd me, laga bii zit ziaad stib rey co, rxeel me bla zha ne tsie tsienee dien zha gataa cuëz lo xtil zho.

³³ Scaque to nagon none glo gwi to pe nac grë ncuaañe no csaan to, parne grieelo ygab to xnëz naa.

³⁴ Sac gon zed ne nzhid, çpa dien yquiina?

³⁵ Per ni par gaca beeb peet xtsiinda; mine ractaaw, laaw rziaab. Zha ne no liaadz guien zho pe rnee naa, yquiaadiag zhow.

15

*Zha rzac Dios zha ne zozit lo me
(Mt. 18:10-14)*

¹ Zeene rseed Jesús miech, nzian grë zha ne rtop dimi ne razh lo zha Roma, ni grë zha ne rzoob miech nac zha yozh, ye zho rbig zho rquiaadiag zho zhiwseed me.

² Nacne grë zha farisé ni grë maistr ley, rneenë zho me, rnee zho lëda ga run me sca rtsieelsa me grë zha co, rownie me zho.

³ Dzigo bnee me lo zho, rëb me:

⁴ —Togase nadien, gzoob ne quianie to tib gayoo mëcwxiiil, ni lega naclew rziaab tib ma, çzha dien run to? Led rsan to ma ne ndxie lo to ga lëe, laa to rie rieguib to ma ne bziaab ga, haxta rdziel to ma.

⁵ Zeene rdziel ma lo to, lo guieibley co haxta rxobyaa to ma rdzinnie to ma ro yu.

⁶ Lëëlëd rzodiidz tow lo zha ne ndzieeldidz to, lo zha ne no gax lidz to, sac rley to laa xpëcwxiiil to brieequia.

⁷ Gni naa lo to ganle, scadaa nagon rzac Dios, tib guieibley nrooba lo me, zeene ran me laa tib zha ngoopdol rsaan xquieIntseeb, laa zho rbig lo me. Ne nligaa tib guieibley rac zha co lo me, lëdle zha ne rzac miech wenle nac zho lo me.

⁸ Zig rzacga tib men wnaa, gzoob ne nzhen me tsii gayoo pes, ni lega naclew rsëeb me tib gayoow, çzha dien run me? Led hor cogazh lëe rquiaa me biini, rsilo me dzega dzega rloob me len lidz me haxta rdziel me dimi co.

⁹ Zeene rdziel mew, rley me rzodiidz mew lo grë zha ne ndzieeldiidz me, lo grë zha ne no gax lidz me.

¹⁰ Zig rne naa ga, scadaa nagon rzac grë xanjil Dios, tib guieibley nrooba lo zho zeene ran zho laa tib zha ngoopdol rsaan xquieIntseeb, laa zho rbig lo Dios.

¹¹ Dzigo psilo Jesús bzodiidz me tib cuent lo zho, rëb me:

—Tib men name quianie me chop mëëdbgui.

¹² Tib dze, rëb zha ne nac zha niab lo me: “Papá, tel pe nac ncuaañe no gneedz luu lo no, bzhiguieI niinaga beengrola, zeena gneedz luu mine raguial naa.” Dzigo beengrol me ncuaañe rap me, bdeed mew lo zho.

¹³ Zhisaque goca, pto zha niab co grëse ncuaañe bial zho, briece zho laa zho zie. Bdziñ zho stib dan, ga been zho grë guieilyozh ne gocladztaa zho, grëse xtimi zho pxin zho ga.

¹⁴ Tibaque zeene laa xtimi zho blozh, mbanse rac zho guieñdraa pe gow zho, ni lëëtaque len dze co laa tib gbin psiloque nëz co.

¹⁵ Dzigo race zho güeyguib zho dziin lad guiedz co, ga brieequia tib men co bree zho, pxeel me zho yquiaanap zho nguts.

¹⁶ Lo gbin ne noded zho ga, rzac zho tebaa cho gdeed maase grë duuzhye dan ne row grë nguts co gow zho, per ni min co choot rdeete lo zho.

¹⁷ Sca no zho ga, tibaque zeene bial zho biini psoladz zho nzian zha ne quia dziin lo pxoz zho, grë ncuaañe raclo row grë zha co, haxta riaana, ni laa zho sca noded ga; rëbchaa zho:

¹⁸ “Mazd mine naca laa naa guia gdziin naa lo pxoz naa stib, guiep naa lo me gun me naa perdon grëtaa falt ne ben naa lo me, falt ne bengaa naa lo Dios.

¹⁹ Maase sacdraa me naa zig xpëed me, siguiel me ycaania me naa gac naa zig tib zha ne quiaze dziin lo me.”

²⁰ Horco bio zho nëz laa zho zey nëz lidz pxoz zho. Zitraa ziaad zho laa me gonle zho, pquia zdoo me zho gon me zha rac zho; rias me güeydzieelo me zho bnaaz me nia zho, bdeed me zho.

²¹ “Papá”, rëb zho lo me, “riën naa nroob falt ne ben naa lo Dios, bengaa naa lo luu. Rieguialdraa sac luu naa zig tib xpëed luu.”

²² Ni blëdz me nlozh nëe zho, lëëlëd bredz me zha ne quia xtsiin me, rëb me: “iNa goltënie tib nëz lar wen nu gacw xpëed naa! iGoltënie tib nil wen tso nia me, tib nëz guieIguid cub yquia ni me!”

²³ Bnabey me zho güeyxi zho tib ngon ne mazdraa ndaan, beet zho, rëb me: “iIb none gac tib lni, none dioow ne, none dio ne!

²⁴ iSac gon gun naa cuent, brieeban xpëed rii naa! iBnitte me ga, na laa me bdziel!” iLaa lni psilo!

²⁵ Lni co noyac, zeene laa stib xpëed me zha ne nac zha gol ga, wbire lo dziin dan. Bdziñ zho gax ro yu, rlu rquia di, haxta wiee rlu noyac;

²⁶ dzigo bredz zho tib zha ne quia dziin lo pxoz zho ga, bnabdiidz zho dien pe lni ne noyac.

²⁷ Dzigo rëbchaa zha co: “Bets luu blanso, gane squitaa bnabey pxoz luu noyac lni; rley me gon me mban zho laa zho blanso. Bnabey me gut tib ngon ne mazdraa ndaan.”

²⁸ Blëe zha gol co bin zhow, lo guieIblëe co bzëëbd zho ro yu. Nacne briece pxoz zho, bnee me lo zho sëeb zho ro yu.

²⁹ Dzigo rëbchaa zho lo me: “ÿLëdraaw i gon papá noyún luu! Bui ganle blactaa iz ne quaiyún naa dziin lo luu, wlaltaa gard quits naa tib xtiidz luu. Ni zha rna tib dze, siquier tib chiv yeen ygad luu lo naa, gownie naa grë zha ne ndzieeldiidz naa.

³⁰ Cho dzigo nac zha qui, blozhse güeyloozh zho xtimi luu lo grëtaa guieÿyozh ne been zho, na no luu beet luu ngon ne mazdraa ndaan, noyún luu zhilni zho.”

³¹ Dzigo rëbchaa me lo zho: “Nliw xin, ni lalnu gard csaan luu naa, gacxe waa grëtaa ncuaañe quianie naa, luu guiaañniew.

³² Per niina ne laa bets luu blanso, ib nonguiela znu dziuun ne tib lni gleynie ne me; sac gon bñit me, ni na laa me bdziel. ÿDziuun ne cuent brieeban me nu!”

16

Ligier miech par lo guieÿntseeb

¹ Tib vuelte bzodiidz Jesús tib cuent lo xpëëdsuel me, rëb me:

—Tib men name nroob rapchen me, quianie me tib zha ne zo lo grëtaa ncuaañe rap me; tib dzew, lega naclè bded diag me zhliian noxin zha co xtimi me.

² Dzigo bredz me zho, rëb me lo zho: “Lëda i gon squi run luu, lega noxin luu xtimi naa. Niinaga racladz naa guiaadnie luu cuent nu dien zha quaiyún luu dziin; sac grieelodraa so luu lo grë ncuaañe rap naa.”

³ Wbire zho ga, rëb zho: “Zha na ganle gon naa, telne guiañ ne ga naa dziin dan, lëbdraa naa gon naa dziin co; tel guiaabgaa ne na ga naa gatop naa gon, rtoladz naa gnab naa gon lo miech.”

⁴ Tibaque zeene biab guic zho rëb zho: “ÿLaa naa bienle zha gon naa, zeena tso zha ne gon xyudar naa zeene laa naa grie lo xtsiin men rii!”

⁵ Dzigo psilo zho bredz zho zha ne quia guieÿqui lo men ne quia zho xtsiin ga. Bdzin tib zha co bnabdiidz zho lo zho dien palal nzëeb zho lo me.

⁶ Rëb zha co: “Tib gayoo tamb nceit nac mine nzëeb naa lo me.” Dzigo rëbchaa zho: “Nliw, lalga quia lo tib val ne psan luu nu. Ledaa val co nu, zac tsieez luuw; bzhixcuaa stiba, pquiaa lo co, grol tamba zëeb luu.”

⁷ Bdzinaque stib zha co, bnabdiidz zho lo zho dien palal nac xquieÿqui zho lo men co. Zha co rëb zëeb zho tib gayoo sac zhobxtil. Dzigo rëbchaa zho: “Nliw, lalga raquiet lo val ne psan luu; per na zac tsieez luu min rii, bzhixcuaa stiba, pquiaa lo co tapgalaque saca zëeb luu.”

⁸ Zeene bien men co zha noyún zho, bzee zdoo me gon me scataa ndzielguic zho. Ncuaañe ntoladza, per grëse miech ne zienal ncuaañ lo guidzliu rii, ndzielguic zho

par gon zho grë guieÿntseeb. Par min co ndziibraa ndzielguic zho lo zha ne no xnëz Dios.

⁹ Sangue to gozobladzde to gon to min co, ncuaañe rap to lo guidzliu rii, golquina per par gon to xyudar samiech to. Zeene laa ncuaañ co grë, nenda zacie zho to, per mine mazdraa non Diosi ible zacie me to, zneedz me tib lugar ndzon cuëz to, led yedraa ga pe nitlo.

¹⁰ Zha ne ndzinli rundziin tel palal yeense ncuaañe riaañnie zho, scaque ndzinli gundziin zhow zeene guiaañnie zho nrooba. Laa zha ne ndzinlid, mine gon zho zeene guiaañnie zho ncuaañ zhis, mincoque gon zho zeene guiaañnie zho ncuaañe nroob.

¹¹ Nana zha ne sca gacñ ne ndzinlise gundziin zho ncuaañe no lo guidzliu rii, zha dzigo grieeo gundziin zho ncuaañ ndzon ne gdeed Dios lo zho zaatne no me?

¹² Stiba, tel sca ndzinlide to lo chen ben, zpe naczhe ncuaañe gon to tib ncuaañe chenpaa to?

¹³ Golgona ganle, grieeod gon gleynie to dimi ni gleynieque Dios. Ib none telne Dios rleynie to, me none gleynie to, togo dimigaaw, dimi golleynie.

¹⁴ Grë zha ne nac farisé zeene gon zho sca rnee me, lel rzhidznie zho me, sac tel zhaw rleyniedox zho dimi.

¹⁵ Dzigo rëbchaa me lo zho:

—Masaque rzac to nalë nli miech wen nac to nëz lo Dios, sangue me gon, wen wen nan me zha nac zdoo to. Nli miech ne ran to, zha wen rzoob zho to; sangue Dios ni lalnu rzacd zdoo me mine run to.

¹⁶ Len dze ne gard guiaad Juan Bautist, niapse xley Moisés ni grë mine bnee zha ne biadteed xtiidz Dios, min co nac mine güeynal to. Per zeene psilo Juan pseed me miech, desde hor co laa miech quiaacnan stib mod ne grieeo yгаа zho zaatne rnabey Dios; gane na nzian zha ne noxco yгаа lugar co.

¹⁷ Per guiabde to togo nondraa ley, sac grëse mine zhobnee lo ley, ÿb laaw none gac! ÿzig nac guidzliu, zig nac gbaw zrieeo nitlow, sangue ley nitloda, tibaque naca!

¹⁸ Gacxe waa, grë zha bgui ne rsëbtsieel niina ni rtsieelnia zho stib wnaa, zha ne rtsieelniaa tib wnaa ne psëëbtsieel, dol ga quaiyún zho; zigtaa dol padzeela, scaque niina dol.

Xcuent tib zha prob lë Lazh

¹⁹ Tib ricw name —rëb Jesús—, niapse grë lar niazh racw me, gzobse dze run me lni lidz me.

²⁰ Zaatne noque me ga, guiedz co no tib zha prob lë Lazh, lala prob me ni rlanaque me guiedz, gdipse lad me noyacñe guiedz co. Riese me riesob me ro lidz zha ricw co,

²¹ rquiambëz me dien pe grielod gow me maase ncuaañe rriengaale lo xmez h men co; ga zob me haxta rdziñ grë mëcw rzëëlud ma lo guiedz ne rlan me ga.

²² 'Bdziñ dzew laa Lazh gut, dzigo biet xanj Dios beynie zho me lo Abraham, zatne rdziñ grë zha wen. Goc palal dzew, laa men ricw co gutaque, blozhse pquianap zho me, laa zho güeyqueets me;

²³ zeene biao me biini laa me nole gabil. Lëbdraa me no me lo guielnë co, lega naclew blis lo me, zit squi gon me Abraham, laa Lazh zobnie Abraham ga.

²⁴ Horco rñab me lo Abraham siguiel Abraham cxeel me Lazh, maase guic mzhugniase Lazh yquiaa Lazh nis tsiegadz Lazh lo ludz me; sac lëbdraa me lo guidox ne no me ga.

²⁵ Dzigo rëbchaa Abraham lo me: "Xin, psoladz ganle zeene wban luu lo guidzliu, ncuaañe gocladztaa luu pquianie luuw; laa Lazh mbanse bded me. Nagaa na, me nac men ne nogaa noyan guielbley, laa luu bgaa squi no luu lo guielnë qui.

²⁶ Stiba, zha ne no nëz rii gacd guiaad zho i, niicle zha ne nogaa iw, gacd guiaad zho nëz rii; sac no tib yeedox ne rtse."

²⁷ "Bzhiguiel sca", rëb men ricw co, "pxeel Lazh tsie me lidz pxoz naa,

²⁸ tsienie me diidz lo zgaay bets naa zha ne biaan, guiab me lo zho ib gund zho miñe beñ naa, zeena guiaate zho nu ygaa zho lo guielnëdöx rii."

²⁹ Pquiabchaa Abraham, rëb Abraham: "Tel mincow, tslow glab zho lo grë ley ne psan Moisés, lo grë miñe bnee grë zha ne güeyteed xtiidz Dios, beñque lo co zho bnee zha no gban zho."

³⁰ "Nliw", rëb me, "per tel squi tib men ne gutle tsie tsienie lo zho, rien naa znuse csaan zho xquielntseeb zho gbig zho lo Dios."

³¹ Dzigo rëbchaa Abraham: "Telne rond zho miñe rnabey grë ley ne psan Moisés, grë miñe bnee zha ne güeyteed xtiidz Dios, scaque gond zho diidz niicle tsie tib zha ne brieabanle tsienie lo zho."

17

*Zha ne gunctal xtol stib zho
(Mt. 18:6-7, 21-22; Mr. 9:42)*

¹ Tib vuelt rëb Jesús lo xpëëdsuel me:

—Nac lo guidzliu rii, ib gunfalte ncuaañe rgogui miech gunctal zho xtol zho, iper probaxe zha ne rquiil samiech runctal zho xtol zho!

² Mazd zhi guielnëw lo zho ygadoo tib quie molin zhoxbtil yan zho tsieron zho zho nis-doo, lëde guielnëdöx ne gan zho; sac gon dol nroob ga gun zho yquiil zho zha ndooladz ne no xnëz naa.

³ iGolguien sca ndzinli golgac! Tib bets tow, zeene pe tib falt gun zho lo to, golnee lo

zho gundraa zhow; telne gnab zho perdon, golgun zho perdon.

⁴ Niicle telne nzian vuelt sca gun zho falt lo luu tib dze, been zho perdon zeene laa zho rbig rnab zho perdon lo luu.

⁵ Stib dzew, rëb zha ne rzënie me lo me:

—Bneedz guielbiini lo no dib zdooraa no gnalo no Dios.

⁶ Pquiab me rëb me:

—Tel niaca miñe gzoob ne rnalole to Dios siquier lal tib midz moxtaz, niicle ncuaañe mazdraa ngan gnab to lo me, zun mew.

⁷ 'Pe ran to ganle, zha nac zha ne run xtsiin beñ? Zeene rbire zho dan, yase güey zho gon, güeygaa zho güeyquianap zho ma, pe liaadz men ne quia zho xtsiin ga, guiab me lo zho: "Na bded, bzob, zeena gowxtsee luu."

⁸ Mine run me, gloque rnabey me zho gunlo zho ncuaañe gowxtsee me, gdziib zhow lo me; rlozhraa row me, dzigora rowxtsee zho.

⁹ Niicle scataa ron zho miñe rnabey me, ni rlozh ga, per ni xquizh rdeete me lo zho.

¹⁰ Scaque to nagon, zeene lozh gun to grë dziin ne pso Dios to gun to, peet yquiambëzde to, golguien tib ngundziine nac to, miñe rieguial to ga, min co been to.

Biac tsii zha ne rlan guiedz lepr

¹¹ Laa Jesús no nëz zie me nëz Jerusalën. Laa me zieded tib guiedz win ne riaan zatne ndzieel xtan Samar xtan zha Galilé,

¹² zeene brieequia tsii zha ne rlan guiedz lepr. Zit zo zho,

¹³ nguiedz rbedz zho me, rnab zho lo me yquia zdoo me zho.

¹⁴ Zeene gon me zho, rëbchaa me lo zho:

—iGoltsie, goltsielulo lo pxoz, zeena gan zho ganle laa to biacle!

Dzigo laa zho zie. Nëz no zho laa zho biaanme lo guiedz co.

¹⁵⁻¹⁶ Lo zga zho, hor co rias tib zho wbiere, nguiedz rnee zho:

—iZha ndzontaa Dios! iGolwi ganle laa me beenguiacl naa!

Zigne bdziñ zho lo Jesús, pquitsgzhil zho lo me, haxta bdziñ lo zho lo liu, rdeed zho xquizh lo me. Tib zha Samara, zha zit nac zho.

¹⁷ Dzigo rëbchaa Jesús:

—iYoraazhe grë zha co waa? Conque tsii zho name beenguiacl naa.

¹⁸ iTibaque zha zit rii dzigo lëë rzac zdoo miñe been Dios lo zho?

¹⁹ Dzigo bliso me zha co ga, rëb me lo zho:

—Porne dib zdoo luu gon bnalo luu Dios, gane biac luu. Bzë, peet tsieniedraa guic luu.

*Zeene gbiire guiaad Mgui ne pxeel Dios
(Mt. 24:23-28, 36-41)*

²⁰ Tib dze bnabdiidz zha farisé lo Jesús, rëb zho:

—¿Poc dzigo csilo gnabey Dios lo ne?

Dzigo pquiab me rëb me lo zho:

—Gacnan to ganle, nacd min co ncuaañe ganlopaa miech.

²¹ Griielod guiab zho laaw psilo nec, laaw psilolegaa nëz rii; sac gon tel niina laa me quianabeyle nu.

²² Bded ga, rëbchaa me lo xpëëdsuel me:

—Zdziñ dze, gacladz to tebaa zha znu so naa lo to maase tibaque dze, per gacdraaw.

²³ Len dze co, zio zha ne gnë lo to: “Goltë ganle laa Mgui ne pxeel Dios bdziñ nu”; gnëgaa zho pa stib lugar none tsie to par gan to naa; tsienalde to, gliladzde to xtiidz zho.

²⁴ Sac zeene gbiire guiañ naa, grëse miech gana. Zig nac tel guiab tib belye nroob ne glu zhan gbaa desde nëz ne rlan ngbidz haxta nëz ne rzëeb ngbidz, çniacxe ganđ grëse miecha?

²⁵ Per ansraa ne gac min co, ible nroob guielnë ne cteed miech rii naa, ni lalnu ganđzed zho naa.

²⁶⁻²⁷ Len dze ne guiañ naa ga, grë miech ne ndxie lo guidzliu gal hor co, zhaa grë ncuaañe tsonie guic zho. Rsoladz to ganle zha rac miech len dze ne biaad Noé, lel lo grë zhillni zho no zho, zha ne notsieelnia, zha ne nobediin xpëed, tibaque zeene biaa zho biini laa guiedox co psilole. Laa Noé nole len barcw, laa zho biaan grëse zho bnitlo lo nis co. Scadaa nagon no miech len dze ne guiañ naa.

²⁸ Zig racgaa miech Sodom len dze ne brie Lot ga. Scaque, loxaque ncuaañ lo guidzliu rii noxco zho, zha ne no lo zhillni, zha ne no zhiwto, zha ne nozigaa, zha ne quia gon, zha ne quiazhixcuagaa lidz.

²⁹ Lega naclew, zeene laa Lot brie, hor co laa tib guidox biet gbaa, notsa zufr bliaala lad guiedz co, grëse miech co bnitlo lo guidox co.

³⁰ Scapaa nagon rac miech ne ndxie lo guidzliu len dze ne laa naa guiañ.

³¹ ‘Zha ne lëëtaque hor co no glaa guic yu, ib guiabd zho sëeb zho len yu tsiebee zho ncuaañe no len lidz zho, zha ne quiaaga lo dziin dana, ib guiabd zho gbi zho guey zho ro yu.

³² ;Golsoladz ganle zha bzhaac wnaa ne goc tsieel Lot!

³³ Grëse miech, zha ne sca rquianë zdoo grë ncuaañe rap zho, ible znitlo zho xquielmban zho; sanque zha ne rquiad zdoo grë ncuaañ co, haxta xquielmban zho rbeeladz zhow, nitlod zho.

³⁴ Gal hor co, zaatne tipse nixgues chop zho, tib zho sēnal zhits naa, laa stib zho guiaañ.

³⁵⁻³⁶ Zaatne tipse quiyot chop wnaa, zaatne tipsegaa quia chop mgui lo dziin dana, tib zho sēnal zhits naa, laa stib zho guiaañ.

³⁷ Dzigo rëbchaa xpëëdsuel me lo me:

—¿Pa lo dzigo gdziñ grë zha co?

Pquiab me rëb me:

—Horco bii zlu ganle paw. Zig nac grë pech, zaatne nix magut ga rdziñ ma.

18

Zha ne rnab lo Dios

¹⁻² Stib dzew, bzodiidz Jesús tib cuent lo xpëëdsuel me, par guien zho ib guiaañ zdoo zho zeene racniobd mine quianab zho lo Dios, rëb me:

—Tib guiedz name, no tib men co nac me wxtis, ni palal rquiad zdoo me samech me, per ni Dios rdziebd me.

³ Guiedz coque no tib zhuz viud, gzobse dze rie zhuz co rienab zhuz gun me guielwxtis, cuedz me tib zha co rlëë lo zhuz.

⁴⁻⁵ Glo ib rquiaadiagd me mine rnab zhuz co, per zeene goc palal dze gon me tibaque quia men co quianab me gac guielwxtis, dzigotaa rëb me: “Ncuaañe lëbdraa guic naa lo men rii, tibaque squi quia me. Nli rdziebd naa Dios, niicle nodgaa naa liaadz pe rzac miech, per parne guiadgunneetraa me naa, mine naca mazd laa naa gun guielwxtis ne rnab me.”

⁶ Blozhse bzodiidz Jesús cuent co, rëbchaa me lo zho:

—Telne sca bdziñ dze ne pquiaadiag zha ntseeb co mine bñab wnaa viud co,

⁷ ;pe lel Dios dzigo yquiaadiagd xtiidz zha ne ngab lo me, tel tibaque gnab zho mine racladz zho?

⁸ ;Nligaa, ib tedsod zun me mine rnab zho! Per segur zhis zho quiambëz gac xquielwxtis me, zeene laa naa guiañ stib.

⁹ Laa grë zha ne riats, zha ne rzac masaque zha wen nac zho nëz lo Dios, haxta rbix zdoo zho ran zho grëraa miech, bnee Jesús lo zho, rëb me:

¹⁰ —Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma.

¹¹ Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grë miech ngoopdoñ, zig nacse zha ne zo i. Wlaltaa rund naa guielgban, rund naa guielntseeb, niicle rquiangoobd naa stib wnaa.

¹² Haxta chop vuelt rcuan naa tib len zmal, grëse ncuaañe run naa gan, run naaw tsii lal, rnedz naa tib lal mine rieguiañ luu.”

¹³ Laa zha ne rtop dimi ne razh Roma ga, gaxaque ga zo zho, per nquiitsrunse zho liu. Mban rac zho, quiaise nia zho zdoo zho, rnee

zho lo Dios: “¡Dios, rnab naa lo luu pquia zdoonaa znutaa miech ngoopdo! nac naa!”

¹⁴ ‘Gneli naa lo to ganle —rëb Jesús—, mazdraa gon wen biaan recaudador co lo Dios, lëdle zha farisé co. Sac zha ne lëëque zha runnon zho, racnond zho lo Dios, laa zha ne riaanwin, runnon me zho.

Beenlay Jesús mëedlas

(Mt. 19:13-15; Mr. 10:13-16)

¹⁵ Tib dze, nzian men ne bdziñ lo Jesús, bdziñnie zho xpëedlas zho lo me, parne cxobnia me guic win gunlay me win. Grë zha ne nac xpëedscuel me, le! psilo zho ndox zho lo grë zha ne bdziñnie grë mëedlas co.

¹⁶ Zeene gon me sca quaiyun zho, dzigo bredz me zho, rëb me lo zho:

—¡Ctsirede to grë mëedlas yeen qui! ¡Golsaan guiaad win lo naa! Sac gon grë mëedlas yeen qui, ni zha ne nac zig nac win, zha co nac zha ne sëeb ygab lo Dios.

¹⁷ Nligaa zha ne gacndooladzd, zha ne gliladzd dib zdoon, zigne run grë mëedlas, grielod gdziñ zho zaatne rnabey Dios.

Ncuuaane run dimi

(Mt. 19:16-30; Mr. 10:17-31)

¹⁸ Tib vuelt, wbig tib men ne nac zha non lo menquiedz Israel, rëb me lo Jesús:

—Nan naa luu nac tib men ne noseed miech, ni tib men wen nac luu, çbnë lo naa dien, pe nac mine gun naa parne grielo ygaa naa guielmban ndzon ne gdziñd dze lozh?

¹⁹ Pquiab Jesús rëb me:

—Rnee luu lëë tib miech wen nac naa. ¡Nligaaw, Diosse gon nac men wen!

²⁰ Telne nli racladz luu ygaa luu guielmban co, none tosoxo luu gban luu zigne nac Xley Dios. Nanle luu ganle zha naca, rneew: Tsionied luu zha ne led tsieeld luu, gute luu samiech luu, cuand luu samiech luu, yquadiidzguizhd luu samiech luu. Gon pxoz luu, gon xniaa luu, cuedd luu xquielto me.

²¹ Dzigo rëbchaa men co:

—Maestro, grëse mine bzeet luu i, ni tiba gard quits naa wlal ne nac naa zha nguieg.

²² Horco rëb Jesús lo me:

—Stibaque mine rquiin gun luu. Güey, güeyto grëse ncuuaane quianie luu, dzigo bdiiz dimi co lo grë zha mban ne guieñd pe yquiiñ; sca nroobraa guielnzaac ne ygaa luu gbaa. Lozh ga, dë, dënal zhits naa.

²³ Zeene bin men co sca rëb Jesús, mbanse rac me laa me zey; sac nroob ncuuaane quianie me.

²⁴ Dzigo rëbchaa Jesús lo xpëedscuel me:

—¡Zha ngantaa lëë, rzac zha ne squi rapchen sëeb zho xnëz Dios gnabey me zho!

²⁵ Mazd ngandse rded tib camell guieer guzh.

²⁶ Grë zha ne ndxie ga, zeene bin zho sca rëb me, rneechaa zho:

—Telne scataa ngan sëeb miech xnëz Dios, çhosezhe dzigo waa nac zha ne zrieelo sëeb xnëz me?

²⁷ Dzigo rëbchaa Jesús:

—Nligaa par miech, zootle tsod zha ne grielo sëeb xnëz me; sangue me nan me no zho. Sac tel me, tsod ncuuaane grielod gun me.

²⁸ Horco pquiab Pedr, rëb Pedr lo me:

—Tel no, grë ncuuaane rdziaapse no psan now, laa no ziaadnal zhits luu.

²⁹ Pquiab me rëb me:

—Golganana ganle, grëse zha ne psan lidz, psan zho tsieel zho, psan zho xpëed zho, psan zho pxoz zho, psan zho xniaa zho, psan zho bets zho, bziangaa zho, porne bzëeb zho xnëz Dios,

³⁰ na lo guielmban riique, mazdraa nroob mine gan zho, ni lozh ga ib tedsod zgaa zho guielmban ndzon ne gdziñdraa dze lozh.

Bzeet Jesús stib zha csacsi miech me

(Mt. 20:17-19; Mr. 10:32-34)

³¹ Ne sca no Jesús nëz zie me nëz Jerusalén, tibaque bredz me gza tsiipchop zha ne rzëniepaa me ga, bzeet me lo zho zha gun miech me, rëb me:

—Grëse mine bzeetle zha ne biadteed xti-idz Dios padzeela teed naa, niina ne laa ne gdziñ Jerusalén, laaw gac cumplir.

³² Ga gnaaz zho naa, tsielo zho naa ladz-nia grë zha ne nacdraa zha Israel, xidznie zho naa, squiaago zho naa, stsuc zho lo naa, ³³ zguin zho naa, ni haxta zut zho naa. Per zeene gac tson ngbidza, zriebaan naa.

³⁴ Per ib biend zho dien zha nacne sca rnee me.

Biac tib zha ne rold lo

(Mt. 20:29-34; Mr. 10:46-52)

³⁵ Laa Jesús bzëeb ro guiedz Jericó, miech guizhiu ne nal zhits me. Ro nëz co zob tib men ne rold lo, rnab me gon.

³⁶ Zeene bien me rlu nzian miech noded ga, dzigo bnabdiidz me dien pe nacne scataa ziaad grë miech co ga.

³⁷ Dzigo rëb zho lo me, Jesús, men Nazaret ziaad ga, zhits me ziaadnal grë miech co.

³⁸ Horco psilo me nguiedz rbedz me, rnee me:

—¡Jesús, men xtii rey David, pquia zdoonaa!

³⁹ Grë zha ne ner, psilo zho ndox zho lo me parne guioog ro me, per le! hor cole nguiedzraa rbedz me Jesús, rnab me yquia zdoon Jesús me.

⁴⁰ Nacne zeene bdziñ Jesús gax zaatne zob me, blëz Jesús, bnabey Jesús güeyxi zho me. Bdziñ me lo Jesús, rëbchaa Jesús lo me:

⁴¹ —¡Pe nadien gun luu naa?

Pquiab me rëb me:

—¡Racladz naa guiac lo naa!

⁴² Dzigo rëbchaa Jesús:

—¡Niinagazh gon laa luu gan stib! Laa luu biac, sacne dib zdo luu bnalo luu naa.

⁴³ Horcogazh laa men co psilo bui, ine rley me roolnie me Dios, laa me zienal zhits Jesús. Haxta grë miech ne zienal ga, zeene gon zhow, ye zho roolnie zho Dios.

19

Guëy Jesús lidz tib men lë Zaquew

¹⁻² Guiedz Jericó, ga no tib men ne rnabey lo grë zha ne rtop dimi ne razh lo rey Roma, lë me Zaquew. Zeene laa Jesús zieded lad guiedz co,

³ brieë me, ziewi me, sac racladz me gunbey me Jesús. Bdzin me, pasëse me gan me Jesús, sac lala miech guizhiu ne nal zhits Jesús, ni lala ndopse me.

⁴ Mine been me, rias me bdedner me guëytsep me tib lo yag guigw zob ro nëz co, par gdeeda diidza gan me Jesús, zeene laa Jesús ted ga.

⁵ Zeene laa Jesús bded ga, blis lo Jesús gon Jesús laa me zob ga, dzigo bredz Jesús me, rëb Jesús lo me:

—Zaquew, na zeena biet i. Sac racladz naa, lidz luu cuëz naa nadze.

⁶ Rley Zaquew gon Zaquew sca rëb Jesús, lëëlëd biet me lo yag co, laa me zienie Jesús nëz lidz me.

⁷ Zeene gon grë miech cow, rlëë zho, rnee zho:

—¡Pe lëëtaa lidz zha ngoopdol qui ziebëz me!

⁸ Laa Zaquew, ine rley zobnie Jesús. Tibaque bzoli Zaquew, rëb Zaquew:

—Gacnan luu gon, lo grë ncuane rap naa, laa naa gded grola ygaaz lo grë zha ne guënd pe yquuin, ni tel nogaa zha ne ndzi-ibraa mine beenquizh naa zho, naa maase ctsiree naa tap lal mine blan naa zho ga.

⁹ Horco pquiab Jesús, rëb me lo zha ne ndxie ga:

—I nagon rlu laa men qui wbigle lo Dios, parne ycaania Dios me. Nli zha xti Abraham nac me, per bzonziaab me

¹⁰ ni naa ne nac naa Mgui ne pxeel Dios, ible laa naa zial zialsilaa naa grë zha ne zonziaab.

Zha ne biaanmie dimi

¹¹ Grë miech ne zienal zhits Jesús ga, rzac zho zigne laa me gdzin Jerusalén, laa me sob gac me zhirey zho; nacne bzodiidz me tib cuent rii, rëb me lo zho:

¹² —Tib xpëed zha non name, no me tib guiedz win, nacle diidza laa me no tsie zaatne zob men nroob ne rnabey, parne gzo zho me gac me rey guiedz ne no me ga.

¹³ Zeene laa dze co bdzin, dzigo bredz me tsii zha ne quia xtsiin me, nroob dimi ne

psan me lo zho tib tib zho, parne gundziin zhow, mientras gbire me.

¹⁴ Nzianlaa zha ladz me, rlëë zho ran zho me, dzigo pxeel zho bla zha ne güey lo men ne rnabey ne zie me ga, güey nab zho gdeete men co dziin co lo me.

¹⁵ Per niicle sca güey grë zha co, peet brieelod niun zho. Blozhse bzo rey co me, laa me bdzin ladz me. Zeene bdzin me, bredz me gza zha ne biaanmie xtimi me ga, par dien palal ziyaca.

¹⁶ Bdzin tib zho, rëb zho: “Laa xtimi luu nu gon, tsii lal mine psan luu ga naca niina.”

¹⁷ Rley me rëb me lo zho: “¡zha squi nagon racladz naa! ¡Wen brieequia xtsiin luu! Niicle zhis ncuane psan naa lo luu, per bien luu niowse bendziin luuw. Na nagon, laa naa gzo luu, gnabey luu tsii guiedz.”

¹⁸ Bdzin stib zho, rëb zho: “Laa xtimi luu nu gon, gaay lal mine psan luu lo naa ga naca niina.”

¹⁹ Scaque rley me. Bzo me zho gnabey zho gaay guiedz.

²⁰⁻²¹ Zeene bdziintaa tib zho, rëb zho: “Nli bendziin naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana; gane mazd pquia naaw tib lë lo lar, blootsow naaw, ledaaw nu.”

²² Blëë guic me, rëb me lo zho: “¡Biche nu, paat rquiind naa miech yozh ne squi nac! Conque nanle luu zha nac naa,

²³ ¿pex nac dzigo waa bioxcod luu maase mbediin luu dimi qui, ndziniaaw palal ncaania naaw niina?”

²⁴ Dzigo rëbchaa me lo grë zha ne ndxie ga: “Niinagazh golcob dimi qui nia zha qui, goldeeda lo zha ne ziaadnie tsii lala i.”

²⁵ Pquiab zho rëb zho: “Per pe nacne zha coque ycaania, ni nrooblew beenlo zho.”

²⁶ “Ib sca no gaca”, rëb me, “sac zha ne rien zha gundziin zho ncuane rcaania zho, nroobraa ncuane ycaania zho. Laa zha ne squi nac, haxta mine pcaaniale zho, zdiiooba lo zho.

²⁷ Sangue zha ne sca ptsidil niac naa rey, goltsiexi zho, niinaga racladz naa ganlo naa gut to zho.”

Bdzin Jesús Jerusalén

(Mt. 21:1-17; Mr. 11:1-11, 15-19;

Jn. 2:13-22; 12:12-19)

²⁸ Blozhse bzodiidz Jesús cuent co lo zho, laa zho bio nëz stib, nerse me lo zho.

²⁹ Zeene bdzin zho gax Gui Oliv, zaatne ndxie guiedz Betfagé ni guiedz Betain, pxeel me chop xpëedsuel me,

³⁰ rëb me lo zho:

—Goltsie guiedz win ne ndxie danse lo ne i. Ga gdzin to zaatne quiadoo tib burr yeen ne choot gard sob lad, dzigo golxadz ma, goltrënie ma nu.

³¹ Tel cho gnabdiidz lo to pe nacne noxadz to ma, golguiab lo zho: men ne rnabey ne, men co rquiin ma.

³² Laa zho zie. Bdziñ zho, zaatne quiadoo burr co,

³³ nīgaa, lēētaque noxadz zho ma, zeene laa bizhuan ma bdziñ.

—¿Pe gun to xpurr naa? —rēb me lo zho—.

¿Pe nacne noxadz to ma?

³⁴ Dzigo rēbchaa zho:

—Men ne rnabey ne, men co rquiin ma.

³⁵ Bdziñnie zho ma lo Jesús, pxob zho lar ne rbix zho lad ma, bzob me ma.

³⁶ Zigse zie me, no grē miech guizhiu co rta zho xab zho ro nēz rded burr ne zob me ga.

³⁷ Grēse miech co, rleynie zho me. Laa zho xiuxto dze cho gui Oliv, zeene psilo zho nguiedz zēēb tsi zho, rley zho roolnie zho Dios, por grētaa milagr ne ziyān zho ruñ Jesús;

³⁸ rnee zho:

—¡Nasi laa Dios pxeel zhirey ne! ¡Zha ndzontaa Dios! ¡Haxta gbaa noyac guieļbley dze rii!

³⁹ Blalaa zha farisé ne zienaļ ga, zeene gon zho zha roolnie grē miech co me, wbig zho lo me, rnab zho gnee me lo zho guioog ro zho.

⁴⁰ Dzigo rēbchaa me:

—¡Zac guioog ro zho, per hor co dzigo laa grē quie rii csilo goolniew naa!

⁴¹ Zeene bdziñ me zaatne nieenpaa Jerusalén, psilo biab guieļnē me, biin me gon me guiedz co,

⁴² rēb me:

—¡Prob to men Jerusalén! ¡Tebaa ye to nien niunbey to men ne needz guieļbley rii lo to! Per na ib biēde tow, masaque rzac to zig zha ne nioog lo.

⁴³ Na nagon laa dze co bdedle. Grē zha ne rlēē lo to, ible ziaad zho ziadsioog corral zho to, ni tib nēz tedlaade to lo zho,

⁴⁴ haxta guiab to ladznia zho, grē xpēēd to. Znitlo zho ladz to, nēzrii nēzrec glaal zho grē quie ne niaa grē lidz to i; sac squi been to ib pcaaniade to Dios, zeene biaadpaa me nsilaa me to lo xtol to.

⁴⁵ Bdziñ me Jerusalén, güey me yadoo, psilo me blee me grēse zha ne noyun lgui ga, rēb me lo zho:

⁴⁶ —Znu zhobnee lo Xtiidz Dios: “Zaatne nac lidz naa, ga none guiaad miech gzodidznie zho naa.” Laa to gon, quiaayun to lugar rii zig tib zhibliee ngbaan.

⁴⁷ Bded ga, gzobse dze rie me rieseed me miechlen yadoo ga. Nacne psilo grē pxoz ne rnabey, grē maistr ley, ni grē zha ne nac zha non lo menguiedz, quiaaguib zho dien zha gdeeda diidz gut zho me.

⁴⁸ Per rdziēld zho dien zha gun zho, sac tibaque ndxie miech lo me, grēse zho rquiaadiag zho zhiwseed me.

20

Bnabdiidz zho cho nac Jesús

(Mt. 21:23-27; Mr. 11:27-33)

¹ Len dze ne sca noseed me miech len yadoo, nonee me lo zho zha nac Xtiidz Dios, tib vuelt bdziñ bla zha ne nac pxoz ne rnabey, grē zho bla maistr ley ni zla men ne nac men non lo menguiedz,

² rnabdiidz zho lo me dien cho nac me, cho rnabey me, zha nacne sca quiaayun me.

³ Dzigo rēbchaa me lo zho:

—Ye naa laa naa gun tib wnabdiidz lo to.

⁴ Golnē dien cho pxeel Juan zeene biadchoobnis Juan miech, ¿pe Dios pxeel Juan, te miechsew ye?

⁵ Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzeets ne Dios pxeel Juan, dzigo laa me gnē: “¿Pex nac dzigo waa biladzde to mine bnee Juan?”

⁶ Tel na dzeetsgaa ne, miechse pxeel Juan, grieequiadaque ne; zgoquie menguiedz ne, sac grēse zho riladz Dios pxeel Juan.

⁷ Dzigo mazd lēē gdib mine been zho, rēb zho nanđ zho dien cho pxeel Juan.

⁸ Nacne rēbchaa Jesús lo zho:

—Niicle naagaa nagon, grieeelod gni naa lo to cho rnabey naa quiaayun naa grē miñ rii.

Xcuent zha ne pquianap liu

(Mt. 21:33-46; 22:15-22; Mr. 12:1-17)

⁹ Blozhse ga, biire psilo me noseed me grē miech co. Bzodiidz me tib cuent rii lo zho, rēb me:

—Tib men name, nroob lbē uv beenbni me lo liun me. Blozh ga blediñ me liu co lo bla zha ne ran liu, dzigo laa me brieē ga, zey me stib dan.

¹⁰ Zeene gol mēē ne laa nex co gol, pxeel me tib zha ne quia xtsiñ me zie lo zha ne quianap liun me ga, parne gdeed zha co nex ne rieguiaļ me ycaa me. Per leļ bnaaz zho zha ne pxeel me ga, bdiñ zho zho, blozh ga scase bzonēz zho zho.

¹¹ Wbiire pxeel me stib zho, scaque peet bdeete zho lo zho, leļ ndox zho lo zho, bdiñ zho zho.

¹² Pxeelaque me stib zho, goc zho tson, scasaque been zho, haxta psiwee zho zho.

¹³ Quianie me tib mēēd, rleynie me mēēd co. Zeene gon me sca been zha co, rēbchaa me: “Miñe naca laa naa cxel xpēēd naa, zeene gañ zho xpēēd naaw, peet gund zho me, nend zon zho xtiidz me.”

¹⁴ Pex guien zho cho nac xpēēd me, zeene gon zho men co, rēb zho: “¡Lēē zha qui nagon guiaañnie liu rii! ¡Golgotsoa dziuut ne zho, zeena guiaana lo ne!”

¹⁵ Bnaaz zho xpēēd me, güeynie zho me zaatne nac tib lad lo liu co, ga güeygut zho me.

¿Zha sca dien rzac to guñ bizhuan liu co gza zha ntseeb co?

¹⁶ Ib tedsod lëë, zeene gbire me, znitlogazh me zho. Lozhse ga, cuediinga me liun me lo zla zha ne guñdziina.

Zeene bin zho sca rëb me, rneehaa zho:
—¡b lic Dios qui, dziuunscad no!

¹⁷ Dze bui me lo zho, dzigo rëbchaa me:

—Per led znu lëë, zhobnee lo Xtiidz Dios: “Quie ne psëëb zha ne nozaa yu, ni nand zho lëëpaa quie co nac mine rnzdziiis yu.”

¹⁸ Ní quie co gon, zha ne tsietsobe low, zac zho zig tib ncuuaane rac tson tap lë; laa tel lëëgaaw tsoe lad zho, zac zho zig tib ncuuaane die die rac.

¹⁹ Grë zha ne nac pxoz ne rnabey, ni grë maistr ley, hor co bien zho mine nac zho ga, bzeet me lo cuent co. ¡Gocladz zho gagazh naaz zho me! Per bdzieb zho, niactseeb grë miech ne ndxie ga.

²⁰ Dzigo mine been zho, pxeel zho bla zha ne zie ziegungüet me par cxin me tib diidz, dzigo min co yquiaaqui zho tsiezo zho me lo zhiwxtis zha Roma. Rquiaalo zha co, no zho liaadz dien zha gzoobdiag zho xtiidz Dios,

²¹ bdzin zho lo me, bnabdiidz zho rëb zho:

—Maestro, ndion no niapse diidzli zienal luu, ni scagaa zeene rseed luu miech, rguibd luu guianziuu luu lo zho, sinque niapse mine nac diidzli, mine rlu zha sëëb zho xnëz Dios, min co rnee luu lo zho.

²² Gane niina, racladz no gnë luu dien pe nonguiela ga rdeed no dimi ne razh lo rey Roma, te nonguiela ye.

²³ Bien ga me racladz zho gungüet zho me, dzigo rëbchaa me lo zho:

²⁴ —¡Golneedz tib xpes to nu ganle!

Dzigo bdeed zho tib pes lo me. Blozh ga, rëbchaa me lo zho:

—¿Cho nu? ¿Cho lë nu quia lo pes rii?

Pquiab zho rëb zho:

—Lëë rey Roma i, lëë lë me i quia lo qui.

²⁵ Dzigo rëb me lo zho:

—Mine riegual sca ycaa rey Roma, goldeeda lo rey Roma; scaquegaa mine riegual ycaa Dios, lo Dios goldeeda.

²⁶ Bzee zdoo zho gon zho sca ptsire me lo xtiidz zho. Mazd dzese bre zho, sac bdzield zho zha niungüet zho me; gocladz zho squi ndxie miech nxin me pe tib diidz, per brieelod niungüet zho me.

¿Pe nli zrieaban miech?

(Mt. 22:23-33; Mr. 12:18-27)

²⁷ Blozh ga, güeyaque zla zha saducé lo Jesús. Nac zha saducé riladzd zho zdzin dze grieaban miech; bdzin zho, rëb zho lo me:

²⁸ —Maestro, znu psan Moisés diidz: telne glo mgui guet lo wnaa ne nac tsieel mgui, ni gopd wnaa mëëd, dzigo none betsaque zho ctsieelna wnaa co stib, zeena gap wnaa mëëd ne guiaan xlugar xpëëd zha ne gut ga.

²⁹ Bio tib dii zha co znu bzhaac, gadz bets nac zho. Ptsieelna zha ne nac zha gol, zeene laa zho gut, biaan xpëëd zho.

³⁰ Dzigo ptsieelna wnaa co stib bets ngutoo co. Blozh ga, gutaque zha co, pa së zho nsan mëëd.

³¹ Ptsieelnaque me stib zho, goc zho tson, niicle zha co psandaque mëëd. Sca sca haxta bza gza gadzse zho ptsieelna me,

³² tibaque zeene yeque me laa me gut.

³³ Mine racladz no gacndion no, ¿chopaa dzigo gac tsieel wnaa co, zeene laa zho grieaban, ne sca gza gadzse zho ptsieelna me?

³⁴ Pquiab Jesús rëb me:

—Tiba, gacnan to ganle, lo guielmban riise rtsieelna miech.

³⁵ Zeene grieaban zho, zig nac zha ne yгаа guielnzaac gdzin zho zaatne no Dios, led yedraa ga ctsieelna zho.

³⁶ Sac laa zho mbanle ga, gdzindraa dze guet zho. Masaque laa zho gac zig nac grë xanj me, mëëd gac zho lo me.

³⁷ Laa stiba, gacnan to ganle ible zrieaban grë mengut. Golwi ganle, zeene bzeet Moisés zha rëb Dios lo me zeene gon me tib yag zarz ne noyazbel ga; ga rlu rrieaban mengut. Rëb Dios lo me: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” Zeene sca rëb me, ga rlu ganle mban zha co.

³⁸ Sac tel me, nacd me xDios mengut, sinque xDios zha mban nac me. ¡Par me, grëse zha ne ngab lo me, zha mban nac zho!

³⁹ Blalaa maistr ley zo ga, gon zho sca rëb me lo zha co, dzigo rëbchaa zho lo me:

—Maestro, nli squi naca zigne rnee luu i.

⁴⁰ Dzigotaa ni stib zho beendraa pe nabdiidz zho lo me.

¿Cho xpëëd nac Crist?

(Mt. 22:41-46; 23:1-36; Mr. 12:35-40; Lc. 11:37-54)

⁴¹ Horco bnabdiidz Jesús lo zho, rëb me:

—¿Zha nac dien ne rnee zho tib xpëëdaque rey David gac Men ne nacle diidz cxeel Dios ga?

⁴² Led Davitaque name znu bnee tib lo salm ne pquiaa me:

⁴³ Bnee Dios lo men ne rnabey naa, rëb Dios lo me:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csan naa zho ladvnia luu.”

⁴⁴ Gase ganle rlu, led scada; telne nli zha xti David gac men co, ¿zha nac dzigo ne lëëque David rnee ne me rnabey David?

⁴⁵ Squi ndxie grë miech co noquiaadiag zho, zeene bnee me lo xpëëdsuel me, rëb me:

⁴⁶ —Golguien gon, ib tsienalde to mine run maistr ley. Sac grë zha ne nac maistr

ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdzieel zho zho ro nêz. Zig nac leŋ yadoo, zha nac zha ne rzob lo xcan zaatne rzob grê zha non; zeene riegaa zho tib lo lni lidz miech, lëëpaaze zha nac zha ne rzob groļ mezh zeene laa wagw rac.

⁴⁷ Ni rlozh ga, rio zho rla zho teļ pe ncuane rapse grê wnaa viud; ni parne peet guiabd miech lo zho, xtse rzo zho rzadraa pe lay ne rooļ zho. Sca ruŋ zho, i per ib tedsod nroob caxtigw ne ygaa zho!

21

Gon ne bdeed tib wnaa viud

(Mt. 24:1-2; Mr. 12:41-44; 13:1-2)

¹ Laa Jesús no leŋ yadoo ga noseed me miech. Ga no me, goŋ me zha rdziŋ grê zha ricw, nroob dimi rsaŋ zho leŋ alcanci ne zob ga.

² Tibaque zeene bdziŋ tib wnaa viud, tib meŋ proba, ye me laa me psan chop gaay win leŋ alcanci co.

³ Zeene goŋ Jesúsa, rëbchaa me:

—Gneli naa lo to gaŋle, mazdraa goŋ non gon ne bdeed wnaa viud qui, lëdle grê gon ne psan grê zha qui.

⁴ Sac teļ zha, dimi ne riaaŋle lo zho i rgogon zho; sangue wnaa prob qui goŋ, centav yeen ne quianiese me, miŋe rnalopaa me gziuu pe yquiiŋ me, per laa me bloogona.

⁵ Laa Jesús zieriee ga, zeene psilo bla zha ne nac xpëëdscuel me, rlozhd gwi zho zha niaa yadoo co, rzee zdoo zho ran zho grê quie ne niaaw, grê ncuaneŋ ngalguiee leŋa. Zeene goŋ mew, rëbchaa me lo zho:

⁶ —Niicle squitaa goŋ ran to niaaw niina, per zdziŋ dze ne nitlow, dib nacsew. Ni stib quie qui guiaandraa zigne squi zhobxcuaaw i.

iNsin goļso!

(Mt. 24:3-28; Mr. 13:3-23)

⁷ Bded ga, bnabdiidz zho lo me, rëb zho:

—Maestro, ¿poc dzigo gac miŋe bzeet luu ga? ¿Zha glu zeene laaw ziaadyob gac?

⁸ Dzigo rëbchaa me lo zho:

—Nsin golso, zeena choot yquidiede to. Sac nzian zha ne grieequia, guiab zho laa dze co bdziŋle, guiab zho zha nac Meŋ ne zëëble diidz ga cxeel Dios. i b giladzde tow!

⁹ Zeene gon to pa lo ndxiedil tib guiedz, pa lo noyacgaa grê diļdox, ib gdziebde to. Ib none gac grê ncuaneŋ co, per lega loxaque miŋe csilosew ga.

¹⁰ Grê guiedz nroob, laaw tiļnie saguiedz nrooba; grê zha ne rnabey grê guiedz nroob, laa zho tiļnie sazha rnabey zho.

¹¹ Nêzrii nêzrec csilo gni grê zhodox, nzian zaatne gaŋ miech gbin, zaatne glaangaa zho

grê guieļguidzdox. Nzian grê ncuaneŋ glu zhan gbaa, nzian grê ncuaneŋ co, ncuaneŋ ctseb miecha.

¹² Per ansraa gac grê ncuaneŋ co, stsidil miech to, squianaļ zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziezo zho to lo wxtis ne rnabey guiedz, loxaque porne nac to zha ne no xnêz naa.

¹³ Ga nagon gdeeda diidz gnee to lo grê zha co, gacnaŋ zho gaŋle cho nac naa.

¹⁴ Ib guŋde to tso to zhgab dieŋ pe guiab to lo zho, zeene laa to ctsire lo miŋe rquiaqui zho to;

¹⁵ Sac naa gnedz guieļbiini lo to, zeene laa to gnee guieŋ to pe guiab to. Zha ne gona, squiaadiing zhow, per ni gdziel zho pe ctsire zho lo to.

¹⁶ Haxta pxoz to, xniaa to, bets to, grê menlidz to, grê zha ne ndzieeldiidz to, stsidil zho to, lëëque zha tsielo to ladznia zha ne csacsi to. Lo grê to, zio zha ne haxta zet ladznia grê zha co.

¹⁷ Grëse miech glëe gaŋ to porne nac to zha ne no xnêz naa.

¹⁸ Nli stiche zho xquieļmban to lo guidzliu rii, per, i ni tib guits guic to, grielod zho gnitlo zho!

¹⁹ Tiblique sca golgac, sozite to lo naa, zeena ygaa to guieļmban ndzon ne gneedz Dios.

²⁰ Zeene gaŋ to igose guiedz Jerusalën ndxienap meŋguiib, naŋle to leŋ dze co laaw nitlo.

²¹ Grê zha ne no guiedz ne ngab Judé, none xoon zho tsie zho nêz yagui, ga tsiet-solan zho. Zha ne no Jerusalën nu, none grieniob zho. Grëga zha ne quia dziin dana, ib guiabd zho gbire zho lad guiedz.

²² Tib guieļnëdox ne csiaab Dios gaŋ grê miech rii leŋ dze co, ga gac grê miŋe raquiet lo Xtiidz me ted zho.

²³ iProb grê meŋ wnaa ne lëëtse leŋ dze co zoney xpëëd, meŋ ne quianiegaa mëed ne bii radz! iMbandox ted miech, guieļnëdox ne csiaab Dios gaŋ zho guiedz rii!

²⁴ Zutxuū miech zho, zha ne tedlaagaa lo guieļgut zeyzhoo miech zho, zhaase zhaase dan ne gueynie zho zho. Horco laa grê zha zit co, sëeb guncheŋ Jerusalën; haxta gdziŋ dze ne gnabey Dios griee zho.

Ziaad Jesús stib

(Mt. 24:29-35, 42-44; Mr. 13:24-37)

²⁵ Nzian grê ncuaneŋ glu lo ngbidz, glu lo mëe, glu lo mel. Mbanse gac miech, dziedbdox zho zeene gon zho bidox ne tso tsasoli nisdo.

²⁶ Nzian zha ne haxta scow zho lo dzeb, zeene laa zho gaŋ grëtaa ncuaneŋ noyac lo guidzliu leŋ dze co. Grê ncuaneŋ no zhan gbaa, nêzrii nêzrec gaca.

²⁷ Horco bii zan zho ganle zeene laa naa zialzëeb tib lo xcow con grë guielndzon, con grë poder ne rap naa.

²⁸ Zeene gan to laa grë ncuuan co rsilo noyac, nley golco zdoo to; jsac hor co laa Dios ycaania to!

²⁹ 'Golzoob cuidad ganle zha nac yag guigw, beelzegaa pe stib yag.

³⁰ Led ran to ganle, zeene laa grë zhicwa racnieen, laa zhiblaga rsilo rdzib, gase runbey to laa mëë nëëg ziaadgaxle.

³¹ Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne csilo gnabey Dios ziaadgaxle.

³² Gneli naa lo to ganle, nzian grë miech ne mban niina, bii zan zho zeene laa grë ncuuan co gac; sac ible ncuuane gaca.

³³ Zdziñ dze ne nitlo gbaa, nitlo guidzliu, sangue mine rne naa lo to nu nitloda; ible laaw none gac.

³⁴⁻³⁵ jNsin sca golso, zaacse golgac! jAdel gal dze ne laa naa guial, lel lo grë ncuuane ndzinlid, lel lo guielgonziu, lel lo grë zhgab ne rac lo guidzliu rii no to, zigne guñ grëraa miech! Sac gon, lega naclew glanso naa.

³⁶ Nligaa nsin golso. Tibaque golnab lo Dios, gacnien me to peet gacde to lo grë guielnë co, ine peet xtolde to zeene laa to gacredz lo naa.

³⁷⁻³⁸ Gzase len dze co pseed me miech. Silgaw, miech guizhiu ne rdziñ len yadoo, parne yquiaadiag zho zhiwseed me. Guidze sca rseed me zho, laa pcow liu riebëz me cho Gui Oliv.

22

Bnediidz zho dien zha gnaaz zho Jesús
(Mt. 26:1-5, 14-16; Mr. 14:1-2, 10-11;
Jn. 11:45-53)

¹ Ziaadyoble lni Pascwa, zhilni nroob men Israel, lni ne row zho guietxtil ne rquiad ncobi lad.

² Grë zha ne nac pxoz rnabey ni grë maistr ley, len dze co laa zho no quiaguib zho dien zha gut zho Jesús. Noguib zho tib mod ne glisquid menguedza; sac rdzieb zho gacntseeb menguedz.

³ Tib dzew, laa mendox bzëeb zdoo Judas Iscariot, tib zha ne rzëniepaa me ga,

⁴ rias Judas güey Judas lo grë pxoz rnabey co, lo grë men ne zo lo zha ne rquiapan yadoo, rëb Judas zha csañ Judas Jesús lадznia zho.

⁵ Zeene bin zhow per nli rley zho, nacne biaan zho diidz quizh zho Judas.

⁶ Dzigo desde hor co psilo Judas noguib Judas dien zha gdeeda diidz guien miech csañ Judas me ladznia zho.

Dowxtseenie Jesús xpëëdsuel me
(Mt. 26:17-29, 31-35; Mr. 14:12-25, 27-31;
Jn. 13:21-30, 36-38; 1Co. 11:23-26)

⁷ Mer dze ne rsilo lni Pascwa, len dze ne sca row zho guietxtil ne rquiad ncobi lad, ni rut zho carner yeen ne rowxtsee zho.

⁸ Dze co bnabey Jesús Pedr grop Juan tsieguñlo zho xtsee ne gownie me zho wdze co.

⁹ Dzigo bnabdiidz zho lo me, rëb zho:

—jPa lo racladz luu guio no guidziuunlo now?

¹⁰ Rëbchaa me lo zho:

—Goltsie Jerusalén. Zeene sëeb to lad guiedz, ga gan to tib mgui nzobyan tib re nis, goltsienal zhits me. Yu ne gan to sëeb me,

¹¹ golguiab lo bizhuan yu co: “Znu në Maestro, jpa len yu me gneedz luu gac zaatne gowxtseenie me xpëëdsuel me wdze rii?”

¹² Ga glu me tib len yu nroob ne riaan glaa, nzhixcuaale lena, dzigo ga golguñlo zhixtsee ne.

¹³ Dzigo laa zho zie. Güey zho zaatne pxeel me zho ga, ga beenlo zho xtsee co.

¹⁴ Wdze co, zeene gol hor xtsee laa Jesús bded lo mezh gza me gza tsiipchop xpëëdsuel me. Xtsee co no zho,

¹⁵ zeene rëb me lo zho:

—jBlaclaa gon pquiambëz naa gdziñ dze rii, znu gowxtseenie naa to nawdze rii, ansraa csacsi miech naa, gut zho naa!

¹⁶ Lëë lultm vuelnt nu gon teed naa lni Pascw rii, haxta gdziñ dze ne laa Dios csilo gnabey, dze ne glupaa ganle zha nac xtsee rii.

¹⁷ Dzigo bzhen me tib cop nroob no vin, bdeed me xquizh lo Dios, blozh ga bdeed me cop co lo zho, rëb me:

—Golquiin vin rii gza to.

¹⁸ Gneli naa lo to ganle, lëë lultm vuelnt nu guie naa vin rii, haxta gdziñ dze ne laa Dios csilo gnabey.

¹⁹ Ni bzhen me guietxtil, bdeed me xquizh lo Dios, blozh ga beengrol mew bdiiz mew lo zho, rëb me:

—Golquiina, rriequia gon lëë xcuerp naa i, sac gon znu guñ zho xcuerp naa parne csilaa naa to grë to. Zeene gdeedtaaw diidz, golguñ min rii parne glu to ganle tibaque rsoladz to naa.

²⁰ Blozhse dowxtseenie me zho, scaque bzhen me stib cop no vin, blozhse bdeed me xquizh, rëb me lo zho:

—Lëë stib trat cub nu gon riaan Dios grë me miech, rriequia xchen naa nu nac vin rii, ren ne gzhiee xcuent to, ren ne tso firm trat co par glu nona.

²¹ Ni gacnan to ganle, lo mezhaque nu gon zob zha ne tsielo naa ladznia zha ne gut naa.

²² Naa ne nac naa Mgui ne pxeel Dios, nli, ible none guet naa, parne gac mine pxeel Dios naa zialguñ naa, jper probsaxe zha ne tsielo naa ladznia zha co!

²³ Horco psilo gza zha ne zobnie me ga, rnabdiidzlsa zho dien cho nac zha ne rzeet me ga;

²⁴ haxta psilo zho nodiidiidz zho dien cho gac zha ne gacnon lo zho.

²⁵ Dzigo bnee me lo zho, rëb me:
—Nli grë zha ne rnabey guiedz ne ndxie lo guidzliu, masaque rnabey zho miech zig nac zeene bzhii zho zho, per zha gunraa miech, lëe gdib rxecw zho, haxta rnee zho nroob quiaiyun zha co xyudar guiedz.

²⁶ Sangue to gon, zha ne gnabey lo to, none guien zho gac zho zig tib ngundziin lo to; zha ne racladzga gacnon, none guien zho guiaanwin zho.

²⁷ Lo guidzliu rii, zha ne rnabey, rzobse zho, zha ne nac ngundziin, zha co rdziib ncuuane row zho. ¡Sangue lo ne, led scad naca! ¡Golwi ganle, tib ngundziin nac naa lo to!

²⁸ Tose goc zha ne tibaque gocnie naa lo grëtaa mine bdeed naa len dze rii.

²⁹ Gane niina, laa naa gneedz tib guielnzaac nroob lo to ygaa to gdziñ to zaatne bneedz Pxo z naa gnabey naa;

³⁰ zeena ine znu tipse zioob ne lo xmez naa ga, dioow ne, dio ne. Haxta so naa to, to gac zha ne cobey, pe nac mine been gza tsiipchop dii ne nac menladz to nu.

³¹ Horcoque bnee me lo Pedr rëb me:
—Bina ganle Pedr, racladz Satanás gon ycuuib ma to, zigne run zho zho bxtil.

³² Per laa naa bnable lo Dios, gacnieñ me luu, csaand me sozitpa luu lo naa. Gacxe waa, zeene guien luu lëda ga been luu, luu gnee lo grëraa zha qui, parne tibaque dib zdoo zho gnalo zho naa.

³³ Pquiab Pedr rëb Pedr:
—Niicxe peraa waa gac, csaand naa luu. Telne co zho luu ladzguuib, ye naa tso ga, ¡telne gutgaa zho luu, zaatne guet luu, ga guet naa!

³⁴ —Bina ganle Pedr —rëb Jesús—. ¡Guieel riigazh gon, gardle ycuedz gall, tsonle vuelt rëb luu runbeyd luu naa!

³⁵ Dzigo bnee me lo zho gza zho, rëb me:
—Led rsoladz to ganle zeene pxel naa to güeyseed to miech, scase güey to, peet dimi bide to, per ni ncuuane gow to, per ni lab to bide to. ¿Pe beenfalt ncuuane nquuin to horco?

Pquiab zho rëb zho:
—Beenfaltedew.

³⁶ Dzigo rëbchaa me:
—Horco nagon peet bide to, sangue niina zha ne quianie dimi, zha ne quaniegaa ncuuane gow zho, none güey zhow. Niina nagon none laa to yquuin spad. Zha ne quianieda, none maase tib xab zho cto zho, si zho tiba.

³⁷ Sac nataa nagon, laa miech cteed naa mine zho bnee lo Xtii dz Dios, zaatne rnee:

“Bnabey zho gut me, zigne rut zho grë zha ntseeb.” Grëse mine zho bnee teed naa, ib laaw none gac niina.

³⁸ Pquiab zho rëb zho lo me:
—¡Bui ganle laa chop spad nule!
Dzigo rëbchaa me:
—¡Mazd peet gnedraa naa lo to!

Bzodiidznie Jesús Pxo z me Getsemani
(Mt. 26:36-46; Mr. 14:32-42)

³⁹ Blozhse ga, laa me brie zie me nëz Gui Oliv, zaatne riettaque me; ziana laque gza xpëedscuel me zhits me.

⁴⁰ Bdziñ zho ga, rëbchaa me lo zho:
—Golnab lo Dios gacnieñ me to, zeena yquuid mendox to.

⁴¹ Bzë me spalal, bdziñ me zig zaatne riab tib quie ne rcheñ ne nia ne, dzigo ga pquuitsgzhib me, psilo me bna b me lo Dios, rëb me:

—Papá, laa naa rnab lo luu, telne zala zdoo luu, psilaa naa lo grë guielnë rii. Per telne grieeloda, mine gnëtaa luu sca gaca.

⁴³ Horco biet tib anjl gbaa bdziñ pchoobladz zdoo me.

⁴⁴ Mban rac me laa me nozodiidznie Pxo z me, per hor cole mazdraa rnab me lo Pxo z me; lo guielnë ro co haxta rzonis me, masaque zëbdzuun grë nis co lo me zootle ren.

⁴⁵ Zeene laa me guso ga, bdziñ me zaatne biaan xpëedscuel me, gon me gzase zho laa zho nixguies. Ye zho mban rac zho, lo guielnë co bguudz zho mcaal.

⁴⁶ Dzigo pcuaan me zho, rëb me lo zho:
—¿Nixguies to ye? Lëda i gon, ¡golsobnal Golnab lo Dios, gacnieñ me to, zeena yquuid mendox to.

Bnaaz zho Jesús

(Mt. 26:47-58, 67-75; Mr. 14:43-50, 53-54, 65-72; Jn. 18:2-18, 25-27)

⁴⁷ Laa Jesús quianeeque, zeene laa Judas bdziñ bdziñnie Judas tib dzoon miech. Zigne bdziñ Judas, wbig Judas lo me, dow Judas bzhid cuas me.

⁴⁸ —¡Judas! —rëb me—. ¿Con tib bzhid dzigo lëe glu luu naa lo grë zha qui?

⁴⁹ Zeene bien xpëedscuel me, me zianaaz grë miech co, rëbchaa zho lo me:
—Maestro, ¿zha dziuun ne? ¿Pe zdeed spad no zho?

⁵⁰ Znuse biet tib zho pcheñ zho tib nia spad, pchug zho diag tib xmoz men ne nac pxoz nroob.

⁵¹ Dzigo bnee Jesús lo zho rëb me:
—Golsaan zho, ndzinli golgac.

Horco wbig me bzhen me diag zha co, beenguiaac mew, lëetse min derecha.

⁵² Lad grë miech co no ndal grë pxoz ne rnabey, grë zha ne zo lo zha ne rquianap yadoo, ni spalal men ne nac zha non lo menguiedz; dzigo bnee Jesús lo zho, rëb me:

—¿Pe nacne squitaa ziaad to, nzhən to yag, nzhən to spad ziadnaaz to naa? ¿Niacxe naa cho ngbaan?

⁵³ Blactaa dze name goṇ to no naa len yadoo, ni bnaazde to naa ga. Per nole guic to nagon nawdze rii gnaaz to naa; grē miṇe racladz to grē to meṇdox, niina laaw gac.

⁵⁴ Horco wbig be zho bnaaz zho me, laa zho zienie me nēz lidz meṇ nac pxoz nroob.

⁵⁵ Bdzin zho lidz meṇ co, bre zho xley me, bzēeg zho gui, laa zho no nodzēē zho. Ye Pedr maase zit zit naḷ Pedr, laa Pedr bdzin ga; laa Pedr wbig bzob lo zho ga.

⁵⁶ Zeene goṇ tib wnaa ne quia xtsiin meṇ co laa Pedr zob ga, dze rwi me, tibaque rēb me:

—¿Ye mgui qui goṇ rzēnie meṇ ne blansonie to i!

⁵⁷ —¿Naa ye? —rēb Pedr—, iṇer ni runbeyd naa meṇ qui!

⁵⁸ Wdzeepaaw, laa tib zha ne zo ga, gonaque Pedr, rēb zho lo Pedr:

—¿Segur lēē ye luu nacie meṇ ne bgaa i? Scaaque bneelid Pedr.

⁵⁹ Wdzeelaaque goca, zeen laa stib zho brieequia, rēb zho:

—Lēē tib zha ne nacie meṇ qui nu goṇ. ¡Rlu zha galilé nac zho!

⁶⁰ Pquiab Pedr, rēb Pedr:

—¿Riend naa goṇ, pe nacne squi rnee luu! Gardle lozh griee diidz co ro Pedr, zeene laa tib gall pcedz.

⁶¹ Gall co nocuedz, zeene ptsire lo Jesús, dze bui me lo Pedr; dzigora psoladz Pedr zeene rēb me lo Pedr: “¿Guiel riigazh goṇ, gardle ycuedz gall, tsonle vuelt rēb luu runbeyd luu naa!”

⁶² Mbanse rac Pedr. Brie Pedr ga, psilo Pedr biin Pedr guielṇe co.

⁶³ Grē zha ne zopaa quianap Jesús, nzian grē ncuane run zho me, psilo zho nonyunguzee zho me.

⁶⁴ Pxidoo zho lo me, ni rguin zho me, rlozh ga, rnee zho:

—Luu ne nac luu meṇ ne ziadteed xtiidz Dios, ¿bnē sca dien cho ga bdiṇ luu?

⁶⁵ Nzian grē ncuane rgoredz zho lo me.

Güeynie zho Jesús lo zhiwxtis zho

(Mt. 26:59-66; Mr. 14:55-64; Jn. 18:19-24)

⁶⁶ Zeene biini liu, pcaalsa grē meṇ ne nac zha non lo menquiedz, grē zho pxoz rnabey, ni grē zha ne nac maistr ley, güey zho güeynie zho Jesús lo zhiwxtis zho. Bdzin me ga, bnabdiidz zho lo me rēb zho:

⁶⁷ —Bnē lo no dien, ¿pe lēē Meṇ ne nacle diidz cxeel Dios lo guidzliu ga i nac luu?

Pquiab me rēb me:

—Niicle telṇe gni naa lo to nli lēē meṇ co nu nac naa, gliladzde tow,

⁶⁸ telṇe pe gnabdiidzгаа naa lo to, ctsirede to low; sac gliladzde to miṇe nac diidzli.

⁶⁹ Naa ne nac naa Mgui ne pxeel Dios, zhile laa dze gdzin zeene laa naa sob cue Dios nēz derech, meṇ nroob ne rrieelo run grēse ncuane racladz me.

⁷⁰ Horco grēse zho pquiab, rēb zho lo me: —¿Xpēēd Dios dzigo lēē nac luu?

Dzigo rēbchaa me:

—Tozhal name rnee, nli Xpēēd me nac naa.

⁷¹ Horco rēb zho:

—¿Pe mazdraa textigw ne racladz ne! ¡Laa ne bdzionle ganḷe mezhah rnee Xpēēd Dios nac me!

23

Güeynie zho Jesús lo Pilat

(Mt. 27:1-2; 11-14; Mr. 15:1-5;

Jn. 18:28-38)

¹ Horcogazh pcaanie zho Jesús nēz, bdzinie zho me lo Pilat, meṇ ne nac gubernador ne nzoob zha Roma ga.

² Ga psilo zho nzian grē ncuane rquiaqui zho me, rēb zho:

—Laa no bnaaz meṇ rii goṇ ziaadnie no me lo luu, sac bgaa me noquill me menladz no gactseeb zho. Rnee me lo zho nonguielḷa gdeed zho dimi ne razh lo zhirey ne, meṇ ne zob Roma; haxta rnee me mele nac rey ne gunbey zho, sac Dios pxeel me ziaad me.

³ Dzigo bnabdiidz Pilat lo me, rēb Pilat:

—¿Pe nli na luu nac Rey ne rnabey lo zha Israel?

Pquiab me rēb me:

—Nliw, rey nac naa zigne rnee luu i.

⁴ Dzigo rēbchaa Pilat lo grē zha ne ne nac pxoz rnabey co, ni grē miech ne zieggrē zho ga:

—¿Ni tib dolḷ rapd meṇ rii!

⁵ —¿Zha gapd me dolḷ? —rēb zho—. Ni zaatne zieetaa me noquill me miech gactseeb zho lo zhirey ne. ¡Dible nēz Judé nu güeyted me; desde nēz Galilé brie me ziaad me haxta nu!

⁶ Goṇ Pilat sca rēb zho, dzigo bnabdiidz me dien pe zha Galilé nac Jesús.

⁷ Zeene gocnan me zha nēz co nac Jesús, dzigo pxeel me Jesús lo Herod, sac Herod rnabey nēz Galilé; lēētaque len dze co laa Herod no Jerusalén ga.

⁸ Rley Herod zeene goṇ Herod me, sac ziyon Herod grētaa mine run me; quiambēz Herod gdzin dze ganḷo Herod me, ganḷo Herod gun me pe tib milagr.

⁹ Psilo Herod nzian grē ncuane rnabdiidz Herod lo me, per ni tib lo wnabdiidz co ib ptsired me.

¹⁰ Zeene goṇ Herod rquiaabd me, ni goṇ Herod noque grē pxoz rnabey co, grē maistr ley co, ib rioogd ro zho rzadraa pe yquiaaqui zho me, rnab zho cteed Herod me caxtigw,

¹¹ nacne leḷ psilo Herod grē xmenguib Herod rzhidnie zho me, ruṅguzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat.

¹² Glo ib rdzieeld xtiidz Herod grop Pilat, laa dze co laa zho psilo bneewen stib.

Bnab zho guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dzigo bnabey Pilat pcaalsa grēse pxoz rnabey, grē zha ne nac zhiwxtis zha Israel, ni grēraa menguedz,

¹⁴ rēb Pilat lo zho:

—Laa zho biad-zoob xdemand meṅ rii lo naa nu, nac diidz noquuil me miech gacntseeb zho lo zhirey ne. Nacne pquiep naa me, ni blalagaa to gonā; par naa peet dol rapd me.

¹⁵ Niiclegaa Herod, ye Herod gon ni tib dol rapd me; gane pxeelaque Herod me lo naa. Quiaayund me ncuaaṅe guiab ne rieguial guet me.

¹⁶ Miṅe gaca, laa naa gnabey ted me tib caxtigw, lozh ga dzigo laa naa csilaa me.

¹⁷ Nac costumbr, gzobse lni Pascw rsilaa zho tib zha ne no xcuent lo wxtis.

¹⁸ Per zeṅe bin grē miech co laa Pilat csilaa Jesús, grēse zho nguiedz roptsie zho, rnee zho:

—jCsilaad luu meṅ qui, bnabey guetgazh me! jBarrabás psilaa!

¹⁹ Barrabás lē tib meṅ co no ladzguiib leṅ dze co, sac bgaa me zo me lo tib dii zha ne noyactseeb lo rey leṅ guiedz Jerusalén ga, ni zēēbaque me tib ngutoo.

²⁰ Bguib Pilat dien zha nrieelo nsilaa me Jesús,

²¹ per psilo grē miech co nguiedz roptsie zho, rnee zho:

—jNone guetgazh meṅ qui! jLo cruz bnabey yquia me!

²² —Per, jpe nacne gnabey naa yquia me lo cruz? —rēb Pilat stib—. jPe nac falt ne rapd me? Laa naa pquieple me, ni tib dol rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

²³ Psiloque grē miech co stib, nguiedzraa roptsie zho, rnab zho yquia Jesús lo cruz; haxta goc miṅe racladz zho.

²⁴ Racse Pilat, laa Pilat bdeed diidz.

²⁵ Blozhse bnabey Pilat psilaa zho Barrabás, zha ntseeb ne no ladzguiib ga, dzigo laa Pilat psan Jesús ladznia zho.

Güeyquiaa zho Jesús lo cruz

(Mt. 27:32-44; Mr. 15:21-32; Jn. 19:17-27)

²⁶ Horco laa zho brieenie Jesús laa zho zienie me zaatne yquia me lo cruz. Nēz zienie zho me, bdzieel zho tib meṅ Ciren lē Simón wbiere lo dziin dan, pcutēz zho meṅ co, bnabey zho me bi me zhicruz Jesús; nalṅe me zhits Jesús, laa zho zienie Jesús.

²⁷ Miech guizhiu ne zie ga, ndal grē meṅ wnaa psilo zho roon zho no zho xquieḷnē me,

²⁸ dzigo dze bui me lo zho, rēb me:

—Xin, nac to meṅ Jerusalén rii, goonde to xquieḷnē naa. Mazd golgoon por grētaa guieḷnē ne no gaṅ to, por grētaa guieḷnē ne no gaṅ xpēēd to;

²⁹ sac zeṅe gaḷ dze co grē meṅ wnaa ne quianie mēēd, ziab zho: “Mazd wenaque zie zha ne quianied mēēd, zha ne nand zha radz mēēd, zha ne niaadgaa gap mēēd.”

³⁰ Horco grē miech, laa zho gnab tebaa zha pixche grē gui guiaan zho zhana.

³¹ jGolwi ganle, telne znutaa miṅe nodeed naa nac naa zig tib yag nguia, peleḷ to dzigo ne nac to zig tib yag bidz!

³² Ye schop zha ne nac ngbaan, zienie zho ga yquiaagza zho me lo cruz.

³³ Zeṅe bdziṅ zho zaatne nac “Gui Beer-guic Ngutoo”, ga pquiaa zho me lo cruz gza me ngbaan co. Tibga zhicruz zho bzo tib nēz cue zhicruz me.

³⁴ Lo cruz co quia me, zeṅe nguiedz bnee me rēb me:

—jPapá! Ncuaaṅe quiaayun grē miech rii nu, bzhiguiel guṅquizhd luu zhow; sac riend zho pe run zho.

Gza menguib ne bdziṅ ga yquiaanap me, hor co tib tib zho bzhense zho tib lē xab me, laa stiba bio zho rif.

³⁵ Ndal miech ne ndxie quiawi. Haxta grē zha ne nac wxtis zo ga, no zho rzhidnie zho me, rnee zho:

—Stib miech scataa beenguiaic me, stib miech scataa bla me. jPe rac me na ne riete me i? jGüet me i zho, telne nli me nac Meṅ ne zēēble diidz cxeel Dios, telne nli Dios bzooblo me ziaad me!

³⁶ Wbig menguib co rdeed zho nziu bla guie me, rzhidnie zho me, rnee zho:

³⁷ —jZhirey zha Israel name nac luu! Psilaa luu lo guieḷnē qui nazho.

³⁸ Glaa guic zhicruz me quia choplan diidz ne pquiaa zho, rneew: “LĒĒ ZHIREY ZHA ISRAEL NU.”

³⁹ Grop ngbaan ne quianie me lo cruz ga, psilo tib zho ye zho rzhidnie me, rnee zho lo me:

—jLed rēb luu lēē, luu nac Meṅ ne zēēble diidz ga cxeel Dios! jBlu nazho nli meṅ co nac luu, psilaa ne lo guieḷnē rii!

⁴⁰ Horco pquiab stib zha co, rēb zho lo zho:

—jPsoog ro luu! jPe niicle niina ne laa luu guetle ib rdzieebd luu Dios?

⁴¹ Bien ganle, jtel ne ible miṅ rii rioguial ne grop ne, nu nodizh ne grē guieḷntseeb ne bdziuuṅ ne; sangue meṅ qui, peet dol rapd me!

⁴² Dzigo rēb zho lo me:

—¡Bzhiguiel zeene guiaad luu gnabey luu, ib csand luu naa tib lad!

⁴³ Pquiab me rëb me lo zho:

—Peet tsienied guic luu, nadzegazh laa luu së guioo ne zaatne nac lo xquielbley PxoZ naa.

Gut Jesús

(Mt. 27:45-56; Mr. 15:33-41; Jn. 19:28-30)

⁴⁴⁻⁴⁶ Goļ grol dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres biaa biini stib. Horco pquiaa Jesús tib redz nroob, rëb me:

—Papá, laa naa rsan zhiesspiritu naa ladz-nia luu, luu pcaaniaw.

Diidz co brieo ro me, znuse blozh me. Laa me quialozh, zeene laa lar nroob ne quia leñ yadoo Jerusalén ga briez nzoli, groltaa goca.

⁴⁷ Zha ne rnabey lo zhaguib ne pquiaa me lo cruz ga, zeene gon zho zha blozh me, bien zho Dios been miñ co, rëb zho:

—¡Ne nlipagaa tib meñ peet xtold goc men qui!

⁴⁸ Scaque grë miech ne goclo ga, zeene gon zho zha blozh me, biabguieñe zho, mbanse rac zho laa zho wbi ga.

⁴⁹ Laa grë zha ne runbey me, zha ne gocnie me, zig nac grë men wnaa ne gocgrë zha ne brieenaļ zhits me zeene brieo me nëz Galilé, grë zho laa zho ndxiese tib lad rwi zho.

Bgueets Jesús

(Mt. 27:57-61; Mr. 15:42-47; Jn. 19:38-42)

⁵⁰ Lad grë zha ne nac zhiwxtis meñ Israel ga, no tib meñ guiedz Arimaté lë me José; lëë guiedz co ndxie xtan Judé. Tib miech wen nac me, noxco me miñe rnabey Dios,

⁵¹ ye me quiambëz gdziñ dze ne csilo gnabey Dios. Zeene bnabey zha ne nacgrë me dziin ga zha gac Jesús, ni lalnu biod me conform miñe bnabey zho.

⁵² Nacne hor co güey me lo Pilat, bnab me diidzbey tsielit me xcuerp Jesús lo cruz.

⁵³ Dzigo güey me, blozhse blit me cuerp co lo cruz, pcheļ me me tib lo lar nroob, güey me güeyqueets me me tib leñ baa cub ndieen tib cho quie gax ga.

⁵⁴ Lëë bdze dze co no zho xco ne laa dze ne gdziiladz zho lo dziin sëëb.

⁵⁵ Grë meñ wnaa ne sca nacga grë zha ne brieenaļ zhits me zeene brieo me nëz Galilé ga, ye zho güeynaļ bgueets me, gon zho pa lo bio me.

⁵⁶ Blozhse bgueets me, laa zho zey. Bdziñ zho bzhixcuaa zho, tiblo zënex ne tsietëëb zho lad xcuerp me; dzigo laa zho bdziiladz zigne rnabey ley no guñ zho.

24

BRIEBAN JESUS

(Mt. 28:1-10; Mr. 16:1-8; Jn. 20:1-10)

¹ Laa zeene goļ dze ne rzobni zhmaļ, sil-gaw laa gza meñ wnaa co brieo, bi zho grë

zënex ne bzhixcuaa zho ga, laa zho zie ro baan Jesús.

² Bdziñ zho, gon zho laa quie ne bioog ro baan me ga bdiooble;

³ bzëëb zho leñ baa gon zho, niicle xcuerp me guiendle ga.

⁴ Laa zho zo ga, riend zho dien pe nacne sca nialse ro baa co, pe nacne niicle xcuerp me guiend leen co. Tibaque zeene gon zho laa chop meñ bgui zole lo zho ga, masaque riaazbel lad xab grop meñ co.

⁵ Horco per nli bdzieb zho, lo dzeb co miñe been zho laa zho pquitsgzhib haxta bdziñ lo zho lo liu. Dzigo rëb grop meñ bgui co lo zho:

—¿Pe nacne ziaadguib to meñ mban za-atne rio mengut?

⁶ ¡Laa me brieo banle! ¡Guiendle me nul Golsoladz ganle zha në me lo to leñ dze ne no me nëz Galilé,

⁷ në me: “Mgui ne pxeel Dios, ible none guiab me ladzna grë miech ngoopdol, squiaa zho me lo cruz, per zeene gac tson ngbidza, laa me grieo ban.”

⁸ Dzigoraa psoladz zho, nligaa sca bnee me,

⁹ hor co lëë lëd güeynie zho diidz lo gza tsi-iptib zha ne nac xpëëdsuel me, ni lo grëraa zha ne nacgza zho ga.

¹⁰ Nzianlaa nac meñ wnaa co, lad co no Mari Magdal, no Zhuan, ni Mari ne nac xniaa Jacob.

¹¹ Niicle bzodiidz zhow lo xpëëdsuel me, per con rnee zho led ncuaañ gacd ga, ni lalnu bliladz zhow.

¹² Tibaque zeene brieo Pedr, rias Pedr laa Pedr zie nëz ro baa. Bdziñ Pedr bdiixlo Pedr leñ baa co, gon Pedr nligaa, ļloxaque lar ne briel me zhoob leen co! Blozh ga, laa Pedr zeyaque, rzee zdoo Pedr gon Pedr nli guiendle xcuerp me ga.

Gon zho Jesús nëz Maús

(Mr. 16:12-13)

¹³ Dze co brieo chop xpëëdsuel me zie zho tib guiedz win lë Maús. Gax Jerusalén riaañ guiedz win co, maase chop hor rzë zho rdziñ zho ga.

¹⁴ Nëz no zho nozodiidz zho grë miñe pteed miech Jesús ga,

¹⁵ tibaque zeene bien zho laa zho bgaa tib lo meñ co, gocgza me zho laa zho no nëz, per, iļb biend zho lëë Jesús ga!

¹⁶ Raņlo zho laa me ziegza zho ga, per ni lalnu beenbeyd zho ne mew, sac zig nac zeen pe tib ncuaañe ptse lo zho.

¹⁷ Dzigo rëb me:

—¿Pe squitaa nozodiidz to? ¿Pe nac squi rac to, zig nac zeene pe guieñe no to?

Dzigo bzodze zho. Mban rac zho, haxta lo zho rlu nroob guieñe no zho.

¹⁸ Pquiab tib zha ne lë Cleof, rëb zho:

—¿Niacxe bind luu ganle zha nactaa ncuuañe goc Jerusalén len dze rii? Grése zha ne name güey Jerusalén, gocnaña.

¹⁹ —Nligaa —rëb me—, ¿pe dien goc ga?

Rëbchaa zho:

—Len dze rii psacsi zho men Nazaret ne lë Jesús. Tib men ne biadteed xtiidz Dios lo miech nac me, nzian grë milagr nroob ne been me; miech guizhiu ne bley pquiaadiag zhiwseed me. Rlu tib men nziuu nac me lo Dios.

²⁰ Per lel briece grë pxoz rnabey, grë zho zha ne nac wxtis, bnaaz zho me, bnaab zho gut me, pquiaa zho me lo cruz.

²¹ Tibaque rdzieets no, me niac tib men ne nsilaa zha ladz ne ladznia zha Roma. Pasëse min co niac, nadzele rac tson ngbidz beet zho me.

²² Per riend no dien zha nac cuent co, sac nasil güey bla men wnaa ne nacgrë no ro baan me,

²³ zeene wbire zho bzodiidz zho lo no në zho guiendle xcuerp me len baa, loxaque chop anjl briecequia lo zho ga, rëb anjl co mban me.

²⁴ Blozh ga, güeyaque bla zha bgui ne nacgrë no, gon zho nligaa guiendle xcuerp me ga.

²⁵ Dzigo rëbchaa me lo zho:

—¿Nadzpaa ncow nac guic to, nadzpaa ndip nac zdoo to! ¿Riladzde to grë mine dzigo lëe bzeet zho padzeela ted Men ne nole diidz ga cxeel Dios?

²⁶ Bzeetele zha co name ible no csacsi miech me, antes ne gbire me lo guielndzon ne no me.

²⁷ Dzigo psilo me bnee me lo zho pa lo zhubnee grë mine bded me ga, psilo me desde grë mine pquiaa Moisés, haxta grë mine pquiaa grëraa zha ne biadteed xtiidz Dios.

²⁸ Sca no zho nëz laa zho bdziñ Maús. Bdziñ zho ga, rac me zig nac zeene tib ted me,

²⁹ dzigo quia zho rnab zho lo me cuëz me ga, sac laa dze bdzele, zhile laa liu ycow. Nacne blëz me.

³⁰ Laa zho zob lo mezh gowxtsee zho, bzhen me quietxtil bdeed me xquizh lo Dios, blozh beengrol mew bdeed mew lo zho.

³¹ Dzigoraa zig nac zeene bzhal lo zho, laa zho beenbey me. Per par nianraa zho me, znuse bnit me lo zho, gonraa zho me.

³² Horco per nli rley zho rnee zho:

—Con razon zeene sca ziaadgza ne me nëz nonee me lo ne zha raquiet lo Xtiidz Dios, masaque tib guiebley nroob ne biaadnie xcodiidz me zdoo ne.

Sca rnee zho, sac bien zho bdziñ tib guiebley nroob zdoo zho, zeene sca nonee me lo zho.

³³ Lëelëdaque briece zho ga, bio zho nëz wbire zho Jerusalén stib. Bdziñ zho lo gza tsiiptib zha ne bzëniepaa me ga, ni grëraa zha ne nacgrë zho,

³⁴ rëbchaa zha co lo zho:

—¿Tebaa gan to ganle nli brieceban xmaistr ne! ¡Laa Pedr gonle me!

³⁵ Psiloque zho grop zho bzodiidz zho zha gon zho me no zho nëz, per haxta horne no zho xtsee, zeene laa me beengrol quietxtil dzigoraa beenbey zho me.

Briecequia Jesús lo grë xpëedscuel me

(Mt. 28:16-20; Mr. 16:14-20; Jn. 20:19-23)

³⁶ Lëëtaaque sca nozodiidz zho, tibaque zeen gon zho laa Jesús zole lo zho ga, pquiaabdiuzh me zho, rëb me lo zho, peet tsieniedraa guic zho.

³⁷ Lel rdzieb zho, haxta rzhidz zho lo dzeb co, sac rëb zho bod ndziin ga ran zho.

³⁸ Dzigo bnee me lo zho rëb me:

—¿Pe nacne rdzieb to? ¿Pe nacne riladzde to naa nu?

³⁹ Golwi len nia naa, golwi zhits ni naa ganle. Golxeen naa, zeena gliladz to ganle nli naaw; sac tel ndziina, mese naca, gacd xen tow.

⁴⁰ Sca quianee me, blu me nia me, blu me ni me lo zho, zaatne biaaz me clav.

⁴¹ Per nli rley zho, rzee zdoo zho, per riladzdaque zho dien pe nli paa lëe me ga. Gon me sca rac zho, nacne bnaab me ncuuañe gow me lo zho.

⁴² Dzigo bdeed zho tib lë mel bguiee lo me,

⁴³ bnaaz me mel co, squi ndxie zho gon zho dow me ma.

⁴⁴ Dzigo rëb me lo zho:

—¿Pe ib rsoladzde to nile naa laa grë min rii no gac? Led ni naa lo to, grëse mine bzeet Moisés, grëse mine bzeet grë zha ne biadteed xtiidz Dios, mine raquietgaa lo Salm teed naa, ible laaw none gac.

⁴⁵ Psilo me clar nonee me lo zho, parne guienpaa zho zha zhubnee lo grë guits co,

⁴⁶ rëb me:

—Ible lo co zhubnee sca teed naa ne nac naa Mgui ne pxeel Dios, rneew ib no gut miech naa, per zeene gac tson ngbidza, laa naa grieeban.

⁴⁷ Rneew, Jerusalén nu, nu csilo gacnan miech ible none csaan zho xquieñtseeb zho, gnalo zho naa, parne gon Dios zho perdon.

⁴⁸ Ni to gon ganle grëse min co, goca.

⁴⁹ Na len dze ne ziaadaque nu, laa naa cxel Espiritu Sant gacniñ to, sac ib scale nac xtiidz Pxoaz naa. Per guiabde to niinaga griece to tsienee to lo miech, Jerusalense nu golcuëz, haxta nieeda yгаа to poder ne gneedz Espiritu Sant lo to.

⁵⁰ Zeene gol dze ne laa me guey gbaa, dzigo güey me güeynie me zho nëz Betain.

Bdziñ zho ga, blis me nia me, psilo me noyunlay me zho.

⁵¹ Laa me quiayunlay zho, tibaque zeene laa me bias lo guidzliu, igonlo zho laa me bzoquia gbaa!

⁵² Horco pquiitsgzhib zho liu, beennon zho me, rnee zho grë diidz ndzon lo me; blozh ga ine rley zho laa zho wbi ga, bdziñ zho Jerusalén stib.

⁵³ Psilo zho gzataa dze rie zho yadoo rooline zho Dios, rdeed zho xquizh lo me.

XTIIDZ NDZON DIOS MIÑE PQUIAA JUAN

¹⁻² Jesús, men ne nac Diidz Ndzon, nole me zeene bíaa grêtaa ncuaañe no; lo Dios no me ni Diosaque nac me. Notaque me, tibaque nac me: me ni Dios.

³ Me bzaa grêtaa ncuaañe no, tsod ncuaañe lega scase niaan; sac me bzaaw grêsew.

⁴ Ladznia me no guielmban ne gdziñd dze lozh, nac guielmban co zig tib biini ne rziini lo miech.

⁵ Me nac biini ne quiaziiini zaatne nac lo guielcow, ni rrieeelod guielcow ctsew lo biini co.

⁶⁻⁷ Bio tib mgui brieelê Juan, Dios pxeel Juan biadnee Juan lo miech cho nac Jesús, zeena grêse zho gliladz Jesús.

⁸ Led Juand nac biini, sinque loxaque bíaad Juan bíaadlu Juan Jesús, men ne nac biini co.

⁹ Bdziñ dzew laa Jesús bíaad, ni niina me nac men ne noziini lo grêse miech, sac mepaa nac biini co.

¹⁰ Jesús nac biini, me nac Diidz Ndzon co. Me bzaa guidzliu, per zeene bíaad me lo guidzliu ib biend miech cho nac me.

¹¹ Per ni menladz me, niicle ne lopaa zho bdziñ me ib gonzed zho me; tib chop zha ne blêzlo me.

¹² Ni grê zha ne sca bleynie me, grê zha ne dib zdoo gliladz cho nac me, grêse zha co laa me bzo zho gac zho xpêed Dios.

¹³ ¡Grêse zho, rrieequia gol zho stib! Per guiabd ne togo gol zho zigne ral grê miech guidzliu rii, sinque laa zho gol zigne racladz Dios; gane niina xpêed me nac zho.

¹⁴ Zeene bdziñ dze ne laa men ne nac Diidz Ndzon ga goc miech bíaad me lo guidzliu, grop lo no bdziñ no me, ni bzianie no me. Blu me pa lotaa nquialadz me miech, ni niapse diidzli bnee me. Bdzion no xquielndzon me ne nac me tibpaa mêed lo Dios, men ne nac Pxoze.

¹⁵ Zeene bzeet Juan Bautist me lo miech, tib vuelt haxta blu Juan me lo zho, rêb Juan: "Lêe men rii ga gon rzet naa lo to zeene rne naa: Iraa ziaad tib men ne mazdraa non lo naa, sac notaque me; nole me zeene blanso naa lo guidzliu."

¹⁶ Nquialadzdox Jesús ne, grêse ne gzataa dze laa ne nogaa grêtaa guielnzaac ne rsiaab me.

¹⁷ Zeene psañ Moisés ley, loxaque bnabeya ne; sañgue niina ne laa Jesús bíaad,

laa me bíaadnie miñe nacpaa diidzli ni bíaadlu me ganle pa lotaa nquialadz Dios miech.

¹⁸ Wlaltaa ib choot gard gan Dios; sañgue niina ne laa Xpêed me Jesús bíaad, men co bíaadlu ganle zha nac Dios; sac zaatne no Dios gaque no me.

Rnee Juan Bautist cho nac Jesús

(Mt. 3:11-12; Mr. 1:7-8; Lc. 3:15-17)

¹⁹ Tib dze pxeel grê zha ne nac zha non Jerusalén, bla zha ne nac pxoze ni zla zha ne rquianap yadoo, zienabdiidz zho lo Juan dien cho nac Juan.

Bdziñ zho bnabdiidz zho lo Juan.

²⁰ Dzigo bneeli Juan lo zho, rêb Juan:

—Golgacnañ ganle, led naad nac Men ne quiambêz to ga cxeel Dios.

²¹ —¿Chox nac luu waa? —rêb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rêb Juan:

—Lêda, led Lí naa.

Biire zho bnabdiidz zho, rêb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rêb Juan:

—Zhaa men co, led naad nac men co.

²² —¿Cho dzigo nac luu? —rêb zho—. Bñe dien cho nac luu; sac gon ib none gdziñnie no tib xtiidz luu lo zha ne pxeel no.

²³ Dzigo pquiab Juan, rêb Juan lo zho:

—Naa nac mgui ne bzeet Isá, men ne biadteed xtiidz Dios padzeela, zeene znu bnee me: "Zon to zêeb tsi tib mgui dan rnee me lo miech: ¡Golgun nguudz zdoo to, sac gon ile ziaad men ne rnabey ne!"

²⁴ Horco laa zha ne pxeel zha farisé pquiab, rêb zho lo Juan:

²⁵ —Telne led luud nac Men ne zêeble diidz ga cxeel Dios, niicle led luud nac Lí, niicle nacdgaa luu cho stib zha ne pxeel Dios ziadteed xtiidz me, ¿zha nac dzigo ne nochoobnis luu miech?

²⁶ Pquiab Juan rêb Juan:

—Tel naa niab nis rchoobnis naa miech, per no tib men ne gard gunbey to.

²⁷ Tib men non nac me, per ni par gac naa tib ngundziin win ne glit lab me ni me raguiald naa; ni merle csilo gun me dziin ne pxeel Dios me gun me.

²⁸ Betain lê tib guiedz ne riaan gax ro guuabee Jordán, nêz ne rlan ngbidz; ga no Juan nochoobnis me miech zeene scataa pquiep zho me.

¿Cho nac Jesús?

²⁹ Biet stib dzew, laa Jesús bdziñ zaatne no Juan ga. Zeene gon Juan me, rêbchaa Juan lo grê miech ne ndxie ga:

—¡Golwi ganle, lêe men qui gon csilaa miech lo grêtaa xtol zho! ¡Me gac zig tib

carner yeen ne guet tsogon lo Dios par guiaanmbe miech lo dol!

³⁰ Lëë men rii ga nagon rzet naa lo to zeene rne naa: "Iraa ziaad tib men ne mazdraa non lo naa, sac notaque me; nole me zeene blanso naa lo guidzliu."

³¹ Len dze co niicle naa runbeyd naa me; per laa naa nochoobnis miech sac ible laa naa zial par glu naa me lo grë zha Israel.

³² Dzigo bzodiidz Juan lo zho, zha gonlo Juan biet Espiritu Sant gbaa, rlu me zigne rlu tib palom blëz me guic Jesús.

³³ —Ne nligaa runbeyd naa me —rëb Juan—. Per zeene pxeel Dios naa zialchobnis naa miech, hor co në me lo naa: "Zeene gan luu guiet Espiritu Sant gbaa cuëz me guic tib mgui ne nochoobnis luu, dzigo gocnañ lëë men co nac men ne rxeel Espiritu Sant zdoe miech."

³⁴ Gonlo naa blëz Espiritu Sant guic me; gane nanween naa ne nli Xpëed Dios nac me.

Zha ne glopaa goc xpëedscuel Jesús

³⁵ Biini liu co, laa Juan zoque ga zonie me chop xpëedscuel me.

³⁶ Ga zo me, gon me laa Jesús zieded ga; dzigo rëbchaa me lo zho:

—jGolwi ganle! jLëë men qui gon nac Xcarner yeen Dios!

³⁷ Zigne bin zhow, laa zho zianañ zhits Jesús.

³⁸ Zeene ptsire lo me, gon me laa zho nalle zhits me; dzigo rëbchaa me lo zho:

—jPe nac ziaadnal to zhits naa?

—Maestro —rëb zho—, laa no racladz gacndion no dien pa rbëz luu.

³⁹ Dzigo rëbchaa me lo zho:

—Na ganle guio ne, zeena gan to paw.

Nacne güeynal zho zhits me, gon zho pa lo no me; dzigo blëz zho lo me ga. Ga blozh ptse zho dze, sac ziedzele dze zie zho.

⁴⁰ Ndrës lë tib zha ne güeynal zhits me ga; lëë Ndrës co nac bets Simón Pedr.

⁴¹ Dzigo zigne brieë Ndrës ga güey Ndrës güeyguib Ndrës Simón. Bdziñ Ndrës rëb Ndrës lo Simón:

—jNasi gon laa no bdzion Men ne nacle diidz ga cxeel Dios!

⁴² Dzigo güeynie Ndrës Simón zaatne no Jesús ga. Zeene gon Jesús Simón, rëbchaa me lo Simón:

—Bina ganle, nli Simón nac lë luu ni xingan Jonás nac luu, sangue niina laa luu grieelë Cef.

(Cef rnee zha Israel quie, laa xtiidz zha Gres rnee zhow Pedr.)

⁴³ Biet stib dze co, laa Jesús no nëz tsie me nëz Galilé. Laa me zieriee dze ga, zeene bdzieel me tib mgui lë Lip; dzigo rëbchaa me lo Lip:

—Dënal zhits naa.

⁴⁴ Zha Betsaid nac Lip, ni zha coque nac Ndrës grop Simón.

⁴⁵ Dzigo güey Lip güeyguib Lip Natanael; rëb Lip lo Natanael:

—jLaa no bdzion Men ne nacle diidz ga cxeel Dios! Men ne rzeet Moisés lo libr ley ne psan me, men ne scataa bzeet grë zha ne biadteed xtiidz Dios padzeela. jLaa no bdzion me, tib men Nazareta, lëë me ga nac Jesús, xingan José!

⁴⁶ Pquiab Natanael, rëb Natanael:

—jNazaret ye? jGard grieequia tib zha non Nazaret!

—Gotsaa guio ne ganle —rëb Lip—, zeena ganzhal luu me.

Dzigo laa zho zie.

⁴⁷ Squi ziaad Natanael, zeene gon Jesús Natanael rëbchaa me:

—jGolwi ganle, lëë zha qui gon nac merpaa zha Israel, sac mesi ib rquidied me!

⁴⁸ —jZha nacne runbey luu naa? —rëb Natanael.

Pquiab me rëb me:

—Gole naa beenbey luu, dzigoraa bredz Lip luu. Zeene zob luu tib zhan yag guigw, hor co gon naa luu.

⁴⁹ Rzee zdoe Natanael, rëb me lo Jesús:

—jNlique nagon luu nac Xpëed Dios! jLuu nac zhirey zha Israel!

⁵⁰ Dzigo rëbchaa Jesús lo Natanael:

—jPe ne binse luu ni naa gon naa zeene zob luu tib zhan yag guigw, pe miñcose laa luu biladze cho nac naa? jNaraa ganle gan luu ncuaañe mazdraa nroob!

⁵¹ Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhal, zlupaa grë xanjl Dios, zha ne ziad-zëeb zha ne ziequia, quiayun zho dziin lo naa, nac naa Mgui ne pxeel me.

2

Güey Jesús tib lo guieltsieel

¹ Goc tson ngbidza, bio tib guieltsieel guiedz Caná, xtan zha Galilé ga. Dzigo bredz zho xniaa Jesús lo lni co,

² ni bredz zho me; nacne bional no zhits me grëse no ne nac no xpëedscuel me.

³ Laa lni noyac, tibaque zeene laa vin blozh. Dzigo güey xniaa Jesús rëb me lo Jesús:

—Laa xvín men rii blozh. jGuiendraa pe quizz zho!

⁴ Pquiab Jesús rëb me:

—jPe nacne rnee luuw lo naa? Gon ganle naraa gdziñ dze ne gacnañ miech cho nac naa.

⁵ Niicle sca rëb Jesús lo me, güey me lo zha ne quiaguiiz vin ga rëb me lo zho:

—Míne gnabeytaa me to, golguña.

⁶ Lidz men co ga ndxie xoop guies ne niaa quie; zaatne rio nis ne rquinn zha Israel riar

nia zho, zigne nac grë xcostumbr zho. Tib tib guies co, rio maase xoopga re nis lena.

⁷ Dzigo bnabey Jesús zha ne rguuiz vin ga pcodzëë zho nis len gza guies co.

⁸ Blozhse guiel guiel pcodzëë zhow, rëbchaa me lo zho:

—Gołcuae niip nis qui, gołtsieniew lo men ne zo lo lni.

Zeene laa zho blee niip nis co tsienie zho, laaw nacle vin.

⁹ Ni lalnu ib güeynied guic men co pa briece vin co (loxaque zha ne nace ngundziin ga, zha ne blee nis ga, zha cose gon pa brieev), zeene pquiaaro mew, bredz me mgui ne notsieelnia ga, rëb me:

¹⁰ —jZha nan luu naraa cuee luu vin rii! Grëtaa zaatne znu rac lni, glo rgaaz vin nizazh, zeene nrooblew noye zho, dzigo rgaaz vin ligase. Laa luu gon lej naraa bnabey luu briece vin niazh.

¹¹ Milagr ne been Jesús guiedz Caná ga, ga gloopaa blu me lo miech ganle nli tib men nroob nac me. Grëse no ne nac no xpëëdscuel me, zeene bdzion now, hor co biladz no nli me nac Men ne zëëble diidz ga cxeel Dios.

¹² Zeene blozh guieltsiel co, laa no wbire guiedz Capernaum stib grë no me, xniaa me, ni zha bets me ne. Bdziñ no Capernaum, ga bliiaz no blalaa ngbidz.

Blee Jesús grë zha ne noyun lgui len yadoo (Mt. 21:12-13; Mr. 11:15-18; Lc. 19:45-46)

¹³ Len dze ne ziaadyob lni Pascw, lni nroob ne run zha Israel rsoladz zho zha psilaa Dios zho Egipt, len dze co briece Jesús zie me nëz Jerusalén.

¹⁴ Bdziñ me Jerusalén, güey me len yadoo nroob ne zob lad guiedz co. Zeene bzëëb me, gon me nzian miech ne ndxie ro yadoo co, zha ne no wto ngon, zha ne no wto mëcwxiiil, zha ne no wto palom ne, haxta zha ne rtsëë dimi ndxie ga.

¹⁵ Dzigo bzhixcuaa me tib lë doo zig riaa dooguid ne rcaa ma, bzhen me doo co benxoon me zho ga grë xma zho; blozh ga, ptixche me xmez h zha ne notsëë dimi ga, nëzrii nëzrec blaal me xtimi zho.

¹⁶ —jNiinagazh gołcuae grë ncuaan qui nu! —rëb me lo zha ne rto palom—. jGolguien ganle lidz Pxoaz naa nu! jNacda yu lgui parne tso to wto nu!

¹⁷ Dzigo psoladz no zha ziaad lo Xtiidz Dios, zaatne rnee: “Rbiniadz guic naa, sac ne nligaa racladz naa yquiaanap naa lidz luu.”

¹⁸ Blalaa zha non lo menguiedz Israel, zeene gon zho sca benxoon me grë miech co, wbig zho lo me rëb zho:

—jCho nac luu ne squitaa noyun luu grë ncuaan qui? jBeen tib milagr, dzigo zliadz no men rnabey nac luu!

¹⁹ —Telne racladz to milagr —rëb me—; gołsil yadoo rii, ni gni naa lo to ganle ngbidz tsona laa naa bzaalolew stib.

²⁰ Pquiab zho rëb zho:

—jNcuaañe gliladzdraa no rnee luu! jLen choopxopraa iz name biao yadoo rii! jZhazhe guñ luu, tsonaque ngbidz gzaa luuw stib?

²¹ Per zeene sca bnee Jesús lo zho, xcuerp me ga nac yadoo ne bzeet me.

²² Gane zeene brieaban me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtiidz Dios zaatne scaque rnee.

²³ Len dze lni Pascw co, nzian miech zeene gon zho grëtaa milagr ne run me, biladz zho ne nli me nac Men ne zëëble diidz ga cxeel Dios.

²⁴ Per ib pxend me lo zho, sacne nanwen me zha nac zho tib tib zho.

²⁵ Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdoo zho.

3

Jesús ni Nicodem

¹ Ziecowle luuw, bdziñ tib zha farisé lë Nicodem zaatne rbëz Jesús; tib zha non nac me lo menguiedz Israel. Bdziñ me rëb me lo Jesús:

² —Maestro, ndion no ible Dios pxeel luu ziadseed luu no. Grë milagr nroob ne run luu, ga rlu ne Dios nacie luu.

³ —Gneli naa lo luu ganle Nicodem —rëb Jesús—, grëse miech, telne gald zho stib grieelod gdziñ zho zaatne rnabey Dios.

⁴ Pquiab Nicodem, rëb Nicodem:

—jGal zho stib ye? jZha grieelo gal miech stib? Tib zha ne nacle mengol, jniacxe zrieelo sëëb zho zdoo xniaa zho gbiire gal zho?

⁵ Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espiritu Sant, grieelod sëëb zho zaatne rnabey Dios.

⁶ Grëse miech zeene ral zho glo, miechse nac zho; sangue zeene ral zho stib, Espiritu Santle nac men ne rnabey zho.

⁷ Gacxe waa, gzeed zdoo luu znu rne naa: “Grëse miech, ib none gal zho stib.”

⁸ Nac cuent rii zig nac me ne rtop xcow, zeene rrie me, nëzrii nëz rec zie me, ron luu razh zhoob me; per ran luu dien pa nëz zie me dien pa nëz ziaadgaa me. Scaque nagon nac zha ne ral stib, grieelod guien miech zha rnabey Espiritu Sant lo xquielmban zho.

⁹ —Riend naa zha rnee luu —rëb Nicodem—. jRiend naa dien zha grieelo gac grë mine rnee luu!

¹⁰ Rëbchaa Jesús:

—¿Rienḁ luu ye zha rne naa? ¡Menḁ rseed miech name nac luu lo menḁguedz Israel!

¹¹ Mine rne naa nu ncuaaḁe rienḁ naaw, ncuaaḁe goḁ naaw, ni rienḁe to zha naca.

¹² Teḁne rienḁ luu zha nac grē miḁe rne naa nu zeene rzet naa ncuaaḁe rac lo guidzliu, ¿zha dzigo guieḁ luu miḁe gne naa teḁne gzet naa grē ncuaaḁe rac gbaa?

¹³ 'Wlaltaa gard tso tib zha ne soquia gbaa, per no tib meḁ ne biet gbaa, meḁ cosi soquia me gbaa, sac ga nac zaatne no me; ni lēe meḁ co nu nac naa.

¹⁴ Ni zigne pquiangaa Moisés tib meelḁ brons tib guic yag zeene nonie me zha Israel dan zit co; scaque none yquiangaa naa tib lo yag,

¹⁵ zeena grēse miech, zha ne gbig dib zdoo zho gnalo zho naa, zgaa zho tib guieḁmban ne gdziḁd dze lozh.

¹⁶ Sac goḁ rleyniedox Dios grēse miech ne ndxie lo guidzliu; gane niicle tib naa nac meēd lo me per laa me pxeelḁ naa lo guidzliu; zeena grēse zha ne gnalo naa, zgaa zho tib guieḁmban ne gdziḁd dze lozh; led yed zho nitlo.

¹⁷ Laa Dios pxeelḁ naa lo guidzliu par csilaa naa miech lo dol, ziaḁd naa par gdziḁbdolḁ naa miech.

¹⁸ Sac grēse zha ne dib zdoo gnalo naa ne naa csilaa zho lo dol, nitlod zho. Sangue zha ne gnalo naa, laa zho bnitlole ga, sac goḁ Xpēēd Dios nac naa ni biladzd zho naa.

¹⁹ Laa zho bnitlole, sac goḁ biaadpaa biini lo guidzliu ni laa ne nleynie zho biini, leḁ guieḁcow bleynie zho, sac guieḁntseeb nac miḁe zienalḁ zho.

²⁰ Grēse zha ne runḁ guieḁntseeb, rlēe zho ran zho biini. Ib rbigd zho lo biini, sac racladzd zho xoobnen grē guieḁntseeb ne quiayunḁ zho.

²¹ Sangue zha ne runḁ miḁe rnabey Dios, haxta rley zho rbigd zho lo biini, zeena glu ganle zienalḁ zho miḁe rnabey me.

Rzeet Juan Bautist Jesús stib

²² Ga brieḁ Jesús güeynie me no nēz xtan zha Judé. Xtselaa bliaaz no ga grē no me, rchoobnis me grē miech co.

²³⁻²⁴ Lenḁ dze co gard guiab Juan Bautist ladzguuḁb; dzigo ye me nochoobnis miech zaatne lē Enón gax Salim; sac ga no naal nis. Nzian miech ne rdziḁn lo me ga, rchoobnis me zho.

²⁵ Tib dzew, wbig tib zha Israel lo zla xpēēdsuel Juan, psilo zho nodiḁdiidz zho dieḁ cho zhiwrobnis nonraa; pe zhiwrobnis Jesús, te zhiwrobnis Juana ye.

²⁶ Blozhse bdiḁdiidz zho, wbig xpēēdsuel Juan lo Juan, rēb zho:

—Maestro, meḁ ne goḁ bzodiidznie luu ro guiubee Jordán ga, meḁ ne scataa bzeet luu lo miech, ¡ye me laa me quiachooobnis miech

niina, ni ndal miech niapse lo me zie zho, ziaatraade zho nēz ri!

²⁷ Pquiab Juan rēb Juan:

—Ib Dios rdeed diidz zha gunḁ miech tib tib xtsiinḁ me, gacd ne lega zhal zho gunḁ zho pe cos.

²⁸ Miḁe pso Dios naa, laaw beḁ naa: laa naa biaḁlu ganle cho nac Menḁ ne zēēble diidz ga cxeelḁ Dios. Ni bneeli naa lo to ganle led naad nac meḁ co; laa naa ziaḁ loxaque par gzet naa me lo miech zeena gunbey zho me.

²⁹ Ible lo me none gdziḁn miech. Nac me niina zig tib mguie ne notsieelnia: Mguie ne notsieelnia, ¡led zha lēe rzobnie ndzooḁ ne notsieelnia zho! Ni grē zha ne ndzieeldiidz zho, rley zho ranḁ zho laa xamigw zho notsieelnia, rley zho ron zho pe rnee xamigw zho. Scadaa nagonḁ rzaac naa niina: rley naa ron naa grē ncuaaḁe runḁ me.

³⁰ Zigse zie dze, laa me gacnonraa; scagaa naa, zigse zie dze laa naa guiaaḁwinraa.

³¹ 'Nēz gbaa ziaad me, miḁ co ne mazdraa non me lo grē miech. Teḁ naa tib miech guidzliuse nac naa, ni ncuaaḁe rienḁe tib miech lo guidzliu miḁ co rne naa;

³² sangue me, niapse grē miḁe bin me, grē miḁe goḁ me miḁ co rnee me lo miech; ¡ni choot rliadzda!

³³ Zha ne rliadzse xtiidz me, rienḁ zho ganle niapse diidzli rnee Dios.

³⁴ Xtiidz Dios rnee me lo miech; sac Espiritu Sant rdeed guieḁbiini lo me, ni Dios nac meḁ ne pxeelḁ me.

³⁵ Rleyniedox Dios me, nac me Xpēēd Dios; gane grētaa ncuaaḁe no gbaa, no lo guidzliu, ladznia me psaaḁ Diosa.

³⁶ Grēse zha ne gnalo me, laa zho bgaale tib guieḁmban ne ib gdziḁd dze lozh; sangue zha ne gond xtiidz me, gdziḁd zho gbaa, zaatne ygaa zho guieḁmban co. ¡Grēse zha co, ible zgaa zho guieḁnēdox ne csiaab Dios!

4

Tib wnaa Samar

¹ Zeene bieḁ Jesús laa zha farisé gocnanle ndalraa miech zienalḁ zhiwseed me, ni ndalraa miech ne quiachooobnis lo me Juan

² (niicle ne led medpaa rchoobnis, sinque zha ne nac xpēēdsuel me zha co rchoobnis),

³ nacne brieḁ me xtan zha Judé ga, wbiere me nēz xtan meḁ Galilé stib.

⁴ Par gdziḁn me Galilé, none ted me xtan meḁ Samar.

⁵ Xtan meḁ Samar zieded me, zig grolḁ dzew, laa me zie gax guiedz ne lē Sicar,

⁶ dzigo güeyted me zaatne quia guiuu ne rnee zho “Zhibzie Jacob”; lo liu ne psaaḁ Jacob lo xpēēd me José padzeela. Rdzag me ziaad-zē me lo nēēg co, bdiḁnḁ me bzob me ro guiuu co;

⁷⁻⁸ ga blêz me, laa no zio lad guiedz Sicar zioxi no ncuaaŋe dioownie no me.

Ro guiuu co zob me bdziŋ tib wnaa Samar zixi nis ga; dzigo rëbchaa me lo wnaa co:

—Bzhiguiel bzoladz niip zhis luu guie naa.

⁹ Bzee zdoo wnaa co gon me bnaab Jesús nis lo me, sac rlëédox zha Judé raŋ zho zha Samar, per ni rneed zho lo zho.

—jNcuaaŋe gliladz naa! —rëb me—. jTi zha Judé gnaab nis lo ti zha Samar!

Dzigo rëbchaa Jesús:

¹⁰ —Tel̄ niaca miŋe guien luu ganle cho rnaab nis lo luu, ni guien luu zha naataa ncuaaŋe rzoladz Dios lo miech, haxta znaab luu nis lo naa. Ni naasi gon, znedz naa nis ne rdeed guielmban.

¹¹ Pquiab wnaa co, rëb me:

—Per ni nzheŋd luu name pe cuee luu nis, ¿pa dzigo tsiebee luu nis ne rdeed guielmban ga? jGon ganle, guietdox bzie rii!

¹² Stiba, ¿niacxe mazdraa dzigo nac luu que pxozgol ne Jacob, meŋ ne psan bzie rii? Nu name go me nis grë xma me; niicle grë xpëéd mew, nuque go zho nis.

¹³ —Grëse zha ne rie nis rii —rëb Jesús—, rbiire rnaab zhis zho;

¹⁴ sangue nis ne rded naa, zha ne guiew gdziŋdraa dze gnaab zhis zho. Sac nis ne gded naa, masaque gdziba zdoo zho zig rdzib nis tib ro zhlian, ni nis co gdeed tib guielmban ne gdziŋ dze lozh lo zho.

¹⁵ Dzigo rëbchaa wnaa co lo Jesús:

—Bzhiguiel bneedz nis co guie naa, zeena gnaabdraa zhis naa, zeena guaaxidraa naa nis nu.

¹⁶ —Güeygazh —rëb Jesús—, güeyxi tsieel luu, dzigo goltë grop to.

¹⁷ —Guien̄d tsieel naa —rëb wnaa co—. Gard tsieelnia naa.

—Nli rnee luu —rëb Jesús—;

¹⁸ sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. jNli miŋe rnee luu i!

¹⁹ Zeene bin wnaa co sca rëb Jesús, rëbchaa me:

—Zootne tib zha ne ziadnee xtiidz Dios lo miech nac luu.

²⁰ Tel̄ scaw, bzhiguiel bnë dien̄, ¿zha nacie rnee grë meŋ Israel ne len̄ yadoo nroob ne zobpaa Jerusalén, gapaa none tsiegan miech Dios? Sac no ne nac no meŋ Samar, rnee no ne ib guic gui ne zob nu, ga none tsiegan miech Dios; sac grë xmeŋgol no ga güeygan zho Dios.

²¹⁻²⁴ Pquiab Jesús rëb me:

—Bina ganle, zdziŋ dze zeene yquindraa ne goon guic gui riipaa, o Jerusalénpagaa tsie to tsiegan to Dios meŋ ne nac Pxoz ne. jNi laa dze co ziaadgaxe! Gacdraaw ne dien̄ pa lo tsie ne tsiegan ne Dios, sinque zha ne

nlipaa racladz gleynie me, none dib zdoo zho gleynie zho me; zigne gdeedse Espíritu Sant guielbiini lo zho.

‘Choot grielod gan Dios; gacxe waa zha ne gleynie me, none gleynie zho me zigne rdeed Espíritu Sant guielbiini lo zho; ni none dib zdoo zho gleynie zho me. Ni zha ne sca gleynie me, zha co rguib me. Tel̄ to laa to riegane Dios ni runbeyde to me; sangue no rdziuunbey no meŋ ne riogan no, sac gon lo xtii meŋ Israel ziaad meŋ ne guiaadsilaa miech lo dol.

²⁵ —Nenda —rëb wnaa co—, per nan̄ naa ib ziaad Meŋ ne zëëble diidz ga cxeel Dios, meŋ ne lë Crist; ni zeene laa me guiaad, me gnë diidzli lo no.

²⁶ Pquiab Jesús, rëb me:

—jNaa gon nac meŋ co! Lëë me nu nonee lo luu.

²⁷ Lëëtaaque hor co grëse no ne nac no xpëëdsuel me laa no bdziŋ. Bzee zdoo no bdziŋ no laa me nozodiidznie wnaa co, per ni tib no bnaabdiidz lo me dien̄ pe quian-abdiidz me, dien̄ pegaa quiazodiidznie me wnaa co.

²⁸ Laa wnaa co, zoque xche me ga, rias me laa me zie nëz lad guiedz. Bdziŋ me, rëb me lo grë miech co:

²⁹ —jGoltë ganle gunbey to ti meŋ co! jBzeet me grëse zha nac lo xquielmban naa! ¿Bay pe lëdle Meŋ ne nole diidz cxeel Dios ga?

³⁰ Horco brieer grë miech co lad guiedz, ziaad zho zaatne gon wnaa co Jesús.

³¹ Laa no, quia no rdeed no ncuaaŋe gow me, per nëd me.

³² —Gowd naa —rnee me—. No stib xquielwagw naa miŋe runbeyde to.

³³ Dzigo rnaabdiidzla no, rnee no:

—Bod no cho biaadnie pe dow me, lal ne bio ne lad guiedz.

³⁴ Nëchaa me lo no:

—Lëë xquielwagw naa nac ne gun naa miŋe rnaabey Dios naa, ni csiaal̄ naa dziin ne pxeel me naa zialgon naa.

³⁵ To lëë rnee to: “Len̄ stapraa mëë csilo gac wlaap.” jPer golwi lo grëtaa miech qui ganle, nac zho niina zig grë guielgon ne gollë gliiap!

³⁶ Gacxe waa, ib none tsie to tsielaap to, tsietop to zho, zeena ygaa zho tib guielmban ne gdziŋd dze lozh. Ni zigne razh zha ne rie wlaap, scaque zguzh Dios to tsietop to zho. jTi guielbley nrooba, zigtaa par zha ne rana, zigtagaa par zha ne rlaapa!

³⁷ Ible nli diidz ne znu rnee: “Zhaa zha ne rie gon, stible zha ne rie wlaap.”

³⁸ Zig nac niina, laa naa rxel̄ to tsielaap to zaatne ni tib xtsiin̄ to psëëbde to; zhaa zha ne güey gon, no tole tsie wlaap.

³⁹ Laga laa me sca quianee lo no, laa grë meŋladz wnaa co no nëz ziaad zho nëz lo no ga. Nzian grë miech co, zeene bin zho rëb

wnaa co bzeet Jesús grë ncuuaane ziyun me, bliladz zho Jesús.

⁴⁰ Laa zeene blanso zho ga, bnaab zho lo me cuéz me ladz zho zhis. Dzigo nacne bléz me lo zho chop ngbidz.

⁴¹ Nzianraa grë miech co bliladz me, zeene bin zho grë zhiwseed me.

⁴² —Nasi nagon laa no rililadz me —rneer zho lo wnaa co—, sac nozhal bdzioon me, ni bdzioon no grë miñe rnee me. Nliw, ible me nac men ne ziaadsilaa grëse miech lo xtoł zho.

Biac xpëed tib zha ne quia dziin lo rey

⁴³ Zeene goc chop ngbidz co, laa no brieer ga gza no me, laa no bdzio nêz stib zio no nêz Galilé.

⁴⁴ Niicle ne bzeetle me: grëse zha ne ziadteed xtiidz Dios, ib randzed miech zho zaatne nac ladz zho; per

⁴⁵ zeene bzëeb me grë guiedz ne ngab Galilé, wen pcaania grë miech co me. Nzian zho güey lni Pascw co Jerusalén, gon zho grëtaa milagr ne been me ga.

⁴⁶ Nêz no no bdziin no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin lo rey; lëëtaque len dze co rzacné xpëed me.

⁴⁷ Bin me laa Jesús brieer xtan men Judé, laa me no gdziin Galilé. Dzigo biaad me biad-dzieelo me Jesús ga, bnaab me lo Jesús tsienal Jesús zhits me Capernaum, tsiegunguiac Jesús xpëed me; sac nzhoor rac win.

⁴⁸ Dzigo rëbchaa Jesús lo me:

—¿Pe haxta gan to dzigo gun naa milagr, dzigoraa gliladz to naa?

⁴⁹ —Been tib guielnzAAC gotsaa guioniob ne —rëb men co—, nend znuse lozh xpëed naa.

⁵⁰ Rëbchaa Jesús:

—Bzë, tsod luo guielnë. ¡Laa xpëed luo biacle!

Dib zdoo men co bliladz me xtiidz Jesús, laa me bio nêz laa me zey.

⁵¹ Zhilew gdziin me lidz me, zeene bdzieelo me bla zha ne quia xtsiin me, rëb zho laa xpëed me biacle.

⁵² Dzigo bnabdiidz me lo zho, maase pa hor biac win. Rëbchaa zho:

—Nieeg, zig rwe ngbidza, tibaque znuse brieer zhixlëe win.

⁵³ Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoo me bliladz me Jesús, tsieel me, xpëed me, menlidz me ne, grëse zho dib zdoo zho bliladz zho Jesús.

⁵⁴ Ga goc broop milagr ne been Jesús lo zha Galilé. Min co been me zeene wbiere me nêz Judé.

5

Biac tib men ne gacd grial

¹ Goc palal dzew, laa stib lni nroob rac Jerusalén, dzigo nacne güey Jesús Jerusalén stib.

² Ro guiedz Jerusalén, gax zaatne quia puert ne rded mëcwxiil, ga niaa tib pil nis rnee zho Betesd. Igo ro pil co niaa tib nsaap, rap nsaap co gaay arcw.

³ Lo nsaap co, ga ndxie nzian men rzacné, no zho rold lo, no zho nê ni, no zho ib gacd grial [grëse zho laa zho ndxie ga quiambéz zho gni lo nis ne no len pil co,

⁴ sac nac diidz poc poc riet tib xanj] Dios riesini lo nis co, dzigo zha ne znuse sëeb lo nis co, tel pe guielguidztaa rzac zho, riac zho].

⁵ Ga nix tib mgui, gocle galptsiipxon iz rzacné me.

⁶ Laa zeene gon Jesús me, ni bin Jesús scataale nroob dze rzacné me, rëbchaa Jesús lo me:

—¿Pe racladz luo guiaac luo?

⁷ —Racladz naa —rëb me—, per guien cho csëeb naa len pil qui zeene laa lo nis rni. Zeene racladz naa sëeb naa, zhaale stib zha ne glo rzëeb.

⁸ Dzigo rëbchaa Jesús lo me:

—¡Nasca zeena guche! ¡Bzoli, bi yag ne bzhoob luo i, zeena bzë!

⁹ Zigne sca rëb Jesús, laa men co biac. Horcogazh blis me yag co, nzëni me laa me brieer ga.

Ni ne dze co nac tib dze nda lo zha Israel,

¹⁰ zeene gon zho ney me yag ne bzhoob me, rëbchaa zho lo me:

—¡Pe rienl luo nda nadze! ¡Lëda i gon squi yquianlan luo ncuana qui dze rii!

¹¹ Pquiab me rëb me:

—Men ne beenguiac naa, mezhal nê lo naa, güey naaw.

¹² —¿Cho men sca nê lo luo? —rëb zho.

¹³ Niicle me rien daque dien chow, sac ndaldox miech ne ndxie ga; hor co laa Jesús bzëëble lad grë miech co.

¹⁴ Haxta len yadooraa bdzieel Jesús me, dzigo rëbchaa Jesús lo me:

—Nana gon ne squi laa luo biacle, bien gunctaldras luo xtoł luo. Sac telne gond luo diidz, nend dzigole glaan luo tib guielguidz ne mazdraa ntseeb.

¹⁵ Zeene laa me brieer ga, güey me lo zha ne rnabey lo zha Israel ga, rëb me lo zho Jesús nac men ne beenguiac me.

¹⁶ Nacne psilo zho quianał zho dien zha gnaaz zho Jesús pe nacne runguiac me miech dze nda.

¹⁷ Blisqui zhow lo me, dzigo rëbchaa me:

—Tel PxoZ naa gzataa dze quiaayun me dziin; ni mincoque nac miñe quiaayun naa.

¹⁸ Zeene gon zho sca rëb me, mazdraa blëe zho lo me rzac zho tebaa zha gutgazh zho me. Rlëe zho, sac zianałd me dien pa dze

nda; mazdraa zeene rëb me Dios nac Pxož me, sac ga rlu me ne lalga nac me con Dios.

Men nroob nac Xpëd Dios

¹⁹ Ni rëb me:

—Gneli naa lo to ganle: peet grielod guñ Xpëd Dios lega guicse me, sinque ncuane ran me ruñ Pxož me, miñ co ruñ me.

²⁰ Nquialadzdox Dios me, grëtaa dziin ne ruñ Dios rlu Diosa lo me; gane zuñ me milagr nroob ne mazdraa gzee zdoō to; ncuane palalse i gon to niina ne biac men qui.

²¹ Sac telne gacladz me cueeban me tib mengut, zbeeban me zho, zigne rbeebanaque Pxož me mengut.

²² Ni bzo Dios me, me guñ guielwxtis,

²³ zeena grëse miech guien ganle zigne nonaque Pxož me, scaque men non nac me, ni sca none gunnon zho me. Sac tel zha ne gunnond me, ye le Pxož me ga (men ne pxeel me) runnond zho.

Ni rëb me:

²⁴ —Gneli naa lo to ganle: Zha ne gliladz xtidz naa, ni gliladz zho men ne pxeel naa, laa zho bgaale tib guielmban ne gdziñd dze lozh. Led yedraa zho yгаа guielnëdox ne yгаа grëraa miech ntseeb; sac laa zho brielee ladznia guielgut ga, bdziñ zho lo guielmban co.

²⁵ Zdzin dze zeene ye grë mengut, zon zho xtiidz Xpëd Dios; ni grëse zha ne gzoobdi-aga, zban zho. iNi lëe dze co bdziñ niina!

²⁶ Sac gon, zigne rreed Dios guielmban lo miech, scaque zrieelo gded naa guielmban lo miech.

²⁷ Ni bzo me naa, naa guñ guielwxtis, gded naa miñe tsieguial tib tib miech.

²⁸ iGzeed zdoō to! Sac ne nligaa, dzdin dze, grëse mengut ne no len baa, laa zho grieeban

²⁹ zeene gon zho tsi naa. Grëse zha ne ndzinli wban, hor co laa zho yгаа tib guielmban ndzon; sangue zha ne been guielntseeb, hor co laa zho guey lo guielnëdox ne rieguial zho.

³⁰ Per grielod guñ naa guielwxtis naase, ib none gacnañ Pxož naaw. Grëse guielwxtis ne guñ naa, laaw guñ naa zigne gnabey Pxož naa, laaw guñ naa zigne nonguiela, sac gon guñd naa miñe guiaabtaa guic naa, sinque laa naa guñ miñe rladz Pxož naa.

³¹ Telne niaca miñe naase rne cho nac naa, zrieequia zha ne guiab nlida.

³² Per na, no stib men ne rzeet naa lo miech; ni nan naa diidzli rnee me.

³³ Haxta Juan Bautist, zeene pxeel to bla zha ne güeynabdiidz lo me, grëse miñe rëb me lo zho ga, diidzliw.

³⁴ Laa naa rzet miñ rii lo to, zeena gliladz to cho nac naa, zeena sca laa to lo xtoł to; sac

rquiindpaa dien cho miech guidzliu rii gnee cho nac naa.

³⁵ Zeene biaad Juan, goc me zig tib biini bziini me lo to palal dze zeena gunbey to naa; ni bley to pquiaadiag to miñe bnee me.

³⁶ Nli bnee me cho nac naa; per grë milagr ne ruñ naa miñ co quiaxobnenraa ganle cho nac naa. Pxož naa rneedz diidz ruñ naaw; ni ga rlu ganle ne me pxeel naa.

³⁷ Haxta ye me mezhal quialu ganle cho nac naa, parga nli gard gan to me, niicle gard gon to tsi me.

³⁸ Ronde to pe rnee me, sac rililadzde to naa; sac gon me pxeel naa zialne naa xtiidz me.

³⁹ Nli rioxco to rseed to grë guits ne ziaad Xtiidz me, sac rien to ga ziaad dien zha yгаа to guielmban ne gdziñd dze lozh. Ni niicle ne lo co zhoobnee ganle cho nac naa,

⁴⁰ per nëde to gbig to lo naa, zeena yгаа to guielmban co.

⁴¹ Nëde to gunbey to naa, nëde to guien to cho nac naa, per peet nacd miñ co;

⁴² runbey naa to, ni lalnu rleyniede to Dios.

⁴³ Sac gon, me pxeel naa zial naa lo to, ni rlëe to ran to naa; mazd zha ne lega ziaadse, zha cosi lëllëd rcaania to zho.

⁴⁴ iMiñ co gon, ib rililadzde to cho nac naa! Sac laa guic to zienie loxaque dien zha gunnon samiech to to, ib rguibde to zha gacnon to lo Dios.

⁴⁵ Ni guiabde to togo naapaa gazo to lo Pxož naa, glisqui naa grë ncuaañe ruñ to. Moisés gon nac men ne glisquiw; sac ley ne psañ me, miñe rnalo to csilaa to lo xtoł to, lëew glu ganle pe nac grëtaa ncuaañe quiaayun to.

⁴⁶ Sac gon, telne niaca miñe nlipaa rililadz to grë miñe pquiaa Moisés, zililadz to dzigo cho nac naa; golgan ganle, lo grë guits ne pquiaa me, ga rzeet me naa.

⁴⁷ Rlu rililadzde to grë miñe pquiaa Moisés ga, gane rililadzde to miñe rne naa lo to.

6

Row gaay mil miech

(Mt. 14:13-21; Mr. 6:30-44; Lc. 9:10-17)

¹ Bded ga, tib dzew brieë Jesús bdedquia me nëz dan ro Nisdoo Galilé (lëëque nisdoo co ga rnee zho Nisdoo Tiberias).

² Miech guizhiu ne brieenał zhits me, sac ziañ zho grëtaa milagr ne ruñ me, runguiac me grë men rzacnë.

³⁻⁴ Nzian zho nac zha ne zie lni Pascw, lni nroob ne rac Jerusalén gzobse iz.

Grëse no ne nac no xpëedscuel me, laa no nał zhits me. Zeene bdiiedquia no ro nis co, dzigo bdiieep no tib cho gui win zob gax ga. Loxaque laa no bzioob ga grë no me,

⁵ zeene bdzïon no miech guizhiu ne ziaadquia cho gui co, laa zho glansole lo no ga. Dzigo rëbchaa me lo Lip:

—Lip, çpa guioziu ne ncuuañe gow grëtaa miech qui?

⁶ Per lega scase rëb me lo Lip, par dien pe guiab Lip; sac nanle me pe nac ncuuañe guñ me.

⁷ —iNe nligaa pe zhidaa zho! —rëb Lip—. Niicle telne niaca miñe gziuu nzian gayoo guietxtil, ni ygaad ncuuañ co ygaa zho tiblë wingaw tib tib zho.

⁸ Dzigo pquiab Ndrës, bets Pedr, stib zha ne nacgza no; rëb Ndrës:

⁹ —Nu zo tib mëëdbgui win ney gaay guietxtil cebad ni schop mel win. çPer pa ygaa ncuuañ co lo grëtaa miech qui?

¹⁰ —Golnee lo zho dien —në me lo no—. Golguiab lo zho sob zho.

Ndzon zëëb guizh nguia ga, dzigo laa grë miech guizhiu co bzob lo guizh nguia co (zig gaay mil rgaa loxaque zha bguise).

¹¹ Dzigo bnaaz me gza guietxtil co, bdeed me xquizh lo Dios. Blozhse ga, zigse rneedz mew lo no scase scase rguiz now lo grë miech co; scaque been me grop mel co. iGrëse miech co, dow zho zaatne bieltaa zho!

¹² Blozhse dow zho, nëchaa me lo no:

—iGoltsietop grëse miñe biaan i, zeena nit-loda!

¹³ Psilo no ptop no grë guietxtil ne biaan ga, zeene blozh bdopa, ilo gaay guietxtil cebad co, biodzë tsiipchop chücuid biow!

¹⁴ Zeene gon grë miech co milagr ro ne been Jesús ga, rneeçhaa zho:

—iNe nlipagaa, lëe men qui ga quiambi-aaz ne! iMe nac Men ne zëëbe diidz ga cxeel Dios lo guidzliu guiadteed xtiidz me!

¹⁵ Biena Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

Rzë Jesús lo nis

(Mt. 14:22-27; Mr. 6:45-52)

¹⁶ Rguetsle liuw, bzhiuxto no dan bdzin no ro nisdoos co; ga bliiaz no me.

¹⁷ Bdziönse no choot rlanosd ni laa liu rowraa, dzigo mazd laa no bziaab len canó, laa no zio nëz Capernaum.

¹⁸ Laa no zionie canó co lo nis, tibaque zeene psilo rriee me, ntseeb riasoli lo nis co.

¹⁹ Maase gaay kilómetro o xoopgaaw goc zio no, tibaque zeene bdzïon no laa me ziaad-zë lo nis co, gaxle lo no ga. Zeene bdzïon no sca ziaad-zë me lo nis, bdzieeb no.

²⁰ Dzigo bnee me, në me lo no:

—iGdziebde to! iNaa zial nül!

²¹ Dzigoraa rley no bdzïon no laa me bzëëb len barcw; tibaque zeene bien no laa no brieequiale zaatne no gdzin no ga.

²² Biini liu co, grë miech ne biaan stib nëz ro nis co, laa zho bdzin zaatne nac ro nis ga, quiambëz zho gan zho me. Sac gon zho tibaque barcw zo ga, ni zeene wbii no ga, loxaque nose wbii.

²³ Gax zaatne bguiaan me zho ga, ga bdzin bla barcw ne ziaad nëz Tiberias;

²⁴ dzigo gonse zho niicle me niicle no ne nac no xpëëdsuel me, choot guien d ga, nacne bzëëbaque zho len barcw ne bdzin ga ziaad zho nëz Capernaum.

Jesús nac men ne rdeed guielmban

²⁵ Zeene blanso zho Capernaum, laa Jesús zole lo no ga; dzigo rëbchaa zho lo me:

—Maestro, çpa horzhe waa blanso luu nu?

²⁶ Dzigo rëbchaa me:

—çNaa lëe ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuuañe pquiin to.

²⁷ iGolguien, tsienied guic to loxaque ncuuañe gowse to, sac znuse rnitlo grë ncuuañ co! Sinque, goltsocx golgun miñe racladz Dios, zeena ygaa to tib guielmban ne ib gdzind dze lozh. Ni naa ne nac naa Mgui ne pxeel me, naa gneedz guielmban co lo to; sac ible min co pxeel me naa.

²⁸ Dzigo bnabdiidz zho lo me, rëb zho:

—çZha dzigo dziuun no miñe racladz Dios? çPe nac ncuuañe dziuun no?

²⁹ Pquiab me rëb me:

—Miñe racladz Dios gon to: gliladz to cho nac men ne pxeel me.

³⁰ —Telne scaw —rëb zho—, none dzianlo no gon luu nzian milagr, zeena gliladz no luu. iNligaa peet milagr nroob gard dzian no gon luu!

³¹ Tel grë pxozgol ne, zeene wban zho grë dan bidz co padzeela, gzobse dze biet tiblo guietxtil zhan gbaa, dow zho; rnee lo Xtiidz Dios: “Moisés rdeed guietxtil co lo zho.”

³² Pquiab me rëb me:

—Golgancañ ganle led Moisésd bdeed guietxtil co, sinque Pnoz naaw. Ni niina gon laa me quianeedz merpaa guietxtil gbaa lo to.

³³ Sac gon, me pxeel men ne biet gbaa ziaddeed guielmban lo grë miech rii; men co nac guietxtil gbaa co.

³⁴ —Been tib guielnzaac sca —rëb zho—, ißzataa dze bneedz guietxtil co dioow no!

³⁵ Pquiab me rëb me:

—Naa gon nac guietxtil ne rdeed guielmban ga. Grëse zha ne gbig lo naa sëëb zho xnëz naa, gdzindraa dze ne ycaabedz zho; grëse zha ne gliladz cho nac naa, gdzindraa dze ne gnab zhis zho.

³⁶ Laa to gon, zigne bnelegaa naa lo to ga, iniicle ran to naa, per riladzde to cho nac naa!

³⁷ Grëse zha ne rxeel Pnoz naa, rlanso lo naa; ni tib zho ctsireed naa.

³⁸ Sac gon, laa naa bieet gbaa zialgun naa mine racladz Pxoꝝ naa (meñ ne pxeel naa); bieete naa par gun naa mine gacladztaa naa.

³⁹ Ni mine racladz me, grëse zha ne bneedz me lo naa, ni tib zho nitlod, sinque cueeban naa zho gal dze ne laa guidzliu nitlo.

⁴⁰ Sac racladz me: grëse zha ne gbig lo naa ni glliladz zho naa dib zdoꝝ zho, grëse zho ygaa tib guielmban ne ib gdziñd dze lozh, ni cueeban naa zho gal dze ne nitlo guidzliu.

⁴¹ Dzigo psilo grë zha Israel rneenë zho me, loxaque ne rëb me, me nac quietxtil ne biet gbaa;

⁴² rnee zho:

—Meñ rii ga name rnee zho Jesús, me nac xingan José. Rdziuunbey ne xniaa me, rdziuunbey ne pxoꝝ me. ¿Zha nac dzigo ne rnee me gbaa biet me?

⁴³ Dzigo rëbchaa me lo zho:

—Lëëwga na, golsioog ro to. Nodne squitaa gzee zdoꝝ to min co.

⁴⁴ Laa Pxoꝝ naa pxeel naa zial naa lo guidzliu, per ni tib miech gon grieelod gbig lo naa telne niaca mine cuedzd me zho; ni zig rnele naa ga, zha ne gbig, naa cueeban zho gal dze ne laa guidzliu nitlo.

⁴⁵ Znu rnee lo Xtiiðz Dios, zaatne pquiaa grë zha ne biadteed xtiidz me padzeela, rneew: “Laa Dios cseed grëse miech.” Ni lëë min co rac niina; gacxe nagon waa, grëse zha ne rquiaadiag mine rnee Pxoꝝ naa ni rseed zhow, grëse zha co lo naa rlanso zho.

⁴⁶ Zha ne rlanso lo naa, guiabde to togo gonlo zho me; ni tib choot gard gan me, naase nac meñ ne ziyañ me, sac zaatne no me ga brie naa zial naa lo to.

⁴⁷ Golliladz mine gni naa lo to nu sca: ¡Grëse zha ne dib zdoꝝ zho glliladz zho cho nac naa, zgaa zho tib guielmban ne gdziñdraa dze lozh!

⁴⁸ Ne nligaa naa nac quietxtil ne rdeed guielmban ga.

⁴⁹ Grë pxozgol to, zeene sca bio zho grë dan bidz co, nli dow zho quietxtil ne biet gbaa ga, per bdeetew guielmban lo zho, sac grëse zho gut.

⁵⁰ Sangue quietxtil ne rne naa lo to, gbaa bieta ni grëse zha ne yquiina zgaa zho tib guielmban ne gdziñd dze lozh.

⁵¹ Xcuerp naa nac quietxtil ne biet gbaa, mine rdeed guielmban ga; grëse zha ne gow quietxtil co, zgaa zho tib guielmban ne gdziñd dze lozh. Lëëw gded naa zeena grieeo ygaa grëse miech lo guidzliu rii stib guielmban.

⁵² Psilo grë zha Israel co stib, quianeelsa zho, rnee zho:

—¿Zha nacne squi rnee meñ qui? ¡Zootne rnee me none dioow ne xcuerp me!

⁵³ —Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guielmban co.

⁵⁴ Sangue zha ne gow xcuerp naa, ni guie zho xchen naa, ib zgaa zho guielmban ndzon ne gdziñd dze lozh ga, ni naa cueeban zho gal dze ne laa guidzliu nitlo;

⁵⁵ sac xcuerp naa nac mine mazdraa rquiin gow miech, ni xchen naa nac mine mazdraa rquiin guie zho.

⁵⁶ Grëse zha ne row xcuerp naa, ni rie zho xchen naa, mbannie zho naa, niiclegaa naaw mbannie naa zho.

⁵⁷ Meñ mban nac Pxoꝝ naa, meñ ne pxeel naa, me nac meñ rneedz guielmban lo naa; ni scaquegaa zha ne gow xcuerp naa, naa gded guielmban lo zho.

⁵⁸ Naa nac quietxtil ne nlipaa biet gbaa. Grëse zha ne gow quietxtil rii, zgaa zho guielmban; led yed zho guet zig gut grë pxozgol to, zha ne sca dow quietxtil co.

⁵⁹ Lëë grë min rii bnee Jesús zeene pseed me miech len yadoo win ne zob Capernaum.

Diidz ne rdeed guielmban

⁶⁰ Nzian grë zha ne rzënie Jesús, zeene bin zho grë mine bnee me ga, rneechaa zho:

—Zha ngandoxtaa nac grë diidz ne rnee me i. ¡Cho gnë dien pe bnee me!

⁶¹ Bien Jesús sca nonee zho, dzigo rëbchaa me lo zho:

—¿Pe rlëë guic to bin to mine rne naa ga?

⁶² ¿Pe guiabzhe to dzigo zeene gan to laa Mgui ne pxeel Dios soquia gbaa, gbiire guey me zaatne no me glo?

⁶³ Espiritu Sant rneedz guielmban lo to, telne guieñd espiritu peet nond xcuerp to, sac bëëlse naca. Ni grë diidz ne bne naa lo to, lëëw nac Espiritu, ni lëëw gneedz tib guielmban ne gdziñd dze lozh lo to;

⁶⁴ sinque to, bii no zla to rliladz cho nac naa.

Sca rëb me sac desde psilo bzënie zho me, rienle me cho nac zha ne ib rliladz me, ni cho nac zha ne tsieto me.

⁶⁵ —Runbey naa to —rëb me—, gane ni naa lo to ni tib miech grieelod gbig lo naa sëëb zho xnëz naa, telne niaca mine cuedzd Pxoꝝ naa zho.

⁶⁶ Nzian zha ne rzënie me, hor co laa zho bzozit lo me, bzënedraa zho me.

⁶⁷ Dzigo bnee me lo no gza tsipchop no ne nac no xpëëdsuel me, në me:

—To waa, ¿pe led yede to racladz gbiche lo naa?

⁶⁸ Pquiab Simón Pedr, rëb Simón:

—¿Per cho lora nadien guio no? Luuse nac meñ ne rseed miech diidz ndzon ne rdeed guielmban ne gdziñd dze lozh.

⁶⁹ Laa no bliladzle cho nac luu, laa no gocondionle ne luu nac Men Ndzon ne pxeel Dios.

⁷⁰ —Nliw —rëb me—, ni naa bzooblo to gza tsiipchop to, per na gon laa tib to bzëëble xnëz mendox.

⁷¹ Laa zeene sca rëb me, lëële Judas ga bzeet me (zhin Simón Iscariot); sac ye Judas nacgza no lo tsiipchop no ne bzooblo me ga, ni Judas nac zha ne güeyto me.

7

Rliladz menlidz Jesús cho nac me

¹ Bded ga, loxaque grë guiedz ne ndxie xtan zha Galilé, gase rieted Jesús. Sac grë zha Israel ne no xtan zha Judé, zha ne rlëë lo me, racladz zho gut zho me.

² Laa zeene bdziñ dze ne ruñ zha Israel lni ne rzhixcuaa zho grë yu guizh, ni rbëz zho lena;

³ rëbchaa zha bets me lo me:

—¿Pe nacne ib rrieded luu nu? Brieë zho, güey dib xtan zha Judé, zeena ye grë zha ne racnie luu ga gan grëtaa ncuaañe ruñ luu.

⁴ Sac gon, zha ne racladz guñbeyraa miech zho, grë ncuaañe rac zho, ruñd zhow ngeuets zhliaan zigne ruñ luu. Rac luu name ruñ luu grë milarg nroob, beena zaatne gan nzian miecha.

⁵⁻⁶ Sca rnee zho lo me, sac niicle zha rliladz cho nac me; dzigo rëbchaa me:

—Grieeod ga naa niina, sac gard gdziñ dze co; zhaa nac to, zac tsie to zeene gacladz-
taa to.

⁷ Tel to, rlëëniéd miech to; sangue naa rlëënie zho naa, sac rne naa lo zho pe nac grë guieñtseeb ne ruñ zho.

⁸ Goltzie, tedse lni rii dzigo ga naa; sac gard gdziñ dze ne glu cho nac naa.

⁹ Dzigo laa me biaan ga.

¹⁰ Per loxaque brieë zho zie zho, yeque me brieë zie me; lëëraasi ngeuetsse bdziñ me.

¹¹ Grë zha Israel ne rlëë lo me, quiaguib zho me lo lni co.

—¿Bay yo men co? —rnee zho—. ¿Pe nacne ib choot gard dzian me?

¹² Grë zha ne ndxie lo lni, loxaque me rzeet zho. No zho rnee: “Tib miech wen nac me”; nogaa zho rnee: “Pe miech wen na zho gam me, loxaque noquidie me miech.”

¹³ Per zhlianse rzodiidz zho rzeet zho me, sac rdzieb zho grë zha Israel ne rlëë lo me.

¹⁴ Goc chop tson ngbidz ne noyac lni, tibaque zeene laa me bzëëb len yadoo nroob ne zòb lad guiedz ga, psilo me pseed me grë zha Israel ne no len yadoo ga.

¹⁵ Zeene gon zho zha rseed me, rzee zdoo zho rnee zho:

—¿Zha nac squitaa rac men qui, ni laa me pseeete me grë zhiwseed yadoo?

¹⁶ Pquiab me rëb me:

—Led naad nobeebey grë miñe quiaseed naa miech, sinque laa naa quiaseed zho miñe rnabey men ne pxeel naa.

¹⁷ Telne yquiabladz to gun to miñe rnabey me, ga guien to dien pe nli xtiidz Dios rseed naa miech, te miñe riab guic naaw ye.

¹⁸ Sac grë zha ne rnee grë miñe riab guicse zho, laa zho ruña zeena gacnziuu zho lo miech; sangue zha ne rioxco glu ne non men ne pxeel zho, zha cosi niapse diidzli rnee zho, ruñd zho ne yquidie zho miech.

¹⁹ Laa Moisés psan ley lo to, per, jni tib to gon zienald miñe rnabeya! ¿Pe nac dzigo racladz to gut to naa?

²⁰ Pquiab be grë miech co, rëb zho:

—jMenzable i gon noguitnie guic luu! ¿Chozhe racladz gut luu?

²¹ Rëbchaa me:

—Tib vult, loxaque gon to beenguiaac naa tib men rzacné dze ne rdziiladz to lo dziin, na grëga to squitaa rac lo naa.

²² Ni to gon, no hor par gun to miñe rnabey ley ruñ to dziin dze co; zig nac zeene rio tib mëéd bey (niicle ne rirole pxozgol to bey co, zeene laa ley biaan).

²³ jGase na ganle golwi! Rquia to rgo to tib mëéd bey haxta dze ne rdziiladz to lo dziin, loxaque par quiitsde to xley Moisés. ¿Pe nac dzigo ne rlëë to lo naa loxaque ne beenguiaac naa tib miech dze co?

²⁴ Golguien ganle, nonguield ne lega gdzi-
ibdoj to tib miech. Goltsoxco goltzienal miñe nac diidzli.

¿Cho nac Jesús?

²⁵ Blalaa men Jerusalén ndxie ga, dzigo psilo zho rnabdiidzlsa zho rnee zho:

—¿Pe led men riid ga zho scataa quiaguib zho gut zho?

²⁶ Pa zotaa me gon quianee me lo grë miech qui, ni choot peet ruñd me. ¿Pe goon bliladzle zhiwxtis ne naye ne me nac Men zeëëble diidz ga guiaad lo guidzliu?

²⁷ Per gacda men qui. Tel men quiw, rdziunbey ne me, ndion ne cho zha nac me; sangue Men ne zëëble diidz guiaad ga, zeene gal dze ne laa me guiaad, choot gacnand dien cho zha me.

²⁸ Bin Jesús sca nonee zho. Squi ndxie grë zha ne noquiaadiag zhiwseed me len yadoo ga, nguiedz bnee me rëbchaa me:

—Ah, conque ruñbey to naa dzigo, jnan to pa nëz zial naa! Per led zhaald naa gon zial naa, no tib men ne pxeel naa per ruñbeyde to me; men co nac men ne rnee niapse diidzli.

²⁹ Sañgue naa ruñbey naa me, sac lo me brie naa, me pxeel naa zial naa lo to.

³⁰ Dzigo gocladz zho naaz zho me ga, per ni tib zho wbigd nzhen zho me; sac gard gal dze co.

³¹ Grë zha ne ndxie ga, ndal zho bliladz me.

—Telne led med nac Crist —rnee zho—, niacxe zun me grëtaa milagr nroob ne run me. ¡Tsodraa zha ne gun grëtaa milagr ne run me!

³² Bin zha farisé nozeet grë miech co Jesús, dzigo bnedidzaque zho grë zho pxoz ne rnabey, pxeel zho bla zhaguib zie zienaaz me.

³³ Bdzin grë zhaguib co, rëbchaa me lo zho:

—¡Golxecw zniip! Zhile dze ne cuëz naa lo to; ib laa naa none gbiire guia naa lo men ne pxeel naa.

³⁴ Zguib to naa, per gdzieldraa to naa, ni grielod gdzin to zaatne guia naa.

³⁵ Grë zha ne ndxie ga, zeene bin zho sca rëb me, rzee zdoo zho.

—¿Pa nac zhe zaatne tsie me? —rnee zho—. ¿Zha nacne ib gdzield ne me? Nend grë zha ladz ne tsieseet me, grë zha ne no stib ladz ben.

³⁶ ¿Zha nacne rnee me, zguib ne me per gdzield me lo ne, niicle grielodga guio ne zaatne guey me?

Nis ne rdeed guielmban

³⁷ Zeene goł dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguiedz bnee Jesús lo grë miech co, rëb me:

—Grëse zha ne racladz guiaanwen zdoo, rzac zho zig nac zeene rnab zhis zho, guiaad zho lo naa, naa gded nis ne guie zho.

³⁸ Sac grëse zha ne dib zdoo gliladz cho nac naa, rnee lo Xtiidz Dios, masaque rrieequia tib nis ndzon ne gdzib zdoo zho, pale tib guibe nroob; nis co gdeed tib guielmban cub lo zho.

³⁹ Sca bzeet Jesús Espíritu Sant. Ga bzeet me, grëse zha ne gliladz cho nac me zacnie Espíritu Sant zho. Gard guiaad Espíritu Sant len dze co, sac gard gbire Jesús lo guielndzon ne no me gbaa hor co.

⁴⁰ Blalaa zha ne ndxie ga, zeene bin zho sca bnee me, rneechaa zho:

—Ne nlipagaa, lëe men qui ga no guiaad antes ne glanso Men ne nacle diidz cxeel Dios ga.

⁴¹ Rrieequia zla zha ne rnee:

—¡Lëda! ¡Lëegazh me! Men qui nac Men ne zëëble diidz ga cxeel Dios guiaad lo guidzliu.

Rquiab zla zha ne rnee:

—Men Galilé nac men qui. ¿Niacxe lo xtií grë zha co grieequia Men ne cxeel Dios ga?

⁴² Pe led rnee lo Xtiidz Dios lo xtií rey David, ga grieequia me ni Belén ga gal me, zaatne gocaque ladz rey David.

⁴³ Zhaase zhaase rnee zho; lel psilo zho nodiidiidz zho dien cho nac me.

⁴⁴ Brieequia bla zho gocladz naaz me, per ni tib zho wbigd nzhen zho me.

⁴⁵ Grë zhaguib ne zienaaz me ga, scase zho laa zho bdzin. Zeene gon grë pxoz rnabey co, grë zha farisé co choot bdzinied zho, rëbchaa zho:

—¿Pe nac dzigo ne ziaadniede to me?

⁴⁶ Pquiab zho rëb zho:

—¡Waltaa gard dzian no tib men ne scataa ndzon rnee!

⁴⁷ Rëbchaa zha farisé:

—¡Pe nlipaa rnee to! ¿Yelaque to dzigo beengüet me?

⁴⁸ ¿Pe rwide to, niicle zhiwxtis new, niicle now, ni tib choot rliladz ne me nac Men ne zëëble diidz cxeel Dios ga?

⁴⁹ Grë zha nxen ne rliladz ne nli Dios pxeel me, ¡miech ndziibdeele nac zho, sac gon riend zho zha rnee lo ley!

⁵⁰ Ga zob Nicodem, men ne güeyzodiidznie Jesús ga glo, ye me nacgza grë zha rnabey co, dzigo guso me bnee me lo zho, rëb me:

⁵¹ —Golguien ganle nonguielda ne lega pe gnee ne. Sac gon, zig nac xley ne, rnabeya none gacndiongazh ne zha nac xtiidz tib miech, dien pe nac mine quiayun zho, dzig- oraa gac guielwxtis.

⁵² Pquiab zho rëb zho:

—¿Zootne ye luu lëe nacgza grë zha Galilé ne rleynie me? ¡Grë zha ne cxeel Dios, ni tib zho grieequiad Galilé! ¡Luuzhal bguiba lo grë guits ne ziaad Xtiidz Dios ganle, zeena gliladz luu!

⁵³ Blozh ga, grëse zho laa zho wbi, tib tib zho zeys zho lidz zho.

8

Tib wnaa ro nëz

¹ Ga brie Jesús güey me zaatne rnee zho Gui Oliv.

² Zeene biini liu co, silgaw laa me bdzin len yadoo co stib. Nzian miech ne goclo lo me ga, nacne bzob me psilo me pseed me zho.

³ Laa me noseet grë miech co, zeene bdzin bla maistr ley, ni zla zha farisé, bdzinie zho tib wnaa ne nole tsiel ni bgaanie me stib mgui; dzigo bzo zho wnaa co glowtaa lo grë miech ne ndxie ga.

⁴ —Maestro —rëb zho lo Jesús—, laa wnaa rii bgaa nonie me stib mgui.

⁵ ¿Pe gnë luu dien zha gac me? Sac zig nac ley ne psan Moisés, rnabeya gdeedque no grë wnaa ne squi nac, haxta guet zho.

⁶ Sca rëb zho, sac laa zho quiaguib dien zha cxin me tib diidz, zeena sca grielo tsiezo zho me lo wxtis. Per zeene bin me sca rëb zho pquitsrunga me liu, psilo me con mzhungia me noquiaa me lo liu.

⁷ Rañ zho rquiabd me, wbiire zho bnabdi-
idz zho lo me stib; haxta blis lo me, rëb me
lo zho:

—Peet nacda, goldeedquie me. ¡Lëëraasi,
zha ne rienñ ni tib doļ rapd, zha co csilo
gdeedquie me!

⁸ Blozh ga biire pquitsrun me, psilo me
stib noquiaa me lo luu.

⁹ Zeene bin zho sca rëb me, mazd miñe
been zho laa zho brieë ga, sac bien zho
miech ngoopdoļ nac zho. Zha ne nacpaa
zha gol lo zho bner, blozh ga zo zo brieë zho
grë zho; loxaque wnaa cose biaan ga.

¹⁰ Dzigo bzoli me, rëb me lo wnaa co:

—¿Yo grë zha ne scataa biaad-zo luu nu?
¿Ni tib zho lëë beenquizhd luu xtoļ luu?

¹¹ —Ni tib zho —rëb wnaa co.

—Niicle naa —rëb Jesús—, gunquizhd naa
luu xtoļ luu. Bzë, per bien gbiiredraa luu
gun luu grë ncuuañe gunctal xtoļ luu.

Jesús nac zig tib biini

¹² Bded ga, tib dze nonee Jesús lo grë zha
ne noquiaadiag zhiwseed me, rëb me lo zho:

—Nac naa zig nac tib biini ne rziini lo
miech. Grëse zha ne gbig lo naa, led yed zho
soriel ni lo ncow, sac naa gziini lo zho zeena
yгаа zho tib guielmban ndzon.

¹³ Zeene bin zha farisé sca rëb me, psilo
zho nguiedz roptsie zho rnee zho:

—¡Cho gliladz xtiidz luu! ¡Lëëque luu rnee
cho nac luu!

¹⁴ Pquiab me rëb me:

—Niicle ne naaque rne dien cho nac naa,
per diidzli nac miñe rne naa. Rien naa pa
nëz zial naa, pa nëzгаа za naa; sangue to gon
peet riende to,

¹⁵ gacxe waa, rcaadzdoļ to naa ncuuañe ni
nacd naa; ncuuañe rcaadzdoļ to naa, niapse
guic to riaba. Tel naa, zig nac niina noyund
naa guielwxtis

¹⁶ per zeene gdziñ dze co, tib tib miech
miñe been zho miñ co glu dien pe nac miñe
tsieguial zho; sac Pxož naa meñ ne nacie
naa, me gnë zha gun naa guielwxtis.

¹⁷ ¿Pe nacie rililadzde to miñe rne naa?
Led rnee lo xley to zeene tipse rzë xtiidz
chop miech, ga rlu ne diidzli rnee zho.

¹⁸ Zig nac niina, naa nac tib zha ne rne cho
nac naa, laa stib zho nac Pxož naa meñ ne
pxeel naa; sac gon ye me rnee ganle cho nac
naa.

¹⁹ Pquiab zho rëb zho:

—¿Yo Pxož luu na? ¿Pa no me?

—Runbeyde to me —rëb Jesús—, sac ni-
icle naa runbeyde to naa. Telne niaca miñe
runbey to naa, runbeyle to me na.

²⁰ Gax zaatne riesañ miech gon len yadoo
nroob ne zob lad guiedz Jerusalén, ga zob
Jesús zeene sca rëb me; per choot bnaazd
me, sac gard gaļ dze co.

Grieeod gdziñ to zaatne guia naa

²¹ Bded ga, biire Jesús rëb me:

—Laa naa guia nagon. Squiaguib to naa,
per lëëque lo xtoļ to i nitlo to, sac zaatne guia
naa grieeod gdziñ to ga.

²² Grë zha Israel ne ndxie lo me ga,
rneeçaa zho:

—¿Pe goon lëëque me naye gut me? Zha
nacne squi rnee me goon grieeod gdziñ ne
zaatne guey me.

²³ —Tel to —rëb me—, zha nëz lo guidzliu
nac to; laa naa gon zha nëz gbaa nac naa.
Meñ guidzliu rii nac to, sangue naa nacd naa
zha guidzliu rii.

²⁴ Gane ni naa lo to lëëque lo xtoļ to i nitlo
to. Ne nligaa, telne gliladzde to ne naa nac
meñ ne nac naa, ible lëëque lo xtoļ to nitlo
to.

²⁵ —¿Cho dzigo nac luu? —rëb zho.

Rëbçaa me:

—Blactaae rne naaw lo to. Haxta zeene
psilo naa xtsiñ naa, laa naa rne lo to ganle
cho nac naa.

²⁶ Ndal grë ncuuañe zac glisqui naa lo to
nu niina, ni ndal ncuuañe racladz naa gne
naa lo to, per laa naa noyund miñe rnabeyse
meñ ne pxeel naa; ni meñ co nac meñ ne
rnee diidzli.

²⁷ Per ib rienñd zho ne Dios ga rzeet me lo
zho.

²⁸ Dzigo bnee me lo zho stib, rëb me:

—Nieeda gaļ dze ne yquiaa to naa tib
lo yag, dze co gunbey to ganle ne naa nac
Mgui ne pxeel Dios ga, dze co guien to ganle
led guicd naa riab grë miñe quiaayun naa;
sinque miñe pseed me naa, miñ co rne naa
lo to.

²⁹ Dios pxeel naa ni tibaque nacie me
naa, ib rsaand me naa, sac tibaque noxco
naa run naa miñe rdziladz me.

Zha ne nac xpëed Dios

³⁰ Grë zha Israel ne ndxie ga, zeene bin
zho sca rëb me, bililadz zho ne me nac meñ
ne no cxeel Dios ga.

³¹ Dzigo bnee me lo zho, rëb me:

—Telne racladz to gac to xpëedscuel naa,
zha ne nliپaa ygab xnëz naa, none guiaad-
nal to grëse zhiwseed naa.

³² Sac sca gunbey to miñe nacpaa diidzli,
ni lëëw glu lo to zha laa to ne squi nac to zig
tib ngundziin.

³³ Pquiab zho rëb zho:

—¡Ngundziin ye! ¡Tel no, zha xtiipaa Abra-
ham nac no, waltaa gard gac no ngundziin
lo miech! ¿Pe lo dzigo laa no, ne rnee luu laa
xtiidz luu csilaa no?

³⁴ Dzigo rëbçaa me:

—Golquiaadiaga ganle: zha ne tibaque
noyunctal xtoļ, rrieequiacxe waa tib
ngundziin nac zho lo doļ ga, sac lëëlew
rnabey zho.

³⁵ Ni zha ne nac ngundziin lëë, zig run miech nëz rii, grielod xoon zho lo men ne rree zho; sangue zha ne nac mëëd, choot lo ngadood zho.

³⁶ Gacxe waa, tel csilaa Xpëed Dios to, dzigosi choot lo ngadoodraa to.

³⁷ Nli lo xtii Abraham ziaad to; per laa to quia gon quia guib to dien zha gut to naa, sac racladzde to yquiaadiag to zhiwseed naa.

³⁸ Laa naa rne grë mine blu Pxoza naa lo naa, zeene no naa lo me; sangue to gon, laa to zienal mine rnabey men ne nac pxoz to.

³⁹ Pquiab zho rëb zho:

—iNi Abraham gon nac pxoz no!

—iNlid ga nagon! —rëb me lo zho—. Telne niaca mine nli zhinpaa Abraham nac to, zun to grë mine been me.

⁴⁰ Per na gon lel racladz to gut to naa, loxaque ne rseed naa to mine nac diidzli, mine blu Dios lo naa. iTel Abraham led squid been Abraham!

⁴¹ Ni lalnu zienalde to mine been Abraham, sinque laa to noyun mine run zha ne nlipaa nac pxoz to.

Pquiab zho rëb zho:

—iLed-xe mëëd ro nëzd no waa! Tibaque men ne nac pxoz no, ni lëë men co nac Dios.

⁴² Dzigo rëbchaa me lo zho:

—Telne niaca mine nli zhin Dios nac to, nleynie to naa, sac gon lo me brie naa zial naa lo to nu. Led zhaald naa zial naa, me nac men ne pxeel naa.

⁴³ Ib riogicde to zha nac grë mine rne naa, ib riende tow, sacne ib nëde to yquiaadiag tow.

⁴⁴ Golgacnan sca ganle, lëë pxoz to ga gon nac mendox, lo ma ngab to, gacxe waa rdziladz to run to grë ncuuane run ma. Tel mendox, haxta zeene biaan guidzliu tibaque nonitlo ma miech, ni ib nreed ma mine nac diidzli, sac ib nan ma zha nac diidzli. Ible lëë xtsiin ma ga nac guielwquidie, gacxe waa ma nac pxoz zha ne rquidie.

⁴⁵ iMin co nagon, niicle diidzli nac grë mine rne naa lo to, per ib riladzde tow!

⁴⁶ Ni tib to choot grielod gnë laa naa noquidie, sac niapse diidzli rne naa. iPe nac dzigo riladzde to mine rne naa?

⁴⁷ Grëse zha ne nlipaa ngab xnëz Dios, rley zho rquiaadiag zho xtiidz Dios; per to gon led xnëz me ngab to, gacxe waa nëde to yquiaadiag tow.

⁴⁸ Horco pquiab zho rëb zho lo me:

—iPsoog ro luu men Samar ngoopdol! iNlique mine rnee no ga nagon, ne mendox noguitnie luu!

⁴⁹ —Choot mendzab noguitnied naa —rëb Jesús—, sinque laa naa noxco xoober ganle pa lotaa men nroob nac Pxoza naa; laa to gon lel rsanwin to naa.

⁵⁰ Noguibd naa dien zha guiaannon naa, per Dios gon racladz me ne sca gaca; ni mesi nan me pe run me.

⁵¹ Gnëli naa lo to ganle: iGrëse zha ne gzoob xtidz naa, gdzind dze ne guet zho!

⁵² Pquiab zho rëb zho:

—iPer nlique nagon mendox noguitnie luu! Zig nac Abraham name gut me, grë zha ne biadteed xtiidz Dios ne, grëse zho gut zho. iZha nac dzigo rnee luu, zha ne gzoob xtiidz luu, gdzind dze guet zho?

⁵³ iPe mazdraa dzigo nac luu lo pxozgol ne Abraham, lo grëga zha ne biadteed xtiidz Dios ga? iCho rzac luu nac luu?

⁵⁴ Rëbchaa me:

—Telne lëëque naa noyunnon naa, nlid mine rne naa dzigo. Per na gon, Pxoza naa, men ne nac Dios ne rnee to riladz to, me rlu ganle ne nli men non nac naa.

⁵⁵ Tel naa runbey naa me, ni run naa mine rnabey me; sangue to gon, nlid runbey to me. Tel gni naa runbeyd naa me, yele naa ga dzigo noquidie zigne rquidie to.

⁵⁶ Pxoza gol to Abraham, bley me zeene gocnan me laa naa znu guial lo guidzliu rii. Ni zeene bdeed Dios diidz gon me naa, mazdraa bley me.

⁵⁷ Zeene bin zho sca rëb me, rëbchaa zho:

—iGon luu Abraham ye? iNi chooptsi iz name rapd luu! iZha dzigo gon luu Abraham!

⁵⁸ —Gnëli naa lo to ganle —rëb me—, notaque naa; nole naa zeene gol Abraham.

⁵⁹ Horco ptop zho quie laa zho gdeedque me, per znuse bded me lad zho brie me len yadoo, gonraa zho me.

9

Biac tib mgui ne rold lo

¹ Zieded Jesús tib lugar co, gon me tib mgui ne rcow lo, scale nac lo men co zeene gol me.

² Dzigo bnabdiidz xpëedscuel Jesús rëb zho:

—Maestro, iBay zha nacne squi golnie men qui guielnë qui? iPe no pe xtol mew, te xtol xmengol mew ye?

³ —Lëda —rëb Jesús—, led por xtol zhow; sinque squi gol me, zeene zeene laa me guiac, ga gan miech ganle zha nactaa grë ncuuane run Dios.

⁴ Zhile laa liu ycow. None dzioxco ne dziuun ne xtsiin men ne pxeel naa laga nasraa bii zob ngbidz, sac deque ycow liu choot grielodraa gun dziin.

⁵ Laga bii no naa lo guidzliu rii, naa nac zig tib biini ne rziini lo grë miech rii.

⁶ Blozhse sca bnee me, ptsuc me lo liu, bzhixcuua me niip ben, dzigo bdëëb mew zhits guidlo mgui ne rcow lo ga;

⁷ blozh ga, rëbchaa me:

—Güey na, güeytiib lo luu ro pil Siloé.
 (Siloé nac zig nacne rnee ne Pxeel zho zho.)

Dzigo güey mgui co güeytiib me lo me, zeene laa me wbiire laa me ranle.

⁸ Grè zha ne no gax zaatne no me, ni grè zha ne runbey me; zeene gon zho me, rneehaa zho:

—¿Mgui rii ga lèe rzob gdib i rnab gon?

⁹ No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhal rëb lo zho:

—Naaw, naa nac mgui co.

¹⁰ Dzigo bnabdiidz zho zha biac lo me. Rëbchaa me:

¹¹ —Men ne rnee zho lè Jesús, men co bzhixcuaa niip ben dzigo bdëeb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbiire laa lo naa biacle.

¹² —¿Yo men co niina na? —rëb zho.

—Dieenda —rëb me—, nand naa dien yo me.

¹³ Dzigo güey zho güeynie zho me lo grè zha ne nac zha farisé;

¹⁴ sac lèetse dze ne rdziiladz zho lo dziin, lèetse dze co sca beenguiac Jesús lo me.

¹⁵ Grè zha farisé co, biire zho bnabdiidz zho lo me dien zha biac me; dzigo bzodiidz me lo zho zha bdëeb Jesús niip ben lo me, blozh ga güeytiib me lo me, zeene laa me wbiire laaw biacle.

¹⁶ Blalaa zha farisé ne ndxie ga, psilo zho rnee zho:

—Nlid ne Dios pxeel men co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdol nac me, ¿ni-acxe zriiello gon me grè milagr qui?

Zhaase zhaase rnee zho.

¹⁷ Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac men ne beenguiac lo luu ga?

Pquiab me rëb me:

—Ible Dios pxeel me. Tib men ne ziadteed xtiidz Dios lo miech nac me.

¹⁸ Per ib rliiladz grè zha wxtis co ne biac lo me, sac rliiladz zho ne rold lo me glo; dzigo bnabey zho gocredz pxoz me, gocredz xnäa me.

¹⁹ Bdzin grop mengol co, rëbchaa zho:

—¿Pe nli xpëed to nac men rii? ¿Pe nli na rold lo me zeene gol me? Tel nli rold lo me, ¿zha biac lo me ne laa me ran niina?

²⁰ —Nli xpëed no nac me —rëb grop mengol co—. Ni nli rold lo me zeene gol me;

²¹ per ndiond no dien zha biaca ne laa me ran niina, niicle ndiondga no dien pe no cho beenguiaca. Benque zha gol-le nac me,

mazd lo me gonabdiidz, mezhal gnè dien zha biac lo me.

²²⁻²³ Sca rëb grop mengol co, sac rdzieb zho griee zho xyadoo zho. Biaanle grè zha rnabey co diidz: zha ne guiab Jesús nac Men ne zëbëe diidz ga cxeel Dios lo guidzliu; csaandraa zho sëeb zho yadoo.

²⁴ Wbiire zho bredz zho men ne biac lo ga, rëb zho:

—Bien ganle Dios zobwi, bnë diidzli lo no; sac tel no ndion no cholze miech ngoopdol nac men co.

²⁵ —Dieenda —rëb me—. Nand naa dien pe miech ngoopdol nac me, te men wena ye. Per me gon beenguiac lo naa, sac rold lo naa glo.

²⁶ Dzigo biire zho bnabdiidz zho stib dien zha beenguiac Jesús lo me.

²⁷ Pquiab me rëb me:

—Ledaaw nile naa lo to, per ib rliiladzde tow. ¿Zha nac dzigo ne racladz to gonaque tow stib? ¿Te racladz to ye, ye to sëeb xnëz me?

²⁸ Dzigo psilo zho ndox zho lo me, rëb zho:

—Luuzhe tel xnëz me no luu, sangue tel no zhiwseed Moisés, min co zional no.

²⁹ Sac tel Moisés, ndion no nli Dios pxeel Moisés, per mgui co ni ndiond no dien pa brie me.

³⁰ Pquiab me rëb me:

—¿Ncuaane gzeegaa zdoo ne i runbeydaque to cho nac me, ni ron to me beenguiac lo naa!

³¹ Ndiõn ne ganle rquiaadiagd Dios xtiidz cholze miech ngoopdol, sinque laa me rquiaadiag xtiidz zha ne rien ne nli men nroob nac me, ni run zho mine rnabey me.

³² Stiba, waltaa gard dzion ne cho zha beenguiac lo tib miech ne znu gol rold lo.

³³ Telne niaca mine nacnied Dios men co, nriielod me niunguiac me lo naa.

³⁴ —¿Psoog ro luu! —rëb zho lo me—. ¡b racladz no guiaad tib ngoopdol nu guida-seed no!

Horco wbig zho, blee zho me ga.

Zha ne rold lo

³⁵ Bin Jesús sca blee zho me ga, dzigo zeene bdzieel Jesús me, rëbchaa Jesús lo me:

—¿Pe rliiladz luu men ne nac Xpëed Dios?

³⁶ Pquiab me rëb me:

—Bzhiguiel bnë lo naa dien cho nac men co, zeena gliladz naa me.

³⁷ —Gonle luu me —rëb Jesús—. Naa gon nac men co, lèe me nu nozodiidznie luu niina.

³⁸ Dzigo pquitsgzhib me lo Jesús, ni rëb me:

—Dib zdoo naa rliiladz naa ne nli Xpëed Dios nac luu.

³⁹ Blozh ga rëbchaa Jesús:

—Laa naa zial lo guidzliu rii, zeena glu dien cho rap dol, dien chogaa rapid dol;

sac zha ne rzac miech peet rienḁ, laa zho tsaa rēbi; laa zha ne rzoob zho niini, laa xquieḁrien zho ycow, guiaan zho zig tib zha ne roḁd lo.

⁴⁰ Blalaa zha farisé zo ga, zeene bin zho sca rēb me, rēbcha zho lo me:

—¿Rzē diidz qui na lēe ye lo no roḁd?

⁴¹ Dzigo pquiab me rēb me lo zho:

—Tel niaca miḁe nḁipaa zha ne roḁd lo nac to, grieelod gni naa rap to doḁ. Per na, ne masaque rzac to rolraa lo to, gane grēse ncuane quiaayun to xtoḁ to noyaca, to zēēba.

10

Mēcwxiiḁ ni zha ne rquianap ma

¹ Ni rēb Jesús:

—Goḁquiaadiaga ganḁe: grēse zha rded stib nēz zeene rzēēb zho leḁ lidz mēcwxiiḁ, laa ne ted zho nēz ro puert, gase rlu ngbaan ga nac zho;

² Sac tel meḁ ne noyaḁ maw, nēz ro puert nēz co rzēēb me.

³ Zha ne rquianap ro lidz ma, ga rxal zho rded me; niicle magaaw, zeene ron na tsi me, grēse ma rdziḁ lo me; dzigo rbedz me ma, rneelē me ma tib tib ma, laa me rbee ma ga.

⁴ Rlozhse rbee me grē ma ne nac xma me, laa me rner lo ma; grēse ma laa ma rnaḁ zhits me sacne runbey ma tsi me.

⁵ Rienḁḁ ma zhits stib miech, zeene ran ma zho znuse rzhoon ma; sac runbeyd ma tsi zho.

⁶ Grē zha ne ndxie lo me ga, ib biend zho zha nac godiidz co;

⁷ dzigo wbiire me bnee me lo zho, rēb me:

—Goḁquiaadiaga ganḁe: Naa goḁ nac zig ro Puert, zaatne rded mēcwxiiḁ ga.

⁸ Grēse zha ne biaad glo rnee zho zha nac Meḁ ne nacḁe diidz cxeel Dios ga, grēse zha co ngbaan ga nac zho, loxaque psacsi zho par grieelo cuan zho; ni grēse mēcwxiiḁ ne nacpaa xpēcwxiiḁ naa, güeynaḁ ma zhits zho.

⁹ Saḁgue naa, laa naa nile lo to ganḁe: Naa nac zig ro Puert, zaatne rded mēcwxiiḁ ga. Grēse zha ne gbig lo naa, zlaa zho, peet lo tsoxtseebdraa zho; pale grē mēcwxiiḁ ne zozēēb zoriee ro lidz, ni rdziel ma guizh nguia, guizh ndzon row ma.

¹⁰ Zha ne nac ngbaan, zeene riaad zho loxaque rban zho ni rut zho; saḁgue naa, laa naa ziaḁ zeena ygaā to tib guieḁmban ne mazdraa ndzon, tib guieḁmban ne gdziḁd dze lozh.

¹¹ Naa nac Baxtor ne nquialadzpaā xpēcwxiiḁ. Sac zha ne nquialadzpaā xpēcwxiiḁ, rquiad zdoo zho xquieḁmban zho, rsilaa zho ma lo guieḁtseeb ne notaa ma.

¹² Per tel noyac-wree zha ne noyaḁ ma, rquiad zdoo zho ma, zigne ran zho palo ziaad tib coyot ntseeb, ndxieque mēcwxiiḁ ga

laa zho rzhoon; sac led cheḁd zho ma, led zhad nac xbaxtor ma. Zeene rdziḁ coyot, nēzrii nēzrec rtsieets coyot ma, nogaa ma rgaa lo coyot.

¹³ Rzhoon zho, sac dimise nonie guic zho, peet liaadz nod zho ma.

¹⁴⁻¹⁵ Naa nac Baxtor ne nquialadz xpēcwxiiḁ. Zigne runbey Pxoḁ naa naa ni runbey naa me, sca runbey naa grēse xpēcwxiiḁ naa, niicle magaaw runbey ma naa. Grēse ma, rleynie naa ma, laa naa rbeeladz xquieḁmban naa totsaque cuee naa ma lo guieḁtseeb ne no ma.

¹⁶ No spalal xpēcwxiiḁ naa, ma ne ngabd leḁ corral rii; grēse ma co, ible zon ma tsi naa sac laa naa no gaxi ma, zeena tipse gam ma grē ma yquianaap naa ma.

¹⁷ Meḁ ne nac Pxoḁ naa, rleynie me naa sac laa naa rbeeladz xquieḁmban naa; per ible zriebaan naa.

¹⁸ Naazhal rbeeladz xquieḁmban naa, choot grieelod lega ctiche xquieḁmban naa. Rap naa poder gded naa xquieḁmban naa, ni rap naa poder gbire gban naa stib. Dios bneedz diidzbey co lo naa.

¹⁹ Grē zha Israel ne ndxie ga, zeene bin zho sca rnee me, laa zho goc chop dii stib.

²⁰ No zho rnee:

—Yase mendox noguitnie guic meḁ qui, o rzhinlegaa guic me. ¿Pe nacne rquiaadiag to xtiidz me?

²¹ Rquiab stib zho rnee:

—Niini rzē xtiidz meḁ qui, led squid rac zha ne noguitnie mendox. Stiba, ¿niacxe zrieelo mendox guḁguiaac ma tib lo zha ne roḁd lo?

Rnee Jesús Xpēēd Dios nac me

²² Leḁ mēe ne rac naḁa, leḁ dze co noyac tib lni Jerusalén, lni ne run zho rsoladz zho dze ne glopaa psilo quiaquiin yadoo. Ye Jesús bdziḁ Jerusalén leḁ dze co.

²³ Laa me zieded tib leḁ nsaap ne quia cho yadoo co, nsaap ne rnee zho zhiNsaap rey Salomón;

²⁴ zeene wbig bla zha ne rnabey Israel, bnabdiidz zho lo me rēb zho:

—¿Poc dzigo gdziḁ dze ne gnē luu diidzli lo no? Telḁ nli luu nac Meḁ ne zēēble diidz ga cxeel Dios guiaad lo guidzliu, niinagazh bnēw lo no.

²⁵ Pquiab Jesús rēb me:

—Blactaale zine naaw lo to, per riladzde tow. Stiba, pe zhidaa milagr ne ziyaḁ to run naa, gase rlu ganḁe cho nac naa; sac Dios meḁ ne nac Pxoḁ naa, meḁ co racnieḁ naa run naaw.

²⁶ Ib riladzde tow, sacne led yede to ngab lo naa.

²⁷ Tel zha ne ngab lo naaw, runbey zho naa; niicle naagaaw runbey naa zho, ni zhits naa rzēnaḁ zho.

²⁸ Grése zho, rded naa tib guiełmban ne gdzind dze lozh lo zho, ni gdzind dze nitlo zho. Choot grieelod ctiche zho lo naa,

²⁹ sac meņ nroob nac Pxoż naa meņ ne pxeel zho lo naa; choot grieelod cuee zho lадznia me.

³⁰ Ni tibaque nac no grop no me.

³¹ Zeene bin grē zha rnabey co sca rēb me, psilo zho ptop zho quie naņ zho ngoquie zho me.

³² Dzigo rēbchaa me lo zho:

—Lo grētaa milagr ne quiaayacnię Pxoż naa naa quiaayuņ naa lo to. *Golnē dien, ėpa miņ rlişqui to ne laa to racladz gneedzquie to naa?*

³³ Pquiaab zho rēb zho:

—*ėCoquiedaxe no luu waa por grē milagr ne ruņ luu, sinque laa no coquie luu por grē diidz ne rnee luu i, quiaguinie luu Dios! ėTib miech bense name nac luu, ni rnee luu laa luu nac Dios!*

³⁴ Dzigo rēbchaa me lo zho:

—*ėLo xlibr ley to name zhubnee zha rzac Dios zha ne pcaania xtiidz me, rēb me dios nac zho!*

³⁵ Ni ndioņ ne ganle, grése miņe rnee lo Xtiidz Dios, diidzliw; gacxe waa tel sca rēb me lo zha ne pcaania xtiidz me ga,

³⁶ ėniacxe rguitinie naa me ga, zeene rne naa Xpēed me nac naa, ni mezhāl bzooblo naa pxeel me naa lo guidzliu rii?

³⁷ Telne ruņd naa milagr ne rlu Dios pxeel naa, ib gliladzde to naa.

³⁸ Per telne raņ to rlu ne me nacie naa, maase gliladzde to naa totsaque golliladz ne me nacie naa; tsow guię to ganle ne tibaque nac no grop no me, zigtaa nacie me naa, scaque nacie naa me.

³⁹ Horco gocladz zho stib naaz zho me, per znuse brie me nia zho.

⁴⁰ Dzigo brie me ga güey me ro guiubee Jordán, zaatne bio Juan pchoobnis Juan miech; ga blēz me palal dze.

⁴¹ Nzian miech ne güey lo me ga, rnee zho:

—*Nli beęd Juan ni tib mlaęr nroob, per grése miņe bnee me zeene bzeet me meņ rii, zigne bneese me laaw norieequia niina.*

⁴² Nzian grē miech ne güeyquiaadiag zhiwseed me ga, dib zdoo zho bliladz zho ne me nac Meņ ne zēēble diidz ga cxeel Dios.

11

Gut Lazh

¹ Leņ dze co blanguidz tib mgui ne no guidz Betain, lē Lazh; no chop bzian Lazh tib zho lē Mart stib zho lē Marí.

² (Lē Marí rii pchoob tiblo nceit nex ni Jesús, ni pcuiidz mew con guitsguic me.)

³ Dzigo pxeel grop wnaa co diidz lo Jesús, gacnaņ me laa Lazh rzacnē, sac naņ zho rleynidex me Lazh.

⁴ Zeene blanso diidz, nēchaa me:

—*Peet tsienied guic to, niicle tel blanguidz me per nacda par guet me, sinque par glu ganle pa lotaa meņ nroob nac Dios. Ga glu ganle pa lotaa meņ nroob nac Xpēed me.*

⁵ Zigtaa Maríw, zigtaa Marta, zigtagaa Lazha, nquialadz Jesús zho gza zho,

⁶ per ib biobladzd me; leļ blēz me schop ngbidz zaatne no me ga.

⁷ Dzigoraa nē me lo no:

—*Laa ne guio nēz xtan meņ Judē stib.*

⁸ Dzigo rdzieets no:

—*Maestro, ėracladz luu tsie luu nēz co stib ye? Pense name goc bla ngbidz ga gocladz zho ngoquie zho luu ga.*

⁹ Nēchaa me:

—*Tsiipchopraa hor name rziini ngbidz, ni laga niini rna zac tibiladz zia ne, noxtseebd ne lega pa griel ni ne;*

¹⁰ loxaque pcow luu, noxtseeb pa griel ni ne; sac ncow rna.

¹¹ Blozh ga nē me:

—*Laa xamigw ne Lazh nixguesle, per na laa ne guio zeęa gabee naa zhimcaalo me.*

¹²⁻¹³ Tibaque ndioņ no nli nixgues Lazh, dzigo rdzieets no lo me:

—*Telne raaguesle me, zac-wen me sca.*

—*Ib bięd no ne gutle Lazh, gane sca rnee me.*

¹⁴ Dzigoraa clar bnee me lo no, nē me:

—*Laa Lazh gutle.*

¹⁵ Ni rley naa goņ ne guięd naa ga dze co, zeęa sca grieeo lozh gliladz to ganle cho nac naa. *Golgotsaa guio ne nēz lo me ga niina sca.*

¹⁶ Laa Mazh, zha ne rnee zho “Mēedgrop”, zeene bin Mazh sca nē me, rneechaa Mazh lo no:

—*Guięd rson, golgotsaa cchoob zdoo ne guionał ne zhits me dien. Tel gut zho me, maase gut zho ne.*

Jesús rbeeban ni me rdeed guiełmban

¹⁷⁻¹⁹ Gax Jerusalén riaan Betain. Zha ne rriee Jerusalén, maase groł hor ruņ zho nēz rdziņ zho Betain. Nzian grē zha Jerusalén rdziņ riequiaabdiuzh zho Marí grop Mart, riechoobladz zho zdoo me lo xquiełnē me ga.

Dze ne rac tap ngbidz bioliu Lazh, dzigoraa laa Jesús bdziņ.

²⁰ Goņ Mart pa lo ziaad Jesús, dzigo brie me biaad-xinēz me Jesús; laa Marí biaan ro yu.

²¹ —*Jesús —rēb Mart—, telne niaca miņe nu no luu segur nietae bzian naa;*

²² sac naņ naa, grētaa ncuaaęe rnab luu lo Dios, ruņ me miņe rnab luu.

²³ —*Peet tsienied guic luu —rēb Jesús—, ible zrieaban bzian luu.*

²⁴ Pquiaab Mart, rēb Mart:

—Nliw, nanpaa naa ible zrieeban me gal dze ne laa guidzliu rii nitlo, zeene grëse mengut, laa zho grieeban.

²⁵ Dzigo rëb Jesús:

—Naa nac men ne rbeeban grë mengut, ni naa nac men ne rdeed guieľmban lo grë miech. Grëse zha ne dib zdoo gliladz naa, niicle guet zho zig ret grëraa miech rii, zdziñ dze ne gban zho stib.

²⁶ Sac grëse zha ne dib zdoo rililadz naa, laa zho bgaale tib guieľmban ndzon ga, guiaand zho ladznia guieľgut. ¿Led rililadz luu lëe Mart, ne sca gaca?

²⁷ —Rililadz naaw —rëb Mart—. Rililadz naa ne luu nac men ne bzooblo Dios ga, luu nac xpëed Dios, Men ne zëeble diidz ga cxeel me guiaad lo guidzliu.

²⁸ Blozhse ga, wbiere Mart zie Mart zietsedz Mart Marí. Bdziñ Mart zhliaanse bredz Mart Marí (sac nzian zha ne ndxie ga ziequiaabdiuzh Marí) rëb Mart:

—Niinapaale blanso Maestro, na laa me rbeedz luu.

²⁹ Zigne bin Marí sca rëb Mart, brieen nguzhoon Marí laa Marí zie nëz co.

³⁰ (Bdziñ Marí, laa Jesús bii zo zaatne güeydzieel Mart me ga; gase blëz me, bzëebd me lad guiedz.)

³¹ Grë men Israel, zha ne ndxie lidz Marí ga ziechoobladz zdoo me, zeene gon zho sca lëelëd brieen me, nalaque zho zhits me; sac nan zho bod ro xpaa bzian me ziegoon me.

³² Zigne bdziñ me zaatne zo Jesús ga, pqiitsgzhib me lo Jesús.

—Jesús, luu ne nac luu men ne rnabey —rëb me—, telne niaca mine nu no luu zeene blanguidz bzian naa, niete me.

³³ Psilo Marí roon Marí. Zeene gon Jesús, niicle Maríw, niicle grë zha Israel ne bdziñ ga, mban rac zho, grëse zho roon, dzigo ye me biab guieľnë me.

³⁴ Bnabdiidz me rëb me:

—¿Pa lo pqueets to me?

—Dë ganle —rëb zho—, zeena gan luu pa lo bguets me.

³⁵ Horco psilo Jesús biin me.

³⁶ Grë zha Israel co, zeene gon zho roon me, rneechaa zho:

—¡Golwi ganle, blactaa nqialadz me Lazh!

³⁷ Laa zla zho rnee:

—Led me name beenguiac lo mgui ne rold lo ga, ¿pe nriee lod zha niun me, zeena niete Lazh?

Brieeban Lazh

³⁸ Zeene laa Jesús bdziñ ro baan Lazh, biire biab guieľnë me.

Zig nac tib bliee niaa baa co; rna tib quie nroob ntse zaatne rsëeb zho ngutoo;

³⁹ dzigo rnabey Jesús cob zho quie co.

Pquiab Mart, bzian ngutoo co rëb me:

—¡Mazd gdiioobda! ¡Nadze rac tap ngbidz gut me, mbanle na rlaa me!

⁴⁰ Dzigo rëbchaa Jesús:

—Led laa naa nile lo luu, telne dib zdoo luu rililadz luu naa, bii zan luu ganle zha nactaa grë ncuuaane ndzon ne run Dios.

⁴¹ Zeene blozh bdozh zho quie co, dzigo blis Jesús lo me nëz gbaa, ni rëb me:

—Dios, luu ne nac luu Pxoz naa, xquizh xquieľnzaac luu sac rquiaadiag luu mine rne naa.

⁴² Nan naa tibaque rquiaadiag luu mine rnee naa, per laa naa rzeta niina, zeena grëse miech ne ndxie nu gliladz zho ganle ne nli luu pxeel naa.

⁴³ Dzigo nguedz bredz me, rëb me:

—¡Lazh, brieen i!

⁴⁴ Zigne sca bnee me, laa ngutoo co brieen ga, scare nrieľ lar dib nia me, dib ni me ne, ni nioog stib lë lar lo me. Dzigo rëb Jesús:

—¡Golxadz grë lar ne nrieľ me i, zeena guey me!

Rguib zho dien zha yгаа Jesús

(Mt. 26:1-5; Mr. 14:1-2; Lc. 22:1-2)

⁴⁵ Grë men Israel ne güeynal zhits Marí ga, zeene gon zho sca bleeban Jesús Lazh, nzian zho bliladz ne nli Dios pxeel me.

⁴⁶ Nogaa zho leľ güey zho güeyzodiidz zho lo grë zha farisé zha bleeban me Lazh.

⁴⁷ Horco lëelëd pcaalsa grë pxoz ne rnabey, ni grë zha farisé, rëb zho:

—¿Pe gnë to dien zha gaca? ¿Zha dziuun ne mgui ne rnee zho Jesús ga, sac gon pe zhidaa milagr ne quiaayun me?

⁴⁸ Telne squise csaan ne me, mbe grëse miech sëeb xnëz me; lozh ga, zeene gančan men rnabey ne zob Romaw, laa me cxeel grë xmenguiib me guiaadnitlo zho xyadoo ne, guiaadnitlo zho ladz ne.

⁴⁹ Dzigo pquiab Caifás, men ne nac pxoz nroob len iz co, rëb me lo zho:

—¡Ni lal nu lëe peet riende to!

⁵⁰ ¿Pe riende to mazd wena yгаа tib zha guet zho, zha quizh par gdib guiedz, lëdle grëse zha ladz ne nitlo?

⁵¹ Zeene sca rëb Caifás men ne nac pxoz nroob ga, ga bzeet me ible no guet Jesús par csilaa me grëse miech lo dol; per led guic me biaba, sinque Dios psiaaba guic me. Ga goquiet ne laa Jesús guet, par csilaa me grëse zha Israel,

⁵² ni grëragaa zha ne no dipse lo guidzliu, zeena tipse gac grëse zha ne nac xpëed Dios.

⁵³ Dzigo grëse zha ne nac wxtis ga, laa zho biaan diidz ne ible no yгаа Jesús gut zho me.

⁵⁴ Nacne briedraa Jesús ne nenlo nian zho me; dzigo mazd laa me brieenie no xtan zha Judé, güeynie me no zaatne wzhi no miech, bdziñ no tib guiedz win lë Efraín, ga bliaaz no grë no me.

⁵⁵ Len ngbidz co, ziaadyob lni Pascw. Nzian grè miech ne no grè guiedzlas ne ndxie dib ga, laa zho rsilo quiariee zie zho nêz Jerusalén; sac ansraa csilo Pascw nzian zho rie yadoo run zho grèse miñe rnabey ley par guiaañmbe zho lo xtoj zho.

⁵⁶ Grèse zha ne rdziñ, len yadoo no zho rnabdiidzlsa zho diñ pe zdziñ Jesús lo lni; sac grèse zho racladz gan me.

⁵⁷ Laa grè pxoz ne rnabey, ni grè zha farisé, laa zho rnabey, zha ne gan̄taa Jesús, tsienie zho diidz parne tsie zha ne tsienaaaz me.

12

Pchoob tib wnaa nceit nex guic Jesús
(Mt. 26:6-13; Mr. 14:3-9)

¹ Sxoop ngbidz gdziñ dze lni Pascwa, güey Jesús guiedz Betain, zaatne no Lazh, men ne bleeban me ga.

² Sac grèse menlidz Lazh, beenlo zho tib tsee, gownie zho me.

Mezh no zho, laga laa Lazh zobnie me, laa Mart nodziib ncuaañe gowxtsee zho lo mezh,

³ tibaque zeene bzëeb Marí bzëebnie Marí tib lo nceit nex ne rriee guiee ne lë nard, tib lo nceit niazha, rgaaw maase grōl boté. Zigne bdziñ Marí bdëeb Marí nceit co ni Jesús, blozh ga con guitsguic Marí pcuiidz Marí ni me. Dipse len yu zëb̄xlaa nceit co.

⁴ Laa Judas Iscariot, tib zha ne nacgza no (zha ne bded ga pto me) zeene gon Judas sca bdëeb Marí nceit co ni Jesús, rneechaa Judas:

⁵—Mazd tebaa zha ndo nceit qui. Nguizh-paa zhow maase tson gayoo pes plat, dzigo needz zho dimi co ngaaza lo grè zha mban ne guien̄d pe yquiiñ.

⁶ Sca rnee Judas, per nliid ne rquia zdoo Judas zha ne guien̄d pe yquiiñ, sinque laa Judas rguib diñ zha cuan Judas dimi co, sac Judas ngotsow bziuud ne no dimi; zigse raclo dimi len bziuud co, zhlianse rbee Judas dimi co.

⁷ Dzigo rëbchaa Jesús:

—Psaan me. Ib laa me bdëeb nceit qui ni naa, zeena nzhixcuuaale xcuerp naa gal dze ne laa naa ygueets.

⁸ Telne racladz to gun to xyudar zha ne guien̄d pe yquiiñ, tibaque ran̄lsa to grè to zho, zac tsoy ygad to lo zho; sangue naa zdziñ dze gandraa to naa.

⁹ Ndäl grè zha Israel, zeene bin zho laa Jesús no guiedz Betain, bio zho nêz güey zho lo me ga, ni güeyso zho lo Lazh, men ne bleeban me ga.

¹⁰ Zeene gon grè pxoz rnabey cow, nacne bnediidaque zho ye Lazh none gut zho;

¹¹ sac por Lazh, nzian grè zha non, laa zho rbig nêz lo Jesús, laa zho riladz ne nli me nac Men ne zëëble diidz ga cxeel Dios.

Bzëeb Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Biini liu co, dipse lad guiedz Jerusalén zhoob diidz laa Jesús gdziñ ga dze co. Grè miech guizhiu ne bdziñ ga zie lni Pascw,

¹³ psilo zho brieë zho ziaad-xinêz zho me; tib tib zho nzhense zho tib lë zin. Lo guielbley co, zeene gon zho me, psilo zho nguietz roptsie zho, rnee zho:

—iZha nroobtaa nac Dios! iZha ndzontaa men rii pxeel Dios ziaad lo ne! iLëë men rii gnabey Israel!

¹⁴ Laa Jesús, zobse me lad tib burr yeen, zigne raquiet lo Xtiidz Dios zaatne rnee:

¹⁵ Grèse to men Israel, gdziebde to.

iGolwi ganle, laa men ne rnabey ladz to ziaad i,

zobse me lad tib burr yeen!

¹⁶ Grèse no ne nac no xpëëdsuel me, ni tib no biend hor co ne grèse ncuaañe noyac ga, raquietlew lo Xtiidz Dios; sinque haxta zeyle me gbaa, dzigora a psoladz no nzian grè ncuaañe raquiet lo Xtiidz Dios ga, gonlo no goca; ni biend no Jesús raquiet ga.

¹⁷ Lad grè miech guizhiu co no nzian zha ne gon zha bleeban me Lazh, dzigo nguietz rzodiidz zhow lo grè miech co.

¹⁸ Ni nzian grè miech co, laa zho blanso ga ziaad-xinêz zho me, sac bin zho zha been me milagr nroob co.

¹⁹ Grè zha farisé, zeene gon zho grè miech guizhiu co, rneechaa zho:

—iPe zhidaa grè miech qui racnie men qui! iPeraa nadien̄ dziuun ne!

Rguib bla zha Gres Jesús

²⁰ Lad grè miech ne bdziñ Jerusalén ga, ziegañ Dios len ngbidz Pascw co, lad co no blalaa zha zit ne nacd zha Israel,

²¹ dzigo bnee zho lo Lip (zha Betsaid nac Lip) rëb zho:

—Bzhiguel̄ bnë diñ pa lo no Jesús, laa no racladz dzian̄ no me.

²² Dzigo güey Lip rëb Lipa lo Ndrës, blozh ga güey zho grop zho güeynie zho diidz lo Jesús.

²³ Dzigo rëbchaa me lo zho:

—Naa ne nac naa Mgui ne pxeel Dios, niinataa nagon laa dze bdziñ zeene laa naa gbire guia gbaa stib.

²⁴ Golquiaadiaga ganle: Tib zhoxtil, telne tsoda liu tibaque zhob naca; per zeene laa zhob co rio liu, nzian raca. Scaque naa nagon, none guet naa, none tsoliu naa, zeena gacnzian zha ne ygab xnêz naa.

²⁵ Sac zha ne rquia zdoo xquielmban, znitlonie zhow; sangue zha ne cueeladz xquielmban, zha cosi zgaa zho tib guielmban ndzon ne ib gdziñ dze lozh.

²⁶ Zha ne racladz sëeb xnêz naa, none gun zho miñe rnabey naa; ni zaatne gdziñ naa yeque zho no gdziñ ga. Ni grèse zha ne sëeb

xnèz naa ni gon zho xtidz naa, zunnon Pxo^z naa zho.

²⁷ Mban rac zdo^o naa niina. Per lèda ga guⁿ naa, telne guiep naa lo Pxo^z naa csilaa me naa lo grètaa guielnè ne no teed naa. ¡Sac par mincopaa zial naa lo guidzliu rii!

²⁸ ‘Dios, luu ne nac luu Pxo^z naa —rèb me—. Blu lo grè miech rii ganle ne men nroob nac luu.

Dzigo bin zho zèèb tib tsi men co gbaa, rèb me:

—Laaw blule naa, ni niina laa naa gbire gluw stib.

²⁹ Nzian grè miech ne ndxie ga, zeene bin zho tsi men co, bzhaac zho nguziw; zha ne bien led nguzida, rnee zho:

—Xanj! Dios ga gon bnee lo me.

³⁰ Dzigo rëbchaa me lo zho:

—Laa to bin ganle laa Pxo^z naa bnee, ni por to gon bnee me, zeena gon to tsi me ni gliladz to ne me pxeel naa.

³¹ Laa dze nagon bdziⁿ zeene laa Dios gunquizh naa xtol grèse miech guidzliu rii; lèè dze bdziⁿ zeene laa men^{dox} piche gnabeydraa ma lo guidzliu rii zigne rnabey ma niina.

³² Sac zeene laa naa quia glaa lo cruz, ga cuedz naa grèse miech zeena sèèb zho xnèz naa.

³³ Ga bzeet me zha gut miech me.

³⁴ Grè miech ne ndxie ga, zeene bin zho sca rèb me, rëbchaa zho:

—¿Guet luu ye? Lo Xtii^d Dios name rnee, ib guete Men ne cxeel Dios ga. ¿Zha nac dzigo ne rnee luu laa luu guet? ¿Chopaa dzigo nac luu?

³⁵ Dzigo pquiab me rèb me lo zho:

—Naa nac zig tib biini ne noziini lo miech; ni ngabse dze ne cuèz naa lo to. Laga noziini naa lo to, golsèni zaatne riab biini zeena ygaade to guiel^{cow}; sac zha ne rzè lo ncow riend zho palo zie zho.

³⁶ Niina ne rdeeda diidz golliladz cho nac naa, zeena gac to zha ne nlipaa no lo biini.

Blozhse sca rèb me laa me biche ga, blulo-draa me lo zho.

³⁷ Niicle gonlo zho nzian milagr ne been me, per ib rililadz zho ne nli Dios pxeel me.

³⁸ Ni ib scalegaa no gaca, sac ga brieequia mine bzeet Isá (tib men ne biadteed xtiidz Dios) zeene znu rèb me:

Dios, bui ganle ni tib choot néd gliladz xtiidz luu,

niicle ran zho grètaa milagr ne run luu.

³⁹ Ni nligaa ib brieelod nliiladz zho me; sac zeene pquiaa Isá, znu rèb me:

⁴⁰ Ncow psan Dios lo zho, ni been^{dip} me zdo^o zho;

zeena gand zho me, niicle guiendgaa zho zha gbig zho lo me csilaa me zho lo xtol zho.

⁴¹ Zeene znu bnee Isá, ible Jesús ga bzeet me; sac gon me grètaa guielndzon ne rap Jesús.

⁴² Ndal zho sca ib bliladz me, per noquegaa zha ne bliladz me; zig nac grè zha ne rnabey lo zha Israel, ndal zho bliladz ne nli Dios pxeel me, per ib pxobnend zhow; sac rdzieb zho cuee zha farisé zho yadoo.

⁴³ ¡Ni stiba rdziladzraa zho guia^{ann}on zho lo miech, laa ne guia^{ann}on zho lo Dios!

⁴⁴ Len dze co, tib vuellt nguiedz bnee Jesús, rèb me:

—¡Grèse zha ne rililadz naa, yele Pxo^z naa ga rililadz zho!

⁴⁵ ¡Ni zeene rwi zho lo naa, yele men ne pxeel naa ga ran zho!

⁴⁶ Naa nac zig tib biini ne rziini lo miech, ni grèse zha ne dib zdo^o gliladz cho nac naa, zriee zho lo guiel^{cow} ne no zho.

⁴⁷ Grèse zha ne gon Xtidz naa, ni gband zho zigne rnabeya, led naad gunquizh zho dol co; sac ziald naa par gdziibdol naa miech, sinque laa naa zial par csilaa naa zho lo dol.

⁴⁸ Xtidz naa gac ley ne gunquizh zhow; zigtaa zhaw zigtagaa grè zha ne néd gunbey naa, grè zha ne néd yquiaadiag xtidz naa.

⁴⁹ Sac grèse ncuaa^{ne} pseed naa miech, led guicd naa biaba, sinque Pxo^z naa men ne pxeel naa, men co rnabey naa pe nac mine cseed naa zho.

⁵⁰ Ni nan^{pa} naa, grèse diidz ne rnabey Pxo^z naa naa rne naa, lèew rlu zha ygaa miech tib guiel^{mban} ndzon ne gdzind dze lozh; gacxe waa, grèse mine rnabey me gne naa, zigne racladz me scase rne naaw lo to.

13

Rguiib Jesús ni xpèèdsuel me

¹ Guieel ne rsilo lni Pascw; wdze co pcaal-sanie Jesús no grèse no ne nac no xpèèdsuel me, laa no nodiowxtsee. Rienle me ne gataa laa dze co bdziⁿ, zeene laa me gbi lo guidzliu rii gbire me lo Pxo^z me stib. Grèse zha ne ngab lo me, rleynie me zho; ne nligaa rleynie me zho haxta bdeed me xquiel^{mban} me psilaa me zho.

²⁻⁴ Rien me grètaa ncuaa^{ne} no, ladzania me psan Pxo^z mew; lo Pxo^z me brie^e me ziaad me lo guidzliu, ni lo Pxo^z me gdziⁿ me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdziⁿlen me tib lè lar nool. Par hor co, laa men^{dox} pquii^l-le Judas, zhin Simón Iscariot, parne tsieto Judas me.

⁵ Dzigo bla^t me nis tib len bandej laa me psilo noguiib me ni grè zha ne nacza no, zigse rlozh rguiib me ni tib zho scase scase rcuiidz mew con lar ne ndxie len me ga.

⁶ Zeene laa me zie quuib me ni Simón Pedr, rëbchaa Simón lo me:

—¡Lêda i gon! ¿Pe nacne leŀ luu quiib ni naa?

⁷ Pquiab me rëb me:

—Griee lod guien luu niina, pe nacne quiib naa ni luu; haxta tedraa nu dzigo ganŀe guien luuw.

⁸ —¡Nend scaw! —rëb Pedr—. ¡Per naasi gon gnedzd naa diidz quiib luu ni naa!

Dzigo rëbchaa me:

—Griee lod sca ygab luu xnëz naa, telne siguielŀ luu quiib naa ni luu.

⁹ Horco pquiab Simón, rëb Simón:

—Bzhiguiel sca, niinagazh bdiib ni naa, per led loxaque nidse naa, sinque dib nia naa, dib guic naa bdiib.

¹⁰ Dzigo rëbchaa me:

—Zha ne gozle, nise zho riar; sac mbele zho. Scaque to nagon, mbele to grë to. Grë to rne naa, niicle ne led gzadpaa to mbe.

¹¹ Sca rëb me, sac rienle me cho tsieto me.

¹² Blozhse bdiib me ni no, wbiire wbix me xab co me, bzob me lo mezh; dzigo në me lo no:

—¿Pe bien to na pe nacne znu bdiib naa ni to?

¹³ Golwi ganŀe: To lëe, Maestro rnee to lo naa, ni rnee to naa nac men r nabey; ni nonguiela gon, sac ne nligaa scaw.

¹⁴ Golgan sca, niicle ne maistr naa, niicle ne naa nac men ne nabey, per laa naa bdeed zig tib ngundziin win bdiib naa ni to. Nana sca, scaque golgac lo samiech to.

¹⁵ Laa naa blule lo to zha guñ to, nana sca goltseñal min co.

¹⁶ Gneli naa lo to ganŀe, lo grë zha ne nac ngundziin, tsod zha ne nonraa lo zha ne nabey zho; scaque grë zha ne rie mandad, tsod zha ne nonraa lo zha ne rxeel zho.

¹⁷ Laa to nanlew nasca. Gacxe waa, telne tseñal to wseed rii, zaacse gac lo xquielmban to.

¹⁸ Golquiaadiag ganŀe, grëse mine none naa nu, led par grëde tow. Naa bzooblo to, nanween naa zha nac to tib tib to, ni nanween naa zha rnee lo Xtuidz Dios, rneew: “Lëëque tib zha ne rownie naa, grieequia tsielo naa ladznia zha ne gut naa.”

¹⁹ Laaw rnegazh naa lo to niina, zeena zeene gaca, gliladz to ganŀe ne nli naa nac men ne rne naa nac naa.

²⁰ Ni golgona ganŀe, grëse zha ne ycaania Espiritu Sant, men ne cxeŀ naa, naale ga nocaania zho; ni zha ne rcaania naa, yele men ne pxeel naa ga rcaania zho.

Rëb Jesús ne Judas nac zha ne tsieto me (Mt. 26:20-25; Mr. 14:17-21; Lc. 22:21-23)

²¹ Horco psilo rlupaa mban goc zdoo Jesús, dzigo bneeli me lo no në me:

—Gneli naa lo to ganŀe, lëëque tib to gon tsielo naa ladznia zha ne gut naa.

²² Zeene bdzion no sca rnee me, psilo no rwilolsa no, rienŀ no dien cho nac zha ne rzeet me ga.

²³ Cuepaa me, ga zoob naa (rleynie me naa niicle ne raguiald naaw);

²⁴ dzigo blunia Pedr lo naa, gnabdiidz naa lo me dien cho nac zha ne rzeet me ga.

²⁵ Nacne wbig gax naa, bnabdiidz naa lo me.

²⁶ Dzigo nëchaa me:

—Laa naa cobie tib lë guietxtil, ni lo zha ne gan luu gded naa guietxtil co, lëe zho ga.

Dzigo bzhen me tib lë guietxtil, blozhse bloobie me guietxtil co, laa me bdeeda lo Judas.

²⁷ Zigne bnaaz Judas guietxtil co, laa menŀox bzëeb zdoo Judas. Dzigo rëbchaa Jesús lo Judas:

—Mine no guic luu guñ luu, na zeen nawdzegazh beena.

²⁸⁻³⁰ Zigne blozh dow Judas guietxtil co, lëelëd briece Judas ley; pcowle luuw.

Lo grë no ne zioobnie no me lo mezh ga, ni tib no bienŀ pe nacne sca rëb me lo Judas. No zho nan bod no pe ncuanea rquiin lo lni co, rxeel me Judas tsiesi Judas, o nogaa pa tsiesan Judas palal dimi lo grë zha ne guienŀ pe yquini; sac Judas nac zha ne ngotsow bzuiud win ne no dimi.

³¹ Gonse Jesús laa Judas briece ley, dzigo nëchaa me lo no:

—Niina nagon bdziñ dze zeene glu ganŀe zha nroobtaa guieñdzon ne rap Mgui ne pxeel Dios, ni ga glu ganŀe pa lotaa nac guieñdzon ne rap Dios.

³² Ni scaque Dios, zlu me ganŀe pa lotaa nac guieñdzon ne rap Mgui ne pxeel me ga.

³³ Xin yeena, jzhile cuëz naa lo to nu! Squiguib to naa, per zigne rep naa lo grë zha Israel co, laaw rneque naa lo to niina: Griee lod sēñal to zaatne ga naa.

³⁴ Gane laa naa rsan tib diidz cub rii, ni laa naa nabey to guñ tow: Tib tib to, golleynie zha ne nacgrë to, goltantsi zho. Zigne rleynie naa to, sca golleynie zho.

³⁵ Zeene gan miech, ne nligaa dib zdoo to rleynie to samiech to, dzigo zien zho xpëedscuel naa nac to.

Ible ziab Pedr runbeyd Pedr Jesús

(Mt. 26:31-35; Mr. 14:27-31; Lc. 22:31-34)

³⁶ Dzigo bnabdiidz Pedr lo Jesús, rëb Pedr:

—Maestro, ¿pa dzigo nac zaatne tsie luu? Dzigo rëbchaa me:

—Zaatne ga naa, griee lod sēñal luu niinagazh; per ib laa luu no guiaadnal.

³⁷ Pquiab Pedr, rëb Pedr:

—¿Per pe nacne griee lod sēñal naa zhits luu niina? ¡sēñal naa zhits luu gon, niicxe maase gut zho naa waa!

³⁸ Dzigo rëbchaa me:

—¿Goon csaand luu naa ye Pedr, niicle gut zho luu? Nlid ga gon. Gneli naa lo luu ganle, zeene laa gall ycuedz tsonle vuelte rëb luu runbeyd luu naa.

14

Niapse por Jesús gdziñ miech lo Dios

¹ Tsoode to zhgab, tsoode to guielñe. Tiblique golgun gauc to, zigne dib zdoo to rililadz to Dios, scaque dib zdoo to golliladz cho nac naa.

² Golgona ganle: Zaatne nac lidz Pxoza naa, ndaldoo zaatne cuëz miech no ga, tel niaca mine guieñd zaatne cuëz to, nile naaw lo to na. Gacxe waa, niina laa naa ga, gzhixcuaa naa zaatne cuëz to ga.

³ Ni zeene lozh gzhixcuaa naa zaatne cuëz to, hor co laa naa gbire guial stib, dzigosi laa to sënäl zhits naa; zeena tibaque zaatne gbiaaz ne.

⁴ Laa to nanle nasca pa lo ga naa, ni nanlegaa to nëz ne.

⁵ Pquiab Mazh rëb Mazh lo me:

—Maestro, pelej nëz na gacndion no, ni per ni zaatne tsie luu ndiond no.

⁶ Dzigo rëbchaa Jesús:

—Naa nac nëz co, naa rseed miech mine nac diidzli, ni naa rded tib guielmban ndzon ne ib gdziñd dze lozh. Lo grëse miech, zha ne gliladz cho nac naa, zha co gdziñ lo Pxoza naa; guieñdraa stib mod ne gdziñ zho lo me.

⁷ Telne runbey to naa, dzigo runbeyaque to Pxoza naa. Ni runbeylegaa to me, sac tibaque ran to me.

⁸ Dzigo rëbchaa Lip lo me:

—Bzhiguieñ mazd blu Pxoza luu lo no. Totsaque dzian no me, lëëlew ga dzigo.

⁹ Pquiab Jesús, rëb me:

—Blactaale dze ga name Lip no naa lo to, ni gardaque ye gunbey luu naa. ¡Grëse zha ne ran naa, lëëque Pxoza naa ga ran zho! ¿Zha nac dzigo ne racladz luu glu naa me lo to?

¹⁰ ¿Niacxe rililadz luu dzigo ne tibaque nac no grop no Pxoza naa? Grëse mine rseed naa to, led guicd naa riaba; grëse ncuuañe run naa, me rnabeya, me runa sac tibaque nac no grop no me.

¹¹ Golliladz sca ne tibaque nac no grop no Pxoza naa. Telne goon rililadzdgaa tow zigne rnee naa lo to nu, siquier lo grë dziin ne nodziun no, ga golgan ganle ne nli tibaque nac no grop no me.

¹² Ne nligaa, gneli naa lo to ganle: Grëse zha ne rililadz cho nac naa, ye zho zun zho grë milagr ne run naa, ni haxta nroobraa ncuuañe gun zho; sac tel naa, laa naa no guia zaatne no Pxoza naa.

¹³ Ncuuañe gnabtaa to lo Pxoza naa, totsaque glu to ne nli rililadz to naa, zun naaw; zeena ga gan miech ganle me nac men ne

mazdraa nroob, me nac men ne mazdraa non.

¹⁴ Ne nligaa, telne rnalo to naa, ncuuañe gnabtaa to zun naaw.

Sxeel Jesús Espiritu Sant

¹⁵ Telne nli rleynie to naa, golgun grë mine rnabey naa to sca.

¹⁶ Scagaa naa, laa naa gnab lo Pxoza naa cxeel me tib men ne tibaque gacnieñ to, tibaque choobladz zdoo to; ib gdziñd dze ne csaan me to. ¡Lëë men co ga nac Espiritu Sant, men ne rlu pa min nac diidzli; ni ible sxeel Pxoza naa me!

¹⁷ Zha ne ngabd xnëz naa, grielod ycaania zho me, sac ran zho me niicle runbeyd zho me; sangue to, runbey to me sac me quianap to niina, ni zbëzga me zdoo to.

¹⁸ Ib csaanladz naa to, zbire naa guial naa lo to stib.

¹⁹ Nli zhilew, zeene gandraa grë miech naa, sangue to gon bii zan to naa; sac zriebaana naa, ni scaquega to zga to tib guielmban ndzon ne gdziñd dze lozh.

²⁰ Gal dze co, zeene gan to laa naa grieban, ga gliladz to ganle ne nli tibaque nac no grop no Pxoza naa, zigne tibaque nacieñ naa to ni naciega to naa.

²¹ Zha ne runbey zha nac grë mine rnabey naa, ni rban zhow zigne naca, ga rlu ne nli rleynie zho naa; ni zigne rleynie zho naa, scaque Pxoza naa zleynie me zho; niicle naagaaw zleynie naa zho, ni zlu naa lo zho ganle cho nac naa.

²² Dzigo pquiab Judas (zhaa Judas Iscariot), rëb Judas lo me:

—¿Pe nac waa lose no glu luu cho nac luu? ¿Telzhe grëraa miech waa?

²³ Pquiab me rëb me:

—Zha ne run mine rnabey naa, lo zha co glu naa cho nac naa; sac rlu zho ne nli rleynie zho naa. Ni haxta ziaad no grop no Pxoza naa gbannie no zho; sac zigne rleynie zho naa, scaque zleynie me zho.

²⁴ Sangue zha ne rund mine rnabey naa, ¿zha dien glu naa lo zho cho nac naa? Sac rlu rleyniend zho naa. Golsoladz ganle grëse diidz ne ron to rne naa, led guicd naa riaba, xtiidz Pxoza naaw.

²⁵ Laa naa rne grë min rii, laga bii zo naa lo to nu,

²⁶ per zeene laa Pxoza naa cxeel Espiritu Sant men ne guiaad choobladz zdoo to (men co guiaad xcuent naa), men co lozh cseed to, ni guncsoladz me to grëse mine bne naa lo to.

²⁷ Laa naa guia, per laa naa ran tib guieñbley zdoo to, zeena zigne tibililadz rac zdoo naa, scaque tibililadz gac zdoo to. Sac guieñbley ne rnedz naa lo to nu, nacda zig

16

¹ 'Laa naa rne grë min rii lo to zeena peet tsienied guic to, tibaque dib zdoos to gnalo to naa.

² Sac gon zunxoon zho to, zbee zho to yadoo; ni zdziñ dze haxta zut zho to, sac masaque sac zho lëë mine racladz Dios ga noyün zho.

³ Laa zho gon grë min co, sac niicle Pxoos naaw, niiclegaa naaw, runbeyd zho no.

⁴ 'Laa naa rzodiidz grë min rii niina, zeene zeene gal dze ne laaw noyac, csoladz to ganle grësew bzodiidzle naaw lo to. Bzodiidz naaw lo to glo, sacne hor co laa naa bii zo lo to.

⁵ Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zaatne ga naa, dien pe nacgaa ne laa naa ga.

⁶ Lëë gdib mine run to, riab guielnë to ron to grë mine rne naa nu.

⁷ 'Gneli naa lo to ganle: Mazd wen gon tsie to zeene laa naa guia lo men ne pxeel naa, sac telne cuëz naa nu, grielod guiaad men ne guiadchoobladz zdoos to ga. Sangue telne guia naa, dzigo naazhal cxel me.

⁸ Ni zeene laa me guiaad, me gunquien miech ganle grëse zho zha ngoopdol nac zho, me gunquien zho zha laa zho lo dol co guiaanwen zho lo Dios, ni guien zho ne nli zdziñ tib dze zeene laa Dios gon xquielwxtis me.

⁹ 'Pe nacne nac zho miech ngoopdol? Miech ngoopdol nac zho, sacne riladz zho cho nac naa.

¹⁰ 'Zha grielo laa zho lo dol co guiaanwen zho lo Dios? Zrieelow, mincoxe waa nacne bial naa, ni na laa naa guia zaatne zob Pxoos naa, gandraa to naa.

¹¹ 'Zha rlu ne nli zun Dios guielwxtis? Nli zun mew, sac gon laa me bnabeyle zha nac grë guielnëdoox ne ygaa menoox, men ne quianabey lo guidzliu rii.

¹² 'Nzianraa ncuuaane racladz naa sodiidz naa lo to! Per rien naa grielod tso guic to zha naca niina.

¹³ Zeene guiaad Espiritu Sant, me gneedz guielbiini lo to guien to grëraa ncuuaane no gacnan to, ni grëgaa ncuuaane naraa gac. Niapse diidzli gnee me, sac led guicd me guiab grë mine gnee me, sinque mine nac xtiidz Pxoos naa, min co gnee me.

¹⁴ Ga glu me lo miech ganle ne nli men nroob, men non nac naa.

¹⁵ Rne naa ga glu me, sac grëtaa ncuuaane rnabey Pxoos naa, yeque naa rnabeya.

¹⁶ Zhilew zeene laa naa gbiche lo to gandraa to naa; per gacdaquew xtse zeene laa to gbiirelaque gan naa stib.

¹⁷⁻¹⁸ Zeene bdziid no sca rnee me, blalaa no psilo no rnabdiidzlsa no rnee no:

—¿Bay zha nacne squi rnee me? ¿Zha nacne rnee me, zhilew dziandraa ne me, per gacdaquew xtse laa ne dzianlaque lo me stib? Ni rneequa me laa me guey lo Pxoos me.

¹⁹ Bien me racladz no gnabdiidz no lo me, dzigo në me lo no:

—¿Racladz to lëë gacnan to zha nacne znu rne naa?

²⁰ Golquiaadiaga sca ganle: Zeene gdziñ dze co, laga noyoon to no to guielnë ne laa naa biche lo to, laa grëraa miech haxta zley zho ne laa naa wbiche lo zho. Nli nroob guielnë ne tso to, per zeene laa to gan naa stib, guielbley nroob ne tso to.

²¹ Nac cuent rii zig rzac tib men wnaa ne ral xpëed. Glo yoob ro, yoobdox ne rquia me, per deque laa mëed co ralse, ni rsoladzdraa me yoob co; sac mazdraa nroob nac guielbley ne rio me ran me laa xpëed me blanso lo guidzliu.

²² Scadaa nagon rzac to, nli mban rac to niina, per zeene laa to gan naa stib, dzigosi tib guielbley nroob ne tso to, ni choot grielod ctiche guielbley co lo to.

²³ 'Zeene gal dze co, yquindraa to pe gnabdiidz lo to naa. Ncuuaane gnabtaa to, lo Pxoos naa gnab tow, ni zneedz mew, sac xnëz naa ngab to.

²⁴ Haxta lo nadze peet gard gnab to, niicle ne xnëz naa ngab to; laa niina laa naa rne lo to ncuuaane rquini to golnaba lo me, ni ible zneedz mew gon. Nroob guielbley ne tso to hor co.

²⁵ Nzian grë ncuuaane zine naa lo to, rned naaw clar; per laa dze bdziñ zeene grëse ncuuaane gne naa, clar gne naaw lo to, zig nac zeene gzet naa Pxoos naa.

²⁶ Ni zig nile naa ga, hor cosi ncuuaane gnabtaa to lo me, zneedz mew, sac xnëz naa ngab to. Yquindpaa gne naa lo me gneedz me ncuuaane gnab to lo me,

²⁷ sac ye me rleynie me to. Rleynie me to, sac gon rleynie to naa ni riladz to ne nli lo me brie naa bial naa lo guidzliu.

²⁸ Ni nligaa, lo me brie naa bial naa lo guidzliu; ni niina ne laa naa gbi, loque me gdziin naa.

²⁹ Dzigo rdzieets no lo me:

—¡Nasi nagon rien no zha rnee luu! Sac clar rnee luu, rneedraa luu zigne rnee luu glo.

³⁰ Nasi rien no grëse ncuuaane nan luu, sac zig nac niina pquindpaa nabdiidz no lo luu. Gacxe waa, nasi nagon riladz no ne nli lo Dios brie luu.

³¹ Pquiab me, në me:

—¡Wen ga telne riladz to niina cho nac naa!

³² Per lëë hor co nagon bdziñ; ni niina, grëse to laa to csaan naa, tib tib to zhaase zhaase nëz ne xen to. Per guiaan naa

loxaque naase, sac tibaque nacie Pxoꝝ naa naa.

³³ Grëse ncuuaꝛe bne naa lo to nu, laaw bne naa zeena peet tsienied guic to, beꝛque naꝛle to gaꝛle tibaque nacie naa to. Parga nli, laga no to lo guidzliu rii, nzian grë guielnë ne ted to, per gdziebde to; sac goꝛ naa rnabey, ladznia naa no grëtaa ncuuaꝛe no lo guidzliu.

17

Rnab Jesús gacniën Dios xpëëdsciel me

¹ Blozhse sca në me lo no, blis lo me bui me nëz gbaa.

—Dios, luu ne nac luu Pxoꝝ naa —rëb me—, niina nagon laa dze co bdziꝛ. Blu gaꝛle meꝛ nroob nac naa ne nac naa Xpëëd luu, zeena ga glu naa lo miech gaꝛle pa lotaa meꝛ nroob nac luu.

² Zigne psan luu grëse miech ladznia naa, ni gdeed naa tib guielmban ndzon ne gdziꝛd dze lozh lo grëse zha ne bneedz luu ngab xnëz naa; scaque niina blu gaꝛle meꝛ nroob nac naa.

³ Lëë guielmban co ygaa grëse zha ne gunbey luu, ne nli luuse nac Dios nguia mban, ni guieꝛ zho cho nac naa, ne pxeel luu naa biaꝛ naa lo guidzliu rii.

⁴ Grëse ncuuaꝛe bnabey luu naa, laaw noyꝛn naa; ni ga rlu naa lo grë miech rii gaꝛle pa lotaa meꝛ nroob nac luu.

⁵ Scagaa luu ne nac luu Pxoꝝ naa, niina ne laa naa glanso lo luu, blu gaꝛle meꝛ nroob nac naa; sac desde mazd glo zeene gard tsa grëtaa ncuuaꝛe no, tibaque nac lo guielndzon ne bdzio ne haxta dze ne blanso naa lo guidzliu rii.

⁶ Grëse zha ne ble luu lad grë miech rii bneedz luu lo naa, laa naa pseed zho gunbey zho luu; ni scagaa zha, biladz zho xtiidz luu. Cheꝛ luu zho per laa luu bneedz zho lo naa.

⁷ Zig nac niina, grëse ncuuaꝛe bneedz luu lo naa, naꝛle zho ne luu bneedza,

⁸ sac pseed naa zho grëse wseed ne bneedz luu lo naa, ni biladz zhow. Wen wen gocnaꝛ zho ne lo luu i brie naa ziaꝛ naa lo guidzliu rii, ni riladz zho ne luu pxeel naa.

⁹ Laa naa rnab lo luu gacniën luu zho. Rnabd naa par grëse miech guidzliu rii, sinque laa naa rnab por grë zha ne bneedz luu lo naa; sac goꝛ cheꝛ luu zho,

¹⁰ ni zha glu gaꝛle pa lotaa meꝛ nroob nac naa. Grëse zho cheꝛ luu zho; sac grëse ncuuaꝛe naccheꝛ naa, cheꝛ luuw; ni grësegaa ncuuaꝛe naccheꝛ luu, cheꝛ naaw.

¹¹ Rieꝛn naa, led nroobdraa cuëz naa lo guidzliu rii, laa naa gbile guaiaꝛ naa lo luu i; per zha, laa zho guaiaꝛnaque nu. Gane niina, luu ne nac luu Pxoꝝ naa, luu ne nac

luu tib meꝛ ne guieꝛd xtoꝛ, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacie grop ne.

¹² Leꝛ dze ne blëz naa lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca grieequia miꝛe raquiet lo Xtiidz luu.

¹³ Zhilew laa naa glanso zaatne no luu i; per leꝛ dze ne blëz naa lo zho nu, nzian grë ncuuaꝛe bne naa lo zho, zeena ye zho tso guielbley nroob ne no naa.

¹⁴ Pseed naa zho miꝛe nac xtiidz luu; per na rleë grëraa miech raꝛ zho zho, sacne zienaꝛdraa zho grë ncuuaꝛe ndzinlid ne rac lo guidzliu rii. Nac zho zigne nac naa, rleyneid naa grë ncuuaꝛe co.

¹⁵ Per rnabd naa cuee luu zho lo guidzliu rii, sinque laa naa rnab scaand luu gun zho ncuuaꝛe racladz meꝛdox.

¹⁶ Sac niicle zhaw, niicle naaw, choot zionaꝛd grë ncuuaꝛe ndzinlid ne rac lo guidzliu rii.

¹⁷ Bzhiguiel sca bdeed guielbiini lo zho guieꝛ zho zha nac Xtiidz luu, sac Xtiidz luu nac diidzli; zeena dib zdoꝝ zho tsoxco zho gban zho zigne rnabey luu.

¹⁸ Sac goꝛ, niina laa naa rxel zho lo grëraa miech guidzliu rii, zigne ne pxeelaque luu naa.

¹⁹ Ni niina, dib zdoꝝ naa laa naa gun miꝛe rnabey luu, zeena ye zho guieꝛ zho none dib zdoꝝ zho gun zho miꝛe rnabey luu.

Rnab Jesús por grë zha ne ygabraa xnëz me

²⁰ Laa naa rnab gacniën luu zho, ni gacniën luu zha ne naraa gliladz naa, zeene laa zho tsieseed zho;

²¹ zeena tibaque gac zho, zigne tibaque nac ne grop ne. Ni scaquegaa gacnie zho ne, zeena gliladz grëraa miech gaꝛle ne nli luu pxeel naa.

²² Laa naa psanꝛon zho zigne psanꝛonaque luu naa, ni tipse gac zho zigne tibaque nac ne grop ne.

²³ Zigne nacie luu naa, scaque nacie naa zho. Bzhiguiel gocniën zho, tibaque gac zho grëse zho, zeena gaꝛ grëraa miech gaꝛle ne nli luu pxeel naa, ni guieꝛ zho gaꝛle zigne rleyneid luu naa, scaque tibaque rleyneid luu grëse zha ne ngab lo naa.

²⁴ Papá, grëse zha ne bneedz luu lo naa nu, racladz naa ye zho guaiaꝛ zaatne glanso naa i, zeena gaꝛ zho lo grëtaa guielndzon ne no naa. Lo guielndzon ne bneedz luu lo naa, sac rleynietaque luu naa haxta zeene gard tsa guidzliu.

²⁵ Papá, luuse nac meꝛ ne rapd ni tib doꝛ, niicle ne ruꝛbeyd grë miech rii luu, saꝛgue

naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa.

²⁶ Laa naa pseedle zho gocnan zho cho nac luu ni bii seedragaa naa zho, guien zho ganle pa lotaa rleynie luu naa; zeena scaque guien zho gleynie zho samiech zho, ni gacnie zho naa.

18

Bnaaz zho Jesús

(Mt. 26:47-58; Mr. 14:43-50, 53-54; Lc. 22:47-54)

¹ Zeene blozh bnaab Jesús lo Dios, laa me brieenie no ga bdieedquia no nëz dan ro psë ne rnee zho Psë Cedron. Ga no tib zaatne zëëb niapse yag nex, dzigo ga bliiaz no gza no me.

² Judas zha ne pto me ga, wen wen runbey Judas lugar co, sac nzian vult ziyenie me no ga.

³ Dzigo zeene laa Judas blanso ga, laa Judas blansonie tib dzoon menguiib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzhenaa spad. (Lëë grë zha co pxeel grë pxoz rnabey, ni grë zha farisé.)

⁴ Loxaque blanso zho, laa Jesús brieequiale, rëb me lo zho:

—¿Cho rguib to?

Sca rëb me sac rienle me pe nacne zie zho ga, nanle me pe nac grëtaa ncuaañe ted me.

⁵ Pquiab zho, rëb zho:

—Men Nazaret ne lë Jesús, men co ziaadguib no.

Dzigo rëb me:

—Naa nac men co, tel me ziaadguib to.

⁶ Zeene bin zho rëb me: “Naa nac men co”, wbire rzhitsaque zho, grëse zho biab liu. Ye Judas no lad co.

⁷ Wbiire Jesús bnabdiidz me lo zho, rëb me:

—¿Cho zho rguib to?

Pquiab zho rëb zho:

—Men Nazaret ne lë Jesús, men co rguib no.

⁸ —Laa naa nile lo to —rëb me—. Naa nac men co. Telne naa ziaadguib to, golsaan sca gey grë zha ne zo lo naa nu.

⁹ Ga brieequia xtiidz me zeene rëb me: “Lo grë zha ne bneedz luu lo naa, ni tib zho bnitlod.”

¹⁰ Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lë Malcw. (Lëë mgui co quia xtsiin men ne nac pxoz nroob.)

¹¹ Zeene gon Jesús, rëbchaa me:

—jBlootsow spad qui Pedr! jBieñ ganle Pxoz naa rnabey znu teed naa! jNiace gond naa miñe rnabey me naa dzigo?

¹² Horco laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

¹³ Sca nzobdoo me, laa zho bdziñnie me lidz men ne lë Anás, pxozdzoop Caifás. Caifás nac pxoz nroob len iz co,

¹⁴ ni me ga rëb lo grë men non lo zha Israel, ne mazd wena tibaque zha ne yгаа guet, quizh zho par dib guiedz.

Rëb Pedr runbeyd Pedr Jesús

(Mt. 26:69-70; Mr. 14:66-68; Lc. 22:55-57)

¹⁵ Zhiits co, ga nal no grop no Pedr. Ni ne runbey naa Caifás men ne nac pxoz nroob ga, zeene bdziñ no ro lidz Anás, loxaque naa brieelo bzëëb nëz ley.

¹⁶ Laa Pedr, zaatne nactaa ro yu par gdziñ zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigora bdeed wnaa co diidz bzëëb Pedr.

¹⁷ Dzigo rëbchaa me lo Pedr:

—¿Bod ye luu dzigo lëë nac xpëëdsuel men ne bdziñnie zho i?

—Coo, led yed naa —rëb Pedr.

¹⁸ Grë zha ne quia xtsiin men co ni grë menguiib ne ndxie ga, laa zho bzëëgle gui. Grëse zho, laa zho ndxiedzë lo gui ga, sac rac nal. Ye Pedr bdziñ lo zho ga nodzëë Pedr.

Rquiep Anás Jesús

(Mt. 26:59-66; Mr. 14:55-64; Lc. 22:66-71)

¹⁹ Laa nëz len yu, laa Anás psilo noquiep Jesús dien yo grë xpëëdsuel me, ni dien pe nac grë wseed ne nolu me lo miech.

²⁰ Dzigo pquiab Jesús, rëb me:

—Grëse miech, nanwen zho ganle pe nac zhiwseed naa. Sac zeene pseed naa zho, bend naa ne ngeuets zhliian nseed naa zho; sinque zaatne rcaalsa nzian miech, ga bne naa lo zho. No hor pseed naa zho len grë yadoo win, nogaa hor pseed naa zho len yadoo nroob ne zob lad guiedz nu.

²¹ Nana bod rieguialda ne lo naa rnabdiidz luu. Mazd lo grë zha co ganle bnabdiidz, zha bin grëtaa ncuaañe bne naa.

²² Loxaque blozh sca pquiab Jesús, zeene bias tib menguiib ne rquianap yadoo zo gax ga, bdap me lo Jesús.

—jBieñ ganle! —rëb me—. jLed squid gon none yquiab luu lo men ne nac pxoz nroob!

²³ Dzigo rëbchaa Jesús:

—Telne rzac luu ben naa falt, bnë dien pe nac diidz ne pxin naa. ¿Te wal rdziladz luu ye, rguin luu zha ne rnee diidzli?

²⁴ Blozh ga scaque nzobdoo Jesús pxeel Anás me lo Caifás, men ne nac pxoz nroob.

Rnee Pedr stib runbeyd Pedr Jesús

(Mt. 26:71-75; Mr. 14:69-72; Lc. 22:58-62)

²⁵ Horco laa Pedr bii zodzëëque lo gui nëz ley. Dzigo wbiire zho bnabdiidz zho lo Pedr, rëb zho:

—¿Bod xpëëdsuel men ne blansonie zho i lëë nac luu?

Laane neeli Pedr, leļ pquiab Pedr rëb Pedr:

—¡Lëda! ¡Zha gaczhe naa xpëëdsuel men qui!

²⁶ Ye tib zhalidz Malcw, zha ne pchug Pedr diag ga, laa zho zodzëë lo gui ga, sac ye zho quia xtsiin pxoz nroob co; dzigo rëbchaa zho:

—Ni gon naa name, ye luu no lad zha ne zonie me len yag oliv ga.

²⁷ Wbiire Pedr rëb Pedr runbeyd Pedr me, ni lëëtaque hor co laa tib gall pcedz.

Güeynie zho Jesús lo Pilat

(Mt. 27:1-2, 11-14; Mr. 15:1-5; Lc. 23:1-5)

²⁸ Ziadyinile liuw, zeene laa zho brieenie Jesús lidz Caifás, zienie zho me zaatne nac xyulow Pilat, men ne nac gobernador. Zeene bdzin zho, ni tib zho bzëëbd len yulow, sac racladz zho quits zho miñe rnabey xley lay zho; parne grielo yquini zho guielwagw ne row zho lni Pascw co.

²⁹ Nacne brieie Pilat bnabdiidz Pilat lo zho, rëb Pilat:

—¿Pe nacne ziaadnie to men qui nu? ¿Pe rquiaqui to me?

³⁰ Pquiab zho, rëb zho:

—¡Por grëtaa guiełntseeb ne noyun me, gane ziaadnie no me! ¡Telne niac me men ndzinli, niacxe lega guiaad-zo no me lo luu!

³¹ Dzigo rëbchaa Pilat:

—Golsënie me, tose golgunquizh me miñe been me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no men Israel, grielod ne nose gnabey guet tib miech.

³² Ga brieequia miñe bnee Jesús, zeene bzeet me ible zut miech me.

³³ Dzigo bzëëb Pilat len yulow, bnabey me gocredz Jesús. Dzigo bnabdiidz me lo Jesús, rëb me:

—¿Pe ni luu nac zhirey men Israel?

³⁴ —Ne squi rnee luu —rëb Jesús—. ¿Pe guic luu biaba, te no cho nëw lo luu ye?

³⁵ Pquiab Pilat, rëb Pilat:

—Nanle luu ganle led zha Israeld naa. ¿Pe nac sca ne ziaadnie zho luu nu? ¿Pe been luu? Sac gon zha ladzaque luu grë zho zha ne rnabey lo zhipxoz zho, zha biaadsan luu nu.

³⁶ Dzigo rëbchaa Jesús:

—Ni rey nac naa, per led lo guidzliu riida, telne niaca miñe lo guidzliu riiv, dzigosi grëse zha ne nacnie naa niacntseeb zho, nsaaand zho naaz zha Israel naa. Per na, zhaa zaatne nac naa rey.

³⁷ Pquiab Pilat, rëb Pilat:

—¿Rey luu dzigo lëë?

—Scaw gon —rëb Jesús—, nli rey naa; zigne rnee luu i. Ible miñ co nacne bial naa gol naa lo guidzliu rii, ni bial naa bialseed naa miech gunbey zho miñe nac diidzli. Ni zha ne zienal miñe nac diidzli, zha co ngab lo naa.

³⁸ —¿Diidzli ye? —rëb Pilat.

Bnabey Pilat tsiegut zho Jesús

(Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, brieie Pilat ga güeynee Pilat lo grë zha ne bdzinne me ga, rëb Pilat lo zho:

—Ni tib dol gon rapd men rii.

³⁹ Per gzobse lni Pascw rii, rnab to rlaa cholze tib zha ne no ladzguib. ¿Pe gnë to sca, mazd csilaa naa men ne nac zhirey to nu?

⁴⁰ Pquiabbe zho, rëb zho:

—¡Csilaad luu me! ¡Mazd psilaa Barrabás! Ni laa Barrabás tib ngbaan nac Barrabás.

19

¹ Zeene gon Pilat sca rac zho, dzigo bnabey Pilat bla menguiib, bdeed dooguid zho Jesús.

² Bzieecw zho bla lë yag guiets bzoob zho guic me, ni bgacw zho me tib lë lar nizhnie nlaan.

³ Dzigo psilo zho runnguzee zho me, nguiedz roptsie zho rnee zho:

—¡Bley na ganle, laa luu nacle zhirey zha Israel!

Ni rgap zho lo me.

⁴ Wbiire Pilat brieequia Pilat zaatne ndxie grë miech co, rëb Pilat lo zho:

—Golwi ganle laa naa cuee me, glu naa me lo to, per gancañ to ganle rieguiald guet me; laa naa pquieple me rlu ni tib guiełntseeb beend me.

⁵ Zeene laa Jesús brieequia, nzobguicse me coron yag guiets co, ni nacw me lar nizhnie co.

—Golwi na ganle —rëb Pilat—, lëë me nu.

⁶ Grë pxoz ne rnabey, ni grë menguiib ne rquianap yadoo, zeene gon zho me, psilo zho nguiedz roptsie zho rnee zho:

—¡None guet me! ¡Bnabey yquia me lo cruz!

Dzigo rëbchaa Pilat:

—¡Goltsienie me sca! ¡To golquiaa me lo cruz! Sangue naa, grielod yquia naa me lo cruz; sac laa naa gonle peet guiełntseeb beend me.

⁷ Pquiab zho rëb zho:

—¡Rdziaap no xley no! Ni ley co rnabey ib none guet me, sac rquidie me rnee me laa me nac Xpëëd Dios.

⁸ Zeene bin Pilat sca rëb zho, mazdraa bdzieb me.

⁹ Dzigo bzëëbnie me Jesús len yulow stib, bnabdiidz me lo Jesús, rëb me:

—¿Bnè dien cho menpaa nac luu? ¿Pa nac laz luu?

Per ib pquiabd Jesús lo xtiidz Pilat.

¹⁰ Dzigo rëb Pilat:

—¿Pe nacne rquiabd luu? ¿Gon ganle naa rnabey, zrieelo csilaa naa luu, o gnabeygaa naa yquiaa luu lo cruz?

¹¹ Pquiab Jesús, rëb me:

—Nli luu nac zha rnabey niina, per telne niaca miñe needzd Dios guielrnabey qui lo luu, grielod ne luu gnabey zha gac naa. Miñocoxe waa, zhi nac xtol luu, mazdraa nac xtol zha ne biaadlo naa nia luu.

¹² Dzigo gocladz Pilat silaa me Jesús, per bzhigueld grè zha ne güeyasñ me ga.

—Telne laa luu csilaa mgui qui gon —rëb zho—, rrieequia dzigo ye luu rlëenie César. Sac gon, grëse zha ne racladz gac rey, lo César ga racndaan zho.

¹³ Zeene bin Pilat sca rëb grè mieh co, bnabey Pilat briece Jesús nëz ley stib. Dzigo güeysoy Pilat lo xcan ne zo ley co, zaatne rzob me run me guielwxtis. (Dipse ley co, niapse quie lag now; gane rnee zha Israela Gabata.)

¹⁴ Lëë dze vispr lni Pascw co ga nagon, zig grolle dzew noyac grè min co. Dzigo rëb Pilat lo zho:

—Laa zhirey to nu gon. ¡Golsënie me!

¹⁵ Psilo zho stib, nguiedz roptsie zho, rnee zho:

—¡Beetgazh men qui! ¡Bnabey yquia me lo cruz!

Rëbchaa Pilat:

—Zhirey to nac me, ¿ni racladz to ye gnabey naa yquia me lo cruz?

Pquiabbe grè pxoz ne rnabey rëb zho:

—¡Tibaque men ne nac zhirey no, ni lëë men co nac César!

¹⁶ Dzigotaa mazd laa Pilat bloo Jesús nia zha ne tsiequiaa me lo cruz.

Pquia Jesús lo cruz

(Mt. 27:32-44; Mr. 15:21-32; Lc. 23:26-43)

¹⁷ Zeene laa Jesús briece ga, rna tib cruz nroob ney me; laa zho zienie me. Bdzinñie zho me ro guiedz, zaatne rnee zho “Gui Beerguic Ngutoo”;

¹⁸ ga pquiaa zho me lo cruz. Ni pquiaa zho schop zha ntseeb, tibga zhicruz zho bzo cue zhicruz me.

¹⁹⁻²⁰ Bnabey Pilat pquia bla lan diidz guic zhicruz me, rneew: “LËË JESUS MEN NAZARET NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha Israel gon sca quia guic zhicruz me, sac gaxpaa ro guiedz nac zaatne pquiaa zho me lo cruz ga.

²¹ Nacne güey grè pxoz rnabey, güeylisqui zhow lo Pilat, rëb zho:

—¿Pe nacne pquiaa luu guic zhicruz mgui co, ne me nac zhirey zha Israel? Pe gacd

nquiaa luu: “Rnee me, me nac zhirey zha Israel.”

²² Pquiab Pilat rëb Pilat:

—Miñe pquia naa, laaw pquiale ga. Ni sca none guiaana.

²³ Laa grè menguiib ne pquiaa Jesús lo cruz ga, zeene blozh pquiaa zho me lo cruz, bzhen zho xab me been zhow tap lë, tib lëgaw biaannie zho tib tib zho. Laa lar ne rbix me, tiblagaque naca, ndiibda;

²⁴ dzigo rëbchaa zho:

—Minritaa nagon dziuungrold ne. Miñe naca gotsaa dzio new rif, dzigo zha ne grieequia zha co guiaanniew.

Ga brieecquia miñe raquiet lo Xtiidz Dios, zaatne rnee: “Xab naa, miñe racw naa nzian lë been zhow bgaaza lo zho; laa miñe rbiix naa, bio zhow rif.” Ni scadaa been gza menguiib co.

²⁵ Gax zaatne zo zhicruz Jesús ga, zo blalaa men wnaa. Ga zo xniaa Jesús, zo tib bel xniaa me, zo Mari tseele Cleof, ni Mari Magdal.

²⁶ Gaxaque ga zo naa. Zeene gon Jesús xniaa me, ni gon me naa, rëbchaa me lo xniaa me:

—Been cuent nagon lëë xpëed luu i zo i.

²⁷ Laa lo naa në me:

—Been cuent lëë xniaa luu i gon. Bzhiguel luu gan me.

Dzigo desde dze co, pcaania naa xniaa me biane naa me lidz naa, pteedlo naa me.

Gut Jesús

(Mt. 27:45-56; Mr. 15:33-41; Lc. 23:44-49)

²⁸ Rienle Jesús ne gataa laa me psiaal dziin ne pxeel pxoz me me gon me, ni par grieequia grëse zigne rzeet lo Xtiidz Dios ted me, hor co bredz me rëb me:

—Rnab zhis naa.

²⁹ Gax lo grè menguiib ne quianap me ga, ga zo tib cant win no nziu bla. Zeene bin zho sca rëb me, rias tib zho bgadz zho tib lë zhiil lo nziu co, bzoob zhow guic tib goobgui nool güeyquiaa zhow ro me.

³⁰ Zeene bdziñ nziu co ro me, pquiin me niipa, dzigo rëbchaa me:

—Lëew nagon, nataa laaw bza.

Zeene blozh sca bnee me, znuse pquianrun guic me; laa me blozh.

³¹ Guini liu co nac tib dze ne mazdraa nda lo zha Israel. Nacne güey grè zha ne rnabey lo menguiidz güeynee zho lo Pilat, gnabey Pilat tsietiits zho gzhibni Jesús ni zha ne pquiagza me lo cruz ga, zeena quietgazh zho lo cruz dze co; sac racladz zho scaque quia zho lo cruz zeene laa dze nda co gdziñ.

³² Dzigo pxeel Pilat bla menguiib. Zeene bdziñ zho, glose güeytiits zho ni tib zha ne quiaagza Jesús lo cruz ga; blozh ga, güeytiitsaque zho ni stib zho.

³³ Zeene bdiin zho zaatne zo zhicruz Jesús, gon zho laa me gutle; nacne bdiitsd zho ni me.

³⁴ Horco wbig tib menguiib co, bliz zho xlanz zho ro xcuxti me. Zeene bdoob zho lanz co, nis ne, ren ne briece ga.

³⁵ Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw.

³⁶ Ga briecequia mine raquiet lo Xtiidz Dios, zaatne rnee: "Ni tib dzit ne no me quiitsd zho."

³⁷ Ni stib lugar, zaatne rnee: "Bii zanaque zho ganle cho nac men ne bliz lanz zho ga."

Bgueets Jesús

(Mt. 27:57-61; Mr. 15:42-47; Lc. 23:50-56)

³⁸ Laa José, tib men Arimaté, zeene bin me laa Jesús gutle, dzigo güey me lo Pilat güey nab me diidzbey par grieelo tselit me xcuerp Jesús lo cruz. Ye me xpëëdsuel Jesús nac me, per pxobnend me ne ye me nacgza Jesús; sacne rdzieb me grë men Israel ne rlëe lo Jesús. Dzigo bdeed Pilat diidzbey.

³⁹ Nicodem, men ne güeyzodiidznie Jesús ga tib pcow liu, ye me güeynal zhits José; güeynie me zig galpssiiptap kil tiblo zënex ne ríaa yaal ne lë mirr ni yaal ne lë áloe.

⁴⁰ Zeene blozh biet Jesús lo cruz, psilo zho bdëëb zho zënex co xcuerp me; blozh ga, pchel zho me tib lar nquits; sac sca rqueets grë men Israel zhingutoo zho.

⁴¹ Gax zaatne pquia Jesús lo cruz ga, niaa tib corral no niapce yag nex. Len corral co, ga ndieen tib baa tib cho quie, ni tib ngutoo gard ygueets len baa co;

⁴² Dzigo nacne gase güeyqueets zho me, sac zhile runfalt sëëb dze nda co, ni baa cose nac mine ríaan gax ga.

20

BRIEEBAN JESUS

(Mt. 28:1-10; Mr. 16:1-8; Lc. 24:1-12)

¹ Gol dze ne rzobni zhmalá, silgaw, scase bii ncow rnaw, briece Mari Magdal zie me ro baan Jesús. Zeene bdiin me, gon me laa quie ne nioog ro baa co bdiooble, laaw zole tib nëz.

² Horco lëëlëd wbiire nguzhoon me, biaad me zaatne no no grop no Pedr, biaadnie me diidz lo no, në me laa zho güeybeele Jesús len baa, dieen palo güeysan zho me.

³ Dzigo lëëlëd, briece no grop no Pedr, zioso no ro baa.

⁴⁻⁵ Zeene bdiin naa ro baa, blëz naa niip, dzigo bdiixlo naa len baa gon naa laa lar ne briel me zhoob ga; per bzëëb naa. Laa naa blozhdze bdiixlo len baa, zeene laa Pedr blanso.

⁶ Zigne blanso Pedr bzëëb briel len baa, gon Pedr nligaa laa lar co zhoob ga,

⁷ niicle lar ne briel guic mew, laaw zhoobaque ga; ndibëdsew, zhooba tib lad.

⁸ Nacne bzëëbaque naa. Zeene gon naa zha zhoob lar co, dzigoraá bliladz naa ne nli brieceban me.

⁹ ¡Sac hor co, bii gard tsoquic naa zha rnee lo Xtiidz Dios; sac ga raquiet ne ible zrieceban me!

Gon Mari Magdal Jesús

(Mr. 16:9-11)

¹⁰ Ye Mari biire blanso ro baa ga stib. Zeene wbiin no ga grop no Pedr, laa Mari bii zo ro baa ga.

¹¹ Ga name zo Mari roon me. Sca roon me, tibaque zeene bui me nëz len baa co,

¹² gon me laa chop anjl zob leen co. Dib nquitsbiese rna xab grop anjl co, tib me zob nëz ne bzhoob guic Jesús, stib me zob nëz ne bio ni me;

¹³ dzigo rëbchaa me lo Mari:

—¡Pe nacne roon luu?

—Roon naa —rëb Mari—, sac laa zho biadbee xcuerp Jesús nu, na dieen pa güeysan zho me.

¹⁴ Loxaque blozh sca bnee me, zeene pt-sire lo me gon me laa tib men co zo gax zhits me. ¡Per ib beenbeyd me ne Jesús!

¹⁵ —¡Pe nacne roon luu? —rëb Jesús—. ¿Cho rguib luu?

Len güeynie guic Mari rëb me bod men ne rquianap gaw, dzigo rëbchaa me:

—Bzhiguiel, telne luu biadbee me nu, bnë dien pa lo güeysan luu me; zeena ga naa gaxi naa me.

¹⁶ Horco bneelë Jesús Mari, bredz me me. Zeene bin Mari lë me, lëëlëd biecw me; dzig-oraá beenbey me Jesús.

—¡Maestro! —rëb me—. ¡Mod luu i!

Laa me zie gbig me lo Jesús.

¹⁷ Dzigo rëbchaa Jesús:

—¡Xeen luu naa! Sac gard guia naa lo Pxoó naa gbaa. Mine naca, güey güeynie diidz lo grë zha ne bzënal zhits naa; gudz lo zho: Laa naa nole nëz guia naa lo men ne nac Pxoó ne, men ne nac Dios ne rdziunbey ne.

¹⁸ Horco lëëlëd wbi Mari ga, ziaadnie me diidz lo no. Blanso me bzodiidz me zha gon me Jesús, ni në me lo no zigne rëbse Jesús lo me ga.

Briecequia Jesús lo xpëëdsuel me

(Mt. 28:16-20; Mr. 16:14-18; Lc. 24:36-49)

¹⁹ Pcow liu dze dmingw co, grëse no ne nac no xpëëdsuel me laa no pcaalsa; lox-aque Mazh runfalt. Dziits nquiaa no yag yu, sac rdzieeb no grë zha Israel ne rlëënie me. Laa no ndxie ga, tibaque zeene briecequia me bzo me glowtaa lo no; pquiaabdiuzh me no.

²⁰ Blozhse pquiaabdiuzh me no, dzigo blu me len nia me lo no, zaatne biaaz clav zeene

pquia me lo cruz, ni blu me ro xcuxti me. jGrése no per nli rley no zeene bdzïon no ne nli mew!

²¹ Blozh ga, në me lo no:

—jLaa naa rnedz tib guie|bley zdoos to, zeena peet tsienied guic to! Zigne pxeel Pxoos naa naa bia|naa, scagaa niina laa naa rxe|to.

²² Dzigo blub me lo no grése no.

—Golcaania Espiritu Sant —në me—.

²³ Ni zeene gon gun to tib miech perdon, scaque Dios zun me zho perdon; laa telne siguield zho gun to zho perdon, laa zho biaanle lo xtol|zho ga.

Gon Mazh Jesús

²⁴⁻²⁵ Zeene bdzïon no Mazh (Mazh ne rnee zho “Mëëdgrop” ga), bzodiidz now lo Mazh, per bliladz Mazha, rnee Mazh:

—Rliladz naa mine rnee to i gon. Zliladz naaw, per haxta ganlo naa me, haxta gan naa len nia me zaatne biaz clav, ni cteed-xug naa ga; ni csëëbnia naa ro xcuxti me zaatne biaz lanz ga.

²⁶ Goc xon ngbidza, laa no pcaalsaque len yu co stib; hor cosi yele Mazh ndxiegrë no ga. Scaque dziits nsioog no ro yu, per tibaque zeene bdzïon no laa Jesús bzëëb len yu ga stib, bzo me glowtaa lo no, pquiaabdiuzh me no. Blozhse pquiaabdiuzh me no,

²⁷ rëbchaa me lo Mazh:

—Wbig na Mazh, bui len nia naa, psëëb mzhugna luu nu. Dien nia luu nu, psëëbnia ro xcuxti naa. Gacchopdraa guic luu, sinque bliladz ganle ne nli mban naa.

²⁸ Dzigoraa bliladz Mazh ne nli mban me.

—Nasi rliladz naa mban luu —rëb Mazh—. Luu nac men ne rnabey naa, luu nac xDios naa.

²⁹ Pquiab Jesús rëb me:

—Laa luu rliladz niina, lëëcxe laa luu gonle naa waa. jDichos zha ne gliladz ne nli mban naa, niicle rand zho naa!

jPe nacne pquia grë diidz rii?

³⁰ Lo lal ne bzënie Jesús no, ndaldoo milagr ne bdzïon no been me, led grëda raquiet lo guits rii.

³¹ Mine pquiase naa nu, laaw pquia naa zeena zeene glab tow, guien to ganle ni gliladz to: Jesús nac men ne biazsilaa ne lo xtol|ne, Dios bzooblo me biaz me, ni Xpëëd Dios nac me; sac zha ne dib zdoos gliladz cho nac me, zгаа zho tib guie|mban ndzon ne gdziñd dze lozh.

21

Gon zho Jesús Galilé

¹ Bded ga, wbiire brieequia Jesús lo no stib, zaatne nac ro nisdoo nroob ne rnee zho Tiberias.

² Tib bdze dzew, tipse ndxie no gza no Simón Pedr, Mazh, Natanael (men ne nac

men Caná ga), bets naa Jacob ni schop zha ne nacgza no.

³ Tibaque zeene në Pedr; laa Pedr tsie guoz mel, Dzigo rdzieets no:

—Yeque no sca zia guio ne.

Dzigo bziaab no tib len barcw win gza no, laa no zio.

Dipse guieel bdzïonie no barcw co lo nis, per ni tib mel bgaad.

⁴ Laa liu ziaadle lozh guini, zeene bdzïon no laa tib men co zo ro nis, per ni tib no bdziunbeyd me.

⁵ Dzigo bnee men co lo no, në me:

—Yo to dien xin, jpe bgaa ma?

Pquiab no rdzieets no lo me:

—Choot ma bgaad.

⁶ Dzigo nëchaa me:

—Golron guiee ne rgaa ma i nëz derech ganle, znaaz to ma.

Dzigo bron no guiee co nëz derech. Zeene laa no cueew lo nis, ib lëbd no glis now; ndaldoo mel ne biodzë lena.

⁷ —jPedr! —rep naa—. jBina ganle, xmaistr ne i gon!

Zeene bin Pedra, lëëlëd wbix Pedr xab Pedr, biab Pedr lo nis; psilo Pedr bzhoobnis Pedr brieequia Pedr ro nis.

⁸ Laa no biaz len barcw ga; nole bdziñniew zaatne nac ro nis. Maase tapgaltsii metr sca bdioobniu no guiee co lo nis.

⁹ Zeene briece no len barcw, bdzïon no laa gui noyeche, laa tib mel zhooble lo gui co, ye guietxtil ne.

¹⁰ Dzigo në Jesús lo no:

—Golhtënie bla mel ne blozh bnaaz to i nu dien.

¹¹ Dzigo güey Pedr biepe me len barcw, güeyxadz me guiee ne no mel ga; dzigo bdoobniu mew bdziñniew mew haxta zaatne nacpaa ro nis. Mel tafa, niapse ma mbeew, zeene bgab ma rgaa ma tib gayoo chooptsi-iptson lo grë ma; niicle scataa nzian ma, per blëb guiee co, briezda.

¹² Blozh ga, bredz me no, në me:

—jGolhtë na, zeena gowxeren to!

Ni tib no bnabdiidz lo me dien pe nli mew; sac, jrienpaa no ne nli mew!

¹³ Dzigo wbig me bdiiz me guietxtil co lo no, bzhen me mel ne, bneedz me ma lo no.

¹⁴ Ga bion vuelte brieequia me lo no wlañ ne brieeban me.

Bzodiidznie Jesús Pedr

¹⁵ Blozhse bdioowxeren no, bredz Jesús Pedr, psilo zho bzë zho grop zho; dzigo rëb me lo Pedr:

—Simón (xingan Jonás), jpe nli dzigo rleyneraa luu naa que grë zha qui?

—Nqualadz naa luu —rëb Pedr—, ni nanlegaa luuw ganle.

—Pteedlo grē xpēcwxiiil win naa sca —rēb me.

¹⁶ Whiire me, rēb me lo Pedr:

—Simón (xingan Jonás), ¿pe nlipaa dzigo rleynie luu naa?

—Nquialadz naa luu —rēb Pedr.

Dzigo rēb me:

—Pquianap xpēcwxiiil naa sca.

¹⁷ Whiireque me stib rēb me lo Pedr:

—Simón (xingan Jonás), ¿pe nlipaa nquialadz luu naa?

Zeene bin Pedr sca rēb me, mban goc zdo Pedr; sac gale rac tson vult zinabdiidz me lo Pedr, dzigo rēb Pedr:

—Luu nac men ne rnabey, luu nana grēsew, nan luu ganle nquialadz naa luu.

Dzigo rēb me:

—Telne nli nquialadz luu naa, yquiaanap luu xpēcwxiiil naa sca.

¹⁸ Zeene gon bii nguieg luu, led rsoladz luu ganle luuzhal racw xab luu, rrieelo rie luu zaatne racladztaa luu; per zeene gon laa luu gac mengolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladzd luu.

¹⁹ Zeene znu rēb me lo Pedr, ga bzeet me zha nac guielgut ne yгаа Pedr, ni ga glu Pedr ganle pa lotaa men nroob nac Dios. Blozhse ga, rēbchaa me:

—¡Dēnal zhits naa!

²⁰ Dzigo nalaque naa zhits me grop me Pedr. Zeene ptsire lo Pedr, gon Pedr laa mēēdscuel ne scataa rleynie me ga, laa zho nal ga, zha ne zobpaa cue me ga lo xtsee co, zha ne wbigpaa bnabdiidz lo me dien cho nac zha ne tsielo me ladznia zha ne gut me; dzigo rēbchaa Pedr lo me:

²¹ —Telzhe zha rii waa, ¿pe nac mine ted zho?

²² Rēbchaa me:

—¿Pe nadien gun luu ne racladz luu gacnan luuw? Telne gacladz naa, zrieelo gnabey naa gban mgui haxta len dze ne guial naa stib. Led xcuenta luu ga. ¡Na zeen dēnal zhits naa!

²³ Zeene gocnan grēraa zha ne rlladz Jesús sca bnee me, grēse zho tibaque güeynie guic zho gdziandraa dze guet naa. Per led scada, sinque znu naca, rēb me: ¡Pe gun Pedr! Telne gacladz me, zrieelo gnabey me gban naa haxta gal dze ne guiaad me stib.

²⁴ Grēse mine pquia naa nu gon, grop lo naa gon naaw, grēse zha ne nacgrē no nanpaa zho ganle ne diidzli rne naa.

²⁵ Ndalsoora grē ncuane nroob ne been Jesús, tel niaca mine yquiaw grēsew, ni ygaad dib lo guidzliu tsotsow grē guits ne yquiaw ga.

MIÑE BEEN ZHA NE PXEEL JESÚS BNEE XTIIDZ ME

¡Diuzh Tiofl!

¹ ¿Yose luu dien bets? Naa gon nac Luc, laa naa rxel stib guits rii lo luu. Miñe pxel naa lo luu glo ga, lo co pquia naa grése miñe been Jesús, grése wseed ne blu me lo miech zeene psilo me xtsiin me

² haxta gol dze ne psan me diidz pe nac ncuane gun gré zha ne bzooblo me tsie tsienee Xtiidz me. Espíritu Sant bdeed guielbiini lo zho bien zho zha racladz me; lée dze co ga zey me gbaa.

³ Nli psacsi miech me, beet zho me, per brieaban me. Ni par glu ganle ne nli brieaban me, dipse len choo ngbidz brieequia me lo gré zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

⁴ Tib vuelt ndxie zho gré zho me, dzigo pso me diidz lo zho ible grieed zho lad guiedz Jerusalén, haxta quiet Espíritu Sant gdeed guielbiini lo zho zigne nacle xtiidz Pxoze me; ni biire rëb me lo zho:

⁵ —Gol soladz ganle laa naa nile lo to: nli laa Juan pchoobnis, per niab nisa; sangue to zgaa to guielbiini ne gneedz Espíritu Sant, rrieequia Espíritu co chobnis to; ni zhile gdziñ dze ne laa miñ co ga.

⁶ Len ngbidz ne sca nolulo me lo zho, tib vuelt bnaadidz zho lo me, rëb zho:

—Ndion no men rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma?

⁷ Dzigo pquiab me rëb me lo zho:

—Dios, men ne nac Pxoze naa, ncuane gun me rieguialde to gacnañ tow, mese nañ dien pa dzew, dien pa horgaaw; sac mese nac men ne grielo gupa.

⁸ Sinque to, zeene laa Espíritu Sant gneedz guielbiini lo to, hor co laa to ygaa poder ne rap me, laa to csilo gnee lo gré zha Jerusalén cho nac naa; tsie to dib xtan zha Judé, dib xtan zha Samar, ni lo gréragea miech, tsienee tow.

⁹ Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me biongueetsse len xcow co, gondraa zho me.

¹⁰ Laa zho hii quiawique zhan gbaa zaatne gon zho biongueets me ga, tibaque zeene bdziñ chop mgui zaatne zo zho ga, dib nquitsbiese rna xab grop mgui co;

¹¹ rëb me lo zho:

—¿Pe nacne squitaa quiawi to zhan gbaa? Zigne gon to i nagon zey me gbaa niina,

squique quiet me gbaa gal dze ne laa me guiaad stib.

¹² Blozh ga dzigo laa zho wbi guic gui co (lëe Gui Oliv ga). Zhisaque bzé zho laa zho bdziñle Jerusalén, lalse ne rzé zho dze ne rdziiladz zho lo dziin.

¹³ Bdziñ zho zaatne rbéz zho, biepe zho len yu ne riaan glaa; sac len yu glaa co ga no zho. Ga rbéz Pedr, rbéz Ndrés, Jacob, Juan, Lip, Mazh, Bartol, Matew, ni Jacob ne nac xingan Alfé; Simón Zelot, ni Judas menlidz Jacob.

¹⁴ Grése zho tibaque rcaalsa zho rzodidznie zho Dios gré zho zha bets Jesús, xniaa me Mari, ni gréaa men wnaa ne nacgré zho.

Bzo zha ne gun dziin ne psaan Judas

¹⁵ Tib dze pcaalsa maase tib gayoo gal zho, dzigo guso Pedr bnee me lo zho, rëb me:

¹⁶ —Grése to bets, grése to bzian, golgacnañ ganle, miñe been Judas zeene sca güeyto me Jesús, nole ne sca gaba. Lo Xtiidz Dios zhozneew, lëe miñ co pquiaa rey David zeene psiaab Espíritu Santa guic me.

¹⁷ Ye Judas gocgza no, ye me nac diidz niun dziin ne nodziun no niina.

¹⁸ 'Ni nligaa laa ne niun me dziin co, lel been me guielntseeb pto me Jesús, ni blozh ga lëeque lo liu ne bziiu dimi ne bdiidz zho me ga, ga güeytsobe me bzob guic me lo liu, wbilgash me, nëzrii nëzrec bliaal len me.

¹⁹ Miñ co nacne zeene laa gré zha Jerusalén gocnaña, dzigo bleelë zho liu co "Liu Ren".

²⁰ 'Zigne rneque naa ga —rëb Pedr—, ible lo Xtiidz Dios sca zhozneee; ni lëe miñ co ga raquiet zaatne znu rnee:

Ible ziaandets lidz zho,

ni stib choot gbandraa zaatne bio zho.

Ni rneequew:

Zhaale zha ne guiaanñie dziin ne no niun zho.

²¹⁻²² 'Miñ co nagon, ible nonguiela so tib zha ne guiaañ xlugar Judas, gacgza zho no guioxobnen no ne nli brieaban Jesús. Nana sca, lo gré zha ne nacgré no psilo bzianie no me zeene pchoobnis Juan me, haxta gol dze ne laa me zey gbaa, lad co golgotsaa cue ne tib zha ne so gacgza no.

²³ Dzigo ble zho tib men ne lë José Barsabás (lëeque me ga rnee zho Just), ni stib men ne lë Matí.

²⁴ Blozh ga, bnaab zho lo Dios, rëb zho:

—Dios, ndion no luu nac men ne rnabey no; ndion no luuse nac men ne runbey zdoos tib tib miech, gane niina laa no rnab lo luu, luu blu dien cho tib zha rii racladz luu so

²⁵ gun dziin ne psaan Judas; sac laa Judas zeyle zaatne rieguial Judas.

²⁶ Blozhse bnaab zho lo Dios, laa grop zha co bio rif. Nacne brieequia men ne lë Matí

ga, dzigo dze cotaā laa me gogza stsiiptib zha poxtl co.

2

Biaad Espiritu Sant

¹ Zeēne goc gadz zhmal gut Jesús, lëētaque dze co ruṅ grē zha Israel lni ne rnee zho Pentecostés. Dze co grēse zha ne no xnēz Jesús, laa zho pcaalsa.

² Laa zho ndxie grē zho, tibaque zeēne bio tib bi nroob zhan gbaa, zig nac zeēne rriee tib medox, haxta len yu ne ndxie zho ga pquiab;

³ ni brieequia nzian biini, rluw zig nac ludz miech, tibga tibga biini co blēz guic zho grēse zho.

⁴ Horco grēse zho pcaania guielbiini ne bdeed Espiritu Sant, psilo zho rnee zho grē xtiidz stib miech miṅe rsiaabtaa me guic zho.

⁵ Len dze co nziandoo grē zha Israel ne no stib ladz beṅ bdziṅ Jerusalén, grē zha ne bi zienal xley Dios.

⁶ Laa zeēne bio bi co, ye zho no lad grē miech guizhiu ne bdopbe zaatne zob yu co; tib tib zho zeēne bin zho laa grē zha ne pcaania guielbiini co nonee xtiidz zho, per nli rzee zdoo zho.

⁷⁻⁸ Rlozhd gwi zho rnee zho:

—iPe nli diidz rii! ¿Zha rrieelo rnee grē zha qui xtiidz ne, ni led zha Galilé nac zho? iTib tib ne ndxie ne nu, zhaase zhaase diidz ne rnee ne!

⁹⁻¹⁰ Nu ndxie grē meṅ Part, meṅ Media, meṅ Elam, meṅ Mesopotam, meṅ Judé, meṅ Capadós, meṅ Pont, meṅ Asia, meṅ Frij, meṅ Panfil, meṅ Egipt, haxta grē meṅ ne ziaad nēz África, delant guiedz Ciren; grē meṅ Cret, meṅ Arab, grē zha Israel ne ziaad nēz Roma, grē meṅ Roma, zha ne zienal zhiwseed zha Israel.

¹¹ Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grētaa milagr nroob ne ruṅ Dios.

¹² Grēse zho per nli rzee zdoo zho, rdziield-
raa zho zha guṅ zho, rnabdiidzlsa zho rnee zho:

—¿Bay pe i? iNcuuaane gard dzian ne!

¹³ Laa nogaa zho rzhidznie, rnee zho:

—Rzudz grē zha qui, gane squi rzē xtiidz zho.

Bdeed Pedr tib iban

¹⁴ Dzigo bzoli Pedr gza me stsiiptib zha ne nac poxtl ga, psilo me nguiedz bnee me lo grē miech ne ndxie ga, rēb me lo zho:

—Grēse to, zigtaa zha Jerusaléna, zigtagaa zha ne blanso Jerusalén nuw, golgona ganle.

¹⁵ No bla to quianee rēb to rzuudz no, per led rzuudz no. Griiṅpaale name blan ngbidz, niicle niaca zha ne riepaa nziu, niacxe goṅ nale laa zho gzudz.

¹⁶ Led rzuudz no, sinque niina nagon noyac grē miṅe bzeet Joel padzeela (tib meṅ ne biadteed xtiidz Dios), zeēne znu rēb me:

¹⁷ Znu rnee Dios:

Zeēne wzhile runfalt gaḷ dze co, laa naa cxel zhiEspiritu naa zdoo grēse miech;

grē xingan zhow, grē xindzooop zhow, laa zho cteed xtidz naa,

grē zha nguieg, nzian grē ncuuaane glulo lo zho,

grē meṅgol, nzian grē ncuuaane glu mcaal lo me.

¹⁸ Len dze co,

grēse zha ne nguzobdiidz lo naa,

niicle mguiew, niicle wnaaw laa naa cxel zhiEspiritu naa zdoo zho,

dzigo grēse zho cteed xtidz naa.

¹⁹ Nzian grē ncuuaane gzee zdoo to glu naa zhan gbaa,

scaque lo guidzliu, zaṅ to ren, zaṅ to bel, zaṅ to grē goxdo.

²⁰ Zeēne zhile gdziṅ dze ne guiaad meṅ ne rnabey ne,

laa lo ngbidz ycow, laa mēē gna nizhnie zig rna ren.

Dze ne guiaad me ga,

dze co gag tib dze ne mazdraa nroob, tib dze ne mazdraa ndzon.

²¹ Grēse zha ne dib zdoo gnab lo Dios yquia zdoo me zho,

grēse zha co scaania me zho.

²² iGrēse to, golquiaadiaga sca ganle! Led nanwen to ganle Dios pxeel Jesús, meṅ Nazaret ne biaad lo guidzliu rii, Dios bnabey beṅ me grē milagr nroob, beṅ me grē ncuuaane bzee zdoo to; ga blu ganle ne nli Dios nacnie me.

²³ Laa zeēne laa Dios bdeed diidz biab me ladznia to (sac ible xtiidz Dios naca, nanle me zha nac ne sca ted Jesús), laa to bnaaz me, bzobdoo to me, bnabey to gut me. Led to goṅ bloo me ladznia grē zha ntseeb ne sca psacsi me pquiaa zho me lo cruz.

²⁴ Per bleeban Dios me, psilaa Dios me ladznia guielgut; sac lēbd guielgut ne lēēw gnabey lo me.

²⁵ Zeēne bzeet David Jesús, znu rēb me:

Meṅ ne rnabey naa, raṅ naa tibaque quianap me naa;

tibaque zo me cue naa nēz derech, ¿pe nac nadiēṅ ne lega pe gag naa?

²⁶ Gacxe waa, nley no zdoo naa,

niicle ludz naaw, rleya roolnie naa me.

Ni gane tibliladz rac naa;

²⁷ sac naṅ naa niicle guet naa,

ib csaand me guiaṅ naa len baa,

ib gdeete me diidz xiṅ xpēel naa.

Naa nac tib ngundziin lo me, ni rleynie me naa.

²⁸ Me blu lo naa zha griielo yгаа naa guielmban,

ni tib guielbley nroob ne ygaa naa zeene laa naa gdziñ lo me.

²⁹ Bets, bzian, to ne nac to menladz naa, gologna ganle: led mine bdete pxozgol ne David bnee me nu; sac gon, zeene gut me güey zho güeyqueets zho me, ni haxta lo nadze laa xpa me bii niaa.

³⁰ Sinqe mine bded Jesús ga bzeet me, sac gon tib zha ne biadteed xtiidz Dios goc me. Gocnanle me ne lo xtii me grieequia Men ne nacle diidz ga cxeel Dios, ni men co sob gnabey zigne bnabey me; sac scale rëb Dios lo me, ni haxta bzeet Dios lë Dios parne glu ne yquidied me.

³¹ Dzigo zig nac zeene ranle me grëtaa mine ted Jesús, nacre bzeet me ne ib zrieeban Jesús, rëb me guiaanđ xcuerp Jesús zatane rbëz grëraa menğut, niicle xindgaaw.

³² Jesús ga gon bzeet me, sac zig nac Jesús grop lo no bdion no bleeban Dios me,

³³ ni niina gbaa zob me cue Dios nëz derech, sac me nac men rnabey. Ni zigne nacle xtiidz Dios men ne nac Pxoz me, laa me pxeel Espiritu Sant lo no; ni niina grëse ncuaañe noyan tow, grëse ncuaañe noyon-gaa tow, xtsiin Espiritu Santow.

³⁴ Laa naa rbire rne lo to stib ganle, led mine bdete David ga bzeet David; sac gon, zeene gut David güeysobd David gbaa. Davitaque goc zha ne znu rëb:

Rëb Dios lo men ndzon ne rnabey naa:
“Cue naa nëz derech, nu bzob,

³⁵ nieeda lozh gnaz naa grëse zha ne rlëe lo luu, csañ naa zho ladznia luu.”

³⁶ Grëse to men wladz, gologna sca ganle: Jesús gon, men ne pquiaa to lo cruz ga, lëe men co nac men ne rnabey. Dios bzo me, ni Dios pxeel me biaad me lo guidzliu.

³⁷ Zeene bin grë miech ne ndxie ga sca bnee Pedr, biab guielnë zho, psilo zho rnabdiidz zho lo Pedr ni lo grëraa zha ne nacgza Pedr ga, rëb zho:

—Bets, nana, çpe nac ncuaañe dziuun no?

³⁸ Dzigo rëb Pedr lo zho:

—Tib tib to, golsaan xquielntseeb to, golbig lo Dios, ni none chobnis to zeena guiaanmbe to lo xtoł to; scagaa ible sxeel Dios Espiritu Sant gacnie to.

³⁹ Sac psanle Jesús diidz ne ible sxeel me Espiritu Sant gacnie grëse zha ne cuedz me sëeb xnëz me; zigtaa tow, zigtaa xpëed tow, zigtagaa grëraa menzita.

⁴⁰ Nzianraa grë ncuaañe bzodiidz Pedr lo zho, ni pso me diidz lo zho csaan zho grëtaa guielntseeb ne run miech lo guidzliu rii.

⁴¹ Lo grë zha ne bzoobdiag grë mine pseed me zho dze co, rgaa zho maase tson mil; blozh ga, grëse zho brobnis, laa zho gocgrë grë zha ne riladzle Jesús ga.

Niowse mban zho

⁴² Grëse zha ne riladz Jesús ga, dib zdoos zho zienal zho grë mine rseed grë zha poxtl co zho, tibaque rcaalsa zho rzodiidznie zho Dios, ni row zho guietxtil zigne psanle Jesús diidz gon zho.

⁴³ Grëraa zha ne zo stib lad, rdzieb zho; laa grë zha poxtl co, nzian grë milagr nroob ne run zho.

⁴⁴⁻⁴⁵ Tipse rnee zho, rdeedlsa zho ncuaañe rquiin zha ne nacgrë zho; zha ne quianie liu, tel pe grëragaa ncuaañe quianie zho, haxta rto zhow, dzigo rguiz zho dimi co lo grë zha ne guieñd pe yquiin.

⁴⁶ Gzataa dze rcaalsa zho len yadoo; rlozh ga, rcaalsaque zho lidz grë zha ne nacgrë zho row zho guietxtil zigne psanle Jesús diidz ga; ine nley, ine ndooladz rbe zho grë zho rquiin zho guielwagw ne runlo zho,

⁴⁷ ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëeb xnëz Jesús, laa zho racnzianraa.

3

Biac tib men ne në ni

¹ Tib dze zig rbixwe ngbidza, briece Pedr grop Juan zie zho yadoo nroob ne zob Jerusalén, sac lëe hor co nac horne rie zho yadoo riezodiidznie zho Dios.

² Gax ro yadoo co quia tib puert rnee zho Puert Ndzon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezooob me ga rnab me gon lo grë zha ne rzëeb yadoo.

³ Laa dze co, zeene gon me laa Pedr grop Juan zieded ga ne laa zho sëeb yadoo, zëeb nia me rnab me gon lo zho.

⁴ Dze rwi zho lo me, tibaque rëb Pedr:

—Lo no bui.

⁵ Dzigo blis lo me bui me lo zho, nan me bod no pe dimi ne gdeed zho lo me.

⁶ Wbiire bnee Pedr lo me, rëb Pedr:

—Quianied naa dimi ygad naa lo luu. Ncuaañe grieelose gnedz naa, laaw gnedz naa niina, iniapse por Jesús (men Nazaret), laa naa rnab lo luu, niinagazh guso i zeen bzëni!

⁷ Dzigo bzhen Pedr nia derech me bliso Pedr me, hor cogazh laa grop ni me ga bdaan,

⁸ laa me psilo bzë. Rley me laa me bzëeb len yadoo gza me zho, lo guielbley co haxta rias me, ni roolnie me Dios.

⁹ Grë miech ne no len yadoo, zeene gon zho laa me rzële, ni scataa rley me roolnie me Dios,

¹⁰ bzee zdoos zho; sac runbey zho me, nanpaa zho rzëd me glo, tibaque ran zho me rzob me zaatne quia Puert Ndzon ga rnab me gon.

¹¹ Zeene laa Pedr grop Juan brieel len yadoo nroob co, yeque me nal zhits zho ib rsaand me zho, laa zho bdziñ stib nēz cho yadoo co zaatne quia tib nsaap nroob ne rnee zho zhiNsaap Salomón. Nalaaque grē miech co, rlozhd gwi zho, rlozhd gzee zdoo zho.

¹² Dzigo rēbchaa Pedr lo zho:

—¿Pe rac to? ¿Pe nace squitaa rzee zdoo to, squitaa rwi to lo no, zig nac zeene no bdziunguiac men rii, zig nac zeene por nguzobdiidz no lo Dios gane brieelo psēē no me?

¹³ Golgacnañ ganle led scada; sinque Dios men ne bliladz Abraham, men ne bliladz Isaac, men ne bliladz Jacob, men ne bliladz grēraa xmengol ne, men co blu lo to niina ne nli men nroob nac Xpēēd me Jesús. Lēē Jesús co ga gon bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe liaadz to ndeed to diidz.

¹⁴ Bdeete to diidz nlaa men ne nac men ndzon, men ne peet xtołd; leł bnaab to blaab tib zha ntseeb ne nzēēb ngutoo.

¹⁵ Laa me, pquia to haxta beet to me, ni me nac men ne rdeed guielmban. Per bleeban Dios me, ni mban me niina; sac grop lo no bdziñ no me.

¹⁶ Ni niina men ne ran to biac nu, niapse por Jesús biac me; led runbeyle to me nanle to ganle rzēd me glo. Ne dib zdoo no riladz no Jesús, gane brieelo bnaab no beenguiac Jesús me.

¹⁷ Grēse to bets, ne nac to menladz naa, rgobey naa niicle to ni niiclegaa grē zha ne nac zhiwxtis ne, lega laa to bnabeyse bgaa Jesús beet to me, niicle to biendaque dien pe nace sca been to.

¹⁸ Laa Dios bneedz diidz been to grē guielntseeb co, sac sca goc grēse mine bzeet grē zha ne biadteed xtiidz Dios padzeela, zeene bzeet zho zha nac grē guielnē ne ted Jesús, Men ne nacle diidz cxeel Dios guiaad lo guidzliu.

¹⁹ Doł nroob ga gon been to, gacxe nana gon waa golsaan xquielntseeb to, golbig lo Dios; zeena csanmbe me to lo xtoł to. Me gneedz guielbley lo to stib,

²⁰ ni zbiire cxeel me Jesús lo to stib, guiaadsilaa me to.

²¹ Gbaa no me niina, ni ga cuēz me nieeda gal dze ne laa Dios blozh bnabey goc grēse ncuuañe none gac, zigne bzeetse grē zha ne pxeel me padzeela, biadteed xtiidz me.

²² Zig nac Moisés bzeet me laa Jesús guiaad, rēb me lo grē pxoz gol ne: “Dios men ne rnabey ne, ible znabey me ne lo xti to grieequia tib men ne gac zig nac naa lo to niina. Zeene laa me guiaad, golgon xtiidz me;

²³ sac zha ne gond xtiidz me, ib tedsod znitlo zho.”

²⁴ Scaque Samuel, ni grēraa zha ne biadteed xtiidz me, grēse zho bzeetle zho grē ncuuañe noyac len dze rii.

²⁵ Grēse to, xmengol to nac grē zha co, ye to ga rēb Dios gunlay me zeene znu biaan me diidz grop me Abraham, rēb me: “Niapse por tib men ne grieequia lo xti luu, laa naa gunlay grēse miech ne ndxie gdibdoose lo guidzliu.”

²⁶ Ni niina ne laa Dios bleeban Jesús, gloque lo to pxeel me me, gunlay me to, zeena csaan to xquielntseeb to.

4

Güeyzo zho zho lo wxtis

¹ Laa Pedr grop Juan bii noneeque lo grē miech co, zeene laa bla zha ne nac pxoz bdziñ ga, bdziñnie zho tib zha non ne quianap yadoo co ni zla zha ne nacgrē zha saduce.

²⁻³ Zigne bdziñ zho bnaaz zho Pedr grop Juan, güeyseeb zho zho ladzguuib; ni ne bdzele dzew, ga biaan zho dipse guiel co. Rlēē grē zha co, sacne laa Pedr grop Juan quianee lo grē miech co zha bleeban Dios Jesús; ni rnee zho grēse mengut, scaque grieeban zho.

⁴ Niicle ne scataa rlēē grē zha rnabey co, per nzian zha ne ndxie ga bliladz Jesús; zig gaay mil rgaa loxaque zha bgui.

⁵ Zeene biini liu co, grēse zha non, grēse zha ne rnabey lo menguedz, laa zho pcaala.

⁶ Ga bdziñ Anás men ne nac pxoz nroob ne rnabey, ga bdziñ Caifás, bdziñ Juan, bdziñ Lejandr ni grē zha ne nac menlidz pxoz ne rnabey ga.

⁷ Dzigo bnabey zho gocredz Pedr grop Juan, bzo zho zho glowtaa, bnaabdiidz zho lo zho, rēb zho:

—Golnē nadien, ¿cho rnabey to, cho pxeel to ne squi no to?

⁸ Horco laa Espiritu Sant bdeed guielbiini lo Pedr; pquiab Pedr rēb Pedr lo zho:

—Grēse to ne nac to zha ne rnabey lo menguedz, grēse to ne nac to zha gol ne non xtiidz.

⁹ Telne mine rlisqui to nac ne dien zha bdziun no men rii ne laa ni me biac,

¹⁰ golsiguel golquiaadiaga ganle, zeena gacnañ tow ni gacnañ grēragaa menguedza. Jesús gon, men Nazaret ne bnabey to gut lo cruz ga, men ne bleeban Dios ga, men co beenguiac men rii; ni laa to rangaa me laa me zo lo ne nu.

¹¹ Lēē Jesús ga raquiet lo Xtiidz Dios zatne znu rnee: “Quie ne psēēb zha ne nozaa yu, ni nanđ zho lēēpaa quie co nac mine rnazdziits yu.” Ni scapaa nagon bzhaac to me.

¹² Loxaque me zrieelo csilaa ne lo xtoꝓ ne, sac bzodraa Dios cho stib zha ne niaad lo guidzliu niaadsilaa miech.

¹³ Zeene gon grē zha wxtis co, scataa peet dzeb nod lo Pedr grop Juan, bzee zdoo zho; sac runbey zho Pedr, runbey zho Juan, nacd zho cho zha ne güey wseed nroob. Ga gon zho, pa lotaa guielbiini ne bgaa Pedr grop Juan ne bzēnie zho Jesús.

¹⁴ Peet brieelod nlisqui grē zha co, sac nligaa laa meñ ne biac ga zo lo zho ga.

¹⁵ Dzigo mazd bnabey zho brieed Pedr ley grop me Juan; laa zho biaan bzodiidz zho dien zha guñ zho zho,

¹⁶ sac rien zho tib milagr nroob ga sca biac ni meñ co; niicle ne racladz zho yqueets zhow, per grēle menguedz bina.

¹⁷ Nacne biaan zho diidz, cteb zho zho gbiiredraa zho cseed zho miech zhiwseed Jesús; zeena lozhd gacnañ grēraa miech zha biac meñ co.

¹⁸ Dzigo bredz zho Pedr stib, grop me Juan, goctox zho lo zho.

—Laa no rso diidz lo to gon —rēb zho—, gbiiredraa to cseed to miech zhiwseed meñ ne rnee to Jesús ga.

¹⁹ Pquiab Pedr grop Juan, rēb zho:

—Zha dien rzac to, ꝓpe nonguiela ga laa ne dziuuñ no miñe rnabey Dios, leꝓ miñe rnee to i dziuuñ no?

²⁰ Grieeelod gon dziuuñ no miñe rnee to i, sac grēse ncuaañe bdzion no, grēse ncuaañe bdziongaa no ib none gnee now, zeena gacnañ grēse miecha.

²¹ Dzigo wbiire grē zha rnabey co, ntseeb rac zho lo zho pso zho diidz csetraade zho miech; blozhse ga laa zho psilaa zho. Bdeetew diidz nsacsi zho zho, sac ndal miech ne rleynie Dios, rdeed zho xquizh lo me ne beñ me milagr

²² beenguiac me meñ co, ni choole iz rac sca gacd sē me.

Bnab zho lo Dios

²³ Zeene laa Pedr grop Juan bdziñ lo grē zha ne nacgrē zho, bzodiidz zho grēse tel zha rēb grē zha rnabey co, zha rēb pxoz non co.

²⁴ Grē zha ne nacgrē zho ga, zeene bin zhow grēse zho psilo zho bnab zho lo Dios, rēb zho:

—Dios, luu nac meñ ro ne rnabey grēraa ncuaañe no, luu bzaa gbaa, luu bzaa guidzliu, luu bzaa nisdoo, luu bzaa grēraa ncuaañe no.

²⁵ Padzeela zeene bdeed Espiritu Sant guielbiini lo pxozgol no David, meñ ne beñ xtsiñ luu hor co; znu bnee me:

ꝓpe nacne squitaa rac grē miech ne nacd zha Israel rlēenie zho Dios?

Racladz zho guñ zho ncuaañe ni grieeelod lo zho.

²⁶ Grēse zha non ne rnabey grē guiedz, tipse rac zho laa zho racntseeb lo Dios rlēenie zho me,

ni rlēenie zho meñ ne bzooblo me pxeel me lo guidzliu.

²⁷ Ni nligaa na scase goca. Guiedz Jerusalén nu, nu biaad rey Herod, biaad Pons Pilat, pcaalsa zho grē zho menladz no ni grē menzit, tipse bnediidz zho psacsi zho Jesús, meñ ndzon ne bzooblo luu pxeel luu biaadgun xtsiñ luu lo guidzliu nu.

²⁸ Grēse zigne psanle luu diidz, scase been zho.

²⁹ Ni scaque niina, bui ganle zha racladz zho cteb zho no parne peet gnedraa no; luu nac meñ ne gocniñ no ne nac no zha ne rdziuuñ xtsiñ luu, zeena gdzieebd no cseed no miech xtiidz luu.

³⁰ Laa no rnab lo luu, beenguiac grē meñ rzacnē, been grē milagr nroob, blu grē ncuaañe gzee zdoo miech; zeena gan zho ganle meñ nroob, meñ ndzon nac Xpēed luu Jesús.

³¹ Zeene blozh bzodiidznie zho Dios, masaque bzhidz zaatne ndxie zho ga; hor co grēse zho laa zho bgaaraa guielbiini ne bdeed Espiritu Sant lo zho; peet rdziebdraa zho laa zho zieseed miech Xtiidz Dios.

³² Len dze co, grēse zha ne riladzle Jesús ga, tibaque nac zho, tibaque rnee zho, tibaque nac miñe zienie guic zho. Nod zha ne guiab lose zho yquini ncuaañe rap zho; sinque grēse ncuaañe quianie zho chen grē zho naca.

³³ Grē zha poxtl co, zeene rseed zho miech zha brieeban Jesús, nzian zha ne riladz me; rlupaa ne Dios nacie zho.

³⁴⁻³⁵ Ne nligaa tipse nac zho grē zho, nod zha ne guiab ne guieñd pe yquini, sac grēse zha ne quianie liu, zha ne quianie rzian yu, rto zhow dzigo rdeed zho dimi co rguiz zho zha poxtla lo zha ne rquiina.

³⁶ Sca been tib meñ ne nacgrē zho lē José. (Zha xtií Leví nac me, gol me tib lo guidzliu win ne no lo nisdoo lē Chipr; zha poxtl-le bleelē me Bernabé. Bernabé, nac zig nac ne rnee ne: Zha ne rchoobladz zdoo miech.)

³⁷ Pto me tib lē liuñ me, dzigo bdeed me dimi co lo zha poxtl, bdiidz zhow.

5

Znu bzhaac Ananí grop Safir

¹⁻² Tib mgui lē Ananí, laa tsieel me lē Safir; ye me pto tib lē liuñ me. Gonlo tsieel me, tel palal dimi ne bdo liu co, bzhenga me zhisa. Zeene laa me ziesañ miñe biaan ga, lo poxtl, rēb me lēē grē dimi ne bdo liuñ me ga.

³ Dzigo rēbchaa Pedr lo me:

—Ananí, ꝓpe nacne bdeed luu diidz bzēeb mendox zdoo luu? Mendox i gon noquiiil luu

nañ luu yquidiee luu Espíritu Sant, rnee luu lëë grë dimi ne bdo liuñ luu nu.

⁴ Bien ganle chen luu liu co. Dimi ne bdi-izh zhow, chen luuw, niac niuñ luuw zigne niaccladztaa luu, ¿pe nac dzigo ne racladz luu yquidiee luu? Goñ ganle led nod noquidiee luu, Dios i gocladz luu nquidiee luu.

⁵ Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdzieb zho.

⁶ Dzigo güey bla zha nguieg pchel zho ngutoo co lar, blis zho me ga laa zho zizequets me.

⁷ Wdzeelaaque goca zeene laa tsieel me bdziñ, ni lalnu güeynied guic me ne laa tsieel me gutle.

⁸ Bnabdiidzaque Pedr lo me, rëb Pedr: —Bnë dien, ¿pe nli lëë grë dimi ne bdo liuñ to nu?

Pquiab wnaa co, rëb me:

—Nliw, lalgui pto now.

⁹ —¿Pa brieë pensar qui lo to grop tsieel to? —rëb Pedr—. Ne squi tipse bnee to nañ to yquidie to Espíritu Sant; doñ nroob i goñ been to lo Dios. Laa zha ne güeyquets tsieel luu blansole ro yu nu, ni niina goñ laa zho güeyaque luu.

¹⁰ Diidz co blozh brieë ro Pedr, znuse biab wnaa co liu, guchedraa me ga. Zeene laa gza zha nguieg co bzëëb len yu, laa me nixle ga; gon zho gutle me, dzigo blis zho me güey zho güeyquets zho me cue xpa tsieel me.

¹¹ Grëse zha ne gon sca goc meñ co grop me, zha ne bingaaw, zigtaa zha ne rililadz Jesús a zigtagaa grëraa miecha, per nli bdzieb zho.

¹² Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz run zho.

¹³ Grëse miech ne rcaalsa ga, rleynie zho grë zha poxtl co, nzian zho rililadz mine rseed zho, per rbigd zho gacgrë zho zho.

¹⁴ Zigse zie dze, scase racndalraa miech ne rzëëb xnëz Jesús, mguisaaque wnaasaque laa zho rililadz me dib zdoz zho.

¹⁵ Zhoob diidz scataa milagr ne run grë zha poxtl co. Dzigo psilo miech rbee zho grë meñ rzacné, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimlëse Pedr guiab lad grë meñ co zeene laa Pedr ted.

¹⁶ Haxta grë guiedz win ne ndxie gax Jerusalén ga, rrieë grë miech rdziñnie zho grë meñ rzacné, no grë meñ co noguitnie menodox; grëse zho runguic zha poxtl co zho.

Bio grë zha poxtl ladzguib

¹⁷ Zeene gon meñ ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëë zho,

¹⁸ bnabey zho bgaa zho psëëb zho zho ladzguib tib.

¹⁹ Pcow liu co, guieela bdziñ tib xanjl Dios pxal me ro ladzguib, blee me zho ga; dzigo rëb me lo zho:

²⁰ —Goltsie len yadoo, grëse miech ne ndxie ga golnee lo zho, zeena gacnañ zho zha yгаа zho guielmban ndzon ne nodeed Dios niina.

²¹ Biinigazh liu, silgaw laa zho bdziñle len yadoo; psilo zho laa zho noseed grëse miech ne ndxie ga.

Laga laa zho noseed miech len yadoo, laa meñ ne nac pxoz nroob ga, grë me zha ne nacnie me, bnabey zho ycaalsa zha ne nac wxtis ni grë zha non lo menguedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguib.

²² Bdziñ zho ro ladzguib, ni tib choot guienñ leen co; rzhitsaque wbiere zho güeynie zho diidz,

²³ rëb zho:

—¡Choot guienñ len ladzguib! Dziits nioga bdziñ no, ga zo zha ne quianap; per zeene bzhiäl ro ladzguib bziaab no, bdziñ no choot guienñ leen co.

²⁴ Grë pxoz ne rnabey, ni meñ ne zo lo menguib ne rquianap yadoo, zeene bin zhow, rdzieldraa zho zha gun zho.

²⁵ Lëëtaaque sca no zho, zeene bdziñ tib zho rëb:

—Zha ne gon bloo to ladzguib ga, laa zho nolaque len yadoo noseed zho miech.

²⁶ Lëëled brieë meñ ne zo lo grë menguib ne rquianap yadoo, brieenie me bla xaguib me, güey zho niapse wen diidz güeyxi zho zha poxtl co len yadoo; sac rdzieb zho ngoquie grë miech co zho.

²⁷ Zeene bdziñnie zho zho lo grë zha wxtis co, dzigo rëb meñ ne nac pxoz nroob ga lo zho:

²⁸ —¿Pe nacne ronde to diidz? Led pso no diidz lo to cseetraade to miech zhiwseed mgui ne nac Jesús ga. Ni na gon dible lad guiedz nu nozhobnneñ zhiwseed to i, haxta rcaadzdoñ to no ne no bdziuu me.

²⁹ Dzigo pquiab Pedr rëb Pedr:

—Rdzion no mine rnabey samiech no, per glo none dziuuñ no mine rnabey Dios no.

³⁰ Meñ co bliladz grë pxozgol ne, ni meñ co gon bleeban Jesús, meñ ne sca psacsi to beet to lo cruz.

³¹ Ni meque zeynie Jesús gbaa, bzoob me Jesús cue me nëz derech; sac Jesús nac meñ ne rnabey, meñ ne rsilaa miech lo doñ. Ni Jesús gon, gdeed guielbiini lo grëse meñ Israel gbiire gbig zho lo Dios stib; zeena gunquizhd me zho xtoñ zho.

³² Mine rnee no lo to nu diidzliw, nozhal bdziña, ni led loxaque nodsegaa; sinque ye Espíritu Sant meñ ne rxeel Dios racnieñ grë

zha ne ron xtiidz me, ye men co quianee ganle ne nliw.

³³ Zeene bin zho sca rëb Pedr, blëëye zho, rzac zho tebaa gagazh gut zho gza zha poxtl co.

³⁴ Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo menguedz; dzigo guso me bnabey me brieë grë zha poxtl co nëz ley,

³⁵ bnee me lo grëraa zha ne ndxie ga, rëb me:

—Grëse to menguedz, laa naa rso diidz lo to, golcobey gon dien pe gun to zha qui. Golguien ganle, nonguielda ne lega mine gacladztaa to gun to zho.

³⁶ Golsoladz ganle, padzeela squi bio tib men ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeene laa me gut nëzrii nëzrec bliaal grë zha ne gocnie me ga.

³⁷ Laa len iz ne nodop lë miech, scaque brieëquia tib men Galilé brieelë Judas. Ndal zha ne gocnie me, per zeene laa me gut scasaque nëzrii, nëzrec bliaal grë zha ne gocnie me; brieelodaque pe niun me.

³⁸ Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, dzizi dze ne nitlow.

³⁹ Laa telne nligaa Dios rsiaab guic zho squi rseed zho miech, niacxe zlëb to gnitlo to wseed ne ziaadnie zho. jTelne guiab to gnitlo tow, nande to nend Dios ga tlnie to!

⁴⁰ Grëse zha wxtis co bzoobdiag zho xtiidz Gamaliel, bien zho ne scataa nonguiel gaca. Dzigo biire bredz zho grë zha poxtl co, bdiñ zho zho, ni biire pso zho diidz lo zho gbiire-draa zho cseed zho miech zhiwseed Jesús. Blozhse ga, dzigo laa zho psilaa zho.

⁴¹ Zeene laa zho wbi ga, rley zho por grëtaa mine pteed grë zha non co zho loxaque ne riladz zho Jesús.

⁴² Ib psaaand zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne nli lëë Men ne zëëble diidz cxeel Dios lo guidzliu ga nac Jesús.

6

Bzo gadz zha ne gun xyudar poxtl

¹ Ni ne len dze co quiaayac nzianraa miech ne rzëëb xnëz Jesús, dzigo psilo grë zha Gres rlisqui zho, rnee zho rdioond grë wnaa viud ne nac zha ladz zho zaacse; zeene rgaaz ncuuaane row zho, rgaad zho lal mine rgaa grë wnaa viud ne nac zha Israel.

² Dzigo nacne bredz gza tsiipchop poxtl co grëse zha ne nole xnëz Jesús ga, bnee zho lo zho rëb zho:

—Gacnan to ganle, grieelodraa ne noque so dzian no dien zha ygaaz ncuuaane yquini to, sac gon nonguielda csaan no mine nac xtsiin no, ib none guioseedraa no miech Xtiidz Dios.

³ Min co nagon, mazd golzo gadz zha bgui ne gun dziin co, lëëraasi golguien cho gzo to; golguib zha ne ndzinli, zha ne nixbiini, zha ne nacnie Espiritu Sant;

⁴ zeeña sca guioh lo no gzodiidznie no Dios, gnab no lo me, ni cseed no grëraa miech Xtiidz me.

⁵ Grëse zho rëb, wen sca gaca. Horcogazh psilo zho ble zho zha ne so gun dziin co. Bzo zho tib men lë Lip, tib men lë Prócoro, tib men lë Nicanor, tib men lë Timon, tib men lë Parmen, tib men lë Xteb, rlupaa dib zdo me riladz me Dios ni nacnie Espiritu Sant me; ni tib men Antioqui lë Nic, mazd glo Nic goc tib zha ne bleyndex grë zhiwseed zha Israel.

⁶ Dzigo güeynie zho gza zha co lo zha ne nac poxtl. Blozhse bnab poxtl lo Dios gacnieñ me zho, dzigo pxobnia poxtl guic zho, bnab zho lo Dios gdeed me guielbiini lo zho.

⁷ Zigse zie dze, laa Xtiidz Dios quigaazraa dib Jerusalén. Nzian grë zha ne rzëëb xnëz Jesús, haxta grë men ne nac pxoz, nzian zho laa zho biladz me dib zdo zho.

Bnaaz zho Xteb

⁸ Goc palal dzew, nzian grë milagr nroob ne run Xteb, sac tibaque sca dib zdo me riladz me Jesús, ni nacnie Espiritu Sant me.

⁹ Laa tib dze, brieëquia bla zha ne rie tib xyadoo win zha Israel, lë “Esclavos Libertados” gocladz zho ndiidiidznie zho Xteb. Brieëque zla zha Israel ne ziaad nëz Ciren, nëz Alejandro, nëz Cilis, ni nëz Asia, ye zho gocgza zha co rlëe zho lo Xteb.

¹⁰ Gonse zho rlëbd xtiidz zho lo Xteb, sac niapse Espiritu Sant rdeed guielbiini lo me, rien me pe rnee me lo zho;

¹¹ dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

¹² Zeene bin menguielda, blëë zho; nacne bnabeyaue zha ne rnabey lo menguietz bgaa Xteb güeyzo zho me lo wxtis.

¹³ Ni güeynie zho bla zha ne lega bnexuu, rëb zho:

—Nliw, rtsidil mgui qui xyadoo ne, rtsidil me xley ne.

¹⁴ Bdzionpaa no gon quianee me laa Jesús men Nazaret ne quiazeet zho dib i ctsil yadoo rii, ni ctsëë me ley ne psan Moisés lo xmengol ne.

¹⁵ Horco zeene laa grë zha wxtis co ni grëraa zha ne ndxie ga bui lo Xteb, gon zho tib biini nroob ne riab lo me, masaque rlu me zig rlu tib xanjil Dios.

7

¹ Dzigo bnabdiidz meñ ne nac pxoz nroob ga lo Xteb, rëb me:

—¿Bnë diñ pe nli quiaayun luu grë ncuaañe rnee zho i?

² —Grëse to ne nac to menladz naa —rëb Xteb—, laa naa rzaac to zig bets naa, zig pxozgaa naa. Golsiguiel golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, briequia Dios ndzon ne no gbaa lo me, rëb Dios

³ grie me ga, csañ me grë menlidz me, tsie me nëz ne glutaa Dios lo me.

⁴ Nacne brie me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios biaadnie me nëz rii, zaatne mban ne nu niina.

⁵ Niicle ne laa me blanso lo liu rii, ni tib lë win zaatne so ni me bdeete Dios lo me; per rëb Dios ib grë zha xpëed me guiaañiew. ¡Ni laa me quianied mëed len dze co!

⁶ Rëbgazh Dios lo me, ib zieban grë zha xpëed me ga ladz beñ dipse len tap gayoo iz, ga csacsi miech zho gunçun zho zho dziin.

⁷ “Per ib tedsod sacsi naa zha ne csacsi zho ga”, rëb Dios, “ni ga grie zho glanso zho nu, nu goolnie zho naa.”

⁸ ‘Ni parne glu ib zac miñe bnee Dios lo Abraham ga, dzigo psan me diidz grëse mëedbgui ne griequia lo xtii Abraham none tso tib bey lad zho. Miñ co nagon, zeene laa xpëed me Isaac goc xon ngbidz, laa me bloo Isaac bey co. Scaque beñ Isaac xpëed me Jacob, ni scaque beñ Jacob gza tsiipchop zha ne goc xpëed Jacob; lëe gza tsiipchop zha co nagon goc pxozgol ne.

⁹ Ziese pxozgol ne ga, blëenie zho bets zho zha ne lë José, pto zho José lo meñ ne zie wto nëz Egipt. Ni ne nacnie Dios José,

¹⁰ psilaa me José lo grëtaa guielñe ne bded José, ni gocniñ me José beenbey rey Egipt José. Ib psaañd me José, bdeed me guielbiini lo José. Zeene gon rey co scataa meñ nixbiini nac José, dzigo bnabey me bzo José goc me tib meñ non ne bnabey dipse Egipt; haxta grë ncuaan non ne no lidz rey, me bnabeya.

¹¹ Lëëtaaque len iz ne nac me dziin, biaad tib gbin; dipse xtan zha Egipt, dipse xtan zha Canaán mban bded miech. Grë zha ne goc pxozgol ne ga, guienñraa pe gow zho.

¹² Laa zeene bin Jacob laa zhobxtil bii no Egipt, dzigo pxeel me zho güeyxi zho zhob ga.

¹³ Zeene goc chop vuilt zixi zho zhob Egipt, dzigora gocnan zho bets zho ga rabey Egipt; niiclegaa rey cow, hor coraa beenbey me bets José.

¹⁴ Dzigo bnabey José güeyxi zho pxoz me Canaán, güeyxi zho tsiel zho, güeyxi zho

xpëed zho. Lo grë zho rgaa zho tsongal tsiin, laa zho bdzin Egipt.

¹⁵⁻¹⁶ “Sca nacne laa Jacob bey Egipt. Ga gut me, dzigo güeyqueets zho me Siquem, tib len baa ne bzhi Abraham lo Hamor; scaque grë xpëed me zha ne goc pxozgol ne ga, ga gut zho.

¹⁷ Grë zha ne briequia lo xtii zha gol co, zha ne na guiab ne nac menladz ne, ndal iz ne bio zho Egipt ga, ni ndaldoo goc zho. Laa zeene ziaadyob cuee Dios zho ga zigne rëble me lo Abraham glo,

¹⁸ laa meñ ne nac rey Egipt len dze co, psilo ptsidil zho; sac rsoladzdraa me grëtaa dziin ne beñ José lo menladz me.

¹⁹ Psacsi me zho, beñ me zho zigne gocladztaa me, haxta bnabey me grëse mëedbgui ne ral gandraa zho win parne guet win.

²⁰ Len dze copaa nagon gol Moisés, tib mëed niow nac win. Tson mëe bloolan xniaa win win,

²¹ laa zeene brieelodraa ngolan me win, dzigo güeysan me win tib ro guiubee Egipt, ga bdziel tib xindzoop rey win. Wnaa co gon win, biaañ win lo me zig tib xpëed me;

²² haxta bioxco me grëse wseed ne rac zha Egipt, pseed win. Zeene laa win broob, tib meñ nixbiini goc win, niicle ne gnee wina, niicle ncuaañe gungaa wina.

²³ Choo iz rap Moisés, zeene biab guic me güeyted me lo menladz me.

²⁴ Dzigo gon me laa tib zha Egipt quiaguin tib zha Israel; nacne bzëëbaque me bla me zho, beet me zha Egipt co.

²⁵ “Sca been Moisés, nañ me niñ grë zha Israel ne Dios bzo me gacnie me zho, csilaa Dios zho ladznia zha Egipt; per biend zho ne scaw.

²⁶ Biini liu co, gon me laa chop zha Israel nodil, zie me nla me lo xtil zho, bnee me lo zho nonguield ga til zho, guien zho ganle menladzaque zho.

²⁷ Dzigo biasaque tib zha ne noquiaaw ga pcheep zho me, ntseeb rac zho rëb zho lo me: “¿Cho bzo luu guiaadnabey luu no, guiaadlisquigaa luu diñ pe nodziun no?”

²⁸ ¿Te racladz luu ye gutaque luu no zigne beet luu zha Egipt co nieg?”

²⁹ Zeene bin Moisés sca rëb zha co, hor co bzhoon me bey me nëz xtan zha Madián. Nëz co ptsieelna me, ga gop tsiel me chop mëedbgui.

³⁰ Choo iz goc no me nëz xtan zha Madián, tib dze no me cho gui Sinaí, tibaque zeene gon me laa tib anj zo groltaa tib lo yag zarz, masaque rso bel lo yag co.

³¹ Bzee zdoo me, lëëtaque laa me zie gbig-gax me, zeene bin me tsi Dios rëb Dios lo me:

³² “Naa nac Dios ne bliladz pxozgol luu Abraham, pxozgol luu Isaac, pxozgol luu Jacob.”

‘Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me.

³³ Dzigo bnee Dios stib, rëb me lo me: “Blit lab luu, sac gag lo naa i zo luu.

³⁴ Laa dze nagon bdzin ne laa naa csilaa grë zha Israel ladznia zha Egipt; sac ran naa zha nactaa grë guielnë ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga.”

³⁵ ‘Dzigo laa Dios pxeel Moisés ziesilaa me zha Israel; niicle ne glo rëb zho lo me: “¿Cho bzo luu guiaadnabey luu no, guiaadlisquigaa luu dien pe nodziuuñ no?” Per me bzo Dios bnabey lo zho, blee me zho Egipt.

³⁶ ‘Nzian grë milagr, nzian grë ncuaañe nroob ne gzee zdoe ne beñ Moisés blee me zho ga; zigtaa len guiedz Egiptow, zigtaa lo Nisdoo Nizhniew, zigtagaa grë dan bidz ne bio zho dipse len choo iz ne bzënie me zho ga.

³⁷ ‘Moisés ga bzeet lo pxozgol ne, ne laa Dios gnabey lo xtiique zho grieequia tib meñ ne cxeel me guiadteed xtiidz me, zigne pxeel me Moisés.

³⁸ ‘Zeene nonie Moisés zho grë dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan lo ne ga, diidz ne rap guielmban.

³⁹ Per ib bind zho xtiidz me, lel gocladz zho mbiire ney zho Egipt stib,

⁴⁰ bnabey zho Aarón rëb zho: “Bzaa tib mdio tedner lo no gacniñ no laa no guioo Egipt stib; sac loxaque biadbee Moisés no ga, na choot nanñ dien yo Moisés.”

⁴¹ ‘Dzigo bzaa zho tib ngon yeen goc zhimdio zho, haxta beet zho grë ma ne bloogon zho lo mdio co; bleynie zho ncuaañe bzaania zho.

⁴² Nacne wbinladz Dios, psaan me zho; psilo zho bleynie zho grë ncuaañe ran zho zhan gbaa. Beñ zho zigne bzeetse zha ne biadteed xtiidz me padzeela, zeene rëb zho: Golsoladz ganle,

laa ne nleyinie to naa dipse len choo iz ne bio to grë dan bidz co,

laa ne niut ma ne ngogon to lo naa,

⁴³ lel grë mdio ne bzaa to, mdio co bleynie to, lo mdio co pquitsgzhib to.

Mdio ne rnee to Moloc,

zaatne zieetaa to tibaque ney to lidza, zhmel mdio ne rnee to Renfán, pa csaan to ma.

Mincoxe waa, laa naa cuee to ladz to, gzonëz naa to guey to grë dan ne riaan zitraa lo guiedz Babiloin.

⁴⁴ ‘Len dze ne sca bio pxozgol ne grë dan bidz co, tib yu larse goc xyadoo zho, ga biotsow quie ne quia xley Dios. Dioszhal blu lo Moisés zha tsaa yu co.

⁴⁵ Goc bla iza, zeene blozh bnitlo Dios grë guiedz ne brin nu glo, laa Josué blansonieque yu co. Haxta len dze ne goc David rey, bii léew nac xyadoo zho.

⁴⁶ ‘David goc tib rey ne gocnziuu lo Dios, bleynie Dios me, dzigo gocladz me nzaa me tib yadoo nroob zaatne mbëzlo zho Dios.

⁴⁷ Per brieelod nzaa mew, Salomónraa goc rey ne bzaaw.

⁴⁸ Nli laa yadoo co baa, per tel Dios, meñ nroob nac me, led yed me cuëz len grë yu ne rzaa miech.

⁴⁹ Zigne zhoneeque lo Xtiidz me, zeene znu rëb me:

Gbaa nac zaatne zoob naa,

laa lo guidzliu nac zaatne rzo ni naa.

¿Zha nadien nac yu ne nan to gzaa to cuëz naa?

¿Pa nadien guiab to gzaa to zaatne gdziiladz naa?

⁵⁰ ¿Niacxe led naad bzaa gbaa?, ¿niacxe led naad bzaa guidzliu?

⁵¹ ‘Golgon sca ganle —rëb Xteb—, zigne beënaque grë pxozgol to ga padzeela, scadaaque gon quaiyun to niina. Miech nad, miech ntseeb zdoe nac to; ib ronde to mine rnee Espiritu Sant.

⁵² Tel pxozgol to, nëlte gondze zho grë zha ne pxeel Dios biadnee xtiidz me; haxta beet zho grë zha ne bzeet ne laa Dios cxeel tib meñ peet xtold ne bzooblo me guiaad lo guidzliu. Ni niina ne laa Dios pxeel meñ co, scasaque beñ to, ptsidil to me, bnabey to bgaa me beet to me.

⁵³ Tibaque squi quia to quiaquiits to Xley Dios; xanjlpaa me biaadsana lo to, ni runde to mine rnabeya.

Beet zho Xteb

⁵⁴ Zeene bin zho sca rëb Xteb, blëeye zho haxta rowye ro zho rwi zho lo me.

⁵⁵ Laa me, ne nacie Espiritu Sant me, zeene blis lo me bui me nëz gbaa, gon me lo guielndzon ne no Dios, gonpaa me laa Jesús zo cue Dios nëz derech.

⁵⁶ Dzigo bnee me, rëb me:

—Ranpaa naa niina gon nzhialse gbaa, laa men ne pxeel Dios baaad lo guidzliu ga, laa me zo cue Dios.

⁵⁷ Mine beñ zho ptse zho diag zho, ni nguedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz.

⁵⁸ Zha ne goc textigw ga, blee zho lar ne mbix zho, bdziin zhow tib lo mgui nguieg lë Saul, mgui co pquianapa; laa zho psilo bdeedquie me.

⁵⁹ Sca nodeedquie zho me, laa me rnab lo Dios rnee me:

—Jesús, luu ne nac luu meñ ne rnabey, luu pcaania zhiespiritu naa.

⁶⁰ Dzigo pquitsgzhb me, ni pquiaa me stib redz nroob bnaab me lo Dios, rëb me:

—Dios, luu ne nac luu men ne rnabey, dol ne quiayun miech rii, laa naa rnab lo luu gunquizhd luu zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

8

¹⁻² Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquielnë me.

Len dze co, psilo zha ne sca rlëënie zha ne rililadz Jesús, ptsidil zho grëse zha ne rililadz me; dipse len guiedz Jerusalén pquiaanal zho zho. Grëse zho bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nacse poxtl bi-aan Jerusalén.

³ Ntseeb rac Saul, rzac me tebaa zha gnitlogazh me grëse zha ne rililadz Jesús. Stib yu stib yu zie me, riebezhoon me zho lidz zho, mgui wnaasaque rey me riesëëb me zho ladzguib.

Bdzin Xtiidz Jesús nëz Samar

⁴ Laa grë zha ne bzhoon Jerusalén ga, zaatne zieetaa zho rnee zho Xtiidz Jesús lo miech.

⁵ Zig nac Lip, zeene bdzin me tib guiedz nëz Samar, psilo me bnee me Xtiidz Jesús lo grë miech co.

⁶ Ndal zho rquiaadiag mine rnee me, rzee zdoo zho ran zho grëtaa milagr ne run me.

⁷ Ndal grë zha ne noguitnie mendox, riac zho, rquiaadan grë mendox co redz zeene laa ma rzhoon; grë zha ne gutoo, grë zha ne nde ni, runguac me zho.

⁸ Grëse miech ne no guiedz co, rley zho.

⁹⁻¹¹ Ga no tib men ne rool diidz dox, lë Simón. Ye me rzee zdoo miech grë ncaaan run me. Nzianle iz sca noquidie me zho, grëse menguedz runbey me, haxta niats rac me rnee me guien draa cho zig me. Grëse zho, haxta grë zha non rbig lo me, rzac zho lëë poder ne rap Dios ga nacie me.

¹² Laa zeene bnee Lip lo grë miech co gocnan zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bililadza, mgui wnaasaque, laa zho brobnis.

¹³ Dzigo yeque men ne lë Simón ga bililadz Jesús, ye me laa me brobnis; zaatne zieetaa Lip nal me zhits Lip, rzee zdoo me ran me grëtaa milagr nroob ne run Dios.

¹⁴ Grë zha poxtl ne no Jerusalén, zeene gocnan zho scataa ndal zha Samar nocaania zhiwseed Jesús, dzigo pxeel zho Pedr grop Juan zie nëz co.

¹⁵ Laa zho zie gnab zho lo Dios ygaa grë zha ne bililadze Jesús ga guielbiini chen Espiritu Sant;

¹⁶ sac zeene bililadz zho Jesús, loxaque brobnisse zho, gard ygaa zho guielbiini co.

¹⁷ Bdzin zho pxobnia zho guic grë men co, bnaab zho lo Dios; dzigo grëse men co laa me bgaa guielbiini ne rdeed Espiritu Sant.

¹⁸ Xeene gon men ne lë Simón ga, ne loxaque rxobniase zha poxtl co guic grë miech co laa zho rgaa guielbiini ne rdeed Espiritu Sant, dzigo laa me rdeed dimi,

¹⁹ rëb me:

—Golneedz poder qui lo naa; zeena ye naa zha ne cxobniataa naa guic ygaa zho guielbiini ne rdeed Espiritu Sant.

²⁰ Pquiab Pedr rëb Pedr lo me:

—¡Bien ganle pe rnee luu! ¿Pa bin luu ye xpoder Dios zac si miech? ¡Tebaa niinagazh nitlo luu grë xtimi luu i!

²¹ Ni lalnu rieguiald luu gun luu dziin rii, ni gdzindgaa dze gun luuw; sac mbed zdoo luu, zienied guic luu gun luu mine rnabey Dios.

²² Blee zhgab yozh qui guic luu, bnaab lo Dios zeena togo squia zdoo me luu, gunquizhd me luu dol ne squi bza zdoo luu i;

²³ sac rlu niapse guielntseeb nonie guic luu, ni lëëque luu gon nosacsi luu ne squitaa noyunctal luu xtol luu.

²⁴ Pquiabse me rëb me:

—Golgun guielnzaac, golnab lo Dios yquia zdoo me naa, zeena ygaad naa grë guielnëdoox ne rnee to i.

²⁵ Blozhse bzodiidznie Juan grë miech co grop me Pedr, blozhse pseed zho zho Xtiidz Dios, laa zho wbre zey zho Jerusalén stib. Guiedz ne rdedtaa zho dib xtan zha Samar ga, rnee zho Xtiidz Dios lo grë miech co.

Bzodiidznie Lip tib men Etiopí

²⁶ Laa Lip no Samar ga, tib dze brieequia tib xanjl Dios lo Lip, rëb me tsie Lip nëz ne rree Jerusalén zie nëz Gaza.

²⁷ Dzigo güey Lip nëz co. Tib dan ngana, lëëtaque laa tib men ne nac dziin lo rein ne lë Candás zie ga, dziin nroob nac me lo rein co, sac me ngotsow grëtaa dimi ne no Etiopí.

²⁸ Zobse me tib len carret nroob zie me ga; znu wbrele me Jerusalén güeygan me Dios. Laa me zob leen co qualab me lo Xtiidz Dios mine pquiaa Isá, men ne biadteed xtiidz Dios padzeala.

²⁹ Dzigo bnabey Espiritu Sant Lip tsie Lip ygaa carret co lo Lip.

³⁰ Zeene bgaa carret co lo Lip, bin Lip pa lo nolab men co; nacie rëbchaa Lip lo me:

—¿Pe rien luu cho raquiet zaatne nolab luu i?

³¹ —Riend naaw —rëb me—, rquiin tib zha ne gnë lo naa dien zha naca.

Dzigo bredz me Lip biepp Lip len carret co, güey sob Lip cue me.

³² Znu rnee zaatne nolab me ga:

Zigne racse mëcwxiił yeen zeene rnaaz zho ma rut zho ma, scadaa ndooladz goc me, peet beend me zeene laa zho zienie me. Ni zigne roptsied ma zeene rtsiib zho ma, scaque ni tib diidz ptsired me lo zho.
³³ Niicle ne gon zho scataa ndooladz me, per psacsi zho me.
 jPa lotaa bdziñ guiełntseeb ne been grë menładz me!
 Sac gon, pliche zho xquiełmban me lo guid-zliu.

³⁴ Dzigo rëbchaa meñ co lo Lip:
 —Bzhiguiel bnë lo naa dien, cho nu znu rzeet Isá lo riı. ¿Pe me bded min riı, te stib zhow ye?

³⁵ Dzigo rëb Lip lo me Jesús raquiet ga, ni bnee Lip grëraa miñe nac zhiwseed Jesús.

³⁶ Laa zho no nëz, tibaque zeene bdziñ zho tib lugar co no nis; rëbchaa me lo Lip:
 —jBui ganle laa nis no nu! Mazd bzhiguiel pchoobnisgazh naa.

³⁷ [—Zaca —rëb Lip—, totsaque dib zdoos luu rlıladz luu Jesús.

—Rlıladz naa me —rëb meñ co—, rlıladz naa ne nli Xpëed Dios nac me.]

³⁸ Dzigo bnabey me blëz carret co ga. Biet me leen co grop me Lip bzëeb zho lo nis co, ga pchoobnis Lip me.

³⁹ Blozhse ga, laa Espiritu Sant blis Lip gondraa me Lip; per rley me laa me bio nëz stib, laa me zie.

⁴⁰ Zeene laa Lip brieequia, laa Lip nole guiedz ne lë Azot. Ga psilo me zigse zie me, guiedz ne rdettaa me rnee me Xtiidz Dios lo grë miech co. Sca bio me nëz, haxta bdziñ me guiedz Cesarea.

9

Gon Saul Jesús

¹ Laa mgui ne lë Saul ga, per nli ntseeb rac me, tibaque ne laa guic me zienie gut me grëse zha ne rlıladz Jesús. Güey me lo meñ ne nac pxoz nroob,

² bdeed pxoz co ti xtiidz me guey lo grë zha ne zo lo xyadoo zho nëz Damasc, parne gacnie zho Saul gnaaz zho grëse zha ne rlıladz Jesús; zha ne ygaataa niicle mguiv niicle wnaaw, gzobdoo zho zho tsiesan zho ladzguib Jerusalén.

³ Laa Saul bio nëz, laa Saul zie. Zhile gdziñ me guiedz Damasc, tibaque zeene brieequia ti biinidoo zhan gbaa biab zaatne zie me ga. Groltaa lo biinidoo co bianañ me, biabgazh me liu.

⁴ Liu nix me, bin me zëeb ti tsi meñ co rnee lo me:

—Saul, Saul, ¿pe nacne quianał luu naa?

⁵ —Been guiełnzaac —rëb me—, bnë dien cho luu.

Dzigo pquiab meñ co, rëb me:

—Naa nac Jesús meñ ne squi quiatsidil luu. [Lëëque luu gon nosacsi luu i, rzac luu zigne rzac ngon ne rcaanñi, ni lëëque lo guiib lots ne rtseb zho ma riecaanñi ma.

⁶ Rdzieb Saul, rzhidz me lo dzeb co rëb me:

—Bzhiguiel bnë dien, ¿pe racladz luu gon naa niina?]

Rëbchaa Jesús lo me:

—Guche i, güey Damasc, ga gnë zho ganle pe nac miñe no gon luu.

⁷ Zha ne ziegza Saul ga per nli bdzieb zho, haxta ni gacdraa gnee zho; loxaque tsi meñ co ron zho zëeb, per choot rand zho.

⁸ Laa Saul guche ga. Zeene laa me pxal lo me gwi me randraa me, jlaa lo me pcowle! Zha ne ziegzale me ga bzheñ nia me bdziñ me Damasc.

⁹ Tson dze sca brieelod nianañ me, gzase dze co dowd me, niicle peet god me.

¹⁰ Guiedz Damasc ga, ga no ti mgui ne rlıladz Jesús lë Ananí; dzigo gon me Jesús, bredz Jesús me. Pquiab me,

¹¹ dzigo rëbchaa Jesús lo me:

—Güey nëz ne lë Derech, zaatne nac lidz ti mgui lë Judas; ga bnabdiidz meñ Tars ne lë Saul. Zeene quiazodiidznie me naa,

¹² blu naa lo me laa tib zha lë Ananí bdziñ rxobnia guic me, zeena gbiire gan me stib.

¹³ Pquiab Ananí rëb Ananí:

—¿Saul ye? Ziyon naa name zha nac grëtaa ncuuaane noyun me Jerusalén, notsidil me grë zha ne rlıladz luu.

¹⁴ Haxta pxoz nroob ne rnabey bdeed diidzbey gnaaz me grëse zha ne no nëz riı.

¹⁵ —Güey —rëb Jesús lo Ananí—, sac laa naa bzooblolle me, ib me tsie grë guiedz zit tsieseed me miech xtidz naa, me gneew lo grë zha rnabey, ni lo grëga zha Israel.

¹⁶ Na naa glu lo me ganle zha nac grë guiełnë ne gan me, zeene laa me quaiyunle xtsin naa.

¹⁷ Dzigoraa güey Ananí zaatne no Saul ga. Bdziñ me, pxobnia me guic Saul, rëb me lo Saul:

—Saul, bina ganle bets, laa Jesús gon, men ne rnabey, meñ ne brieequia lo luu zeene ziaad luu nëz ga, laa me pxeel naa zial naa nu; zeena gnab naa lo me gunguiac me bzi-aalo luu, ni ycaania luu guiełbiini ne nreedz Espiritu Sant.

¹⁸ Zigne sca bnee Ananí, laa lo Saul bica-gazh; lega zigne nac xmed meł nac grë ncuuaan co brieel lo me. Horcogazh laa me brobnis.

¹⁹ Blozh ga laa me dow stib, zhiga zhiga laa me wbiire pcaa fuerz.

Goc bla dze no Saul lo grë zha ne rlıladz Jesús Damasc ga, dzigo brieel me

²⁰ güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

²¹ Rzee zdoo grëse miech co ran zho sca rnee me, rneechaa zho:

—¿Led lëe men qui ga name scataa ntseeb rac Jerusalén, notsidil me grë zha ne riladz Jesús? Conque nac diidz min co ziaad me nu, ziadnaaz me zho tsiesan me zho lo grë pxoz ne rnabey.

²² Per zigse zie dze, mazdraa rac Saul tibaque ne rnee me lo grë miech co, lëe men ne zëëble diidz cxeel Dios lo guidzliu ga, nac Jesús. Grë zha Israel ne no ga, riendraa zho dien pe gliladz zho.

²³ Goc bla dze no me ga, laa grë zha Israel ne no ga blëe lo me; bnediidz zho rëb zho laa zho gut me.

²⁴ Dze guieel riesobnap zho gzaase zaatne rap biedz nroob ne ndze igo guiedz co nëz, riequiambëz zho ted me, gut zho me. Per gocnan mew,

²⁵ nacne gol ti pcow liu pcaalsa grë zha ne bliladz mine bnee me, bloo zho me ti len chicuid nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz brie me ga.

Bdzin Saul Jerusalén

²⁶ Zeene bdzin Saul Jerusalén gocladz me ndzin me lo grë zha ne riladz Jesús ga, per lel bdzieb zho zeene gon zho me, sac riladzd zho ne nli yele me bzëeb xnëz Jesús.

²⁷ Dzigo güeynie Bernabé me lo grë zha ne nac poxtl, bzodiidz Bernabé lo zho zha gon me Jesús zeene no me nëz zie me Damasc, zha rëb Jesús lo me; ni zha bdziebd me bnee me lo grë miech cho nac Jesús, len dze ne blëz me Damasc.

²⁸ Dzigoraa pcaania zho me. Laa zho gocgza me, zaatne zietaa zho zieseed zho miech, ib rdziebd me rnee me cho nac Jesús.

²⁹ Brieequia bla zha Israel ne rnee xtiidz zha Gres bdliidznie zho me. Zhisaque goca, laa zho gocladz niut zho me.

³⁰ Zeene gocnan grë zha ne riladz Jesús gaw, dzigo güeyan zho me guiedz Cesarea; ga brie me laa me zie nëz Tars, zaatne nac ladz me.

³¹ Len dze co, grëse miech ne no xnëz Jesús, zigtaa zha ne no Judë, zha ne no Galilé, zha ne nogaa Samar, ngüeel rac zho peet lo guieextseeb nodraa zho; zigse zie dze rioguicraa zho zha nac Xtiidz Dios. Grëse zho rioxco zho mban zho zigne rnabey me, tibaque nacnie Espiritu Sant zho. Ni scagaa, zigse zie dze ndal grë miech ne rzëebraa rcaania Xtiidz Dios.

Rieted Pedr lo grë zha ne riladz Jesús

³² Len ngbidz coque, zie ziaad Pedr rieted me lo grëse zha ne riladz Jesús. Nacne güeyted me lo grë zha ne no Lida.

³³ Guiedz co, beenbey me ti mgui lë Enë, gocle xon iz nix mgui co, ib gacd së me sac dipse me gutoo.

³⁴ Dzigo rëbchaa Pedr lo me:

—¡Enë, niinagazh gon laa Jesús gunguiaac luu! Na zeen guche i blis xta luu.

Zigne sca bnee Pedr laa men co biac, laa me guche ga.

³⁵ Grëse men Lida, grëse men Sarón zeene gon zho sca biac men co, grëse zho bliladz Jesús.

³⁶ Gaxaque Lida riaan ti guiedz lë Jop. Jop ga no ti wnaa ne riladz Jesús, lë Tabit (laa xtiidz zha Gres rnee zho me Dorc). Nquialadz me miech, grë zha ne guiend pe yquiin, run me xyudar zho.

³⁷ Lega nacle blanguidz me, laa me gut.

Zha ne riladz Jesús ga, laa zho noxco dien zha ygueets me. Bgaz zho me, blozhse ga güeyxob zho me sti len yu ne riaan nëz glaa. Xco co no zho,

³⁸ zeene bin zho laa Pedr no Lida. Px-eelaque zho chop zha bgui zienie diidz lo Pedr tsieniob Pedr Jop.

³⁹ Zigne bdzinie zha co diidz, zienalgazh Pedr zhits zho. Bdzin zho lidz men co, zolinëz güeynie zho Pedr zaatne zhoob me. Nzian grë wnaa viud ndxie ga, wbigbe zho lo Pedr, roon zho rlu zho grë lar ne bdib me.

⁴⁰ Dzigo bnabey Pedr brie zho ley grëse zho, laa me biaan ga, pquitsgzhib me bnab me lo Dios. Blozhse ga wbig me lo ngutoo co, bnee me lo me rëb me:

—Guche i, Tabit.

Zigne sca rëb Pedr laa lo ngutoo co bzhiäl, zeene gon me laa Pedr zo ga, laa me bzobli.

⁴¹ Bzhen Pedr nia me, bliso Pedr me, dzigo bredz Pedr grë zha ne riladz Jesús ga, ni grë wnaa viud co; gon zho laa me brieebanle.

⁴² Dipse lad guiedz co bzhoob diidz sca brieeban wnaa co; grë zha ne bina, ndal zho bliladz Jesús dib zdoo zho.

⁴³ Nzianlaa dze biaan Pedr ga, blëz me lidz Simón ti men ne rcuudz grë guid ma.

10

Güeyzodiidznie Pedr Cornel

¹ Guiedz Cesarea, ga no ti men lë Cornel, rnabey me lo ti partid menguiib lë partid Italian.

² Zigtaa mew, zigtaa grë menlidz mew, dib zdoo zho riladz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuaañe rgad zho lo grë zha ne guiend pe yquiin.

³ Tib dze, bdzële dzew tibaque zeene gon me laa ti xanjl Dios bdzin zaatne zo me, bredzlë anjl co me.

⁴ Dze rwi me lo anjl co, rdzieb me laa me puiab. Dzigo rëbchaa anjl co lo me:

—Gocnan ganle grëse mine rnab luu lo Dios ron mew, ni ran me grëtaa yudar ne squi quiaayun luu lo grë zha ne guiend pe yquiin.

⁵ Gacxe waa, laa naa ziaŋnie diidz lo luu: pxeel bla zha ne tsie guiedz Jop tsixi zho ti men ne lë Simón Pedr.

⁶ Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.

⁷ Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrë zhaguiib ne zopaa gax lo me; dib zdoo zhaguiib co riladz zho Dios.

⁸ Blozhse bzodiidz me lo gza zha co zha bzhaac me, dzigo laa me pxeel zho zixi zho Pedr Jop.

⁹⁻¹⁰ Biini luu, zig rwe ngbidza gaxle Jop zie zho. Lëëtaaque hor co laa Pedr biepe nëz glaa guic yu ne rbëz me ga. Rcaabedz me, dzigo laga noyaclo ncuuaŋe gow me laa me biepe guic yu co ziezodiidznie me Dios.

¹¹ Dios nozodiidznie me, tibaque zeene gon me laa ti lar nroob ziad-zëëb zhan gbaa, nzhidoo gzatap nëza laaw bdziŋ lo me.

¹² Grë lose ma no lo lar co, ga no ma ne rzë gza tap ni, no grë ma ne rzë zigne rzë meel, ni no grë ma ne rsiibe.

¹³ Horco bin me ti tsi men co, rëb lo me: —Pedr, ma ne racladztaa luu gow luu zac gut luu ma.

¹⁴ Pquiab me rëb me: —iMin cogaa nagon grielod! Wlaltaa gard gow naa grë ma beed qui.

¹⁵ Rëbchaa men co lo Pedr: —Grë ncuuaŋe beenlayle Dios, nodne gnee luuw ncuuaŋ beed.

¹⁶ Blulo lar co tib, bluloquew stib, laa zeene biontaa gon mew dzigo laaw biire bzoquia nëz gbaa.

¹⁷ Lëëtaaque laa Pedr no zhgab dien pe nacne sca gon me lar co, laa zha ne pxeel Cornel ga bdziŋ ro yu ne rbëz me ga,

¹⁸ rñabdiidz zho me.
¹⁹ Zhgab co no Pedr, zeene rëb Espiritu Sant lo Pedr:

—Laa tson zha bgui gon ziaadguib luu.
²⁰ Biet, bnee lo zho. Ib peet tsienied guic luu güeynal zhits zho, sac naa bnabey ziaad-xi zho luu.

²¹ Dzigo laa Pedr biet ga, bdziŋ me lo zha ne pxeel Cornel ga, rëb me lo zho:

—Naa nac Simón Pedr. ¿Pe nac mandad ne ziaad to?

²² Pquiab zho rëb zho: —Laa no ziaad xmandad Cornel, ti men ne rnabey lo menguiib Cesarea. Laa me pxeel no ziaad-xi no luu, sac ti xanj Dios rëb lo me cxeel me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoo me riladz me Dios, grëse zha Israel rleynie zho me.

²³ Dzigo bredz Pedr zho bded zho nëz len yu; ga biaan zho wdze co. Biiniraa liu zienie zho me, ye palal zha Jop, zha ne riladz Jesús zianal zhits me.

²⁴ Dze ne rac chop ngbidz brieë zho Jop, laa zho bdziŋ Cesarea. Laa Cornel bredz grë menlidz me, grë zha ne ndzieeldiiz me; ndal nac zha ne ndxieŋie me lidz me, quiambëz me Pedr.

²⁵ Zeene laa Pedr bdziŋ, brieë me güeydzieelo me Pedr, pquitsgzhib me lo Pedr nan me niun me Pedr zigne riegän me Dios.

²⁶ Dzigo bliso Pedr me, rëb Pedr lo me: —iGuso i, nodne yquitsgzhib luu lo naa! Bien ganle samiechaque luu nac naa.

²⁷ Dzigo laa menguiib co guso ga. Nozodiidz zho laa zho bzëëb len yu. Zeene bdziŋ zho zaatne ndxie grë miech co,

²⁸ psilo Pedr bnee me lo zho, rëb me: —Nanle to ganle zha Israel naa, ni ib lo xley no rnabey nodne ziaab no lidz grë zha zit, per ni ctsieelsad no zho; per laa niina laa Dios blu lo naa, grëse miech ne beenlayle me nod pe nacne gbix zdoo naa gan naa zho.

²⁹ Gacxe waa, zigne gocnan naa laa to rbedz naa, zialnalgazh naa zhits zha ne pxeel to. Nana sca, goŋnë dien pe nacne bredz to naa.

³⁰ Dzigo bzodiidz Cornel zha bzhaac me, rëb me:

—Nadze rac tap ngbidz ga, zig znaw gon, no naa lidz naa nu nocuan naa, ni nonab naa lo Dios. Tibaque zeene gon naa laa ti mgui zole lo naa, masaque riaazbel xab me,
³¹ në me: “Gocnan ganle grëse miŋe rnab luu lo Dios ron mew, ni ran me grëtaa yudar ne squi quiaayun luu lo grë zha ne guiend pe yquiin.

³² Gacxe waa, laa naa ziaŋnie diidz lo luu: pxeel bla zha ne tsie guiedz Jop tsixi zho ti men ne lë Simón Pedr. Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.”

³³ Sca nagon në men co lo naa, nacne bnabey naa biaad-xi zho luu; ni xquizhгаа luu ne laa luu ziaad. Dios zobwi ganle, grëse no laa no ndxie nu par yquiaadiag no miŋe bnabey me luu gnë luu lo no.

³⁴ Dzigo rëbchaa Pedr: —iNaraa rien naa, led yed Dios cue miech dien cho nac zha Israel, cho nacгаа zha zit!

³⁵ Sinque grëse miech lo guidzliu, tel pa guiedztaa nac zho, rcaania me zho totsaque ron zho miŋe rnabey me, ni rioxco zho zaacse rban zho.

³⁶⁻³⁷ Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guaianwen miech lo Dios, totsaque gliladz zho cho nac Jesús, men ne zëëble diidz ga cxeel me (ni Jesús gon bzaa grëtaa ncuuaŋe no). Zig nac dib Judé, desde ne psilo Juan pseed me miech Galilé, laa zho gocnana.

³⁸ Ni nanaxe to ganle, bdeed Dios poder lo Jesús, pxeel me Espiritu Sant gocnie Jesús. Zaatne bdedtaa Jesús, pquia zdoo me miech, grè zha ne nosacsi mendox psilaa me zho lazdnia ma; sacne nli Dios nacie me.

³⁹ No ne nac no zha ne bzianie me, grop lo no bdzian no grètaa milagr ne been me, zigtaa Jerusaléna zigtagaa dib Judéw. Jerusalénpaag ga beet zho me pquiaa zho me lo cruz,

⁴⁰ per zeene goc tson ngbidza laa Dios bleeban me, ni bneedz Dios diidz biire bdzian no me.

⁴¹ Led grèdraa miech gon me, loxaque nose bdzian me; sac ib Dios bzooblo no dzian no grè dziin ne been me. Haxta bdiowonie no me, bdionie no me,

⁴² ni pxeel me no gnee no lo miech gacnañ zho ganle laa Dios bzo me, me gun guielwxtis gal dze ne laa Dios cuedz grèse miech, zigtaa zha guta zigtagaa zha mbana.

⁴³ Me ga bzeet grè zha ne biadteed Xtiidz Dios lo miech padzeela, zeene rnee zho: “Grèse zha ne gliladz cho nac me, silaa Dios zho lo dol.”

⁴⁴ Laa Pedr bii quianeeque, zeene laa grè zha ne noquiaadiag ga bgaa guielbiini ne bdeed Espiritu Sant lo zho.

⁴⁵⁻⁴⁶ Grè zha Israel ne ziegza Pedr ga, zeene gon zho laa grè zha co psilo quiane stib diidz, ni rdeed zho xquizh lo Dios, bzee zdoo zho gon zho ye grè menzit rgaa guielbiini ne rdeed Espiritu Sant.

⁴⁷ Dzigo rëbchaa Pedr:

—¿Peraa nadien gbiaaz ne, ne cchoobnizgazhd ne zha rii? Laa ne bdzianle ganle zigne rdeed Espiritu Sant guielbiini lo zha Israel, scaque bdeed me guielbiini lo zho.

⁴⁸ Dzigo bnabey Pedr brobnis zho, laa zho bzëeb xnèz Jesús.

Blozh ga bnee Cornel lo Pedr cuèz me ga ti bla dze.

11

Bzodiidz Pedr zha güey me lidz Cornel

¹ Grè zha poxtl ne no Jerusalén, ni grèraa zha ne riladzle Jesús zha ne no Judé, bin zho sca biladz gza menzit co Xtiidz Dios.

² Dzigo zeene laa Pedr bdzin Jerusalén güey bla zho güeytildiidznie zho Pedr;

³ blisqui zho lo Pedr pe nacne güey Pedr lidz menzit, pe nacne güeytownie Pedr zho.

⁴ Dzigo psilo Pedr bzodiidz me lo zho zha nacne güey me lidz men co, rëb me:

⁵ —Guiedz Jop no naa, tib dze lëëtaque nozodiidznie naa Dios, tbaque zeene gon naa laa ti lar nroob ziad-zëeb zhan gbaa, nzhidoo gzatap squina laaw ziaad nëz lo naa.

⁶ Zeene bdixlo naa bui naa dien pe quia lo lar co, gon naa niapse ma no lo co, grè ma

ntseeb, grè ma ne rzë gzatap ni, grè ma ne rzë zig rzë meel, ni grè ma ne rsiibe.

⁷ Lo grè ma co nowi naa, zeene bin naa ti tsi men co, nè lo naa: “Pedr, ma ne racladztaa luu gow luu, zac gut luu ma.”

⁸ Dzigo pquiab naa rep naa: “Min cogaa nagon grieelod, waltaa gard gow naa grè ma beed qui.”

⁹ Nèchaa me lo naa: “Grè ncuaañe beenlayle Dios, nodne gnee luuw ncuaañ beed.”

¹⁰ Tson vuelt sca gon naa lar co. Blulow tib, bluloquew stib, zeene biontaa gon naaw dzigo laaw biire zey gbaa.

¹¹ Loxaque blozh gon naa lar co, laa tson zha bgui blanso ro lidz men ne blëz naa ga, pxeel men Cesarea co zho ziaadguib zho naa.

¹² Ni laa Espiritu Sant bneequè lo naa, no ganañ naa zhüts zho, niicle ne zhazit nac zho; nacne bialañ naa. Ye gza xoop zha ne zialnie naa nu bzë bio no.

¹³ Bdzin no lidz men co, psilo me bzodiidz me lo no zha bzhaac me, nè me len yu no me, zeene gon me ti xanjl Dios, rëb anjl co lo me cxeel me bla zha ne tsie Jop tsixi zho naa

¹⁴ zeena gane naa lo me zha grieeo csilaa Dios me lo dol grè menlidz me.

¹⁵ Laa naa psilo quiane lo me grè menlidz me, zeene grèse zho laa zho pcaania Espiritu Sant, ni bgaa zho grè guielbiini ne rdeed me zigne bgaaque new.

¹⁶ Ga nagon psoladz naa xtiidz Jesús men ne rnabey ne, zeene znu nè me lo ne: “Nli nisse pchoobnis Juan miech, sangue to zгаа to guielbiini ne rneedz Espiritu Sant.”

¹⁷ Sca nagon pcaania zho Espiritu Sant, laa zho bgaa guielbiini ne rdeed me zigne bgaaque new. ¿Cho nac naa nadien ne glisqui naa mine run Dios?

¹⁸ Zeene blozh bin zho grè mine bnee Pedr ga, peet rëbdraa zho. Psilo zho rleynie zho Dios, rdeed zho xquizh lo me; sac hor coraa bien zho ye grè menzit zrieelo gbig zho lo Dios, gdeed me ti guielmban ndzon ne gdzind dze lozh lo zho.

Bliladz zha Antioquí Xtiidz Dios

¹⁹ Zeene sca pquianañ zho grè zha ne riladz Jesús len dze ne beet zho Xteb ga, nëzrii nëzrec bliaañ zho. No zho bdzin haxta Fenicia, no zho bdzin Chipr, nogaa zho bdzin nëz Antioquí. Zaatne bdiingtaa zho bnee zho cho nac Jesús, per loxaque lo grè menladz zho bnee zhow.

²⁰ Niicle ne scaw, lëëque grè zha Israel ne no Chipr, zha ne no Ciren, zeene laa zho biladz Jesús güey zho guiedz Antioquí, bnee zho lo grè zha zit co cho nac Jesús.

²¹ Ni ne nacie Dios zho, ndal grè miech co bzëeb xnèz Jesús.

²² Grë zha ne no Jerusalén, zeene gocnan zhow pxeelaque zho Bernabé güey Antioquí.

²³ Zeene bdziñ Bernabé Antioquí, rley me gon me scataa quiaayunlay Dios grë miech co; dzigo pso me diidz lo zho ib csaand zho zhiwseed Jesús.

²⁴ Ti men dib zdoo rliladz Dios nac Bernabé, nacie Espíritu Sant me, ti miech wen nac me; gane zeene laa me bdziñ ga nzian-raa zha ne bliladz Jesús.

²⁵ Goc palal dzew, dzigo güey Bernabé guiedz Tars güeyxi me Saul, bdzinnie me Saul Antioquí.

²⁶ Dipse ti len iz bléz zho ga grop zho, blozh pseed zho grë zha ne bliladz Jesús. Ga gloopaa psilo ne laa grë zha ne rliladz Jesús brieelè CRISTIAN.

²⁷ Len iz co blalaa zha ne noteed xtiidz Dios no Jerusalén. Dzigo briece zho ga güey zho Antioquí.

²⁸ Lad co no tib men lè Agab, psiaab Espíritu Sant guic me bnee me laa ti gbïn dox gan miech nêz Israel. (Ni nligaa scase goca, lèè gbïn co biaad len iz ne zobnabey men ne lè Claud.)

²⁹ Grë zha ne rliladz Jesús Antioquí, zeene bin zho sca rëb Agab, nacie bnediidz zho grë zho, tel palaltaa ncuane rgaa lo zho tib tib zho gdeed zhow gaclo ti gon cxeel zho lo zha Judé.

³⁰ Dzigo ptop zho gon co, zeene laaw goclo, pxeel zho Bernabé grop Saul güeyšana lo grë zha rnabey ne zo lo zha ne rliladz Jesús nêz Judé.

12

Bio Pedr ladzguiib

¹ Len dze co psilo rey Herod notsidil me grë zha ne rliladz Jesús.

² Bnabey me bgaa Jacob bets Juan, beet zho Jacob lo spad.

³ Zeene gon Herod rley grë zha ne rnabey lo menguedz Israel ran zho zha rsacsi me grë zha ne no xnêz Jesús ga, dzigo bnabeyaque me bgaa Pedr bio Pedr ladzguiib; lèëtaque len dze co noyac lni Pascw.

⁴ Laa Pedr no ladzguiib, bnabey me bzo xon nêz menguiib quianap Pedr. Quiambéz me tedse lni co, laa me cuee Pedr gan grë menguedz zha csacsi me Pedr.

⁵ Grë zha ne rliladz Jesús, zeene gocnan zho scataa ndxienap menguiib Pedr no Pedr ladzguiib, psilo zho tibaque quianab zho lo Dios gacnien me Pedr.

⁶ Nacle diidz pa dze cuee Herod Pedr. Wdze ne guini liu co, laa Pedr nixguiesse len ladzguiib; tib ga caden zob ti nia me, tibga menguiib tib nêz cue me, ni zhaaque zo zla zha ne quianap ro ladzguiib.

⁷ Tibaque zeene biab ti biinidoo len ladzguiib, laa ti xanjl Dios bdziñ ga. Bdziñ

me, pcaannia me cue Pedr, pcaaan me Pedr, rëb me:

—jNa zeen guche i!

Zigne sca bnee anjl co, lega zhal caden ne zob nia Pedr ga bzhiala brieew nia Pedr;

⁸ dzigo rëbchaa anjl co lo Pedr:

—jPxidoo len luu, pquiaa lab luu ni luu!

Blozhse pxidoo Pedr len Pedr, ni pquiaa lab Pedr; rëbchaa anjl co:

—jWbix xab luu na, zeen dënal zhits naa!

⁹ Nalse Pedr zhits anjl co laa Pedr briece ga. Riend Pedr ne nli nosilaa anjl co Pedr, masaque rzac me nonixquieel mew.

¹⁰ Bded zho chop len yu zaatne ndxie menguiib ne quianap, laa zho bdziñ zaatne quia puert guiib ne rriece ro nêz. Zigne bdziñ zho, zhal puert co bzhiala; laa zho briece. Bzënie anjl co Pedr spalal, zeene gol zho zaatne rdedlsa nêz co, dzigo laa anjl co psan Pedr ga.

¹¹ Dzigoraa bien Pedr led nonixquieel Pedr, nli Dios pxeel xanjl me güeysilaa Pedr lадznia Herod, zeena gleyd zha Israel nian zho grë guielnè ne nded Pedr.

¹² Dzigo laa Pedr zie nêz lidz Marí, xniaa Juan Marcw; lèëtaque hor co nzian zho ndxie ga quianab zho lo Dios.

¹³ Zeene bdziñ Pedr pcaannia Pedr ro yu. Briece ti ndzoop ne quia dziin ga lè Rode, zieso ndzoop dien chow.

¹⁴ Zeene beenbey ndzoop co tsi Pedr, rley ndzoop. Lo guielbley co niicle pxaldaque ndzoop ro yu, rias ndzoop zienie ndzoop diidz lo grë zha ne ndxie ga; rëb ndzoop laa Pedr bdziñ ro yu ga.

¹⁵ Per bliladzdz zhow.

—jDieen pe rool luu! —rëb zho—. jNcuane gliladzdz ne rnee luu!

—jCoo, nli lèè mew! —rnee ndzoop—, laa me zo ga.

—jLed meda, —rnee zho—, bod anjl ne quianap mew!

¹⁶ Sca no zho, laa Pedr bii nocaannia ro yu. Zeene güey zho pxal zho ro yu, bzee zdoo zho gon zho nli Pedra, laa Pedr zo ga.

¹⁷ Dzigo blunia Pedr lo zho gnee nguiedzdz zho; laa zho bzëëbnie Pedr len yu. Ga psilo Pedr bzodiidz Pedr lo zho zha güeybee xanjl Dios Pedr len ladzguiib; ni pso Pedr diidz lo zho sodiidz zhow lo Jacob, ni lo grëraa zha ne nacgrë zho. Blozhse ga, laa Pedr briece ga.

¹⁸ Zeene biini liu, grë menguiib ne pquianap Pedr len ladzguiib ga, rdzieldraa zho zha gun zho; sac ib biend zho dien yo Pedr.

¹⁹ Zeene laa Herod pxeel zha ne ziebee Pedr ladzguiib, pa sële Pedr. Dzigo güey zho güeynie zho diidz lo Herod; nacie bnabey Herod gocredz grë zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod briece Judé zey me Cesarea.

Dow mziog Herod

²⁰ Len dze co, pcaalsa menġuedz Tir ni menġuedz Sidón ġueyne zho lo Herod; sacne rlëenie Herod zho. Lëëque ti men ne nac dziin lo Herod lë Blast ġueynie zho bnee lo Herod, bnab zho tilnedraa me zho, niicle zhagaaw laa zho gbig lo me; sac grëse ncuaañe rquuin zho, grë ġuedz ne rnabey me ga rriew.

²¹ Dzigo bzo Herod ti dze ne tsie zho tsiezodidznie zho me. Zeene ġol dze co, got me lar niazh ne racw rey; bdziñ me bzob me lo zhixcan me, psilo me bnee me lo grë miech co.

²² Goc palo quianee me, psilo zho rleyne zho me, ġuedz roptsie zho rnee zho:

—jLed miechdraa i ġoñ! jTi diosle i nac men qui quianee lo ne!

²³ Laa me bii quianeque, zeene biet tib xanjł Dios bdiñ me, psilo dow mziog me, gagazh gut me. Sca gut me, sac beenbeyd me ne Dios nac men ne non, men ne rnabey.

²⁴ Laa Xtiidz Dios, zigse zie dze laaw quia-gaazraa lo miech; ndal zha cub ne nozëeb xnëz me.

²⁵ Jerusalén ga no Bernabé ġrop Saul len dze co; zeene bialse xtsiñ zho, laa zho brieque ga laa zho zie nëz Antioquí zienie zho Juan Marcw.

13

¹ Lo grë zha ne rililadz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grë zha co no Bernabé, no ti mġui lë Simón ne rnee zho “Men Yaas”, no ti men Ċiren lë Lus, gaque no Saul, ni ti men lë Manaén, bets pchoob Herod.

² Laa ti dze lëëtaque ndxie zho noyoolnie zho Dios ni nocuan zho, zeene laa Espíritu Sant bnee lo zho, rëb me:

—Ġolcueextso Bernabé i ġrop Saul, zeena csilo zho lo dziin ne gded naa ġuñ zho.

³ Blozhse pcan zho, blozhse bzodidznie zho Dios, dzigo pxobnia zho ġuic Bernabé ġrop Saul, bnab zho lo Dios ġacniñ me zho; bnee zho lo zho, laa zho zie.

Ġüey Saul Ċhipr ġrop me Bernabé

⁴ Ga brie Bernabé ġrop Saul zienie Espíritu Sant zho bdziñ zho ġuedz Seleucia, Seleucia bzëeb zho barcw laa zho zie nëz Ċhipr (ti ġuidzliu win ne no lo nisdo).

⁵ Ye Juan Marcw zienie zho ġuñ xyudar zho.

Bdziñ zho ro ġuidzliu win co zaatne ndxie ġuedz Salamin, biet zho barcw ġüey zho grë len xyadoo men Israel ne no ga, ġüeyseed zho miech Xtiidz Dios.

⁶ Ga brie zho ġüeyted zho dipse lo ġuidzliu co bdziñ zho ġuedz Pafos; ġuedz ne bdedtaa zho bnee zho Xtiidz Dios lo miech.

Pafos, ga beenbey zho ti men Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox rool me.

⁷ Ġuedz co ga no ti men lë Sergio Paul, men co zob rnabey ġuidzliu co; dzigo lo men co ga no Barjesús. Ti men nixbiini nac men ne lë Sergio ga, no me liaadz ġacnan me zha nac Xtiidz Dios; dzigo bnabey me gocredz Bernabé ġrop Saul.

⁸ Zeene bdziñ zho psilo Barjesús quiaguib me dien pe yquiaaqui yquiaadiagd men rnabey co Xtiidz Dios.

⁹ Dzigo buitpaque Pabl lo Barjesús (Pabl nac sti lë Saul), ni ne nacnie Espíritu Sant Pabl

¹⁰ rëb Pabl lo me:

—jBiche nu zhin menox! Zhin menox ġoñ nac luu, squitaa noquidiee luu miech, notsidil luu diidzli. jZha rna dze ne csaan luu miñe nac luu i, squi notsidil luu Xtiidz Dios?

¹¹ Ġoñ ġanle, jlaa Dios csaabzi luu, ninagazh laa lo luu ycow, ni spalal xbiini ngbidz ġandraa luu!

Zigne sca rëb Pabl laa lo men co pcow, nëzrii nëzrec zie me racladz me dien cho ġnaaz nia me.

¹² Zeene ġoñ men rnabey co sca pcow lo Barjesús, hor co bililadz me Xtiidz Dios, bzee zdoo me ġoñ me scataa poder ne ziaadnie zhiwseed Dios.

Bdziñ zho ġuedz Antioquí

¹³ Bded ga, laa Pabl gza Bernabé ni Juan bzëeb barcw stib, laa zho zie nëz xtan zha Panfil. Bdziñ zho ġuedz Perg laa zho brie len barcw, ga pto Juan lo zho, laa Juan zey nëz Jerusalén;

¹⁴ laa zho bio nëz zie zho nëz xtan zha Pisd, bdziñ zho sti ġuedz lë Antioquí.

Zeene ġol dze ne rdziiladz miech lo dziin, ġüey zho xyadoo zha Israel.

¹⁵ Blozhse bded zha ne blab lo ġuits ne pquiaa Moisés, ni blab zho miñe pquiaa grëraa zha ne biadteed xtiidz Dios padzeela, dzigo laa men ne rnabey yadoo co bnee lo Pabl ġrop Bernabé, rëb me lo zho:

—Telne racladz to gnee to chop lan xtiidz to, zac gnee tow niina.

¹⁶ Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib ġuedz zha ne noxco ġban zigne rnabey Dios; ġolquiaadiag chop lan xtidz naa ġanle gne naa lo to:

¹⁷ Dios ne rililadz no nac no men Israel, lb me bzooblo grë pxozgol no laa zho bgab lo me. Me ġocniñ zho zeene bio zho ladz men Eġipt, ni me ġüeysilaa zho ga, blu me ġanle ne nli men nroob nac me.

¹⁸ Dipse len choo iz ne bio zho grë dan bidz ne bëd zho ga, pxcw me grëtaa xquie|ntseeb zho.

¹⁹ Blozh ga, bnitlo me gadz guiedz nroob ne ndxie xtan zha Canaan, bdeed me liu co lo zho.

²⁰ Ni dipse len tap gayoo gro| iz, me bzooblo grë zha ne bzo bnabey lo zho; lëë lultm zha ne bzo me ga bnabey lo zho goc profet Samuel.

²¹ Blozh ga, laa zho bnab so ti rey gnabey lo zho, nacne bzo me Saúl, bzob Saúl choo iz goc me zhirey zho. Lëë pxoz Saúl ga brieelë Cis, men ne ziaad lo xti| pxozgol no Benjamín.

²² Zeene laa Dios ptiche dziin co lo Saúl, dzigo bzo me David goc rey. Lëë David ga rzeet Dios zaatne znu rnee: “Rleynie naa xingan Isaí zha ne lë David, laa naa gonle ib zun David miñe gnabey naa.”

²³ Ni lo xti| David co nagon brieequia Jesús, men ne pxeel Dios lo guidzliu biaad-silaa miech lo dol, zigne psanle me diidz lo xmengol no padzeela.

²⁴ Len dze ne merle xoobnen cho nac Jesús, len dze co bnee Juan Bautist lo grë men Israel: csaan zho xquie|ntseeb zho gnab zho perdon lo Dios, zeena chobnis zho.

²⁵ Laa zeene zhile gdziñ dze ne gut zho Juan, dzigo bnee me lo miech rëb me: “Golgacnan ganle, led naad nac men ne quiambëz to ga cxeel Dios. Merle gunbey to me, ti men non nac me, per ni par gac naa ti ngundziin win ne glit lab me ni me raguiald naa.”

²⁶ 'Golgacnan sca ganle bets: zigtaa tow ne ziaad to lo xti| Abraham, zigtagaa tow ne nac to miech stib guiedz zha ne riladlez Dios, ib laa Dios pxeel Jesús csilaa me ne lo xtol ne grëse ne.

²⁷ Grë zha Jerusalén ni grë zha ne rnabey lo zho, ib biend zho cho nac Jesús, niicle ne scataa gzobse dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bnab zho gut me zigne bneese grë zha co.

²⁸ Niicle ne gon zho peet xtold me, niicle ne brieequiad dol ne pquiaqui zho me, per bguib zho bdeeda diidz bnabey Pilat gut me.

²⁹ Blozhse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne blit me lo cruz, güeyqueets zho me.

³⁰ Per bleeban Dios me.

³¹ Grë zha ne güeynal zhits me zeene briece me Galilé bdziñ me Jerusalén, nzian zho gon me; ni niina grëse zho laa zho quianee lo miech ganle cho nac me.

³² Scaquegaa no grop no Bernabé, laa no ziaadnie diidz lo to gacnan to ganle niina ne laa Dios bleeban Jesús, laa me beñ miñe bnee me lo pxozgol ne padzeela.

³³ Lëë Jesús ga raquiet lo Salm brop, zaatne rnee: “Xpëed naa nac luu. Desde nadze laa zho gunbey ne Xpëed naa nac luu.”

³⁴ Ni bzeetle Dios ne laa me cueeban Jesús, bzeetle Dios xind xcuerp me len baa; miñ co ga raquiet lo Xtiidz me, zaatne rnee: “Zunlay naa luu, zigne bnese naa lo David gun naa.”

³⁵ Laa stib lo Salm ne pquiaa David rnee: “Gdeete luu diidz xind xcuerp naa len baa.”

³⁶ Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo xcuerp me.

³⁷ Led meda, zhaa men ne raquiet ga; gacxe na rneew waa peet gacd xcuerp men co, zbeeban Dios me.

³⁸⁻³⁹ 'iGrëse to bets, golgacnan sca ganle! jJesús nac men ne rsilaa miech lo dol! Zha ne gliladztaa me dib zdoo zho, tel pe nactaa grë xtol zho, sanmbe me zho. Miñe wlataa brieelod ngaa to, niicle ne zienal to xley Moisés; sac niicle gun tow grëse zigne naca, csañmbeda to lo dol.

⁴⁰ 'iGolguien sca gacnroladzde to! Zeena ygaade to miñe bzeet zha ne biadteed xtiidz Dios padzeela, zeene znu bnee zho:

⁴¹ Grëse to ne rzhidznie to miñe nac diidzli, bii zan to ganle laa naa gun ti milagr nroob ne gzee zdoo to;

per znitlo to, sac gliladzde tow niicle guiaad zha ne gzodiidza lo to.

⁴² Blozh bnee Pabl; laa zeene laa Pabl greee ga grop Pabl Bernabé bnab grë miech co lo zho, siguiel zho guiet sti zhmal co biire tsie zho tsieseed zho zho.

⁴³ Zeene briece zho len yadoo co, nzian grë zha Israel, nzian grë zha stib guiedz zha ne riladlez Dios zienal zhits zho. Nèz no zho bnee zho lo grë miech co tiblque tso guic zho tsienal zho zhiwseed Dios, guien zho ganle pa lotaa noxco me zho.

⁴⁴ Biet sti zhmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtiidz Dios.

⁴⁵ Zha ne rnabey lo grë zha Israel ne no ga, zeene gon zho scataa ndal miech ne goclo ga, blëe zho lo Pabl, ndox zho lo me, rëb zho led diidzlid nac miñe rseed me.

⁴⁶ Niicle Pabla, niicle Bernabéw bdziebd zho, dzigole bnee zho lo zho rëb zho:

—Nli to glo rieguial yquiaadiag Xtiidz Dios ne nac to zha Israel. Per ne squi run to guie|ntseeb nède to ycaania tow par yгаа to guie|mban ndzon ne rneedz Dios; na laa no guioseed grë zhazit.

⁴⁷ Ni scalegaa rnabey Dios gaca, sac znu rnee me:

Laa naa bzole luu tsienee luu Xtiidz naa lo grë menzit,

luu gac zig ti biini ne gziini lo grë miech ne ndxie lo guidzliu;

zeena guien zho zha laa zho lo dol.

⁴⁸ Grè zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grëse zha ne nole ygaa guielmban ndzon ne gdeed Dios ga, grëse zho dze cogazh laa zho bliladz Jesús.

⁴⁹ Dipse dan co, gocnan miech Xtiidz Dios.

⁵⁰ Grè zha Israel ne rlëe lo Pabl ga, psilo zho pquuil zho grè men wnaa ne nac diidz noxco Xtiidz Dios, ni güey zho güeynee zho lo grè zha ne nac men non lad guiedz co; zeena ctsidil zho Pabl grop Bernabé, guncxoon zho zho dan co.

⁵¹ Zeene bin Pabla grop Bernabé, par glu ne nonguiel sca been zha co zho, beenmbe zho grè yudie co ni zho laa zho briece ga, laa zho zie nëz Icon.

⁵² Grè zha ne bliladz Jesús ga, nguieel rac zho, rdeed Espíritu Sant guielbiini lo zho.

14

Bdzin Pabl Icon grop me Bernabé

¹ Zeene bdzin Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grè zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza.

² Laa grè zha Israel ne bliladzda, psilo zho bloo zho diidz lo grëraa miech guiedz co glëenne zho Pabl grop Bernabé.

³ Niicle sca been grè zha co per wbid zho, bii blëz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grè mülagr ne bdeed me diidz run zho par glu ne nli Xtiidz me nonee zho.

⁴ Dzigo grè miech ne no lad guiedz co goc zho chop dii, groł zho racnie grè zha Israel ne rlëe ga, zgrol zho racnie grop zha poxtl co.

⁵ Zha ne rlëe ga, zigtaa zha Israela zigtagaa zha guiedz cow, bnediizd zho grè zho wxtis laa zho tsie tsiedeedquie zho Pabl grop Bernabé.

⁶⁻⁷ Zeene bin Pabla grop Bernabé, mazd laa zho briece ga, laa zho zie nëz xtan zha Licaon. (Güey zho Listr, güey zho Derb ni grëraa guiedz ne ndxie gax ga; güeynee zho lo grè miech co zha nac Xtiidz Dios.)

⁸ Guiedz Listr ga gon zho ti mgui në ni, waltaa lo xquielmban me ib gard sé me; sac scale në ni me zeene gol me.

⁹ Zeene gon Pabl dze zob me rquiaadiag me miñe nonee Pabl lo grè miech co, dzigo dzeque bui Pabl lo me, gon Pabl dib zdoe me rililadz me nli zrieelo gunguiac Dios me;

¹⁰ Dzigo nguiedz bnee Pabl lo me, rëb Pabl: —|Beenli ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzë.

¹¹ Zeene gon grè miech co sca biac me, psilo zho con xtiidz zho nguiedz rnee zho:

—|Diosle i gon, nasi zig rlu miech rlu me laa me biet gbaa ziaadgan me ne!

¹² |Masaque rzac zho lë xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibraa rnee.

¹³ Ro guiedz co ga zob xyadoo zhimdio zho Júpiter, dzigo briece pxoz ne no yadoo co grè me miech lad guiedz, zienie zho ngon, zienie zho guiee, nan zho gut zho ngon co cogan zho ma lo Pabl grop Bernabé.

¹⁴ Zeene bien Pabla grop Bernabé wbinladz guic zho. Ptsiez zho xab zho, bzëeb zho lad grè miech co, nguiedz rnee zho lo zho:

¹⁵ —|Ndzinli golgac! ¿Pe nacne squi rac to? |Golgan ganle miech guidzliuque nac no, tibaque nac ne grè ne! Laa no ziaad lo to ziadseed no to wseed cub ne nac Xtiidz Dios, zeena guien to csaan to grè ncuaañe paat rquiind ne run to i, gbiire gbig to lo Dios men ne nliipaa mban. Me bzaa gbaa, me psan guidzliu, me psan nisdoe, grëse ncuaañe no gbaaw, ncuaañe no lo guidzliuw, ncuaañe no lo nisdoow, me bzaaw grësew.

¹⁶ Niicle ne glo bdeed me diidz been miech grè ncuaañe gocladztaa zho,

¹⁷ per psanladz me zho. Gocnie me zho zigne racnieque me ne niina, rsiaab me nisguie rac xcuaa ne, rneedz me ncuaañe rdioow ne gzataa dze, rneedz me guielbley lo ne.

¹⁸ Niicle sca rnee grop zha poxtl co, nen bin grè miech co diidz beete zho ngon co ngogon zho ma lo zho.

¹⁹ Len dze co, blalaa zha Israel ne ziaad nëz Antioqui ni nëz Icon bdzin Listr ga. Psilo zho bloo zho diidz lo grè miech co gocntseeb zho lo Pabl; güey grè miech co bdeedquie zho Pabl.

Masaque bzhaac zho gutle Pabl, bdoobniu zho me güeyron zho me tiblad ro guiedz.

²⁰ Grè zha guiedz co zha ne rililadzle Jesús, zeene bin zhow, güey zho zaatne nix me ga. Lëëtaaque ndxie zho lo me, zeene laa me guche; ga guche me laa zho zeynie me nëz len guiedz. Biini liu, pcaa me nëz grop me Bernabé laa zho zie nëz Derb.

²¹ Bdzin zho Derb, psilo zho bnee zho Xtiidz Dios lo grè miech co; ndal grè zha ne bliladza. Blozh ga, laa zho wbi ga biire güeyted zho nëz Listr, güeyted zho Icon, ni güeyted zho Antioquí,

²² güeynee zho lo grè zha ne rililadz Jesús ga, pchoobladz zho zdoe zho, pso zho diidz lo zho, niicle nroob guielnë ne noded zho per none tibaque gac guic zho tsienal zho Xtiidz Dios; sac ible sca nzian ncuaañe ted

zho laga gdziñ dze ne gdziñ zho zaatne rnabey Dios.

²³ Tib tib guiedz co, bzose zho grë zha ne so gnabey lo grë zha ne riladz Jesús ga; rlozhse ruan zho grë zho zho ni rzodidznie zho Dios, dzigo laa zho rsan zha co ladznie me yquianap me zho.

Bdziñ Pabl grop Bernabé nëz Siria stib

²⁴ Nëz no Pabl grop Bernabé bded zho dib xtan zha Pisisid, bzëëb zho xtan zha Panfil, bdziñ zho guiedz Perg.

²⁵ Blozhse bnee zho Xtiidz Dios lo grë miech co, dzigo laa zho brieë ga, bdziñ zho guiedz Atalia.

²⁶ Atalia ga bzëëb zho barcw bdziñ zho sti guiedz ne lë Antioquí, gataa laa zho psiaal viay co. Guiedz coque ga brieë zho grop zho güey zho grë guiedz co güeynee zho Xtiidz Dios lo miech; zeene sca bñab grë zha ne riladzle Jesús ga lo Dios gacniën me zho tsiegun zho xtsiin me.

²⁷ Zigne bdziñ zho Antioquí ga, bnabey zho pcaalsa grëse zha ne riladz Jesús, bzodidz zho lo grë miech co grëse zha gocniën Dios zho güeygun zho xtsiin me, ni zha rquia zdoo Dios zha ne nacd zha Israel rbedz me zho ye zho rzëëb xnëz me.

²⁸ Xtselaa bio Pabl ga grop me Bernabé, blëz zho lo grë zha ne riladz Jesús ga.

15

Pcaalsa zho Jerusalén

¹ Ga no Pabl grop Bernabé zeene bdziñ bla zha ne ziaad nëz Judé, psilo zho noseed zho grë zha ne riladzle Jesús ga, rnee zho lo zho ib none tso zho bey zigne rnabey xley Moisés, niicle ne riladzle zho Jesús; zeena sca csilaa Dios zho lo xtol zho.

² Zeene gon Pabl sca noseed zha co miech, nacne bdidiidznieque Pabl zho grop Pabl Bernabé. Dzigo mazd bnediidz grë zha ne riladz Jesús ga, bzo zho zla zha ne gacgza Pabl grop Bernabé tsie zho Jerusalén tsienabdiidz zho lo zha poxtl ni lo grë zha ne rnabey lo zha ne no ga, dien pe guiab zho.

³ Nacne brieë zho zie zho. Nëz no zho bded zho xtan zha Fenicia, xtan zha Samar; zaatne notaa zha ne riladz Jesús, rzodiidz zho lo zho grëse zha nobedz Dios grë zha ne nacdreaa zha Israel, rsaan zho grë zhiwseed xmengol zho laa zho riladz Jesús. Rley grë miech co ron zhow. Sca bio zho nëz, laa zho bdziñ Jerusalén.

⁴ Zeene bdziñ zho Jerusalén, pcaalsa grë zha poxtl, grë zha ne riladz Jesús ga, ni grë zha ne rnabey lo zho. Dzigo ga bzodiidz Pabl grop Bernabé grëse zha gocnie Dios zho, zeene güeyted zho grë dan co güeynee zho Xtiidz me lo miech.

⁵ Min co quanee zho zeene guso bla zha ne glo goc farisé rëb zho, grë zha ne nacd

zha Israel zeene laa zho riladz Jesús ib none tso zho bey, ni none gun zho grëse mine rnabey Xley Moisés.

⁶ Dzigo nacne bnabey grë zha poxtl co ni grë zha rnabey co, ycaalsa zho stib dien zhapaa gaca, pe nonguiela tso grë zha zit bey co.

⁷ Zeene pcaalsa zho, goc pa lo quanee zho zeene guso Pedr rëb Pedr lo zho:

—Grëse to bets, golquiaadiag mine gne naa lo to nu ganle. Led rsoladz to, zeene griinpa psilo quiagaaz Xtiidz Jesús lo miech, ible Dios bzoooblo naa pxeel me naa gaseed naa grë zha ne nacdreaa zha Israel gliladz zho me.

⁸ Ni megaa ne runbey me zdoo tib tib miech, laa me blu ganle, niicle ne zha zit nac zho laa me pcaania zho; pxeel nac xley ne? Sant nacnie zho, zigne pxeelaque Espiritu Sant nacnie ne.

⁹ Gotsaa gwi ne ganle, led yed Dios rbe dien cho nac zha Israel cho nacгаа zha zit; zigtaa zhaw, zigtagaa new, laa me pcaania ne porne dib zdoo ne bliladz ne me.

¹⁰ ¿Zha nac dzigo ne racladz to gnabey to grë zha co gun zho grë mine nac xley ne? ¿Pe niacxe rienraa ne lo Dios dzigo? ¡Niicxe ne name, niicxe xmengol ne brieelod niuna zigne naca!

¹¹ Golguien ganle, zigtaa zhaw zigtagaa new laa me csilaa ne lo dol grë ne, per nacda por ncuaañe rdziun ne; sinque laa me csilaa ne porne nquialadz me ne.

¹² Zeene blozh sca bnee Pedr, dzese biac zho grë zho; dzigo laa Pabl grop Bernabé psilo bzodiidz grëta milagr ne blu Dios lo grë menzit zaatne güeynee zho Xtiidz me lo grë miech co.

¹³ Blozhse bnee grop zha co, laa Jacob gusoque rëb me:

—Grëse to bets, golquiaadiaggaa chop lan xtidz naa naganle gne naa lo to.

¹⁴ Laa Pedr bzodiidzle lo ne ganle zha psilo bredz Dios grë zha zit, bzoooblo me zho ye zho gac zha ne sëëb xnëz me.

¹⁵ Ga nagon goca zigne zho bneese lo Xtiidz me, mine pquiaa grë zha ne pxeel me padzeela, rneew:

¹⁶ Tedse nu ganle, laa naa cuedz grëse miech ne ygab lo naa; grë zha xti David zha ne bzozit, laa zho gbign stib.

¹⁷ Horco grëse zha zit, laa zho gon ganle cho nac naa,

zeena grieelo sëëb zho xnëz naa.

¹⁸ Znu nac xtiidz Dios, ni padzeelale bzeet me ne laa me gun min co.

¹⁹ Min co nagon grë zha zit ne riladzle Jesús, ib nonguiela ga gnabey ne zho gun zho mine nac xley ne.

²⁰ Sinque mazd yquia tib diidz cxeel ne lo zho gon zho, grë ma ne rut miech rgogon

zho lo grê zhimdio zho, ib gowd zho bëel co; grê ma ne rxieed ren zeene ret ma, gowd zho ma; ni niicle grêragaa ma ne gut zho, ib gowd zho xchen ma. Grê zha bgui, nodne tsonie zho wnaa ne nacd tseel zho; niicle wnaagaaw, nodne tsonie zho mgui ne nacd tseel zho.

²¹ Niicle mazd padzeelaw, tibaque quiaayon miech guṇd zho miṇ co; sac desde hor co tib tib guiedz bzose Moisés tib zha ne gneew lo miech leṇ xyadoo zho, dze ne rdziiladz zho lo dziin.

²² Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grêraa zha ne riladz Jesús ga.

²³ Pquia ti guits güey zho, rnee lo guits co: "Zigne nose no Jerusalén nu, zigtaa zha ne nac poxtla, zha ne rnabeya ni grêraa zha ne riladz Jesús nuw, grê no laa no rquiaab-diuzh to grêse to bets ne nac to zha ne no guiedz Antioquí, ni grêraa guiedz ne ndxie nêz Siria i, ni nêz Cilis.

²⁴ Niina ne gocdion no laa bla zha ne nacgrê no nu biaad lo to i, biaadcots zho guic to dien peraa no guṇ to. Gacnan to ganle led nod pxeel zho,

²⁵⁻²⁷ gane niina bzodiidz no grê no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquieṽmban zho quiaayun zho xtsiin Jesús.

²⁸ Lo godiidz ne bdziuun no, laa no bdzianle nonguielḁa ne dien peraa gnabey no to guṇ to, ni niiclegaa Espiritu Sant scaque rnee me. Rquiind ne peraa guṇ to, lèḁlew ga totsaque tsoxco to

²⁹ gowde to xpèel grê ma ne rgogon miech lo grê zhimdio zho; grê ma ne rxieed ren zeene ret ma, gowde to ma; ni niicle gowdgaaw to xchen grê ma ne gut to. Grê zha bgui, nodne tsonie zho wnaa ne nacd tseel zho; niiclegaa wnaaw, nodne tsonie zho mgui ne nacd tseel zho. Miṇ rii nagon nac miṇe no tsoxco to.

'Guiaanne Dios to sca."

³⁰ Gza tap zha co laa zho briece Jerusalén, laa zho zie nêz Antioquí. Zeene bdziṇ zho ga, bnabey zho pcaalsa grêse zha ne riladz Jesús, dzigo bdeed zho guits co lo zho.

³¹ Zeene gocnan grê zha co zha rnee low, rley zho sacne pchooblada zdo zho.

³² Blozhse ga, psilo Judas grop Silas pseed zho grê miech co Xtiidz Dios, zeena dib zdooraa zho gnalo zho Dios; sac bdeed me guieḁiini lo Judas grop Silas rteed zho xtiidz me lo miech.

³³ Xtselaa blêz Silas ga grop Judas, laa zeene goḽ dze ne laa zho griece gbiire zho nêz

Jerusalén stib, iṇe güeyzonêz grê zha co zho, rdeed zho xquizh lo zho.

³⁴ [Laa zho nole nêz, tibaque zeene rêb Silas laa Silas guiaanaque ga spalal dze.]

³⁵ Laa Pabl grop Bernabé ible laa zho biaan ga beṇ zho xyudar grê zha ne noseedle miech ga.

Ptso Pabl grop Bernabé

³⁶ Goc palal dze no Pabl guiedz Antioquí ga grop me Bernabé, zeene rêb me lo Bernabé laa zho gbiire tsie grê guiedz ne güeynee zho Xtiidz Dios lo miech ga, par gacnan zho dien yo grê zha co.

³⁷ Dzigo gocladz Bernabé ye Juan Marcw nienie zho;

³⁸ per bzhiguielḁ Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynalḁ Juan nlozh nsiaal zho lo dziin co.

³⁹ Miṇ co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nêz grop Bernabé Juan bzêeb zho barcw zie zho nêz lo guidzliu win ne no lo nisdoe lè Chipr;

⁴⁰ laa Pabl goc grop Silas. Blozhse bnab grê zha co lo Dios gacniē me Pabl grop Silas, laa zho briece ga

⁴¹ güeyted zho grê guiedz ne ndxie nêz xtan zha Siria, grê guiedz ne ndxie nêz Cilis, güeynee zho lo grê miech ne riladz Jesús nêz co, güeychoobladz zho zdo zho.

16

Beenbey Pabl Timoté

¹ Leṇ dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne riladzaque Jesús lè Timoté, ti meṇ Israel ne riladzle Jesús nac xniaa me, laa pxoz me nac meṇ Gres.

² Grêse zha Listr, zha Icon, zha ne riladz Jesús tibaque rzeet zho Timoté rnee zho ti miech ndzinli nac me, nacne bnee Pabl lo me tsienal me zhits Pabl.

³ Ni ne nod me bey ne rio zha Israel sac led zha Israel nac pxoz me, dzigo bloo Pabl me bey co, zeena tsod pe glisqui grê zha Israel ne no nêz co.

⁴ Laa me zienal zhits Pabl. Guiedz ne rdedtaa zho rnee zho lo grê zha ne riladz Jesús ga, tsoxco zho guṇ zho grê miṇe pso zha poxtl ga diidz, grê zha rnabey ne no Jerusalén.

⁵ Zeene ron grê zha cow, dib zdooraa zho rnalo zho Dios, zigse zie dze racnzianraa zha ne riladz Jesús.

⁶ Blozh ga, tibbed zho xtan zha Frij ni xtan zha Galás, sac bdeete Espiritu Sant diidz nienee zho Xtiidz Dios lo miech grê guiedz ne ndxie nêz Asia ga.

7 Zeene bdziñ zho zaatne rsilo xtan zha Misia gocladz zho nie zho nêz xtan zha Bitin, scaque bdeete Espîritu Sant diidz nie zho nêz co.

8 Dzigo tibbdeed zho dib xtan Misia bdziñ zho ti guiedz ne ndxie ro nisdoo lê Troas.

9 Guieel co blulo ti mgui Macedon lo Pabl, rnab me guñ Pabl guiełnzaac tsie Pabl nêz co, tsiegun Pabl xyudar grê miech co.

10 Nacne hor cogazh bzhixcuuaa no, sac bien no ible Dios racladz guio no nêz co guionee no Xtiiidz me lo miech.

11 Dzigo brieer no ga bziaab no ti len barcw bdziñ no ti lo guidzliu win ne no lo nisdoo lê Samotras. Biini liu brieer no ga bdziñ no Neápolis, ga bliiaaz no wdze co.

12 Biini sti liu co brieer no Neápolis bziani no bdziñ no Filip. Lêê guiedz co rianz zaatne rsilo xtan zha Macedon, niapse men Roma no ga; nzianlaa ngbidz bliiaaz no ga.

13 Laa tib dze ne rdziiladz miech lo dziin, brieer no bio no tib lad ro guiedz co, gax ti ro guiubeer, zaatne bdzion no rcaalsa zha ne rienab lo Dios. Bdziñ no nzianlaa men wnaa ndxie ga, dzigo psilo no bnee no lo zho cho nac Jesús.

14 Lad co no ti wnaa Tiatir lê Lidia, rto me grê lar nizhnie nlaan mine nac lar niazh; ye me dib zdoo me riladz me Dios. Laa me noquiaadiag mine nonee Pabl ga, zeene psiaab Dios guic me bliladz mew.

15 Dzigo hor cogazh brobnis me grê menlidz me; blozh ga, bredz me no guiobiaaz no lidz me, nêchaa me lo no:

—Telne rzac to nli dib zdoo naa rleynie naa Dios, goltê sca cuêz to lidz naa.

Rzoobguic me lo no, nacne biobiaaazeque no lidz me.

Bio Pabl ladzguuib grop Silas

16 Tib dze, lêêtaque zio no zaatne riozodidnie no Dios, bdzieelo no ti ndzooop nguieg noguitnie menox. Zêêb diidz grêse tel pe rnabdiidz miech lo ndzooop, rnee menox cow; roob dimi ne riab nia zha ne rnabey ndzooop.

17 Nał ndzooop zhits no, nguiedz roptsie ndzooop rnee ndzooop:

—jXtsiin Dios ndzon ne zob gbaa gon noyuu gza mgui rii! jLaa zho ziadseed to zeena gacnan to zha csilaa Dios to lo xtol to!

18 Nzian dze zaatne rdzieeltaa no ndzooop tibaque sca rnee ndzooop. Zeene bieedtaa guic Pabl, biireque me bnee me lo menox ne noguitnie ndzooop ga, rêb me:

—Jesús nacie naa, ni laa naa rnabey luu gon niinagazh psaan ndzooop qui.

Zigne sca rêb Pabl laa menox co bzhooon.

19 Gza zha ne rnabey ndzooop ga, zeene gon zho rupdraa ndzooop guiełnsin co gdziniaa ndzooop dimi, bnaaazeque zho Pabl grop Silas güeyzo zho zho lo wxtis, rêb zho:

20-21 —jGolwi ganle pe nac ncuuaane noyuu grop zha Israel rii lad guiedz nu! jNogodil zho miech, laa zho quiaseed miech ncuuaane nonguieldraa dziuun ne nac ne zha Roma!

22 Pcaalsa grêse miech co, grêse zho ntseeb rac zho lo Pabl grop Silas. Dzigo bnabey wxtis co brieer xab zho grop zho bdeed bar zho zho, nroob bdiñ zho zho.

23 Blozhse bdiñ zho zho laa zho psêêb zho ladzguuib, bnabey zho men ne quianap ladzguuib ga tibaque yquianap me zho, sac tel laa zho xoon me tsietizha.

24 Zeene bin men co sca rêb zho, güeyaque me güeyseêb me zho stib lena mine riaan caanraa, ga psêêb me ni zho lad chop lê yag nroob.

25 Wdze co, zig grol guieela laa Pabl grop Silas bii noyoolnie Dios, ni rnab zho lo me gacnie me zho. Grêse zha ne no ladzguuib ga, ron zho sca no Pabl grop Silas.

26 Tibaque zeene bni ti zhodox, psiniw dib nacse ladzguuib co, grêse ro ladzguuib co bzhial, guuib ne no nia grê zha ne no ga, wbiła.

27 Lêêlêd brieer mcaallo men ne quianap ga, zeene gon me grêse ro ladzguuib co zonal, masaque güeynie guic me bzhooonle grê zha ne no ga, bdobaque me spad ne ney me laa me zie gut me me.

28 Horco broptsie Pabl lo me, rêb Pabl:

—jGute luu luu! jGrê no ndxie no, choot bzhioon!

29 Lêêlêd bnab me biini, bzêêb nguzhoon me len ladzguuib, masaque rzhidz me dzeb pquitsgzhib me lo Pabl grop Silas.

30 Blee me zho ga, rêb me lo zho:

—Golnê lo naa, zpe nac mine gon naa zeena csilaa Dios naa lo grêtaa xtol naa?

31 —Dib zdoo luu bliladz Jesús, men rnabey ne pxeel Dios lo guidzliu —rêb zho—, dzigo silaa me luu lo dol, silaa me menlidz luu ne.

32 Dzigo güeynie me zho lidz me, bnee zho Xtiiidz Dios lo me grê menlidz me.

33 Guieel co no me bdiib me zhits zho, zaatne brêê bar ne bloobar zho zho; blozhse ga, laa me brobnis grê menlidz me.

34 Bnabey me goclo ti guiełwagw downie me zho, rley me, niicle grêgaa menlidz mew rley zho ne laa zho bliladz Jesús.

35 Biini liu, pxeel wxtis zha ne güeynie diidz lo me cuee me Pabl ladzguuib grop Pabl Silas.

36 Dzigo güey me güeynee me lo Pabl rêb me:

—Laa wxtis pxeel diidz cuee naa to ladzguuib; zacle nasca grieer to, peet tsieniedraa guic to.

37 Dzigo rêbchaa Pabl lo zha ne bdziñnie diidz ga:

—¡Zha ndzielguictaa zhiwxtis to gon! Squi ndxie mengüedz bđin zho no, ni gardle gacnan zho dien pe nli no pe falt ne rdziaap no. Bnabey zho bio no ladzguiib, ni zha Roma nac no; nana racladz zho zhlianse gree no. ¡Lêda ga gon! ¡Goltsie golguiab lo zho, lêêzhal zho guiaad guiadbee zho no nu!

³⁸ Dzigo güey zha co güeynie zho diidz lo wxtis. Zeene bin wxtis zha Roma nac Pabl, bdzieb zho;

³⁹ Lêlêd güey zho ro ladzguiib güey nab zho dispensar lo Pabl grop Silas. Blee zho zho ladzguiib, ni bnab zho lo zho siguiel zho mazd gbi zho guiedz co.

⁴⁰ Ga briece zho güey zho lidz wnaa ne lê Lidia ga, bnee zho lo grê zha ne pcaalsa ga, zha ne riladz Jesús, pso zho diidz lo zho tiblique gac zho tsienal zho xtiidz me. Blozhse ga, dzigo laa zho briece guiedz co.

17

Güey Pabl Tesalónica grop me Silas

¹ Briece Pabl guiedz Filip grop me Silas, güey zho güeyted zho guiedz Anfípolis ni guiedz Apolonia, bđzin zho guiedz Tesalónica. Lad guiedz co zob ti xyadoo zha Israel,

² dzigo güey Pabl güeynee me Xtiidz Dios lo grê zha ne rcaalsa ga, zigne runaque me grêraa guiedz ne zieded me.

Blêz zho ga tson zhmal, gzobse dze ne rdziiladz miech lo dziin güey Pabl güeyzodiidznie Pabl grê zha co,

³ bzeet me lo zho grê zaatne raquiet grêtaa ncuuañe ted meñ ne cxeel Dios lo guidzliu ga, ni zha grieeban me; ni blu me lo zho gacnan zho ganle lêe meñ co ga nac Jesús.

⁴⁻⁵ Ndal zha ne pquiaadiag xcodiidz Pabl, bien zho ne nli sca naca, laa zho bliladz Jesús, ndal zho nac zha nêz Gres, zha ne noxcole miñe rnabey Dios, ye blalaa meñ wnaa ne nac meñ non lad guiedz co. Laa zha Israel ne rnabey yadoo co, zeene gon zho scataa ndal zha ne bliladz Jesús, blêe zho; güey zho güeytop zho grê zha yozh ne quianzê lad guiedz co, ti ruid ne been zho lad guiedz. Güey zho güeyseeb zho lidz Jasón nan zho niebee zho Pabl ga grop Silas, ngo zho zho ladznia grê miech co.

⁶ Zeene gon zho bgaad grop zha co lo zho, bnaaazeque zho Jasón ni zla zha ne riladz Jesús, bđobniu zho zho bđzinme zho zho lo wxtis, roptsie zho rnee zho:

—¡Golgan ganle laa zha ne sca quianzê nocots guic grê miech, laa zho blansole nu!

⁷ Ni Jasónpa rdeed zaatne rbêz zho. Racladzdraa zho gun zho miñe rnabey rey César, sac rnee zho no sti zhirey zho lê Jesús.

⁸ Grê zha wxtis co ni grê mengüedz ne pcaalsa ga, zeene bin zho sca rnee grê zha co, riendraa zho zha gun zho.

⁹ Miñe been zho beenquizh zho Jasón ti mult gza Jasón zla zha co, dzigo laa zho wbi ga.

¹⁰ Pcow liu co, wxina laa grê zha ne riladz Jesús ga bleese Pabl ga grop me Silas, pxeel zho zho nêz Beré. Zigne bđzin zho Beré, gloque ti xyadoo zha Israel güey zho.

¹¹⁻¹² Grê zha Israel ne no Beré ga, rley zho rquiaadiag zho miñe rnee Pabl grop Silas, gzobse dze rlab zho lo Xtiidz Dios rwi zho dien pe nli miñe rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa meñ wnaa co zha non nac zho guiedz co. Tibliladz nac grê miech co, gocntseebd zho zigne gocntseeb zha Tesalónica.

¹³ Laa zeene gocnan zha Israel ne no Tesalónica laa Pabl nolaque guiedz Beré, güeyaque zho güeyquil zho grê miech co glêenie zho Pabl.

¹⁴⁻¹⁵ Dzigo lêlêd briece bla zha ne riladz Jesús ga, zienie zho Pabl nêz ro nis; laa Silas grop Timoté biaan ga. Güey zha co güeysan zho Pabl guiedz Aten; laa zeene laa zho wbi, pxeel Pabl diidz lo Silas grop Timoté tsieniob zho Aten.

Leñ dze ne no Pabl Aten

¹⁶ Laga quiambêz Pabl gdzin Silas grop Timoté güey me güeyted me lad guiedz co, wbiñladz guic me gon me led zhid grê mdio ne riegan grê miech co.

¹⁷ Nacne bioxco me bnee me Xtiidz Dios lo zho, güey me xyadoo grê zha Israel ne no ga, bzodiidznie me zho grê zho zha guiedz co zha ne riladzle Dios. Gzobse dze rie me leñ guiedz rienee me lo grê miech ne rdzin ga.

¹⁸ Tib dze bđzieelo me bla zha rac ne zienal zhiwseed ti meñ lê Epicur, ni zla zha ne zienal wseed ne rnee zho estoic; psilo me bzeet me Jesús lo zho, bnee me zha brieeban Jesús. Zeene bin zho zha rnee me, no bla zho rzhidznie me, rnee zho:

—¡Dieen pe riab guic meñ qui rnee me, ziaadquidie me miech!

Zlagaa zho rnee, nend cho zhiwseed sti Dios ne riladz miech stib dan zienie Pabl, gane sca rnee Pabl;

¹⁹ dzigo rêb zho lo Pabl:

—Bzhiguiel mazd, sê luu guio ne lozh sodiidz luu lo no dien zha nac wseed ne ziaadnie luu,

²⁰ sac wlaataa gard dzion no grê ncuuañe rnee luu i.

²¹ No zho liaadz gacnan zho pe rnee Pabl, sac sca nac grê zha Aten, niiclegaa grê zha ne quiazin ga, rdziladz zho rded-dze zho rzodiidz zho dien zha nac grê diidz cub ne griin ron zho.

²² Bdzin zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rëb me:

—Grëse to ne nac to men Aten, ran naa ne nligaa rioxco to rleynie to grë men ne rzac to nac Dios;

²³ sac len dze rii biateed naa zaatne zob grë xdios to, haxta no zaatne niaa ti lo pcoog quia chop lan diidz ne znu rnee: “MIN RII NIAA PAR DIOS NE RDZIUUNBEYD NE.” Golgacnañ sca ganle, Dios ne runbeyde to ga, runbey naa me ni lëë zhiwseed me none naa lo miech len dze rii.

²⁴ Dios co bzaa guidzliu, me bzaa grëtaa ncuane no lo guidzliu; gacn ne guiab miech zha gzaa ti zaatne cuëz me, sac men nroob men rnabey nac me, me rnabey gbaa, me rnabey guidzliu.

²⁵ Niicle rquiindгаа me dien zha yquianap zho me, sac grëse ne ne nac ne miech, me rneedz guielmban lo ne, me rneedz grëtaa ncuane rquini ne.

²⁶ Lo tib nëzaque miech ne bzaa me ga, bnabey me brieequia grëse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho.

²⁷ Laa me psan zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grë ne,

²⁸ sac gon, niapse por xpoder me laa xuerp ne niaa zigne naca, laa ne mban, laa ne rriel. Lëëw ga bnee bla menladz to, zha rac ne znu rëb: “Xtii Dios nac ne.”

²⁹ Gase na ganle gotsaa gwi ne, conque xtii Dios name nac ne, pe nac dzigo gliladz ne lëë Dios ga nac grë cho mdio or, cho mdio plat, cho mdio quie ne riab guic miech rzaa zho;

³⁰ ni ib sca riladz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grë ncuane bliladz zho ga gbig zho lo me, mese gleynie zho;

³¹ sac laa me bzole tib dze ne gacredz grëse miech lo me yгаа zho mine tsieguial zho tib tib zho, tel zha wban zho. Ni laa me blule ganle cho nac men ne gun guielwxtis co, lëë men co ga gon bleeban me.

³² Zeene bin zho bzeet Pabl no ti men ne brieeban, nzian zho rzhidznie Pabl, zla zho rëb:

—Na dien pa sti dze lozh yquiaadiag no mine rnee luu i.

³³ Gataa pcuëëz zho lo xcodiidz Pabl, laa Pabl wbi lo zho ga.

³⁴ Brieequia blalaa zha Aten bliladz Jesús, lëë tib zho ga nac mgui ne lë Nich (men ne nacgrë zha ne nac wxtis) ni ti wnaa lë Dámaris.

18

Güey Pabl guiedz Corint

¹ Brieë Pabl Aten bdzin me guiedz Corint.

² Ga beenbey me ti men Pont lë Aquil, ti zha xtii zha Israel nac Aquil. Roma no me glo, wriin bdzin me Corint ga grop tsieel me; sac bnabey rey Claud brieë grëse zha Israel ne no Roma.

³ Dzigo güey Pabl blëz Pabl lo zho ga, sac ye zho rzhixcuua grë lar nroob ne rquia ncal, tipse pquia zho dziin ga gza zho.

⁴ Gzobse dze ne rdziladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús.

⁵ Zeene laa Silas grop Timoté bdzin Corint, dzigo laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús.

⁶ Laa zeene gontaa me rond zho diidz, lel ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—jLaa naa bia! bia!ne naa lo to per pquiaadiagde to mine rne naa; xto!le to nasca tel laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

⁷ Dzigo laa Pabl psilo güey lidz ti men ne no gaxaque zaatne zob yadoo co lë me Just, dib zdoo me riladz me Dios.

⁸ Len dze co ndal zha Corint bliladz Jesús zeene bin zho mine rnee Pabl, haxta ti men ne rnabey xyadoo zha Israel lë Crisp, grë menlidz me bliladz Jesús, dzigo grëse zho laa zho brobnis.

⁹ Ti wdze blulo Dios lo Pabl, rëb me lo Pabl:

—jGdziebd luu! j!b ycuëëzd luu lo dziin ne noyun luu i, bnee xtidz naa lo grë miech qui! Ndal grë miech rii no sëëb xnëz naa.

¹⁰ Peet tsienied guic luu, choot grieelod lega pe gun luu sac naa quianaap luu.

¹¹ Nacne blëz Pabl ga stib iz gro! pseed me grë miech co Xtiidz Dios.

¹² Laa zeene bzob men ne lë Galión zobnabey me xtan Acay, grë zha Israel ne no Corint ga bnedidz zho grë zho bnaaz zho Pabl güeyzo zho me lo Galión

¹³ rëb zho:

—Laa no ziaadnie mgui rii lo luu, sac laa me quiauiits xley no, quiego me guic miech tsiegan zho Dios sti mod mine ni nacdraa ley.

¹⁴ Laa Pabl zie gnee, zeene pquiab Galión rëb me lo grë zha co:

—Telne niaca mine no pe ti falt, pe ti guielntseeb ne quiayun me, dzigosi naa raguial gun guielwxtis.

¹⁵ Per telne laa to ziaadnie me nu porne rdziladzde to mine quiaseed me miech,

rdziladzde to tel cho rzeet me, sac led scad nac xley to, tsow golgan dien pe gun to. Nodaque xtil to guic naa.

¹⁶ Bleegea Galión zho nêz ley.

¹⁷ Dzigo bnaaz zha guiedz co ti men lê Sóstenes, men ne rnabey xyadoo zha Israel ga; gonlo Galión bdiñ zho me, per peet rêbd Galión.

Biire bdiñ Pabl guiedz Antioquí

¹⁸ Goc spalal dze no Pabl Corint ga, dzigo bnee me lo grê zha ne riladz Jesús ga laa me gbi; ye Aquil ni Priscil wnaa ne nac tsieel Aquil nole guic tsienal zhits me.

Nacne zeene laa me brieë, ye zho bzëëbgza me barcw, laa zho zie nêz Cencre. Lêëtaaque len dze co noxco Pabl gun me tel pe nac ncuaane rêb me lo Dios gun me, dzigo zeene bdiñ zho Cencre bnabey me liu liu ptsiib guic me.

¹⁹ Cencre bzëëb zho barcw stib, zie zho nêz Efés. Bdiñ zho Efés, güey Pabl xyadoo grê zha Israel ne no ga güeynee me Xtiidz Dios lo zho.

²⁰ Dzigo bnab zho mbêz me lo zho ga ti blalaa dze, per brieelod mbêz me

²¹ sac laa guic me no gdzinnoib me Jerusalén ygaa me lni ne ziaadyob len dze co, rêb me:

—Na telne zneedz Dios diidz, bii zialteadaque naa dien yo to.

Gataa biaan Aquil grop Priscil, laa me bzëëb barcw stib zie me nêz Cesarea.

²² Cesarea brieë me barcw, laa me zie nêz Jerusalén. Bdiñ me güeyquiaabdiuzh me grê zha ne riladz Jesús ga; biireraa me ga bdiñ me Antioquí.

²³ Goc palal dze no me Antioquí, laa me brieëque ga güeyted me grê guiedz ne ndxie dib xtan zha Frij, dib xtan zha Galás, güeynee me lo grê zha ne riladz Jesús ga dib zdo zho gleyne zho Dios.

²⁴ Len dze co bdiñ ti men xtii zha Israel guiedz Efés, ti men Alejandríwle me Apol. Ti zha rac nac me, rien me zha gnee me Xtiidz Dios lo miech.

²⁵⁻²⁶ Güey me xyadoo zha Israel ne no ga, nguieel rac me, peet dzeb guiend lo me psilo me nonee me lo zho grêse mine bnee Juan Bautist zeene bzeet Juan Jesús; sac loxaque min co bin me zeene gocnañ me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

²⁷ Grê zha ne riladz Jesús ga, zeene gocnañ zho laa guic me no tsie me nêz Gres, dzigo ye zho rêb wen tsie me, pquiaa zho ti cart pxeel zho lo zha ne no nêz co zaacse ycaania zho me. Zeene bdiñ me nêz co,

pseed me grê zha co. Rley zho blozh gocnañ zho cho nac Jesús;

²⁸ sac squi ndxie miech rsioog me ro grê zha Israel, rnee me lo zho lêële men ne quiambêz zho cxeel Dios ga nac Jesús, ni rlu me lo zho pa lo zho bneew lo Xtiidz Dios.

19

Biire güey Pabl Efés

¹ Len dze ne no Apol Corint, laa Pabl bdiñ Efés. Blozhse güeyted Pabl grê guiedz ne ndxie nêz xtan zha Galás, laa me bdiñ ga. Ga bdiizeel me blalaa zha ne riladz Jesús,

² dzigo bnabdiidz me lo zho, rêb me:

—¿Pe bgaa to guielbiini ne rneedz Espiritu Sant, zeene bliladz to Jesús?

Pquiab zho rêb zho:

—¿Güelbiini ye? Gard gon dzion no rdeed Espiritu Sant guielbiini.

Dzigo rêbchaa Pabl:

³—¿Pezhe waa pseed to zeene brobnis to?

—Zhiwseedse Juan Bautist gocndion no —rêb zho.

⁴ Dzigo bnee Pabl lo zho zha nac wrobnis ne biaadnie Juan. Rêb me lo zho nace wrobnis co par glu miech ne laa zho csaan guelntseeb, laa zho sëëb xnêz Dios; per grêse zha ne bgaa wrobnis co ib none gliladz zho Jesús, men ne bzeet Juan ga zeene rêb Juan ile ziaad me.

⁵ Min co bin zho nacne brobnis zho stib zigne psañ Jesús diidz.

⁶ Zeene laa Pabl pxobnia guic zho bnab me gdeed Espiritu Sant guelbiini lo zho, hor co psilo zho zian lo diidz ne rnee zho; ni bnee zho tel pe nac mine racladz Dios gacnañ miech.

⁷ Lo zga zho rga zho tsiipchop, niapse zha bguiw.

⁸ Tson mëë blêz Pabl ga, tibaque rie me xyadoo grê zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús.

⁹ Per zeene gon me no palal zho ib rond diidz, lel psilo zho squi ndxie miech rneenê zho Jesús, nacne bleextsoque me grê zha ne riladzle Jesús, güeyne me zho zaatne nac xyuscuel ti men lê Tiran; ga rcaalsa zho gzbse dze rieseed me zho.

¹⁰ Dipse len chop iz blêz me ga pseed me grê zha co; nacne grêse miech ne no dib nêz Asia ga, zigtaa zha Israela zigtagaa grêraa miech cow, bin zho zha nac Xtiidz Dios.

¹¹ Bdeed Dios diidz beñ me grê milagr nroob ne rzee zdo miech;

¹² sac haxta lar ne rzêse nia me, lar ne rbixse me rzhoo lad men ne racnê laa zho riac, niicle grêgaa mendox ne noguitnie miecha, rzhooñ ma.

13-14 Ga quianzë gadz xpëed ti zhipxoz zha Israel lë Escev, stib guiedz stib guiedz rie zho rieguncxoon zho mendox ne noguitnie miech. Ti vuelt, nan zho na ye zho cuedz lë Jesús gacniën me zho guñcxoon zho mendox; bdiñ zho zaatne guñcxoon zho ma, rëb zho:

—¡Zig zobwi Jesús ne rzeet Pabl, laa no rnabey to golrieeгах i niina!

15 Pquiabaque ma rëb ma lo zho:

—Wen wen runbey naa Jesús ni nangaa naa cho nac Pabl, sangue to gon ni lalnu runbeyd naa to.

16 Znuse bias men ne noguitnie mendox co, bnaaz me gza zha co bdiñ me zho. Ib blëbd zho lo me, masaque dib brëe rna zho, ni xab zho nacwdraa, laa zho bzhoon.

17 Grë miech ne no Efés, zigtaa zha Israela, zigtagaa grë zha guiedz cow, zeene bin zhow per ni bdiieb zho; grëse zho bien zho ne ni men non, men rnabey nac Jesús.

18 Haxta ye grë zha ne riladzle Jesús, hor co laa zho bleero pe nac grë ncuaañe ndzinlid ne bliladz zho glo.

19 Nzian zha ne biil diidz dox güeyxi zho grë xquits zho, squi ndxie miech laa zho bzëëga grësew. Zeene biobey palal goconon grëtaa guits co, biirew zig chooptsii mil pes plat.

20 Ga blu poder ne nacie Xtiidz Dios, sac grë zha ne bina bdzëë lo xquielmban zho.

21 Bded ga, biab guic Pabl tsieted me nëz xtan zha Macedon, xtan zha Gres, gbiire me ga laa me tsie Jerusalén stib; haxta rnee me Jerusalén gree me tsie me Roma.

22 Nacne ptedner me Timoté grop Rast (zha ne noyup xyudar me len dze co) zie zho nëz Macedon, laa me bi biaan nëz Asia ga.

Gocntseeb zha Efés

23 Len dze co brieequia palal zha Efés ptsidil zho zha ne riladz Xtiidz Dios.

24 Guiedz co no ti men ne rundziin guuib plat lë Demetr, rzaa me grë yadoo yeen zig niaada xyadoo xnaxnash zho Dian; nroob dimi ne rial me grë me zha ne runnie me dziin co;

25 bnabey me pcaalsa grë zha ne quia dziin lo me, ni grëragaa zha ne runaque dziin co, rëb me lo zho:

26 —Rien naa ziyonle to, ziyangaa to ganle laa mguì ne rnee zho Pabl quianzë lad guiedz nu, rnee me nlid Dios ga nac grë mdio ne rzaa miech. Pe zhidaale miech qualiladz zhiwseed me nu; ni led loxaque nudsegaa, dible Asia qualiladz miecha. ¿Pe gnë to zha dziuun ne?

27 Golguien ganle noxtseeb guiabdraa xtsiin ne, ni nanwen to ganle lëe xtimi ne nu. Ni tebaa mincosegaaw, mine mazdraa noxtseeb nend grëse miech csaanladz xyadoo nazhnash Dian, nend grëse miech

ne rleynie me dib Asia, diibгаа lo guidzliuw con guiaanladz zho me.

28 Zeene gon grë zha co sca rëb Demetr, rlëe zho, roptsie zho rgo zho xviv Dian.

29 Wdzeepaaw grëse menguedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdoñni zho zho bdiñnie zho zho ro yulow.

30 Nacne gocladz Pabl nie me nienee me lo grë miech co, per psaand grë zha ne riladz Jesús ga.

31 Haxta bla zha wxtis ne ndzieeldiidz Pabl, pxeel zho diidz lo me tsied me.

32 Zhaase zhaase rnee grë miech co ndxie zho ro yulow ga, no zho haxta ni riend pe nacne zie zho ga.

33 Blalaa zha Israel, zeene gon zho scataa rac grë miech co, bdoñ zho zhiwç ti men lë Lejandr gocladz zho nee me chop lan xtiidz zho. Laa men co blis nia me parne cuedze zho gnee me;

34 zeene gon zho zha Israel nac me, psilo zho stib grëse zho nguiedz roptsie zho, rgo zho xviv Dian rnee zho:

—¡Men ndzondoo nac Dian! ¡Men ndzon nac xnaxnash ne!

Zig chop hor bre zho ga sca roptsie zho.

35 Dzigo briece men ne zobnabey ga, blunia me lo zho cuedze zho; zeene laa zho bredze, psilo me bnee me lo zho rëb me:

—Golgona ganle, grëse miech lo guidzliu nan zho guiedz rii zob nazhnash Dian, nan wen zho gbaa biet me zob me nu;

36 tsod zha ne guiab led scada. ¿Pe nac nadien ne squitaa rac to? Golguien ganle nonguielda i squi lëelëd dieen pe rzhixcuaa to.

37 Golwi ganle, laa to ziaad-zo grop zha rii nu, ¿pe nadien been zho? Nacd zho cho zha ne quiguitnie yadoo, cho zha ne nozhidzniegaa xnaxnash ne.

38 Nana, telne racladz Demetr pe glisqui me grë me zha ne rquianie me dziin, gacxe na no yulow waa. Niac niaad zho niaadnab zho guielwxtis, ni zogaa zha ne yquiaadiaga. ¡Ga glisqui zho pe run tib, pe runгаа stib!

39 Laa telne noragaa pe racladz zho glisqui zho, dzigo niac niacredz grëse zha ne nac wxtis, zha ngobey dieñ zha niaca.

40 Sac gon ne squi been to nadze, noxtseeb glisqui zha Romaw lo ne; ni pe nadien dzieets ne telne laa zho glisquiw.

41 Blozhse sca bnee me laa me wbi lo zho ga, niicle zhagaaw laa zho zey.

20

Güey Pabl nëz Macedon ni nëz Gres

1 Zeene laa ruid co blëz, dzigo bredz Pabl grëse zha ne riladz Jesús, bnee me lo zho zaace gac zho. Blozhse bnee me lo zho, laa me briece ga zie me nëz xtan zha Macedon;

² güeynee me lo grë zha ne riladz Jesús nêz co, pso me diidz lo zho zaacse gac zho. Nêz co brieë me bdziñ me nêz Gres. Ga blêz me tsoñ mēë.

³ Laa zeene laa me gbi ga tsie me nêz Siria, laa me ziele sëëb me barcw zeene gocnañ me laa zha Israel ne no ga bnediiz pa tsetiñ zho me, nacne güeydaque me barcw, mazd bio me nêz güeyted me nêz Macedon.

⁴ Blalaa zha ne bzënañ biogza no me, bzë ti men Berë lë Sópater xingan ti men lë Pirr; bzë chop zha Tesalónica, Aristarco ni Segund; ti zha Derb lë Gay, Timoté, ni schop zha nêz Asia, Tíquico ni Trófimo.

⁵ Goñ no Filip laa zho bner, per biaan no diidz Troas cuëz zho no;

⁶ laa no bliaaz ga, ga bdieed no lni Pascw. Zeene bded lni co laa no bziaab barcw, laa no brieë ga. Goc gaay ngbidz no lo no nis laa no bdziñ lo zho Troas, dzigo bliaaz no Troas ga gadz ngbidz.

⁷ Zeene goñ dze dmingw, bio no yu ne rcaalsa zha ne riladz Jesús ga. Ti yu tsoñ xcuaaw, laa no pcaalsa par dziuun no xtsee ne psañ Jesús diidz ga guñ grë zha ne riladz me. Laa no ndxie grë no, dzigo psilo Pabl pseed me no; nzian ncuaañe nonee me lo zho sac guini liu co laa me griee ga; goñ grol güeela rsiaañdaque me.

⁸⁻⁹ Nzian nac biini ne noquia len yu co; zaatne nac ro ventan ga zob ti niib lë Tic. Wdzeelaaw rsiaañdaque Pabl, tibaque bzhen mcaañ niib co, wbix niib ga biab niib nêz ley; ni glaaw, len yu ne rianañ glaaraa ga ndxie no. Zeene güeylis zho niib laa niib gutle.

¹⁰ Biet Pabl, bdziñ me lo niib bdeedz me niib.

—jGdziebde to! —rëb me—. jZrieëban niib!

jNi nligaaw brieëban niib!

¹¹⁻¹² Grëse zho per nli rley zho. Blozh ga bdzieep no glaa stib bdziñ no len yu co, dzigora a bdiiz Pabl quietxtil pquiin no. Blozhse bdziuun no xtsee co, laa Pabl psilo bnee lo zho stib, quianeeque Pabl laa liu biini.

Bdziñ Pabl Milet

¹³ Lban co psiaañ Pabl, laa me wbi ga laa me zie nêz Ason nzëni me; laa no bziaab barcw bdiëdnieer no lo me. Bdziñ no Ason ga bliaaz no me zigne biaan no diidz.

¹⁴ Zeene blanso me lo no, laa no bziaab barcw gza no me bdziñ no guiedz Mitilen.

¹⁵ Biini liu brieë no Mitilen, bdieed no gax Quo, biëtraa stib dze co bdziñ no Samos, ga bliaaz no; bzia no lo nis co zig sti dze dzigora a bdziñ no Milet.

¹⁶ Biotieete no Efës, sac laa guic Pabl no gdziñniob me Jerusalén, zeena ygaa me lni Pentecostés.

¹⁷ Nacne zigne bdziñ no Milet pxeel me diidz Efës bredz me grë zha ne zo lo zha ne riladz Jesús ga.

¹⁸ Zeene blanso zho, bnee me lo zho rëb me:

—Wen wen runbey to naa, nanle to ganle zha noxco naa noyuuñ naa xtsiñ Jesús men ne rnabey ne. Wlal ne psilo ziyal naa nêz Asia nu,

¹⁹ blactaa biin naa lo grë mine bdeed naa, blactaa lo guieñtseeb ne ziyo naa, tibaque quianañ grë zha Israel quin zho naa.

²⁰ Per gon to ganle, tibaque bioxco naa bialseed naa to mine nac diidzli, zigtagaa pseed naa to zaatne rcaalsa tow, zigtagaa pseed naa to stib yu stib yu.

²¹ Grëse miecha, tibaque mine pseed naa zho, mine bne naa lo zha Israel mincoque bne naa lo miech stib guiedz; grëse zho bnee naa lo zho none csaan zho xquieñtseeb zho dib zdoo zho gnalo zho Jesús, zeena gbig zho lo Dios.

²² Scaque niina ne laa Espiritu Sant rnabey ga naa Jerusalén, nand naa dieñ peraa nac ncuaañe gdzieelo naa ga;

²³ per nanpaa naa ible zgo zho naa ladzguuib, ible sacsi zho naa, sac guiedz ne gdziñtaa naa min co rnee Espiritu Sant teed naa.

²⁴ Lo guieñtseeb co no naa per rquiad zdoo naa xquieñmban naa; mine nziuuraa lo naa laga gdeeda diidz ib laa naa no gne lo miech pa lotaa rleyne Dios zho, zeena ine gley naa csiaañ naa dziin ne bzo Jesús naa nu quiayuuñ naa.

²⁵ Rien naa lo grë to ne nac to zha ne bialseed naa gocnañ to zha nac xnêz Dios, gandraa to lo naa lo guidzliu rii.

²⁶⁻²⁷ Laa naa pseedle to grëse mine nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoñdraa naa ga.

²⁸ Golguieñ sca, igolquianap to, ni scagaa golquianap grë zha ne zo to lo! jGolwi ganle xnêz Dios no zho, haxta lo cruz gut Xpëed me bdiizh me xtoñ zho! Ni stiba, jib Espiritu Sant bzo to yquianap to zho zigne rquianap baxtor xpëcwxiiil zho!

²⁹ jNsin golso! Sac rienle naa zeene laa naa gbiche lo to, ib zrieëquia grë zha ne guiaad guiaadquidie to, zgub zho zha gnitlo zho to zigne run grë coyot mëcwxiiil.

³⁰ Haxta lad to, zrieëquia bla zha ntseeb ne ctsëë Xtiidz Dios, squiil zho to tsienal to zhiwseed zho.

³¹ Gacxe waa laa naa rne lo to, jnsin golso! Golsoladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to.

³² Dios nac men ne gacniën to, laa naa rsañ to ladznia me grëse to; Xtiidz Ndzon me mine rnee ganle zha nquialadztaa me to, lëëw lozh quix biini to dib zdoo to gnalo to

me, zeena yгаа to zaatne gneedz me cuëz to grë to zha ne noraa xnëz me.

³³ 'Waltaa ib rzobladz naa dimi, ib rzobladz naa lar, guiep naa tebaa zha yquanie naa grë ncuuan co.

³⁴ Leñ dze ne blëz naa lo to, gon to ganle niapse nia naa bdziniaa naa ncuuaane pquini naa, ncuuaane pquingaa grë zha ne bzënie naa.

³⁵ Ga blu naa lo to ganle, ib none dziuun ne dziin zeena grieelo dziuun ne xyudar zha ne guiend pe yquini. Ib riaanladz naa xtiidz Jesús men ne rnabey ne, zeene znu bnee me: "Mazdraa nroob guiebley ne rgaa zha ne rgad, lëdle zha ne rad."

³⁶ Zeene blozh bnee Pabl lo zho, laa me pquitsgzhib ga grë me zho bzodiidznie zho Dios.

³⁷ Blozhse ga, tibga tibga zho wbig bnee zho lo me, bnaaz zho nia me, bdeedz zho me.

³⁸ Mban rac zho psilo zho roon zho, rso-ladz zho rëb me gandraa zho lo me. Blozh ga, güey zho güeyzonëz zho me zaatne sëëb me barcw.

21

Biire güey Pabl Jerusalén

¹ Blozhse bzhieen no nia grë zha Efés co, laa no bziaab barcw, laa no zio bdzin no ti lo guidzliu win ne no lo nisdoo co lë Cos. Biini liu brie no ga bdzin no lo sti guidzliu win co lë Rodas. Rodas brie no bdzin no guiedz Pátara.

² Guiedz Pátara, ga bziaab no ti barcw ne zie nëz xtan zha Fenicia.

³ Zeene zieded barcw co ngali zaatne rian guidzliu win ne lë Chipr, bui no nëz revés rlupaa guidzliu co. Laa no zio haxta bdzin no guiedz Tir, xtan zha Siria, ga blëz barcw co biet grë yo ne neya.

⁴ Zigne bdzin no ga bdzieet no barcw bziaab no lad guiedz co, biodziel no grë zha ne riladz Jesús ga; bliazaque no lo zho ga ti zhal. Dzigo psiaab Espiritu Sant guic zho rnee zho lo Pabl, tebaa siguiel me mazd tsied me Jerusalén.

⁵ Zeene laa no brie ga, grëse zha ne riladz Jesús grë tsieel zho grë xpëed zho biaad-zonëz zho no ro nis co; dzigo lo yuzh co ga pquitsgzhib no grë no, bzodiidznie no Dios.

⁶ Blozhse bzhieen no nia zho, laa zho wbi ga.

⁷ Brie no Tir bdzin no guiedz Tolemaid, ga bio no bioquiaabdiuzh no grë zha ne riladz Jesús ga, bliaaz no lo zho tib dze.

⁸ Biini liu brie no ga bdzin no guiedz Cesarea, ga biobiaaz no lidz ti men ne noneeque Xtiidz Dios lo miech, lë Lip. Lëe Lip co ga gogza sxoops zha ne bzo been xyudar zha poxtl.

⁹ Quanie me tap ndzooop ne gard ctsieel-nia, gzase zho bdeed Dios guieibiini lo zho rnee zho tel pe nac mine racladz Dios gacnañ miech.

¹⁰ Nzianle dze goc no no lidz Lip, zeene blanso ti men ne ziaad nëz Judë lë Agab, biadquiaabdiuzh me no. (Ye me rnee tel pe nac mine racladz Dios gacnañ miech.)

¹¹ Zigne blanso me lo no ga, bzhen me lar ne rbe leñ Pabl, pxidoo mew nia me ni pxidoo mew ni me, në me:

—Znu gon rnee Espiritu Sant gzobdoo zha Israel bizhuan lar rii, co zho me ladznia zha Roma zeene laa me gdzin Jerusalén.

¹² Grë zha ne riladz Jesús ga, zeene bin zho sca rëb men co, rnab zho lo Pabl tsied me Jerusalén, yeque no sca rnee lo me. Mban rac no rdzioon no.

¹³ Pquiaabaque me në me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalén, niicxe haxta gut zho naa waa porne rleynie naa Jesús. ¡Loxaque rsiaab guieinë to naa i gon squi rac to!

¹⁴ Bdzianse no nlid yquiaadiag me xtiidz no, dzigo mazd psaan no, rdzieets no:

—Golgotssaa csaan ne, Diostaa nan dien zha gaca.

¹⁵ Bdedse ga bzhixcuaa no laa no brie ga, laa no zio nëz Jerusalén;

¹⁶ Blalaa zha ne riladz Jesús Cesarea ga bzënal zhits no, bzënie zho ti men Chipr lë Mnasón. Izle riladz me Jesús, lidz me biobiaaz no zeene bdzin no Jerusalén.

¹⁷ Grë zha ne riladz Jesús Jerusalén, rley zho zeene gon zho laa no bdzin, blëzo zho no.

¹⁸ Biini liu co güeynie Pabl no lidz Jacob bioquiaabdiuzh no me, lëëtaque laa grë zha rnabey ne zo lo grë zha ne riladz Jesús Jerusalén ga, ndxie ga.

¹⁹ Blozhse pquiaabdiuzh Pabl grë zha co, dzigo psilo me bzodiidz me lo zho grëse zha gocniën Dios me güeyseed me grë miech stib guiedz.

²⁰ Zeene bin zhow per nli rley zho, rdeed zho xquizh lo Dios; dzigo rëbchaa zho lo me:

—Bets, ye zha Israel gon ndaldao zho ziladz Jesús; per racladz zho tibaque tsienal zho mine rnabey Xley Moisés.

²¹ Grë zha ne no nu bin zho laa luu güeyseed grë men wladz ne no guiedz zit, nac diidz blu luu lo zho tsienaldraa zho Xley Moisés, codraa zho xpëed zho bey, niicse tsienaldraa zho grë zhiwseed xmengol ne.

²² ¿Zha ganle dziuun ne? Sac zeene gon zho laa luu blanso, ible ziaadguib zho luu.

²³ No tap bets ne nu ziaadyoble gon zho mine bnee zho lo Dios; mine gaca güey

²⁴ güeynie zho yadoo, golgun grë mine rnabey ley, bdiizh ctsiib guic to gza to; zeena

ga gaṇ grē zha rii gaṇle nliḍ grē miṇe rnee miech luu ga.

²⁵ 'Sanguē grē miech stib guiedz zha ne rililadz Jesús, laa no pxeelle diidz lo zho zigne bzodiidz ne nu: grē ma ne rut miech rgoṇ zho lo zhimdio zho, gowd zho bëël co; grē ma ne rxieed ren zeene ret ma, gowd zho ma; ni niicle grēgaa ma ne gut zho, ib gowd zho xchen ma; grē zha bgui, nodne tsonie zho wnaa ne nacd tsiel zho; niicle wnaagaaw, nodne tsonie zho mgui ne nacd tsiel zho.

Bnaaz zho Pabl

²⁶ Laa Pabl zienie gza zha co. Biini liu güey me gza me zho güeyguṇ zho miṇe rnabey ley; blozh ga güey zho yadoo güeynie zho diidz pa dze gza miṇe quiayun zho ga, zeena gaḷ dze co laa zho tsonie gon ne gdeed zho tib tib zho.

²⁷ Laa zeene merle gza gadz ngbidz ne quiayun me miṇe rnabey ley ga zha me zha co, lega naclew goṇ bla zha Israel ne ziaad nēz Asia laa me no leṇ yadoo. Nacne wbig zho

²⁸ bzheṇ zho zhicw me, roptsie zho rnee zho:

—¡Grēse to menquiedz! ¡Goḷguṇ xyudar no gnaaz ne meṇ rii! Sac lēē me ga quianzē quiaseed me zha wladz glēēnie zho ladz zho, rnee me lo zho gundraa zho grē miṇe rnabey ley, gapdraa zho respet yadoo rii; haxta grē zha zit zizēēbnie me nu. ¡Noguitniele me lugar nda rii!

²⁹ Sca rnee zho, sac goṇ zho Pabl leṇ guiedz Jerusalén ga ziegrop me ti zha Efés lē Trófito, dzigo rzac zho güeynie me zha co leṇ yadoo.

³⁰ Pe ga bin grē menguiēdz, grēse zho bdziṇ wbigbe zho lo Pabl bdbobniu zho me blee zho me leṇ yadoo, zigne blee zho me ga lēēlēḍ psioo zho ro yadoo; psilo zho noguin zho me, naṇ zho gut zho me.

³¹ Zeene gocnaṇ meṇ ne rnabey lo menquuib ne ndxie ga laa ruid co noyac,

³² lēēlēḍ brienie me grē xmenguiib me ni grēraa zha ne rnabey lo zho. Zeene goṇ grē zha ne noguin Pabl ga, laa grē menguiib co bdziṇ, dzigoraā blēz bdiṇ zho me.

³³ Dzigo wbig meṇ rnabey co, bnabey me grē zhaguiib co bzoob zho Pabl chop caden. Bnabdiidz me lo grē miech co dien cho nac Pabl, pe quiayun me ne scataa rlēēnie zho me.

³⁴ Psilo zho nguiedz roptsie zho, zhaase zhaase ncuaaṇe rcaadzdoḷ zho me. Goṇse meṇ rnabey co rlud dien pepaa rliisqui zho, nacne bnabey me grē menguiib co ziesan zho Pabl yu ne rbēzpaā zho.

³⁵ Laa grē menguiib co csilo soquianie Pabl lo scaler ne rdziṇ ro yu co, gataa mazd

bzoobyāṇ zho me, sac ntseeb rac grē miech co;

³⁶ nalbe zho, roptsie zho rnee zho:

—¡Goḷnitlogazh meṇ qui! ¡Niinagazh golgut me!

³⁷ Laa grē menguiib co csēēble me leṇ yu co, zeene bnee me lo meṇ rnabey co, rēb me: —¿Pe zrieelo gne naa ti xtidz naa lo luu?

Dzigo rēb meṇ rnabey co:

—¿Mod rac luu rnee luu xtiidz zha Gres?

³⁸ ¿Led luud ga dzigo nac ti zha Egipt ne psilo racntseeb lo gobiern leṇ dze rii? Nac diidz, tap mil zha ntseeb nacnie zho, laa zho ziese nēz dan.

³⁹ —Led naada —rēb Pabl— meṇ Israel nac naa. Guiedz Tars gol naa, lēē guiedz co nac miṇe nroobraa lo grē guiedz ne ngab Cilis. Na laa naa rnab lo luu, beṇ guieḷnzaac bneedz diidz gne naa chop lan xtidz naa lo grē miech qui.

⁴⁰ —Zaca —rēb meṇ co.

Lo scaler co zo Pabl blunia me lo grē miech co cuedze zho. Zeene laa zho biacdze, dzigo psilo me bnee me xtiitsē me grē me zho, rēb me:

22

¹ —Grēse to meṇ wladz, laa naa rzaac to zig ti bets naa zig pxozgaa naa, goḷquiaadiag miṇe gne naa nu gaṇle zeena gacnaṇ to quiayunḍ naa miṇe rquiaqui to naa.

² Zeene goṇ zho xtiidz zho rnee me, grēse zho dzese bre zho; dzigo rēb me:

³ —Meṇ Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc meṇ ne pseed naa. Pseed me naa grēse zigne nac xley xmengol ne, grēse zigne nac zhiwseed zho; pseed me naa tibaque noxco naa runnon naa lē Dios zigne noxcoque tow.

⁴ Miṇe beṇ to nu nadze, ye naa blac-taa squi beṇ naa ptsidiḷ naa grē zha ne rililadz Jesús, pquianaḷ naa yгаа zho guet zho; mgui wnaasaque razobdoō naa zho lidz zho rasan naa zho ladzguiib.

⁵ Meṇ ne nac pxoz nroob ni grē mengol ne goc wxtis guiedz rii leṇ iz co, zha co naṇpaa gaṇle nli sca beṇ naa; sac zha bneedz ti xtidz zho bi naa ndziṇnie naa lo zha ne rnabey xyadoo grē meṇ wladz ne no Damasc, zeena niacnie zho naa nianaz naa grēraa zha ne no ga rililadz Jesús, nialnie naa zho Jerusalén nu nded zho caxtigw.

⁶ 'Min copaa nagoṇ brie naa nu za naa nēz co. Zhile gdziṇ naa Damasc, zig rwe ngbidza tibaque zeene ziaad ti biinidoo nēz zhan gbaa biab lo naa.

⁷ Biabgazh naa liu, ga nix naa bin naa ti tsi meṇ co rnee me lo naa: “Saul, Saul, ¿pe nacne quianaḷ luu naa?”

⁸ “¡Been guielnzaac bnë dien cho luu!”, rep naa. Dzigo në men co lo naa: “Naa nac Jesús men Nazaret ne squi quiatsidil luu.”

⁹ Grë zha ne zanie naa ga, bdzieb zho gon zho biini co, per biend zho pe rnee men co lo naa.

¹⁰ Dzigo rep naa lo me: “Bzhiguiel bnë dien, ¿pe racladz luu gun naa niina?” Nèchaa me: “Guche i, güey Damasc ga gnë zho ganle pe nac miñe no gun luu.”

¹¹ Dzigo bzhen zha ne zanie naa ga nia naa, bdziñnie zho naa Damasc; sac lo bi- inidoo co pcow lo naa.

¹² Ga no ti mgui lë Ananí, zëëb diidz rioxco me grë miñe rnabey ley, grëse men wladz ne no ga nanpaa zho ti men wen nac me;

¹³ dzigo biaad me zaatne blëz naa ga, në me lo naa: “Saul, niinagazh gon bets laa luu gbiire gwi stib.” Zigne sca bnee me laa lo naa biac, gongazh naa me.

¹⁴ Dzigo nèchaa me lo naa: “Dios men ne bliladz grë pxozgol ne, ib men co bzooblo luu gacnan luu pe nac miñe racladz me gac, me bzooblo luu gunbey luu men ne nacle diidz ga cxeel me lo guidzliu, ni gon luu tsi men co.

¹⁵ Ib laa me bzo luu tsienee luu lo miech miñe bzhaac luu ga, miñe bin luu ga.

¹⁶ Guso i sca, zeena chobnisgazh luu. Dib zdo luu bredz Jesús, bnab lo me csanmbe me luu lo xtol luu.”

¹⁷ Zeene laa naa blanso Jerusalén nu, tib dze lëëtaque no naa yadoo nozodiidznie naa Dios,

¹⁸ tibaque blulo me lo naa në me: “Na zeena biobladz brie Jerusalén nu, sac ib giladzd grë miech rii miñe gnee luu zeene gnee luu xtidz naa lo zho.”

¹⁹ “Per runbey zho naa waa”, rep naa lo me, “nanpaa zho scataa ra naa grë yadoo raxizhoo naa grë miech ne rliladz luu, rnabey naa rguin zho zho ni rio zho ladzguiib,

²⁰ niicle zeene beet zho Xteb men ne bnee xtiidz luu ga, ye naa bded diidz beet zho me, haxta pqui anaap naa xab grë zha ne bdeedquie me.”

²¹ Dzigo në me lo naa: “Na zeena pcaaniob nëz brie nu, sac gon laa naa cxel luu stib dan tsienee luu xtidz naa lo grë menzit.”

²² Zeene bin zho sca rëb me bdeetraa zho diidz nee me, psilo zho nguiedz roptsie rnee zho:

—¡Ib riegualdraa gban men qui! ¡Golnitlogazh me!

²³ Nguiedz zëëb tsi zho, ib rioogd ro zho, masaque rdzib zho xab zho ni rchoon zho yudie laglaa.

²⁴ Dzigo psëëb men rnabey co Pabl len yu co, ni bnabey me grë menguiib co quin zho Pabl, zeena cueero Pabl dien pe nac ncuaañe been Pabl, zha nac ne scataa rac grë miech co lo Pabl.

²⁵ Laa zho blozhle pxidoo me, laa zho csilo quin me, zeene rëb me lo sti zha ne rnabey lo grë zhaguiib co:

—¿Pe nonguiela dzigo ne lega quin to ti zha Roma, ni gardle gac guielwxtis dien pe nli paa no xfalt zho?

²⁶ Zeene bin zha co sca rëb Pabl, lëëled güeynie zho diidz lo men ne rnabey zho ga, rëb zho:

—¿Zha gon gun luu? Sac zha Roma me nac mgui co.

²⁷ Dzigo güey men rnabey co rëb me lo Pabl:

—Bneeli lo naa, ¿dien pe nli naa men Roma nac luu?

—Nliw —rëb Pabl—, zha Roma nac naa.

²⁸ Rzedz yan men rnabey co rëb me:

—¡Naasi zha Roma nac naa, ni nroob dimi bdizh naa bgab naa lo zha Roma!

Dzigo rëbchaa Pabl:

—Sangue naa, desde gol naa bgab naa lo zha Roma.

²⁹ Grë zhaguiib ne bzo nguñ Pabl ga parne cueero me, lëëled wbiche zho lo me, niicle men rnabey cow bdzieb me zeene gon me nli zha Roma nac Pabl, sac nrooble nac falt ne niun me ga lega nabey me nguñ zho ti zha Roma.

Bnee Pabl lo wxtis Israel

³⁰ Zeene biini liu, bnabey men rnabey co pcaalsa grë zhipxoz non zha Israel ni grë men ne nac zhiwxtis zho, sac racladz me gacnan me dien pepaa nac ncuaañe rquiaqui rlëënie grë miech co Pabl. Dzigo pxadz me Pabl, blee me Pabl bzo me Pabl lo zho.

23

¹ Dze bui Pabl lo grë zha wxtis co, dzigo psilo Pabl bnee me rëb me lo zho:

—Laa naa rneli lo to nu ganle, mbe zdo naa, Dios zobwi ganle zanañd naa ncuaañe rdziguend me.

² Zeene gon Ananí (men ne nac pxoz nroob) sca rëb Pabl, bnabey me zha ne zo gax lo Pabl, rëb me:

—¡Golcap ro zha qui!

³ Dzigo rëbchaa Pabl lo me:

—¡Tebaa squique cap Dios ro luu! ¡Nac luu gon zig ti lidz nguts loxaque nëz zhtssew stib rna! ¿Pa rquiin ne laa luu zob i? Led luu zo par cobey luu tel no pa ti ley ne zaguits naa, na le luule noguiitsa bnabey luu bñin zho naa.

⁴⁻⁵ Pquiabbe zha ne ndxie ga rëb zho:

—¡Bieñ ganle lo pxoz nroob i, lo men ne quia yun xtsiin Dios i noquiabro luu!

—Golgun dispensar —rëb Pabl—. Nand naa lëë pxoz nroob i, tel niaca miñe nan naaw ne scad naa; sac zho bnee lo Xtiidz Dios: “Gneened luu zha ne rnabey ladz luu.”

⁶ Zeene bien Pabl groḷ zha wxtis co zienal zhiwseed zha saducé, zgroḷ zho zienal zhiwseed zha farisé, dzigo psilo me nguiedz bnee me rëb me lo zho:

—¡Grëse to bets, golgona ganle, zha farisé nac naa, niiclegaa pxoz naaw farisé goc me! ¡Ni porne rliiladzpaa naa gon zrieeban zha ne ret, min co gane znu zo naa lo to nu!

⁷ Zeene sca rëb Pabl, psilo zho bdildiidz zho. Goc zho chop dii,

⁸ rrie zha saducé rnee nlid grieeban zha ne ret, nlid no anjl, nlid no espíritu; laa zha fariséga na rnee zrieeban miech, no anjl ni no espíritu.

⁹ Nguiedz zëëb tsi zho noneelsa zho, dzigo gusoque bla maistr ley ne nacgrë zha farisé, rëb zho:

—Laa ne bdzianle ganle, ¡ni ti falt rapd mgui qui! ¿Pe nadien dziuun ne? Nend ti espíritu ga, ti xanjlgaa Dios ga sca bnee lo me.

¹⁰ Zeene gon men ne rnabey lo menguiib ga, laa lo xtil zho noyac nroobraa, bdzieb me rëb me nend znuse gzhiih zho Pabl; bnabeyaque me gocredz menguiib güeyxi zho Pabl biire güeyan zho me len yu ne rbëz zho ga.

¹¹ Goḷ guieel co, blulo Dios lo Pabl rëb me: —Gdzieebd luu, zigne bnee luu xtidz naa lo miech Jerusalén nu, scaque none tsienee luuw lo grë zha ne no Roma.

Gocladz zho niut zho Pabl

¹²⁻¹³ Zeene biini liu, ndziisraa choo zha Israel bnediidz rëb zho gowd zho, ni tib ro peet guied zho haxta gut zho Pabl; telne gund zho mine rnee zho maase csiaabzi Dios zho.

¹⁴ Dzigo güey zho lo pxoz ne rnabey, lo grë zha ne nac zha non lo menguiedz, bzodiidz zho mine no guic zho ga, ni rëb zho:

¹⁵ —Nana gon, golnab lo men ne rnabey lo menguiib cxeel me Pabl lo to gzhe, golquiaalo noraa pe lozh yquiep to Pabl; laa no nsinle zioombiaaz. Zeene laa zho tednie Pabl, ga dziut no Pabl.

¹⁶ Dieen zha bin ti xingan bzian Pabla, nacne lëëld güey win yu ne rbëz menguiib ga güeynie win diidz lo Pabl.

¹⁷ Dzigo bredz Pabl ti zha ne rnabey lo menguiib co, rëb Pabl lo zho:

—Bzhiguiel güeynie mëed rii lo men ne rnabey to, sac laa win no tsienie ti diidz lo me.

¹⁸ Bzhen men rnabey co nia mëed co, güeynie me win lo men nroob ne rnabey zho, rëb me:

—Laa naa zialnie mëed rii nu me, dien pe nac diidz ne ziaadnie win lo luu; Pabl ne no ladzguuib ga bnab lo naa guialnie naa win.

¹⁹ Dzigo bzhen men rnabey co nia win, güeynie me win stib nëz, bnabdiidz me lo win dien pe nac diidz ne zienie win lo me.

²⁰ Dzigo rëbchaa win:

—Laa zha Israel gon bnediidz gnab zho cxeel luu pxey naa Pabl lo zhiwxtis zho gzhe, yquiaalo zho gnë zho noraa pe yquiep zho me.

²¹ Bzhiguiel gliladz luu xtiidz zho, sac ndziisraa choo zha ne nacgrë zho rëb zho laa zho tsiesoblan nëz gutgazh zho me zeene laa me ted. Biaan zho diidz grë zho, gowd zho, ni tib ro peet guied zho haxta gut zho me; haxta rëb zho tel laa zho gund min co maase gdzibdee Dios zho. Ible zun zhow, loxaque quiambëzse zho dien pe guiab luu.

²² Blozhse ga dzigo bzonëz me win, ni pso me diidz lo win choot lo gneed win ne laa win güeynie diidz lo me.

Güey Pabl lo gobernador Wech

²³ Lëëld bredz men rnabey co chop zha ne zo lo menguiib, rëb me:

—Laa zhaguiib gon none griee naguiel tsie zho Cesarea, na zeen golzo zha ne tsie; none tsie chop gayoo zha ne sëni, tsongal tsii zha ne sob guay, schop gayoo zha ne güey lanz. Naguielgazh, zig rlozh xtsee none griee zho nu;

²⁴ sac laa zho none tsiesan Pabl Cesarea. Ni golcoxab ti guay ne sob Pabl, sac none ndip ndaan me gdziñnie to me lo gobernador Wech Cesarea.

²⁵⁻²⁶ Dzigo pquiaa me ti guits ne güey zho gdziñnie zho lo gobernador, rneew:

“¡Diuzh Gobernador Wech!

‘Naa nac Claud Lisias, laa naa rxel guits rii lo luu gzodiidz naa ganle zha nacne bnabey naa ziaadsan zho men qui zaatne zob luu i.

²⁷ ‘Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhaguiib güeyla me lo zho.

²⁸ Gocladz naa niacnan naa dien zha nacne rlëënie zho me, dzigo bianie naa me lo zhiwxtis zho.

²⁹ Ga gon naa led ncuane rnad rlëënie zho me; tel zha nac xley zho ncuane co rliisqui zho; nacda ncuane guiab ne riegual guet me, tsogyugaa me ladzguuib.

³⁰ Zeene gocnan naa laa palal zho bnediidz gut zho me, nacne bnabeyaque naa ziaadsan grë menguiib qui me lo luu i. Niiclegaa zha ne rlëënie mew, laa naa rep lo zho guiaad zho lo luu i, zeena i gnë zho dien zha nacne rlëënie zho me.

‘Lëed bii gdzieel ne sca dien.’

³¹ Zeene laa liu pcow, zig rlozh xtseew laa grë menguiib co pcaanie Pabl nëz; dib guieel bio zho nëz bdziñnie zho me guiedz Antipatris.

³² Biini liu, loxaque zha ne zob guay ga pcaa nêz zienie zho me Cesarea, laa grêraa menguiib co wbiire bdziñ Jerusalén stib.

³³ Zeene bdziñ zho Cesarea, bdeed zho guits ne zienie zho ga lo meñ ne nac gobernador; dzigo laa zho psañ Pabl ga.

³⁴ Blozhse blab me lo guits co, dzigo bn-abdiidz me lo Pabl dien pa guiedz gol Pabl. Dzigo rëbchaa Pabl lo me, zha Cilis nac Pabl.

³⁵ —Nasca —rëb me—, zeene laa zha ne rlëenie luu glanso nu, dzigo yquiaadiag naa dien zhapaa nac xtiñ to.

Dzigo bnabey me, pquianap menguiib Pabl zaatne nac len xyulow Herod.

24

Gocredz Pabl lo gobernador Wech

¹ Zeene goc gaay ngbidza, laa Anani men ne rnabey lo pxoz bdziñ ga, gza me blalaa zha ne nac zha non lo menguiiez Israel, zienie zho ti licenciad lë Tértulo; grê zho laa zho zie zienie zho diidz lo gobernador pe nacne rdilnie zho Pabl.

² Dzigo bnabey gobernador gocredz Pabl. Zeene laa Pabl bdziñ, psilo licenciad co bzeet me grê ncuane rquiaqui zho Pabl, rëb me:

—Xquizhdoo luu gon gobernador, ne squitaa ndzielguic luu rien luu zha gnabey luu, gane zaace mban menladz no niina, blactaa ncuane yquini lo no noyñ luu.

³ Rzac zdoo now, tel pa lotaa zo no rsoladz no luu nac luu meñ ne rnabey no.

⁴ Nli nonguiel da dziunneed no luu, per been ti guielzaac pquiaadiag ganle pe nac ncuane rlisqui no quiaayñ mgui ne zo lo ne nu.

⁵ Msaque nac me lo no zig nac ti guielguiz dox ne rded, grêse guiedz quianzë me noyungüet me menladz no gacndaan zho lo meñ ne rnabey no. Lëe me ga zo lo grê zha ne rnee zho nazaren.

⁶ Zeene bgaa me, lëëtaque laa me lo len yadoo ro ne zob Jerusalén quiaayñnguzee me xyadoo no. Nacne gocladz no gagazh nguizh me falt co zigne rnabey xley no;

⁷ per biaad Lisias grê xmenguiib me ntseeb rac zho biaadla zho me lo no.

⁸ Na nagon zac luuzhal yquiep me, zeena gan luu ganle nli quiaayñ me grê mine rnee no nu.

⁹ Grê zha Israel ne zianal ga, pquiabbe zho rëb zho nli quiaayñ me grê min co.

¹⁰ Dzigo blunia men ne nac gobernador ga lo Pabl gnee Pabl; nacne psilo Pabl bnee me rëb me:

—Nanle naa ziele iz zob luu nu rquiaadiag luu grê ncuane rac xtan no nu, gane rley naa zial naa lo luu par yquiaadiaggaa luu ganle zha nac xtidz naa.

¹¹ 'Na rac tsiipchop ngbidz ga bdziñ naa Jerusalén, biagan naa Dios len yadoo nroob ne zob ga (niicle tel niaca mine griece diidz ganle).

¹² Laa naa bia Jerusalén biagan naa Dios, choot biatilnied naa ga; niicle len grêragaa yadoo wina, ro nêzgaaw, wlaltaa noquiild naa miech cho lo gacntseeb zho.

¹³ Grêse mine rquiaqui grê zha qui naa grieelod glu zho nliw, sac led ncuane godca.

¹⁴ 'Mine nac diidzli, niina wriin psañ Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanañ naaw, dib zdoo naa quiaayñ naa dziin lo Dios meñ ne bliladz pxozgol no; ni scaquegaa, noxco naa grêse mine nac ley. Rliladz naa grêse mine bnee grê zha ne biadteed xtiidz me.

¹⁵ Rliladz naa zdziñ dze ne cueban Dios grêse miech, zigtaa zha wena zigtagaa zha ntseeba, ni haxta zha ye zho rliladz min co.

¹⁶ Ni min copaa nagon gane tibaque noxco naa guiaanmbe zdoo naa, guntaldras naa xtoñ naa zigtaa lo Diosa zigtagaa lo samiech naaw.

¹⁷ 'Nod naa Jerusalén tibaque, blale iz goc no naa ladz menzit; dze ne bdziñ naa Jerusalén ga, laa naa bia porne zasañ ti gon lo menladz naa ni zanie naa ti gon ne gded naa lo Dios.

¹⁸ Min co nagon nacne no naa len yadoo zeene gon grê zha qui naa. Blozhle ben naa grê mine rnabey xley no rdziun no zeene sca riosañ no gon, zeene laa bla zha Israel ne no nêz Asia blanso lo naa ga; per choot miech taf ndxienied naa ga, niicle choot noquiildga naa.

¹⁹ Zha co nagon rieguañ niaad nu, nlisqui zho tel pe ncuane rzac zho nonguield noyñ naa ga.

²⁰ Zha ne ndxieggaa nu niina, zac gnë zho telne brieequia falt ne rquiaqui zho naa zeene gocredz naa lo wxtis Jerusalén.

²¹ Te goon falt ga naye ben naa, lëe gdib nguiedz bne naa lo zho rep naa: "Laa naa racredz lo to, zig nac zeene falt ga rap naa loxaque ne rliladz naa zdziñ dze ne grieceban miech." Scase nagon naa.

²² Nanle gobernador co led ncuane gund zha ne rliladz Jesús ga rquiaqui zho Pabl, dzigo bnee me lo zho cuëz zho nieeda gdziñ Lisias, dzigo dien zhapaa guiaan xtiñ zho.

²³ Bnabey me zha ne zo lo menguiib yquianap zho Pabl, ni pso me diidz zaacse gac zho lo Pabl, gdeed zho diidz ted grê zha ne ndzieeldiiz Pabl tsiegan zho Pabl.

²⁴ Goc blalaa ngbidza, bnabey gobernador co gocredz Pabl lo me grop tsiel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús.

²⁵ Zeene bzeettaa Pabl, zha nac guielwxtis, zha none tsoxco miech gund zho mine ri-aabtaa guic zho, ni zha gdziñ dze ne guñ Dios guielwxtis, dzigotaa laa me bdzieb, rëbchaa me lo Pabl:

—jLëëewga na nadien! Na zeene guioba, dzigo naazhal cuedz luu guiaad luu ziodiidz ne stib.

²⁶ Zhiga zhiga rbedz me Pabl, sac quiambëz me dien pe gdziibd Pabl dimi csilaa me Pabl.

²⁷ Zeene goc chop iz sca no Pabl ladzguuib ga, laa Wech brieë guielgobnador, bzëëb ti meñ lë Pons Fest. Niicle brieë Wech per psilaad me Pabl, sac racladz me dien zha guianñziuraa me lo grë zha Israel.

25

Güeyzo zho Pabl lo gobernador Fest

¹ Zeene goc tson ngbidz bdziñ Fest Cesarea pcaania me guielgobnador, laa me brieë güey me Jerusalén.

² Grë zha pxoz non ni grë zha ne rnabey lo menquiedz Israel, zeene bin zho laa Fest bdziñ Jerusalén lëëëd güey zho lo me güeyxob zho xdemand Pabl; ni

³ bñab zho lo me cxeel me Pabl Jerusalén. Laa zho rnab min co sac laa zho bñediidzle, nëz tsiesoblan zho, yquiambëz zho ted Pabl gut zho Pabl.

⁴⁻⁵ Per bdeete Fest diidz, rëb me laa Pabl nole ladzguuib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; beñque zlase dze laa me gbiire güey nëz co dzigo zac tsienal zho zhits me.

⁶ Ndziisraa ti zhmäl blëz me Jerusalén ga, dzigo laa me biire zey Cesarea. Zna dze bdziñ me biinigazh liu co güey me yulow, bnabey me gocredz Pabl.

⁷ Laa grë zha Israel ndxiele ga, wbig zho lo Pabl ndal grë falt nroob ne rcaadzdoj zho me, per loxaque diidzsew, guiend zha glu zho ne nliipaa goca.

⁸ Dzigo pquiab Pabl rëb Pabl:

—Grëtaa mine rquiaqui zho naa i, ni tiba nliid. Wlaltaa gard quits naa xley no, gard quitnie naa xyadoo no, niicle gardgaa gacntseeb naa lo zhiwxtis zha Roma.

⁹ —¿Pe racladzdgaa luu tsie luu Jerusalén? —rëb Fest—. Ga gbiire yquiaadiag naa xtil to i zeena glu dien chopaa rap dol.

Sca rëb me, sac racladz me dien zha guianñziuu me lo grë zha Israel.

¹⁰ Dzigo rëbchaa Pabl:

—jGad naa! jNod pe nac ga naa ga, to rieguial guñ guielwxtis rii! Beñque nan wen luu ganle peet falt nzëëbd naa lo zha Israel.

¹¹ Tel niaca mine nli ziyun naa pe guielntseeb ne raguiäl naa guet naa, maase guet naa. Per na nanpaa naa ni ti ncuaañe rquiaqui zho naa i nliid, ¿pe nac dzigo cho

co naa ladznia zho gut zho naa? Laa naa racladz, mazd golneedz diidz tibaque ga naa lo zhiwxtis nroob ne, meñ ne zob Roma.

¹² Dzigo bzodiidz Fest grë me meñ rac ne nacie me dziin; gzhohse ga rëbchaa me lo Pabl:

—Guiend rson sca. jTel lo César racladz luu tsie luu, na maase tsie luu!

Gocredz Pabl lo Agrip

¹³ Zeene goc bla zhmala, laa rey Agrip grop wnaa ne lë Berenis bdziñ Cesarea ga güeyquiaabdiuzh me Fest.

¹⁴ Nzianlaa ngbidz blëz me ga, dzigo bzodiidz Fest lo me laa Pabl sca no ladzguuib ga, rëb Fest:

—Len dze ne bii nac Wech dziin biab ti mgui ladzguuib nu,

¹⁵ laa len dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me.

¹⁶ Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli mine rquiaqui zho me togo nliidgaaw;

¹⁷ nacne biaad zho nu. Zna dze blanso zho, biinigazh liu co bnabey naa gocredz me.

¹⁸ Tibaque ni naa bod no pe ti falt nroob ne rquiaqui zho me, per zeene biaad zho yulow gon naa

¹⁹ lëë gdib tel zha nac grë ncuaañe riladz zho min co rlisqui zho, ni rlisqui zho pe nacne zienal me zhiwseid ti mgui lë Jesús, gutle meñ co ni laa me rnee mban me.

²⁰ Zeene gon naa grë ncuaañ co rquiaqui zho me nli riend naa zha gun naa, dzigo rep naa lo me, telne racladzgaa me zac tsie me Jerusalén ga dien zha guiaañ lo xtil zho.

²¹ Per bnëd me, lel bñab me tsie me lo César; gane niina laa me bii no i, nieeda gne naa lo César dien pa hor grielo cxel naa me nëz co.

²² Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegazh gnabey naa gacredz me.

²³ Biini liu, ti lni nroob ne rac laa Agrip ni Berenis bdziñ len yu ne rac guielwxtis ga, grë zha non ne rnabey lo menquuib, grë zha non lo menquiedz, nal zho zhits me. Dzigo bnabey Fest gocredz Pabl, zeene laa Pabl bdziñ

²⁴ laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to meñ ne ndxiegrë ne nu nadze, golwi ganle lëë meñ rii nagon rlëñiedox zha Israel, racladz zho guet me;

zigtaa Jerusaléna zigtagaa nuw ziyaadnab zho lo naa gnabey naa guet me.

²⁵ Saṅgue naa goṅle naa rapd me falt, par guiab ne rieguiā guet me; per laa me bnab tsie me lo César, na laa naa no cxel me nēz co.

²⁶ 'Nli riend naa dien pe nac diidz ne cxel naa lo César, ne squi lega ncuuaṅe nliid rquiaqui zho me. Miṅ co nagon bnabey naa gocredz me lo to nu, ni laga laa luu ziaadgaa nu rey Agrip, bzhiguiel pquiaadiag ganle zha rzē xtiidz me; zeena togo zdziel naa pe nac diidz ne cxel naa gal dze ne laa me tsie nēz co.

²⁷ iSac nonguield ga guṅ naa telne sobdoo me cxel naa me, ni tel cxelnd naa diidz dien pe nac xfalt me!

26

Bnee Pabl lo Agrip

¹ Dzigo rēb rey Agrip lo Pabl, mezhāl gnee dien zha naca. Nacne blis nia Pabl psilo Pabl bnee Pabl rēb Pabl:

² —Rley naa goṅ rey Agrip ne laa naa ziaḷ lo luu nadze, zeena gzodiidz naa lo luu gacnaṅ luu ganle nliid grē ncuuaṅe rquiaqui grē menladz naa naa.

³ Rley naa sac naṅ naa naṅpaa luu zha nac grē xcostumbr no, grē ncuuaṅe rililadz no. jRnab naa lo luu sca, guieete luu yquiaadiag luu grē miṅe gne naa!

⁴ 'Grēse zha Israel naṅ wen zho ganle zha mban naa, sac mēēdas naa bdziṅ naa Jerusalén, ga broob naa.

⁵ Naṅpaa zho zha farisé goc naa, ni zha farisé nac zha ne rioxcoraa ruṅ grēse miṅe rililadz zha Israel.

⁶ Per mazd goṅ, laa zho rlēē lo naa porne dib zdoo naa rililadz naa laa Dios beenle miṅe psan me diidz lo grē pxozgol no.

⁷ Grēse zha Israel, zigne ziaad zho lo gza tsiipchop dii ne psan xmengol no, grēse zho dze guieel bii quiambēz zho gac miṅ co. jMasaque rzac zho dol ga quiaayun naa rililadz naa laaw gocle!

⁸ Haxta to, zeene rzet naa zrieeban miech, rzhidz to ron tow, ipe rzac to naa grieelod Dios guṅ me miṅ co?

⁹ 'Glo nli ptsidiḷ naa grē zha ne rililadz Jesús meṅ Nazaret, masaque rzaac naa lēēw ga quiaayun naa.

¹⁰ Pe zhidaa zha ne blo naa ladzguuib Jerusalén, haxta grē pxoz non bneedz diidz beṅ naa grē miṅ co; ni zeene rnabey zho ret grē zha co, ye naa rded diidz ret zho.

¹¹ Nzian grē yadoo win bia naa, biasacsi naa zho haxta gneenē zho Jesús. Blēēniedox naa zho, haxta grē guiedz zit bia naa bi-aguib naa zho.

¹² 'Miṅ copaa nagon brie naa za naa guiedz Damasc, masaque grē pxoz rnabey bneedz ti xtiidz zho bi naa laa naa za.

¹³ Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nēz zhan gbaa biab lo naa, ni lo grē zha ne zanie naa ga, nroobraa nac biini co lo xbiini ngbidz.

¹⁴ Grēse no biab liu, dzigo bin naa ti tsi men co rnee me xtiidz no, bredz me naa nē me: “Saul, Saul, ipe nacne quianaḷ luu naa? Lēēque luu goṅ nosacsi luu i, rzac luu zigne rzac ngon ne rcaanni, ni lēēque lo guuib lots ne rtseb zho ma riecaanni ma.”

¹⁵ Dzigo rep naa: “Been guieḷnzaac bnē dien cho luu.” Nēchaa men co: “Naa nac Jesús, men ne squi quiaatsidiḷ luu.

¹⁶ jNa zeena guche i, bzoli! Laa naa bredz luu zeena guṅ luu xtsiṅ naa, tsiezodiidz luu lo miech miṅe blozh bzhaac luu nu, ni grēragaa miṅe naraa gan luu.

¹⁷ Peet tsienied guic luu, naa yquianaap luu, niicle zhaladz luuw niiclegaa zha zita peet grieelod guṅ zho luu. Sac laa naa cxel luu grē guiedz zit

¹⁸ tsienee luu lo miech gacnaṅ zho miṅe nacpaa diidzli, zeena griee zho lo ncow gbig zho nēz lo biini, griee zho lадznia mendox ygab zho lo Dios. Dib zdoo zho gililadz zho naa zeena guṅ Dios zho perdon, ni ygaa zho zaatne gdziṅ grēse zha ne mbe zdoo.”

¹⁹ 'Miṅ co nagon rey Agrip nacne bioxco naa beṅ naa miṅe nē men co lo naa ga.

²⁰ Glose Damasc psilo naa bne naa lo miech, ga brie naa bdziṅ naa Jerusalén, bia naa dib Judé ni grē guiedz zit, bne naa lo miech csaan zho grē xquieḷntseeb zho gbig zho lo Dios.

²¹ 'Miṅ co nagon nacne rlēēnie zha Israel naa, biadnaaz zho naa len yadoo ro ne zob Jerusalén, gocladz zho niutgazh zho naa.

²² Gocnieṅ Dios naa, gane laa naa bii zo nu quiane naa Xtiidz me zigtaa lo grē zha wina zigtagaa lo grē zha nona. Noseete naa miech stib wseed, sinque laa naa rne miṅe bzeetaque Moisés ni grēragaa zha ne biadteed xtiidz Dios padzeela.

²³ Tel zha, bzeetle zho ib sacsi miech men ne cxeel Dios ga, ni me gac men ne glopaa grieeban, me gac zig ti biini ne gziimi lo grēse miech, zigtaa zha Israela zigtagaa grē menzita.

²⁴ Tibaque nguiedz bnee Fest rēb me lo Pabl:

—jBod rzhinle guic luu goṅ Pabl! jNe tibaque nagon rio luu wseed gane squi riots xtiidz luu!

²⁵ —Coo, gobernador Fest —rēb Pabl—, led rzhinḷ guic naa. Niapse miṅe nac diidzli miṅ co none naa,

²⁶ laa rey Agrip zob i, me naṅ ganle nli grē miṅe rne naa nu. Tibliladz naa none naaw lo me, sac naṅpaa naa naṅ me nli miṅe rnee naa, nacda ncuuaṅe goc nguets zhliiaan.

²⁷ ¿Led nli lëë rey Agrip riladz luu miñe bzeet grë zha ne biadteed xtiidz Dios padzeela? Nanpaa naa riladz luuw.

²⁸ Pquiab rey Agrip, rëb me lo Pabl:

—¿Zlalaque nu gon laa luu cole guic naa ye naa sëëb xnëz Jesús!

²⁹ Dzigo rëbchaa Pabl:

—¿Nend zhilew o nroobragaaw, per rnab naa lo Dios led loxaque luudse sëëb xnëz me, sinque ye grëraa zha ne noquiaadiag miñe none naa nu niina; zeëna yгаа to miñe bgaa naa nu, per led znud sob caden rii nia to!

³⁰ Gataa laa Agrip guso, gusoque Fest, gu-soque Berenis ni grëraa zha ne zobnie zho, laa zho brieë ga.

³¹ Grëse zho rnee peet xtołd Pabl, rapd me falt ne guiab ne rieguial guet me, rieguialgaa tso me ladzguib.

³² —Niacpaa nsilaa ne me —rnee Agrip lo Fest—, telne nabd me tsieppaa me lo César.

27

Pxeeł zho Pabl nëz Roma

¹ Bdzin dzew, laa Fest bnabey tsie Pabl nëz Roma, dzigo laa zho psan Pabl ladznia ti meñ ne rnabey lo menquib lë Jul, gza Pabl zlalaa zha ne no ladzguib ga. Lëë Jul co rnabey lo tib dii menquib ne rnee zho “Augusto César”.

² Ye no zional zhits Pabl grop no Aristarco, laa no bziaab ti xbarcw zha Adramit zie grë guiedz ne ndxie ro nis nëz Asia, laa no pcaa nëz laa no zio.

³ Biini liu co laa no bdzin guiedz Sidón. Zeëne bdzin no ga, wen goc Jul lo Pabl bdeed me diidz güey Pabl güeyquiaabdiuzh Pabl grë zha ne runbey Pabl ga, grëse zho rleyynie zho me blëzlo zho me.

⁴ Ga brieë no bdieed no tib ro guidzliu win ne lë Chipr, psaac guidzliu co palal, sac psilo rrieë me rtsire me barcw ne zio no ga.

⁵ Laa no zio, bdieed no gax ro guidzliu ne nac xtan zha Cilis ni xtan zha Panfil, bdzin no ti guiedz ne ndxie xtan Licia lë Mira;

⁶ ga bdzieet no barcw ne zio no ga. Lëëtaaque noguib Jul sti barcw ne guio no, laa ti xbarcw zha Alejandri no greeë ga tsie nëz Italia, dzigo bziaab no barcw co laa no zio stib.

⁷ Tsow ga zie barcw co, nzian dze goca, nen dzigora a bdzin no gax guiedz Gnid; ib rbëzdaque me, nacne bguib zho dien pa nëz zhi rcaan me, dzigo güeynie zho barcw co nëz Cret. Tib ro guidzliu win co zio no bdieed no Salmon;

⁸ nen bdzin no zaatne rnee zho Buenos Puertos, gaxle ga riaan ti guiedz lë Lasé.

⁹ Nrooble dze goc no no lo nis, len dze co laa mëë nal psilole ni zëëb diidz gacd së barcw len mëë co, nacne bnee Pabl lo grë zha ne zienie no ga,

¹⁰ rëb me lo zho:

—Golgona ganle, telne laa ne greeë nu len dze rii, rgobey naa ib znitlonie ne barcw rii lo nis.

¹¹ Laa ne niacnie Jul Pabl niac miñe rëb Pabl ga, leł mazdraa bliladz me xtiidz zha ne rsëë barcw ni meñ ne nac bizhuana.

¹² Stiba, zaatne nac Buenos Puertos ga rapda zaatne zaacse cuëz miech len mëë nal, nacne nzian zho rëb mazd gdzin guiedz Fenice, ga zac gbiaaz no gdipse len mëë nal. Ro guidzliu win co riaan Fenice, nligaa zhi rcaan me ga.

¹³ Zeëne laa ti me win ne znu ziaadquia psilo brieë lo nis co, zootle na nli grieedraa me. Nacne lëëled bnabey zho bziaab no barcw, blisglaa zho lar nroob ne rcaan me rzëw, laa no zio, gax gax ro guidzliu co zienie zhow.

¹⁴ Zhisaque goca zeëne laa ti me dox ne rnee zho Nordest psilo brieë, laa me co psilo rtsire barcw.

¹⁵ Niicle racladz zho tsienie zhow nëz ne no guio no ga, per rsaand me; gonse zho led ncuaañe gacda, mazd psaan zho zienie mew nëz ne racladztaa me.

¹⁶ Scale zienie me barcw ne no no ga, biotieed no gax ro guidzliu win ne lë Claudia, ga në në brieelo blis zho grë canó win ne nal zhits barcw ga bzëëba nëz len barcw;

¹⁷ dzigo blibdoo zho barcw co zeëna gbilda, ni blit zho lar nroob ne rcaan me rzëw, sac rdzieb zho rëb zho telne scaquia lar co nend tsieniezhoo mew nëz ro nis, pa tsiesonagwa lo yuzh.

¹⁸ Zeëne biini sti liu co mazdraa rrieë me, ni guixoo ne ziaadnie me, nacne blee zho grë yo ne no len barcw blaal zhow lo nis.

¹⁹ Goc bion ngbidz scataa zo guie dox co, bnabeyaque zho blee no grëse ncuaañe runxtsiin zho len barcw blaal now lo nis.

²⁰ Goc bla ngbidza rbëzdaque guie dox co, rludraa lo mel per ni lo ngbidz rludraa, dzigotaa rdzieets no nlidraa griequiaa no.

²¹ Niicle raagw choot rroladzdraa, dzigo bnee Pabl lo grë zha ne zio grë no ga, rëb me:

—Tebaa nion to xtidz naa nagon nzhiguiel to rrieed ne Cret, zeëna ndzieelod ne grë ncuaañe nodzian ne nu, niicle nlaaldgaa ne grë yo co lo nis.

²² Per laa ne znule bzhaac zha dziiunpaa ne. ¿Gdziebde to! ¿Peet gacd ne! Niicle nitlo barcw rii, per choot peet gacd.

²³ Led nanle to ganle, xnëz Dios no naa ni xtsiin me noyün naa, nieewdze pxeeł me ti xanjł me

²⁴ në lo naa: “Gdziebd luu gon Pabl, peet gacd luu, sac ib none laa luu gdzin lo rey ne zob Roma. Niicle grë zha ne ziadgrëë luu len barcw i peet gacd zho, sac bin me miñe rnab luu.”

²⁵ Gane rne naa lo to peet tsienied guic to, nanle naa csaand Dios ne, ible zac minē nē anj l co lo naa.

²⁶ Ib tedsod, no pa ti lo guidzliu win ne no lo nis rii tsiezo me rii ne.

²⁷ Zeene goc tsiida ngbidz sca nēzrii nēzrec zienie me no, laa no no lo Nisdoo Adriático. Wdze co, zig grol guieela, bien grē zha ne rsēē barcw ga gaxle ti ro guidzliu ga nonie barcw no;

²⁸ dzigo ptiix zho dien palal quiet nis ga, gon zho loxaque gal yas guieta. Bzē zho spalal biire ptiix zhow stib, gale guieta loxaque tsiiptib yas.

²⁹ Gataa laa zho bdzieb rēb zho nend pa tsietaan barcw lo quie, dzigo psilēē zho lo doo ne zob gza tap guuib cruz nroob ne quia nēz zhits barcw, bron zho gza guuib co lo nis, zeena tswoga sē barcw; rzac zho tebaa laa liu biinile.

³⁰ Grē zha ne run dziin len barcw, gocladz zho nzhoon zho, psilo zho noxadz zho grē canó win ne ney barcw, rquiaalo zho zig nac zeene guuib cruz nroob ne ney barcw nēz quia wqualit zho csēēb zho len nis.

³¹ Zeene gon Pabla, rēbchaa me lo Jul ni lo grē xmenguuib Jul:

—iLaa grē zha rii gon racladz xoon! Csaande to, sac telne laa zho xoon nlidraa grieequia to lo nis rii.

³² Dzigo pchug grē menguib co doo ne zob grē canó win co, bron zhow lo nis.

³³⁻³⁴ Silgaw, bii ncow rnaw laa Pabl bnee lo zho gow zho, rēb Pabl:

—iNone gow to! Golwi ganle nale gac tsiin ngbidz ga ni ti lē peet gard gow to, ni squique raguiesde to zaacse. Peet tsienied guic to, ni tib to peet gac.

³⁵ Blozhse sca bnee Pabl lo zho, bzhen Pabl ti quietxtil, squi ndxie zho grē zho bdeed me xquizh lo Dios, dzigo beengrol me quietxtil co laa me psilo wagw.

³⁶ Dzigoraa peet güeyniedraa guic zho, ye zho laa zho psilo dow.

³⁷ Lo grē no zig zio no len barcw co rgaa no chop gayoo tsongaltsimtib.

³⁸ Blozhse bdioow no, dzigo laa zho blee grē zhoxtil ne zie len barcw ga blaal zhow lo nis, zeena gmitnē barcw spalal.

³⁹ Zeene laa liu blozh biini, gon grē zha ne rsēē barcw ga laa ti lē ro guidzliu rlu gax ga, per riend zho dien paw. Natlaa nac ro guidzliu co, rlu zac gdziñ barcwa, nacne rēb zho dien pe grieelod gdziñni zho barcw ga.

⁴⁰ Dzigo pchug zho doo ne zob guuib cruz nroob ne no len nis ga, biaanse guuib co ga. Psilēē zho doo ne naaz yag nlag ne rchug nis rzē barcw, ni blisglaa zho lar nroob ne rcaan me rzēw; zeena csēē mew gdziña gax ro guidzliu co.

⁴¹ Per ziese zho, lēēte lo yuzh ne zobli len nis co güeysiba, loxaque güeysēēbguica

ga laa nēz zhitsa psilo nobilaque, sac grēse nis ne rias riecaan choo co.

⁴² Dzigotaa laa grē menguib co gocladz niut grē zha ne zie ga guey ladzguuib, rēb zho nend znuse xoobnis zho xoon zho.

⁴³ Per bdeete men ne rnabey lo zho diidz, sac racladz me gut zho Pabl. Mazd bnabey me zha ne rac rzhoobnis, zac ner zho xoobnis zho grieequia zho ro nis co;

⁴⁴ laa grē zha ne gacd xoobnis, zac maase grē yag biats ne nobil barcw xoobnisnie zho. Sca bdeeda diidz briequia no ro nis grēse no.

28

Blēz zho Malt

¹ Zeene bdziñ no ga, dzigoraa gocndion no lēē guidzliu win ne lē Malt ga.

² Grē miech ne no ga pquiadox zdo zho no, bzēēg zho gui bredz zho no bdzēē no, sac lala rac nal ni scataque bgaa no guie.

³ Ye Pabl güey güeytop chop lē yag ne cuib lo gui. Lēētaaque laa me nodziiba lo gui, tibaque bias ti meel ne zizhoon lo zhindzēē gui co, pquiaalay ma nia me, quiatague ma ga.

⁴ Grē miech ne no ga, zeene gon zhow rneechnaa zho:

—iIse nagon rlu, nzēēb men qui ngutoo! Niicle blaa me lo nisdoo, per no guielwxtis ne quianab guet me.

⁵ Znuse bdzib Pabl nia me bron me meel co lo gui.

⁶ Grēse zho rwi quiambēz zho dien pa hor sigui me, te tibaque tsobe me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

⁷ Gaxaque ga quia tib lē liun men ne rnabey lo guidzliu win co lē Publ, dzigo bneedz me zaatne bliaaz no ga tson ngbidz ni bneedz me ncuaañe bdioow no.

⁸ Lēētaaque len dze co laa pxoz me nix rlan xlēē ni yoobchen. Dzigo güeynee Pabl lo me, bnaab Pabl lo Dios guiac me; blozhse bnaab Pabl lo Dios, pxobnia Pabl guic me, laa me biac.

⁹ Zeene bin grē miech cow, zha ne rzanēetaa riaadnie zho zho lo Pabl, runguiac Pabl zho.

¹⁰ Dzigo rleynie zho no, nroob grē ncuaañe bgad zho lo no. Zeene goł dze ne laa no wbii ga, scasaque nroob ncuaañe yquin no nēz bneedz zho.

¹¹ Tson mēē bliaaz no lo guidzliu co, dzigo laa no briea ga bziaab no ti len xbarcw zha Alejandrí, ti barcw ne blēz ga dipse len mēē nal co. Guic barcw co quia chop mdio, mdio ne rnee zho Cástor ni mdio ne rnee zho Pólux.

¹² Bdzin no guiedz Siracús, ga bliaaz no tson ngbidz.

¹³ Siracús brie no, gax gax ro guidzliu zio no bdzin no guiedz Regio; biini liu ine zhoob ti me ne ziaadquia lo nis co, dzigo laa no brie Regio laa no zio. Biiniraa sti liu bdzin no guiedz Puteoli,

¹⁴ ga bdzin no lo blalaa zha ne riladz Jesús. Bnab zho lo no gbiaaz no, nacne bliaaaze no lo zho ga ti zhmal. Garaa brie no bdzin no Roma.

¹⁵ Grè zha ne riladzle Jesús Roma, zeene bin zho laa no gdzin ga, brie zho biaadinè zho no. Zhis zho biadzieel no zatne lè Foro de Apio, szhis zho biaad zatne lè Tres Tabernas. Zeene gon Pabl scataa biaad-xinè zho no, rley me rdeed me xquizh lo Dios.

Bdzin Pabl Roma

¹⁶ Zeene bdzin no lad guiedz Roma, bdeed zho diidz Pablzhal bguib ti yu ne blèz me grop me menguib ne quianap me, blood zho me ladzguib.

¹⁷ Goc tson ngbidz bdzin no ga, dzigo bredz Pabl grè zha ne nac zha non lo zha Israel ne no ga. Blozhse pcaalsa zho, rëbchaa me lo zho:

—Laa naa bredz to nu gon bets, gacnan to ganle laa grè zha ladz ne bnaaz naa Jerusalén, güeyzo zho naa lo zhiwxtis zha Roma rnab zho guet naa, per gneli naa lo to ganle, peet bend naa lo zho, ni ti zhiwseed xmengol ne bditd naa.

¹⁸ Niicle wxtisgaaw, blozhse pquiep zho naa gon zho raapd naa falt, nacd naa zha ne rieguial guet; dzigo gocladz zho nsilaa zho naa.

¹⁹ Per zeene gon naa néd menladz ne csilaa zho naa, nacne bnabaque naa ziaadnie zho naa lo César nu. Miñ co nagon nacne zial naa nu, ziald naa cto naa menladz ne o cteedquiegaa naa zho.

²⁰ Wen ne laa naa beenbey to nagon, ni beenbeygaa to naa; gacnan to sca ganle laa caden rii zob nia naa, per nacda por pe falt ne rap naa, sinque laaw zob nia naa porne riladz naa laa Dios pxeelle men ne quiambèz menladz ne ga.

²¹ Dzigo pquiab zho rëb zho lo Pabl:

—;Wlaltaa, ni ti guits ib gard cxeel menladz ne lo no zaatne gzeet zho luu! Niiclegaa grè zha wladz ne zilanso nuw, rneed zho laa luu noyup pe guieintseeb.

²² Per na laga laa luu ziaad nu, siguiel luu sodiidz luu lo no dien zhapaa nac wseed ne riladz luu i, sac blactaa zidzion no, zaatne notaa zha ne riladza rlèenie miech zho.

²³ Dzigo pso zho ti dze ne tsie zho.

Zeene gol dze co, nzian zho pcaalsa zaatne rbèz Pabl ga. Dzigo psilo Pabl bzodiidz me lo zho zhapaa racladz Dios gban miech,

ni rnee me lo zho gliladz zho lèele men ne nac diidz cxeel Dios ga nac Jesús; blu me lo zho grèse zaatne zhobneew, zigtaa lo grè mine pquiaa Moisésa, zigtagaa lo grè mine pquiaa grèraa zha ne biadteed xtiidz Dios. Dipse dze sca bzodiidznie me zho grè miñ co.

²⁴ Briequia bla zha ne biladz grè mine bnee me ga, ni scaquegaa briequia zha ne biladzda.

²⁵ Grè zha ne riod zdoo mine rnee me ga, laa zho psilo noriee, nacne rëb me:

—Ib lèepaa mine nac to i ga nagon bzeet Espiritu Sant, zeene psiaab me guic profet Isá znu rëb Isá

²⁶ lo grè xmengol to:

Niicle peraa gon to, niicle peraa gan to,

per peet guiende to;

²⁷ sac gocntseeb zdoo to.

Zob diag to, ni peet ronde to;

zob lo to, ni peet rande to.

Ncow nac guic to,

gane peet ronde to, peet rande to;

niicle rioxcodgaa to gbig to lo naa zeena csilaa naa to lo xtol to.

²⁸ Golgacnan sca ganle, miñ co gane laa Xtidz Dios quiagaaz lo grè miech stib guiedz, ni zhasi gon noliladz zhow.

²⁹ [Zeene gon zho sca rëb Pabl mazdraa blèe zho, nodiidzlsa zho laa zho zey.]

³⁰ Dipse len chop iz blèz Pabl ga, ga bree me ti len yu ne bio me. Ga rdzin grè miech ne ziene lo me,

³¹ zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse len dze co, ib biod zha ne ntsidil pe nacne sca noseed me miech.

GUTS NE PXEEL PABL LO ZHA ROMA

¡Diuzh to grëse to!

¹ Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

² Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guts ne zhubnee Xtiidz me.

³ Lëew ga rnee ganle cho nac Jesús (men ne brieequia lo xtii rey David ne laa me goc miech lo guidzliu;

⁴ sangue Espiritu Sant, pxobnen me ganle Xpëed Dios nac me; min co gane brieeban me).

⁵ Zeene biaad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me.

⁶ Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

⁷ Laa naa rxeel guts rii lo to, grëse to ne no to guiedz Roma i. Golgacnañ ganle rleynie Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoz ne, ni Jesús men ne rnabey, tibaque noxco me to, me nac men ne gacniën to zeena peet zhgab ctsebde to.

⁸⁻⁹ Nanle to nasca ganle xtsiin Dios quiayun naa, dib zdoos naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por mine quiayun to grëse to, sac gon tel pa lotaa zëeb diidz ne nlipaa dib zdoos to rliadz to me. Me zobwi, me nan ganle zeene rnabtaa naa lo me, ib riaanladz naa to, tibaque rnab naa lo me gacniën me to;

¹⁰ ni tibaque rnab naa telne zneedz me diidz gdziñ tib dze ne grielo guial naa i gualgan naa to.

¹¹ Ne nlipaa rquiabladz naa ganlo naa to, gualzhaal naa gnedz naa rson lo to guien to zha ycaaniraa to guielbiini ne rneedz Espiritu Sant; zeena tiblque gac guic to dzitsraa so to.

¹² Ni scagaa tipse gac ne ziodiidz ne zha nac Xtiidz Ndzon Dios, mine rliadz ne; zeena tipse gac ne sodziits ne low.

¹³ Bets, bzian, tel gan to ganle blactaa vult ziyacldz naa guial naa i gualgan naa to, per haxta lo nadze gon rrieelodaque

guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa.

¹⁴ Sac ible naa raguial cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëga zha ne peet rienda.

¹⁵ Mincoxe waa, tibaque laa naa racladz ye nëz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

Poder ne rap Xtiidz Ndzon Dios

¹⁶ Tel naa, ib rtoladz naa gne naa Diidz Ndzon rii lo miech, sac ncuuan ro ne run Dios zeene rquiaadiag miecha. ¡Grëse miech ne gliladza, ib zlaa zho lo xto! zho! Laa guielnaac co no niina par grëse miech. Glose lo zha Israel bdzina, laa niina laaw quiazin lo grëraa miech, zeena grëse zho gbig sëeb xnëz Dios.

¹⁷ Sac gon, lëe Diidz Ndzon rii rlu zha rbiire rcaania Dios miech, rsanbme me zho lo dol rbiire riaanwen zho lo me: totsaque nli dib zdoos zho gliladz zho mine nac Xtiidz me. Sca zhubnee lo Xtiidz me, zaatne rnee: "Zha ne biaanwenle lo Dios, ib zrieelo gbannie zho me, sacne dib zdoos zho rliadz zho mine nac Xtiidz me."

Xtolmiech

¹⁸ Ndionle ne ganle no guielne ro ne csiaab Dios yгаа grëse miech ntseeb, miech ne nëd gac-wen, ni desde gbaa cxeel me guielne ne yгаа zho; sac por xquielntseeb zho rsaand zho gacnañ grëraa miech mine nac diidzli.

¹⁹ Grë zha ntseeb, nanle zho zha nac Dios, sac mezhall blu lo miech zha grielo gunbey zho me.

²⁰ Niicle ne grielod ganlo ne Dios, per de lo grëtaa ncuuane bzaa me, grëtaa ncuuane run me, gase rlu ganle cho nac me. ¡Gase rlu ne nli me nac Dios, ni gdziñ dze ne lozh xpoder me!

Gacxe waa grë zha ntseeb, ib tedlaad zho lo guielne ne csiaab me ga;

²¹ sac gon niicle nanpaa zho me nac Dios, ni ib rond zho xtiidz me. Nëd zho gunbey zho me zigne rieguiala, niicle xquizh nand zho gdeed zho lo me. Laa ne rzac zho na rien zho pe run zho, lel pcow xquielrien zho; rzac zho na lëew ga, gun zho ncuuane guiaabtaa guic zho.

²² Niicle ne rzac zho zharieñ zharac nac zho, per zha nac miech ne quialoozhraa lo xquieln xen;

²³ sac gon laa ne gunbey zho guielndzon ne rap men ne nacpaa Dios nguianban, lel rsilo zho rzaa zho grë mdio ne niaa zigne rlu samiech guidzliu zho, grë mdio ne niaa zigne rlu grë ma ne rsiibe, grë ma ne rzë tap ni, grë ma ne rzëlen lo liu; lel grë ncuuan

co ziegan zho laa ne gleynie zho men ne nacpaa Dios.

²⁴ Mincoocxe nagon waa, rsaanladz Dios zho laa zho zienal gre ncuaañe ndzinlid ne rzoobladztaa zho. Gre ncuaañe ntoladzdox ne run zho, leëque zha runnguzee zho rguitnie zho xcuerp zho.

²⁵ Sac laa ne gleynie zho diidzli mine rnabey Dios, lel mine rnee zha ne rquidie rleynie zho; lel gre ncuaañe bzaale Dios, ncuaañe psanle me, ncuaañ co ziegan zho, lo gre ncuaañ co ziequitsgzhib zho; laa ne yquitsgzhib zho, gleynie zho men ne nac Dios mban, men ndzon ne psan gretaa ncuaañe no. iDiosse rieguial gunnon miech, men co rieguial tibaque goolnie zho! Sca rieguiala.

²⁶ Ne sca nagon nac zho, gane psaan Dios zho laa zho run gre guelyozh, ncuaañe ngubeeguelto ne rieguialdraa gun miech. Gre wnaa laa ne gdeed zho diidz gnee tsieel zho lo zho, lel leëque sawnaa zho rquiangob zho, laa zho zienal gretaa guelyozh;

²⁷ gregeaa mguì, laa ne gnee zho lo wnaa ne nac tsieel zho zigne biaan no gaca, lel leëque sabgui zho rzoobladz zho. Ncuaañe mbixladz run zho, rquiangob zho leëque sabgui zho; ni ne sca run zho gre ncuaañ co, leë mine rdziniaa zho nac gre guelguidz yozh ne riaan lad zho; ndzinlidraa rac zho.

²⁸ Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaan lo gre zhgab yozh ne no guic zho, no zdox zho, min co ne scataa nac zho.

²⁹ Nroobdoo nac xtol zho, sac: rsacsixuu zho samiech zho, rzoobladz zho ncuaañe quianied zho, racntseeb zho lo samiech zho, nē rac zdox zho ran zho stib noded samiech zho,

rut zho samiech zho, rtsidil zho samiech zho, rquidie zho samiech zho, rquiadiidzguizh zho samiech zho, miech yozh nac zho,

³⁰ rneenē zho samiech zho, rquiabro zho lo samiech zho, racniats zho lo samiech zho, rlu zho ncuaañe rapd zho, ncuaañe nacd zho;

rlēēnie zho Dios, rio zho rbeebeey zho gre guelntseeb, rond zho xtiidz pxoz zho, rond zho xtiidz xniaa zho,

³¹ racladz zho gon zho diidz, rund zho mine rnee zho, rleyniend zho samiech zho, rund zho samiech zho perdon, rquiad zdox zho samiech zho.

³² Niicle ne nanpaa zho zha rnabey Dios none gban miech, niicle ne nanpaa zho grese

zha ne run guelntseeb, ib tedsod znitlo zho; ni laa zho bii quiayuna, ni haxta rley zho ran zho cho gretaa zha ne run gre mine run zho.

2

Xquielwxtis Dios

¹ Ib tedsod no to gnē: “iZha ntseebttaa miech ne sca run!” iPer gni naa lo to ganle, zigtaa zhaw, zigtaa tow, lalga ntseeb to gre to! Sac ye to gon run gre guelntseeb co, gacxe waa, zha ne rzac rieguial zha co yгаа zho guelne ne csiaab Dios, ye zho rieguial min co.

² Ndion ne ganle Diossi zeene laa me gun guelwxtis, grese zha ne sca zienal guelntseeb, ib tedsod zunquizh me zhow.

³ Zha ne sca rlozhd gzee zdox pe quiayun stib zho, haxta rlisqui zho mine quiayun zha co, ni yeque zho quiayuna; masaque nan zho nagon zdedlaa zho zeene laa Dios guiaadgun xquielwxtis me, masaque nan zho zha cose nitlo, laa zho tedlaa.

⁴ None guien zho ganle pa lotaa nquialadz Dios zho, pa lotaa noyap me zho paciens noxecw me gretaa ncuaañe run zho; sac laa me quiambēz csaan zho xquielntseeb zho, yguudz zdox zho gban zho zigne rnabey me.

⁵ Telne tibaque squi ndip gac zdox zho, gond zho mine rnabey me; gacnan zho ganle, quiayunloraa zho gre guelndox ne yгаа zho gal dze ne laa me gun guelwxtis. Ni xquielwxtissi me, zigne rieguial gaca sca gun mew.

⁶ Gal dze co, laa me gdeed mine rieguial yгаа tib tib miech tel zha wban zho.

⁷ Grese zha ne guēynal beennon zho le me, pxobnen zho xquielndzon me, guēynald zho gre ncuaañe rnitlo, lo zha co gdeed me tib guelmban ne gdzind dze lozh.

⁸ Sangue gre zha ne guēynal loxaque gre zhixco zho, guēynal zho gre guelntseeb, laa ne nienal zho mine nac diidzli; zha co yгаа grese zhan ne csiaab me.

⁹ Ga nagon, grese zha ne run guelntseeb, zigtaa zha Israela, zigtagaa zha stib guiedza, ible zгаа zho tib guelndox;

¹⁰ sangue gre zha ne rban zaacae, zigtaa zha Israela, zigtagaa zha stib guiedza, ible zгаа zho lo xquielndzon me, zunnon me zho. Ni led yedraa ga pe zhgab ctseb zho.

¹¹⁻¹⁵ Grese zha ne gunctal xtol, tel chotaa nac zho zunquizh Dios zhow; sac tel me, led yed me cue. Zig nac gre zha ne beenbeyd xley me, zunquizh me zho gre xtol zho; sac niicle ne gocnandpaa zho zha naca, per len zdox zho, guic zho, nanpaa zho pa min nac guelntseeb, pa mingaa nac guelwen. Rieequiacxe waa runbeyle zho xley Dios ga. Scaquegaa zha Israela, ne nac zho zha ne runbeypaa xley Dios, zunquizhaque me zho gre xtol zho; sac niicle ne runbeypaa zho xley

me, per tel lozh ga mband zhow. Nanpaa zho pa min wen, ni tel lozh ga rond zho diidz gun zhow; sac gon, led-xe por ne gacnandse ne ley waa laa Dios ycaaniale ne, sinque none gban new.

¹⁶ Zdziñ tib dze, zeene laa Dios cxeel Jesús, gunquizh me miech grëse dol ne been zho tib tib zho, niicle mine mazdraa rzac zho ngeuets zhliian been zho; sac sca rnabey Dios gaca, ni min co noseed naa miech.

Zha Israel ni xley Moisés

¹⁷ To ne nac to zha Israel, rzac to zienalpaa to xley Moisés, niats rac to, rzac to tose non lo Dios.

¹⁸ Nanwen to zha racladz Dios gban to, nanpaa to pa min wen sac pseed to xley me.

¹⁹ Min co masaque rzac to to cseed zha ne no lo ncow, grë zha ngoopdol.

²⁰ Masaque rzac to to rienraa zha cseed to grë zha ne peet gacd, to rienraa zha quixbiini to grë zha ne peet riend; sac rzac to ne nan to ley, tose nac zha ne ndziibraa nixbiini, tose nan mine nacpaa diidzli.

²¹ Nana, tel scataa rien to zha cseed to stib miech, ÷pe nac dzigo rwide to mine run to?

Conque to name rnee lo miech cuand zho, ni rlozh ga toque quiaiban.

²² Rseed to miech rnee to, tib zha ne nole tsieel, nodne yquiangob zho stib zha ne led tsieeld zho; ni rlozh ga toque noyun min co. Rnee to, rdziguiende to grë mdio, ni rio to riebhan to yadoo ne zob grë mdio co.

²³ Rlozhd gacniats to rzac to quiaayunnon to lë Dios ne nan to ley, ni nandë to gon, lel quiauguinie to lë me ga, sac mbande to zigne nac ley.

²⁴ Mine noyunpaa to i ga gon raquiet lo Xtuidz Dios, zaatne rnee: "Por xtol to, grë zha zit laa zho rneenë Dios."

²⁵ Tel to, rzac to porne nacle to zha Israel non to lo Dios, per ne squi mbande to zigne nac xley me, nacaque to zigne nac grë zha zit ne runbeyda.

²⁶ Nana, zha zit ne rioxco rban zigne nac xley me, ÷niacxe rieguiald dzigo guianzniu zho lo Dios? Sanzniu me zho gon.

²⁷ Golgacnan sca ganle, glöle zha zit co gon guianzniu lo Dios, lëdle to ne nanpaa to zha racladz Dios gban to, nanpaa to mine psan Dios diidz yгаа to, ni rbande to zigne rnabey me.

²⁸ Golgacnan sca ganle, led porne nacdse to zhin zha Israel, porne bio to xbey zho, laa to nziuule lo Dios.

²⁹ Led scada gon, sinque zha ne nli dib zdoo rioxco mine rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlpaa dib zdoo, dib guic, rban zigne racladz me. Grëse zha ne znu nac, nziuu zho lo Dios, niicle telne rzac to peet nond zho.

3

¹ Nana, ÷pa lugar nadien ne riaannon zha Israel lo grëraa zha stib guiedz? ÷Pa rquiin ne scataa rio zho bey? Zootle lëë lalaquew tel niaca mine niacd zho zha Israel.

² Per led scada, no pe nacle non zho. Sac gon, ible lo zho psan Dios xtuidz me mazd padzeela.

³ Nli ndal zho rond xtuidz me, per led mincod ctsëë me xtuidz me, mine bneele me lo zho.

⁴ Niicxe tel zharaa quiaayunctal miech xtol zho, sanque Dios ctsëëd me xtuidz me. Zigne zhubneeque lo Xtuidz me, zaatne rnee: "Mine rnee Dios, diidzli naca; niicle zha ne gacladz, guiend pe ncuaañe glisqui zho lo me."

⁵ Sca nac Dios, gacxe waa rnee me grëse zha ne runctal xtol, rieguial yгаа zho guielnë ne cxeel me. Ga nagon, rlu ne mine nac diidzli, min co run me. Nana, ÷pe ziab ne nonguield mine run me ga?

⁶ Mine nonguiel ga gon run me, sac tel gdziguien me grë zha ne runctal xtol, ÷zha naczhe guielwxtis ne dzigo gun me?

⁷ Nana, nogaa zho gnë, ÷per pe nacle glisqui Dios dol ne rdziun ne, ni tel por lëëw rlu ne diidzli nac mine run me?

⁸ Per telne sca naca, rriequia dzigo ib none gunctal ne xtol ne parne yquiaraa zdoo me ne. Ni nzian zha ne nobee xquielto naa, rnee zho ib min co noseed naa miech. Ni zha ne sca rnee, ib tedlaad zho lo guielnëdox ne rieguial zho.

Grëse miech, ngoopdol nac zho

⁹ Nana, ÷pe zdzieets ne dzigo ne nac ne zha Israel, nziuura ne lo grëraa miech stib guiedz? ÷Led scada gon! Niina blozh bzeet naa lo to, grëse ne ngoopdol nac ne, zigtaa zha Israela, zigtaga zha stib guiedza.

¹⁰ Zigne zhubneeque lo Xtuidz Dios, zaatne rnee:

¡Guiend miech ne zienalpaa mine racladz Dios!

¡Ni tib zho guiend!

¹¹ Guiend zha ne niini guic; guiend zha ne tsoxco yguib xnëz Dios.

¹² Grëse zho laa zho zie nëz ne nitlo zho; niapse guielntseeb zienal zho.

¡Guiend zha ne zienal mine racladz Dios!

¡Ni tib zho guiend!

¹³ Ro zhow,

masaque been cuent naca zig nac len grë baa ne noyodz ngutoo;

niapse diidz ne rquidie zho zhoob lo ludz zho.

Grë diidz ne rnee zho,

masaque naca zig nac xvenen grë meel dox;

¹⁴ niapse grë diidz dox, niapse grë diidz në rrieche ro zho.

¹⁵ Ni zhow,

masaque zombëzlew dien pa tsiegut zho samiech zho;

¹⁶ loxaque guie_lnë, loxaque guie_lzi rsan zho zaatne rded zho.

¹⁷ Ib nand zho ne zaacse gbannie zho samiech zho;

¹⁸ per ni Dios rdziebdraa zho.

¹⁹ Gacxe waa nroob nac guie_lnëdox ne ygaa grë zha ne runbey ley ni mband zho zigne naca, le_l run zho grëtaa guie_lntseeb zig nac grë minë goquiet nu. Ni niicle grëraa miech ne runbeyd ley, scaque ngoopdo_l nac zho, ni ro zho guiend pe guiab zho lo Dios.

²⁰ Golgan sca ganle, grieeod guiaanmbe ne lo Dios, niicle paraa yquia ne gun ne minë rnee ley; sinque par guie_n ne ganle ne ngoopdo_l nac ne, gane biaan ley.

Silaa Dios miech zeene gnalo zho me

²¹ Sangue niina, tib ladle biaan ley, laa Dios bneedz stib mod ne guiaanwen ne lo me. Ni lo grëque guits ne ziaad ley, lo grë guits ne pquiaa zha ne biadteed Xtiidz Dios padzeela, ga raquieta.

²² Grëse miech tel chotaa nac zho, tel petaa been zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

²³ Zigne rne naa ga, grëse ne miech ngoopdo_l nac ne lo Dios, ni palal rdzieeld gdzi_n ne lo xquie_lndzon me.

²⁴ Per niina laa me blu ganle pa lotaa noxco me ne, gola zdoo me pxeel me Jesús bdiizh grëse xtol_n ne, laa ne biaanwen lo me.

²⁵ Laa me been min_n co parne glu run me guie_lwxtis, sac niicle bdizhd ne xtol_n ne, per pxeel me tib men ne bzhiee xchen bdiizha xcuent ne, lëë men co nac Jesús; gane niina grëse zha ne gnalo men co, zun me zho perdon grëtaa do_l ne pxeew me been zho.

²⁶ Ni tib do_l rapd me, ni scaque grë zha ne dib zdoo gnalo Jesús, sanmbe me zho lo xtol_n zho.

²⁷ Sca nagon psilaa Dios ne lo do_l. ¿Cho nadien gacniats ga? Ni tib choot gacd gacniats, sac led por minë bdziuund new, sinque por grëtaa minë bded Jesús.

²⁸ Gocndion ne sca ganle: Niapse por dib zdoo miech gliladz zho Jesús, laa Dios ycaania zho; nacda por tso zho gun zho minë rnabey ley.

²⁹ Nana, ¿pe zha Israelse sca ycaania me? ¡Lëda gon! Grëse miech, sca ycaania me zho.

³⁰ Sac gon tibeyse ran Dios ne grëse ne; zigtaa zha Israela, zigtagaa zha stib guiedza, sanmbe me ne lo grë xtol_n ne, totsaque dib zdoo ne gnalo ne Jesús.

³¹ Nana, ne znu rcaania Dios ne, no zho sac rquiindraa ley. ¿Zha yquiind-zhew? Niinale ne znu dib zdoo ne rililadz ne Jesús, rienraa ne pa rquiina.

4

Dib zdoo Abraham bnalo me Dios

¹ Zig nac pxozgoldoo ne Abraham, ¿pe been me ne laa Dios pcaania me?

² ¿Pe por guie_lwen ne been mew? ¡Lëda! Telne scaw, nrieeo niacniats me (niicle ne nëz lo Dios ni palal rieguiald niacniats me).

³ Sac gon rnee lo Xtiidz Dios, ne dib zdoo me bliladz me Dios gane pcaania Dios me zig tib zha ne peet xtol_d.

⁴ Zig nac tib zha ne run dziin, dimi ne razh zho ible rieguial zhow, rate zhow ga.

⁵ Sangue Dios zdoo me ral rcaania me miech, zha ne dib zdoo rnalo me, nacda por pe guie_lwen ne gun zho par guiab ne laa zho rieguiala.

⁶ Ye rey David bzeet guie_lbley ro ne rgaa zha ne sca rcaania Dios,

⁷ rëb David:

¡Wen zie zha ne run Dios perdon!

Niicle nroob guie_lntseeb ne been zho; tel pe nactaa xtol_n zho, glisquidraa mew.

⁸ ¡Wen zie zho sac gunquizhdraa me zho grë xtol_n zho!

⁹ Nana, ¿pe loxaque grë zha ne nose bey zrieeo ygaa guie_lbley co, te ye grë zha ne nada ye? Nacda por bey, laa ne blozh bzeet ganle niapse ne dib zdoo Abraham bnalo me Dios, min_n co ne pcaania Dios me zig tib zha ne peet xtol_d;

¹⁰ sac gon gard pe bey ne tso me zeene pcaania Dios me.

¹¹ Pcaaniale Dios me dzigoraa bio me bey. Lega laa me biose bey co, zeena glu ne laa Dios pcaaniale me porne dib zdoo me bnalo me Dios. Min_ncocxe waa, Abraham nac dad lo grëse zha ne nod bey, ni dib zdoo zho rnalo zho Dios; ni scagaa Dios, rcaania me zho zig tib zha ne peet xtol_d.

¹² Ni meque nac dad lo grë zha ne no bey ni dib zdoo zho rnalo zho Dios, zigne bnalo me Dios zeene gard tso me bey co.

Zha goc minë bnee Dios lo Abraham

¹³ Psanle Dios diidz lo Abraham ne me guiaan_nie guidzliu, grë me zha ne grieequiaraa lo xti_n me; guiabd ne togo porne been me minë nac xley zha Israela, sinque ne dib zdoo me bnalo me Diosa.

¹⁴ Nana, tel niaca zha ne rnee minë nac ley, zha cose ygaa min_n co, rrieequia dzigo zhlëse ga bnalo Abraham Dios, niicle diidz ne psan_n Dios lo me ga, nondaqew.

¹⁵ Sac nac ley gon, zha ne gunda zigne naca, laa Dios csiaabzi zho; laa zaatne guiend_nga ley, gacd guiab zho cho noguiitsa.

¹⁶ Ne scacxe waa nac ley, gane niina lëëse minë no gun ne nac dib zdoo ne gnalo ne Dios par ygaa ne minë psanle me diidz ga. Grëse ne ygaa min_n co, per nacdraaw dien cho zienal_n ley, cho zienaldgaaw, sac minë nonraa, dib zdoo ne gnalo ne Dios zigne

bnalo Abraham me. Miñcocxe waa, rrieequia Abraham nac pxoz ne grëse ne,

¹⁷ zigne rëb Dios lo Abraham: "Laa naa bzo luu, luu gac dad lo nzian dii miech." jLëë Dios co nagon biladz Abraham, me rbeeban grë mengut, ni niicle haxta grë ncuuaane guienđ, saa mew!

¹⁸ Ndaldox rëb Dios gac lo xti Abraham, ni biladz Abraham miñe rëb Dios ga. Niicle ne zootle led ncuuaane gacda, per me dib zdoo me biladz me ne zaca, ni scagaa bdzin dze ne laaw goc.

¹⁹ Tibaque bnalo me Dios, niicle ne lala ziele xtse me (zig tib gayoole iz me), ni lala tsiel me Sar, nacd me wnaa ne gap mëëđ.

²⁰ Ib goc chopd guic me niab me bod nliđ niac miñe bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios,

²¹ sac nanpaa me men nroob nac Dios zun me miñe psan me diidz ga.

²² Ne sca nagon dib zdoo me rnalo me Dios, gane pcaania Dios me zig tib zha ne peet xtold.

²³ Zhobnee lo Xtiidz Dios sca pcaania me Abraham, ni laaw zhobnee zeena gacndion ne

²⁴ ye ne scaania me ne zig tib zha ne peet xtold, totsaque dib zdoo ne gnalo ne Jesús, men ndzon ne rnabey ne;

²⁵ men ne gut ga bdiizh me xtol ne, men ne brieeban ga, par glu me nli psanme me ne nëz lo Dios.

5

Jesús rsanme miech lo dol

¹ Nasi laa ne nacle zig zha ne peet xtold, laa ne biaanwenle lo Dios porne dib zdoo ne rnalo ne Jesús, men ndzon ne rnabey ne.

² Sac por grëtaa mine bded Jesús, laa ne bgaa guiełnzaac rii nacie me ne, ni ib csaand ne me. Tib guiełbley nrooba lo ne, sac ndionpaa ne ib zgaa ne lo guiełndzon ne no me.

³ Ni scaquegaa nagon none gley ne zeene pe guiełnë ne nodzian ne; sac ndion ne ganle, ga cseed ne lëb ne dziits so ne lo miñe rliładz ne.

⁴ Ni zeene sca dziits so ne, zliładzraa ne dib zdoo ne; ni zeene dib zdoo ne rliładz ne, zacannpaa ne ib zgaa ne miñe rliładz ne.

⁵ Ni ndionpaa ne zgaa new, sac blu Dios rleynie me ne, pxeel me Espiritu Sant nacie ne.

⁶ Lëëtaaque zeene rdzieldraa miech zha guñ zho par guiaanme zho lo dol, hor co laa Dios pxeel Jesús, biaad me gut me bdiizh me xtol ne nac ne miech ngoopdol.

⁷ Ndion ne ganle, niicle tib miech ne peet xtolda, tib miech ne mazdraa wena, led lega grieequiad tib zha ne cueeladz xquiełmban guet por zha.

⁸ Sangue Dios gon, niicle ne miech ngoopdol nac ne, blu me ganle pa lotaa nquialadz me ne, pxeel me Xpëëđ me Jesús, men co bleeladz xquiełmban gut me xcuent ne.

⁹⁻¹⁰ Gotsaa gwi ne ganle, zha nactaa guiełnë ne bded Jesús psanme me ne lo xtol ne, psanwen me ne lo Dios; ni scaque nagon, ible me csilaa ne lo grëtaa guiełnëdox ne csi-aab Dios ygaa grë miech ntseeb. Ne nligaa, csaand me dzian ne guiełnë co; sac gon, tel scataa mine been me por ne zeene nac ne tib miech ngoopdol, zeene scataa ntseeb goc ne blëënie ne Dios, çpe leł na dzigo ne laa ne biaanwenle lo Dios, laa ne biaanle zig tib zha ne peet xtold?

¹¹ Gacxe waa, niina ne psanwen Jesús ne lo Dios, none ine gley ne ne laa ne ngable lo Dios.

Zha nacne biaan dol

¹² Znu gon nacne laa dol biaan: por miñe been Adán bind me xtiidz Dios, miñ co nac ne biaan. Ni por lëëw pquiaqui laa guiełgut biaanaque, blozh ga grëse miech laa zho ret, sac grëse zho, tsod zha ne gunctald xtol.

¹³ Desde hor co biaan runcal miech xtol zho. Grëse miech ne bre lo guidzliu, desde Adán haxta leñ dze ne laa Moisés pcaania ley, beenctal zho xtol zho, niicle ne guienpaa tib ley hor co nlu ne dola.

¹⁴ Gacxe waa ye zho, grëse zho gut; niicle ne bdiitsd zho merpaa xtiidz Dios zigne been Adán.

¹⁵ Nli tib guiełnë ga psan Adán, per ninagaa mazdraa nroob guiełnzaac ne rneedz Dios lo ne. Por falt ne been Adán, biaan grëse ne ne nac ne miech laa ne no guet; per niina ne biaad stib men ne beenđ ni tib falt, por miñ co laa Dios rquia zdoo ne grëse ne, laa me rneedz tib guiełmban ndzon lo ne; lëë men co nac Jesús.

¹⁶ Tibaque nac dol co been Adán, per grëse miech biabzi; sangue Jesús zeene laa me biaad, grëse ne ne nac ne miech psilaa me ne lo grëtaa xtol ne, psanwen me ne lo Dios.

¹⁷ Dol ne beense Adán ga, miñ co pquiaqui grëse ne ne nac ne miech, laa ne biaan ladznia guiełgut; sangue niina ne biaad Jesús, zrieelo ygaa ne tib guiełmban ndzon. Guiełmban ne ral zdoo Dios gdeed me lo grëse zha ne gbig lo me guñ me zho perdon.

¹⁸ Sca nagon naca: por falt ne been Adán ga, grëse ne ne nac ne miech laa ne biabzi, per zeene laa Jesús biaad, pquia zdoo me ne masaque me bdiizh grëse caxtigw ne riogual ne ga, laa me psanwen ne lo Dios parne grieeolo ygaa ne tib guiełmban ndzon.

¹⁹ Golgan ganle, porne bdiits Adán xtiidz Dios, grëse ne ne nac miech laa ne goc zha ngoopdol; per scagaa, por bzoob Jesús grëse xtiidz Dios, zha ne gacladztaa, zrieelo guiaanwen zho lo me.

²⁰ Ible laa ley biaan, par glu ganle pa lotaa nac grë falt ne noyun miech lo Dios. Per niicle scataa nac grë dol co, per blu Dios ganle mazdraa rquia zdoo me miech.

²¹ Masaque rnabey dol miech, pxeela zho nêz ne nitlo zho; sangue zeene laa Jesús biaad, psanwen me ne lo Dios, gane niina zha ne gnalotaa Jesús zgaa zho tib guielmban ndzon.

6

Zha ne mbanniele Jesús

¹ Laa ne bdzianle ganle zha noxcotaa Dios ne. Nana, ¿pe zdzieets ne dziuunctalraa ne xtol ne zeena tosoxcoraa me ne?

² ¡Lëdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nêz lo dol.

³ Golgan ganle, zeene laa ne bziaab xnêz Jesús ni brobnis ne, rrieequia gut ne ga zigne gut me.

⁴ Zeene brobnis ne rrieequia bioliu ne ga, zigne bioliu Jesús. Ni zigne brieegan Jesús (por poder ndzon ne rap Dios), scaque ne rrieequia brieegan ne, stible guielmban ne rdziaap ne.

⁵ Ni zigne sca rrieequia gut ne zeene gut Jesús, scaquega ndionpaa ne zbeegan me ne zigne brieegan me.

⁶ Ndion ne ganle, miech ne goc ne lo zeene scataa bional ne guielntseeb, rrieequia ye miech co pquianie me lo cruz. Ga bnitlo mine goc ne ga, zeena ygadoodraa ne lo dol;

⁷ sac gon, deque bnitlo grë mine goc ne glo, grieelodraa gnabey dol ne.

⁸ Nana, telne scale gutnie ne Jesús, ndionpaa ne ib zbannie ne me.

⁹ Ndion ne ganle brieegan Jesús, ni gdzindraa dze guet me. Grieelodraa pe gun guielgut me.

¹⁰ Tibaque vuelte gut me bdiizh me xtol grëse miech, sangue niina mban me ni Dios mbannie me.

¹¹ Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

¹² Nana sca, gdeetraa to diidz gnabey dol xcuerp be to i, tso to gun to grë ncuane ndzinlid ne racladz xcuerp to.

¹³ Ib gdeete to diidz guiab to lo dol stib, gun to grë guielntseeb; sinque golsan to ladznia Dios, ine golgun grë mine racladz me. Golguien ganle, laa to gutle lo grë dol, Diosle mbannie to niina;

¹⁴ zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne.

¹⁵ Per nana, ¿pe ne rnabeydraa ley ne, ne nquialadz Dios ne dzieets ne dziuun ne grëtaa ncuane gunctal xtol ne? ¡Lëda ga gon!

¹⁶ Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtol.

¹⁷ Nli glo lo dol ngadoo to, per xquizh Dios zeene laa zho biadseed to Xtuidz me gocnan to zha laa to lo dol, laa to bliladza ni noxco to mban tow niina.

¹⁸ Ni zeene laa to brieeg ladznia dol, laa to bgab lo Dios; zeena mine rnabeyle me mincole gun to.

¹⁹ Znu bzet naa grë min rii lo to, zeena guien to zha naca.

Nana sca, zigne scataa bio to ladznia dol been to grëtaa guielyozh, grëtaa guielntseeb, scagaa niina golsan to ladznia Dios, golban zigne rnabey me, zeena lozh guiaanmbe to zigne racladz me.

²⁰ Zeene scataa ngadoo to lo dol, ib wbande to zigne rnabey me.

²¹ ¿Pe nadien needz dol lo to? Lëe gdib mine ngaa to laa to nitlo. Zig nac niina, haxta rtoladz to zeene rsoladz to grë ncuane been to hor co.

²² Sangue niina, ne laa to brieeg ladznia dol laa to ngab lo Dios, ible ziaanmbe to zigne racladz me ni zgaa to tib guielmban ne gdzind dze lozh.

²³ Sac gon, zha ne runctal xtol, lëe gdib mine tsieguial zho laa zho nitlo; sangue zha ne gbig lo Jesús, mine ral zdoo Dios ygad me lo zho nac tib guielmban ne gdzindraa dze lozh.

7

¹ Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

² Zig nac tib mgui ne rtsieelnia, rnabey ley ne mguise gbannie wnaa ne nac tsiel mgui. Per tel zgoob ne glo mgui guet, dzigo gacdraa gnabey ley ne mguipaa gbannie wnaa co; telne gacladz zho ctsieelnia zho stib mgui, zaca.

³ Nli nonguielga ga gun wnaa ctsieelnia zho stib mgui laga bii zomban tsiel zho; laa zeene gutle tsiel zho, led doldraaw yguib zho stib zha ne ctsieelnia zho.

⁴ Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoodraa to lo ley, niicle lëegaaw grielod gnabeya to. Jesús, men ne brieegan ga, mele nac tsiel cub to niina. Ninasi, zrieelele gban to zigne racladz Dios;

⁵ sac glo (zeene scataa bdziunŋctal ne xtoł ne, bdziunŋ ne grêtaa ncuaaŋe nonguiel)draa niicle ne ndionŋpaa ne pe nac miŋe zhonee le ley no dziunŋ ne), niapse grê ncuaaŋe nxeel ne zaatne nitlo ne, ncuaaŋ co bdziunŋ ne.

⁶ Blactaa bgadoo ne lo ley, saŋgue niina rriequia gutle ne nêz lo ley, laa ne mbanle zigne rnabey Espiritu Sant.

Rca doł gac miŋe rnabey ley

⁷ Nana, ¿pe zdieets ne dzigo por leypaa rdziunŋctal ne xtoł ne? ¡Coo, led scada! Teł naa gon, ib niacnaŋd naa pe nac doł telne guiend ley. Niacnaŋd naa ne doł ga gzoobladz ne chen ben, telne niacnaŋd naa ne rnee lo ley: "Gzoobladz luu chen ben."

⁸ Zeene gocnaŋ naa zha nac ley, dzigora a bien naa niapse doł nac miŋe noyun naa; sac zeene guiend ley, rlud pe nac doł.

⁹ Glo zeene rienŋd naa zhapaa nac ley, tibaque rzaac naa ib peet doł rapd naa; per zeene gocnaŋ naa zha nac ley, bien naa ne ib raguial naa nitlo naa, sac doł quaiyun naa.

¹⁰ Nli laa ley biaan zeena guiend ne zha grielo ygaa ne guielmban, per leł bluw ne raguial naa nitlo naa sac ngoopdoł nac naa.

¹¹ Ne nligaa bdziitnie doł naa, miŋe rsojaa ley diidz nod guŋ miech mincopaa ben naa; ni blozh ga, lêêque ley blu ne ib raguial naa nitlo naa.

¹² Niicle ne scaw, per Dios psana ni rquiin grê miŋe zhonee low.

¹³ Nana dzieets ne: conque telne wen nac ley, zha nac dzigo ne lêêpaaw rlu ne rioguiel ne guet ne? ¡Coo, led scada! Sinque znu naca: doł pteedquie ne lадznia guielgut. Ga rlu ganle zha nactaa doł, sac gon lêêque ley pquiu doł pteedquiew ne lo guielgut. Ga blu ley ganle zha ntseebtaa nac doł.

¹⁴ Gotsaa gwi ne ganle wen ley, led leyd rxin sinque ne rxin; sacne rriequia ngadoo xcuerp ne lo doł.

¹⁵ Teł naa, rienŋd naa pe nacne znu rac naa, niicle ne racladzpa a naa guŋ naa ncuaaŋe nonguiel per nêda, leł ncuaaŋe rzoobladz naa miŋ co ruŋ naa.

¹⁶ Grê ncuaaŋe ruŋ naa, now rienŋpaa naa nonguiel)da; haxta guic naa, zdoo naa, rien naa wen ley sinque naa quiaquits miŋe rnabeya.

¹⁷ Nana, niicle ne rienŋ naa scaw per gacd pe guŋ naa, sac ngadoo xcuerp naa lo doł, masaque doł rcheep naa ruŋ naa ncuaaŋe ndzinlid.

¹⁸ Rien naa miech ngoopdoł nac naa, ni palal ncuaaŋe ndzinli gacd guŋ naa; niicle ne racladz naa gac-wen naa, per rrieeloda.

¹⁹ Zeene racladz naa guŋ naa ncuaaŋe rquiu, per rrieelod guŋ naaw; laa zeene

ni naa guŋdraa naa ncuaaŋe ndzinlid, leł mincole ruŋ naa.

²⁰ Ni ne znu leł grê ncuaaŋe racladz naa, miŋ co ruŋ naa, gasé rlu ne led naadse quaiyun grê ncuaaŋ co; sinque doł quianabey xcuerp naa ruŋ naaw.

²¹ Rien naa niicle ne racladzpa a naa guŋ naa ncuaaŋe wen, per leł guielntseeb ruŋ naa.

²² Zdoo naa, guic naa, rleynie naa Xley Dios, racladz naa gban naa zigne rnabey me;

²³ per dzigo rtse doł lo naa, rrieelod guŋ naa ncuaaŋe nonguiel. Masaque doł rnabey xcuerp naa, racladzda guŋ naa ncuaaŋe rnabey Dios; sac ngadoo xcuerp naa lo doł.

²⁴ ¡Xprobsaxe naa, znutaa nac xcuerp ngoopdoł naa nu! ¿Cho samiech ne dien grielo csilaa naa low; sac ncuaaŋe gnitlo naa miŋ co mazdraa rdziladza?

²⁵ ¡Xquizh Dios pxeel me Jesús bиаad silaa me ne lo doł!

¡Jesús nac meŋ ne psilaa naa!

(Znu nagon rzac naa: rienŋ naa nonguiel guŋ naa miŋe nac Xley Dios, per xcuerp naa leł laaw zianał miŋe rnabey doł.)

8

None gban miech zigne racladz Espiritu Sant

¹ Laa ne gocndion nasca ganle, zha ne ngab lo Jesús ndziibdoł)draa zho,

² sac zha ne ngab xnêz me, laa Espiritu Sant psilaale zho lo doł, laa me psilaale zho ladznia guielgut, laa me bdeedle tib guielmban cub lo zho.

³ Wlaltaa ib brieelod ley nsilaaw ne lo doł, gane mazd laa Dios pxeel Xpêed me bиаad silaa ne. Brieelod ley, sac grêse miech laa ne tsianał zho miŋe rnabey ley, mazdraa zianał zho ncuaaŋe runctal xtoł zho. Gane zeene pxeel Dios Xpêed me, goc me miech (lêêraasi ni tib doł beend me), meŋ co gut bdiizh grêse xtoł ne, dzigo ga laa me psilaa ne ladznia doł.

⁴ Gacxe waa, niinasi zrieelo dziunŋ ne grê miŋe rnabey ley, per none gdeed ne diidz guionał ne miŋe rnabey Espiritu Sant, ni lalnu gdeete ne diidz gac miŋe racladz xcuerp ne nu.

⁵ Grêse zha ne mban zigne racladz xcuerp ngoopdoł zho, loxaque grê miŋ co rioxco zho; laa zha ne mban zigne racladz Espiritu Sant, miŋe rnabey Espiritu Sant rioxco zho.

⁶ Zha ne sca rioxco loxaque miŋe racladz xcuerp ngoopdoł zho, nêz ne nitlo zho ga zie zho; saŋgue zha ne rioxco miŋe racladz Espiritu Sant, laa zho zie nêz ne ygaa zho tib guielmban; peet dzeb, peet zhgab ctsebdraa zho.

7 Ni stiba, zha ne rioxco loxaque mine racladz xcuerp ngoopdol zho, rlëenie zho Dios ga, sac nëd zho gban zho zigne rnabey xley me; ni niicle gacladzga zho, grieelod zho.

8 Mincoxce waa, ib rzacd zdoo Dios grë ncuaañe ruñ zho.

9 Sangue to, mbandraa to zigne racladz xcuerp to, sinque laa to mban zigne racladz Espiritu Sant. Sca mban to, sac Espiritu Sant nacie to. Nanle to ganle zha ne nacieid Espiritu Sant, nliid xnëz Jesús no zho.

10 Ni to ne nac to zha ne nole xnëz Jesús, ible zgaa to tib guiełmban ndzon, sac laa Dios psilaale to lo dol. Nli zig nac xcuerp to, ncuaañe nitlo naca, sac por dol biaan sca no gaca; sangue zhiEspirituw, nitloda.

11 Dios bleeban Jesús, ni scagaa telne nli nacie to zhiEspiritu me, meque cueeban to.

12 Bets, bzian, nodne dziuun ne ncuaañe racladz xcuerp ngoopdol ne, zig nac zeene pe nzëeb ne low.

13 Sac telne grë ncuaañ co tsienal to, ible znitlo to; sangue telne gnab to gacnieñ Espiritu Sant to csaan tow, dzigo ible zgaa to tib guiełmban.

14 Sac grëse zha ne zienal zigne racladz zhiEspiritu Dios, ga rlu ne nlipaa xpëed Dios nac zho.

15 Golguien ganle, laa Dios bneedz zhiEspiritu me lo to, sac xpëedle me nac to niina. Tsode to sca gdziebd to me, zig nac zeene cho tib ngundziin win nac to lo me. Xpëed me nac ne, gacxe waa zac tibililadz gnee ne lo me guiab ne: "Papá yeeñ!"

16 Ni Espiritu coque ruñquien ne ne nli xpëed me nac ne.

17 Nana ne laa ne nacle xpëed Dios, scagaa dzigo ye ne ible zgaa ne grëtaa ncuaañe bdeed me lo Jesús.

Nli zgaa ne lo grë guiełndzon ne no Jesús ga, per scagaa nonë dzian ne grë guiełnë niina ne laa ne ngab lo me.

Guiełndzon ne naraa guiaad

18 Guiełnë ne dzian ne lo guidzliu rii, loxaque ne ngab ne lo Jesús, led ncuaañe rnad ga; mazdraa nroobdo nac lo guiełndzon ne naraa dzian ne.

19 Zig nac grëtaa ncuaañe bzaa Dios, masaque quiambëznëw gdziñ dze zeene laa grë zha ne nac xpëed Dios ygaa lo guiełndzon co;

20-21 sac gon, gal dze co laa guidzliu guiaanmbe lo grëtaa ncuaañ paat rquiind, lo grëtaa guiełntseeb ne no low niina. Dios bdeed diidz biaan grë ncuaañ co low, per zeene gal dze co, zeene laa grë zha ne nac xpëed Dios laa lo grëtaa guiełntseeb, yew laaw laa.

22 Laga quiambëz grë ncuaañ co gdziñ dze co, masaque mban raca, rzaca zig rzac tib meñ wnaa ne quiayal xpëed.

23 Ni ndion ne ganle, haxta ne, ne nac ne zha ne nacie Espiritu Sant (zeena glu ne ible zgaa ne grëtaa ncuaañe gneedz me), mban rac ne quiambiaaz ne gdziñ dze co, zeene laa Dios ctsëë xcuerp rii ne ni ycaania me ne zig xpëedpaa me.

24 Ndiñ ne ible zbee Dios ne lo grëtaa ncuaañe rac lo guidzliu rii, per nana laa ne quiambiaaz dzianpaa ne gaca. Tib ncuaañe lëe ranle ne noyac, nod pe nacie yquiambëzraa new,

25 per zeene quiambëz ne tib ncuaañe naraa gac, dzigo nodne guieed ne, sinque ine tiblucque gac ne yquiambëz new.

26 Ni scagaa zeene lëbdraa ne, riendraa ne zha gun ne, Espiritu Sant nac meñ ne gacnieñ ne. Zig nac zeene gzodiidznie ne Dios, tel nesew nand ne zhapaa nonguiel gnee ne lo Dios, dzigo Espiritu Sant runcee ne grë diidz ne riend ne zha nac.

27 Ni Dios ne nac me meñ ne nanpaa pe rza zdoo miech, rien me pe rnee Espiritu Sant, sac mine racladz Dios gac miñ co rnab me.

Tsod ncuaañe yquiaaqui csaanladz Jesús ne

28 Ndiñ ne ganle, zha ne nli dib zdoo rleynie Dios, zha ne rioxco gac grë mine racladz me, grëse ncuaañe rded zho, led lega rdete zhow, sinque no zaatne rquiina lo zho.

29 Ni ndion ne ganle, zha ne nanle me ygab xnëz me, desde mazd glow, pso me zho gac zho zig nac Xpëed me Jesús. Lo grë zha ne nac xpëed me, Jesús nac meñ nroob.

30 Ni grë zha co, laa me quiabedz zho, quasilaa me zho lo dol, laa zho noyaanwen lo me; zeena ygaa zho lo guiełndzon ne no me.

31 ¡Zha nactaa ncuaañe lëe ruñ Dios! Nana, tel scataa racie Dios ne, zcho nadien grielo lega pe gun ne?

32 Golgotsaa gwi ne ganle, haxta xpëed me bdeed me gut xcuent ne, grëse ne ne nac ne miech. Nana, zpe lel grë pe stib cos dzigo yquia zdoo me nneedz me lo ne?

33 ¡Ile Dios bzooblo ne, gacxe waa, ¡choot rieguald glisqui gnë lëda nodziuun ne! Sac gon, Dioszhal psanmbe ne lo dol.

34 ¡Choot rieguald ycaadzdo! ne! Sac gon laa Jesús gutle bdiizh me xtol ne; per brieaban me, ni na laa me zob cue Dios zaatne rieguald me nac me meñ non. Ga no me quianab me lo Dios por ne.

35 ¡Tibaque rleynie Jesús ne! Zeene nodzian ne guiełnë, zeene mban rac ne, zeene rtsidil miech ne, ib guiabd ne togo bod rleynie me ne. Niicle zeene guiełdga pe gow ne, guiełd pe gacwxab ne, o

noxtseebga ne guet ne, ib guiabd ne togo psaanladz me ne. ¡Tibaque rleynie me ne!

³⁶ Ni zig nac xcuent guielgut, laaw raquietaque lo Xtiidz Dios, zaatne rnee: Grêse no ne nac no zha ne ngab lo luu, tibaque noxtseeb no lo guielgut; masaque rzac miech no zig rzac zho grê mēcwxiiil ne gollje guet.

³⁷ Niicxe peraa waa dieed ne, dzdziuun ne gan low ni palal csañwinda ne, sac Jesús nacie ne; ni rleyniedox Jesús ne.

³⁸ Nanween naa tsod ncuaañe yquiaaqui csaanladz Dios ne:

per ni guielgut,
per ni guielmban,
per ni anjl,
per ni mendox,
per ni grê ncuaañe noyac niina, grêgaa ncuaañe naraa gaca.

³⁹ Niicle grê ncuaañe no glaa zhan gbaaw, niicle grê ncuaañe no guietraa zhan guidzliuw,

niicle grêragaa ncuaañe bzaa Dios. ¡Ni tiba ycada, sac tibaque rleynie Dios ne! Ni laaw blule me ganle, zeene pxeel me Jesús (men ne rnabey ne), men ne gut bdiizh grêse xtol ne.

9

Ible Dios bzooblo zha Israel

¹⁻³ Bets, bzian, ¡blactaa racladz naa guien grêraa zha Israel cho nac Jesús! Rquianē zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nan ganle rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, telne niaca por min co laa zho guien zha gbig zho lo Dios.

⁴ Blactaa quiayacnieñ Dios zho, ni rond zho xtiidz me. Bzooblo me zho gac zho zha ne ygab lo me, haxta bzēnie me zho, gon zho ganle men ndzon nac me; biaan zho diidz grê zho me zha mod gunlay me zho. Psañ me ley lo zho zeena guien zho zha gban zho, ni psañ me diidz lo zho zha gleynie zho me. Nzian grê ncuaañe bnee me gdeed me lo zho.

⁵ Lēē pxozgoldoo zho ga goc Abraham, goc Isaac, goc Jacob, ni lo dii co ga briecequia zha ne bded zig menlidz Jesús. Me nac Dios, me rnabey grētaa ncuaañe no, ni me rieguiāl gacnon gzataa dze. Ible sca rieguiāla.

⁶ Nana, no zho guiab godcaque grê mine bnee Dios ga yгаа zha Israel. Per led scada. Sinque lēē min co rгаа zha ne nlipaa rnalō Dios, sac zha co nac zha ne nlipaa nac zha Israel.

⁷ Nacda ne loxaque ziaad zho lo xtiī Abraham, laa zho nacle merpaa zha Israel; sac

gon, niicle ne nzian mēēd pquianie Abraham, per rēb Dios loxaque Isaac gac cuent zig xpēēd Abraham.

⁸ Gase naganle rlu, zig nac niina, grê zha ne ziaad lo xtiī Abraham, led grēd zho ngab lo Dios; sinque zha ne bzooblole me zigne bzooblo me Isaac, zha co ngab lo me.

⁹ Sac zig nac Isaac, ible Dios bnee lo Abraham grop Sar, ne laa Isaac gac mēēd lo zho.

¹⁰⁻¹¹ Ni scasaque xpēēd Isaac. Bdzin dze, zeene laa Isaac ptsieelnia wnaa ne lē Rebec, dzigo gop Rebec tibnēz mēēdbgui.

¹² Bii zoney Rebec grop mēdyeen co, laa Dios bzooblole win ne brieelē Jacob rēb me, ne ible Jacob gac zha non lo Esaú, win ne glogal.

¹³⁻¹⁵ Laaw zhoobneeque lo Xtiidz Dios, zaatne znu rēb me: “Ible Jacob bzooblo naa beenlay naa, bzoblod naa Esaú.” Gard gal grop mēēd co, per ni gard gacnan win zha nac guielntseeb, zha nacгаа guielwen, laa me bzooblole tib win. Ga nagon, blu Dios ne mese nac men ne rieguiāl rzooblo tel cho zha ne ygab lo me, nacda por pe ncuaañe noyūñ zho.

Nana, ¿pe dzdieets ne guielntseeb ga sca run Dios? ¡Led guielntseebda! Tib vuelt rēb me lo Moisés: “Zha ne gacladz naa yquia zdoo naa, squia zdoo naa zho.”

¹⁶ Ga nagon, zha ne runlay me, nacda porne zha rquiaguiba, o rioxcogaa zho yгаа zhow; sinque laa zho rгаа, porne me rquia zdoo zho.

¹⁷ Gotsaa gwi ne ganle zha beenndip me zdoo rey Egipt. Lo Xtiidz me zhoobnee zeene rēb me lo rey co: “Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios.”

¹⁸ Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho.

¹⁹ Nana, no zho gnē: “Telne scaw, ¿pe nac dzigo rlisqui Dios mine run miech, tel mezhal rnabey zha nac zho tib tib zho?”

²⁰ Per nana, ¿cho nac ne par glisqui ne mine run Dios? Zig nac tib guies ben, niacxe zlisquiw lo men ne bzaaw, guiaba: “¿Pe nacne znu bzaa luu naa?”

²¹ Led zha ne run dziin co, zrieelo gzaa zho tib guies zigne gacladztaa zho; tib lē ben ne xen zho, zac gzaa zhow tib guies niow, o gzaagaa zhow tib guies beelze.

²² Scaquegaa nagon rzac Dios miech. Grê zha ne psañle me nitlo, ible rap me derech csiaabzhian me zho, glu me poder ne rap me; per laa me bii quiayap zho paciens nieeda gdzizn dze co.

²³⁻²⁴ Grêgaa zha ne bzooblo me yгаа lo guielndzon ne no me, zigtaa new ne nac ne zha Israel, zigtagaa zha stib guiedza; ible

rap me derech bzooblo me ne, sac rquia zdoo me ne.

²⁵ Gołsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grè zha ne nacd zha Israel ygab zho lo me, zeena gleynie me zho niicle ne rleynied me zho glo.

²⁶ Laa stib lugar bzeet Osé, zha bnee Dios lo zho, rëb me: "Ngabde to lo naa, per zdziñ dze ne laa to gac xpëed naa, ne nac naa Dios nguimban."

²⁷ Laa Isá stib men ne biadteed xtiidz Dios padzeela, zeene bzeet me zha Israel rëb me: "Niicle ne ndaldoo nac zha Israel pale yuzh ne ndxie ro nisdoos, per zhis zho gac zha ne ycaania Dios;

²⁸ sac ziaadyoble gun Dios xquielwxtis me lo guidzliu, zigne bneele me."

²⁹ Min co ga bzeet Isá mazd glo, rëb me: "Telne niaca mine yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr."

Zha ne nacd zha Israel laa zho wbig lo Dios

³⁰ Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne wlaataa ib bioxcod zho dien zha nsilaa me zho lo dol.

³¹ Laa zha Israel, niicle ne rioxco zho run zho grè mine rnabey ley parne csilaa me zho, per ib laad zho lo dol sca.

³² Laad zho, sac zienied guic zho gnalo zho Dios, rzac zho por grè ncuuaane gunse zho laa zho laa lo dol. Mincocke waa, zeene laa Jesús biaad, bzhaac zho me zig tib quie ne rriel ni ne riab ne liu.

³³ Lëë min co ga zhobnee lo Xtiidz Dios, zaatne rnee:

Sxel naa tib men lo zha Israel,
me gac zig tib quie ne griel ni zho;
sangue zha ne dib zdoo gnalo me,
tsod dze ne tso zho guielnë, guiab zho pe
nacne bnalo zho me.

10

¹ Bets, bzian, ne nlijaa rzaac naa tebaa zha laa grëse zha Israel lo dol, tibaque rnab naa lo Dios guien zho gbig zho lo me, zeena laa zho lo grè xtol zho.

² Parga nli ran naa noxco zho gbig zho lo me; per rund zho mine no gun zho.

³ Ib rienñ zho zdoo Dios ral rsilaa me miech lo dol, laa zho rzac por mine gun zho laa me csilaa zho. Ib nëd zho gun zho mine racladz Dios.

⁴ Sac gon, laa Dios racladz Jesús gnalo zho zeena guiaaambe zho lo grëse xtol zho; sac Jesússe nac men ne brieelo been grëse mine rnabey ley.

⁵ Bzeet Moisés rëb me, zha ne gnalo ley ne lëëw csilaa zho, none gun zho grëse mine rnabeya;

⁶ sangue zha ne gnalo Jesús ne me csilaa zho, nacda dien peraa gun zho. Nacda ncuuaane tso zho guiab zho, tebaa zha tsie zho lo me gbaa, gnab zho csilaa me zho (ncuuaane gacda ga, dzigo rriequia racladz zho guiet me ga stib);

⁷ o guiaabgaa zho tsie zho zaatne noliu grè ngutoo, tsienab zho lo me csilaa me zho (ncuuaane gacdaque ga, ni stiba led gad no me, laa me brieebanle).

⁸ Rquiind paraa tsieguib zho csilaa me zho, zig rzac zho zdoo zho, zig rzac zho ro zho, sca gax lo zho zo me quiambëz me csilaa me zho. Min co nac mine noseed no miech, rnee no lo zho:

⁹ Zha ne cueero guiab zho Jesús nac men ne rnabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo grè xtol zho.

¹⁰ Sac none dib zdoo ne gliladz ne, dzigo sanme Dios ne lo dol; ni none cueero ne pe nac mine riladz ne, dzigo scaania me ne.

¹¹ Rnee lo Xtiidz me: "Zha ne dib zdoo gliladz Jesús, quitnied me zho."

¹² Grëse miech, niicle zha Israela, niicle-gaa zha stib guiedza ible sca ycaania me zho, sac led yed me rbe; me rnabey zho grëse zho, ni grëtaa ncuuaane rap me, zdeed mew lo zha ne gnaba lo me.

¹³ Rnee lo Xtiidz me: "Grëse zha ne gnab lo Dios csilaa me zho lo dol, ible silaa me zho."

¹⁴⁻¹⁵ Nana, no zho gnë: ¿Per zha gnab zho lo me, ni runbeyd zho me? Nli gunbeyd zho me, tel niaca mine gard cho cxeel zha ne tsienee Xtiidz me lo zho, parne gon zho cho nac me. Ni min co rzeet Isá, zeene rëb me: "¿Zha wentaa ziaad zha ne ziaadnie Xtiidz Ndzon Dios!"

¹⁶ Rgaaz Xtiidz Dios, per led grëd zho rzoobdiaga, zig rbiireque Isá, rnee me: "Dios, bui ganle choot nëd gliladz Xtiidz luu, mine rne naa."

¹⁷ Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

¹⁸ Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiaayacnañ Xtiidz me.

¹⁹ No hor rne naa: ¿Pe ib rienñ zha Israel, telne gbigd zho lo me csilaa me zho, laa me csilaa miech stib guiedz? ¿Per rienle zhow! Sac bzeetle Moisésa padzeela, zeene rëb Dios laa me ycaania miech stib guiedz, zha ne ib peet rienñ; zeena tednë zdoo zha Israel, togo ziaa zho biini.

²⁰ Mincoque ga pquiaa Isá, zeene rëb Dios: Grë miech ne ni zienied guic yguib zho naa, laa zho beenbey naa.

²¹ Laa zha Israel, blactaa bzëëb nia naa lo zho ni naa niacnie naa zho, per pa nion zho xtidz naa, le_l goctseeb zho lo naa.

11

Zha Israel ne wbig lo Dios

¹ Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtií Benjamín, zha xtií Abraham nac naa;

² dzigo led psaanladzd Dios zho (nac zho zha ne padzeelale bzooblo me ygab lo me).

Golsoladz ganle, zha rëb Dios lo Lí, men ne biadteed xtiidz Dios padzeela, zeene bzodidnie Lí Dios

³ grëtaa ncuaane noyuñ zha Israel, ptsil zho zaatne riegan grë miech me, beet zho grë zha ne pxeel me noteed xtiidz me, ni laa zho quianalaque gut zho Lí. Rzac Lí guiendraa zha ne ron xtiidz me,

⁴ dzigo hor co rëb me lo Lí: “Led tibd luu riaan, no zgadz mil zha ne gard yquitsgzhib lo Baal, naa bzooblo zho ygab zho lo naa.”

⁵ Scaquegaa niina nagon led grëd zha Israel psaanladz Dios, no palal zha ne pquia zdoo me ble me zho ygab zho lo me.

⁶ Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nlid dzigo ne rquia zdoo me zho.

⁷ Znu nagon naca: Zha Israel ne bzooblome me, zha cose guiaanwen lo me. Laa los demas zho, le_l lozh gacndip zdoo zho,

⁸ zigne zhobneeque lo Xtiidz me, zaatne rnee: “Beendip Dios zdoo zho, riend zho zha gbig zho lo me; niicle ne zob lo zho, per rac zho zig rac zha ne rand; niicle zob diag zho per rac zho zig rac zha ne peet rond. Ni scataque nac zho haxta lo nadze.”

⁹ Mincoque bzeet rey David, zeene rëb me: Lëëque grë zhilni zho, lëëque grë ncuaane row zho, gac zig len doo ne, len guieñ ne tsietsoe zho;

zeena yga zho guieñe ne rieguial zho.

¹⁰ Guiaan zho zig tib zha ne rold lo, guiaan zho zig tib zha ne blozh blengw zhits.

Psilaa Dios zha ne nacd zha Israel

¹¹ Grë zha Israel ne sca gocndip zdoo, guiabde to togo laa zho bnitole ga. ¡Lëda! Sinque laa me bdeed diidz sca goc zho, zeena gbig grë zha stib guiedz lo me csilaa me zho lo xtol zho; ni tednëgaa zdoo zho gan zho laa me rcaania zha stib guiedz.

¹² Nana, telne scataa guieñzaac ne bgaa miech stib guiedz ne znu racndip zdoo zha Israel, çpe lelgue dzigo zeene laa zho gbiire guiaanwen lo Dios stib? ¡Zha nac zhe grëraa guieñzaac ne yga me stib!

¹³ To ne nac to miech stib guiedz, led nanle to ganle, ible Dios bzo naa none naa Xtiidz me lo to. Scagaa naa, dib zdoo naa rioxco naa run naaw,

¹⁴ zeena togo soobladz palal zha ladz naa ye zho squi gbig lo Dios csilaa me zho lo xtol zho.

¹⁵ ¡Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, ¡tib guieñbley nrooba zeene laa me ycaania zha Israel stib! Sac gon, rrieequia grieegan zho ga.

¹⁶ Zigne pcaania Dios xmengol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low mine naaza len liu, ndaanaque zhicwa. Scaque nagon, zeene bzooblo Dios xmengol zha Israel, yele zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa.

¹⁷ Bdzin dze brug palal zhicwa, dzigo ga bguiid zhicw yag oliv dan; lëë yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guieñzaac co.

¹⁸ Lëëraasi, guiabde to togo nonraa to lo zha ne nac zhicwa mine brug ga. Golguieñ ganle, por lo yag ndaan zhicwa.

¹⁹ Nana, nend guiab to: “Per rioguial now, gacxe waa no biaan xlugar zhicwa, mine brug ga.”

²⁰ ¡Golgap cuidad gon! Nli lëë biche zho, laa to biaan xlugar zho, porne bnëd zho nalo zho Dios zigne bien to rnal to me; per golguieñ gacniatsde to.

²¹ Golgan ganle, niicxe zha name zhicw-paa yag co nac zho ni ptiche me zho, ipelel to dzigo!

²² Golwi ganle zha wentaa Dios, per scagaa rdziladzd me gats xtiidz me. Mincoxe waa gondzed me grë zha co, laa to gon wen goc me lo to. Lëëraasi none gon to mine rnabey me, sac gon telne gonde tow, scaque gandzed me to.

²³ Nana, zig nac zha Israel ga, telne gbiire gbig zho lo me, ible squiid me zho lo yag co stib. ¡Golgan ganle men nroob nac Dios!

²⁴ Niicxe to na, nac to zig yag oliv dan, pquia zdoo me to pquid me to zhicw yag oliv wen co, ipelel zha Israel dzigo yquiad zdoo me, gbiire yquid me zho lo yag ne nacpaa zho!

Scaania Dios zha Israel ne bzozit lo me ga

²⁵ Bets, bzian, laa naa gni lo to ganle zha nac mine no guic Dios gun me. Niicle ne riend miecha niina, per racladz naa gacnan

tow, zeena gacniatsde to ne squi bzooblo me to: Nli ndal zha Israel racndip zdo zozit zho lo me niina, per zeene laa grë miech stib guiedz blozh wbig lo me,

²⁶ hor co grëse zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene rëb zho:

Guiedz Sión, ga griee men ne cuee zha Israel lo xquielntseeb zho.

²⁷ Dzigo laa Dios csilaa zho lo grëtaa xtol zho, zigne psanle me diidz lo zho.

²⁸ Len dze rii rlëe zha Israel ron zho none gnalo zho Jesús, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sangue Dios rleyne me zho, sac scale rëb me lo grë pxozgol zho.

²⁹ Me bzooblo zho, dzigo ible scaania me zho; sac gon, led yed me ctsëe xtiidz.

³⁰⁻³¹ Glo to nac zha ne ib bind xtiidz Dios, laa niinagaa na zha Israel nëd gon xtiidz me. Per zigne rquia zdo me to niina, scaquegaa zdzin dze ne yquia zdo me zho.

³² Grëse miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocontseeb to lo me, zeena grieeo glu me ganle ne lalga rquia zdo me ne.

³³ ¡Gotsaa gwi ganle zha men nroobtaa nac Dios! ¡Pa lotaa rac me, pa lotaa rien me! ¡Pa lotaa rioxco me miech! ¿Cho grieeo guien pe nac mine no guic me gun me, pe nacgaa gun mew?

³⁴ Zigne zhubneeque lo Xtiidz me, zaatne rnee: "¡Choot nañd pe no guic Dios gun me! ¡Choot grieeold guiab lo me, znu znu been!

³⁵ Wlaltaa choot gard pe gdeed lo Dios, par guiab ne laa Dios zëeb."

³⁶ ¡Peet gon nzëebd Dios lo miech! Sac grëtaa ncuaañe no, me psana, me naaza, ni me rnabeya.

¡Mese nac men ndzon, tibaque gotsaa dziuunon ne me! Sca rieguiala.

12

Golban zigne rdziladz Dios

¹ Bets, bzian, laa to gocnanle ganle pa lotaa nquialadz Dios to. Nana sca, dib nacse to golsan to lадznia me, gac to zig tib gon mbe, tib gon ne gley me ycaania me. Sca glu to ne nli rleyne to me.

² Ib tsienaldraa to grë ncuaañe ndzinlid ne noyac lo guidzliu rii, grëse zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne mine rnabey me.

³ Ne znu nac naa zha ne pquia zdo Dios noyun naa dziin rii, nligaa laa naa rso diidz lo to, ndzinli golgac, ib glude to ncuaañe ni nacde to, sinque golguien cho nac to, zha rnalo to Dios.

⁴⁻⁵ Golgan ganle zha niaa xcuerp ne: nzian lë niaaw, ni tib tiba nose zaatne rquiina; scaque nagon nac grë zha ne ngab lo Jesús, nzian nac ne, per tib tib ne nose zaatne rquiin ne, tsod zha ne yquiind. Grëse ne none gnalolsa ne grë zha ne nacgrë ne.

⁶ Tib tib ne bneedzse Dios guielbiini lo ne, par grieeo dziuun ne dziin ne pso me ne dziuun ne lo me. Gacxe waa, zha ne pso me cteed xtiidz me, none gnee zhow zigne csiaab mew guic zho;

⁷ zha ne pso me gun ncuaañe yquiin lo grëraa miech, none gun zhow.

Zha ne pso me cseed miech, none min co gun zho;

⁸ zha ne pso me gdeedlban miech, none lban gdeed zho.

Zha ne pso me ygad, none dib zdo zho ygad zho;

zha ne pso me so gnabey, none ndzinlise gnabey zho;

zha ne pso me choobladz zdo zha ne mban noded, none nley gac zho tsie-nee zho lo miech.

⁹ Dib zdo to golleyne samiech to. Gandzede to grë ncuaañe ntseeb, niapse ncuaañe rquiin goltsienal.

¹⁰ Ine niowse golleyne grë zha ne nacgrë to, gacnguizhde to, quitniede to zho.

¹¹ Nguieel golgac, gacmbechde to, dib zdo to goltsoxco golgun mine nac xtsiin Dios.

¹² Nley golgac lo guielmban rii, golsoladz ganle zha nactaa grë ncuaañe no gneedz Dios lo to; golxecw lo grë guielnë ne gan to; tibaque golzodiidznie Dios.

¹³ Goltsoxco xliaadz grë zha ne nacgrë to ngab to lo Dios; zaacse golcuëzlo zha ne ziaadted lidz to.

¹⁴ Grë zha ne rtsidil to, laa ne gdzibdee to zho, golnab gunlay Dios zho.

¹⁵ Zha ne no guielbley, golgacnie zho lo xquielbley zho; zha ne nogaa guielnë, golgacnie zho lo xquielnë zho.

¹⁶ Gacniatsde to. Grë zha ne rzac miech peet nond, goltsieelsa zho; guiabde to to nac zha ne racraa. Niowse golbannie zha ne nacgrë to.

¹⁷ Zha ne csacsi to, gunde to ne yeque to csacsi zho. Goltsoxco wen golgac lo grëse miech.

¹⁸ Tlniede to samiech to, goltsoxco tibaque wen golbannie zho.

¹⁹ Golguien, zha ne csacsi to, ib guiabde to ne tozhal ctsire guielnë co, sinque golsana lадznia Dios, metaa nan zha gun me xquielwxtis me; zigne ziaad lo Xtiidz me zeene rëb me: "Naa raguial gun guielwxtis, naa gunquizh miech tel pe nac dol ne zëeb zho.

²⁰ Gacxe waa, zha ne rlëe lo luu, zeene gan luu mban rac zho rcaabedz zho, mazd

bdeed ncuaañe gow zho; gangaa luu mban rac zho rnab zhis zho, bdeed ncuaañe guie zho. Sac zeene sca guñ luu, stoladz zho csoladz zho miñe been zho luu; rriequia gui gui cauib guic zho.”

²¹ Golguieñ sca, niapse guielwen goltsienal, zeena sca ycuëz to lo guielntseeb. Gdeete to diidz ne ye to guñ guielntseeb.

13

Golgon mine rnabey wxtis

¹ Grëse to none gon to xtiidz zha ne nac-paa wxtis. Sac grëse zha ne nac wxtis, ible Dios reed diidz ne laa zho rac dziin co.

² Gacxe waa, zha ne racndaan lo wxtis, rriequia ye lo Dios ga racndaan zho; ni zha ne racndaan, lëëque zha rguib ted zho caxtigw ga.

³ Golgan ganle, ible laa wxtis zo, par zha cobey caxtigw ne tsieguial zha ntseeb. Telne racladz to sca tsoxtseeb to lo wxtis, zacse golgac; scagaa zha, tsod pe nacne ygaal zho to.

⁴ Dios psan rzo zho ni zha rteedlo to, ni scagaa, telne pe guielntseeb ne guñ to, zhaque gnabey pe caxtigw ne ygaal to; sac gon, ible laa Dios bzo zho guñ zho guielwxtis.

⁵ Gacxe waa, ib none gon to miñe rnabey zho, zeena tsoxtseebde to lo zho, ni scagaa niicle nëz lo Dios a ine tiblise no guic to.

⁶ Scaque dimi ne no gdeed to lo zho, goldeeda; sac rquiin dimi co parne grieelo guñ zho tel pe nac dziin ne no guñ zho.

⁷ Golguieñ sca, dimi ne no gdeed to lo zho, goldeeda; miñe rnabey zho to guñ to, golguña. Golleynie zho, quitniede to zho, golguieñ zha non nac zho.

Golleynie samiech to

⁸ Grë ncuaañe rieguial to guñ to, golgunzaha zeena bdedgaw; sangue samiech to, none tbaque gleynie to zho. Zha ne rleynie samiech, grële miñe zhobnee lo Xley Dios ga quiayun zho.

⁹ Sac telne rleynie to samiech to zigne rleynie to to, nod pe nacne csacsi to zho; guiab to:

laa to yquidie zho,

laa to gut zho,

laa to cuan zho,

laa to tsonie tsieel zho,

gzoobladzga to grë ncuaañe quianie zho.

Gacxe waa, zha ne rleynie samiech zigne rleynie zho zho, grële miñe zhobnee lo Xley Dios ga quiayun zho.

¹⁰ Zha ne rleynie samiech, rsacsidraa zho zho; ni miñ co rnabey Dios. Gacxe waa, grëse ne none gleynie ne samiech ne.

¹¹ Ib none gban ne zigne racladz Dios, golle na tsaa ne biini; sac gon, laa dze ne ycaania Dios ne bii ziaadgaxraa, lëdle zeene psilo rnalo ne me.

¹² Dziuun ne cuent laa guieel lozhle ted, laa biini ne guini liu dze ndzon co ziaadle; gacxe waa, ni lalnu guionald ne miñe racladz mendox, sinque miñe racladz Dios, miñ co golgotsaa dziuun ne.

¹³ None ndzinli gban ne:

dziuun ne guielgonziu,
dziuun ne grë lni yozh,
yquiangobd ne zha ne led tsieeld ne,
dziuun ne grë guielyozh ne racladz xcuerp ne,

dilnied ne samiech,

glëenied ne zho zeene stib noded zho.

¹⁴ Golgotsaa gnab ne lo Jesús sca, zig zie dze lozh csanme me xquielrien ne, csanme me zdoe ne, gac ne zigne racladz me. Dziuun draa ne grë ncuaañe ndzinlid ne racladz xcuerp ne.

14

Gzeed zdoe to mine run zha ne nacgrë to

¹ Golcaania zha ne gard tsoguicpaa zha nac Xtiidz Dios. Telne no palal miñe rililadz to zhaa rzac zho, glisquide tow lo zho.

² Gzoob ne, no to rzac peet nacda gow to grë lose guielwagw, laa zha ne na gard tsoguicpaa Xtiidz Dios, rzacgaa wena telne scuaan guizhyese gow zho;

³ ga nagon, ni stib ni stib nod pe nacne glisqui dien cho pe row, dien cho pe rowdga; sac gon grëse to, Dios bzoooblo to ngab to lo me.

⁴ Nana zig nac zho, lo Dios ngab zho, led lode tow; ¿cho nac to dzigo tso to glisqui to dien pe run zho? Dios nac men ne nan telne lëew o lëdgaaw ga quiayun zho; men nroob nac Dios, me gdeed guielbiini lo zho guien zho gban zho zigne racladz me.

⁵ Scaque, no zho zienal dien pa dzepaa none gleynie zho Dios, nogaa zho rnee zac tel pa dzetaa gleynie zho me. Per peet nacd ga, zac tib tib zho gunse zho miñe rzac zho rdziladz me.

⁶ Tel pa dzetaa wena, totsaque run zhow par gunnon zho me. Scaquegaa guielwagw, wena zha ne gow grëlosew; niicle zha ne ncuuegaa ncuaañe gow, wenaquew, totsaque run zhow par glu zho ne rleynie zho me, ni rdeed zho xquizh lo me.

⁷⁻⁸ Sca nagon naca, per led miñ cod dzieets ne dziuun ne miñe gacladztaa ne. Grëse ne ne nac ne zha ne ngab lo Dios, laa ne mban par dziuun ne miñe rnabey Jesús, ni zeene guetgaa ne, lo me none gdziñ ne. Gacxe waa, niicle niina ne zomban new, niicle zeene gutlegaa new, ladznia me no ne.

⁹ Sac gon, tel Jesús gut me ni brieeban me; gacxe waa, me rnabey ne grëse ne, zigtaa zha mbana zigtagaa zha guta.

¹⁰ Jesús rnabey ne tib tib ne. Gacxe waa, nonguielda glisqui to lo zha ne rund miñe

run to; nonguielda por mincose sac to zho zig zha ne peet nond, tso to gneedraa to lo zho. Ni stiba, gal dze ne laa Dios gun guielwxtis, grëse ne laa ne none gacredz lo me.

¹¹ Zigne raquetaque lo Xtiidz me, zaatne rnee me:

Naa nac Dios mban, gneli naa lo to ganle: grëse miech, ible squiitsgzhib zho lo naa, cuero zho ne nli naa nac Dios.

¹² Sca nagon gaca, tib tib ne ib laa ne no cuero lo me tel zha wban ne.

Csande to zdoo zha ne nacgrë to

¹³ Nana sca, zha ne sca rund grë mine run to, ible glisquidraa tow lo zho. Golguien, gunde to ncuaañe rgobey to yquiaaqui gunctal zho xtol zho, o csaangaa zho Xtiidz Dios.

¹⁴ Tel naa, nanpaa naa led dolđa gow ne grë lose guielwagw; sac niicle Jesúsa scaque nac xtiidz me. Sangue zha ne rzac dolđa, mazd gowd zhow; sac tel laa zho gowa, xtol zho ga gunctal zho.

¹⁵ Zig rne naa ga led dolđa, per telne xtsin-paa row to tib ncuaañe rquiaaqui rsañ to zdoo stib zho, ga rlu to ne rleynie to zho. ¡Golguien sca, gowde to ncuaañe yquiaaqui sozit zho lo Dios! Sac gon, blactaa guielnë ne bded Jesús psilaa me zho.

¹⁶ Ib gunde to grë ncuaañe yquiaaqui gneenë miech to, niicle ne nanpaa to led dolđa.

¹⁷ Zha ne ngab lo Dios, mine none tsienie guic zho nac ne ndzinli gban zho, tilnied zho samiech zho, ine nley gac zho (min co nac mine rdeed Espiritu Sant); led tsod zho dien pe zac gow zho, pe zac guie zho, pegaa gacda.

¹⁸ Sca rdziladz Jesús, ni zha ne sca gban, zleynie Dios zho, niiclegaa grë miecha zleynie zho zho.

¹⁹ Goltsoxco sca, gunde to ncuaañe codil to grë zha ne nacgrë to; zeña tipse gac to lozh tsoguic to zha racladz Dios gban to.

²⁰ Ib gunde to, ne por tib guielwagw codil to grë zha ne ngable lo Dios. Zig rnele naa ga, grëlose guielwagw mbew, peet nacda gow new; sinque mine nonguielda, nacne gow ne mine nanpaa ne yquiaaqui csañ ne zdoo stib zho.

²¹ Mincoxe waa, mazd gowde to pe scuaan bëël, guiede to nziu, telne min co yquiaaqui gunctal to xtol zho; ni tel pe grëraa ncuaañe nañ to tsod zdoo zho, gunde tow.

²² Niicle ncuaañe nanpaa to dolđa gun tow, niiclegaa nëz lo Dios a led dolđa; per mazd gunde tow zeña zo zha ne rzac dolđa. ¡Wen zie zha ne sca niicle nanpaa zho dolđ nac mine gun zho, per rund zhow, parne gunctald zho xtol zho!

²³ Sangue zha ne racchop guic rienđ zho dien pe zow zho tib guielwagw, ni lozh ga

row zhow, runctal zho xtol zho ga; sac beend zho mine rzac zho rdziladz Dios. Grëse ncuaañe rzactaa zho wend ni gun zhow, xtol zho ga gunctal zho.

15

Golgacnie zha ne nacgrë to

¹⁻² Golguien sca, to ne nac to zha ne dziitsle zo lo Xtiidz Dios, golgacnie grë zha ne gard sodziits lo Xtiidz me. Golgun ncuaañe tso zdoo zho, ncuaañe yquini lo zho, zeña lozh guien zho zha gnalo zho Dios; led tsode to gun to ncuaañe yquinese lo to.

³ Golgan ganle, niicle Jesúsa bguibd me niac ncuaañe nquini lo me. Zigne raquetaque lo Xtiidz Dios, zaatne rnee: "Grëtaa diidznë ne rnee zha ne rlëë lo Dios, grësew pcon zho me."

⁴ Grëse mine raquiet lo Xtiidz Dios, padzeela pquiaw; ni ib laaw pquia zeña gacndion ne zha no gban ne. Lëew rnee none nley gac ne, lëew rnee guieete ne yquiambiaaz ne yгаа ne grë mine bzeetle Dios.

⁵ Dios men ne rneedz guielbley co, men ne racnien ne guieete ne, me gacnien to niowse gbannie to grë zha ne nacgrë to. Golleynie zho zigne rleynie Jesús to,

⁶ zeña grëse ne tipse gac ne dzioolnie ne Dios, Pxož Jesús, men ndzon ne rnabey ne.

Grëse miech noyon Xtiidz Ndzon Jesús

⁷ Golguien sca, grëse zha ne nacgrë to, golcaania zho zigne pcaania Jesús to. Sca golgun, zeña xoobnenraa lë Dios.

⁸ Golsoladz ganle, zeña biaad Jesús nroob ncuaañe been me lo zha Israel, me bi-aadgun grëtaa mine bzeetle Dios padzeela. Ga blu Jesús grëse mine rnee Dios, ib run mew.

⁹ Ni golsoladz ganle, ye grë miech stib guiedz biaadsilaa me, gane niina grëse zho roolnie Dios, ne scataa pquia zdoo me zho. Min co raquiet lo Xtiidz me, zaatne rnee:

Zoolnie naa luu,

ni zlu naa lo grë zha stib guiedz ne men non nac luu.

¹⁰ Stib lugar rnee:

To ne nac to miech stib guiedz, jine nley golgac grë to zha Israel!

¹¹ Ni no stib zaatne rnee:

Grëse to ne nac to miech stib guiedz, ¡golleynie Dios! ¡Golsanñziuu lë me!

¹² Mincoque ga bzeet Isá, zeña znu pquiaa me:

Zriequia tib men lo xti Isai;

men co gnabey lo grëse miech stib guiedz, ni me gnalo zho grëse zho.

¹³ Mincoxe waa, to ne nac to miech stib guiedz, rnab naa lo Dios (men ne psanle diidz pe nac grë ncuaañe yгаа ne ga) gneedz me guielbley lo to, gacnie me to peet zhgab

ctsebde to niina ne laa to rliadlzle me. Rnab naa lo me, gacniën Espíritu Sant to ine gley to yquiambëz to gac grë miñe psanle me diidz ga.

¹⁴ Bets, bzian, nanle naa zha wen nac to, nacde to zha ne csañ zdoos tib zho; rienle to zha racladz Dios gban to, rienle to zha cso to diidz lo grë zha ne nacgrë to;

¹⁵ per lo guits rii gon nzian ncuaañe rso naa diidz lo to. Guiabde to togo ndox naa lo to, sinque laaw ben naa zeena guiaanladzde tow.

¹⁶ Ne nquialadz Dios naa, laa me bzooblo naa noyūn naa xtsiñ Jesús, none naa Xtiidz Ndzon me lo grë miech stib guiedz, zeena csañmbe Espíritu Sant zho; lozh ga gded naa zho lo Dios zig tib gon ne gley me ycaania me.

¹⁷ Gacxe waa, tel niina rley naa sac noyacniën Jesús naa noyūn naa dziin ne pso Dios naa.

¹⁸ Me noyacniën naa none naa Xtiidz me lo grë zha stib guiedz, zeena gban zho zigne racladz me. Ni laa zho nobig lo me, sac ran zho grëse miñe rne naa mban naaw zigne naca,

¹⁹ ni ran zho zha racniën Espíritu Sant naa run naa grë milagr, grë ncuaañe rzee zdoos zho. Sca nagon none naa Xtiidz Jesús lo zho, brie naa Jerusalén briequia naa haxta nêz xtan zha lliir. Guiabde to togo rtix naa diidz.

²⁰ Ni laa naa noxco za naa zaatne waltaa gard gon zho cho nac Jesús, zeena gasëëbd naa zaatne ziyeele zha ne güeynee Xtiidz me.

²¹ Laa naa zanañ zigne zhobnee lo Xtiidz Dios, zaatne rnee: "Grë zha ne waltaa gard gon cho nac me, zeena gan zho grëtaa ncuaañe run me, laa zho gunbey me."

Racladz Pabl tsie Pabl Roma

²² Nzian vuelt gocladz naa nialgan naa to, per ib bdeetew diidz, sac laa naa bia grë dan co biaseed naa miech.

²³ Izle ga na tibaque sca no guic naa, laa niina ne laa naa psiaal lo xtsiñ naa, nataa nagon ible zial naa.

²⁴ Laa naa no ga Spañ, dzigo lëe nêzle ga teed naa Roma i guialgan naa to. Tib guielbleya lo naa guialquiabdiuuzh naa to, dzigo lozh ga siguiel to gun to xyudar naa grieelo ga naa nêz Spañ.

²⁵ Laa niina, laa naa no ga Jerusalén gasañ naa tib gon lo grë zha bets, zha bzian ne no ga;

²⁶ sac grë zha bets, zha bzian, ne no nêz Macedon, ni nêz Acay, laa zho bnediizd beenlo zho palal dimi cxeel zho yquiiñ grë zha prob ne no nêz co.

²⁷ Niapse zdoos zho gol ptop zho gon co, sac rzac zdoos zho grëtaa miñe been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho

rxeeł palal ncuaañe rgaa lo zho yquiiñ zha Jerusalén.

²⁸ Zigne lozh nagon gasañ naa gon co Jerusalén, dzigo laa naa teed guialgan naa to i zigne nile naa ga.

²⁹ Rien naa nroob guielnzaac ne gneedz Dios lo to zeena laa naa guial.

³⁰ Bets, bzian, golguien ganle Jesús rnabey ne grë ne; ni rleynie ne zha ne nacgrë ne, sac Espíritu Sant nacnie ne. Gane niina, laa naa rnab lo to, golgotsaa gnab ne lo Dios gacniën me naa;

³¹ golnab lo me, csilaa me naa ladzniia grë zha Israel ne gard guien cho nac Jesús. Gólnab lo me, ine gley grë zha bets ne, zha bzian ne, ycaania zho gon ne gasañ naa lo zho nu;

³² zeena ine nley no zdoos naa glanso naa lo to, ine gdziiladz naa len dze ne cuëz naa lo to i. Sca nagon no guic naa, totsaque gneedz Dios diidz gaca.

³³ Ni me ne nac me men ne rbee miech lo grëse zhgab, lo grëse guielxtseeb, me gacniën to. Sca gaca.

16

Bdiuzh

¹ Bets, bzian, len dze rii laa Feb, tib wnaa ne run xtsiñ Dios guiedz Cencre, laa me guiaad nêz lo to i.

² Laa naa rso diidz lo to, zeena glanso me i niowse golcaania me, golcaania me zigne riegual ycaania ne zha ne ngab lo Dios. Golsiguiel goldeed grë ncuaañe yquiiñ me; sac gon, tel me ndal grë zha ne ziyacnie me lo xliiadz zho, haxta naa blactaa ziyacnie me naa.

³ Ni rnab naa lo to, golsiguiel goldeed zhibdiuzh naa lo grë zha qui.

Goldeed tib zhibdiuzh naa lo Aquil i, grop tsieel me Priscil. Blactaa ziyacnie zho naa zidziuun no xtsiñ Jesús,

⁴ haxta bdedlaa zho niet zho psilaa zho naa lo guielgut. Rzacdox zdoos naa miñe been zho ga, niicle grëragaa zha zit ne nacgrë new, rzac zdoos zhow.

⁵ Ni scagaa, grë zha ne rcaalsa lidz zho riegoolnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lëe me nac zha Asia ne glopaa bzëëb xnëz Jesús.

⁶ Goldeed zhibdiuzh naa lo Marí, blactaa noyūn me xtsiñ Jesús lo to.

⁷ Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguib. Glo zho bliladz Jesús lo naa, zha nziuu nac zho lo grë zha ne pxeel Dios nonee Xtiidz me.

⁸ Goldeed zhibdiuzh naa lo Ampliat, lëe stib zha ne rdzieel xtidz naa ga;

⁹ lo Urban, rsoladz naa me, tipse bdziuun no xtsiin Jesús grop no; lo Staquis, stib zha ne nziuu lo naa, gołdeed zhibdiuzh naa lo zho;

¹⁰ lo Apel, ye me blactaa ncuaañe bded me blu me ganle ne nli dib zdoe me rnaloe me Jesús; lo grē zha ne no lidz Ristob ne.

¹¹ Gołdeed zhibdiuzh naa lo Herodion, ye me menladz naa nac me; lo grē zha ne no lidz Narcis, zha ne riladzle Jesús;

¹² lo Trifen, lo Trifós, ni lo Pérsida, gza men wnaa rii blactaa noyuu zho xtsiin Jesús.

¹³ Gołdeed zhibdiuzh naa lo Ruf, zēēb xtiidz me lo grē zha ne nacgrē ne; gołdeed zhibdiuzh naa lo xníaa me ne, ruñ naa cuent lēē stib xnía naa ga, blactaa pteedlo me naa.

¹⁴ Gołdeed zhibdiuzh naa lo Asintric, lo Flegon, lo Hermes, lo Patrob, lo Hermas ni lo grēragaa zha bets ne nacgrē zho.

¹⁵ Gołdeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grēraa zha bets ne nacgrē zho.

¹⁶ Grēse to bets, grēse to bzian, gołcaania zhibdiuzh naa. Grēse zha ne riladz Jesús nēz rii, laa zho rxeel bdiuzh lo to.

¹⁷ Nu ne laa naa csiaalle lo guits rii, laa naa rso diidz lo to, nsin gołso lo grē zha ne ziaad loxaque dien zha codil zho to, dien zha gungüet zho to, rlu zho minē ni nacdraa Xtiidz Jesús; yquiaadiagde to zhiwseed zho.

¹⁸ Grē zha co, led xtsiindraa Jesús ga ruñ zho, sinque laa zho noxco ncuaañe gdeed guxt xcuerp zho. Diidz nex, diidz ndooladz rnee zho; grē miech ne beelze pe riladz, znuse rquidie zho zho.

¹⁹ Sangue to, zēēb diidz ne ib rsaande to minē nac Xtiidz Dios, zienal to minē rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuaañe yquiiñ guñ to, ni lalnu tsoed to lo guientseeb.

²⁰ Scagaa Dios men ne rtiche grēse zhgab, grēse dzeb, merle quixdze me Satanás, zeena peet grielodraa guñ ma. Jesús, men ndzon ne rnabey ne, me gacniñ to.

²¹ Gołcaania zhibdiuzh Timoté, men ne quianie naa xtsiin Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

²² (Naa nac Ters, naa noquia guits rii, ye naa laa naa rxeel zhibdiuzh naa lo to i. Rleynie naa to, sac ye to ngab lo Jesús.)

²³ Gołcaania zhibdiuzh Gay, men ne rbēz naa lidz, laa me rxeel bdiuzh lo to. Lidz me nu rcaalsa grē zha ne riladz Jesús nēz rii. Ye Rast, men ne nac wxtis quianap xtimi guiedz rii, ni bets ne Cuart, laa zho rxeel bdiuzh lo to.

²⁴ Jesús men ne rnabey ne, me gacniñ to grēse to. Sca gaca.)

²⁵ Laa naa rsan to ladznia Dios, me gacniñ to lozh sodziits to lo Xtiidz me, minē none naa lo miech. Haxta zeena gard tsaa guidzliu, znu no guic Dios csilaa me grē miech lo xtol zho, per choot gocnanda, naraa laaw bzhoobnen.

²⁶ Laa niina, nzian zaatne nogaaz Xtiidz me, zeena grēse zho guien Jesús none gnalo zho, ni minē rnabey me min co no guñ zho. Grē zha ne biadteed xtiidz Dios padzeela, bzeetle zho ne znu gaca, ni ible Dios rnabey ne znu gaca.

²⁷ ¡Mese nac Dios, mese nac men ne nlipaa rien! ¡Tibaque sca gologtsaa dziunnon ne me, grēse ne ne nac ne zha ne ngab lo Jesús! Sca rieguiala.

Pabl

GUILTS NE GLO PXEEL PABL LO ZHA CORINT

¡Diuzh to grêse to! ¹ Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

² Laaw ziaad lo to i, grêse to ne nac to zha ne ngable xnêz Dios no to guiedz Corint i, nac to zha ne bredz Dios ngab lo me, psanbe me to zeene laa to bliladz Jesús; zigne psanbeque me grêse miech ne no dib lo guidzliu, zha ne bliladz Jesús, men ne rnabey ne grêse ne.

³ Dios men ne nac Pxoze, ni Jesús men ne rnabey ne, me gacnie to, me glu lo to ganle pa lotaa noxco me to; zeena peet tsienied guic to.

⁴ Gzataa zeene rzodiidznie naa Dios, rded naa xquizh lo me por grêtaa ncuaane zi-needz me lo to, niina ne laa to riladz Jesús.

⁵ Sac gon porne riladz to Jesús, blactaa ziyunlay me lo xquielmban to, noyacnie me to quiayoguicraa to zha nac zhiwseed me, rien to zha gnee tow lo miech.

⁶ Rlu zienal to mine nac Xtiidz Jesús, zigne binse tow,

⁷ Gacxe waa bneedz Dios grêtaa guielbiini lo to, zeena guien to zha gban to, laga quiambêz to gdziñ dze ne guiaad Jesús men ne rnabey ne.

⁸ Ni Dios nac men ne gacnie to tiblifique gac to lo Xtiidz Jesús, zeena ni tib falt rapde to gal dze co.

⁹ Sca nac xtiidz me, ni mesi gon ctsêed me mine rnee me, ible laa me bredz to gacnie to Xpêed me Jesús, men ndzon ne rnabey ne.

¹⁰ Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grê to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesús zhal noso diidz rii lo to.

¹¹ Sac gon nê tib zhalidz Cloé lo naa nodilla to i;

¹² no to dien cho xnêz ngab to. No to rnee: “Xnêz Pabl no naa”; riasaque zha ne rnee xnêz Apol no zho, rrieequiagaa zha ne rnee xnêz Pedr no zho; haxta no zho rzac zhase nac zha ne nlipaa no xnêz Jesús.

¹³ Ne squi rac to, ¿pe rzac to dzigo squi nzián lè nac Jesús? Zha ne rnee xnêz Pabl no zho, ¿pe niacxe naa pquia lo cruz gozh xtol zho?, ¿te brobnis zho ye par ygab zho lo naa?

¹⁴ ¡Xquizh Dios led naad pchoobnis to grê to, lèese chop zha ne pchoobnis naa nac Crisp ni Gay!

¹⁵ Zeena tsod pe nacne guiab to xnêz naa ngab to, sac naa pchoobnis to.

¹⁶ Ah, ni naaque gon pchoobnis grê menlidz Stef. Bod lèese zha ne pchoobnis naa ga,

¹⁷ sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa zho lo dol. Haxta bod ligase bzhaac to mine bialne naa lo to, sac ib zanaid naa pe guielrac, pe diidz ngan ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

Diosse nac men ne rien

¹⁸ Min co nagon noxco naa, maase niicle no grê zha ne rzac ncuaane paat rquiind ga been Jesús gut me lo cruz, per lèe zha co nole nêz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios.

¹⁹ Noyaca zigne zhoobneeque lo Xtiidz Dios, zeene rêb me:

Znitlo naa grê guielrac ne rzac zho csilaa zho,

niicle rzac zho mazdraa zhooba guic zho, ni lalnu yquiinda.

²⁰ Ni nligaaw, grê zha rac, grê zha rien, grê zha ne rzob dien cho nroobraa rac, ib blud grê zhiwseed zho ga lo zho zha csilaa Dios zho, chogaa nac Dios. Ga blu Dios ganle lega nase grê guielrac ne no lo guidzliu rii.

²¹ ¡Diosse nac men ne rien! Bien me grielod gunbey miech me por xquielrac zho, nacne rnabey me zha ne dib zdoz gliladz xtiidz me, zha co csilaa me; niicle ne rzhidznie miecha, rzac zho ncuaane paat rquiinda.

²² Zig nac grê zha Israel, grê zha Gres ncuaane paat rquiinda rzac zho. Grê zha Israel, racladz zho ganlo zho grê milagr nroob par glu ne diidzliw; laa zha Gres na zienalgaa gaca zigne nac zhiwseed zho, sac laa zho zienal guielrac ne no lo guidzliu rii.

²³ Gacxe waa zeene rnee no lo zho Jesús men ne pquia lo cruz, men cose csilaa miech, rlêe zha Israel ron zhow; laa zha Gres, rzhidznie.

²⁴ Sangue ne, ne nac ne zha ne bredzle Dios bzêeb xnêz me, zigtaa zha Israela, zigtagaa grêraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios.

²⁵ Mine rzac miech paat rquiind ga been Dios, ni nand zho ndziibguicraa nac min co lo grê xquielrac zho; zha ne rzacгаа cholze cho men nsis ga sca gut lo cruz, ni nand zho lèe men co mazdraa ndip lo grêse miech guidzliu.

²⁶ Bets, bzian, golgan ganle lo grê to ne nac to zha ne ngab xnêz Dios, led grêde to nac zha rien nêz lo miech, led grêde to nac zha

non, zha ne ziaadga lo grê dii ne nziuu lo zho.

²⁷ Per ib laa Dios nobedz grê zha ne rzac miech peet riend, grê zha ne rzac zho nac zha nsis, parne guñctoladz me grê zha ne rzac zho nac zha rac, zha non.

²⁸ Laa me nobedz grê zha ne sca rzac miech paat rquuin, zha ne rzac zho peet nond, parne guioog ro grê zha ne rzac zho nac zha non, zha nziuu.

²⁹ Ga rlu me ganle ni tib choot grieelod gacniats lo me.

³⁰ Golwi ganle, niapse por me laa ne nacie Jesús, grê guielrac, grê guielrien ne rdzi-aap ne, Jesús bneedza, ni Jesús nac men ne psilaa ne lo grêta xtol ne, men ne psanmbe ne laa ne bziaab xnêz Dios. Dios bnabey sca goca.

³¹ Gacxe waa choot grieelod gacniats, zigne ziaadaque lo Xtiidz me zaatne rnee: "Zha ne racladz gacniats, mazd guñnon zho Dios por grêtaa ncuaae run me."

2

Xtiidz Jesús bnee Pabl

¹ Gacxe waa tel naa, golsoladz ganle bets, bzian, len dze ne bialseed naa to Xtiidz Dios, bned naa dien pe diidz nroob, dien pe diidz ndzielguic lo to.

² Bend naa dien peraa nseed naa to, sinque mine nac zhiwseed Jesús min co bialne naa, zeena gacnan to cho nac me ni pe nac ne pquia me lo cruz.

³ Lega gzhe gzhe rac naa, haxta rzhidz naa, rdzieeb naa no naa lo to.

⁴ Zeene laa naa psilo bne Xtiidz Dios lo to i, gon to ganle ib bned naa zigne rnee grê zha ne nac zha rac lo guidzliu rii; per blu Espiritu Sant ganle nacda beelze pe wseed, ni blu ganle pa lotaa poder ne rap Dios.

⁵ Sca bne naa lo to, sac laa naa racladz zha ne gbig sëeb xnêz Dios, me gnalo zho, gnalod zho grê mine nac xquielrac miech.

⁶ Parga nli no zaatne rnee no grê diidz nroob, diidz ndzielguic, per laa min co rnee no lo grê zha ne rienraa zha nac Xtiidz Dios, ni nacdgaaw zigne nac grê xtiidz ndzielguic grêraa miech, grê diidz ne rleynie grê zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuaae tibrded naca.

⁷ Grê diidz ne rnee no, ndzielguic naca, sac zhiwseed Diosa, lëe xquielrac me ga. Ndzielguica, sac ga rlu me zha no guic me csilaa me miech gdziñ zho lo guielndzon ne no me; gocnand miecha padzeela, per nlew zeene bzaa me guidzliu.

⁸ Grê miech ne no len dze rii, rioguicd zho zha nac xquielrac Dios; sac telne nioguic zhow nabeyd zho nquia men ndzon ne nac Jesús ga lo cruz.

⁹ Zigne zhubneeque lo Xtiidz Dios, zaatne rnee:

Ncuaae waltaa gard guien miech, nac grê mine quianiele Dios gdeed me lo grê zha ne nlipaa gbig lo me gleynie zho me.

Ncuaae choot gard gana, ncuaae choot gard gona.

¹⁰ Sangue no laa no ndionlew, sac pxeel me zhiEspiritu me blu lo no zha naca, men co nan grêse mine no guic me.

¹¹ Zig nacse tib miech, grieelod gacnanpaa ne dien pe nac mine no guic zho, pe nacga mine rza zdoo zho, loxaque zhiespirituse zho nana; scaque Dios, loxaque zhiEspiritu me nan grêse mine no guic me gun me.

¹² Ni tel no, Espiritu co nacie no (nacie no espiritu ne quianzê lo guidzliu rii), ni ible laa Dios pxeel me lo no zeena gacndion no zha nactaa grê ncuaae nole guic Dios gneedz me lo ne.

¹³ Zeene rzeet no grê guielnzaac co, laa no rneew zigne nreedz zhiEspiritu me guielbiini lo no, rneed now zigne riab guic grê zha rac ne no lo guidzliu rii. Laa no rnee grê min co zigne rlu zhiEspiritu mew, ni ible laaw nac par grê zha ne rioguicle zha racladz Espiritu co.

¹⁴ Grê zha ne nacie no zhiEspiritu Dios, cholze miech nac zho, grieelod tsoguic zho zha nac grê mine rlu Espiritu co lo no. Rzac zho ncuaae paat rquind naca, sac grieelod guien zhow ne zhase.

¹⁵ Sangue zha ne rioguicle zha racladz Espiritu co, rien zho pe nac mine rlu me.

¹⁶ Ni nligaa zha guien zhow, zigne zhubneeque lo Xtiidz Dios, zaatne rnee: "Choot grieelod gacnan pe nac mine no guic Dios gun me, choot grieelod glu lo me pe nac mine no gun me." Per no, ndion now, sac grê ncuaae nan Jesús, bneedz me diidz lo no ye no gocndion.

3

Gnalod zho samiech zho

¹ Bets, bzian, ne nligaa gard grielo gne naa lo to zigne rne naa lo grê zha ne rioguicle zha nac mine racladz zhiEspiritu Dios, sinque tibaque laa naa rne lo to zigne rne naa lo grêraa miech guidzliu, sac rrieequia bii mëdeyen naa to lo zhiwseed Jesús.

² Niapse ncuaae ligase ziseed naa to, laa ne cseed naa to ncuaae ndzielguic. Rrieequia nidzse nonedz naa quia ye to, laa ne gow to grê ncuaae row zha gol. Haxta niinagaa gard tsoguic to zha nac grê mine ndzielguic,

³ sacne laa to bii zienal mine run miech guidzliu, laa ne gun to mine racladz Dios. Golguien ganle zha rac to, no to rlozhd

glëëlsa to, rlozhd tilla to. ¡Led squid gon no gac zha ne nole xnëz Dios!

⁴ Pe i na rriee bla to rnee: “Tel no xnëz Pabl no no”, rrieequegaa zla zha ne rnee: “Tel no xnëz Apol no no.” Gase rlu ganle zienalë to miñe racladz Dios, sinque laa to zienal miñe no guic to.

⁵ Nana, ¿cho nac Pabl, chogaa nac Apol parne no yquaaqui tsodil to? Nli no biadseed to Xtiidz Dios, per tib ngundziin winse nac no lo me, bdziuuñ no miñe rnabey me no.

⁶ Nac cuent rii zig nac tib guielgon, naa blo bni liu, laa Apol bgaala; per Dios nac men ne bnabey blana ni me pchooba.

⁷ Golwi sca ganle Diosse nac men non, sac me pchoob bni co, tel no peet ncuaañe nroob bdziuuñd no, lëë gdib tib bloo bni liu, stib bgaala.

⁸ Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac men ne gdeed miñe rieguial zho tib tib zho por dziin ne been zho.

⁹ Tib ngundziin winse nac no lo Dios grop no Apol; laa to nac zig tib lë liu ne quaiyan Dios, zig tib yu ne quizaagaa me.

¹⁰ Pa lotaa wen Dios, sac zbooblo me naa naa psilo yu co, ni blu me lo naa zhapaa none tsaaw. Nli naa bgaa blee xcimienta, per niina zhaale zha ne nosoquiaw. Tib tib zha ne nosoquia yu co, none guien zho zaacse gzhixcuuaa zhow, tsienal zho zigne nace xcimienta ga,

¹¹ sac gon nod pe nacne csëëb zho stib cimient, tibaque cimient no, lëë cimient co nac Jesús.

¹² ¡Laa cimient co nole! Nana no zho gzaa yu co niapse guiib or, niapse guiib plat, no zho gzaaw grë quie niash, no zho gzaaw yag, nogaa zho gzaaw grë pe guizh, pe yag xidgaa.

¹³ Zeene gdziñ dze ne laa Jesús gun guielwxtis, ga glu dien zha nac xtsiin zho; sac gal dze co grësew laaw none ted lo gui, ga glu dien pa miñ lëbraa.

¹⁴ Zha ne pquuin ncuaañe rlëb lo gui, ib tedsod zгаа zho miñe rieguial zho gdeed Dios lo zho;

¹⁵ laa zha ne pquingaa grë ncuaañe znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

¹⁶ Golgacnan ganle xyadoo Dios gon nac to, sacne zdoo to rbëz zhiEspiritu me.

¹⁷ Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho.

¹⁸ Golguien sca zaacse gulgac, tel no zha ne rzac nroob rac zho wseed lo guidzliu rii, gnalod zho miñ co; nend lej lo co no zho, ygaad zho miñe nacpaa guielrac, guielrac ne rneedz Dios.

¹⁹ Sac gon grë guielrac ne no lo guidzliu rii, ncuaañe beelze naca nëz lo Dios. Zigne raquetaque lo Xtiidz me zaatne rnee: “Grë zha rac ne no lo guidzliu rii, lëëque lo grë guielrac ne zienal zho, ga rlu Dios ganle paat rquiinda.”

²⁰ No stib zaatne rnee: “Nanle Dios grë zhgab ne nonie guic grë zha rac, ncuaañe paat rquiinda.”

²¹ Tsode to sca lozhd gacniats to dien cho xnëz miech guidzliu rii no to, golguien ganle grëtaa ncuaañe no, laa Dios psana par yquina lo to.

²² Zig nac guidzliu, guielmban, guielgut, ladznia to now, niicle ncuaañe no niinaw, ncuaañe naragaa ziaada, chen tow; haxta Pabl, Apol, Pedr, ib laa no zo nu par dziuuñ no xyudar to.

²³ Grëse to tibaque xnëz men ne no to, lëë men co nac Jesús, men ne pxeel Dios.

4

Zha rzac zha ne rienee xtiidz Dios

¹ Golguien sca tib moz winse nac no lo Jesús, laa me bzoo no noseed no miech xtidz me miñe gocnand miech padzeela.

² Ni zha ne gon znu ruñ tib dziin, ible none nguzobdiidz gac zho lo men ne rnabey zho.

³ Gacxe waa tel zha rzac to naa, tel zha rzacgaa grëraa miech naa, peet zienied guic naa. Haxta ni miñe rzuac naa nac naa, peet nonda, rieguiald guiep naa znutaa znutaa nac miñe noyuñ naa.

⁴ Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz miñe gaguial naa.

⁵ Gacxe waa, gunde to ne glöle to guiab dien cho nac zha ne wenraa; sac miñ co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grë miñe rza guic ne, miñe no zdoo ne, laaw glu me; grë no ne nodziuuñ no xtsiin me, dze co laa me gneedz miñe rioguiapaa no tib tib no.

⁶ Bets, bzian, niina ne nozet naa no lo to nu grop no Apol, quaiyunnon naa naa, niicle nosanwindgaa naa me. Ga sca ganle golwi, zeena cseed to gban to zigne nac Xtiidz Dios, tsode to lozhd dien cho non, chogaa nond.

⁷ Stiba, ¿cho nadien në lo to ne gunnon to to? Grë ncuaañe rap to, grë ncuaañe rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquieliger to bgaa tow?

⁸ Niats rac to, masaque rzac to grële zhiwseed Dios nan to, gaxle zo to lo me, haxta rzac to tole nac zha rnabey, paat rquiindraa

no. Wenzhe tebaa nligaa zha rnabeyle nac to, zeena haxta ye no zley no.

⁹ No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi grë anj̄ dien zha rac no; zig ruñ miech rieso zho lo zha ne rnabey zho ret.

¹⁰ Ne znu quiadziiun no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no.

¹¹ Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guien̄d, rdib rdzaag no rdziun̄ no dziin rdziniaa no ncuaane rquiīn no.

¹² Ni rlozh ga rrieque miech rsacsi zho no. Rriequia zha ne rdzibdee no, per rdziun̄ no gdzibdeeqe no zho, sinque mazd rnab no lo Dios gun̄lay me zho; zha ne rtsidil̄ no, rdziun̄casd no zho.

¹³ Rriequia zha ne n̄ rnee lo no, per no, diidz wen rtsire no lo zho. Masaque rzac miech no, zig rzac zho grë ncuaane paat rquiindraa, zig rzac zho grë ncuaane nole lo quizh.

¹⁴ Laa naa rzet grë min rii lo to, per nacda par gun̄ctoladz naa to, sinque laa naa rzeta zeena guien to zaacse gac to, golguien gan̄le rleyinie naa to, rzaac naa to zig tib xp̄ëd naa.

¹⁵ Niice niaca min̄e ndal zha ne guidseed to i, niicxe guiaad nzian mil zho waa, per led gr̄ed zho tsoxcopaa to zig rioxco tib dad xp̄ëd zho. Zigne rne naa ga, xp̄ëd naa nac to, rriequia pxoz to nac naa, sac gon naa glo bial̄ne xtiidz Dios lo to, laa to bzëeb xn̄ez Jesús.

¹⁶ Goltsoxo sca, gol̄ban zigne mban naa.

¹⁷ Ni ible min̄copaa gon̄ laa naa rxel̄ Timoté ziaad lo to i, l̄ëe stib xp̄ëd naa i, ne nligaa rleyinie naa me, tib zha nguzobdiidz nac me lo men̄ ne rnabey me. Laa me ziaad i, me gzodiidz lo to gan̄le zigne rseed naa miech gr̄ese zaatne ziyateed naa, scagaa noxco naa mban naaw.

¹⁸ Rien naa no bla niats ne nac to i, rzac nliidraa guaiā naa lo to i stib.

¹⁹ Gacnan zho gan̄le, gneedzse Dios diidz, ible laa naa none guaiān̄iob, dzigo bii zdzian̄ ne dien̄ pe nli na nacie zho xpoder Dios, te loxaque rnee zho ye.

²⁰ Sac gon̄ zha ne ngab xn̄ez Dios, gr̄e min̄e rnee zho none glu nacie zho xpoder me, nacda loxaque diidzse.

²¹ ¿To nadien̄ zha racladz to? ¿Pe rdziladz to guaiā naa guaialgactox naa lo to i, te mazd wen ye niapse diidz ndooladz, diidz nex guaiāne naa lo to?

5

Zha ne run̄ctal xto!

¹ Zëeb diidz gon̄, lad to i no tib zha bgui ne quiayun̄ tib dol̄ nroob; per ni gr̄eraa miech ne gard gliladz Xtiidz Dios rund̄ min̄ co. Bin naa l̄ëeqe xn̄iaa pchoob zho quiangob zho.

² ¿Yo na ne rzac to gr̄ele zhiwseed Dios nan̄ to, gaxle zo to lo me! ¿Laa ne ctoladz to, laa ne tso to guiel̄n̄e, cuee to zha qui lad to, lel̄ no to rlozhd gacniats to!

³ Niicel ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to gan̄le zha rieguiāl gac zha co:

⁴ Gr̄e to ne nac to zha ne ngab lo Jesús, rnab naa lo to ycaalsa to zigne rnabey me. Ndiönle ne gan̄le zeene laa to ycaalsa, ga zo Jesús lo to, scagaa naa, golgun̄ cuent lo to i zo naa.

⁵ Squi ndxie to gr̄e to, golzon̄ez zha co, golcueegazh zho lo to i, tsie zho tsietsobe zho ladznia men̄dox, ga tedn̄e xcuerp zho guien̄ zho gan̄le pe noyun̄ zho; nan̄ new togo zzhixcuaa zho stib, zeena ycaania Jesús zho gal̄ dze ne laa me gbiire guiaad.

⁶ ¿Xl̄ese gon̄ squitaa racniats to rzac to zha mbe nac to, ni randze to zha ne quiayun̄ dol̄dox qui! ¿Pe rien̄de to tel̄ne glisquide to min̄e quiayun̄ zho, ib tedsod zrieequiaraa zha ne squi gun̄ctal xto!

⁷ Zha ne squi nac, masaque nac zho zig nac gr̄e guiel̄guidzdox ne znuse rded; golcueegazh zho sca, zeena ine mbe gac to n̄ez lo Dios, tete to guiel̄guidz qui. Golguien̄ gan̄le laa Jesús psanmbe ne, min̄copaa gut me, goc me gon̄ n̄ez lo Dios zig carner yeen ne rgogon zho lo me Ini Pascw.

⁸ Golgotsaa gban ne zigne racladz Dios, gr̄ese tel̄ zha whan ne glo, gr̄ese guiel̄yozh, gr̄ese guiel̄ntseeb ne bdziun̄e ne, none csaan new gr̄esew. Ndzinli sca gol̄gac, golt̄sienal̄ min̄e nac diidzli; none mbe gac to n̄ez lo Dios, zig guietxtil ne notsd ncobi.

⁹ Lo stib guits ne pxel̄ naa lo to ga, laa naa psole diidz lo to gan̄le ctsieelsade to gr̄e miech yozh ne ndzinlid mban.

¹⁰ Zeene sca pso naa diidz lo to, guiabde to togo naca parne ctsieelsadraa to gr̄e zha ne gard gliladz Xtiidz Dios, zha ne rquiangob zha ne led tsiield, gr̄e zha ne zienāl loxaque gun̄lo dimi, gr̄e zha ne run̄ guiel̄gbaan, gr̄egaa zha ne rnal̄o gr̄e mdio. Led zha coda, sac laga mban ne lo guidzliu rii, ible zan̄lsa ne gr̄e ne zho.

¹¹ Sinque zha ne bzet naa ga ctsieelsade to, nac zha ne nacle diidz xn̄ez Dios no zho, ni noque zho quiayun̄ctal zho xto! zho, no zho rquiangob zha ne led tsiield zho, no zho zienāl loxaque gun̄lo dimi, zhiga zhiga laa ne gleyinie zho Dios lel̄ zhaa

ncuaane rleynieraa zho, no zho rquiadi-idzguizh samiech, no zho rzudz, nogaa zho run guielgbaan. Ne nligaa zha ne sca nac, per ni tib guielwagw gawniede to zho.

¹² Tel grëraa zha ne gard gliladz Xtiiadz Dios, led ned riogual glisqui mine quaiyun zho, Dios nac men ne gunquizh zhow.

¹³ Sangue zha ne nacgrë ne, zeene noyun zho tib ncuuane ndzinlid, ib rieguial glisqui new lo zho. Gacxe nana sca, zha ne squi quaiyunctal xtol i, golcueegazh zho lad to, ni spalal gandzedraa to zho.

6

Zha none gac guielwxtis

¹ Laa to gocnanle ganle, to rieguial glisqui tel pe nac ncuuane nonguield run zha ne nacgrë to. Lëda i gon run to, zeene pe tib dil rap to, lëelëd zie to lo wxtis laa ne gbig to lo zha ne nacgrë to, zha csiooglo lo xtil to.

² ¿Niacxe nande to zha ne ngab xnëz Dios, zha co cobey zha nac xtol grëraa miech zeene gal dze ne laa Dios gnabeya? ¿Pe nac dzigo grielod tose csiooglo lo tel pe dil win ne rap to?

³ Haxta grë anjl name, ne gon cobey pe nac grë mine quaiyun zho. Gacxe waa, grë dil ne rac lo guielmban rii, ne riogual cobey zha guiooglo low.

⁴ Sca gon gun to, led node to, rnadse pew laa to ziele lo wxtis.

⁵ ¿Pe ni tib lë guielto guiend lo to? Lo grë to, ¿niacxe goon guiend zha ne grielo gnee lo to, cuëz lo xtil to?

⁶ Nazdpaa rdziladz to dil, ¿pe i na lëëque zha ne nacgrë to quaidilnie to, ni rlozh ga zieque to zienie to xtil to lo zha ne riladzdz Dios?

⁷ Pe riende to tib guielto doxle i squi no to lëëque to quaidilisa. Mazd golxcw tel cho pe run to.

⁸ Mazdraa gon mbana squi no to rsacsi to miech, ni haxta zha ne nacgrë to rsacsi to.

⁹ Nanle to ganle zha ne squi run guielntseeb, grielod gdzin zho zaatne rnabey Dios. Tseniewguite guic to sca. Golsoladz ganle grëse zha ne run guielyozh: zig nac zha ne rquiangob zha ne led tseield zho,

zig nac zha ne rquiangob zha ne nole tseiel, zig nac zha ne nac mrazh,

zig nac zha ne rnalo grë mdio laa ne gnalo zho Dios,

ni tib zho grielod gdzin zaatne rnabey Dios.

¹⁰ Scaque:

zha ne nac ngbaan,

zha ne zienie guic loxaque dien zha gunlo dimi,

zha ne nac ngonziu,

zha ne rzhixcuuaa diidzguizh,

zha ne rungüet miech par cuan zho zho; ni tib zho ygaad guielnzaac co.

¹¹ Blalaa to bio lo grë dol co glo, sangue niina miech mbele nac to nëz lo Dios, laa Jesús ni Espiritu Sant psanle to zig tib zha ne peet xtol, laa me psanwenle to nëz lo Dios.

Gunctald zho xtol zho

¹² Nli ndal ncuuane zac gun ne, gunctalda xtol ne, niicle choot rcaadgaaw, per led grëda rquiin. Tel naa, niicle no ncuuane zrieelo gun naa, per rund naaw; sac racladzd naa guien naaw, lozh ga lëew gnabey naa.

¹³ Zëeb diidz rnee zho: “Laa guielwagw biaan par gow miecha, scagaa zdoo zho laaw biaan par tsodzëw guielwagw.” Nli scaw, per guiabd ne togo por min co lega gowcho ne. Pa rquiin ne lega tedso gow ne, sac gon zigtaa zdoo new, zigtagaa guielwagwa, zdzin dze ne gnitlo Dios. Guielwagw ga na, sangue grë guielyozh nerun miech rquiangob zho zha ne led tseield zho, biaand ne par dziuun ne min co, sinque laa ne biaan par gban ne zigne rdziladz Dios, sac me rnabey ne.

¹⁴ Tel new nitlod ne, sac gon zigne bleeban Dios Jesús con poder ne rap me, scaque zbeeban me ne zeene laa dze co gdzin.

¹⁵ Golgacnan ganle, rrieequia lëë tiblë xcuerp Jesús nu gon nac ne tib tib ne. Nana, ¿pe nonguiela ga dzigo dzieel tib lë xcuerp me ga xcuerp tib wnaa ro nëz? ¿Nonguielda gon!

¹⁶ Sac gon zha ne raanie tib wnaa ro nëz, rrieequia tibaque rac zho ga grop zho wnaa co. Rnee lo Xtiiadz Dios, par me: “Zeene laa mgui racgrop tib wnaa, tibaque miech rac zho ga grop zho.”

¹⁷ Scagaa zha ne rzëeb xnëz Jesús, tibaque rac zho grop zho me, zhiEspiritu me racnie zho.

¹⁸ Gacxe waa, gunde to guielyozh yquiangob to zha ne led tseielde to. Lo grë dol ne no, min riise nac mine xcuerppaa miech rguitnie zho. Sac gon zha ne run guielyozh co, masaque rsanbeed zho zho ga.

¹⁹ Golguien ganle, zha ne nole xnëz Dios, masaque zha nac zig tib yadoo zaatne rbëz Espiritu Sant, Espiritu ne rdeed Dios rbannie zho. Led nedraa rnabey xcuerp ne,

²⁰ Diosle rnabeya, sac gon bzhiile me ne ni nroob gocnon ne lo me. Gacxe waa, zigtaa xcuerp new, zigtaa xpensar new, gotsaa yquiin new par cxobnen ne ganle pa lotaa men nroob nac me.

7

Rtsire Pabl lo zhiwnabdiidz zho

¹ Lo guits ne pxeel to lo naa, nzian ncuuane rnabdiidz to, nu ganle laa naa ct-sire lo wnabdiidz co: nli wena, telne niaca mine grielow ctseelniad ne.

² Per parne tsod pe yquiaaqui cho guñ guilyozh, tsonie zho zha ne led tsielnd zho, mazd wena zigtaa mguiw, zigtaa wnaaw ctsieelnia zho, tib tib zho gbanniese zho tsielnd zho zigne rieguiala.

³ Zha ne ptsieelniale, zig nac mgui none gnee zho lo tsielnd zho zeene racladz me, scaquegaa wnaa zeene racladz tsielnd zho gnee lo zho none siguiel zho.

⁴ Sac gon wnaa ne rtsieelnia, led zhadraa rnabey xcuerp zho, sinque tsielnd-le zho rnabeya; scaquegaa mguiw zeene laa zho rtsieelnia, tsielnd-le zho rnabey xcuerp zho.

⁵ Golguien sca, niicle mguiw niicle wnaaw nodne yca zho xcuerp zho lo tsielnd zho. Laa telne rzacgaa zho none rquiind zho tsielnd zho tib blalaa dze, sac rquiabladz zho gzodiidznie zho Dios, wena totsaque guiaa zhow diidz grop zho. Per zigne ted ga, gbiireque gnee zho lo tsielnd zho, sac gon zha ne grielod cxcw, nend ccheep mendox zho guñ zho guilyozh.

⁶ Ne znu rne naa lo to, guiabde to nagon togo rne naa nopaa ctsieelnia to.

⁷ Telnaa, rzac naa wena tebaa grese to znu ctsieelniad, zigne nac naa; per na ncuane gacd ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelniad, per rley zho mban zho zigne nac zho.

⁸ Zig nac gre zha ne bii tib, greгаа zha ne gutle tsielnd, wena tebaa grielod scase guiaa zho,

⁹ per telne rien zho lebnd xcuerp zho, dzigo mazd ctsieelnia zho. Mazd wena ctsieelnia zho, ledle so zho tib zho ni tel rec rdzu zho.

¹⁰ Sangue zha ne ptsieelniale, laa naa rso diidz lo zho csaand zho tsielnd zho, ni nacda xtidz naa, sinque ible sca rnabey Dios.

¹¹ Laa tel zha ne guiaabgaa csaan zho tsielnd zho, zaca, per leeraasi grielodraa gbiire ctsieelnia zho, mazd mine naca telne zrieelow ycatsieelnd zho stib, o guiaangaa zho tipe zho.

¹² Nu na ganle laa naa gnegaa chop lan xtidz naa lo zha ne led yed tsielnd riladz Xtidz Dios; tib diidzse naca gni naaw, nacda mine rnabeyppaa Dios. Zha bgui ne mbannie tib wnaa ne riladz Xtidz Dios, per telne rio guic wnaa gbannie wnaa zho, nodne csaan zho wnaa.

¹³ Scaquegaa wnaa ne mbannie tib mgui ne riladz Xtidz Dios, nod csaan zho mgui co telne riopaa guic mgui gbannie mgui zho.

¹⁴ Zigtaa mguiw, zigtagaa wnaaw, zha ne sca mbannie tib zha ne riladzle xtidz Dios, ye zho runlay Dios ga, nenda haxta zio dze ne ye zho gliladz xtidz me. Sac telne ctso zho, laa ne gbigraa xpæd zho lo Dios, lel znu sozit meed.

¹⁵ Nana, telne zhalgaa zha ne riladz Xtidz Dios ga, rnab csaanla zho, peet nacda

maase ctso zho, nod pe nacne gzoobguicppaa tsielnd zho lo zho cuéz zho. Sac gon zha ne riladzle Xtidz Dios, laa me bredz zho parne zaacse gban zho, bredzd me zho par tsodil zho;

¹⁶ stiba, nand zho dien pe zdziñ dze ne gliladz tsielnd zho Xtidz Dios.

¹⁷ Mine naca tib tib to goltscoxco guñ to mine rdziladz Dios. Zigtaa zha ne pso me ctsieelnia, zigtagaa zha ne pso me scase guiaa, sca none gac to; scagaa zha ne ncaatsieelnd-le zeene riladz zho xtidz me, none sca guiaa zho niicle telne riladz tsielnd zho xtidz me. Grese zha ne ngab lo me, diidz rii rso naa lo zho.

¹⁸ Zig nac gre zha ne nole bey xcuerp zeene laa zho rzæb xnéz me, sca no zho bey co guñ zho ne yqueets zhow. Zha ne na nodgaa bey co zeene rzæb zho xnéz me, scaque nod pe nacne tsopaa zho bey co.

¹⁹ Mine mazdraa non lo me, gban zho zigne rdziladz me, guindraa ne dien cho no bey, chogaa noda.

²⁰ Zigne rneque naa ga, grese zha ne rzæb xnéz Dios, tel zha nac zho zeene laa me bredz zho, scase none guiaa zho.

²¹ Zig nac zha ne nac ngundziin lo ben, peet tsienied guic zho guiab zho dien zha griee zho ladznia zha ne rnabey zho; per telne gdeeda diidz, zac tscoxco zho dien zha griee zho lo zha co.

²² Zha ne sca nac ngundziin lo ben zeene bzæb zho xnéz Dios, guien zho ganle rrieequia zonlaale zho, sac gon laa Jesus psilaale zho lo gretaa dol ne bio zho. Zha ne nacdga ngundziin lo ben zeene bzæb zho xnéz Dios, guien zho ganle tib ngundziinle nac zho lo Jesus niina, me rnabey zho.

²³ Golguien ganle, grese to laa Dios bzhiile to ni nroob gocnon to, gacxe waa mele rnabey to; ni togaa, lo me none guñ to dziin, gdeete to diidz lega gnabey miech to.

²⁴ Sca nasca gon bets gaca, tib tib to zigne nace to zeene bzæb to xnéz Dios scase no gban to, ine gleynie to me.

²⁵ Stib wnabdiidz ne run to ga dien zha gac zha ne gard ctsieelnia, gneli naa lo to ganle, guind tib xley Dios mine gnabeyppaa dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdoo Dios rbedz me, mine rquiin min co rnee zho.

²⁶ Gre ne ne nac ne zha ne riladz Xtidz Dios len dze rii, nligaa ngan nac lo xquielmban ne, gane zoot naa wena zha ne sca gard ctsieelnia, maase guiaantib zho.

²⁷ Zha bgui ne na ptsieelniale gaa, grielod gni naa guiaantib zho; sca mbannie zho tsielnd zho; per tel zha ne gard ctsieelniaw, mazd sobd guic zho ctsieelnia zho.

²⁸ Zha ne racladzpagaa ctsieelnia, zigtaa mguiw zigtaa wnaaw, led dol d ga guñ zho

teĴne laa zho ctsieelnia; per gacnaŋ zho ganĴe, zeene laa zho pcatsieel-le, ib tedsod nroob guiĴnĕ ne gan zho por grĕ miŋe noyac leŋ dze rii.

²⁹ Miŋe none guieŋ to: zhisle nac dze ne so ne lo guidzliu rii, led nroob nac ngbidz ne grieeo dzuuŋ ne xtsiŋ Dios; gacxe waa, zha ne nole tsieel, mazd sac zho zho zig tib zha ne guiĕnd tsieel.

³⁰ Zha ne quianie dimiw, zha ne no guiĴbleya, zha ne nogaa guiĴnĕw, gdeete zho diidz yca grĕ ncuaaŋ co lo zho par gun zho xtsiŋ me.

³¹ Zha ne bienle ruŋfalte grĕtaa ncuaaŋe rquiŋ zho, gdeete zho diidz ctse grĕ ncuaaŋ co lo zho, sac zigtaa guidzliuw, zigtaa grĕ ncuaaŋe no low, zdziŋ dze ne nitlow.

³² Miŋe racladz naa peet zhgab ctsed lo to. Golwi ganĴe, zha bgui ne tib, tiblique zienie guic zho ruŋ zho miŋe rdziladz Dios, miŋe nac xtsiŋ me.

³³ Laa zha ne no tsieel, grieeodraa sca gac zho, sac laa guic zho zienie zha gbannie zho tsieel zho, zha grieeo gun zho miŋe rdziladz me, miŋ co rionieraa guic zho.

³⁴ Scaque grĕ meŋ wnaa, zha ne tib, riox-coraaz zho ruŋ zho miŋe rdziladz Dios, dib nacse zho rbeeladz zho zho lo xtsiŋ me. Laa zha ne ptsieelniale, xco ne dieŋ zha gbannie zho tsieel zho, dieŋ zha grieeo gun zho miŋe rdziladz tsieel zho, xco co rioraa zho.

³⁵ Laa naa rne miŋ rii lo to, per guiabde to togo rca naa ctsieelnia to, sinque laaw rne naa parne guieŋ to zha gun to, zeena grieeo zaacse gac to gun to miŋe rnabey Dios.

³⁶ Zha ne quianie wnaa nguieg, teĴne rzac zho nonguiĴda ga scase ted lo xquiĴnguieg xpĕĕd zho, sinque none ctsieelnia zho, peet nacda, led doĴd ga ctsieelnia zho.

³⁷ Laa teĴne rzacгаа zho, wenraaw ctsieel-niad xpĕdwnaa zho, ible scale pquiabladz zho guiaaŋ meĕd, wenaque ga teĴne sca rzac zho.

³⁸ Wen ga gun zha ne sca gdeed diidz ctsieelnia xpĕdwnaa, per mazdraa wen ga gun zha ne rzac mazd ctsieelniad xpĕĕd.

³⁹ Nana, wnaa ne retгаа tsieel, nli zeene mban tsieel zho rnabey ley ne tsieelse zho gbannie zho; per zeene laa tsieel zho ret, zac ctsieelnia zho teĴ cho stib mgui ne racladz zho, totsaque zha ne noque xnĕz Diosa.

⁴⁰ Per teĴ naa, rzac naa mazdraa wen gban zho teĴne sodraa guic zho ctsieelnia zho stib; sca nagon rzaac naa wena, ni led xtiidzse naaw sac rziŋ naa led tibd naa, Espĕritu Sant nacie naa.

8

Bĕĕl ne rgogon zho lo mdio

¹ Stib wnabdiidz ne ruŋ to ga, dieŋ zha nac guiĴwagw ne rgogon zho lo grĕ mdio, pe zrieelo gdioowa, te grieeoloda ye. Zootle na grĕle to naŋ miŋ co; per no hor zeene squi rzac ne grĕlew naŋ ne, leĴ racniats ne, laa ne gacndooladz ne gnee ne lo grĕ zha ne nagrĕ ne dieŋ zha gun zho parne tsogucraa zho Xtiidz Dios.

² Zha ne rzac grĕlew rac zho, ga rlu zho ganĴe peet riĕnd zho.

³ TeĴ Dios ruŋbey me tib tib miech, naŋpaa me cho nac zha ne rleynie me.

⁴ Zhapaa dzigo gac, Ĵpe wena dioow ne xpĕĕl grĕ ma ne rgogon zho lo mdio ga, te wenda ye? Ndionle ne ganĴe grĕ mdio ne riegan miech led Diosd ga, tibaque meŋ ne nac Dios no.

⁵ No zho rzac nziandox Dios, nziandox meŋ rnabey no, no me no gbaa, nogaa me no lo guidzliu,

⁶ sangue ne ndion ne ganĴe tibaque Dios no, lĕĕ meŋ co nac Pxoze ne, me psan grĕtaa ncuaaŋe no, me psan ne parne dzuuŋbey ne me. Ni scaqueгаа, tibaque meŋ ne rnabey ne, lĕĕ me ga nac Jesuŋ, me bzaa grĕtaa ncuaaŋe no, me nac meŋ ne neezd xquiĴmban ne.

⁷ Per no zha ne riladzle Xtiidz Dios, bii gardaque guieŋ zho ne tibaque Dios no. Tibaque rzac zho mban mdio, gane zeene rquiŋ zho bĕĕl ne rgogon zho lo mdio racchop guic zho, lĕĕque zha ruŋctal xtoĴ zho ga sca ruŋ zho.

⁸ Golguien sca, teĴ Dios rwid me dieŋ cho pe row. Guiabd ne togo por gow ne o gowdгаа ne bĕĕl co laa ne guiaŋnziuu lo me.

⁹ Laa to nanle nasca, peet nacda yquiŋ to guiĴwagw co, per scagaa golcobey adel miŋ co yquiaaqui guncfal to xtoĴ tib zha ne squi bii racchop guic.

¹⁰ Sac gon, nenda tibliladz to zob to zaatne riegan grĕ miech mdio noquiŋ to bĕĕl co, ni gan tib zha ne bii racchop guic. Zeene gan zho to, nend yeque zho gbig gow zhow, per zeene lozh ga tibaque laa guic zho tsienie lĕda ga beŋ zho.

¹¹ Zha ne sca gun, niicle ne nli riĕnd zho peet nacd ncuaaŋe noyŋ zho ga, per por zha laa zha co guncfal xtoĴ. Gunscade to, golguien ganĴe ye zho ga psilaa Jesuŋ zeene gut me lo cruz;

¹² gacxe waa, teĴne sca gun to por to yquiaaqui gun zho tib ncuaaŋe rzac zho nonguiĴd, lole Jesuŋ ga quiaayŋ to falt.

¹³ Miŋ co nagon, teĴ naa mazd maase gowd naa bĕĕl co, teĴne por miŋ co yquiaaqui guncfal naa xtoĴ tib zha ne nole xnĕz Dios; sac lĕda ga gun naa gac naa zig tib quie ne griĕl ni zho.

9

Mine rieguiaŷ zha ne ruŋ xtsiin Dios

¹ Zigne nagon zac guŋ to grè ncuaaŋe wen ne racladz to, scaquegaa naa, zac gnab naa ncuaaŋe wen ne racladz naa. Teŷ naa gonlo naa Jesús meŋ ne rnabey ne, Dioszhal bzo naa pxeel me naa none naa Xtiidz me. Ne squi ptsëë Dios lo xquielmban to zeene bialseed naa to, i rlu ganle me nacie naa.

² No zha ne rzac nlid Dios pxeel naa, sanŋe to nanwen to ganle me pxeel naa, sac gonlo to mine beŋ naa, mine blu naa; ni scagaa niina, lo xquielmban to i rlu ganle ne nli xtsiin me quiaayun naa.

³ Grè zha ne sca rzac nlid Dios pxeel naa, rzac zho peet raguiald naa, gacnan zho ganle:

⁴ ¡Raguiaŷ naaw gon! Ni grëragaa zha ne rdziuŋza no xtsiin Dios, rioguiaŷ no gneedz to ncuaaŋe yquiin no, gneedz to zaatne gbiaaz no.

⁵ Teŷ naa, haxta raguiaŷ yquianie naa tib meŋ wnaa ne gac stieel naa, ine sënne naa me zigne ruŋ grëraa zha ne rdziuŋza no dziin rii, zig nac Pedr; zig nacgaa grè zha bets meŋ ne rnabey ne.

⁶ ¿Te loxaque grop no Bernabé naye znu zhaaque no dziuun no stib dziin, par gdziniaa no ncuaaŋe diow no?

⁷ Golgan ganle, zig nac zha ne rzëëb lo xtsiin menguiib, ¿niacxe zhaa lo dziin ne rdziniaa zho ncuaaŋe row zho rio zho lo xtsiin menguiib? ¿Zha ne rangaa, niacxe rieguiaŷd zho yquiin zho ncuaaŋe rac zaatne ran zho? ¿Zha ne na rangaa ma, niacxe rieguiaŷd zho yquiin zho ma zigne racladz zho?

⁸ Guiabde to togo bod guicse naa riab mine rne naa nu, golgan ganle haxta lo ley ne psan Moisés

⁹ no tib zaatne rnee: "Zeene guncun to xcon to dziin gzëëni ma mzion zhubxtil gacmbew, code to guex ro ma, golsaan gow ma mine yгаа ro ma." Golwi ganle zha rnee Dios, nana pe nan to ngonse rquia zdoo me.

¹⁰ Lëda gon, grëse ne rquia zdoo me ne. Ga rlu me ganle, zha ne ruŋ xtsiin me, ible rieguiaŷ zho ycaa zho mine non xtsiin zho. Zig nacaque guielgon, zigtaa zha ne rana, zigtagaa zha ne ruŋmbe grè guielnzaac co, ible rieguiaŷ zho yquiin zhow.

¹¹ Teŷ no, rrieequia nazho tib gon i bdziuun no biadseed no to Xtiidz Dios, ¿niacxe rioguiaŷd no dzigo gneedz to ncuaaŋe yquiin no?

¹² Blalaa zha ne nale griiŋ riaadted lo to i, rnabey zho to rdeed to ncuaaŋe rquiin zho, ¿pe leŷ no dzigo rioguiaŷd gnaba lo to? Mazdraa gon rioguiaŷ no gnab now, per haxta lo nadze gard dziuun no miŋ co, notaa nan zha rdziniaa no ncuaaŋe rdioow no; zeena guiaaŋd zdoo to, lozh ga laa to csaan mine nac Xtiidz Dios.

¹³ Led nanle to ganle, grè zha ne ruŋ dziin leŋ xyadoo Dios, psan me diidz grè ncuaaŋe nac gon, ga xen zho pe yquiin zho, zig nac zha ne ruŋ dziin zaatne nac lo pcoog, lo ncuaaŋe rielogon miech ga, ga rdioob ncuaaŋe row zho.

¹⁴ Ni scaquegaa psan Jesús diidz, zha ne cseed miech Xtiidz me, ib none lo dziin co gdziniaa zho pe yquiin zho.

¹⁵ Per teŷ naa gon, waltaa peet gard gnab naa lo miech.

Laa naa rzet miŋ rii lo to, per guiabde to togo ruŋ naaw parne csilo to pe gneedz to lo naa. Ib zanaŷd naa miŋ co, sac rley naa znu quiaayazhd naa quiaayun naa xtsiin Jesús, mazd maase guetgbin naa, lëdle ctiche zho guielbley rii lo naa.

¹⁶ Niicle ne znu quiaayazhd naa quiaayun naa dziin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, jprobsaxe naa telne gned naaw!

¹⁷ Noyund naaw par dien pe premio yгаа naa, sac zig rne naa ga Dios bzo naa, me rnabey naa quiaayun naaw, masaque nacse naa zig tib nguŋdziin.

¹⁸ Par naa, lëële premio nu nac guielbley rii ne znu liga quiaseed naa miech Xtiidz Dios, rnabd naa gneedzpaazho ncuaaŋe yquiin naa niicle ne raguiaŷ naa gnab naaw.

Tsoxco zho yгаа zho premio

¹⁹ Stiba mazdragaa wena, znu choot noneedz ncuaaŋe yquiin naa, sac sca griielod cho gnabey naa; per niicle ne nagon choot rnabeyd naa, zhaal naa rac naa zig tib nguŋdziin lo grëse miech, parne gdeeda diidz tso guic zho sëëb zho xnëz Jesús.

²⁰ Gacxe waa zeene no naa lo grè zha Israel, rac naa zigne rac zho, zeena tso guic zho gliladz zho cho nac Jesús. Zeene nogaa naa lo grè zha ne zienaŷ xley zha Israel, niicle ne rnalodraa naa ley, per ruŋ naa grè ley ne zienaŷ zho, zeena sca griieelo yquiabladz zho sëëb zho xnëz Jesús.

²¹ Scaquegaa zeene no naa lo grè zha ne ruŋbeyd ley co, rioxco naa rac naa zig tib zha ne ruŋbeyda; per guiabd ne togo haxta grè ncuaaŋe rleynidraa Dios ruŋ naa. Laa naa ruŋ miŋ co, zeena ye zho sëëb xnëz Jesús.

²² Grè zha ne pense quiaayacnan zha nac Xtiidz Dios, zeene no naa lo zho, ruŋd naa gne naa grè ncuaaŋe gard guien zho zha nac, ruŋd naa csanwin naa zho, sac mine rioxco naa lozh gliladz zho cho nac Dios. Tib tib miech, rguib naa rac naa zigne rac zho, parne griieelo gzodiidz naa lo zho cho nac Jesús, zeena gacnan zho zha sëëb zho xnëz Dios.

²³ Laa naa ruŋ miŋ co, parne gdeeda diidz gnee naa Xtiidz Dios grëse lo miech, ni

scagaa, gley naa gan naa ye zho yгаа lo guieIndzon ne zhobnee lo Xtiidz Dios.

²⁴ Nanle to ganle zha rzac zha ne rie tib lo corr, nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grēse to goltsoxco xoon to zeena grēse to yгаа tib premio.

²⁵ Grē zha ne sca rio tib lo wguit, par grieeo gun zho gan rioxco zho ran zho xcuerp zho, rund zho ncuaaane csaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco yгаа ne tib premio ne gdziind dze nitlo.

²⁶ Gacxe waa, tel naa tibaque noxco naa dien zha xoonraa naa. Nanpaa naa pa gdziin naa, nacd naa zig zha ne riend dien pa gdziin, zha ne lega rquiaagaa puñet, rdeete zhow zaatne no ygaaw.

²⁷ Ni lalnu rdete naa diidz gac mine racladztāa xcuerp naa, tibaque rnabey naaw parne guiena ncuaaane nonguiel min co none guņa, led gunda ncuaaane racladztāaw. Laa naa run min co zeena gun naa gan, sac gon, guieItodox ga grieequia naa znu no naa none naa lo miech zha gun zho, ni tel lozh ga naapaze biaan bend naa gan.

10

Nodne gleynie miech mdio

¹ Bets, bzian, goltoladz ganle zha bzhaac grē pxozgol ne zha ne sca bzēnie Moisés ga. Pxeel Dios tib xcow been ncal zaatne zieetaa zho, ni pteed me zho lo Nisdoo Nizhnie.

² Zigtaa lo xcow cow, zigtaa lo nisdoo cow, masaque rrieequia lo co brobnis zho, parne tibaque niac zho niacnie zho Moisés.

³ Grēse zho gon milagr nroob ne been Dios, bnabey me bliaal quietxtil zhan gbāa bdeed me dow zho,

⁴ beencta me nis tib cho quie bdeed me go zho no zho dan bidz co. Lēēle Jesús ga bdeed nis co go zho. Lo zho ga zo me, rrieequia me ga nac quie ne bda nis go zho, sac mese rzhixcuaa lo grētaa xliaadz miech.

⁵ Niicle scataa gon Dios zho, per led grēd zho bioxco nion xtiidz me, nacne ndal zho bnitlo bioliuse zho dan co.

⁶ Gase na ganle gotsaa gwi ne zha bzhaac zho, zeena gzoobladz ne dziuun ne grē ncuaaane ndzinlid ne been zho.

⁷ Golguien gleyniede to mdio, zigne been zho. Rnee lo Xtiidz Dios: "Blozhse dow zho, go zho, laa zho psilo biee lo zhimdio zho."

⁸ Gotsaa gwi ne ganle, pe guieIne ne bgaa zho zeene brieequivia bla zho lega bionie wnaa, tib deque bnabey Dios gut galptson mil zho. iNi lalnu tsod guic to gun to min co!

⁹ Ib gunglēēde to Dios, sac zha, zeene benngulēē zho me, bnabey me brieequivia grē meel pquiaa maw zho, ndal zho gut.

¹⁰ Niicle glisquidgaa to tel pe nac mine quiaayun me, sac tel zha, sca been palal zho; nacne pxeelaque me anjl ne rnitlo, ndal zho bnitlo anjl co.

¹¹ Sca nagon bzhaac grē pxoz gol ne ga, gotsaa guien ne sca dziuund ne mine been zho, mine been zho ga laaw zhobnee lo Xtiidz Dios parne gacndion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

¹² Gacxe waa, zha ne rzac mbanpaa zho zigne racladz Dios, none nsin so zho zeena gund zho ncuaaane gunctal xtol zho.

¹³ Nli no ncuaaane rcheep ne gunctal ne xtol ne, per nacda ncuaaane griin rien. Pe zhidaa miech ne zieded lo min co. Tsod mine guiab ne ib lēbd ne griee ne lo. Mine naca none gnalo ne Dios, sac tel me ib csaand me guiab ne tib lo ncuaaane glēbd ne griee ne; sca nac xtiidz me, ni mesi gon ctsēēd me mine rnee me. Me nac men ne gacnieñ ne grieeo griee ne low.

¹⁴ Bets, bzian, golguien sca ib none csaan to grē mdio, gnalodraa tow.

¹⁵ Miech nixbiini nac to, grē mine rne naa lo to nu, nan to ganle ncuaaane rquiina.

¹⁶ Golwi ganle, zeene rdioow ne quietxtil, rdio ne vin, rdziuun ne xtsee ne been Jesús ga, ga rlu tipse nac ne grē ne nacnie ne me.

¹⁷ Niicle ne ndal nac ne, per ne tibaque quietxtil ne rdioow ne, min co gane tibaque cuerp nac ne grē ne, ni lēē xcuerp Jesús ga.

¹⁸ Scaque zha Israel, zeene row zho xpēel ma ne riogon lo Dios, ga rlu zho ne nacnie zho me.

¹⁹ Zha ne rnalogaa mdio, zeene row zho grē ncuaaane riogon lo mdio, scaque tibaque rac zho grē zho mdio. Per guiabde to togo mban mdio, togo mazdragaa nac bēel ne rgogon zho lo mdio.

²⁰ Mine racladz naa guien to, zeene sca run grē miech pe rgogon zho lo grē mdio, lo mendox ga rgogon zhow, led lo Diosda. Golguien sca, ib tsiesēēbde to lo grē zha ne quiaayownie mdio, zeena gacniede to mendox.

²¹ Lēdraaw ga gon gun to, tel rlozhse rquiin to xtsee ne psan Jesús diidz ga dziuun ne, ni tsieque to tsiegie to, tsietow to zaatne rownie zho mendox.

²² iGunscade to, gunglēēde to Dios! iGolguien ganle, lēbd ne dzian ne xquieIblēē me!

Zha gun zha ne riladzle Jesús

²³ Zig rne naa ga: "Nli zac gun ne ncuaaane gacladztāa ne, per led grēda nonguiel." Tel naa, zrieelo gun naa ncuaaane gacladztāa

naa, per led grêda yquiin par guñ naa xyudar grêraa zha bets ne, lozh tsoguic zho Xtiidz Dios;

²⁴ sac gon, ib none dzioxc ne grêraa zha ne nacgrê ne.

²⁵ Zig nac grê bëël ne rdo lo lgui, zac gow tow, ib guñde to gnabdiidz to dien zha naca, sac gon nend bëël ne biogon lo mdiow, dzigo laa dzeb co tsonie guic to.

²⁶ Golguien ganle, Dios psan guidzliu, sca-gaa grêtaa ncuuaane no low chen me naca.

²⁷ Zeene tel zha tsiegaa to tib wagw lidz tib zha ne gard gilladz Jesús, bëël ne gneedztaa zho golgowa, per scaque gnabdiidzde to dien zha naca; zeena peet dzeb tsonied zdoos to.

²⁸ Per telne grieequia tib zha ne gnê bëël ne biogon lo mdiow, gowde tow; zeena csande to zdoos zho.

²⁹ Niicle ne ndionpaa ne led dojd ga guñ to gow tow, per zha ne gana ga sadol zdoos zho.

Nana gnê to: "¿Pe nac dzigo por stib zho grielod guñ naa mine racladz naa?"

³⁰ Tel rded naa xquizh lo Dios zeene pe tib guielwagw ne rquiin naa, ¿pe nac dzigo por mine rzacse stib zho, grielod gow naaw?"

³¹ Golguien ganle, racda por zha cose; sac grêse ncuuaane dziuun ne, haxta ncuuaane dioow new, ncuuaane dio new, none zeene nodziuun new cxobnen ne ganle pa lotaa men roob nac Dios.

³² Gotsaa guien ne sca ganle dziuun ne ncuuaane yquiaaqui csan ne zdoos stib miech, zigtaa zha Israella, zha stib guiedza, zha ne nolegaa xnêz Diosaa.

³³ Tel naa, zanajd naa ncuuaane gdziladz naa naase, sinque rioxc naa grêtaa ncuuaane run naa, run naaw par gacnie naa grêse miech, zeena griello tso guic zho gnab zho lo Dios csilaa me zho lo xtoj zho.

11

¹ Golwi sca, zigne ran to noxc naa mban naa zigne blu Jesús, scaquegaa to goltsoxc gban to zigne ran to mban naa.

² Bets, bzian, rleynie naa to gon sac tibaque rsoladz to naa, ni rioxc to zienal to grê mine pseed naa to.

³ Per golsoladz ganle: grêse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me.

⁴ Gacxe waa, tel tib zha bgui yase nozodidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho.

⁵ Scagaa men wnaa, tel zhoobd bay guic zho ni zo zho nozodidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui.

⁶ Telne racladzdga zho gdze lad guic zho, mazd gnabey zho chug guitsguic zho.

Laa telne rtoladz zho chuga, rtoladz zho gacruxa, dzigo mazd cxobguic zho xpay zho.

⁷ Grê zha bgui, nod pe nacne gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men non nac me; scagaa wnaa, laa wnaa biaan par glu zho ganle non mgui.

⁸ Gotsaa gwi ne ganle, letxe xcuxtid wnaa waa baa mgui, sinque xcuxti mgui briece baa wnaa.

⁹ Stiba, zeene psan Dios wnaa, ib laa me psan zho par gacnie zho mgui.

¹⁰ Gacxe nagon waa ib none gdze lad guic wnaa, zeena glu ganle nguzobdiidz zho lo zha ne rnabey zho; haxta grê anl ne no gbaa zley zho gan zho min co.

¹¹ Per guiabde to togo peet nond wnaa, golsoladz ganle psanle Dios diidz zigtaa mguiw, zigtaa wnaaw rquinsa zho; sac telne guind wnaa guind mgui, telne guindgaa mgui guind wnaa.

¹² Gotsaa gwi ne ganle, zeene baa wnaa cho mgui briece dzit ne baa wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho.

¹³ ¿To nadien zha rzac to? ¿Pe nli nonguiela gdze lad guic wnaa zeene nonab zho lo Dios, te nonguiela ye?

¹⁴ Golwi ganle ib no gdze guic wnaa, biaanle zho roob guits guic zho parne ctsew lad guic zho;

¹⁵ tel zha, haxta rleynie zhow zeene scataa noola, sangue ne nac ne zha bgui, guieltow ga guool guitsguic ne.

¹⁶ Tel nogaa zha ne rzac led scada, maase gnee zho. Per ible znu gon noseed no miech, ni grêragaa zha ne riladzle Xtiidz Dios, rien zho ne nli scaw.

Zha none gac xtsee ne psan Jesús

¹⁷ Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan Jesús diidz, laa ne gley to ycaalsa to, lel quiaayunctal to xtoj to. Minçosi nagon ni lalnu riod zdoos naaw.

¹⁸ Ziyon naa gzobtaa zeene rcaalsa to, pe na tsiegald tildiidz to, laa ne tipse gac to lel rlêlsa to. Ni rgobey naa nli scaw.

¹⁹ Rien naa masaque rzac to ible sca none gac to, parne glupaa cho nac zha ne non xtiidz, zeena guianzniiu zho lo miech.

²⁰ Led zhixtseedraa Jesús i gon run to.

²¹ Sac ron naa zeene laa to row, masaque lèlèd rac to row to ncuuaane zienie to, ib rwide to no zha ne rdzin ga quianied zho roob ncuuaane gow zho. Squi rzob to rowcho to, haxta rzudz to; laa zha mbanse rac zho grielod gow zho ncuuaane row to.

²² ¿Mod guienð lidz to, ga sob to gow to, guie to haxta zaatne guieltaa to, led node to runctoladz to zha ne squi guienð pe yquuin? I gon rlu to rleyniede to grê zha ne no xnêz Dios. ¡Ni palal gon rdzigiuenð naa ncuuañe noyun to i!

²³ Golsoladz ganle zha nac ne laa xtsee rii biaan, Jesús psañ diidz gaca, sca gocnan naaw ni scagaa biallu naaw lo to. Wdze ne bnaaz zho Jesús ga, zeene blozh dowlxtsee-nie me xpêêdscuel me, bzhen me tib guietxtil, bdeed me xquizh lo Dios;

²⁴ Blozhse bdeed me xquizh, nzian lê been me guietxtil co, bdeed mew lo zho rêb me: "Golquiina, rrieequia lêê xcuerp naa nu, sac gon znu gun zho xcuerp naa parne csilaa naa to grê to. Golgun xtsee rii, parne glu to ganle tibaque rsoladz to naa."

²⁵ Blozh ga, scaque bzhen me tib cop no vin, rêb me lo zho: "Lêê stib trat cub nu gon rian Dios grê me miech, rrieequia xchen naa nu nac vin rii, ren ne tso sell trat co par glu nona. Gzataa zeene znu guie to vin, golsoladz ganle zha naca."

²⁶ Golguien sca, zeene guntaa to xtsee co zaacse golguña, sac gon, ga quiaxobnen to lo miech Jesús nac men ne gut xcuent to, psilaa me to. Tibaque none gun to xtsee co, haxta gdziñ dze ne laa me guiaad stib.

²⁷ Gacxe waa, zha ne rieniewguit guic rquiind zho xtsee co zigne no yquuin zhow, dol nroob ga run zho, xcuerp Jesús ga, xchen me ga noguitnie zho.

²⁸ Zeene gun to xtsee co, none wen wen sob to ganle zha naca, pe nacne laaw rac, dzigo lozh ga zac yquuin tow.

²⁹ Sac gon zha ne lega gow guietxtil co, lega guie zho vin co, sac zhow zig beelze pe xtsee; rrieequia guielñe ne yгаа zho ga gow zho, guielñe co ga guie zho.

³⁰ Mincoxce waa, blactaa zha ne nacgrê to i quiayaan nsis, nogaa zho rzacnêle, haxta nzian zho gutle.

³¹ Telne niaca mine wen wen gwi ne ganle zha nac xtsee co, tsod pe nacne pe guielñe ne cxeel Dios dzian ne.

³² Ni zeene scagaa rteed me ne tib caxtigw, laaw run me parne taa ne biini gbiire gbig ne lo me, zeena led yed ne nitlo gal dze ne nitlo grêraa miech ne zienal ncuuañe lo guidzliu rii.

³³ Bets, bzian, golguien sca zeene ycaalsa to gun to xtsee co, golcuêz grêraa zha ne nacgrê to dzigo tipse golsilo golquiina.

³⁴ Tel zha ne riengaa lêbd zho lozh gdziñ grêraa zha ne nacgrê zho, mazd gowgazh zho lidz zho, zeena yguibd zho yгаа zho guielñe co.

No spalal mine racladz naa gacnan to, per naa zeene guiañ naa nêz qui dzigo gne naaw lo to.

12

Guieibiini ne rdeed Espiritu Sant

¹ Bets, bzian, nugaa na ganle laa naa gzet zha nac guieibiini ne rneedz Espiritu Sant, sac racladz naa wen wen guien to zha naca.

² Rsoladz to ganle zeene gard giladz to Xtiidz Dios, nêzrii nêzrec bio to gueygan to stib stib grê mdio, ncuuañe ni tib lan diidz rneed; sangue Dios ne riladz to niina, led scad nac me.

³ Per nsin golso dien cho nac zha ne no-teedpaa xtiidz me, sac nzian zha ne rnee xtiidz Espiritu Sant noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacie Espiritu Sant, rdzibdeed zho Jesús, sinque rlu zho ne me rnabey zho, ni haxta didz doo zho rnee zhow.

⁴ Tib tib zha ne riladz Jesús, zhaase zhaase nac guieibiini ne rgaa zho, per tibaque men ne rdeeda, lêê men co nac Espiritu Sant.

⁵ Nzian mod zrieelo dziuun ne dziin lo Jesús, per grêse ne me rnabey ne.

⁶ Tib tib ne zhaase zhaase mod ne rlu Dios nacie me ne, per grêse ne me nac men ne rlu zha dziuun ne xtsiin me.

⁷ Guieibiini ne rneedz Espiritu Sant lo ne tib tib ne, laaw rneedz me parne dziuunlsa ne xyudar grê zha ne nacgrê ne gacndionraa ne zha racladz Dios.

⁸ No lo zho rdeed me guieibiini rien zho zha cso zho diidz lo miech,

no lo zho rdeed me guieibiini rseed zho grê ncuuañe ngan ni rlu zhow lo miech.

⁹ No lo zho rdeed me guieibiini dib doo zho rnalo zho Dios, niicle ncuuañe mazdraa ngan rnab zho lo me, naca.

No lo zho rdeed me guieibiini zeene rnab zho lo Dios, riac grê men rzacnê.

¹⁰ No lo zho rdeed me guieibiini rnab zho lo Dios rac grê milagr,

no lo zho rdeed me guieibiini rteed zho xtiidz Dios lo miech,

no lo zho rdeed me guieibiini rien zho cho nac zha ne nlipaa nacie me, cho zhagaa nacie mendox.

No lo zho rdeed me guieibiini rnee zho stib diidz ne gard cseed zho,

no lo zho rdeed me guieibiini rien zho pe rnee zha ne rnee diidz co, dzigo rnee zhow.

¹¹ Grêse guieibiini, Espiritu Sant rdeeda, ni me nan pa mine rneedz me lo ne tib tib ne.

¹² Lo grêse ne ne nac ne zha ne no xnêz Jesús, rrieequia xcuerp me nac ne. Tel cuerp, niicle ne nzian part niaaw, per tibaque naca.

¹³ Ndal miech ne nac xcuerp me, no zho nac zha Israel, no zho nac zha zit, lo grê zho no zho ngadoo lo ben, nogaa zho zonlaa, per

grêse ne tibaque Espîritu ne nacie ne, sac tibaque Espîritu bgaa ne zeene brobnis ne.

¹⁴ Gotsaa gwi ne ganle, no ni ne, no nia ne, no diag ne, nzian lê niaa xcuerp ne, per tibaque naca.

¹⁵ Gacxe waa telne niaca miñe rnee ni ne, grielod guiaba porne nacda nia ne, nacda xcuerp ne.

¹⁶ Scaque diag ne, grielod guiaba porne nacda bziaalo ne led yedraaw nac xcuerp ne.

¹⁷ Sac telne niaca miñe gdipse xcuerp ne niaa bziaalo ne, çzha nadien gon ne? Telne gdipsegaa xcuerp ne niaa diag ne, çzha gzoobzhi ne?

¹⁸ Lëezhe wen led scad psan Dios xcuerp ne, sinque grêse part ne niaaw bzaa mew zigne gocladz me, psanse mew zaatne rquiina tib tiba.

¹⁹ Sac telne tipse niaa grêse part ne nac xcuerp ne, jzhazhe rlu ncuaan co!

²⁰ Gocda sca, sinque zhaase zhaase nac tib tib part co, per grêsew tibaque cuerp naca.

²¹ Gacxe waa grielod guiab bziaalo ne lo nia ne: "Ib rquiind naa luu"; guiaabgaa guic ne lo ni ne: "Ni lalnu rquiind naa to."

²² Grêse part ne niaa xcuerp ne nose zaatne rquiina, haxta miñe mazdraa nda lêe miñ co rquiinraa.

²³ Stiba, no part ne niaa xcuerp ne rzac ne zhi nona, no part haxta rtoladznie ne, per gotsaa gwi ne ganle part co nac zaatne ranraa ne, rioxcoraa ne rdze;

²⁴ sangue part ne nziuu lo ne, zienied guic ne dien zha gdzew. Ible sca psan Dios xcuerp ne, zeena sca gacnon part ne rzac ne zhi non.

²⁵ Sca niaa xcuerp ne, grêse part ne niaaw rquiinlsaw xcompañera; led yeda rtsolsa.

²⁶ Golwi ganle, zeene nê tib part xcuerp ne, grêse part ne niaraaw zienie nê co; scaquegaa zeene rdioon tib part co grêsew zienie guielbley co.

²⁷ Laa naa rne miñ rii lo to, sac racladz naa guien to sca none tipse gac to. Golguien ganle xcuerp Jesús i nac to grê to, tib tib part ne niaa cuerp co i nac to, rquiinlsa to zha ne nacgrê to.

²⁸ Ni zigne sca tib tib part ne niaa cuerp nose zaatne rquiina, scaquegaa grêse zha ne no xnêz me, bzoze Dios zho pe nac dziin ne gun zho:

no zho rienee xtiidz me lo miech,
no zho rteed xtiidz me lo miech,
no zho rseed miech xtiidz me,
no zho rnab lo me rac grê milagr nroob,
no zho rnab lo me riac men rzacnê,
no zho rioxco run xyudar grê miech,
no zho rzo rac zho zha rnabey,
nogaa zho rnee grê diidz ne gard cseed zho.
²⁹ Golgan ganle, psod me zho grêse zho tsie-
nee xtiidz me lo miech, grêse zho cteed

xtiidz me, grêse zho cseed miech xtiidz me, grêsegaa zho gnab gac milagr.

³⁰ Niicle psodgaa me zho grêse zho gnab guiac men rzacnê, grêse zho gnee stib diidz, grêsegaa zho gnee zha nac grê diidz co.

³¹ Zhaase zhaase nac guielbiini ne rgaa tib tib zha ne no xnêz me, per goltoisoxco ygaa to guielbiini ne mazdraa rquiin.

Sca nagon naca, per golquiaadiaga ganle, nu laa naa gzet lo to stib miñe mazdraa non lo grê guielbiini rii.

13

Guie|wleynie

¹ Miñe mazdraa rquiin gon nac ne gleynie ne samiech ne. Tel niaca miñe bgaa naa guielbiini rne naa grê lose diidz ne rnee miech, haxta grê diidz ne rnee xanj Dios rne naa, ni tel rleynied naa samiech naa, çpa dien rquiin rac naa grêtaa diidz co? Rrieequia nac naa ga zig tib lê guuib ne loxaque rzedz.

² Tel niaca miñe rteed naa xtiidz Dios lo miech, rien naa pe nac miñe naraa cxoben me, grêse wseed ne no rien naa, ni rleynied naa samiech naa, jpaat rquiinda! Tel dib zdoogaa naa rnalo naa Dios, haxta ncuuaane mazdraa ngan rnab naa run mew, ni rleynied naa samiech naa, jpeet nonda!

³ Tel quizzgaa naa grê ncuuaane quianie naa lo grê zha ne guien pe yquiin, haxta ged naa naa tsec naa, per tel rleynied naa samiech naa, jzhlêse ga gun naa miñ co!

⁴ Sac gon zha ne nli mban zigne nac guie|wleynie co:

riednied zho samiech zho,
wen rac zho lo samiech zho,
racnêd zdoos zho, niicle ran zho wenraa noded stib miech lo zho,

rund zho ne lëêque zha gunnon zho,
racniatsd zho lo samiech zho,

⁵ rund zho ncuuaane coguielnê zho,
gunglêêgaa zho samiech zho,

ziena|d zho ne tebaa lose zho yquiin grê pe cos,

nacd zho zha ne lega zolêe,
rapguielnêd zho samiech zho,

⁶ ni lalnu riod zdoos zho miñe run zha ne rsacsi samiech,

miñe rleynie zho nac diidzli.

⁷ Zha ne nli rleynie samiech, ni lalnu peet grielod yca gleynie zho zho; rquiaadiag zho miñe rnee zha co, rzhidznied zho zho; tibaque rquiabladz zho wen grieequia zho, rsaand zho zho, tibaque racnie zho zho.

⁸ Zdzin dze yquiindraa cho cteed xtiidz Dios lo miech, yquiindraa gnee zho stib diidz, yquiindraa grê guielrac, sangue guie|wleynie gdziñd dze ne nitlow.

⁹ Niicle ne nogaa ne guielbiini ne rneedz Espîritu Sant, niicle no zha ne rien zha gnee

zho Xtiidz Dios lo miech, per palalse nac ncuuañe rien ne niina.

¹⁰ Sangue gal dze ne laa Dios lozh gzhix-cuaa ne zigne no gac ne, grëse guielbiini ne rdziaap ne niina, paat yquindraaw.

¹¹ Masaque nac ne niina zig tib mēēdlas. Tel naa, zeene goc naa mēēdlas grëse ncuuañe bne naa, grëse ncuuañe bien naa, grëse ncuuañe pseed naa, grëse ncuuañ co ben naaw zigne run grēraa mēēdlas. Per zeene laa naa broob, laa naa biala biini, grëse ncuuañ co laa naa bienpaa zha naca; laa guielmēēdlas co bded.

¹² Scadaa nagon rziaac ne niina, palalse rien ne zha nac Dios, rrieequia rdziañse ne me niina zigne ran ne zhimlë ne lo beelze pe tib lë vidr; per zdziñ dze laa ne dziañlo me zigne nacpaa me. Palalse ndion ne niina zha nac me, palalse rsilo rdziañ ne me, per gal dze co laa ne dziuunbeypaa me zigne runbey me ne niina, nanpaa me zha nac zdoo ne tib tib ne.

¹³ Golgacnañ sca ganle, grë guielbiini co zdziñ dze ne yquindraaw, sangue ne znu: dib zdoo ne rnal ne Dios, noniepaa guic ne zac miñe rnee me, ni rleynie ne samiech ne, lozhda. Per lo gza tsona nagon, guielwleynie co nac miñe gdziñd dze ne gdzëë.

14

Zha ne rnee stib diidz

¹ Laa to nanle pa miñ nac miñe mazdraa non, jgolleynie samiech to sca! Per scagaa goñab ygaa to guielbiini ne rneedz Espiritu Sant. Zig nac guielbiini ne rgaa zha ne rteed xtiidz Dios lo miech, goñab ygaa to miñ co zeena sca grieelo cseed to miech xtiidz me.

² Sac tel zha ne rgaa guielbiini rnee zho stib diidz, zeene rnee zho diidz co choot rienñ dien pew, sac lo Dios ga rnee zho. Tel pe nac miñe rnee zho ga, Espiritu Sant rsiaba guic zho, per choot racnañd dien zha naca.

³ Sangue zha ne rgaa guielbiini rteed zho xtiidz Dios lo miech, miñe rnee zho ga rquiina par tsoquicraa miech zha racladz me, par guien zho pe nonguiel gun zho, ni rchooblada zdoo zho.

⁴ Tib zha ne sca rnee stib diidz, lose zho rquiin guielbiini co, sac zhase rioguicraa zha racladz Dios; sangue zha ne rteed xtiidz me, diidz ne rnee zho rquiina lo grēraa zha ne no xnëz me, grëse zho rioguicraa zha racladz me.

⁵ Wena tebaa grëse to ygaa guielbiini co gnee to stib diidz, per mazdraa goñ wena cteed to xtiidz Dios lo miech, cseed to miech xtiidz me; sac miñ co mazdraa rquiin, lëdle gnee to stib diidz. Zacagueaa gnee to stib diidz co, tsaque lozhse gnee tow,

gneegazhaque to dien zha naca; zeena sca yquiina lo grēraa zha ne no xnëz Dios.

⁶ Bets, bzian, to gase nadien, tel niaca miñe glanso naa lo to i csilo naa gne naa stib diidz, çpa dien yquiina lo to? Per tel glanso naa, ine csilo naa clar gne naa lo to pe nac miñe zinee Dios lo naa, pe nac grë miñe rien naa, pe nac miñe ziaadyob gac, zha nac grë miñe zhoobnee lo Xtiidz Dios, led grëse miñ co zien to zha naca, ni squiina lo to grëse to.

⁷ Haxta grë ncuuañe rool miech, zig nac bzie zig nacga vihuel, tel csilo zha ne noyoolla tel zhataa gool zhow, çzha dien guien miech pa di noyool zho?

⁸ Zig nacga zha ne rcuedz cornet lo menguiib, telne tel zhataa ycuedz zhow, çzha dien gacnañ menguiib pe nac vis ne quiayun zho?

⁹ Scadaa nagon run to zeene rnee to stib diidz lo miech, çzha nadien guien zho pe nonee to? Rrieequia lo mese ga rnee to.

¹⁰ Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena.

¹¹ Telne guiaad tib zho lo naa csilo zho gnee zho, ni rienñ naa pe quianee zho, grieelod guien naa pe racladz zho, guienгаа zho zha rzaac naa.

¹² Nana sca, zha ne rquiablaz ygaa guielbiini ne rneedz Espiritu Sant, gnab zho ygaa zho miñe grieelo yquiin lo grēraa zha ne nacgrë zho, zeena grë zho tsoquic zha racladz Dios gban zho.

¹³ Gacxe nagon waa, zha ne rneele stib diidz, none gnab zho gdeed Espiritu Sant guielbiini lo zho guien zho pe nac grë diidz co, parne gnee zhow lo miech;

¹⁴ sac zha ne sca rnee stib diidz, tel so zho gnab zho lo Dios, rienñ zho pe nonab zho, loxaque zhiespirituse zho quianee ga.

¹⁵ Gacxe waa zeene gnab ne lo Dios, zeene goolniegaa ne me, zac gnee ne stib diidz, per scagaa none gnee ne diidz ne rien ne, miñe riengaa grēraa miech.

¹⁶ Sac goñ tel stib diidz nonee ne noyoolnie ne Dios, nodeed ne xquizh lo me, çzha dien yquiab grēraa zha ne ndxie ni rienñ zho pe rnee ne?

¹⁷ Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

¹⁸ Xquizh Dios, tel naa ye naa rne stib diidz, ni mazdraa goñ rne naaw que zha ne rneew lo to i,

¹⁹ per zeene zo naa zaatne ndxie grë zha ne noquiaadiag Xtiidz Dios rund naa ne gnee naa stib diidz, sinque rne naa miñe guien zho. Rien naa wenraaw gne naa maase gaayaque lan diidz, per miñe guien zho, lëdle so naa gne naa tsii mil diidz, ncuuañe ni tib choot guienñ.

²⁰ Bets, bzian, golguien sca golsaan guielmëédlas qui. Zacгаа gac to mëédlas per nêz lo guielntseeba, sangue xpensar to golgac zig zha ne biaa biinile.

²¹ Gotsaa gwi ne ganle zha nac stib diidz. Zhubnee lo Xtiidz Dios rëb me, laa me cxeel miech stib dan miech ne rnee stib diidz, par gnee zho lo zha Israel; per niicle tsienee zha co, ib guienḁ zhow.

²² Gase naganle rlu rquiind stib diidz co par grë zha ne rnalole Dios, sinque laaw rquiin parne grë zha ne nod xnêz me gan zho ganle nli no me. Zha ne nole xnêz me, zha co rquiin gon zho pe nac mine racladz me gacnaḁ zho, pe nac mine zhubnee lo Xtiidz me.

²³ Per niicle scaw, telne zob bla zha ne sca gard gliladz Xtiidz me, zobгаа bla zha ne pense rsilo rquiaadiaga, ni csilo to gnee to stib diidz, zeene gan zhow lëêtaa mine guiab zho rzhinle guic to sca rac to.

²⁴ Laa telne grëse to no teed to xtiidz me, nonee to mine racladz me gacnaḁ miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grëtaa mine nonee to, haxta ziaa zho biini zien zho ne nli tib miech ngoopdoḁ nac zho.

²⁵ Zigse quianee to laa zdoo zho lozh yguudz, laa zho ted yquitsgzhib zho gnab zho perdon lo Dios; ga guien zho ganle ne nli nacie me to.

²⁶ Bets, bzian, golguien sca zeene ycaalsa to cseed to Xtiidz Dios, zigtaa zha ne gooḁa, zha ne cteed xtiidz Dios, zha ne gnee stib diidza, zha ne gneegaa zha nac diidz co, none tsienie guic zho mine gun zho ga laaw yquiin parne tsoguicraa los demas zho zha racladz Dios gban zho.

²⁷ Zeene gnee zho stib diidz, none choptaa zho, tsontagaa zho gneew. None tibga zho gnee, ni rquiin zole zha ne gnee pe nac diidz co.

²⁸ Laa telne guienḁ zha ne grielo gnee dien pe naca, nodne gnee zhow; mazd lenḁ zdoose zho gnee zhow, Diosse gon pe nonee zho.

²⁹⁻³⁰ Scaque zha ne cteed xtiidz Dios, choptaa zho, tsontagaa zho gneew, laa grëraa zha ne ndxie none yquiaadiag zho mine nonee zho. Telne lëêtaque nonee tib zho, ni csiaab Dios guic stib zho gnee, dzigo none cuêz zha ne quianeele ga zeena grielo gnee zha co.

³¹ Sca none gaca, none tibga tibga zho gnee, zeena grëse zha ne ndxie grielo gon zho dien pew, parne cseed zho, ni gacngueelraa zho lo Xtiidz Dios.

³² Zha ne sca rteed xtiidz Dios, none cseed zho gnabey zho zho, cuêz zho nieeda gdzin hor ne gnee zho.

³³ Sac tel Dios, rdziladz me guiots gnaaz pe cos, rdziladz me ncuanea nzhiiḁni. Mine

rdziladz me zaacse gac tib cos, ni scagaa run grëraa zha ne no xnêz me.

³⁴ Ni stiba, zeene sca rcaalsa to, racladz naa guien grë menḁ wnaa dzese sob zho. Nodne so zho ye zho gnee, sac gonḁ mgui rnabey zigne zhubneeque lo Xtiidz Dios.

³⁵ Ncuanea racladz zho gacnaḁ zho, ro yu ga gnabdiidz zhow lo zha bgui, sac gon, rdzieelda lëêpaaze wnaa gnee zaatne rcaalsa to rquiaadiag to Xtiidz Dios.

³⁶ Zaacse sca golgac, golguien ganle grielod gun to mine notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

³⁷ Mine rne naa lo to nu xtiidz Dios naca, zha ne rteed xtiidz me lo to i, zha ne raggaa pe stib guielbiini ne rneedz Espiritu Sant, zha co gunbey ganle nli mine rnabey mew.

³⁸ Zha ne gliladzḁgaaw, maase gliladz zhow.

³⁹ Sca nagonḁ naca. Goltsoxco sca ygaa to guielbiini cteed to xtiidz Dios lo miech, zeena gacnaḁ zho zha racladz Dios gban zho; per scagaa, ib ycade to tel cho zha ne rnee stib diidz.

⁴⁰ Per zigne rne naa ga, grëse mine gun to none zaacse gun tow, tib tiba gacsew hor ne rieguiaḁa.

15

Brieaban Jesús

¹ Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëe. Lëew ga pcaania to, ni haxta niinagaa rililadz tow.

² Lëew rlu zha grielo ycaania Dios to, totsaque nli dib zdoo to bliladz tow, ni bii lëegaaw rnal to.

³ Zeene bialḁ naa lo to i, pseed naa tow zigne pcaaniase naaw. Gocnaḁ to cho nac Jesús, gocnaḁ to por xtoḁ ne gut me lo cruz, zigne zhubneeseḁ lo Xtiidz Dios.

⁴ Gocnaḁ to ganle zeene goc tsonḁ ngbidz pqueets zho me laa me brieaban, zigne raquetaqueḁ lo Xtiidz Dios.

⁵ Lenḁ dze ne brieabanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me sac güeyted me lo zho.

⁶ Güey me güeyted me zaatne ndxie ndzi-ibsráa gaay gayoo zha ne nole xnêz me, grëse zho gonḁ me; ndal zha co bii mban niina.

⁷ Bded ga gonaque Santiagw me, ni biire güey me lo zha ne bzënie me ga stib;

⁸ goc palal tiempa, lega naclew haxta lo naa brieequia me. Telḁ naa gonḁ, rrieequia nac naa zig tib mëed ne rzamëed,

⁹ lo grëraa zha ne nac poxtl, ni lalnu peet nond naa, per ni rdzieeld gnee zho naa

poxtl; sac goṇ pa lotaa ptsidiḷ naa grē zha ne glopaa bzēēb xnēz Dios.

¹⁰ Per xquizh Dios tibaque noxco me naa, bzooblo me naa gane laa naa nac miṇe nac naa niina. Ni led zhlēdgaa bzooblo me naa, sac goṇ nroobraa xtsiṇ me noyūn naa lo miṇe noyūn grēraa poxtl; per rned naa togo naase quiayūn, sinque me noyacnie naa rrieelo noyūn naaw.

¹¹ Laa naa rzet miṇ rii, per nacda par glu dien cho nroobraa noyūn xtsiṇ me, sac miṇe mazdraa non nac ne noseed no miech Xtiidz me; lēēw biadseed no to, ni biladzdgaa tow.

¹² Nana sca, racladz naa gnē to dien zha nacne no bla to i rnee nliid grieeban menḡut; led wen wen name gocnaṇ to brieeban Jesús.

¹³ Telne rnee to nliid grieeelo grieeban menḡut, rrieequia goṇ rnee to ga nliid brieeban Jesús.

¹⁴ Nana telne brieeband me, paat rquiind miṇe dzigo noseed no miech nu, zhlēse znu nooted-xtse ne rnalno ne Dios.

¹⁵⁻¹⁶ Rrieequia noquidiee no miech, sac goṇ tibaque rnee no lo zho bleeban Dios Jesús; ni telne nli rrieeband menḡut, ye Jesús dzigo bii noliu me niina.

¹⁷ Stiba, telne nliid brieeban me, zhlēse dzigo rnalno to me ycaania me to; telne nliid brieeban me, scase bii zēēb to grē xtol to.

¹⁸ Grē zha ne no bliladz me, zha ne nacle menḡut niina, lēē bnitole zho ga dzigo.

¹⁹ Nana telne loxaque lo guielmban riise nona gnalo ne Jesús, ne dzigo nac miech ne mazdraa nxen.

²⁰ Per gacnaṇ to sca ganle, jbrieeban Jesús! Me nac menḡ ne glopaa brieeban lo grēraa miech guizhiu ne grieeban.

²¹ Grēse ne ne nac ne miech, ible laa ne none guet; sac laa guielgut biaan por miṇe been Adán; per niina ne laa Jesús biaan, por miṇe been me grēse menḡut laa zho none grieeban.

²² Zigne grēse miech ret porne ziaad zho lo xtii Adán, scaquegaa grēse zha ne gbig lo Jesús, zgaa zho tib guielmban ndzon.

²³ Ible sca none gaca, ndion ne ganle laa Jesús brieebanle, ni zeene laa me guiaad, grē zha ne no xnēz me laa zho grieeban.

²⁴ Gaḷ dze co laa me lozh gnitlo meṇdox ni grēraa ma ne nacnie ma, dzigo laa me csaṇ grēse miech ne no xnēz me ladznia Dios menḡ ne nac Pxoze me; dze cotaa nagoṇ laa Dios guṇ guielwxtis.

²⁵⁻²⁶ Sac ible Jesús nonabey haxta gdzin dze co, zeene laa me gnitlo grēse meyozh ne rlēē lo me; zig nac guielgut, lēēw nac miṇe lultn gnitlo me.

²⁷ Zigne zhoabeeque lo Xtiidz Dios, ladznia me biaan grētaa ncuaaṇe no; per guiaab

ne togo ye Dios no ladznia me, sac goṇ Dios nac menḡ ne bdeeda lo me.

²⁸ Gacxe waa, zeene gaḷ dze ne laa me sca lozh gnitlo grē zha ne rlēē lo me, Pxoze me nac menḡ ne gnabey lo me; sac goṇ menḡ co gocnie me been me gan, ni menḡ co nac menḡ ne rnabey.

²⁹ Nana, ne rnee to i nliid rrieeban menḡut, ¿pe nac dzigo no zha ne rrobnis xcuent zha ne gutle?

³⁰ Telne niaca miṇe nliid grieeban menḡut, ¿pe nac nadien znu gzataa dze quiabeeladz no no lo grē guielxtseeb?

³¹ Bets, bzian, nligaaw tel naa goṇ gzataa dze noxtseeb naa lo guielgut; nanle to ganle zeene rne naa rleynie naa to, diidzli rnee naa; scaquegaa niina, miṇe rnee naa nu diidzliw.

³² Ne nligaaw zeene glo bial naa guiedz Efés nu, ntseeb goc miech rii lo naa, pale grē ma ntseeb. Telne nliid grieeban menḡut, zhlēse dzigo nodeed naa grē miṇ co; mazd tel zhataa dzigo gban ne, zigne rēbaque diidz ne rēb: “¡Golgotsaa dioow ne, golgotsaa dio ne, benque guielgutse quiambiaaz ne!”

³³ Per lēda ga goṇ. Zha ne zianaḷ miṇ co, ib yquiaadiagde to xtiidz zho, zeena gacde to zigne nac zho; zigne zēēbaque diidz: “Telne ndzinliid miech ne ctsielsa luu, zdzin dze ne gac luu zigne nac zho.”

³⁴ Golquix biini sca, gunctaldras to xtol to; pe rtoladzde to, golwi ganle no bla to i gard sēēb xnēz Jesús, haxta ni riend zho zhapaa nac Dios.

Zha grieeban menḡut

³⁵ Nana, no to gnē: “¿Per zha grieeban menḡut? ¿Zhazhe nac cuerp ne grieebannie zho?”

³⁶ ¡Aque nxen wnabdiidz co! ¿Pe rande to zig nac grē midz ne rio liu rac bni, rlozhse rnitlo midz co dzigo laa guizh ne naca ga rlan?

³⁷ Tel rnee to zha nac cuerp ne grieebannie zho, golwi ganle zig nac zhoxtli, zig nac grēragaa midz, ¿pe niacxe zigne nacsew riow liu, scasaque naca rlan? Led zeene laaw rlan, guizhle naca.

³⁸ Tib midzse naca riow liu, Diosle nac menḡ ne rdeed zhiblaga zigne racladz me. Tib tib midz, psanle me dien zha gluw zeene laaw glan.

³⁹ Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe.

⁴⁰ Grē anjl ne no gbaa, zhaa nac xcuerp zho lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu.

⁴¹ Gotsaa gwi ne ganle, zig nac xbiini ng-bidz zhaa naca lo xbiini mēē, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma rol rna.

⁴² Scadaa nagon, zhaa rlu cuerp ne rap miech niina, ni zhaagaa glu miñe ygaa zho zeene laa zho grieeban. Cuerp ne rdziaap ne niina, ncuaañe tib rded naca, sangue cuerp ne grieebannie ne gal dze co, led yedraa miñ co nitlo.

⁴³ Mban nac cuerp rii, sac rzacnēw, reta; sangue cuerp ne grieebannie ne, tib cuerp ne gdziñd dze nitlo gaca. Lega zozhidz cuerp rii, sangue cuerp co tib cuerp ndip ndaan gaca.

⁴⁴ Cuerp ne rdziaap ne niina, tib cuerp ngoopdol naca, sangue cuerp ne grieebannie ne, miñ co gac tib cuerp ne gban zigne racladzpaa Dios. Sac zigne znu no cuerp ne rquini lo guielmban rii, scaquegaa no miñe yquini stib lo guielmban ne gneedz Dios.

⁴⁵ Golsoladz ganle, rnee lo Xtiidz Dios Adán goc miech ne glopaa biaan ni Dios nac men ne bdeed guielmban lo Adán; sangue Jesús, me rap guielmban, ni zrieelo gdeed me guielmban co lo miech.

⁴⁶ Scaque nagon, glo rgaan ne cuerp ngoopdol ne rdziaap ne niina, dzigoraa ygaa ne cuerp ne gban zigne racladzpaa Dios.

⁴⁷ Gotsaa gwi ne ganle, zeene biaan Adán yudiese bzaa Dios me; sangue Jesús, men gbaa nac me.

⁴⁸ Grēse ne nac ne miech, cuerp ne rdziaap ne lo guielmban rii, zigne gocdaa xcuerp Adán naca; per zha ne gnalo Jesús, zeene laa zho grieeban laa zho gaple tib cuerp zigne nac xcuerp me.

⁴⁹ Masaque nac ne niina zigne goc Adán, ni scaquegaa zdziñ dze ne glu ne zigne rlu Jesús.

⁵⁰ Golgacnañ sca ganle, cuerp ne rdziaap ne lo guidzliu rii, grielod gdziña zaatne rnabey Dios; sac rdziñ dze ne rnitlow, grielod gaca tib cuerp ne guete.

⁵¹ Wen wen golzoobdiag miñe gne naa lo to nu ganle, waltaa choot gard gacnana: Grēse ne ne nac ne zha ne rnalo Jesús, gal dze co zigtaa zha ne mbana, zha ne gutlegaaw ible stsēē Dios xcuerp ne.

⁵² Znuse gac miñ co zig nacse zeene riab tib belye; lēē miñ co gac lultm vult ne ycuedz xanjl Dios zhitrompet zho. Zeene sedz trompet co, hor co grēse zha gut, laa zho grieebannie tib cuerp ne gdziñdraa dze nitlo; scagaa grē zha ne bii zomban, hor co laa xcuerp zho gdzēē. ¹Grēse ne dziaap tib cuerp cub!

⁵³ Ible sca none gaca, ib none gdzēē xcuerp ne gaca tib cuerp ne xiñd, tib cuerp ne gdziñdraa dze nitlo.

⁵⁴ Zeene gac miñ co, ga grieequia miñe raquiet lo Xtiidz Dios zaatne rnee: "Nasi laa guielgut bnitlo, guielmbanle nac miñe rnabey.

⁵⁵ Ah guielguta, ²Yoraa na zeene scataa psacsi luu? ³Yoraa zeene scataa gocndip xtiidz luu?"

⁵⁶ Grielodraa pe guñ guielgut ne hor co, sac led yedraa hor co tso dol, led yedraa hor co gnabey ley; sac por dol gane rrieelo rsacsi guielgut ne niina, ni por ley rlu pe nac xtol ne.

⁵⁷ ¹Xquizh xquielnzaac Dios pxeel me Jesús, sac gon por Jesús zrieelo griee ne ladzniia guielgut!

⁵⁸ Bets, bzian, ne nac to zha ne rleynie naa, golguien sca tibaque dziits golso lo Xtiidz Dios; zig zie dze goltsoxcoraa golgun xtsiin me, benque nanle to ganle, grēse xtsiin me miñe rdziun ne nacda ncuaañe zhlēse.

16

Gon ne guey Jerusalén

¹ Laa zig nac gon ne noyacro guey gac xyudar grēraa zha ne no xñaz Jesús Jerusalén, laa naa rso diidz lo to zigne psoque naa diidz lo zha Galás.

² Tel palal run to gan tib len zhma, lo co golcob mine ral zdoo to gdeed to gac gon co; gzobse dze goltgiesana lo zha ne noyunlow. Adel na ganle haxta glansoraa naa i, dzigoraa no to dien zha topa.

³ Ni golzoobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow;

⁴ ni tel rquinpagaay ye naa ga, dzigo na maase ga naa ganie naa zho.

⁵ Len dze rii no guic naa gateed naa nēz Macedon, dzigo gale griee naa glanso naa lo to i.

⁶ Nend zbēz naa lo to i palal dze, togo iquegaa teed naa len mēē nal ne ziaad; ni racladz naa zeene gbi naa i, siguiel to gun to xyudar naa tel pa nēz ne no ga naa len dze co.

⁷ Telne zneedz Dios diidz cuēz naa lo to grē len dze co, zbēz naa, sac racladzd naa tib guialtee naa lo to i.

⁸⁻⁹ Niina ne no naa Efēs nu, len dze riipaa rlu ndal miech ne no liaadz ycaania Xtiidz Dios, gane zbēz naa nu haxta ted lni Pentecostēs. Nliga ndal zha ne no liaadz co, per scagaa ndalake zha ne rtsidiñla.

¹⁰ Nacle diidz laa Timoté guiaad i; tel nand new naraa guiaad me, golsiguiel zeene glanso me zaacse golcaania me, zaacse golcuēzlo me, zeena tsonley zdoo me; golgan ganle, ye me quiayun xtsiin men ne rnabey ne.

¹¹ Golguien csanwinde to me, sinque golgap me respet; zeena zeene glanso me lo naa nēz

rii ine nley gac me csoladz me zha biaadted me lo to i. Laa naa quiambêz glanso me nêz rii, gza me zha ne guiaadnalraa zhits me.

¹² Sangue bets ne Apol, blactaa bnab naa lo me niaadgza me zha ne ziaad i niaadgan me to, per rzac me grieeloda niina. Rien naa zeene gdeedtaaw diidz, ible ziaad me ziaadgan me to.

¹³ Bets, bzian, nsin golso, tibaque golnalo Dios. Ib ctsêede to xtiidz to, tibaque goltsoxco tsienal to mine rnabey me.

¹⁴ Ncuane guntaa to, golconie guic to gun tow porne rleynie to Dios, porne rleyniegaa to samiech to.

¹⁵⁻¹⁶ Laa naa rso diidz lo to, niowse gon golgac lo grê zha bets ne, zha ne run xyudar to i; zig nac Stef grê menlidz me, golgon xtiidz zho. Led nanle to ganle, Stef nac tib men ne glopaa bliladz Xtiidz Dios nêz Gres i grê menlidz me; ni desde dze co laa me pquiabladz tibaque squi quiyun me xyudar grêraa zha ne no xnêz Jesús.

¹⁷ Rley naa gon zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grêle lo to ga gon naa.

¹⁸ Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiyun zho.

¹⁹ Grêse zha ne no xnêz Jesús nêz Asia nu, laa zho rxeej bdiuzh lo to, golcaania zhibdiuzh zho. Scaque Aquil grop me Priscil, ni grêraa zha ne rcaalsa lidz zho rieseed Xtiidz Dios, grê zho laa zho rxeej bdiuzh lo to.

²⁰ Scagaa grê zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzlsa, golcaania zhibdiuzh no.

²¹ Nu laa naa cso schop lan xtidz naa lo to, ni golwi ganle naazhal yquiaw:

²² Grêse zha ne gon nêd gleyniepaa Jesús, miech ndziibdeele ga nac zho. ¡Ni ile gon ziaad me!

²³ Mese nac men ne gacniên to, me nac men ne no zhixco to, sac ne nligaa rleynie me to.

²⁴ Niicle naaw rleynie naa to, sac gon tibaque nac ne ngab ne lo me. ¡Lêed bii gdzieel ne sca!

Pabl

BROP GUILTS NE PXEEL PABL LO ZHA CORINT

¡Diuzh to grëse to!

¹ Naa nac Pabl, grop no bets ne Timoté, laa no rquia stib guits rii rxeel no guiedz Corint i. Nanle to ganle Dios bzo naa, pxeel me naa none naa Xtiidz Ndzon Jesús lo miech.

Laaw ziaad lo to i, grëse to ne nac to zha ne ngab xnëz Dios; zigtaa tow, zigtaa grëragaa zha ne no dib nëz Gres iw.

² Dios men ne nac Pxoze ne, ni Jesús men ne rnabey ne, me gunlay to, me glu ganle pa lotaa noxco me to zeena peet zhgab ctsebde to.

³ Bets, bzian, golgotsaa gwi ne ganle, ¡zha ndzontaa Dios, Pxoze Jesús men ne rnabey ne! Sac gon, pa lotaa rquia zdoo me ne, pa lotaa rchoobladz me zdoo ne

⁴ lo grëtaa guielnë ne rdieed ne. Ni laa me rchoobladz zdoo ne gon, zeena scagaa grëraa zha ne rdzian ne no guielnë, mban rac zho, guio ne guiochoobladz ne zdoo zho zigne rchoobladaque me zdoo ne.

⁵ Zig nac niina, nroob guielnë ne nodieed no loxaque ne riladz no Jesús, per scaque-gaa ib rsaand me no tibaque nochoobladz me zdoo no.

⁶⁻⁷ Laa no nodzian grë guielnë rii, sacne noxco no nonee no lo miech zha laa zho lo dol, parne scagaa grielo cchoobladz no zdoo to. Lo grë guielnë rii, me nac men ne nochoobladz zdoo no, gane ndion no scaque squia zdoo me to, schoobladz me zdoo to zeene gdziñ dze ne laa to gan grë guielnë ne nodzian no nu niina. Ni me gon nac men ne gacniën to glëb to gan tow.

⁸ Bets, bzian, tel niaca mine nian to ganle zha nactaa grë guielnë nroob ne bdieed no zeene no no nëz Asia. Ne nligaa nroob psacsi zho no, ncuaañe lëbdraa no lo grë guielnë co, tibaque rdzieets no bod gataa niet no.

⁹ Masaque bzhiac no len dze co zig rzac tib zha ne nole guet, laa zho quiambëzse gal hor ne guet zho. Garaa bdziun no peet grielod dziuun no ne nose, sinque Dios none gnalo no, mese zac csilaa no lo grëtaa guielnë; sac tel me, haxta mengut rbeeban me.

¹⁰ Ni nligaa blee me no lo guielnë co, bla me no lo guielgut co; ni ndion no scaque zla me no lo grëraa guielxtseeb ne dzian no,

¹¹ totsaque gacnie to no tibaque gnab to lo me gacniën me no. Zeena, tibaque gac ne grëse ne gdeed ne xquizh lo me.

¹² Rley no sacne rien no choot noquidied miech, ndzinli mban no, zigtaa zeene zo no lo tow, zigtaa zeene zogaa no lo grëraa

miecha. Per guiabd ne togo por niini now, sinque ne nquialadz Dios no gane quiaayacniën me no znu mban no.

¹³ Grë mine rnee no lo guits ne zixeel no lo to, niapse diidzliw, ni mine rgobey no grielo guien to min co rquiaa no; gane racladz naa gdziñ dze ne guien tow.

¹⁴ Nli runbeydpaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guiaad stib.

¹⁵⁻¹⁶ Sca nagon rzaac naa, gacxe na ni naa glo nialgan naa to, dzigo ile nrrie naa nia naa nëz Macedon. Ni zeene mbire naa nëz co, nialteedaque naa lo to i stib; zeena niac chop vuelt ne nionley zdoo to. Lozh ga, ine niowse nzonëz to naa nia naa nëz Judé.

¹⁷ Ni pasëe naa nial. Per guiabde to togo bod notiblid guic naa zeene sca bne naa, o nacgaa naa zig nac grë zha ne laglaase rnee tib diidz, laa len zdoo zho nanpaa zho gund zhow.

¹⁸ Dios zobwi ganle rdziuunscad no. Mine rnee no, rdziuun now.

¹⁹ Golgan ganle, zigtaa naaw, zigtaa Silvana, zigtagaa Timoté, no biadseed to cho nac Jesús, men ne nac Xpëed Dios; ni zig nac Jesús, rquidied me. Grëse mine rnee me run mew,

²⁰ ni grëse mine psan Dios diidz gun me, grësew noyun mew; gane niicle nogaaw rnee no lo miech ganle ible run me mine rnee me, ga rlu ganle pa lotaa men nroob nac me.

²¹ Ni lëe Dios co gon nozhixcuuaa lo xquielmban ne, laa ne ngab xnëz Jesús niina; me bzooblo no nonee no Xtiidz me.

²² Haxta pxeel me Espiritu Sant zdoo ne, rrieequia bloobey me ne ga, par glu ganle lo me ngab ne, ni ible zгаа ne grëtaa guielnzaac ne bneelee me gneedz me lo ne.

²³ Me zobwi, me nan ganle pe nacne gard guial naa. Gard gon guial naa, per por tow; sac rquia zdoo naa to, racladzd naa loxaque guialquiago naa to i, lozh ga mban gac to.

²⁴ Guiabde to sca togo bod racladzd no guiaad no. Ni rquiindraa to guiadnee no lo to zha giladz to Dios, sac dib zdoole to riladz to me; per laa no racladz ine guiaadlonley no zdoo to i. Golguien sca, min co racladz no, racladzd no guiaadloguieñ no to.

2

¹ Min co nagon bend naa ne nial naa,

² sac nonguielda ga coguieñ naa to, ni to nac zha ne rgonley zdoo naa.

³ Ne racladzdaxe naa min co waa, gane pxel naa tib guits co lo to glo, zeena nzhixcuuale lo guielto ne nobee to i, zeene laa naa nlanso. Sac tel lega nlanose naa, laa ne ndzio ne guielbley, lel guielnë ndzio ne. Ni

nan to ganle, tipse nac guiebley ne rdziaap ne; zniacxe zrieelo nley gac to telne ran to mban rac naa?

⁴ Tel gan to ganle zeene pxel naa guits co, jne nlipaa mban rac naa no naa zhizhgab to! Haxta roon naa zeene noquiaa naaw. Laa naa pxel guits co lo to, per pxel naaw par ngogieñe naa to; sinque laaw pxel naa, zeena xixcuaaniob lo ncuane ndzinlid ne noyac i; ni laa naa ben min co sacne rquia zdoo naa to.

⁵ Zeene bin naa zha nac dol ne noyup zha co i, zig rne naa ga: bio naa guieñe; per rien naa mazdraa nroob bio to guieñe.

⁶ Nana gon, ne squi laa to pteedle zho tib caxtigw, jleew ga na!

⁷ Golguiaanladz mine been zho ga, golneewen lo zho stib, golchoobladz zdoo zho zeena gacmband zho. Sac telne csaanladz to zho, nend scase lozh guiuu zho lo xquieñe zho.

⁸ Rnab naa lo to, golleynie zho stib, zigne rleyneque to zho glo.

⁹ Ni stiba, laa naa pxel guits co lo to, zeena dien pe zon to diidz gun to mine rne naa lo to ga.

¹⁰ Golguiaanladz mine been zha co sca, tel naa laa naa biaanladzlew. Jesus zobwi ganle laa naa benle zho perdon, zeena gbiire zace gac to;

¹¹ ni scagaa gleyd mendox gunguet ma ne. Led nanle to ganle, zombezle ma dien zha gnitnez ma ne.

Tibaque noxco Pabl cseed miech Xtiidz Dios

¹² Bded ga nagon dzigo bia naa guiedz Troas. Zeene bdziñ naa ga, ne nligaa bneedz Dios diidz niup naa xtsiñ me ga.

¹³ Nac diidz ga ndzieelo naa bets ne Tit, per zeene gon naa bdziñ me, biotiblidraa guic naa. Nacne brieque naa ga bia naa nez xtan zha Macedon, biaguib naa me.

¹⁴ Per, jxquizh xquieñzaac Dios! Sac zaatne ziotaa no, Jesus ner lo no, me rlu ganle rdziun no gan lo greeta ncuane rca. Tibaque rnee no lo miech gacnañ zho ganle cho nac me, sca quiaxobnen no Xtiidz me, zig rzéblaax tib ncuane nex rlaa.

¹⁵ Haxta no, masaque nac no lo Dios zig tib ncuane sca nex rlaa; sca nac no lo me sacne laa no ngable lo Jesus. Nézrii nézrec nex zéblaax gox co, zigtaa lo gré zha ne ngable xnéz Diosa, zigtagaa lo gré zha ne zie néz ne nitlow.

¹⁶ Par gré zha ne nole néz ne nitlo, masaque rzac zho no zig tib gox ne nguid rlaa, haxta rsoladz zho pe nac guielgut ne quiambéz zho; sañgue gré zha ne nole xnéz Dios, rzac zho no zig tib gox nex ne rupsoladz zho guieñmban ndzon ne no yгаа

zho. jNi led choId zha ne gon grieelo gun dziin riil!

¹⁷ Nu rquiin zha ne dib zdoo rquiabladz gun dziin lo Dios, glu zho ne nli Dios pxel zho, ne nli Jesus nacnie zho. Sac no zha ne, loxaque rquiaalo zho ye zho rseed miech Xtiidz Dios, per laa zho ruña par cuee zho dimi.

3

¹ Nana ne znu rne naa, guiab to bod yeque no rdziun zig run zha ne sca rquidie ga, leéque zha runnon zho, rio zho dieen pe diidz ne rquia rey zho par glupaa dien cho nac zho. Ni lalnu rdziunnon no no, niicle peet diidz rquiindgaa no.

² Led yed no rquiin pe diidz ne dzeey no, to rlu cho nac no. Grése miech ne gan zha notséé Dios lo xquieñmban to, gase gunbey zho no, ga glu pe nac dziin ne rdziun no.

³ Gane rriequia nac to zig tib diidz ne quialu ganle cho nac no. Jesuszal pquiaa diidz co, ni pquiind me pe tint ne nquiaa mew, sinque laa me pquiaaw con guieñbiini chen zhiEspíritu Dios, men ne nguiamban. Ni pquiindgaa me pe lo guits ne nquiaa mew, sinque laa me pquiaaw zdoo to.

⁴ Ni ndionpaa no nli scaw, sac Dioszal rluw, ne nac no zha ne ngab lo Jesus.

⁵ Per guiabd ne togo nose rrieelo rdziun gré mine rdziun no, led scada, Dios nac men ne racniun no rdziun now;

⁶ sac me bdixbiini no zha cseed no miech diidz cub ne psañ me. Gane laa no noseed miech niina, per rseete no zho tsienal zho mine rnabey ley, sinque laa no noseed zho guien zho tsienal zho mine rnabey Espiritu Sant. Sac tel leya, leé gdib rnabeya guet grése miech ngoopdol; sañgue Espiritu Sant, laa me rlu zha ygaa zho tib guieñmban ndzon.

⁷ Golsoladz ganle, zha blu Dios biini ne nac xquieñdzon me zeene pcaania Moisés ley ne rnabey guet gré zha ngoopdol. Biinidoo ne biaan lo Moisés dze co, haxta lébd lo zha Israel gwi zho lo me, per dzega dzega biuu biini co.

⁸ Scaque nagon nolu Dios xquieñdzon me, niina ne laa Espiritu Sant nolu zha ygaa miech guieñmban; per, jmazdraa gon nroob nac guieñdzon riil!

⁹ Sac gon, tel scataa blu xquieñdzon Dios zeene biaan guet gré zha ngoopdol; mazdraa dzigo nroob nac guieñdzon ne rlu niina.

¹⁰ Ne nligaa, palalse ga nac biini ne blu lo Moisés zeene pcaania Moisés ley co, mazdraa nroob biini ne ziaadnie xtiidz cub Dios niina.

¹¹ Ni stiba, bza dze ne been ley co dziin; sañgue xtiidz cub me, gdziñd dze ne gdzëw.

Gacxe waa, mazdraa nac biini ne ziaad-niew.

¹² Ni ne ndionaxe no waa gdzind dze ne gdzëew, gane tiblique laa no noneew lo miech;

¹³ rdziuund no zig been Moisés. Sac tel Moisés, pquia tib lë lar lo me dzigo gond zha Israel zha bnitlo biini ne biaan lo me ga.

¹⁴ Ni rrieequia ye lo grë zha Israel ga sca bdze, gacxe waa, haxta lo nadze rienð zho zha zhubnee lo Xtiidz Dios, mine psan me padzeela. Ible rienð zho ne bdedle dze ne pquini diidz gol co, Jesúsle none gliladz zho niina. Me nac men ne cxal lo zho.

¹⁵ Ne nligaa sca nac zho, haxta lo nadze niicle rlabraa zho lo guits ne pquiaa Moisés ga, tibaque ndip nac zdoo zho.

¹⁶ Per tel zha ne csaan grë guielntseeb, dib zdoo zho guien zho cho nac Jesús, ible zlit me lar co lo zho;

¹⁷ sac gon, miech ne naciele zhiEspíritu me, led yedraa zho ngadoo lo ley gol co. Ni ndion ne ganle, meque ga nac Espiritu.

¹⁸ Gacxe waa, grëse ne ne ngab ne xnëz Jesús, led yedraa lo ne ndze. Masaque nac ne niina zig tib quiewan, zeene ran miech zha mban ne, ga ran zho ganle pa lotaa nac xquielndzon Dios. Tibaque nozhixcuuaa zhiEspiritu me lo xquielmban ne, zigse zie dze noluraa me zha nactaa guielndzon ne rap me.

4

¹ Ne nligaa noxco Dios ne, gane niicle peet nond no laa me bzo no quianee no Xtiidz Ndzon me lo miech; ni choot rsaand dziin rii.

² Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guieltole ga, tel dzio no yquidiee no miech, cseed no zho ncuuaane nacdraa Xtiidz me. Me zobwi ganle niapse diidzli rnee no, niicle grëgaa zha ne rdziuunbey no, nan zho rquidied no.

³ No grë zha ne ib nëd tsoquic zha nac zhiwseed Dios miñe nonee no; sac lëëque grë xtol zho notse lo zho, laa zho zie nëz ne nitlo zho.

⁴ Nëd zho gliladz zhow, sac ible mendox (ma ne nonabey lo guidzliu rii) noyuu ncow xquielrien zho; gane rienð zho ycaania zho Xtiidz Ndzon Jesús, men ndzon ne biaadlu ganle zhapaa nac Dios.

⁵ Laa no quiaseed miech, per rseete no zho gacnan zho dien cho nac no, sinque laa no noseed zho gunbey zho cho nac Jesús. Gacnan zho, ne me nac men ne rnabey; laa no, tib ngundziin winse nac no lo to, sacne rleyne no me.

⁶ iNe nligaa tib ngundziin winse nac no! Golwi ganle Dioszhal, men ne bnabey biaan

biini ne rziini guidzliu, me bdixbiini guic no bien no xquielndzon me ga biaadlu Jesús.

Rsaand Dios zha ne dib zdoo rnaló me

⁷ Ne nlipaa, lega nacse no zig nac tib guies yu ne notsow grëtaa ncuuaane ndzon ne zieneedz Dios lo no. Gase na ganle rlu, Dios naccheña grësew, peet nond no loxaque nose.

⁸ Me nacie no, niicle nroob zhgab ne rio no, per racmband no; niicle nroob nac guielxtseeb ne rdzian no, per choot rdziebd.

⁹ Tibaque notsidil miech no, per rsaand Dios no; niicle rsacsi zho no zootle laa no nitole, per rbiire riochee no ga stib.

¹⁰ Zaatne ziotaa no, quiana miech gut zho no, zigne beëaque zho Jesús; per me rsilaa no lадznia zho. Ga rlu ganle ne men mban nac me, ni me nacie no.

¹¹ Gzataa dze noxtseeb no gut miech no, loxaque ne rdziuun no xtsiin me; per ga rdeeda diidz rlu no ganle pa lotaa nacie me no, niicle ne tib lëse ben nac no.

¹² Ne nligaa, tibaque noxtseeb no lo guielgut ne znu nonee no Xtiidz Jesús; per scagaa, porne biadnee now i laa to bgaa guielmban ne gneedz Dios lo to.

¹³ Niicle nagon ne znutaa noxtseeb no, per ndionpaa no me quianap no, gane rdziebd no noseed no miech Xtiidz me; zig zhubneeque lo Xtiidz me, zaatne rnee: "Bliladz naa miñe rnee me, gane rne naaw."

¹⁴ Ni ndion ne ganle, zigne bleeban me Jesús, scaque zbeeban me ne, lozh ga tipse gac ne gdziinne Jesús ne lo me.

¹⁵ Grëse guielnë ne nodzian no, laaw nodzian no sacne nligaa noxco no to; zeena grëse to sëeb xnëz me. Sac telne ndal grë zha ne sëeb xnëz me, scaquegaa ndal zha ne gdeed xquizh lo me, cxobnen zho pa lotaa men ndzon nac me.

¹⁶ Miñcocxe waa, ib choot riablod. Nli zigse zie dze laa no bii noyoxraa, sangue zhiespirita no, zigse zie dze laaw racnucubraa, laaw riaanmberaa nëz lo Dios.

¹⁷ Ni stiba, niicle ne znutaa nodzian no grë guielnë rii, per ncuuaane tib rded naca, led ncuuaane rnada; sac gon, zeene laa no lozh dieed grë miñ rii, mazdraa nroob nac lo guielndzon ne ygaa no, ni miñcosi gdziindraa dze lozha.

¹⁸ Gacxe waa, choot rdziuuncasd grë ncuuaane quiazian no lo guidzliu rii, sinque laa guic no nonie ygaa no grëtaa guielbley ne no gbaa. Sac grë ncuuaane ran ne niina, ncuuaane tib rded naca; sangue grë ncuuaane gard dzian ne ga, led yedraa miñ co nitlo.

5

¹ Ni ndion ne ganle, zeene laa xcuerp rii ne nitlo, laa Dios gneedz stib miñe gdziindraa dze nitlo. Masaque nacse xcuerp rii ne zig

nac tib yu guizh win ne rbëz miech lo wгаа; sangue cuerp ne gneedz me lo ne, rrieequia naca zig tib yu ne gbiaazpaa ne gbaa.

² ¡lactaa guielnë ne rdieed ne niina ne rdziaap ne cuerp rii! Gacxe waa, quiambiaaznë ne gdziñ dze ne gneedz me stib cuerp co.

³ Sac gon, led niapdse espíritu gdziñ ga, sinque none gapa cuerp.

⁴ Ne nligaa, niina ne mbannie ne cuerp rii, zeene në nodieed ne, rziaac ne tebaa laa ne mbanniele stib cuerp co. Per par ygaa ne cuerp cub co, ible none guet ne. Per zienied guic ne sca, sinque laa ne racladz zhits cuerp riise tsie cuerp co, zig nacse ne niina ygaa ne guielmban ndzon co. Sca rziaac ne, sac choot rdziladz d guet.

⁵ Dioszhal bzo ne ygaa ne min co, ni ible zaca, sac gon laa me pxeelle Espíritu Sant nacie ne.

⁶ Tel no, min co nagon quiambiaaz no; ndionle no laga mbannie no cuerp rii, grielod ygaa no min co, grielod gdziñ no zaatne no Jesús.

⁷ Nli rdziand now niina, per dib zdoo no riladz no ib laaw none gac.

⁸ Gacxe waa, haxta nley rac zdoo no quiambiaaz no gdziñ dze co; rziaac no tebaa laa no briele len cuerp rii, zeena giobannie no Jesús.

⁹ Min co nagon, tibaque noxco no gac no zigne rdziladz me, zigtaa niina ne no no lo guidzliu riiw, zigtagaa zeene gdziñ no lo mew.

¹⁰ Sac gon, grëse ne zdziñ dze ne laa ne gacredz lo me zaatne gun me guielwxtis. Grëse ne ne nac ne miech, tel zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne tel zhataa mbana, ga ygaa ne mine guioquia ne tib tib ne.

¹¹ Min rii nagon nonie guic no, gacxe waa noxco no nonee no lo miech zha nac Xtiidz Dios. Ni me nan ganle dib zdoo no nodziun no dziin rii, ni racladz naa guien to ganle sca nac no.

Zaacse golgac lo Dios

¹² Grë mine blozh bne naa nu, zig bnele naa ga: nacda par dziunnon no no. Laa no rnee grë min rii, zeena guienpaa to ganle cho nac no; ni scagaa, guien to zha ctsire to lo xtiidz grë zha ne squi riaad i rlozhd gacniats zho. Tel zha, laglaase rlu zho miech wen nac zho.

¹³ Nligaa, dib zdoo no noxco no xtsiin Dios, laa miech masaque rzac zho riotsle guic no. Nana niicle tel riotsgaaw, per xtsiin Dios nodziun no. Sangue no, ndionpaa no riotsd guic no; laa no rdziun grë min rii, sacne noxco no cseed to Xtiidz me.

¹⁴ Laa no nodziun dziin rii, sacne rleyne no Jesús, maase tel zhataa rzac miecha.

Ndionpaa no Jesús bgaa guielgut ne nioguaial ne; scaquegaa, ndion no niina ne laa no bziaab xnëz me, rrieequia gutle no lo grëtaa ncuaañe ndzinlid ne bdziun no lo.

¹⁵ Gacxe nagon waa, grëse zha ne rzëeb xnëz me, nodraa gban zho zigne notaa guic zho, sinque laa zho none tsoxco gban zho zigne rdziladz me; guien zho ganle, me gut bdiizh me xtol zho (ni brieaban me), par ygaa zho tib guielmban ndzon ne gdziñ dze lozh.

¹⁶ Gotsaa guien sca, zha ne nole xnëz Dios, ziaacd ne zho zig rzac grëaa miech zho, rzac zho peet nond zho. Tel naa glo sca bzhaac naa Jesús, masaque bzob naa cholze miech nac me; sangue niina, ndionpaa ne ganle cho nac me.

¹⁷ Sac gon, grëse zha ne ne nliipaa dib zdoo riladz Jesús, stible miech nac zho. Grëse tel zha goc zho glo, laa min co bdedle. ¡Ncube nac lo xquielmban zho!

¹⁸ Ni loxaque Diosse gon zrieelo sca gunnub miech. Sac gon, me pxeel Xpëed me Jesús biaadtizh grëse xtol ne, laa ne biaapwen lo me. Ni scagaa niina, me bzo no znu quiaseed no miech, zeena gacnan zho zha grielo guiaanwen zho lo me.

¹⁹ Znu gon naca: Laa Dios nodeed diidz niina guiaanwen miech lo me, gunquidzhd me zho tel pe nactaa xtol zho, totsaque gliladz zho cho nac Jesús. Min rii nagon bzo me no nonee no lo miech.

²⁰ Golgan sca ganle, xmandad Jesús nac no. Me zobwi ganle laa no rnab lo to niina: ¡Golguiaanwen lo Dios! Golguien ganle, rrieequia gon Dioszhal rso diidz rii lo to.

²¹ Sac gon, Dios bzo Jesús bgaadz me grëse xtol ne, niicle ne ni tib dol rapd me; zeena niina ne laa ne wbig lo me, grielo ndzinli gban ne, zigne racladz Dios. ¡Masaque Jesús bdiizh grëse xtol ne, psanwen me ne lo Dios!

6

¹ Gotsaa gwi ne ganle pa lotaa noxco Dios ne. Gacxe waa, no ne nac no zhingundziin me laa no rso diidz lo to: golguien golgon mine nonee me lo to niina.

² Lo Xtiidz me, no tib zaatne znu zhoobnee: Lëetse len dze ne nosilaa naa miech, laa to bñab gacnie naa to.

Lëetse len dze ne rdeeda diidz gac mine quiambëz to, laa grë xliaadz to blanso lo naa.

¡Ni lëe dze co nu nagon bdziñ! ¡Nadzegazh quiambëz me gbig miech lo me, zeena csilaa me zho!

³ Dziin rii quiadziun no, choot quadiunntald xtol miech, choot noguibd sozit zho lo Dios. Zaatne ziotaa no, tibaque noxco

no zaacse gac no, zeena tsod pe yquiaaqui zho gneenê zho Dios.

⁴ Zigtaa ncuuaane rdziuun now, zigtaa grêgaa ncuuaane nodieed now, rlu no ganle ne nli xtsiin me nodziuun no. Tel pe nactaa grê guielnê ne nodieed no, tel pe nactaa grê xliaadz no, niicle no zaatne rsacsi miech no, per choot rieetede.

⁵ Blactaa zaatne rguin zho no, zaatne rsoogyu zho no, zaatne rriee zho ndal zho racntseeb zho lo no. Blactaa rdib rdzaag no rdziuun no dziin, no zaatne rriee zhimcaalo no dipse guieel, no zaatne retgbin no.

⁶ Ne nligaa rdzioxco no ndzinli mban no, choot rieetede, wen wen rdziuunbey no zha nac Xtiidz Dios, sca ran miech ganle ne nli Dios pxeel no. Dib zdoo no rleynie no samech no, wen rac no lo zho, zilu no ganle pa lotaa racnie Espîritu Sant no.

⁷ Niapse mine nac diidzli min co rnee no, ni scagaa Dios, nolu me ganle ne nli scaw. Niapse guielwen, niapse diidz ndooladz rlu no ne nli lo Dios quiadziuun no dziin.

⁸ Choot rsaand mine pso Dios no nodziuun no, maase niicle mine runtaa miech no. No zaatne runnon zho no, nogaa zaatne rzhidznie zho no; no zaatne rneenê zho no, nogaa zaatne rleynie zho no. Niicle ne diidzli rnee no, per no zho rzac noquidiee no miech.

⁹ Runbey miech cho nac no, sangue Dios runbey me no. Niicle ne tibaque noxtseeb no lo guielgut, per peet gard gac no laa no bii mban; niicle ne rsacsi zho no, per choot gard guet.

¹⁰ Niicle ne no hor mban rac zdoo no, per znusaque rneedz Dios tib guielbley zdoo no. Nacd no zha dimi, per nroob nac grê guielnzaac ne rgaa miech zeene rnee no lo zho. Rdziaapd no grê ncuuaane rap grêraa miech, per ncuuaane rdziaap no, nroob nona.

¹¹ Bets, bzian, ne no to Corint i, laa no rzodiidznie to, laa no rnee lo to grêse zigne rza zdoo no. Ne nligaa rleynie no to.

¹² Telne rzac to gard gacpaa ne tipse, per led nod naca. Tel no rleynie no to, sinque to gon rien no laglaase rleynie no to.

¹³ Ne nligaa peet rqueets naa lo to, laa naa rne lo to zig rnee tib dad lo mêed. ¡Scaquegaa to, golsiguie! zaacse golgad!

Zhaa nac biini lo guielcow

¹⁴ Golguien, guiabde to tipse gac to grê to zha ne gard sëeb xnêz Dios. Golgan ganle, tib zha ne nôle xnêz me, rdzieeld gac zho zig rac zha ne bii no lo dol. Zig nacgaa biini, zhaa nac biini, zhaagaa nac lo guielcow.

¹⁵ Sac gon, tel Jesús, ¡niacxe tipse nac me grê me mendox? Scaquegaa grê zha ne nôle xnêz mew, grielod tipse gac zho grê zho zha ne no lo dol.

¹⁶ Tel xyadoo Dios, nacda zig nac xyadoo grê mdio. Ni rrieequia gon ne nac xyadoo me, zigne raquiet lo Xtiidz me zaatne rnee: Na gbannie naa to, ine sênie naa to.

Naa gliladz to, ni scagaa to, no naa ygab to.

¹⁷ Gacxe waa, rbiire me rnee me:

¡Golriee lad grê zha qui, golbiche lo zho!

Gunde to grê ncuuaane ndzinlid ne run zho, golbig lo naa, naa ycaania to.

¹⁸ Naa gac Pxoxt to grêse to,

scagaa to, laa to gac xpêed naa.

Lêe xtiidz men ne rnabey to nu.

7

¹ Bets, bzian, gotsaa gwi ne ganle zha nactaa ncuuaane psan Dios diidz yгаа ne. Gacxe waa, golgotsaa lozh griee ne lo grê zhgab yozh, lo grê ncuuaane ndzinlid ne runctal xtol ne. None zigse zie dze dzioxcorra ne gban ne zigne rdziladz me.

² Ne nligaa, zaacse golgac golcaania no stib. Tel pe guielnê ne noded to, tel zha rzac to, to bguiba; zig nac no, choot noquidiede to, choot nosacside to.

³ Guiabde to togo noquiago naa to nu, laa naa nile ganle dib zdoo no rleynie no to. Len ngbidz ne gbantaa no lo guidzliu rii, ib csaand no to.

⁴ Laa naa rne grê min rii lo to, sacne nanpaa naa zha nac to, nanpaa naa zac gne naa lo to zigne nose guic naa. Zeene rsoladz naa to, haxta riaanladz naa grê mine nodeed naa, ine riaad tib guielbley zdoo naa; haxta riats naa ne runbey naa to.

⁵ Wlal ne blanso no Macedon nu, ni tib lê notilbid guic no; lala noxtseeb no lo grê zha ne quiana! no, lala nonieque to guic no dien yo to.

⁶ Per rsaand Dios zha ne no lo zhgab, me pchoobladz zdoo no; sac zeene blanso Tit lo no nu,

⁷ blansonie me diidz zaacse pcaania to me. Per nli rley no bdzion ndzinlile mban to, nê me bio to guielnê grê len dze ne bded ga, ni nê me nonie no guic to, quiambêz to tebaa zha ganniob to lo no stib.

⁸ Zeene pxel naa guits co lo to glo, mban goc zdoo naa sac bien naa ib zgoquielnêw to, sangue niina racmbandraa zdoo naa; sac rien naa niicle ne bio to guielnê tib bla dze, per na laa ncuuaan co bdedle.

⁹ Gacxe waa rley naa niina, per guiabde to togo rley naa bio to guielnê, sinque rley naa gon naa laa to wbiire wbig lo Dios por guielnê ne bio to ga. Ni sca nagon racladz Dios gun grê zha ne ngab xnêz me zeene runctal zho xtol zho, gane rienpaa naa led psacsid no to ga.

¹⁰ Zeene Dios rdeed diidz sca rio miech guielnê, lo guielnê co laa zho rbig lo me rspanme me zho lo xtol zho; rsaan zho tel pe nac ncuuaane ndzinlid ne noyun zho. Zha

ne sca rac-wen lo Dios, nodne gacmban zho guiab zho pe nacne bded zho guielnē co. Laa grēraa guielnē ne ran miech, zig nac zha ne nod xnēz Dios, loxaque rlozh runmbana zho, laa zho bii zie nēz ne nitlo zho.

¹¹ Golgan ganle, pa lotaa bzhixcuaa to niina ne bio to guielnē co. Haxta bīaa to biini, bioxco to blee to zha co lo dol ne quiauyun zho ga; bien to ganle nonguiela rlisqui naaw. Gacxe waa, zeene gon to pa lotaa nac dol co, güeyniew guic to ni wbinladz to; gondzedraa to zho. Niicle ne gocladz to tebaa i zo naa nedz naa rson dien zha niun to; per tibaque beenquiz to zho miñe been zho ga. Wen ne sca been to, ga blu to ganle rdziguiende to dol ne been zho.

¹² Ne nligaa tibaque noxco no zaacse gac to. Zeene pxeel no guits co lo to, guiabd ne togo zhizhgabpaa zha ne been dol co no no, zhizhgabpagaa pxoz zho; sinque laa no pxeela sac tibaque noxco no zaacse gac to.

¹³ Gacxe waa, zeene bdzion no bin to diidz been to mine rnee no lo guits co, per nli rley no.

Ni zeene bdzion no grēse to zaacse blēzlo to Tit, madzraa bley no; niicle megaa rley me ne squi niowse gon to me; haxta nguieel rac me niina.

¹⁴ Bzodiidzle naa lo me, ne squitaa wen miech nac to, gane rley naa psande to naa guielto. Tel naa niapse diidzli rne naa, zig nac niina, zig repse naa lo Tit scase gon me rac to.

¹⁵ Rleynie me to, rzac zdo me zeene rso-ladz me grēse to ndooladz goc to pcaania to me, ni bin to diidz been to miñe bnabey me to.

¹⁶ iNe nligaa, rley naa niina bin naa squi zaacse rac to! iNasi, nanpaa naa racnie to naa zigne racnie naa to!

8

Dib zdo to goldeed gon

¹ Bets, bzian, laa no gzodiidz lo to ganle pa lotaa quiaycnien Dios grē zha ne ngab lo Jesús nēz Macedon nu.

² Nli nroob grē guielnē ne quiayan zho, per nguieel rac zho. Len dze ne bded nu beenlo zho tib gon, niicle ne zhis ncuuañe rap zho, per nroob gon ne beenlo zho.

³ Laa naa rnew lo to, sac naazhal gona. Ne nligaa, dib zdo zho bleeladz zho grē ncuuañe bloogon zho; ncuuañe rgaataa lo zho laa zho bdeeda.

⁴ Dzigo bnab zho lo no gdeed no diidz ye xgon zho guey lo grē zha ne nacgrē ne, zha ne guieñd pe yquini.

⁵ Ni lēdsew ga, bzee zdo no zeene bdzion no blozhse psan zho zho ladznia Dios, laa zho wbig lo no nē zho, miñe csiabtaa Dios

guic no gnabey no zho, zun zhow. Ni lalnu gon güeynied guic no gun zho grētaa miñ rii.

⁶ Niina ne bdzion no znutaa biabgan zho nēz rii noyuno zho gon rii, nacne rdzieets no lo Tit siguiel me guiaad me nēz lo to i stib; zeena lozh gunlo to gon ne bnabeyle me to i quiauyunlo to.

⁷ Rdziunbey no to: dib zdo to rnalto to Dios, zha niini nac to, rien to zha gnee to Xtiidz Dios lo miech, nguieel rac to run to xtsiin me, ni pseed to rleynie to samiech to. Nana sca, zig nac gon rii, scaque dib zdo to goltsoxco golgunlow.

⁸ Laa naa bzet lo to nu zha been zha Macedon, per guiabde to bod nonabey naa to scapaa gun to. Sinque laa naa bzeta lo to, zeena gacnan to ganle ye zha co pquiabladz bdeed gon co. Nu nagon rdeeda diidz glu to ne nli rleynie to grēraa zha ne nacgrē ne, led loxaque diidzsew.

⁹ Golwi ganle, zig nac Jesús pa lotaa noxco me ne. Niicle ne me naccheñ grētaa ncuuañe no, per bdeed me diidz goc me zig tib zha ne peet rapd; ga bgaa ne grētaa guielnē naac ne rap me. Laa me been miñ co sacne rleynie me ne.

¹⁰ Wena, tebaa tsoxco to lozh gunlo to gon qui. Golsoladz ganle, topaa psilo bleebey gaclow wdibiz ga, iñe nguieel rac to psilo to.

¹¹ Nana sca, zigne psilo to hor co, scaque-gaa niina nguieel golgac golsiaal lo dziin co. Golquiabladz tel palaltaa ncuuañe rgaal lo to tib tib to, dib zdo to goldeeda;

¹² sac zeene dib zdo miech rquiabladz zho cogon zho, tel palaltaa miñe yгаа lo zho, scaania Dios. Nanle me palal ncuuañe rgaal lo tib tib miech, gnabd me ncuuañe ni quianied zho.

¹³ Sac nacda ne ygad to grēse ncuuañe rap to lo stib zho, lozh ga guiaanmban to; laa zha yquianie grēsew.

¹⁴ Led scada. Laa miñ rii rac, zeena grēse ne lalga ncuuañe yquianie ne. Niina ne rgaaw lo to, goldeed palala yquini grē zha ne rapd nrooba; zdzingaa dze na pe gunfalt lo to, dzigo laa zho gneedz tel pe nacгаа ncuuañe quianiede to. Sca none dziunlsa ne xyudar zha ne nacgrē ne, zeena zig rne naa ga: lalga ncuuañe yquianie ne.

¹⁵ Golsoladz ganle, znu rnee lo Xtiidz Dios: "Zha ne ptop nrooba, beenda sobr lo zho; niicle beenfaltegaaw lo zha ne ptop zhisa."

Laa Tit guiaad i stib

¹⁶ Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no.

¹⁷ Zeene bnab naa lo me siguiel me guiaad me lo to i, bzhiguielga me; ni nolegaa guic me guiaad me, sac ne nligaa racladz me guiaadso me lo to stib.

¹⁸ Něz rii, no tib bets ne, nroob yudar quiaayun me nogaaz Xtiidz Dios lo miech; zaatne rcaalsataa zha ne no xněz Dios nu, grēse zho runbey me, tib men nziuu nac me lo zho. Me gacgrop Tit, niina ne laa no cxeel Tit lo to i;

¹⁹ ni meque bzooblo zho, sēnal zhits no zeene guiosan no gon rii. Nozhal guiosana, sac ne nligaa dib zdoo no noxco no zha gac xyudar grē zha ne guiend pe yquiin. Nu rlu ganle pa lotaa men nroob nac Dios, sac me quiaayacniēn ne ne laa dziin rii noyac.

²⁰ Gza no bets co guio, zeena gzaoldz zdoo miech guiab zho nend zha lega zhiēn no palal gon rii, sac gon nligaa nroob naca.

²¹ Dios zobwi ganle mbe lo no, ni racladz no ye miech gan zho ganle ne nli zha legal nac no. Miñ co nagon, nacne sca guio no gza no.

²² Rdziuunbey no stib bets ne nu, rdzian no nli dib zdoo me rleynie me Dios. Niina ne laa grop zha co guiaad i, ye me guiaadnal zhits zho. Rley me ne laa me guiaadgan to i, sac ziyon me ye to noxco gacnie to zha ne nacgrē ne.

²³ Tel nanđ new cho gnabdiidz lo to dien cho nac Tit, golguiab lo zho tipse nac no grop no me, xyudar naa noyun me quiaaseed no to. Ni tel gnabdiidz zho cho nac schop zha ne ziaadnal zhits me i, dzigo golguiab grē zha ne ne no něz rii pxeel zho, dib zdoo zho noxco zho mban zho zigne rdziladz Dios.

²⁴ Golguien sca, gza zho zigne ziaad zho lo to i, niowse golcuēzlo zho. Gollu ganle ne nli dib zdoo to rleynie to zho, zigne rleynieque to naa; zeena gacnan grēraa zha ne nacgrē ne nli miñe rnee no zeene rzodiidz no lo zho zha nac to.

9

¹ Nanle naa, rquiindpaa gni naa lo to zha gdeed to gon ne gaclo nu gac xyudar grēraa zha ne nacgrē ne, sac laa to noyunlolew.

² Runbey naa to, nanle naa ible rquiabladz to gun to xyudar zho, gacxe waa rley naa rzodiidz naa lo zha ne no něz Macedon nu, rne naa lo zho: wdibizlaa psilo to něz Acay i quiaayunlo to gon co. Miñcocxe waa, zeene bin zhow, nzian zho pquiabladz laa zho bdeeda.

³ Per laa no rxeel gza bets rii ziaad i, ziaadguncsoladz zho to lozh gunlo niob tow; zeena glu ganle led lega rneed no zha nac to.

⁴ Sac gon guielto ga grieequia naa lo zha rii, tel gualnie naa bla zho i, ni gan zho peet gard gaclo. Nli ziaan naa guielto, per mazdraa gon nac guielto ne guiaa to.

⁵ Miñ co nagon, ni naa mazd cxeel naa zha rii, ziaadnerga zho zeena gun zho xyudar to lozh ycaalsa gon ne pquiabladz to gunlo to zha.

Laa naa rnab lo to, tel pe nac ncuaaane cogon to, dib zdoo to goldeeda. Golguien zha cogon to.

⁶ Golwi ganle zha nac guielgon; Zha ne zhis ran, zhis guielnzaac ne rcaa zho; sangue zha ne nroob ran, scagaa nroob guielnzaac ne rlis zho.

⁷ Tib tib to sca, golcobeypalal ncuaaane gdeed to. Miñe gdeedtaa to, dib zdoo to goldeeda; ib gunde to ne guiab to por racwnabsew laa to gdeeda. Sac gon, zha ne dib zdoo rdeed ncuaaane rgogon zho, rleynie Dios zho.

⁸ Ni me ne nac me men ne rrieelo rneedz grēse ncuaaane rquiin, me nac men ne gneedz grētaa ncuaaane yquiin to; ni haxta ziaan miñe gdeed to gac xyudar grēraa zha ne nacgrē ne.

⁹ Zigne raquetaque lo Xtiidz me, zaatne rnee:

Zha ne nguzobdiidz lo Dios,
dib zdoo zho rgad zho ncuaaane rap zho lo grē zha ne guiend pe yquiin;

ni scagaa sēeb diidz ne miech wen nac zho.

¹⁰ Dios gunlay ncuaaane quianie to, ygaaw gdeed to, ni scagaa me gacnie to nroobraa guielnzaac ne yгаа to. Golwi ganle, zha runlay me zha ne ran: Me psan grēse lo bni ne ran zho, ni meque rchooba; rlozh zha, nroob guielnzaac ne rlis zho, rgaaw row zho.

¹¹ Ne nligaa, Dios nac men ne gunnroob ncuaaane quianie to, zeena scagaa nrooba cogon to. Golguien ganle, zeene laa no guiosana lo grē zha ne yquinaa ga, blactaa gley zho gdeed zho xquizh lo Dios.

¹² Led lega nacdsē gon ne gdeed to i. Sac gon, led loxaque xyudardse zho guna, sinque zeene laa zho ycaaniaw, haxta squiabladz zho dib zdoo zho gdeed zho xquizh lo Dios.

¹³ Zley zho gan zho grētaa ncuaaane cxeel to yquiin zho; ni zleynie zho Dios gan zho ron to miñe rnabey Xtiidz Jesús.

¹⁴ Haxta dib zdoo zho gnab zho gacnieñ Dios to, por grētaa guielnzaac ne gdeed me ga yгаа zho.

¹⁵ iXquizh xquielnzaac Dios, sac gon tel me nroobraa nac guielnzaac ne bneedz me lo ne! iGotsaa gwi ne ganle, haxta Xpēed me bleeladz me!

10

Rieguial gnabey Pabl lo zha Corint

¹ Ziyon naa rnee zho i, zeene zose naa zit nguieex rzē xtidz naa rxel naa; laa zeene zo naa lo to, rdzield naa pe gne naa. Sangue tel naa, tibaque nac naa, ndooladz rac naa lo to, niicle zeen tel pe diidz ne rsogaa naa, ndooladz rne naaw; zig gun Jesús, tel niaca miñe mezhall gnee lo to.

² iTebaa gdzind dze pe yquiaaqui glu naa xquieldox naa lo to! Zha ne squi rzac lalague

nac no grëa miech, rnee zho mîne run miech, mîncocque rdziuuñ no, jtebaa siguiel zho zaacse gac zho, sac racladz naa tijnie naa zho!

³ Nli miechse nac no, per ib zionald no gacndaan no zigne racndaan grëraa miech guidzliu.

⁴ Sac tel no, choot rnalod grë guiab laa ne rnalo zho, sinque laa no rnalo poder ro ne rap Dios; mîncosi zrieelo gnitlo grëtaa guielntseeb ne racladz mendox gac.

⁵ Con poder rii, zrieelo csioog no ro zha ne squitaa lega rnee, zha ne racndaan nêd zho gacnañ miech cho nac Dios. Grë zha ne ractseeb lo Dios, con poder rii zrieelo co no guic zho gbiire gbig zho lo me, gac zho tib miech nguzobdiidz lo Jesús.

⁶ Ni poder co yquiin no gnee no lo to lozh guien to gban to zigne racladz Jesús; lozh ga, grëragaa zha ne ractseeb, lëëque yquiin no par gacnañ zho ganle zha rieguial gac zho.

⁷ Zha ne rnee i loxaque rzedz yan naa, laglaase ga ran zho, nañd zho zhapaa nac naa. Naasi xnêz Jesús no naa; gacxe waa, zha ne rnee xnêz me no zho, none guien zho ganle cho nac naa.

⁸ Nana no to guiab guielniatsle nu, sac rlu naa ne naa rnabey lo to. Per nacda guielniats, ible Dios bzo naa gnabey naa lo to, ni laa me bzo naa par glu naa zha tsienal to grë mîne rnabey me, bzod me naa par yquidiee naa to tsienal to nêz ne nitlo to.

⁹ Golgacnañ sca ganle Dios bzo naa, guiabde to togo lega rnese naa par ctseb naa to.

¹⁰ Sac nañle naa no zha ne rnee i: “Gonde to mîne rnee men qui. Loxaque lo guits ne rxeel me squitaa ndox rzê xtiidz me, per loxaque diidza. jZeene zo me lo ne, tib zha yozhsew, per ni rienñ me zha gnee me!”

¹¹ Per led scada gon. Niina ne laa naa guial i, laa naa glu lo zho ganle zigne rzê xtidz naa zo naa zit, sca nac naa.

¹² Ib guiabde to, togo ye naa quiayun zigne run zha qui, lëëque lëë zho runniats zho. Tib guielnxen ga, sac gon lëëque zha runnon zho.

¹³ jTel no, choot rdziuuñniatsd no ncuaañe ni nacd no! Ni zeene rnee no cho nac no, per mîne bzo Dios no nodziuuñ no mîñ co rnee no; ni mecxe waa bzo no quiaseed no to.

¹⁴ Ible rioguial ne no gnabey lo to, sac gon no gloopaa baaad i biadseed no to zha nac Xtiidz Ndzon Jesús; choot noziaabd zaatne rioguiald no.

¹⁵ Stiba, rdziladz no gdaannie no xtsiin stib miech. Laa no bii cseed to lozh tsoguic to zha nac Xtiidz Dios, zeena haxta yele to gun xyudar no ygaazraa Xtiidz me.

¹⁶ Dzigosi nagon laa no guio grëraa guiedz ne ndxie dib nêz qui, guioseed no zho gacnañ zho zha laa zho lo dol; per zig rneque naa ga, guioiaabd no zaatne psilole stib zho, zeena gan miech ganle rdaannied no xtsiin stib zho.

¹⁷ Znu ziaad lo Xtiidz Dios, zaatne rnee: “Zha ne zienie guic xoobnen lë zho por dziin ne run zho, mazd tsoxco zho xoobnen lë Dios.”

¹⁸ Sac paat rquiinda ne lëëque ne gunnon ne, mîne mazdraa rquiin nacne Dioszhal glu zha non nac ne.

11

Nlid Dios pxeel zha qui

¹ Laa naa rnab lo to, jgolxcw yquiaadiag to mîne gne naa nu, niicle tel no mîne rzac to rquiind!

² Golgacnañ ganle, zigne rzac Dios to scaque rzaac naa to, ib racladz naa cho guiaadquidie to. Mîne racladz naa Jesússe gleynie to, zig run wnaa nguieg ne no xtiidz ctsieelnia. Sac tel wnaa nguiega, mgui ne no xtiidz zho mgui cose rleynie zho, haxta rdzin dze ne rtsieelnia zho.

³ Sca none greeequia to lo me; per rdzieeb naa gon nend zha yguib mendox yquiiil ma to, gondraa to mîne rnabey Dios, dzigo laa to gac zig rac grëraa miech ndzinlid. Sac gon tel Ev, sca pquiiil ma Ev.

⁴ Laa naa rzet mîñ rii lo to, sac rien naa, zha ne riaadtaa i ween rdeed to diidz rquiaadiag to zhiwseed zho. No zho rzeet Jesús, rzeetga zho espíritu, per rzeete zho me zigne biadseed no to; rneegaa zho zha laa miech lo dol, per nacda zigne pseedle to glo.

⁵ Haxta rnee zho, rienraa zho lo grëraa zha ne noteed Xtiidz Dios; sangue naa, nanpaa naa led scada, zrieelo glu naa lo zho ganle peet rienñ zho.

⁶ Nend nli gacd naa gne naa zigne rneetaa zho, per zeene rne naa rienpaa naa ne diidzli none naa; ni ziyanlegaa tow ganle.

⁷ Rzaac naa lëda ga ben naa, zeene bial naa bialseed naa to Xtiidz Dios; sac rsoladz to ganle ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guielnzaac nroob ne rap to niina.

⁸ To rioguial needz ncuaañe nquiiin naa, na lel grë zha ne nole xnêz Jesús len dze co, zha co pxeel ncuaañe pquiiin naa, rrieequia bla naa xtimi zho ga.

⁹ Niicle bdzin dze ne peet guienndraa lo naa, per ni tib lo to ib psodziind naa; lëëtaque len dze co baaad bla zha bets ne zha ne ziaad nêz Macedon, zha co baaadnie ncuaañe pquiiin naa. Ib peet bnabd naa lo to hor co, ni gdziindga dze ne pe gnab naa.

¹⁰ Ni golgacnan ganle, ib tedsod sodiidz naa grè min rii dib nêz Gres i. Ible zun naaw, led yed naa rquidie, sac gon runbey naa zha nac Xtiidz Jesús.

¹¹ Per guiabde to togo rlèènie naa to, racladz naa csan naa to guielto; sac Dios zobwi ganle rleynie naa to.

¹² Golgacnan sca led scada, sinque laa naa gun min co, zeena csioog naa ro zha ne rlozhd gacniats i, rnee zho ye zho quiayun xtsiin Dios zigne quiadziun now.

¹³ Sangué no, ndion no nlid Dios px-eel zho, lega noquidiese zho to i squi no zho, rquiaalo zho zig nacne nli xtsiin Jesús quiayun zho.

¹⁴ Ni led ncuuaane gzeed zdoon ga. Sac ibe sca run mendox, no hor rzèeb ma rded ma zig tib xmandad Dios.

¹⁵ Gacxe waa, zha ne squi run xtsiin ma, mincoque run zho rquiaalo zho rac zho zig cho miech wen, rquidie zho miech! Per zdziin dze ne laa zho yгаа guielndox ne tsieguial zho, zaatne tsietizh zho grètaa mine noyun zho i.

Blactaa ncuuaane zadeed naa

¹⁶ Laa naa rnab lo to nu stib, golquiaadiag mine gne naa, niicle tel rzè xtidz naa zig rzè xtiidz zha ne rzhinle guic. Nli lega niats gne naa, per golxew gon tow, sac laa naa gunnon naa zig run grè zha qui.

¹⁷ Led Jesús r nabey znu gne naa, sinque masaque laa naa gun min rii, zig run tib zha ne riotsle guic.

¹⁸ Tel squitaa niats rac zha qui lèèque lèè zho runnon zho, lozhd gool zho lo to dien pe nac ncuuaane noyun zho; golquiaadiaggaa mine gne naa nu na ganle:

¹⁹ Conque rzac to name nixbiini to, zha nac dzigo rdeed to diidz rquiaadiag to ncuuaane rnee grè zha yozh qui?

²⁰ zPe ib riende to ganle quianabeyzhoole zho to i, quiasaci zho to, quiaquidie zho to, quiala zho grè ncuuaane rap to, quiasanwin zho to, ya zig zgap zho lo to?

²¹ zHaxta rtoladz naa gon, sac laa ne naa squi nabey to lel zhale squitaa no!

Grè ncuuaane riats zho i nac zho, ye naa zrieelo sca gunniats naa naa (znu nagon rac zha ne rzhin guic).

²² zTelne riats zho rnee zho zha Israel nac zho? Yecxe naa waa zha Israel nac naa. zTelne rnee zho lo dii ne bzooblo Dios ga ziaad zho? Ye naa lo dii co zial naa. zTelne rnee zho Abraham nac xmengol zho? Men cocxe waa nac xmengol naa.

²³ zTelne niats rac zho rnee zho xtsiin Jesús quiayun zho? Gacnan zho ganle, naasi xtsiinpaa me quiayun naa. Nroob dziin ne ziyun naa, blactaa ncuuaane zadeed naa, pe zhidaa zigo miech naa ladzguiib, blactaa

zineedz dooguid zho naa, blactaa zaatne zadedlaa naa lo guielgut.

²⁴ Gaayle vuelt zisacsi zhiwxtis zha Israel naa, galptsibguieega nia dooguid bneedz zho naa.

²⁵ Tsonle vuelt zineedzyag zho naa, stib vuelt bneedzquie zho naa. Tsonle vuelt zadzieelo naa rdedquie barcw ne no naa len nisdoo; tib vuelt, tib dze tib guieel bzhoobse naa lo nisdoo.

²⁶ Pa lotaa grè dan ne ziya naa. Nzian vuelt ne bdedlaa naa niet naa: zaatne bdedlaa naa lo nis guiubee, zaatne bdedlaa naa lo ngbaan, zaatne bdedlaa naa lo grè menzit, zaatne bdedlaa naa lo grè menladz naa. Ziyoxtseeb naa lo guielgut, zigtaa zaatne nac len guiedza, zaatne nac dana, zaatne nac lo nisdoo, zigtagaa lo grè zha ne laglaase rquiaalo riladz Jesús a.

²⁷ Blactaa rdib rdzaag naa run naa dziin, blactaa guieel ni niip raaguieds naa, blactaa zaatne retgbin naa, zaatne retnis naa, zaatne rcuan naa, zaatne mbanse rcuub naa ni guien lar ne piix naa.

²⁸ Ni zhaaque tibaque nonie guic naa dien yo to, grèse to ne nac to zha ne nole xnèz Dios, zha no to tib tib guiedz zaatne squi blansole Xtiidz Dios.

²⁹ Zeene ron naa cho tib to racladz guiaan zdoon mban rac naa zeene rrieelod gane naa lo zho; zeene rongaa naa cho tib to quiayunctal xtol stib zho, ni rrieelod galisqui naaw lo zho, scaque mban rac zdoon naa.

³⁰ Grè mine bne naa nu, nacda guielniats; telne rieguialpaa gunniats naa naa, mazd gzet naa grè mine rlu ganle peet gacd gun naa naase.

³¹⁻³³ Zig bzhaac naa tib vuelt zeene bia naa Damasc, len dze co zob tib gobernador nac dziin lo rey Aret. Bnabey gobernador co xmenguiib me pquianap zho gzase puert ne rap biedz nroob ne ndze igo ro guiedz co; nan me naaz zho naa ngo zho naa ladzguiib. Per brieelod naaz zho naa, sac grè zha ne nole xnèz Jesús ga, zeene bin zhow dzigo bloo zho naa tib len chiciud pteed zho naa tib ro ventan ne quia cho biedz nroob co. Sca bdeeda diidz brie naa ga, biabd naa ladznia gobernador co.

Ni Dios gon, men ne nac Pxoze Jesús, men ne rieguial dziuunnon ne gzataa dze, me zobwi ganle diidzli rne naa.

12

Racniatsd Pabl

¹ Nanle naa nonguielda lèèque ne gunniats ne, per laa naa sodiidz lo to ganle zha nac grè ncuuaane zinabey Dios zilulo lo naa, ni grègaa mine zinee me lo naa.

2-3 Niina rac tsiida iz ga blis Dios naa güeynie me naa gbaa. Nand naa dien pe dib znu naa bia naa, te zhiéspirituse naa ye güeynie me; loxaque mese nan dien zha güeynie me naa. Loxaque mine bien naa ne laa naa bia lugar ndzon co,

4 ga bin naa grè diidz ndzon ne waltaa gard gon miech, ncuuaane guiend zho zha naca, ni nodgaa diidzbey gne naaw.

5 Zrieelopaa nagon gunniats naa naa ne laa naa bia ga, per ib gund naa min co. Laa ne gunniats naa naa zig rnele naa ga, mazd gzet naa grè mine rlu ganle peet gacd gun naa naase.

6 Ni tel gacladzga naa gunniats naa naa por mine blozh bzet naa nu, led guielxend ga gun naa; sac mine nlipaa goca. Per rund naa min co, sac laa naa racladz tozhal guien cho nac naa, benque ran to ganle zha mban naa, rangaa to zha rne naa.

7 Ne nligaa ndzondoo nac grè ncuuaane blu Dios lo naa ga, zac nazho gunniats naa naa sac naa gona; per parne gund naa min co, laa Dios bdeed diidz biaad tib xmandad mendox psanwin naa, biaan tib yoob xcuerp naa zig nac zeene pe tib guiets nroob ne niaaz naa.

8 Tsonle vuelt zinab naa lo Dios ctiche me yoob rii;

9 biontaa vuelt në me lo naa: “Bui ganle laa naa naciele luu, ni min co nac mine rquinraa lo luu. Peet tsienied guic luu sca, zha ne squi nsis rac, ga rdeeda diidz rlu naa ne nli naa nacie zho.” Min co nagon rley naa, sac ne znu nsis rac naa, grèse miech zeene ran zho grètaa ncuuaane rrieelo run naa, rien zho nli Jesús nacie naa.

10 Ne nligaa rley naa, sac niicle ne miech gzhe gzhele rac naa, niicle nroob guielnë ne nodeed naa, niicle rbidzgo miech lo naa, rtsidil zho naa, no hor guiend pe yquinn naa, per rley naa sac laaw nodeed naa porne no naa xnëz Jesús. Rne naa rley naa, sac zeene sca zootle grieequiadraa naa lo zhgab ne no naa, hor co laa Dios rlu ne me nacie naa.

11 iNligaa lega guielxenle nu znu rne naa, rac naa zig tib zha ne rzhinle guic! Per to gon rap dol, sac laa ne cxobnen to nli miech wen no, lel zhaa mine noyun to. Nli nacd naa cho zha non, per tsod ncuuaane csanwin grè zha qui naa, niicle ne squitaa rzac zho zha rien nac zho, niicle ne rnee zho Dios pxeel zho.

12 Golsoladz ganle, zeene bialseed naa to i, blu naa lo to ne nli Dios pxeel naa noteed naa Xtiiidz me, blactaa grè ncuuaane bneedz Dios diidz blu naa lo to, blactaa grè milagr, blactaa grè ncuuaane bzee zdoo to gon to. Biod dze ne nieednie naa to.

13 Lëese mine bend naa lo to i, nacie nab naa needz to pe nquinn naa; sac grèraa zaatne ziyaseed naa miech, zha rneedz

ncuuaane rquinn naa. iGolgun dispensar telne rbiqladz guic to min co!

Nonie zha Corint guic Pabl

14 Laa naa nozhixcuuale par guialgan naa to stib. Nu gac tson vuelt guial naa lo to i; ni scaquegaa niina gon ib csodziind naa lo to. Sac tel naa, noguibd naa dien pe gneedz to lo naa, sinque to guialguib naa. Golguien ganle, niicle ne racladzde to, per rrieequia gon mëed nac to lo naa; ni ndion ne ganle, led mëete riegual gdeed ncuuaane yquinn dad, sinque dad none gdeed ncuuaane yquinn mëed.

15 Ne nligaa, tib guielbleya lo naa quia-teedlo naa to, laa naa noxco guien to zaace gban to, zeena gdzin to zaatne gneedz Dios cuëz to. Xco co no naa, ib rquiad zdoo naa lozh grè ncuuaane rap naa, o lozhgaa naa lo xco co; maase niicle squi zootne laa ne rleynieraa naa to, lel nozozit to lo naa.

16 Nanle naa, no bla zha ne rnee i: “Nli peet bnabd me zeene biadseed me ne, per ne squi miech ndzielguic nac me bod no pa stib mod ne rien ne quiaban me ne.”

17 Nana, zig nac zha ne zixel naa ziyaadgan to i, iPe niacxe biaadban zho to? iPe niacxe biaadquidie zho to?

18 Naa quia bnaab naa favor lo Tit biaad me i, ni pxel naa stib zha bets ne biaadgrop me. iPe no pe bnaab zho lo to? Golgacnan ganle nodziuund no min co, sac zigtaa naaw, zigtagaa mew, dib zdoo no nodziuun no dziin rii, choot noquidied miech.

19 Nana gza zdoo to guiab to bod parne guiaanwen no lo to, gane znu rne naa. Dios zobwi ganle led scada. Bets, bzian, grè mine none naa lo to nu, laaw rne naa sacne racladz naa lozh tsoguc to gban to zigne nac Xtiiidz Dios.

20 Sac gon, rdziladzd naa telne glanso naa lo to i, ni gan naa racde to zigne racladz naa; dzigo niicle togaaw, tsod zdoo to zeene gan to laa naa glisquiw. Adel gon zeene laa naa glanso i, lel dil no to; zha ne në rac zdoo dien cho stib noded, zha ne nozhix-cuaa diidzguizh, zha ne quianeenë, zha ne quiyacniats; nend haxta chop tson diile nac to.

21 Tel gan naa sca rac to, mbe gon stoadznie naa to ni haxta siaabguielnë to naa; sac nanle naa ni lalnu rdziladzd Dios grè min co. Zig nac grè zha ne squi padzeelale quiyayunctal xtol ni rsaand zho grètaa guielyozh, grètaa ncuuaane ndzindid ne bii quiyayun zho, mbe gon sigoon zho naa.

13

Rso Pabl diidz

1 Niina nagon ne gac tson vuelt guialgan naa to, tel pe nactaa falt ne cho quiyayun i, guiaanda scase. Zigne rnee lo Xtiiidz Dios:

Teĭ no chop zho, tsonġaa zha ne nanpaa zha naac falt co, zha ne beena ga ib none laa zho quizh xfalt zho. Nu rac bion vuel ne rso naa diidz rii lo to.

² Laaw nile naa lo to lultm vuel ne bialġan naa to, ni niina laaw rneque naa stib: Grēse zha ne quiayunctal xtōĭ i, zigtaa zha ne padzeelale squi no, zigtagaa zha ne wriin psilow, gacnaġ zho ġanle zeene laa naa glanso i, grēse miġe quiayun zho ib tedlaad zho, laa naa ġunquizh zhow zigne rieġual zho.

³ Ga ġan to ġanle nli Jesús rnabey naa, ni Xtiiidz me none naa lo to; sac mesi ġon, gdziguiend me sca ġac to, sinque zigne racladz me sca none ġac to.

⁴ Nli ġuudz ġoc me bdeed me diidz pquiaa zho me lo cruz hor co, sangue niina meġ rnabey nac me; laa me mban niina niapse por poder ne rap Dios. Ye no, zig nac niina miech ġuudz nac no, per ible zġaa no tib ġuielmban ndzon, sacne me nacnie no; ni zrieelo ġnabey no to sacne rdziaap no xpoder me.

⁵ Nana sca, tozhal ġolcobey dien zha mban to. Wen wen ġolcobey dien pe nli dib zdo to rliladz to Jesús. ĶPe nli mban to zig none ġban zha ne rliladz me? ĶPe zig zie dze rienraa to ne me nacnie to, me rnabey lo to? ĶTe loxaque diidzse ye nac ne laa to rliladz me?

⁶ Sangue no ġon, wen wen ndion no zha mban no, ndionpaa no ne lo Jesús ngab no.

⁷ Tibaque rnab no lo Dios cxobnia me ġuic to zaacse ġban to. Ni ġuiabde to togo par ġuiannziuu no lo miech ġane noxcopaa no zaacse ġac to; sinque laa no rdziuuġa parne ġban to zigne rieġual ġban zha ne nli no xnēz Dios. Miġ co nagon noxco no, niicle tel rzac to lēda nu quiaadziuu no.

⁸ Sac tel no, laa no zionaġ ġac to miech wen, zha ne zienaġ miġe nac diidzli; choot ziaate par lega gactox no lo to.

⁹ ġacxe waa, tib ġuielbley nroob ga lo no, telne zhal to znuse xixcuaa to, ġac to zha ne nliġaa dib zdo rleynie Dios; laa ne yquiambēz to ġuiaadlisqui no grē ncuaaġe noyun to. Laa no racladz gdziġ dze ne ġac to zigne rdziladz Dios, ni miġcogaa quianab no lo me.

¹⁰ Laa naa rso diidz rii lo to lo ġuits ne rxeġ naa nu, sacne racladz naa gactox naa lo to zeene laa naa glanso i. Nli Dios bzo naa rnabey naa lo to, ni miġe racladz paa naa nacne lozh tsoġuic to zhiwseed me; ib racladz naa yquiaago naa to.

¹¹ Nu ne laa naa csiaaġ lo ġuits rii, laa naa rnab lo to bets, laa naa rnab lo to bzian: Nley ġolġac, ġoltsoxco ġban to zigne racladz Dios, zha ne mban rac, ġolchoobladz zdo zho; iġe niowse ġolġban, tipse ġolġac. Scagaa

Dios zleynie me to, ni haxta zacnie me to zeena peet ctsebde to.

¹²⁻¹³ Nana sca, tib tib zha ne nacgrē to ġolquiaabdiuzh zho, iġe ġolxen nia zho. Grēse zha bets ne, zha bzian ne, zha ne rliladz Jesús nēz rii; laa zho rxeel bdiuzh lo to. ġolcaania zhibdiuzh zho.

¹⁴ ĶDios sca ġuiaannie to! Iġe nley ġolġac, ġolġan ġanle pa lotaa rleynie me to. Peet tsienied ġuic to, Jesús nac meġ ne noxco grē zhizhġab to; ni scagaa Espiritu Sant ġacnieġ to tibaque tipse ġac to.

Pabl

GUTS NE PXEEL PABL LO ZHA GALÁS

¡Diuzh to grése to!

¹ Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoo naa, led miechd pxeel naa, sinque Jesús pxeel naa, me ni Dios Pxoze me, men ne bleeaban me.

² Laa naa rxeel tib guts rii ziaad lo to zigne no to nêz Galás i, nac to zha ne ngab lo Jesús; rquiaabdiuzh naa to, ni scagaa grê zha rii laa zho rxeel bdiuzh lo to.

³ Dios men ne nac Pxoze ne, ni Jesús men ndzon ne rnabey, me nac men ne tsoxco grê zhizhgab to, zeena peet tsienied guic to.

⁴ Jesús bdeed xquielmban bdiizh me xtol ne, psilaa me no lo grêtaa guielntseeb ne no lo guidzliu rii, laaw been me zigne gocladzse Dios men ne nac Pxoze me.

⁵ ¡Gotsaa dziuunnon ne Dios sca, ni gdziñd dze ne csaan ne dziuunnon ne me! Sca rieguaia.

⁶ Rzee zdo naa gon ne gardle gac nroob dze ga, laa to bzozitle lo Xtiidz Ndzon Dios, men ne bredz to pcaania me to, porne nquialadz Jesús to. Wseed ne rililadz to niina, masaque rzac to na mincogaa csilaa to lo dol.

⁷ Per guienndraa stib wseed ne gon csilaa ne lo dol. Mine naca zha ne biadseed to i, lega rquidiese zho to, racladz zho ctsêê zho mine nac Xtiidz Ndzon Jesús.

⁸ Grése zha ne guiaadnie stiblo wseed mine pseete no to, ni gnê zho lëe min co csilaa to lo dol; zha ne sca gon, miech ndziib-deele ga nac zho. Tel chotaa sca gon, niicle tel naazhala, tib anj ne quietgaa gbaaw, ible zdzibdee Dios zho.

⁹ Bnele naaw lo to, ni na laaw rneque naa stib: Tel cho zha ne guidseed to stiblo wseed mine pseete no to, ni gnê zho lëe min co csilaa to lo dol, ible zdzibdee Dios zho.

¹⁰ Nana gon ne znu rne naa, no to guiab parne guianzniu naa lo miech gane znu rne naa; per golgacnañ ganle, quiaguibd naa guianzniu naa lo miech, sinque laa naa noxco gon naa mine rnabey Dios. ¡Sac telne lel ncuuane gleynie miech noxco naa, nliid dzigo xtsiin Jesús ga noyün naa!

Jesús pxeel Pabl gnee Pabl Xtiidz me

¹¹ Bets, bzian, golgacnañ sca ganle: Wseed ne nac Xtiidz Ndzon Jesús, mine bialseed naa to, led guicd miech biaba.

¹² Paat biad naa nseed miech naaw, sinque Jesús zhal bneedza lo naa.

¹³ Led nanle to ganle, zha nactaa grê mine ben naa zeene bii no naa lo zhiwseed zha

Israel; ptsidil naa grê miech ne no xnêz Jesús, blêenie naa zho, pquianañ naa nloozh naa zho.

¹⁴ Bzhoob diidz ne naa nac zha ne pseedraa lo grê menladz naa, zha ne tipse biagrêe naa scuel; naa nac zha ne neer lo zho, sac naa run grése mine rnabey zhiwseed zha Israel, ni naa rioxcora naa run grése mine been grê pxozgol no. Sca nagon goc naa lo zha Israel.

¹⁵ Ible güeynied guic naa, antes ne gal naa laa Dios bzoooble naa gunbey naa Xpêed me; laa me bleextsole naa, niapse porne nquialadz me naa. Zeene bdziñ dze co

¹⁶ laa me blu me lo naa, bzo me naa ga naa zaatne ndxie grê miech ne nacdrea zha Israel, gaseed naa zho Xtiidz me mine glu zha laa zho lo dol. Zeene blozh gon naa Xpêed me, biad naa niaguib naa ne goon dien cho nseed naa,

¹⁷ ni niicle biadgaa naa Jerusalén, nian-abdiidz naa lo grê zha ne pxeelle me nonee Xtiidz me; sinque laa naa bia nêz Arab, wbirele naa nêz co, dzigoraa bdziin naa Damasc stib.

¹⁸ Gocle tson iza dzigoraa bia naa Jerusalén, hor coraa beenbey naa Pedr; blêz naa lo me ga tsiin ngbidz.

¹⁹ Gaque beenbey naa Jacob bets Jesús, laa grêraa zha ne pxeel Jesús noyün xtsiin me, ni tib zho gon naa.

²⁰ Dios zobwi ganle diidzli nac grê mine rne naa nu, led lega rned naaw.

²¹ Zeene brie naa ga, laa naa bia nêz Siria ni nêz Cilis.

²² Grê zha Judê zha ne nole xnêz Jesús, gard gunbey zho naa len dze co.

²³ Diidz ronse zho rnee zla zha ne nacgrê zho: "Men ne scataa pquianañ ne, yele me noseed miech Xtiidz Dios, ni glo scataa gocladz me nitlo mew."

²⁴ Dzigo rley zho, rdeed zho xquizh lo Dios ne yele naa rililadz Jesús.

2

Rcaania zho Pabl

¹ Zeene blozh tsiida iza, dzigo laa naa biire bia Jerusalén stib, bio no grop no Bernabê, ni bionie no Tit.

² Laa naa bia, sac ib Dios blu lo naa ne no ga naa. Dzigo ga pcaals no grê no zha ne zo rnabey lo grê zha ne no xnêz Jesús ga, bzodiidz naa lo zho zha noseed naa grê zha ne nacd zha Israel Diidz Ndzon ne rlu lo zho zha laa zho lo dol, ni naa zeena guien zho ganle ne nli rquiin dziiñ ne benle naa, ni mine quiaayungaa naa.

³ Ni nligaa bley zho bin zhow.

Niicle ne led zha Israeld nac Tit, per nabeyd zho niopaa Tit bey ne rio grê zha Israel.

⁴ Per lo zha ne zioobgza no ga, lad co briequia bla zha ne bnab nio Tit bey co, per choot pquiaadiagd xtiidz zho. Nac diidz ye zho riladz Jesús, per nlida; ib blud zho cho nac zho, ngeets bzëëb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziun no miñe rnabey ley.

⁵ Per ni palal bdeete no diidz niac miñe rnee zho, laa no racladz guiaannie to Xtiidz Ndzon Jesús miñe rlu zha laa miech lo dol, sac miñ co nac diidzli.

⁶ Grë zha non ne zo rnabey lo grë zha ne no xnëz Jesús ga (zha non guiab ne, per ndion ne ganle grëse ne tibaque nac ne nëz lo Dios)

⁷⁻⁸ ib peet blisquid zho lo naa, niicle peet pseetragaa zho naa. Sinque laa zho gochna ganle ne ib Dios bzoo naa gun naa xtsiin me, gaseed naa grë zha ne nacd zha Israel guien zho zha laa zho lo dol; zigne bzoque me Pedr noseed Pedr zha Israel. Dios men ne bzo Pedr quiaseed Pedr zha Israel, lëëque me bzo naa quiaseed naa grë zha ne nacd zha Israel.

⁹ Gacxe waa, zig nac Pedr, Jacob, Juan, zha ne zo rnabey lo grë zha ne riladz Jesús ga, laa zho bien ne ible naa bgaa guielnzaac rii, bneedz Dios dziin rii lo naa. Dzigo rley zho haxta bzhen zho nia no grop no Bernabé, laa no biaan diidz ne zha tsieseed zha Israel, laa no guioseed grë zha ne nacd zha Israel.

¹⁰ Lëëse miñe pso zho diidz lo no, dzioxco no dziun no xyudar grë zha ne guien pe yquini; ni nligaa ib nonguiel min co ni laaw noyoxco naa.

Ractox Pabl lo Pedr

¹¹ Laa zeene bиаad Pedr Antioquí, dzigo ga nli laa naa goctox lo Pedr, sac ncuane ndzinlidraa quiayun Pedr.

¹² Glo, grëse zha ne nacd zha Israel zha ne riladzle Jesús, rzënie Pedr zho, tipse rbenie Pedr zho zeene laa zho row; ni blozh ga, zeene laa bla zha ne pxeel Jacob bdzin ga, pasëraa Pedr sca tipse niownie zho, laa Pedr bzozit lo zho. Rdzieb Pedr zha ne bdzin ga, sac lëë zha co racladz, grëse zha zit ne rzëëb xnëz Jesús ib none tso zho bey ne rio zha Israel.

¹³ Grë zha Israel ne nole xnëz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho.

¹⁴ Nacne zeene gon naa sca zienaldras zho zigne nacpaa wseed ne ziaadnie Xtiidz Dios, squi ndxie grëse zha ne rcaalsa ga goctox naa lo Pedr, rep naa: "Luugase name nicle ne zha Israel luu, ni mband luu zigne nac zhiwseed zha Israel, çpe nac dzigo ne racladz luu gnabey luu grë zha ne nacd zha

Israel, gban zho zigne nac zhiwseed zha Israel?"

Zha rlaa miech lo dol

¹⁵ Golquiaadiaga ganle, tel no desde gol no zha Israel nac no, nacd no zigne nac grëraa miech ngoopdol ne nac stib nacion; ible pseed no grë miñe nac xley zha Israel.

¹⁶ Sangue niina laa no ndion ganle, niicle mazdraa gun miech miñe nac ley grielod guiaanwen zho lo Dios, sinque zha ne dib zdoos gliladz Jesús, zha co nac zha ne guiaanwen lo me. Gacxe waa, ye no laa no bliladz Jesús dib zdoos no, zeena guiaanwen no lo Dios; ni laa no guiaanwen lo me porne dib zdoos no riladz no Jesús, nacda porne dziun no miñe nac ley. Sac gon niicle zha ne tsoxcoraa gun zho grë miñe nac ley, grielod guiaanwen zho lo Dios.

¹⁷ Nana ne laa no wbig lo Jesús parne guiaanwen no lo Dios, no zha ne rzac dol ga. Masaque rzac zho xtol no ga rdziuanctal no porne riladz no Jesús, per; jled scada gon!

¹⁸ Mazdol ga gun naa, telne rlozhle rseed naa miech rne naa lo zho ne led leyd nac miñe csilaa ne lo dol, ni lozh ga naaque no lozhd tsoxco gun grë miñe nac ley.

¹⁹ Sac tel naa, ib brieelod niun naa grë miñe rnabey ley, ni zha ne rguiits ley gon ib none guet zho; gane niina masaque rriequia laa naa gutle. Niina ne laa Jesús gut por grë xtol naa, rriequia ye naa gutnie me ga, zeena grielod gun naa miñe rnabey Dios.

²⁰ Led naadras nu znu mban, Jesúsle nu mbannie naa, ni guielmban ne mban naa niina, lëë min rii bneedz Dios lo naa porne riladz naa Xpëed me, men ne rquia zdoos naa, men ne bleeladz xquielmban ga beet zho me bdiizh me xtol naa.

²¹ Nana, telne niaca miñe nli zrieelo guiaanwen ne lo Dios porne gun ne miñe nac ley, zhlëse ga dzigo bиаadguet Jesús. Golangnaa sca ganle, Jesússe nac men ne csañwen ne lo Dios, gacxe waa nonguielda ga csañ ne me tiblad, ni pa lotaa ga pquia zdoos Dios ne.

3

Jesús none gliladz miech

¹ Nadzpaaxnen to nac to zha Galás! ¿Pe goc to, cho bиаadgunguet guic to squi rac to? Pe led zeene biadseed no to, wen wen gocnañ to cho nac Jesús, ni zha nacne sca beet miech me lo cruz.

² Zhal to golcobei dien, çpe ne been to grë miñe nac xley zha Israel, laa to bgaa guielbiini chen Espiritu Sant, te ne bliladz to Xtiidz Diosa ye?

³ Pa lotaa gon rdzin lo xquieln xen to i, conque laa to gonle ganle ne niapse por guielbiini chen Espiritu Sant laa to psilo

mban tib guielmban cub, ni na nanaque to tsienal to ley.

⁴ Pe nlipaa rnee to, ¿pe lega scase nazho gon to grê guielnê ne pteed miech to, zeene psilo bliladz to Xtiiidz Jesús?

⁵ ¡Golzhixcuaa guic to! Golguien ganle, laa Dios bneedz zhiEspíritu me lo to, ni laa me noyũ grê milagr lo to, per nacda porne run to miñe rnabey ley, sinque porne dib zdoo to rililadz to Xtiiidz mew, miñe biadseed no to.

⁶ Zig Abraham, porne dib zdoo me bliladz me xtiidz Dios miñe rêb Dios lo me, gane pcaania Dios me zig tib zha ne peet xtold.

⁷ Gulgacnañ sca ganle, grêse miech ne dib zdoo gliladz Xtiiidz Dios, grêse zha co laa Dios ycaania zho zig xpêédpaa Abraham.

⁸ Ni miñe nodzian ne niina, ib lo Xtiiidzle Dios zhozneew, zeene bnee me ne grêse miech ne nacd zha Israel, silaa me zho telne dib zdoo zho gliladz zho me. Lêe min co ga bnee me zeene znu rêb me lo Abraham: “Grêse miech ne ndxie dibdoo lo guidzliu, zha ne dib zdoo gliladz naa zigne rililadz luu naa, zunlay naa zho.”

⁹ Gane grêse zha ne dib zdoo rililadz Jesús, runlay me zho zigne beenlayaque me Abraham, zeene laa Abraham bliladz me dib zdoo Abraham.

¹⁰ Sangue zha ne rnalo ley ne lêew csilaa zho, laa zho noyac ndziibdeele ga, sac lo Xtiiidz Dios no tib zaatne rnee: “Ndziibdee grê zha ne grieelod guñ grêse zigne nac ley.” ¡Ni tsod zha ne gon grieeo guñ grêse miñe rnabey ley!

¹¹ Gase naganle rlu tsod tib zha ne grieeo guiaanwen lo Dios por guñ zho miñe nac ley; ni laaw zhozneeeque lo Xtiiidz Dios zaatne rnee: “Zha ne guiaanwen lo Dios, laa zho guiaanwen porne dib zdoo zho gliladz zho me; ni zha co yгаа tib guielmban ndzon.”

¹² Led yed ley rnab dien cho dib zdoo gliladz; sinque rneew: “Zha ne racladz gban, none gon zho grêse miñe rnabey ley.”

¹³ Miñ co nagon, grêse ne nac ne miech laa ne biabdee, sac brieelod mban ne zigne nac ley. Per niina, laa Jesús biaadsilaa ne lo grêtaa dee co, masaque lêe grê dee ne nac ne ga bi me zeene sca pquia me lo cruz; zigne zhozneeeque lo Xtiiidz Dios, zaatne rnee: “Miech ndziibdee ga nac grêse zha ne ret rquianga zho tib lo yag.”

¹⁴ Ni por miñe sca bded Jesús ga, miñ co niina grêse miech ne nacd zha Israel, zac yгаа zho grêse guielnzaac ne bzeet Dios lo Abraham ga; ni niicle tib tibгаа zha ne ngab lo mew, scaania zho Espiritu Sant, Espiritu ne rêb me cxeel me lo grê zha ne dib zdoo gliladz me.

Zha ne nlipaa nac xpêéd Abraham

¹⁵ Bets, bzian, laa naa gzet ncuaañe rac lo guidzliu rii. Nanle to ganle, zeene laa chop miech run tib trat, rquia miñe rnee zho ga lo guits ni rquia lê zho lo guits co grop zho; zeene laa lê zho pquiase ga, ni tib zho gacdraa ctsêê trat co.

¹⁶ Nana gotsaa gwi ne ganle zha been Dios: Psañ me xtiidz me lo Abraham, ni tib lo men ne grieequia lo xtiia Abraham. Raquiete nzian zho, rêb me: “grê zha xtiia Abraham”, sinque tibaque men ne bzeet me, ni lêe men co ga nac Jesús.

¹⁷ Znu nagon nac miñe quiane naa lo to nu: Tib trat ga been Dios grop me Abraham, zeene rêb me scaania me grêse zha ne dib zdoo gliladz me; ni ible laa xtiidz co me biaan zig tib trat ne quia lê me lo. Miñ co nagon, grieelod ctsêê ley trat co; zig nac ley, blozhle tap gayoo galptsii iz biaan xtiidz co me zeene laa ley biaad.

¹⁸ Nana, telne por guñ ne miñe rnabey ley, laa ne yгаа grê guielnzaac ne bzeet Dios lo zhitrat me gdeed me por tib men ne grieequia lo xtiia Abraham; ¿pazhe dzigo rquiin trat co? Sac lo trat co gon raquiet ne por tib men ne grieequia lo xtiia Abraham, laa me gneedz guielnzaac co lo ne.

¹⁹ Nana gnê to: “¿Pa dzigo rquiin ley ne laa ley biaan, ni tel nole trat co glo?” Laaw biaan gon zeena glu ganle zha nac miech, ib rond zho miñe rnabey Dios zho, laaw been dziin laga bdziñ dze ne laa men ne brieequivia lo xtiia Abraham ga biaad, men ne bzeet Dios ga zeene psañ me xtiidz me lo Abraham. Ni tel ley, dze ne pcaania zha Israela tib xanjl Dios pxeel me bdeeda lo Moisés, dzigo Moisésle psaña lo menguietz Israel.

²⁰ Sangue dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anjlgaa ni-aadnie xtiidz me; sinque mezhal biadneew lo Abraham.

¿Pa rquiin ley?

²¹⁻²² Nana gnê to: “¿Zig gocladz dzigo lêe nsiooglo xley Moisés lo trat ne been Dios ga?” ¡Led scada! Sac grieelod yгаа ne guielmban ndzon ne gdziñd dze lozh ga, telne gnalo ne ley; ib grieelod ley csañwena ne nêz lo Dios. Telne niaca miñe nrieelo ley nsi-laaw miech lo dol, nod pe nacne dzigo nxeel Dios Xpêéd me, biaad me biadbee me miech lадznia dol (sac rnee lo Xtiiidz Dios masaque ngadoo miech lo dol). Jesússe gon zrieelo csilaa miech lo dol, totsaque dib zdoo zho gnalo zho me, mese zrieelo gdeed guielmban ndzon co lo zho.

²³ Zeene gard guiaad Jesús ga, laa ley co pquiin pquianapa ne zigne rquianap wxtis zha ne nioogyu, laga bdziñ dze ne laa me biaad.

²⁴ Zig tib ngudziaan ne riaanne mēēdwin, sca pquian ley co lo ne, pseedā ne zha gban ne, ni gacnañ ne cho nac Jesús, men ne csilaa ne lo dol zeene dib zdoo ne gliladz ne me.

²⁵ Sanguē niina ne laa Jesús biaadle, led ley codraa gnabey ne, ni niicle rquiindra-gaa pe cseedā ne.

²⁶ Gacxe waa, tel to xpēēdle Dios nac to porne dib zdoo to riladz to Jesús,

²⁷ ni grēse zha ne brobnisle porne no zho xnēz Jesús, laa zho rlu ganle ne Jesúsle nacie zho, ni laa zho zianañ gban zho zig racladz me.

²⁸ Miñcocxe nagon waa, grēse ne tibaque nac ne niina, guiēndraa ne goon cho nac zha Israel, cho nacgaa zha zit; dien cho nac ngundziin, cho nacgaa zha ne rnabey; goon dien cho nonraa pe mguiw te wnaaw ye; sac grēse zha ne naciele Jesús, tibaque nac zho grē zho.

²⁹ Ga nagon, telne ngable to lo Jesús, dzigosi nli zha xtii Abraham nac to, ni zгаа to grē guiēlnzaac ne bzeet Dios zeene psañ me xtiidz me lo Abraham.

4

Zha ne nac xpēēd Dios

¹ Golgona ganle, nligaa tib mēēdwin lēē, niicle guiaanne win ncuaañe rap pxoz win, per lega nace win zig tib ngundziin win ne run xtsiin pxoz win. Niicle chen win grē ncuaañ co, per grieelod win gnabey wina.

² Laa win rianañ ladznia zha ne ran win, zha ne rseed win dien pe nac ncuaañe gun win, laga gdziñ dze ne laa win zacle ycaania ncuaañe psañ pxoz win.

³ Scadaa nagon bzhaaac ne glo zeene gard guiaad Jesús, rrieequia masaque ngadoo ne lo grē ley co, ni lo grēraa ncuaañe rac lo guidzliu rii.

⁴ Laa zeene bdziñ dze ne laa Dios pxeel xpēēd me Jesús lo guidzliu (tib wnaa bded por xniaa me, bzoob me diidz been me grēse zigne rnabey xley zha Israel),

⁵ laa me biaadsilaa ne, biadbee me ne ladznia ley co, bdiizh me grē xtol ne, zeena ycaania Dios ne gac ne mēēd lo Dios.

⁶ Ni parne glu ganle ne nli xpēēdle Dios nac ne, pxeel Dios zhiEspíritu xpēēd me blēz zdoo ne; gacxe waa niina laa ne rien rnee ne lo me: "¡Papá yeeñ!" Espiritu co rnee ne Pxoze ne nac me.

⁷ Ga nagon, led yedraa niina nac ne zig cholze cho ngundziin, sinque xpēēdle Dios nac ne, ible ye ne ygaa grē guiēlnzaac ne rap Dios.

Rnee Pabl rnabeydraa ley

⁸ Bets, bzian, golsoladz ganle, zeene bii gard gunbey to men ne nacpaa Dios, masaque rrieequia ngadoo to lo ncuaañe

nac zhindio to hor co, rdib rdzag to run to grē miñe rzac to rdziladz grē mdio co.

⁹ Nana, laa to runbeyle Dios, mazd gni naa ganle ledaa Dios runbeyle to, zpe nac dzigo racladz to gbiire tsiegan to, tsiequitsgzhib to lo grē mdio co, gbiire guiab to ladznia grē ncuaañe paat rquiind co, gnabeya to?

¹⁰ Rquia to gon run to grē lni, dien pa mēē ndzonraa, dien pa dze nac dze ndaraa, pa iz nac iz ne ndaraa, dien pa dze zac pe gow to, pa dzeegaa gacda.

¹¹ ¡Rdziebnie naa to gon! ¡Pe nlipaa zhlēse bialseed naa to, ne squi laa to racladz csaan miñe bialne naa lo to!

¹² Bets, bzian, laa naa rnab lo to golban zigne mban naa, tel naa niicle ne zha Israel nac naa per zanañdraa naa miñe nac xley zha Israel. Ngadoodraa naa lo ley, gane rne naa: Golban zigne mban naa. Ni guiabde to togo bod nend no pe falt ne been to lo naa.

¹³ Led rsoladz to ganle, rzacnē naa len dze ne psilo pseed naa to zha laa to lo dol; miñ co nacie nzianlaa dze blēz naa lo i.

¹⁴ Niicle ne sca rzacnē naa, gon dze to naa; laa ne mbix zdoo to nian to xquielguidz naa, znu pquia zdoo to naa, rley to blēzlo to naa pale cho xañl Dios o Jesúsгаа, tel niaca miñe mezhal niadseed to.

¹⁵ ¡Ne nlipagaa rleydiox to len dze co! Tel niaca miñe niac mbee to bziaalo to, zootle zig mbee tow ngad tow lo naa. ¿Yo grē guiēlbley co na? ¿Yo ne scataa rleynie to naa len dze co?

¹⁶ Nana, pe rēb to rlēē naa lo to ne znu rne naa miñe nacpaa diidzli. ¡Lēda gon!

¹⁷ Golquiaadiaga ganle, grē zha ne gon squi ziadseed to i niina, nli laa zho noxco to per zhaa ncuaañe no guic zho. Laa zho racladz tebaa zha guiaañladz to naa, csaan to grē miñe bialseed naa to, zeena gbig to lo zho.

¹⁸ Rtsidiñd naa pe nacie cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeene zodse naa lo to i.

¹⁹ ¡Xin, ne nlipagaa gon rdednē naa ran naa squi rac to! Masaque nac guiēlnē rii lo naa niina, zig tib yoob ne rquia grē men wnaa ne gap mēēd. Ni lēē nole naa guiēlnē rii nu nagon, haxta gdziñ dze ne gan naa laa to wbiire wbig lo Jesús stib.

²⁰ Tebaa niaca miñe grieeo guialzhaal naa lo to i niina, zeena gan naa zha no to, dzigo dien zha negaa naa lo to; per na ne znu zit zo naa, nanñ naa dien pe nacraa ncuaañe noyūn to.

²¹ Zha ne racladz gnabey xley zha Israel zho, racladz naa gnē zho dien, zpe ib riend zho zha zhobnee lo guits ne ziaad Xtiidz Dios

²² zaatne raquiet xingan Abraham? Rneew: Chop xingan Abraham, tib mēēd

co gop wnaa ne nac ngundziin lidz me, laa stib mēēd gop wnaa ne nacpaa tseeel me.

²³ Xpēēd wnaa ne nac ngundziin ga, laa win goc mēēd zig grēraa xpēēd miech; san̄gue mēēd ne gop tseeel me ga, laa win gol porne ib Dios rēb ne laa me yquiane win.

²⁴ Lo grop wnaa co, tibga me rlu gan̄le zha nac grop trat ne beēn Dios: Mīne bzhaac Agar, ga rlu gan̄le zha nac trat ne beēn Dios guic ghu Sinaí. Grēse zha ne zienal̄ trat co, nac zho zig goc xpēēd Agar, ladznia trat co no zho.

²⁵ Gzoob ne Agar nac Gui Sinaí, gui ne riaan nēz Arab; me nac guiedz Jerusalén ne ndxie len̄ dze rii, sac tel̄ grē menguiedz Jerusalén, masaque ngundziin nac zho lo ley.

²⁶ San̄gue wnaa ne gocpaa tseeel Abraham ga, rrieequia me nac Jerusalén ne no gbaa, zaatne ngab grē zha ne no xnēz Jesús, sac led yedraa grē zha co ngadoo lo ley; ye ne ngab ga, ni gzoob ne lēē xniaa ne ga nac wnaa co.

²⁷ Lēē Jerusalén co ga raquiet lo Xtiidz Dios, zaatne znu rnee:

Luu, ne nac luu wnaa ne brieelod niap mēēd, bley niina;

nguieel̄ goc, nguiedz broptsie lo guieel̄ bley qui,

luu ne bdziṅd dze niacnan̄ luu zha nac yoob mēēd.

Sac gon̄ ndalraa xpēēd wnaa ne brieelod niap mēēd,

lēdle grē xpēēd wnaa ne gop mēēd.

²⁸ Bets, bzian, golgacnan̄ sca gan̄le, laa ne nacle niina zig Isaac, xpēēd tseeelpaa Abraham, wnaa ne gacd yquiane mēēd ga; sac tel̄ Isaac, ib Dios psan̄ diidz ne laa Isaac gac mēēd lo Abraham.

²⁹ Ni zigne sca blēēnie xpēēd wnaa ngundziin co Isaac, mēēd ne Dioszhal psan̄ diidz gal ga; scasaque niina, no zha ne rlēē ran̄ zho zionald ne mine rnabey ley, sinque laa ne zional̄ dib zdoe ne riladz ne Jesús.

³⁰ Ni nana, led lo Xtiidzque Dios zhobnee gan̄le zha rēb Dios lo Abraham, rēb me: “Wnaa ne nac ngundziin lo luu i, bzonēz me grop xpēēd me, nonguieel̄d ne ye mēēd qui guiaannie ncuaaṅe csan̄ luu lo xpēēd tseeel luu.”

³¹ Gacxe nagon̄ waa, tel̄ ne nacd ne zig xpēēd wnaa ngundziin co, sinque laa ne nac zig xpēēd tseeelpaa Abraham.

5

Dziits goṽso

¹ Peet lo ngadoodraa ne niina, sac gon̄ laa Jesús baaadsilaale ne, sinque to none dziits so zeēna ygadooṅe to lo xley zha Israel.

² Naa nac Pabl, ni naazhal rne lo to nu. Golgona sca gan̄le, tel̄ne laa to gdeed diidz tso to xbey zha Israel, nacdiedraa to Jesús ga dzigo.

³ Ni laaw gneque naa lo to nu stib, grēse zha bgui ne rio bey co, ib none gun̄ zho grēse zigne rnabey ley co.

⁴ Zha ne rzac por gun̄ zho grē mīne rnabey xley zha Israel, mīn̄ co laa Dios csilaa zho lo dol, gacnan̄ zho gan̄le, leṽ nozozit zho lo Jesús ga; ygaad zho guieel̄nzaac ne ygaa zha ne gnalo Jesús.

⁵ Sangue tel̄ no, ndion̄paa no silaa Dios no lo dol, sacne dib zdoe no riladz no Jesús ni nacnie Espiritu Sant no.

⁶ Sac zha ne nli nole xnēz Jesús, peet liaadz nodraa zho bey ne rio zha Israel. Mīne noxcoraa zho nac ne dib zdoe zho giladz zho Jesús, ni scagaa grieele gleynie zho samiech zho.

⁷ ¡Ese tow nli! ¿Pex goc to waa? Zaacse name rac to zeēne psilo to bliladz to mīne nac diidzli. ¿Cho pquuil to ne nēdraa to tsienal̄ tow?

⁸ Mīne squi nonie guic to i niina, led zhiwseeṅe Dios i, men̄ ne bredz to griee to ladznia ley.

⁹ Gol̄guien̄ sca, adel̄ ye to sac zig rēb diidz ne rnee: “Niipaxe ncobi waa run̄csibe ncob quietxtil.”

¹⁰ Per nan̄paa naa, ible men̄ ndzon ne rnabey ne men̄ co gacnie to, zeēna csaande to mine nac diidzli; ni zha ne squi racladz gun̄güet to, tel̄ chotaa nac zho ib tedsod siaabzi Dios zho.

¹¹ Bets, san̄gue naa tel̄ niaca mīne nli ye naa quianabey tso grē zha ne riladz Jesús xbey zha Israel zig quianee zha qui, bod goon̄zhe ni ctsidil̄draa zha Israel naa dzigo, glēēdraa zho zig rlēēṅaa zho niina zeēne ron zho rne naa zha nacne baaadguet Jesús lo cruz.

¹² Zha ne squi ziaadnabey tsopaa to bey ne rio zha bgui nēz Israel, ¡tebaa mazd ladaque zho yga zho, niicxe gdib nacse zho waa cueniaal̄ zho, led tsod zho noyunn̄eed zho to!

¹³ Bets, gol̄guien̄ gan̄le ne ygadoodraaxe to lo ley waa, mīn̄ co nacne baaadsilaa Jesús to. Per guiabde to togo ne laa me psilaale to, laa to gun̄ ncuaaṅe guiaabṅaa guic to. Gun̄scade to, sinque tib tib to gol̄leynie samiech to, ine gol̄gun̄ ncuaaṅe rquiin̄ grē zha ne nacgrē to;

¹⁴ sac niina toṅsaque gban to zigne rnabey Dios nu: “Bleynie samiech luu zigne rleynieque luu luu”; lēlēe grē mīne nac ley ga gun̄ to.

¹⁵ Per tel̄ laa ne gleynie to zha ne nacgrē to, leṽ dil̄ no to, zig run̄ grē ma ne lēēque ma noquiaal̄aysa, lēēque ma noyowṽlsa; dzigo lēēque to gnitlo to ga. ¡Gun̄scade to!

Zha ne lega mbanse

¹⁶ Gacxe, laa naa rnab lo to: Gol̄tsoxco gol̄ban zigne racladz Espiritu Sant, ni me

gacnieŋ to; led tsođe to dieŋ zha guŋ to grē ncuaaŋe ndzinlid ne racladz xcuerp to.

¹⁷ Sac goŋ grēse ncuaaŋ co, rleynieđ Espiritu Santa. Laa xcuerp ne ruŋ ncuaaŋe racladzđ Espiritu Sant, ni ncuaaŋe racladz-gaa Espiritu Sant nēđ xcuerp ne gac miŋ co. Guŋde to miŋe racladz xcuerp to sca.

¹⁸ Telne gban to zigne rnabey Espiritu Sant, dzigosi nodraa pe nacne ygadoo to lo xley zha Israel.

¹⁹ Ni miech ne sca ruŋ grē ncuaaŋe ndzinlid, ib paat nguetsd zho:

rionie zho zha ne led tsieeld zho, ruŋ zho grē ncuaaŋe ndzinlid ne racladztaa xcuerp zho,

²⁰ riegau zho grē mdio, rnab zho pe sac samiech zho, rlēenie zho samiech zho, rdilnie zho samiech zho, rzac zho adel cho glale tsiel zho, rnadse pew laa zho rlēele, ruŋctil zho miech,

rguib zho rtso miech, rbeextso zho dieŋ cho zha ne gacnie zho,

²¹ nē rac zdođ zho ran zho ncuaaŋe quianie stib miech,

rzudz zho, rcaalsa zho zaatne loxaque rowcho zho, ni ruŋ zho grē guielyozh.

Grē ncuaaŋ co ruŋ zho ni grēragaa ncuaaŋe ndzinlid ne sca nac. Laa naa rbire rso diidz lo to, guŋde to grē ncuaaŋ co; sac goŋ grēse miech ngoopdoł ne sca rban, grielod gdziŋ zho zaatne rnabey Dios.

²² Sanguē zha ne zienal miŋe racladz Espiritu Sant, znu nac zha co:

rleynie zho samiech zho, tibaque nguieel rac zho, peet dzeb nonied guic zho, rxecw zho, rievedniobd zho, niowse rnee zho lo samiech zho, niapse ncuaaŋ wen ruŋ zho lo samiech zho,

ruŋ zho miŋe rnee zho guŋ zho,

²³ miech ndooladz nac zho,

zha rnabey xcuerp zho.

Ni telne gban ne zigne nac grēse miŋ rii, ni tib ley noguuitsd ne ga.

²⁴ Grēse miech ne nli xnēzle Jesús no, zieniedraa guic zho guŋ zho grē ncuaaŋe ndzinlid ne bzoobladz zho padzeela, grē ncuaaŋe ndzinlid ne racladz nē xcuerp zho, sac rien zho paat rquiind ncuaaŋ co lo zho.

²⁵ Gacxe nagon waa, telne nli mbannie ne guielmban ne rneedz Espiritu Sant, golgotsaa dzion ne miŋe rnabey me.

²⁶ Dzigosi gacniatsdraa ne lo samiech ne, tsienaldraa ne dieŋ cho glaaraa guiaan, tso ne nē gac zdođ ne gau ne grē ncuaaŋe rap zho, ncuaaŋe racgaa zho.

6

None gacnie ne samiech ne

¹ Bets, bzian, telne gau to laa cho tib zha ne nacgrē to noyup pe tib doł, dzigo to ne nac to zha ne nlipaa zienal miŋe rnabey Espiritu Sant, to golnee lo zho. Diidz wen, diidz ndooladz golco zdođ zho gbiire xixcuaa guic zho; ni scagaa tib tib to none nsin so to, sac goŋ adel nenda yeque to sca sac.

² Zeene ran to zha ne mban noded, golgun xyudar zho, golchoobladz zdođ zho, sac goŋ sca rnabey Jesús gban miech.

³ Tel zha ne rzac zha non nac zho, ni laa zho peet nond zho; lēeque zha noguitnie zho ga.

⁴ Tib tib to, wen wen golguieŋ dieŋ pe quiayun to, telne ncuaaŋe ndzinliw ine golley, per tsođe to glēē zdođ to gau to miŋe ruŋ stib zho.

⁵ Sac tib tib ne, psose Dios ne pe nac xtsiin me miŋe guŋ ne.

⁶ Grē zha ne noseed Xtiiđz Dios, ib none ncuaaŋe rgaataa lo zho gdeed zhow yquiin zha ne noluw lo zho.

⁷ Tsenie wguite guic to sca, sac goŋ led yed Dios guiab ne quitnie ne. Tib tib ne, tel pe nac miŋe ruŋ ne miŋcoque ctsire me lo ne.

⁸ Zha ne ruŋ grē ncuaaŋe ndzinlid, lēē miŋe cueequia zho ga laa zho nitlo. Laa zha ne guŋ grē miŋe rnabey Espiritu Sant, lēē miŋe ygaa zho ga nac tib guielmban ndzon ne gdziŋd dze lozh.

⁹ Gacxe nagon waa, tibaque gotsaa dzioxco ne dziuun ne ncuaaŋe ndzinli, ncuaaŋe rquiin, guieete ne; sac telne sca tibaque dzioxco new, zeene gal dze co laa ne ygaa miŋe guiguial ne.

¹⁰ Zeene gdeedtaaw diidz sca, golgotsaa dzioxco ne dziuun ne xyudar grēse samiech ne, ni nana zeene zha ne noque xnēz Dios nac zho, mazdraa rieguial dziuun ne xyudar zho.

Rso Pabl diidz

¹¹ iGolwi ganle, naazhal pquia nu! iGolwi ganle mbee nac let rii pquia naa rso naa diidz lo to!

¹² Grē zha ne gon squi racladz tsopaa to bey ne rio zha Israel, laa zho ruŋa zeena glēenieđ miech zho, zigne rlēenie zho grē zha ne rseed miech ne ib laa Jesús gut lo cruz, psilaa me grēse miech lo doł.

¹³ Nana, niicxe grē zha ne nole bey co, ruŋdaque zho grē miŋe rnabey ley; sinque laa zha qui nagon quiaguib tebaa gdeed to diidz tso to bey, zeena sca lozhd guiats zho ne zha bnabey to bio to bey.

¹⁴ Sanguē tel naa, ib quiaguibd naa ne dieŋ zha gacniats naa, sinque laa naa quiaguib gacnan miech ganle zha nac ne laa Jesús gut lo cruz. Sac tel naa, por grē miŋe bded Jesús ga, grētaa ncuaaŋe no lo guidzliu laaw psan

naa tib lad; ni niicle naagaa, sca rzac grë miech guidzliu naa.

¹⁵ Grëse zha ne ygab xnëz Jesús, nacda ne dien cho no bey ne rio zha Israel, chogaa noda; sinque minë non nacne ctsëë Dios lo xquielmban zho.

¹⁶ Grëse to ne nac to zha ne zienal diidz ne rso naa nu, Dios yquia zdoo to, ni me gacniën to ctsebd grë zhgab to; niicle tow ni niicle grëragaa zha ne ngable lo mew.

¹⁷ Bets, bzian, golgacnan sca ganle, ib racladzdraa naa gon pe yquiaaqui gbiire gaquiet minë bnele naa lo to nu; sac tel naa, grëtaa mdel ne no xcuerp naa nu, lëëlew nac bey ne rlu ganle ne nli lo Jesús ngab naa, ni xtsiin me noyün naa.

¹⁸ Jesús men ndzon ne rnabey ne, me tsoxco grë zhizhgab to. Sca gaca.

Pabl

GUITS NE PXEEL PABL LO ZHA EFÉS

¡Diuzh to grëse to!

¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tiblque laa to rililadz Jesús.

² Dios meñ ne nac Pxoze ne, ni Jesús meñ ndzon ne rnabey, me glu lo to guien to ganle pa lotaa noxco me to, ni me gacnieñ to ctsebd grë pe zhgab to.

³ ¡Gotsaa dzioolnie ne Dios, Pxoze Jesús, meñ ndzon ne rnabey ne! Sac gon, zha nactaa grë guielnzaac nroob ne bneedz Espiritu Sant lo ne niina ne laa ne ngab xnëz Jesús.

⁴ Haxta zeene gard cue guidzliu, bzooblo Dios ne gac ne zha ne gdzin lo me zeene laa ne gliladz Jesús, gac ne tib miech peet xtold, zha ne gban zigne racladz me.

⁵ Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdo me.

⁶ Minocoxe waa tibaque none dzioolnie ne Dios, sac gon zha wentaa me lo ne, pxeel me xpëed me meñ ne nquialadz me ga, biaadgunlay me ne.

⁷ Ne nligaa nquialadzdox Dios ne, gane pxeel me xpëed me bzhiee xchen psilaa me ne lo grë dol ne ngadoo ne, been me ne perdon grë dol co.

⁸ Ni led loxaque mincodse, sinque haxta bneedz me guielrien lo ne, bdxibni me ne,

⁹ ni bneedz me diidz gocndion ne pe nac mine no zdo me, mine mese nan, mine nole me gun me.

¹⁰ Sac niina laa ne ndionle: Grëse ncuaañe no gbaa, ncuaañe no guidzliu, tibaque gaca grëw ni Jesús gnabeya grësew; sca gaca zeene laa dze co gdzin.

¹¹ Grëse ncuaañe bnabeyle Dios no gac, run mew zigne racladz me. Gotsaa gwí ne ganle, glole bzooblo me ne ygaa ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bziaab xnëz Jesús.

¹² Ni laa me bzooblo ne, zeena ne ne nac ne zha ne gloopaa psilo bnalo Jesús, cxobnen ne lo miech ganle pa lotaa meñ nroob nac me.

¹³ Xquizh Jesús, ye to zeene laa to psilo pquiaadiag diidzli, Diidz Ndzon ne rnee ganle zha laa to lo dol, ni bliladz to cho nac Jesús, laa Dios pxeel Espiritu Sant lo to zig tib

bey, bey ne rlu lole me ngab to; zigne bneele me glo.

¹⁴ Ne znu pxeel me Espiritu Sant nacie ne, ga rlu ganle ib nli zgaa ne grë mine bneele me gdeed me lo grë zha ne ngab lo me, ni lëe min co ygaa ne zeene gal dze ne laa me blozh psilaa grë zha ne ygab lo me; zeena grë ne gleynie ne me por squitaa meñ nroob nac me.

Rnab Pabl guielni lo Dios

¹⁵ Zeene gocnan naa ne nlipaa dib zdo to rililadz to Jesús, ni ne nli nquialadz to grëaa miech ne no xnëz Dios,

¹⁶⁻¹⁷ rded naa xquizh lo me. Zeene rzodidznetaa naa me, rsoladz naa to, rnab naa lo me gneedz Espiritu Sant guielni lo to guien to cho nac me, zeena lozh gunbey to me. Lëe me nac xDios Jesús, lëe me nac Pxoze ndzon ne.

¹⁸ Rnab naa lo me quixbiini me guic to, guien to ganle zha nactaa grë ncuaañe ygaa to ne laa me bredz to, guien to ganle zha ndzontaa, zha nontaa ncuaañe gdeed me lo grëse miech ne ngab lo me,

¹⁹ ni guien to zha nroobtaa guielrnabey ne rap Dios, pa lotaa naca; lëe guielrnabey co nacie ne ne nac ne zha ne no xnëz me. Lëe guielrnabey co bla me

²⁰ zeene bleeban me Jesús bzoob me me cue me gbaa, zaatne rieguial sob me ne nac me meñ rnabey,

²¹ bzo me me, me rnabey lo grëse zha ne rnabey, lo grëse zha ne non, ni lo grëragaa ncuaañe no; niicle niinaw, niicle len dze ne naragaa guiaada.

²² Grëse ncuaañe notaa, laa Dios psana ladznia me, ni bzo Dios me me rnabey lo grëse zha ne no xnëz me.

²³ Sac grëse zha ne no xnëz me rriequia xcuerp me ga nac zho, gacxe waa grëse zha ne nac cuerp co, zha none cxobnen ganle pa lotaa meñ nroob nac me. Tel pe lotaaw me nacie zho, sac grëtaa ncuaañe no ladznia me now.

2

Ne noxco Dios miech gane psilaa me zho

¹ ¡Laa Dios bneedzle tib guielmban cub lo to niina, niicle ne ntseeb goc to glo! Golsoladz ganle, zeene scataa beenctal to xtold to, masaque nac to lo Dios hor co zig tib zha ne gutle,

² laa to güeynal niapse grë ncuaañe ndzinlid ne rac lo guidzliu rii, been to grë mine rnabey ma ne rnabey lo mendox, ma ne rcheep grë zha ne ib néd gon xtiidz Dios.

³ Grëse ne sca whan ne glo, bional ne ncuaañe ndzinlid ne bzoobladztaa ne, bdiuun ne ncuaañe bdeedtaa guxt xcuerp ngoopdol ne, ncuaañe biaabtaa guic ne. Ni ne scataa nac ne, ib biogual ngaa ne

lo guielnédox ne cxeel Dios, lo guielnē ne noxtseeb grēraa miech niina.

⁴ Per ne nquialadz Dios ne nac ne miech, gane pquia zdoo me ne,

⁵ ni niicle ne rriequia mengutle nac ne ne scataa quiazdiuun ne grē dol co, per bleeaban me ne; lēē miñ co ga been me zeene bleeaban me Jesús. ¡Laa me psilaa ne lo guielgut co, niapse por mezhal noxco ne!

⁶ Laa me bleeaban ne, zeena ygaa ne guio-siobnie ne Jesús zaatne gnabey Jesús.

⁷ Zigtaa len dze riiw, zigtagaa len dze ne ziaadraaw, ga gan miech ganle pa lotaa nquialadz me ne, pa lotaa wen me lo ne, sac pxeel me Jesús biaadsilaa ne.

⁸ Golgan ganle, ne wen me mezhal noxco guiaanwen miech lo me, gane rsilaa me ne lo dol zeene laa ne rliiladz Jesús dib zdoo ne; guiabd ne togo por pe guielwen ne gun ne laa me csilaa ne. Ible zdoo me ral rsilaa me miech,

⁹ racda ne por pe guielwen ne gun zho; zeena gdaannied zho guielwen ne run zho.

¹⁰ Dios nac men ne psan ne, ni niina ne laa ne bziaab xnēz Jesús, laa me bredz ne dziuun ne grē guielwen ne racladz me, miñe bzooblole me ne dziuun ne.

Grēse zha ne ngab lo Jesús, tipse nac zho

¹¹ Golsoladz ganle miech ngoopdol, miech ne ngabd lo Dios, miech beed, sca lē to lo grē zha Israel glo (sac zha, ne rio zho bey zigne rnabey xley zho, rzac zho miech wen, miech mbe nac zho, zha nac zha ne ngabpaa lo Dios).

¹² Len dze co gard ygab to lo Jesús, gard gac to tipse grē to zha Israel, led yede to no lo trat ne biaan Dios grē me zha Israel, nande to grē diidz ne psan me lo zho. Lega laa to mbanse, runbeyde to Dios, ni tib guielnzaac quiambēzde to yгаа to.

¹³ Sangue niina ne laa to bzēēb xnēz Jesús porne bzhiee xchen me psanmbe me to, laa to ngable lo Dios.

¹⁴ Jesús nac men ne psanwen ne grē ne, ptiche me grētaa ncuaañe pca zaacse ndzianlsa ne; zigtaa zha Israela, zigtagaa zha zita, tibaque been me ne lo me niina.

¹⁵⁻¹⁶ Zeene pquia me lo cruz, gataa ptiche me grē ley ne zienal zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me been zho tipse, been me zho tib guiedz cub ne ngab lo me. Sca nac ne laa me psanwen zho grē zho, ni psanwen me zho nēz lo Dios.

¹⁷ Jesús nac men ne biaadnie Xtiidz Ndzon me lo ne grēse ne, gocndion ne zha guiaanwen ne nēz lo Dios, zigtaa tow ne nac to zha ne zit zo lo Dios glo, zigtagaa zha Israela ne nac zho zha ne gax zo lo me.

¹⁸ Gane niina, niicle zha Israela, niicle zha zita, zrieelo ygab zho lo Dios men ne nac

Pxoz ne, zeene laa Espíritu Sant gunquien zho none gbig zho lo me.

¹⁹ Gacxe waa, tel to nacdraa to menzit niina, lole Dios ngab to, lal non to, lal nac to grē to grēraa zha ne ngab lo me.

²⁰ Golguien ganle, grēse ne niina gzoob ne nac ne zig tib yu ne noyaa, yu ne psilo grē zha ne pxeel Dios nonee xtiidz me lo miech niina, grē zha ne pxeelgaa me pteed xtiidz me lo miech padzeela, ni Jesús nac quie ne naaz yu co.

²¹ Grēse zha ne zienal miñe rnabey me, rriequia nosoquiaraa zho yu co ga, haxta guirew gaca tib yadoo ne nliipaa mbe nēz lo Dios.

²² Zig nac to gon, tib tib to ne nac to zha ne ngab lo Jesús, ye to nac yadoo co, zaatne rbēz Espiritu chen Dios.

3

Pabl nac zha ne güeyseed zha zit

¹ Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, miñ co gane znu nioogyu naa nu.

² Nanlaxe to ganle ne wen Dios, laa me bzo naa gun naa dziin rii cseed naa grē menzit.

³ Laa me blu lo naa zha nac grē ncuaañe no guic me gun me, mese nana per laa me blu lo naa zha naca, ni laa palala psilo bzetle naa lo to lo guits rii.

⁴ Zeene glab tow i, dzigo guien to ganle ne nli nan naa zha nac grē miñe gun Jesús, miñe mese nan.

⁵ Wlaltaa choot miech gocnanda, laa niina laa Dios pxeel zhiEspiritu me bneedz guielbiini lo no gocndion now, zigtaa no ne nac no zha ne pxeel me nonee xtiidz me, zigtagaa grē zha ne pxeel me noteed xtiidz me.

⁶ Ni znu naca: grēse zha zit, zgaa zho guielnzaac ne rēb Dios gdeed me lo grē zha ne ngab lo me, tibaque nac guielnzaac ne ygaa zho grē zho zha Israel. Niicle zha Israela, niicle zha zita, laa Dios quiambēz gdeed me guielnzaac co lo zho, totsaque gliladz zho Xtiidz Ndzon Jesús.

⁷ Niicle ne tib miech peet nond nac naa, per laa Dios bzooblo naa gne naa lo miech gacnan zho miñe blozh bzet naa nu, me nacie naa, me rneedz grētaa poder ne rap me parne grielo gun naa dziin rii.

⁸ ¡Ncuaañe gzee zdoo new! Golwi ganle, naa nac tib zha ne mazdraa peet nond lo grē zha ne ngab lo Dios; per laa me bzooblo naa, naa bgaa dze ndzon rii gne naa Xtiidz Ndzon me nu lo grē zha zit, zeena gacnan zho ganle pe zhistaa grē guielnzaac ne gdeed Jesús lo zho.

⁹ Gne naa lo zho gacnan zho ganle zha nactaa grē miñe no guic Dios gun me, miñe

wlaltaa choot gard gacnan; Dios, men ne bzaa grëse ncuuane no.

¹⁰ Nana gnë to: “¿Pe nacne sca been me?” Laa me beena zeena grëse zha non, zha rnabey ne no gbaa, zeene gan zho tipse nac zha Israel grë zho zha zit ngab zho lo me, ga guien grë zha gbaa co ganle zha ndzielguic-taa Dios.

¹¹ Sca nac mine no guic me padzeela, ni zeene laa me pxeel Jesús laaw goc.

¹² Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbig ne lo Dios, sac ndion ne zha ne rnalo Jesús ible scaania Dios zho.

¹³ Laa naa rso diidz lo to sca, niicle ne znu-taa quiaadeed naa loxaque ne bialseed naa to, gunde to ne miñriise laa zdoo to guiaan, sinque golley golwi ganle nu rlu zha nziuu, zha non nac to lo naa.

Nquialadz Jesús miech

¹⁴⁻¹⁵ Zeene rsoladz naa grëtaa mine no guic Dios gun me, ni mine beenlegaa me (me ne nac me Dad lo grëse zha ne ngab lo me, niicle lo guidzliu nuw, niicle gbaagaaw); rded naa xquizh lo me.

¹⁶ Ni ne squitaa ndzon, ne squitaa ncuuane lozhd nac grëtaa guielnzaac ne rap me, laa naa rnab lo me cxeel me zhiEspíritu me gneedz xfuers to dziits so to.

¹⁷ Ni rnab naa lo me tibaque dib zdoo to gliladz to Jesús, zeena scagaa tibaque gban-nie to me, parne guien to ganle pa lotaa nquialadz me to.

¹⁸ Ga guien to ganle grë to grëraa zha ne ngab lo me, ne nligaa pa lotaa nquialadz me to, nacda ncuuane grieeo ctiix ne, guiab ne lalnuw.

¹⁹ Niicle ne znu nacda ncuuane grieeo guiab ne znu znu naca, per laa naa rnab lo me zig zie dze guienraa to pa lotaa rleynie Jesús to; zeena glu ganle ne nli nacnie Dios to.

²⁰ Ni Diossi gon ne nac me men ne ndzon, mazdraa ncuuane grieeo gneedz me lo ne, lède mine riab guic ne rnab ne lo me; ni ncuuane gaca gon, sac me nacnie ne.

²¹ Grëse ne ne nac ne zha ne no xnëz Jesús, ¡tibaque golgotsaa gleynie ne me sca, ne squitaa ndzon me! Sca rieguiala.

4

None tipse gac zha ne riladz Jesús

¹ Zigne rne naa ga, laa naa nioogyu nu loxaque ne run naa xtsiin men ndzon ne rnabey, per laa naa rnab lo to zaacse golgac, golban zigne rieguial gban grë zha ne bredzle Dios ngab lo me, sac gon laa me bredzle to.

² Golgac tib miech ndooladz, tib miech wen, tib miech nlëëguicd, tib miech ne

guieednied samiech sinque ine gleynie to zho.

³ Wenle na ndxie to niina, ni Espiritu Sant nac men ne gacnieñ to; zeena tibaque squi tipse gac to.

⁴ Sac gon tibaque cuerp nac ne grë ne, tibaque Espiritu nacnie ne, ni tibaque nac mine ndion ne gneedz Dios lo ne, ne laa me bredz ne.

⁵ Tibaque men ndzon ne rnabey ne, tibaque men ne riladz ne, tibaque wrobnis ne no par grë ne ne dib zdoo ne riladz ne me;

⁶ tibaque Dios no, me nac Pxoze ne grëse ne, me nac men nroob ne zo lo ne, me racnieñ ne grëse ne, ni me nacnie ne.

⁷ Tipse nac ne, per tib tib ne ppose Jesús ne pe nac dziin ne grieeo dziuun ne lo me, zigne gola zdoo me.

⁸ Min rii ga raquiet zaatne znu zhobnee lo guits ne ziaad Xtiidz Dios:

Blozhse psanwin me grëse zha ne rlëë ran me,

laa me biire zey gbaa stib;
ni ppose me tib tib miech pe nac dziin ne grieeo gun zho lo me.

⁹ Golgotsaa gwi ne ganle, Jesús raquiet nu, rneew “biire zey me gbaa stib”, ga rlu ganle tib men ne biet gbaaw biaad me lo guidzliu.

¹⁰ Sac me biet gbaa, ni biire zey me gbaa stib, zeena glu ganle tel pa lotaa zrieelo gdzin me.

¹¹ Ni mezhaz rzo ne tib tib ne pe nac dziin ne dziuun ne; me rzo:

zha ne rxeel me gnee xtiidz me,
zha ne rxeel me cteed xtiidz me,
zha ne rienee Xtiidz Ndzon me tib tib lo miech zha laa zho lo dol,
zha ne rtedlo grë zha ne ngab lo me, ni zha ne rseed zho zha nac Xtiidz Ndzon me.

¹² Laa me run min co, sac laa me racladz grëse zha ne ngab lo me lozh xixcuua lo xquielmban zho, zeena guien zho zha gun zho xtsiin me;

¹³ haxta gdzin dze ne tibaque mine gliladz ne grë ne, grëse ne dziuunbeyppaa ne men ne nac Xpëed Dios. Laa ne lozh sodziits, haxta gac ne zig me.

¹⁴ Gacdraa ne zig choi cho meëdlas ne beelze pe riladz; niicxe guiaad grë zha ne guiaadnie stib wseed, zha ndzinlid ne zombëz loxaque dien zha gdeeda diidz yquidie zho miech; yquidied zho ne.

¹⁵ Sinque guional ne mine nac diidzli, ine gleynie ne samiech ne, tibaque laa ne guional zigne nac Jesús, men ne rnabey lo ne grë ne ne ngab ne lo me (rrieequia xcuerp me nac ne, me nac guic cuerp co).

¹⁶ Ni ne me nac men ne rnabey lo ne, me rnabey zha gac tib tib dziin ne pso me ne dziuun ne; niicle ne nzian ne, per tipse nac ne laa ne nodziun dziin ne pso me ne,

zeena xixcuaraa lo xquielmban ne, ni lozh guien ne zha gleyneraa ne samiech ne.

Guielmban cub ne rneedz Jesús

¹⁷ Laa naa rso diidz lo to nu, ni golquiaadiaga zig nac zeene men ndzon ne rnabey ne rneew lo to: gbandraa to zigne mban grëraa miech ne zozit lo Dios, grë zha ne mban zigne notaa guic;

¹⁸ sac tel zha, ncow nac guic zho. Gard ygaa zho guielmban ndzon ne rdeed Dios, nand zho zha nac guielmban co sacne ndip zdoo zho.

¹⁹ Laa zho gocnadle, niapse lo grë ncuaañe ndzinlid no zho, ib rgobeyd zho run zho grëtaa guielyozh ne no.

²⁰ Sangue to gon, ne nac to zha ne no xnëz Jesús niina, led mincod noseed to;

²¹ telne nli noquiaadiag to ganle cho nac me, telne nli rien to zhiwseed me mine rlu ganle zha nac diidzli.

²² Miech yozh ne goc to glo, grëtaa ncuaañe ndzinlid, grëtaa guielyozh ne gocladztaa xcuerp to been to, igolsaana!

²³ None gdzëë lo xquielmban to, zigtaa grë mine no zdoo to, zigtagaa grë mine rza guic to,

²⁴ golgac tib miech cub, zaacse golban, ndzinli golgac; zeena glu ganle ne nli beenncuble me to zigne racladz me.

²⁵ Golguien sca, yquidiedraa to samiech to, sinque niapse mine nac diidzli golnee, sac gon tel ne pe nacne yquidielsa ne ni tibaque nac ne grë ne.

²⁶ Telne glëë to, code to guielblëë co zdoo to dib dze, sac gon dol ga.

²⁷ Gunde to mine racladz menox.

²⁸ Zha ne goc ngbaan lëë, cuandraa zho, sinque gun zho dzin gdziniaa zho ncuaañe yquini zho, zeena scagaa grieelo gun zho xyudar zha ne guien pe yquini.

²⁹ Gneede to diidznë, sinque diidz ne ndzinli, diidz ne yquini golnee, zeena zha ne gona ine cchoobladza zdoo zho, ine yquina lo zho.

³⁰ Golguien, gunde to ncuaañe coguielnë to Espiritu Sant. Golgan ganle laa Dios pxeel me, nac me zig tib bey ne glu ganle ne nli lo Dios ngab to, gal zhe ne laa me lozhpaa csilaa grë zha ne ngab lo me.

³¹ None csaan to:

guielnialadz, tso to gow gzhiizh zdoo to; glëëdraa to,

sobzhiandraa to,

coredzdraa to,

gacntseebdräa to, ni

grëragaa guielntseeb ne no, gunde tow.

³² Sinque none:

wen gac to lo samiech to,

golquia zdoo samiech to,

golgun samiech to perdon, zigne beenaque Dios to perdon zeene laa to beenbey Jesús.

5

None glu cho nac zha ne ngab lo Dios

¹ To ne laa to nacle xpëëd Dios ni nquialadz me to, goltsoxco gac to zig me.

² Zaacse golban, golleynie samiech to zigne rleynie Jesús to, sac gon tel me, haxta bleeladz me me gut me xcuent ne, gut me biogon me lo Dios psanmbe me ne lo xtol ne, me goc tib gon ne pcaania Dios.

³ Golguien sca, none glu to ne nli xnëz Dios no to;

gunde to grë guielyozh ne run grë zha ne zienald zigne nacpaa guieltsieel,

gunde to grë ncuaañe yozh ne run miech ndzinlid,

gunde to grë ncuaañe run grë zha ne zienald loxaque dien zha gunlo dimi.

Gunde to grë ncuaañe co, per ni gzodiidzde tow.

⁴ Gneede to grë diidzguidz,

gneede to grë diidz ne paat rquiind,

gneede to grë diidz ro nëz;

sac gon rdzieeldraa gnee to grë ncuaañe co; sinque Dios golgoolnie, goldeed xquizh lo me.

⁵ Nanle to ganle, grëse:

zha ne zienaldraa zigne nac guieltsieel,

zha ndzinlid ne run grëraa guielyozh,

zha ne mbidz (zha ne rleynieraa dimi, laa ne gleynie zho Dios);

ni tib zho grielod gdziñ zaatne rnabey Jesús grop me Dios.

⁶ Gdeete to diidz lo zha ne gacladz yquidie to gnë zho peet nacd grë min co, sac gon, grëcxe min co waa run grë zha ne nëd gon xtiidz Dios, lozh ga, lëë mine tsieguial zho laa zho ygaa lo guielzi ne csiaab me.

⁷ Golguien sca, yquiaadiagde to xtiidz grë zha ne sca rnee, per ni ctsieelsade to zho.

⁸ Nli, çlëë?, ndzinlid wban to glo, rrieequia lo ncow ga bio to, gocnie to menox; sangue niina ne laa to nacnie Jesús men ne nac biini, rrieequia lo biinile no to. Golguien sca, zaacse golban,

⁹ sac niina ne laa to nole lo biini, none gac to:

tib miech wen,

tib miech ne zienald gac mine nac diidzli,

tib miech ne rnee diidzli.

¹⁰ Goltsoxco guien to zha racladz Dios gban to.

¹¹ Gandzede to grë ncuaañe ndzinlid ne run grë zha ne no lo ncow, sinque gollisquiw;

¹² sac grë ncuaañe run zho ngueets zhliiaan, haxta ncuaañe ctoladz ne gnee new.

¹³ Grëse zha ne gbig lo biini co, zien zho ganle zha nactaa grë ncuaañe yozh ne

noyun zho; sac gon telne biiniw, tsod ncuane guiangueets low.

¹⁴ No tib zaatne znu zhobnee lo Xtiidz Dios, rneew:

Luu ne tibaque guieel no luu, blee mcaal lo luu;

briece lad grē zha ne squi nole lадznia guielgut,

zeena gban luu lo biini ne nac Jesús.

¹⁵ Golguien sca:

Miech nixbiini golgac, ndzinli golban; gbande to zig chol cho grē miech nxen ne run mine notaa guic.

¹⁶ Cteed zhlēde to xtse to lo ncuane paat rquiind, niicle ne niapse grē min co zienal grēraa miech len dze rii.

¹⁷ Gunde to ncuane paat rquiind ne rza guic to, sinque golguien dien pa minpa racladz Dios gun to, dzigo goltsoxco min co golgun.

¹⁸ Gzudzde to, sac gon lo guielgonziu run miech ncuane nonguieldraa; sinque mazd golnab gneedzraa Espiritu Sant guielbiini lo to, zeena ine:

¹⁹ gool to grē salm, grē himno, grē cant ne csiaab Espiritu Sant guic to; dib zdo to golgoolnie men ndzon ne rnabey.

²⁰ Goldeed xquizh lo Dios men ne nac Pxoze, por grētaa ncuane ran to, ncuane rded to; golguien ganle lo Jesús ngab to.

Zha none gban zha ne riladz Jesús

²¹ To ne nac to zha ne ngable lo Jesús, tib tib to golgon mine rnee zha ne nacgrē to, zeena glu ganle me nac men non lo to.

²² To ne nac to men wnaa ne ptsieelniale, golgon xtiidz tsieel to, zigne rioxcoque to ron to mine nac xtiidz men ndzon ne rnabey.

²³ Sac ible tsieel to nac men ne no gnabey lo to, zigne Jesús rnabey lo grē zha ne no xnēz me (ni me psilaa zho lo dol, laa zho nac zig xcuerp me).

²⁴ Ni zigne sca ron zho xtiidz me, scaque none gon to mine rnabey tsieel to to.

²⁵ Togaa ne nac to zha bgui ne ptsieelniale, golleynie tsieel to, zigne rleynie Jesús zha ne no xnēz me. Tel me haxta bleeladz me xquielmban me,

²⁶ blee me zho lo dol, ni biaanmbe zho zeene laa zho pquiaadiag xtiidz me, wban zhow ni brobnis zho;

²⁷ zeena gal dze ne laa me ycaania zho, laa zho nacle miech ne rieguial gdziñ lo guielndzon ne no me, ni tib dol rapdraa zho, miech mbele nac zho, zig tib lē lar nquitsbie ne ni tib pxud neyd.

²⁸ Sca nagon none gun mgui, none gantsi zho tsieel zho zigne rantsi zho xcuerp zho. Mgui ne rantsi tsieel, rrieequia xcuerp zho ga rantsi zho;

²⁹ sac gon, tsod tib zha ne lēēque zha csacci xcuerp zho, sinque ran zhow. Ni scadaa nagon rzac Jesús grēse miech ne ngab lo me,

³⁰ sac nac zho zig xcuerp me. Ni lēē tib lē cuerp co nu nac ne.

³¹ Zha ne pcatsieel-le, ible tibaque cuerp nac zho grop zho, laaw zhobneeque lo Xtiidz Dios zaatne rnee: “Ib none griezhaa mgui lo pxoz zho, lo xnīaa zho, zeena gbanie zho tsieel zho gac zho zig tibaque miech grop zho.”

³² Rgobey naa ngan tsoguic to zha nacne chop miech gac tibaque cuerp; per ga gon rlu ne niicle nzian ne per tibaque cuerp nac ne, ni lēē xcuerp Jesús ga.

³³ Mine racladzpa naa csoladz to nu: to ne nac to men bgui, none gleynie to tsieel to zigne rleynieque to xcuerp to; ni niicle togaa ne nac to men wnaa, none gon to xtiidz tsieel to, cueede to xquielto zho.

6

¹ To ne nac to mēēd, golgon xtiidz pxoz to, xtiidz xnīaa to, sac sca nonguiela, ni scagaa glu ne nli rleynie to Dios.

² Golgan ganle, lo grē xley Dios no tib mine znu rnee: “Bin xtiidz pxoz luu, xtiidz xnīaa luu, zeena ine niowse gac lo xquielmban luu, ni nroob dze ne gban luu lo guidzliu rii.” Ni lēēw glopaa rnee ganle pe nac mine ygaa zha ne gun mine rnabeya,

³ sac rneew, niowse gac lo xquielmban zho, ni nroob dze ne gban zho lo guidzliu rii.

⁴ Togaa ne nac to men nguzan, gunde to ncuane yquiaaguieelne to xpēēd to, sinque golcobey dien zha gun to parne gon zho diidz, ni cseed zho gban zho zigne rdziladz Dios.

⁵ To ne nac to zha ne ngadoo ladznia ben, golgon xtiidz men ne rnabey to. Golguien zha rnabey to, dib zdo to, goltsoxco golgun xtsiin zho, zig nac zeene xtsiin Jesús ga noyun to.

⁶⁻⁷ Gunde to ne loxaque zeene zose zho lo to, dzigose yquiaalo to gun to dziin zeena guianzliu to lo zho, sinque ine nguiel golgac golgun xtsiin zho, zig nac zeene xtsiin Jesús ga quia to, ine dib zdo to quiayun to mine racladz Dios.

⁸ Benque nanle to, zigtaa zha ne ngadoo ladznia beña, zigtagaa zha ne rnabeya, zdeedse Dios mine tsieguial zho tib tib zho tel pe nac ncuane wen ne noyun zho.

⁹ Togaa ne nac to zha ne rnabey, niowse golgac lo zha ne quia xtsiin to, gacntseebde to lo zho. Golguien ganle, zigne rzacaque zho, scaque rzac to, no tib men ne rnabey to grē to, lēē me ga zob gbaa; ni tel me gon led yed me guiab dien cho rnabey, chogaa run dziin.

None nsin so zha ne riladz Jesús

¹⁰ Bets, bzian, nu ne laa naa csiaalle, laa naa rnab lo to gon tibaque golnalo Dios; golgan ganle, con grëtaa guielrnabey ne rap me, me needz grë lose fuerz lo to.

¹¹ Zig nac grë menguiib, ible no grë ncuane rquuin zho zeene laa zho rie lo dil, scaque to niina nagon, golquuin grë lose fuerz ne bneedz Dios lo to, zeena glëbd mendox gungüet ma to.

¹² Golgan ganle, led-xe miech guidzliud waa nodilnie ne, sinque laa ne nodilnie grë me yozh ne quianzë zhan gbaa, ma ne quianabey grëtaa guielntseeb ne rac lo guidzliu rii.

¹³ Gane nagon none yquuin to grëse lo fuerz ne zineedzle Dios lo to, zeena guiablode to zeene laa grë me ntseeb co csilo ygaal to; ni scagaa, zeene laa ma biablo, tibaque dziits so to grë to.

¹⁴ Dziits sca golso:

Dziits golso lo mine nac diidzli, zigne dziits dziits rzhidoo len menguiib zeene laa zho tsie lo dil.

Golgun mine nonguiel zeena ctse to lo mendox, zigne rtse ncuane racw menguiib lo grë ncuane gnitlo zho.

¹⁵ Nsin golso zeene laa to tsienee Xtiidz Dios lo miech gacnan zho zha guiaanwen zho lo me, zigne nsinle zo menguiib zeene laa zho no tsie lo dil.

¹⁶ Guiaanladzde to, golnalo Dios, zeena peet grieelod gun grë me yozh co to, zigne rnalo menguiib guiblag ne rsaac zho lo zha ne nodilnie zho.

¹⁷ Golsoladz ganle laa Dios psilaale to lo guielgut, golsaca zigne rzac menguiib pchog guuib ne rzob guic zho, rsilaaw zho lo guielgut. Ni golsac Xtiidz Dios mine rneedz Espiritu Sant lo to, zigne rzac menguiib xquuib zho.

¹⁸ Nsin sca golso, guiablode to. Tibaque golzodiidznie Dios. Golnab lo me mine rsi-aab Espiritu Sant guic to, golnab gacnien me grëse zha ne ngab lo me; ni

¹⁹ golnab lo me gacnien me naa, csiaab me guic naa pe nac mine gne naa, peet dzeb tsod lo naa gne naaw lo miech; zeena gacnan zho ganle, zha nac Diidz Ndzon ne rnee zha laa miech lo dol, mine choot gochand glo.

²⁰ Ib me bzo naa cteed naa xtiidz rii me lo grë zha zit, ni mincocxe waa rquiaqui znu no grë guuib rii nia naa, ngoguiu zho naa nu. Golnab lo me gacnien me naa, gdzieebd naa gne naa ganle cho nac me. jNsin sca golso!

²¹ Laa naa rxel Tic lo to, me nac tib men nziuu lo naa, dib zdoo me laa me quiayun xyudar naa lo xtsiin men ndzon ne rnabey ne. Me guiaadnie diidz lo to ganle zha rac naa, zha no naa nu.

²² Mincopaa ziaad me i, ziaadnie me diidz zha no no nëz rii, zeena ine gley to tsoxcoraa to mine riladz to.

²³ Rnab naa lo Dios men ne nac Pxoze ne, ni lo Jesús men ndzon ne rnabey, me gacnien to peet zhgab ctsebd to, ine tibaque gliladz to me, ine gleynie to samiech to.

²⁴ Me gunlay to, grëse to ne nac to zha ne nlipaa dib zdoo rleynie Jesús.

Pabl

GUITS NE PXEEL PABL LO ZHA FILIP

¡Diuzh to grëse to!

¹ Naa nac Pabl, grop no Timoté laa no rxeel guits rii guiedz Filip i. Laaw ziaad lo to ne nac to zha ne ngable lo Dios, ni nacie to Jesús; zigtaa tow, zigtaa zha ne zo lo tow, zigtagaa zha ne ruñ xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

² Dios men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebde to.

³ Zeene rsoladztaa naa to, rded naa xquizh lo Dios;

⁴ ni zeene rzodiidznie naa me, rley naa gon rnab naa lo me gacnien me to;

⁵ sac desde dze ne laa to psilo bliladz Jesús haxta lo nadze, tibaque laa to quiayacnie naa, quiayun to xyudar naa noseed naa miech Xtiidz Ndzon me.

⁶ Ni nappaa naa, zigne squi psilo Dios nozhixcuuaa me lo xquielmban to, zigse zie dze laa me gzhixcuuaraa to, zeena nsinle zo to gal dze ne laa Jesús guiaad stib.

⁷ Min co racladz naa, ni ib rieguiala sac ne nligaa rleyne naa to. Sac ib rsaande to naa, zigtaa zeene znu no naa ladzguiba, zeene zonlaagaa naaw, zaatne racpaa rne naa ni rlu naa ganle ne nli diidzli nac Xtiidz Jesús.

⁸ Dios nan ganle pa lotaa nonie to guic naa, rquiané zdoo naa to, zigne rzacaque Jesús ne.

⁹ Rnab naa lo Dios gacnien me to, zig dze gleyneraa to samiech to, tsabiiniraa to,

¹⁰ zeena guien to cue to niapse gré ncuuaane ndzinli gun to. Sca ine ndzinli nac lo xquielmban to, ni tib xtol to guieñd gal dze ne guiaad Jesús;

¹¹ zaacse gban to. Ga glu to ganle lëe min co blu Jesús lo to, zeena sca csanglaa to Dios.

¹² Bets, bzian, racladz naa gacnañ to ganle niicle tel pe nactaa ncuuaane nodeed naa, per led mincod gon cuéz ygaazdraa Xtiidz Ndzon Jesús, sinque lel znu mazdraa ndal miech ne noquiaadiaga.

¹³ Sac tel niina, zigtaa gré zha ne rquia dziin lo gobierna, ni gréragea miecha, laa zho nanle ganle ne loxaque noyun naa xtsiin Jesús gane znu no naa ladzguib.

¹⁴ Sac ndal gré bets zeene gon zho laa naa znu biab ladzguib, laa zho bguiaalraa laa zho noseed miech Diidz Ndzon rii; peet rtoladzdraa zho, peet dzeb guieñdraa lo zho, masaque Dios rnalo zho.

¹⁵ Parga nli no stib dii zha ne psilo noyun dziin co, per laa zho noyuna loxaque par dieñ zha guianzniu zho, sac né rac zdoo zho

ran zho zha none naa Xtiidz me. Per zigne no zha ne sca nac, noque zha ne nli dib zdoo zho quiaseed zho miech.

¹⁶⁻¹⁷ Lëe zha co nagon rlu ne nli rleyne zho naa; sac nan zho ib laa Dios bzo naa gne naa ni glu naa lo miech ganle ne nli diidzli nac Xtiidz Jesús; laa zha ne sca noyun dziin co par guianzniu zho, rzac zho na tel mazdraa glaa guiaañ zho lo naa, mazdraa lozh coguieñé zho naa ne laa naa znule no ladzguib.

¹⁸ Per par naa, pex gun naa zho. Tel zha ne zie dib zdoo, zha ne zieedgaa dib zdoo, totsaque ne Xtiidz Jesús quiaseed zho miech; min co nac mine mazdraa rley naa.

¹⁹ Ni zleyragaa naa, sac nan naa ib zrie naa zaatne niioogyu naa nu; sac lala quianab to lo Dios por naa, ni lala nacie zhiEspíritu Jesús naa.

²⁰ Dib zdoo naa racladz naa, tiblique gac naa lëeb naa gan naa mine tedtaa naa, gdzind dze ne gun naa ncuuaane cuee xquielto naa. Racladz naa cxobnen naa ganle zha men rottaa nac Jesús; niicle tel niaca por min co yquiaaqui gut miech naa.

²¹ Sac gon, par naa laa naa mban par gun naa mine rnabey Jesús, ni zeene guetgaa naa, nappaa naa tib guieñbley nroob ne ygaa naa.

²² Per tel laga mban naa, nzianraa ncuuaane grielo gun naa lo me; dzigo nagon riendaque naa dieñ pa min wenraa. ¡Pe wena gbanraa naa, te wena ye prontga gbi naa lo guidzliu rii!

²³ No hor rzaac naa gbanraa naa, nogaa hor rzaac naa tebaa laa naa wble lo guidzliu rii; zeena ziagaa naa lo Jesús, sac nligaa zoot naa laa naa bdzinle lo me. ¡Min co mazdraa wen, lëde cuéz naa lo guidzliu rii!

²⁴ Per rien naa ible none cuéz naa, sac rquinpaa to naa.

²⁵ Mincoxe nagon waa, rgobey naa zbanraa naa, zeena lozh cseed naa to choobraa to lo Xtiidz Jesús, ine nley gac to laa to riladza;

²⁶ ni zeene laa naa gbire guial lo to i, rien naa nroob gley to, zdeed to xquizh lo Jesús porne racnie me naa.

²⁷ Per mine rsopaa naa diidz lo to gon: Goltsoxco golban zigne no gban zha ne ngab xnéz Jesús, zeena niicle telne grielod guial naa, racladz naa gon naa tipse nac to gré to, tiblique dziits zo to lo Xtiidz Dios; ni noxco to dieñ zha gliladz grérea miech Jesús,

²⁸ ni lalnu rdziebde to gré zha ne rlëe ran to. Ga guien zho ganle néz ne nitlo zho zie zho, sangue to ga rlu ne laa Dios psilaale to lo xtol to, ni nacie me to.

²⁹ Sac gon, ible none gan to guieñé porne no to xnéz me, bzooblod Jesús to loxaque par ygaa to guieñzaac qui gnalo to me.

³⁰ Niicle tow, niicle naagaaw none dzian ne min co. Gonle to ganle zha nactaa grē ncuaañe bdeed naa, ni ziyongaa to grē miñe nodeed naa niina.

2

Goc Jesús tib meñ ndooladz

¹ Nanle to ganle Jesús rchoobladz zdoo to, me rlu zha gleynie to samiech to, tipse nac to ni Espíritu Sant nacnie to; nanle to ganle none yquia zdoo to samiech to.

² Gaxe nana sca, golconley zdoo naa, ine tipse golgac, golleynie grē zha ne nacgrē to, tipse golnee, ni tipse golgac tel pa lo dziin ne gnediizd to gun to.

³ Ncuaañe gun to, guiabde to ne laa to guna par dien zha csañwin to stib miech, zeen dien zha guianñziuu to; sinque ine ndooladz golgac, masaque goltsienie guic ne nonraa stib miech lo to.

⁴ Ib yguibde to ne lose to yquuin ncuaañe gun to, sinque golguib dien zha gun to xyudar grēraa miech.

⁵ Golsoladz ganle pa lotaa ndooladz goc Jesús len dze ne biaadted me lo guidzliu, scaquegaa nasca ndooladz golgac.

⁶ Sac tel me:

Niicle ne Dios nac me,
per led miñcod niab me nrieed me lo
guieñdzon ne no me,

⁷ sinque grēse zigne nac me, laa me psaña tib
lad,

laa me goc zig tib ngunñdziin win,
biaad me gol me lo guidzliu rii goc me
miech.

Nacle me miech,

⁸ ni bii psañwin me me lo miech,
haxta bdeed me diidz pquiaa zho me lo
cruz,

zig run zho cho grē zha yozh.

⁹ Miñcocxe waa, psañglaaraa Dios me,
biaañ me meñ ne mazdraa non, meñ ne
mazdraa nroob;

¹⁰ zeena zeene laa me gaquiet,
grēse zha ne no gbaa, grēse zha ne no lo
guidzliu,

ni grēse zha ne no nēz len guidzliu, laa zho
yquuitsgzhib,

¹¹ ni grēse zho laa zho cueero, guiab zho
ganle ne nli me nac meñ ne rnabey.
Ga laa zho xobneñ ganle, zha meñ nroob-
taa nac Dios, meñ ne nac Pxoz me.

Zha ne nac biini lo guidzliu rii

¹² Bets, bzian, ne nligaa rleynie naa to.
Laa naa rnab lo to (zigne bioxco to bin to
xtidz naa zeene blēz naa lo to i, scaquegaa
niina niicle ne zit zo naa, golgon miñe rne
naa nu), ib gdeete to diidz guiab to ladz-
nia dol stib, niina ne laa Dios psilaale to;
goluiñ tsieniewguite guic to.

¹³ Benque Dioszhal rsiaab guic to
rquiabladz to gun to mine racladz me, ni
scagaa me racnieñ to rrieelo run tow.

¹⁴ Ni ncuaañe rieguial to gun to, ine
nguieel golgac golgana, peet glisquide to, ni
niicle tilidiidzdgaa to;

¹⁵ zeena tsod pe nacne cho glisqui guiab
zho laa to pe falt, pe dol ne quiayun. Gollu
ganle nli xpēēde Dios nac to; zaacse golban,
niicle ne ladaque grē miech ntseeb, miech
ncow ne ndxie lo guidzliu rii no to. Golgac
zig tib biini lo zho, zigne rziini mel gbaa lo
ncow ne nac guieel.

¹⁶ Ib csaande to Xtiidz Ndzon Jesús, diidz
ne rdeed guieñlmban, lēew golconie guic to.
Sca golgac, zeena gal dze ne laa Jesús guiaad
stib, per nli gley naa gan naa led zhlēd brie
naa bial naa, bialseed naa to.

¹⁷ Zig nac niina, tel niaca miñe no gded
naa xquieñlmban naa gaca zig tib gon, parne
dib zdooraa to gliladz to Dios, haxta zley
naa gded naa xquieñlmban naa; sac racladz
naa ye to yгаа guieñbley.

¹⁸ ¡Golley sca! Zigne no guieñbley rii zdoo
naa, scaquegaa to golco nley zdoo to, zeena
grē ne gley.

Timoté ni Epafrodit

¹⁹ Telne gneedz meñ ndzon ne rnabey
ne diidz, racladz naa cxeelñiob naa Timoté
guiaadwi dien zha no to, zeena haxta stib-
gac zdoo naa zeene laa Timoté glansonie
diidz lo naa.

²⁰ Me cxel naa, sac guieñd stib zha ne
zienie guic zig zienie guic naa, tel led med;
sac tel me nonie to guic me.

²¹ Grēraa zho, ncuaañe yquuin lo zho ri-
oxco zho, laa ne tsoxco zho miñe nac xtsiñ
Jesús.

²² Laa Timoté, led nanle to ganle zha
ndzinli nac me, tel niina ine tib mēed nac me
lo naa, nroob yudar ne quiayun me noseed
no miech Xtiidz Ndzon Jesús.

²³ Ible laa guic naa no cxel naa me lo to i,
loxaque gacnañe naa dien zha csañ wxtis
rii xcuent naa nu.

²⁴ Ni ye naa nend pronaque guialso naa
i dien yo to, sac rien naa ible zneedz Dios
diidz guial naa.

²⁵⁻²⁶ Ni rgobey naa nonguielaquew cxel
naa bets ne Epafrodit guiaad me nēz qui, sac
laa me rbanle to, ni no me zhgab bin me laa
to gocnañ ne laa me bzhaacnē. Nli laa to
pxeel me lo naa nu, ni blactagaa noyun me
xyudar naa ne znu mban nodeed naa, blac-
taa noyacnie me naa lo dziin ne nodziun
no.

²⁷ Ni nligaa bzhaacnē me, nzhooc goc me
zootle laa me nietle; per pquia zdoo Dios me
ni pquiaagaa zdoo Dios naa peet gocd me,
sac gon nole naa guieñē, ni tel pe niacaque
me mazdraa niac nroob xquieñē naa.

²⁸ Min co nagon gan laa naa cxelgazh me, zeena gley to gan to lo me stib, ni scagaa niicle naaw zley naa.

²⁹ Golley sca gon golcaania me, golguien ganle bets to nac me, bets new grë ne ne nac ne zha ne ngab lo Dios; ni grëragaa zha ne nac zig nac me, golleynie zho.

³⁰ Golgan ganle, tel me haxta bdedlaa me niet me nu niina ne biaadgun me xtsiin Jesús; per ib pquaid zdoo me me, bleeladz me xquielmban me biaadgun me xyudar naa, porne brielod niaad-zhal to.

3

Ncuuaane mazdraa non

¹ Bets, bzian, golley ne laa to ngab lo Jesús men ndzon ne rnabey. Mine ziesole naa diidz lo to, guieete naa zneque naaw stib, sac ncuuaane yquingaa lo tow:

² jib cxende to lo grë mëcw dox qui! Grë miech ndzinlid ne squi quianzë, racladz zho tsopaa zha bgui bey, sac rzac zho zha ne sca tso bey, ga rlu xnëz lo Dios no xnëz me.

³ Sangue ne, ndionle ne zha nac diidzli, zha ne rleynie Dios zigne rsiaab Espiritu Sant guic zho, ni dib zdoo zho run zhow, zha co nac zha ne nlipaa no xnëz me. Ne ne nac ne zha ne no xnëz me, Jesús nac men ne rdziunnon ne, sac ndion ne por me laa Dios ycaania ne; rnalod ne grë ncuuaane laglaase,

⁴ sac telne scaw; zig nac naa pe zhistaa ncuuaane dzigo zrieelod gnalo naa. Tel no zha ne rzac por ncuuaane been zho min co laa Dios csilaa zho; tel scaw, nroobraa ncuuaane ziyun naa lo zho:

⁵ Xon ngbidz raap naa laa naa birole bey co, zha Israel nac naa, lo xtií Benjamín zial naa, merpaa zha Israel nac naa; sac niicle pxoz naaw, niicle xniiaa naaw zha Israel nac me. Niicle xleygaa zha Israela, nroob pseed naaw, zha farisé goc naa;

⁶ bleyniedox naa grë mine zienal zha Israel, gacxe waa pquianaal naa grë miech ne no xnëz Jesús; zig nac mine raquiet lo ley, grësew ben naaw zigne naca, ib biod dze ne cho zha pe nlisqui lo naa.

⁷ Lëe grë ncuuaan co rnaloo naa len dze co, sangue niina Jesús rnaloo naa, grëse ncuuaan co laaw psanle naa tib lad.

⁸ Ni led loxaque psandse naaw tiblad, sinque grësew peet nondraaw lo naa, mine non lo naa niina nacte beenbey naa cho nac Jesús, men ndzon ne rnabey naa. Niina ne laa naa runbey me, grëse ncuuaan co rzaac naaw zig rzac ne grë pe guizh beed, sac laa naa racladz gbigraa naa lo me, ni gacniera naa me.

⁹ Zanaal draa naa gun naa mine rnabey ley par guiaanmbe naa lo dol, sinque laa naa zanaal dib zdoo naa gliladz naa cho nac Jesús;

sac zha ne dib zdoo rnaloo me, sanmbe Dios zho lo dol.

¹⁰ Racladz naa guienraa naa zha nac Jesús, ni gaap naa poder ne pquian Dios zeene blische me me len baa, ye naa teed grë mine bded me, ni cueladz naa xquielmban naa zigne bleeladz me xquielmban me;

¹¹ ni scagaa, nanpaa naa ye naa grieeban gal dze ne guiadbeeban me grë zha ne no xnëz me.

Stsëe Jesús xcuerp zha ne ngab lo me

¹² Gnid naa togo laa naa benle gan, nasi laa naa nacle zigne racladz Jesús gac naa; led scada, laa naa bii noxcow, sac nanpaa naa zac naa zigne no guic me gac naa zeene psilaa me naa.

¹³ Bets, bzian, gard gun naa gan; per xco co no naa; grëse ncuuaane bded laaw biaanladze naa, laa guic naa zienie ncuuaane naraa ziaad.

¹⁴ Masaque rzaac naa niina zig rzac zha ne rie prueb lo corr, rded naa fuerz gdzin naa zaatne gneedz Dios zhipremio naa, guielnaaac ne rbedz Dios ne ygaa ne zeene laa ne riladz Jesús.

¹⁵ Ni ib znu none tsonie guic grë zha ne nlipaa dziits zo lo Xtiid Dios; telne nogaa bla zha ne rzac led scada, per Dios gdeed guielbiini lo zho guien zho ganle zha naca.

¹⁶ Ni negaa, grë mine rienle ne zha nac, none gban new.

¹⁷ Bets, bzian, golwi ganle zha mban naa, ni zha mbangaa grë zha ne zienal mine blu no lo to grë to; dzigo sca golban.

¹⁸ Sac gon nzian zha ne nacgrë to i (blac-taale zizet naa zho lo to, ni niina haxta roon naa rzet naa zho stib), laa zho mban zigne racladztzaa zho, rlëe zho ron zho pe nac gut Jesús lo cruz;

¹⁹ ni nëz ne nitlo zho ga zie zho. Laa ne tsienal zho mine rnabey Dios, laa zho zienal grë ncuuaane gdeed guix zdoo zho, ncuuaane gdeed guix xcuerp zho. Loxaque grë ncuuaane mbee guielto zienal zho, per zha rlozhd gleynie zhow; niapse grë ncuuaan lo guidzliu rii nonie guic zho.

²⁰ Sangue ne, laa ne zional ncuuaane ygaa ne gbaa, sac gbaa nac zaatne ngab ne, ni laa ne quiambiaaz quiet Jesús gbaa guiaad me stib (me nac men ne psilaa miech lo dol, me nac men ndzon ne rnabey);

²¹ zeena ctsëe me xcuerp ben wiich ne nu, gaca zig nac xcuerp ndzon me. Ni ib zun mew, sac nroob poder ne rap me rnabey me grëta ncuuaane no.

4

Rnab Pabl nley gac zha Filip

¹ Bets, bzian, ne nlipaa gon rleynie naa to, haxta rzaac naa tebaa laa naa ranle lo to; to nac xquielbley naa, to nac zig tib premio

lo naa por grëtaa xtsiin Jesús miñe beñ naa lo to. Laa naa rso diidz lo to, tibaque squi dziits gołso, ib csaande to zhiwseed Jesús.

² Rnab naa lo bzian ne Evodia, ni lo bzian ne Síntique glëëlsadraa zho, none tipse gnee zho; sac gon beł zho, xnëz Dios no zho grop zho.

³ Ni luu gon bets, ne nac luu zha ne tibaque quaiyacnie naa lo dziin ne quiazdiuun ne, laa naa rnab lo luu bnee lo grop wnaa qui gneewen zho stib, sac gon ye zho blactaa miñe bded zho zeene bzënal zho zhits naa biotiiz no Xtiidz Jesús, ni zeene güeynalгаа zho zhits Clement, ni zla zha ne rdziuungza no dziin. Laa lë zho zhooble leñ libr ne quia lë grëse miech ne bgaale guiełmban ne gdziñdraa dze lozh.

⁴ ¡Golley sca, tibaque golley! ¡Golgan ganle lo Jesús ngab to! Ni rneque naaw stib: ¡Golley!

⁵ Golguien zaacse golbannie grëse samiech to, zeena haxta gzeëb diidz ganle ne nli miech ndzinli, miech ndooladz nac to. ¡Golguien ganle, ile ziaad meñ ndzon ne rnabey ne!

⁶ Teł pe nac grë ncuaane quiaded to, tsode to zhgab, gdziebde to, sinque gołzodiidznie Dios, gołsan grësew ladznia me; per led lox-aque gnabde to, sinque gołsoladz gołdeed xquizh lo me.

⁷ Ni zeene sca csan to grë xliaadz to ladznia me, haxta tibililadz guiaan zdoo to, peet dzeb tsoniedraa zdoo to, peet zhgab tsoniedraa guic to, masaque Jesús nac meñ ne nacie to; grëraa miech ib guieñd zho zha nac ne scataa tibililadz rac to.

⁸ Bets, bzian, nu ne laa naa csiaalle guits rii laa naa rnab lo to, min rii gołconie guic to: niapse miñe nac diidzli, niapse grë ncuaane nonguiel gac, niapse grë ncuaane rac zigne nac diidzli, niapse grë ncuaane mbe, niapse grë ncuaane gleynie miech, niapse grë ncuaane gley miech gon zho, niapse grë ncuaane yquiin, niapse grë ncuaane gzee zdoo miech ni gleynie zho.

Grë min rii gołconie guic to, ni lëew gołtsoxco gun to.

⁹ Ni gołguien gon, grë miñe pseed naa to, miñe psan naa diidz lo to gun to, grë miñe bin to bne naa lo to, miñe gon to beñ naa, grë min co gołtsienal; zeena scagaa zacnie Dios to ib peet zhgab ctsehdraa to.

Gon ne bdeed zha Filip

¹⁰ Ne nlipaa rded naa xquizh lo meñ ndzon ne rnabey ne, ni rley naa ne laa to pxeel grë ncuaane yquiin naa stib. Nan naa ne led biaanladzde to naa, sac tibaque noxco to dien zha gun to xyudar naa; sinque bdeedniobda diidz.

¹¹ Rley naa ne laa to psoladz naa, maase niicle nodpaa naa zhgab co dien pa gree pe yquiin naa, sac pseedle naa peet zienied guic naa niicle teł zhataa nodeed naa.

¹² Nan naa zha nac guiełprob, ni nanquegaa naa zha nac zeene quianie ne nroob ncuaane yquiin ne. Pseedle naa rzac zdoo naa miñe nodeedtaa naa, niicle zeene biodzë zdoo naaw, zeene rcaabedzгаа naaw; niicle zeene nroob ncuaane yquiin naa no, zeene peet guieñdgaa.

¹³ ¡Grësew rrieelo naa, sacne nacie Jesús naa, me rneedz xfuers naa!

¹⁴ Per wen ga been to, pxeel to ncuaane pquiin naa lëëtaque leñ dze ne peet guieñd lo naa.

¹⁵ Zeene brie naa nëz xtan zha Macedon i, leñ dze ne wriin psilo noseed naa miech Xtiidz Ndzon Jesús ga, tosaque nac zha ne been xyudar naa, beenlo to gon pxeel to lo naa, porne rleynie to dziin rii.

¹⁶ Scasaque leñ dze ne no naa Tesalónica, blalaa vuelte pxeel to pe pquiin naa.

¹⁷ Guiabde to togo bod ne dien zha ygadraa miech lo naa gane rzetpaa naaw; lëda, sinque rley naa ne squi rala zdoo to rgad to, sac squi nroobraa guiełnzaac ne ygaa to.

¹⁸ Teł na gon, grële ncuaane yquiin naa no, haxta nrooblew nu. Ni ne pxeelaque to Epafrodit biaadsan stib nëza, haxta bdedsole goclow lo naa nu. Grëtaa ncuaane bgad to lo naa, rrieequia naca zig tib gon ne bdeed to lo Dios, zig tib gox ndzon ne sac zdoo me ycaania me.

¹⁹ Scagaa niina nagon, grëse ncuaane yquintaa to, Dios meñ ndzon ne rililadz ne, me gneedza lo to, porne nligaa dib zdoo to rililadz to Jesús; sac gon, nroobdoo grë guiełndzon, grë guiełnzaac ne rap Dios.

²⁰ ¡Lëë xDios ne ga, me nac Pxoz ne grëse ne! ¡Gotsaa dziuunnon ne me sca, mesi gdziñd dze ne nitlo xquiełndzon me! Sca rieguiala.

²¹ Gołdeed tib zhibdiuzh naa lo grëse zha ne no xnëz Jesús i, grë zha ne squi noxco mban zigne racladz Dios. Scagaa gołcaania zhibdiuzh grë zha bets ne, zha ne no lo naa nu.

²² Gołcaania zhibdiuzh grëse zha ne no nu, zha ne rililadz Jesús; haxta ye grë zha ne rquia dziin lo rey Roma nu, laa zho rxeel zhibdiuzh zho lo to.

²³ Jesús, meñ ndzon ne rnabey ne; me noxco to, me nonie grë zhizhgab to. ¡Me gunlay to grëse to!

Pabl

GUITS NE PXEEL PABL LO ZHA COLÓS

¡Diuzh to grëse to!

¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

² Grop no Timoté laa no rxeel guits rii Colós i, laaw ziaad lo to grëse to ne nac to zha ne noxco mban zigne racladz Dios, ni dib zdoo to rleynie to Jesús.

Dios men ne nac Pxoze ne, me glu ganle pa lotaa noxco me to, zeena peet dzeb tsonied guic to.

³ Gzobtaa zeene rzodiidznie no Dios, Pxoze Jesús men ndzon ne rnabey ne, rnab no gacnie me to, ni rdeed no xquizh lo me ne squitaa rneedz me guielbiini lo to;

⁴ sac zidzion no ne nlipaa dib zdoo to riladz to cho nac Jesús, ni rleynie to grëse zha ne no xnëz Dios.

⁵ Min co nonie guic to, sac desde dze ne psilo pquiaadiag to Xtiidz Ndzon Jesús mine nac diidzli, laa to gocnañ ganle no tib guielnzaac nroob ne yгаа to gbaa.

⁶ Gogacnañ sca ganle, Xtiidz Ndzon Jesús, wseed ne riladz to, nzianraa zaatne quiaaaza, ni lëew notsëe lo xquielmban miech, zigne bdzëeque lo xquielmban to zeene pquiaadiag tow, laa to bien ganle ne nligaa pa lotaa noxco Dios to.

⁷ Lëe min co ga biadseed Epafra to; tib men ne nziuu lo no, ye me rquiaagza no dziin; ranaxe to ganle zha rioxcotaa me xtsiin Jesús.

⁸ Me bzodiidz lo no ne squitaa rneedz Espiritu Sant guielbiini lo to, rleynie to samiech to.

⁹ Gane zeene bdzion no squitaa ndzinli mban to, tibaque laa no quianab lo Dios quixbiiniraa Espiritu Sant guic to, guien to zhapaa nac grë mine racladz Dios gun to;

¹⁰ zeena grielo gban to zigne no gban zha ne no xnëz Jesús, tibaque gun to ncuuane conley to zdoo me; dzigosi grëse ncuuane ndzinli ne gun to, zlupaa ncuuane rquiina, ni zioguicraa to zha nac Dios.

¹¹ Ni rnab no lo me, niapse por poder ne rap me gunndip me zdoo to, gunndip me guic to; zeena niicle tel pe nactaa guielne ne gan to, ib peet tsienied guic to, ib sacxuude to,

¹² ine gley to gdeed to xquizh lo me nac me Pxoze ne, ne squi laa me bzooblo to, psanmbe me to; zeena gdzin to lo biini zaatne yгаа to mine no gdeed me lo grëse miech ne no xnëz me.

¹³ Sac me nac men ne blee ne ladznia menodox, ma ne rnabey lo guielcow, psan me

ne ladznia Xpëed me Jesús, men ne rleynie me ga.

¹⁴ Jesús nac men ne bdiizh grëse to! ne zeene sca gut me lo cruz, me nac men ne psanmbe me ne nëz lo Dios.

Grë ncuuane been Xpëed Dios

¹⁵ Niicle ne gard dzian ne Dios, per laa Xpëed me biaad biaadlu lo ne ganle zha nac me, sac zigne nacse me scaque nac Xpëed me; ni ladznia Xpëed me no grëtaa ncuuane no.

¹⁶ Zeene bnabey me tsa grëtaa ncuuane no gbaa, grëtaa ncuuane no lo guidzliu; Xpëed me bzaaw grësew, zigtaa grë ncuuane rdzian new, zigtagaa grë ncuuane grielod dzian new, zig nac grë "me mban" ne rap guielrnabey, rap poder. Jesús bzaaw grësew, ni ible par me biaaw.

¹⁷ Nole Jesús zeene baa grë ncuuane co, me naaza, gane tib tiba nosew zaatne rieguiala.

¹⁸ Ni grëse zha ne no xnëz me, me nac men nroob ne rnabey lo zho; grëse zho laa zho nac zig tib cuerp, dzigo me nac guic cuerp co. Me nac men ne nole glo, ni me nac men ne glopaa brieaban; zeena glu ganle me nac men ne mazdraa nroob, me nac men ne mazdraa non;

¹⁹ sac ib Dios bnabey zigne nacse Dios scaque nac me.

²⁰ Niapse por Jesús grëse ncuuane no zigtaa lo guidzliuw, zigtagaa gbaaw, laaw baaanwen lo Dios, ni lëe min co goc zeene sca bzhee xchen Jesús lo cruz.

²¹ Zig nac to, glo zit zo to lo Dios, rriequia rlëenie to me, sac niapse grë ncuuane ndzinlid güeynie guic to been to;

²² sangue niina laa Jesús psanwenle to lo me, zeene sca goc me miech pquiaa zho me lo cruz. Ni laa me psanwen to, zeena ine mbele to, ni tib dol rapdraa to gdzin to zaatne no me.

²³ Per parne grielo gdzin to ga, none tiblque golgun guic to, goltsienal Xtiidz Ndzon me mine riladz to, ib guiaanladzde to guielnzaac ne no yгаа to, zigne raquiet lo Diidz Ndzon ne pquiaadiag to ga. Lëe Diidz Ndzon co quiaaaz dipse lo guidzliu niina, ni ye naa nac tib zha ne quia quianeew lo miech.

Dios bzo Pabl tsoxco me zha ne ngab lo Dios

²⁴ Grë guielne ne noyan naa porne rleynie naa to, rley naa noyan naaw. Laa Jesús gonle grë guielne co zeene psilaa me grë zha ne ngab lo me niina, laa niina ye naa noyan spalala, loxaque ne noseed naa zho Xtiidz Ndzon me, ne nac zho zig xcuerp me.

²⁵ Ni ible Diosgaa bzo naa noyan naa dziin lo grë miech ne no xnëz me, zig nac to, gocnieñ me to bzo me naa bne naa grëse zigne nac Xtiidz Ndzon me lo to.

²⁶ Diidz ndzon ne gocnaṅd grētaa zha gol ne ziyaadmban wlal ne bre guidzliu, laaw gocnaṅ grē zha ne no xnēz me niina.

²⁷ Ible zha gocladz me gacnaṅ grētaa guielnaac ne ygaa zho zeene laa zho gacnaṅ diidz co; haxta to ne nac to zha zit. Ni lēē diidz ndzon co nu: Zha ne nacie Jesús, me gziṅnie zho zaatne nac lo guielndzon ne no me.

²⁸ Gacxe waa, zaatne ziotaa no, Jesús nac meṅ ne rzeet no lo miech, ni megaa rneedz guielbiini lo no rseed no zho, rso no diidz lo zho; zeena gac zho tib miech ndzinli, zigne no gac zha ne ngab lo me.

²⁹ Miṅ co nac dziin ne noxco naa, per led dziin ligada, gane dib nacse guielndaan, dib nacse fuerz ne rneedz me lo naa, noxco naa noyuṅ naaw.

2

¹ Racladz naa gacnaṅ to ganle ne nlipaa tibaque no to guic naa, zigtaa tow, zigtagaa zha Laodicéw, ni grēragaa zha ne gard ganlo naaw.

² Rnab naa lo Dios ib guiaaṅd zdoos to, tipse gac to ine gleynie to grē zha ne nacgrē to, lozhraa tsaa biini xquielrien to guen to ganle zhapaa nac Jesús, sac gon naraa bdeed Dios diidz gunbey miech me.

³ Me nac meṅ ne rap grēse guielrac, grēse guielbiini nroob cheṅ Dios.

⁴ Laa naa rne miṅ rii lo to, zeena choot yquidiede to, niicle paraa ndzielguic rzē xtiidz zho.

⁵ Niicle ne nli zozhaald naa lo to i, per zhiespírítu naa nacie naa to, ni rley naa ran naa squi zaacse mban to, tiblique nac guic to dib zdoos to riladz to Jesús.

Tib guielmban cub

⁶ Nana sca, zigne bzēēb to xnēz Jesús gnabey me to, scagaa gołtsienal miṅe rnabey me,

⁷ masaque ladznia me gołsan xquielmban to, me gołnalo, gołlu ganle ne nli dib zdoos to riladz to me, zigne pseed no to, ni tibaque goldeed xquizh lo Dios.

⁸ Nsin gołso: ib gac-wete to lo grē zha ne guiaadnie wseed lo guidzliu rii, grē godiidz ne paat rquiind, sac laa zho gacladz yquidie zho to. Teł zha, ib rzeete zho lo miech dien cho nac Jesús, sinque leł grē ncuaaṅe ruṅ grē xmenṅol zho, grē wseed ne rleynie grē miech lo guidzliu, miṅ co rseed zho miech.

⁹ Sangue ne, ndion ne ganle zigne nac Dios scapaa nac Jesús.

¹⁰ Gacxe waa, to ne nacie to Jesús, peet rquiindraa to. Me nac meṅ ne rnabey lo grēse zha ne rap poder, lo grēse zha ne rnabey.

¹¹ Zeene bnalo to Jesús rrieequia hor co bio to tib bey, per nacda zig nac bey ne rio

xcuerp zha bḡui, sinque tib bey ne rlu ne laa to psaanle grē doł ne beṅ to glo; ni Jesús nac meṅ ne bloo to bey co.

¹² Ni zeene brobnis to, rrieequia bḡueet-snie to me ga ni brieebannie to me, sacne biladz to poder ro ne rap Dios meṅ ne blische me leṅ baa.

¹³ Glo zha gutle nac to nēz lo Dios, lala por grētaa xtol to ni porne gard co Jesús to bey co; laa zeene bleeban Dios Jesús, meṅ ne pxeel me biaadsilaa ne lo doł, laa to wbiire bḡaa guielmban stib.

¹⁴ Ptiche Dios grēse miṅe riogual ne, sac bdiits ne miṅe nac xley me; grēse doł co pcaadz me Jesús zeene laa Jesús pquia lo cruz.

¹⁵ Ni zeene sca bded Jesús, ga psiaablo me menox; grē me yozh ne rap poder, me ne rap guielrnabey, psan me ma guielto; sac gasi laa me blu lo miech ganle ne nli ladzniale me no ma.

Grē wseed ne paat rquiind

¹⁶ Gacxe waa, ib guncasde to zha ne rlisqui dien pe nacie pe row to, pe nacie pe rie to, pe nacie runde to grē zhiłni zha Israel, runndade to dze ne rquia mēē yeen, runndade to dze ne rdziiladz zha Israel lo dziin.

¹⁷ Grē miṅ co bioxco miech zeene gard guiaad Jesús, per lega gocse ncuaaṅ co zig tib zhiłlē guielbiini ne biaadnie Jesús.

¹⁸ Ib gliladzde to xtiidz grē zha ne squi racladz csozit to lo Dios, niicle squitaa rquiaalo zho ndooladz rac zho, squitaa rleynie zho grē anjł, rnee zho goon dien pe ncuaaṅe gbaa ne zielulo lo zho, lēēque lēē zho rlozhd gunniats zho por grē zhiwseed zho.

¹⁹ Led yed zho ngab lo Jesús, meṅ ne rnabey lo ne grēse ne ne nac ne zha ne ngab lo me. Teł ne, me racniē ne, tipse noyuṅ me ne, laa ne noyabiiniraa zigne racladz Dios.

²⁰ Zeene sca gut Jesús, gataa bnitlo me grētaa miṅe nac to glo, gane niina ngadoodraa to lo grē ncuaaṅe zienal grēraa miech guidzliu. ¿Pe nac dzigo ne bił zienal to grē miṅ co?

²¹ Zig nac grē miṅe rnabey zho to, rnee zho: "Nod gon yquini to ncuaaṅ rii, nod gon to miṅ rii, gacđ ygaal to ncuaaṅ rii."

²² Ncuaaṅe tib rded nac grē ncuaaṅe qui, zig nac guielwagw led ncuaaṅe gdiid ga, grēse wseed qui miechse bleebeya.

²³ Parga nli na zootle nixbiini nac grē wseed co, sac rioxco zho dien zha tsiegan zho grē anjł, rac ndooladz zho lo miech, ni rsacsi zho xcuerp zho; per rrieelod grē ncuaaṅ co ctsēēw xpensar zho, zdoos zho, parne gnabey zho xcuerp zho.

3

¹ Golguien ganle, stible guielmban rap to niina, lëë guielmban co bгаа to zeene briceeban Jesús; gacxe waa, goltsoxco yгаа to grë guielnzaac ne no gгаа, zaatne zob Jesús cue Dios nëz derech.

² Grë guielnzaac ne no gгаа min co golconie guic to, led grëd ncuaaane no lo guidzliu rii;

³ sac gon, rrieequia gutle to lo grë ncuaaane no lo guidzliu rii, laa to mbanniele Jesús, zigne racladz Dios.

⁴ Laa ne rdziaap tib guielmban cub niina, sacne nacnie ne Jesús; gal dze ne laa me guiaad stib, laa ne no gdzin lo me gban ne zaatne nac lo xquielndzon me.

Zha gban zha ne rliadz Jesús

⁵ Gacxe nana sca, golsaan grëtaa guielntseeb ne run miech lo guidzliu rii:

tsioniede to zha ne led tsieelde to, gunde to grë ncuaaane mbeeguieito, gdeete to diidz gnabey xcuerp to to, gunde to ncuaaane ndzinlid ne racladz to, ni gacblëde to lo dimi (sac tel scaw, dzigo dimi rsañ to xlugar Dios).

⁶ Grë dol rii run grë zha ne nëd gon xtiidz Dios, lozh ga lëë mine tsieguial zho laa zho yгаа lo guielzi ne csiaab Dios.

⁷ Zig nac to, grë min co been to glo; ⁸ sangue niina, none csaan tow, ni lalnu: glëëndraa to samiech to,

sobzhiandraa to, gundraa to guielntseeb, gneenëdraa to samiech to, gneedraa to diidzguidz,

⁹ yquidiedraa to samiech to. Sac gon, nacdraa to zigne nac to glo, laa to brielee lo grëtaa mine been to.

¹⁰ Stible nac lo xquielmban to niina: tib miech cuble nac to, ni laa to biï nodzëë haxta que ne gac to zigne racladz Dios men ne psañ miech, zeena scagaa lozh gunbey to zha nac me.

¹¹ Zha ne bgaale guielmban cub rii, led yedraa zho cue dien cho zha nac zha Israel, dien cho zhagaa nac zha zit; dien cho no bey, dien cho nodgaaw; dien cho ziaad guiedz nroob, dien cho ziaadgaa guiedz win; dien cho rac, cho gacdgaa; dien cho run xtsiin ben, dien chogaa nac zha rnabey. Mine rquiinraa niina, nacne grëse zho guien ganle Jesús nac men ne mazdraa non, me none gnalo zho.

¹² Golgan ganle, zha nquialadzttaa Dios to, ib laa me ble to gac to miech ne ygab xnëz me. Zaacse sca golban, ne nlipaa dib zdo to: golquia zdo samiech to, niowse golgac lo samiech to, ndooladz golgac lo samiech to, nguudzladz golgac lo samiech to, guieedniede to samiech to.

¹³ Guieedniede to samiech to, ni zeene cho zha run pe tib falt lo to, golgun zho perdon. Golguien ganle zha been Dios to perdon; scaque to, none gun to samiech to perdon.

¹⁴ Ni mine mazdraa none tsoxco to, golleynie zha ne nacgrë to zigne racladz Dios, zeena tipse gac to; ni scagaa gleynie to grëraa samiech to.

¹⁵ Jesús nac men ne ctiche grëtaa ncuaaane ndzinlid ne no zdo to, zeena niowse gbanie to samiech to. Lëë tib guielnzaac co no yгаа to ne laa Dios bredz to, ni scagaa none gban to, zeena tipse gac to grë to. Golsoladz goldeed xquizh lo me.

¹⁶ Niapse mine nac Xtiidz Jesús golconie guic to, golco zdo to. Golquien grë guielbiini ne rneedz me lo to, golseed grë zha ne nacgrë to, ni zha ne rxin, golnee lo zho zaacse gac zho. Dib zdo to, goldeed xquizh lo Dios por grëtaa mine run me, ine golgoolnie me grë salm, golgoolnie me grë cant ne rdziolnie ne me.

¹⁷ Ncuaaane guntaa to, niicle zeene gnee tow, zeene gungaa to tib dziina, golguna zigne rdziladz Jesús, men ne rnabey ne; ni tibaque goldeed xquizh lo Dios men ne nac Pxo to, niina ne laa to ngable lo Jesús.

¹⁸ To ne nac to men wnaa ne ptsieelniale, golgon xtiidz tsieel to, sac ible sca nonguiel gban miech ne no xnëz Jesús.

¹⁹ To ne nac to men bgui ne ptsieelniale, golleynie tsieel to; gacnchogde to lo me.

²⁰ To ne nac to mëëd, golgon mine rnee pxoz to, mine rnee xniala to, sac sca rdziladz Dios.

²¹ Togaa ne nac to men nguzan, gunde to ncuaaane gunglëe to xpëëd to, zeena csande to zdo zho.

²² To ne nac to zha ne lega run xtsiin ben lo guidzliu rii, golgun grëse mine rnabey zho to; gunde to zeene zose zho lo to dzigose yquiaalo to gun to dziin, zeena guianzuiu to lo zho; sinque dib zdo to golgun xtsiin zho, golguien ganle Dios zobwi ran me pe run to.

²³ Grëse dziin ne gun to, ine nguieel golgac golguna, zig nac zeene xtsiin zhal Dios noyun to.

²⁴ Benque nanle to, zгаа to mine gdeed Dios lo grë zha ne ngab lo me, telne gon to diidz; sac gon Jesús nac men ne nlipaa rnabey to, ni lo me quia to dziin.

²⁵ Golgon diidz sca, sac zha ne gonda, ib tedsod zdeed Jesús mine tsieguial zho; sac gon, tel me led yed lo me ncuue miech.

4

¹ Togaa ne nac to zha ne quia miech xtsiin, zaacse golgac lo zho, csacside to zho. Golsoladz ganle, ye to tib ngundziin nac to lo men rnabey ne zob gгаа, ni me zobwi ganle pe run to.

Gnab zho gacnieŋ Dios Pabl

² Bets, zbian, tel petaa rzac to tibaque golzodiidznie Dios, nsin golso, goldeed xquizh lo me.

³ Golnab lo me gacnieŋ me no, grieelo ziaab no zaatne guioseed no miech Xtiidz Ndzon Jesús, gnee no lo zho ganle cho nac Jesús men ne beenbeyd miech padzeela; sac zig nac niina por min co znu nioogyu naa nu.

⁴ Golnab lo me gneedzraa me guielbiini lo naa, zeeŋe cseed naa miech xtiidz me, guien zho mine rne naa; guŋ naa dziin co zigne no guŋ naaw.

⁵ Golquiin guielbiini ne rneedz Dios lo to, zeeŋa guien to zha gnee to, zha gac to lo zha ne gard gliladz Xtiidz Jesús; ni zeeŋe sca rdeeda diidz sodiidznie to zho, golnee lo zho ganle zha nac Xtiidz me.

⁶ Golguien tib godiidz ndzinli, tib godiidz niowse, min co golzodiidznie zho, ni none guien to zha ctsire to lo xtiidz zho tib tib zho.

⁷ Laa bets ne Tic guiaad i, me guiaadnie diidz lo to ganle zha no naa nu. Rleynie no me, tibaque laa me noxco quiadziuungza no me xtsiin men ndzon ne rnabey ne.

⁸ Ga nagon laa naa rxel me, me gnë lo to ganle zha no no nëz rii, ni gnee me lo to zeeŋa cchoobladz me zdoo to.

⁹ Ye menladz to Onésimo guiaadgrop me. Rleynie no Onésimo, ye me tibaque noxco me xtsiin men ndzon ne rnabey ne. Grop zho guiaadnie diidz i ganle zha nac grë ncuane quiayac nëz rii.

¹⁰ Golcaania zhibdiuzh Ristarc, men ne nioogyunie naa nu, zhibdiuzh Marcw bet-syeen Bernabé (laa naa nile lo to ganle, telne laa Marcw guiaadgan to i, niowse golcuézlo me);

¹¹ ni zhibdiuzh Jesús, tib men ne rneeque zho Just. Lo grë zha Israel ne rililadz Jesús, lëese gza zha rii nac zha ne quiayun xyudar naa quiaseed no miech zha sëeb zho xnëz Dios, ni blactaa zichoobladz zho zdoo naa.

¹² Golcaania zhibdiuzh menladz to Epafra, ye me quiayun xtsiin Jesús nëz rii; tibaque rzodiidznie me Dios rnab me dziits so to lo Xtiidz Jesús, ni tiblrique gac guic to tsoxco to gban to zigne rnabey Dios.

¹³ Nanpaa naa ganle pa lotaa nonie to guic me, grë to zha Laodicé ni zha Hierápolis.

¹⁴ Golcaania zhibdiuzh Demas ne, ni zhibdiuzh Luc men ne ruŋ rmed, lëe stib men ne nziiu lo no nu.

¹⁵ Goldeed tib zhibdiuzh no lo grë zha ne no guiedz Laodicé, zha ne nacgrë ne. Goldeed zhibdiuzh no lo zhuz Ninf, ni lo grëraa zha ne rcaalsa lidz me i, riegoolnie zho Dios.

¹⁶ Zeeŋe gon lozh glab to lo guits rii, dzigo golxeela lo zha Laodicé, zeeŋa ye zho glaba; ni scagaa to, gollab mine cxel naa lo zho.

¹⁷ Ni golguiab lo Arquip, tsoxco me zaacse guŋ me dziin ne bdeed Dios lo me i.

¹⁸ Naa nac Pabl, golgan ganle naazhal pquia tib bdiuzh rii nu rxel naa lo to. Golsoladz ganle ladzguiib no naa. Dios nac men ne guŋay to, me glu lo to ganle pa lotaa noxco me to.

Pabl

GUITS NE GLO PXEEL PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté, laa no rxeel guits rii Tesalónica i; laaw ziaad lo to grëse to ne nac to zha ne ngable lo Jesús, meñ ndzon ne rnabey, ni lo Dios meñ ne nac Pxoꝝ ne.

Dios ni Jesús, me glu ganle pa lotaa noxco me to, zeena peet zhgab csebde to.

² Tibaque rdeed no xquizh lo Dios meñ ne nac Pxoꝝ ne, squitaa rneedz me guielbiini lo to; gzobtaa zeene rzodiidznie no me rzeet no to lo me.

³ Ni zeene rzeet no to lo me, rsoladz no grëtaa dziin ne run to niina ne dib zdoo to rleynie to me, ni zha quialëb to lo grëtaa guielnë ne noyan to, tibaque nonie guic to ne ible zdziñ dze ne laa Jesús guiaad stib.

⁴ Bets, bzian, rleyniedox Dios to, ni ndion ne ganle me bzooblo to ygab to lo me.

⁵ Zeene biaad no biadseed no to Xtiidz Ndzon Jesús, znuse ptsëew lo xquielmban to, sac gocnie Espiritu Sant to bien to ganle niapse diidzli nac grë diidz ne nonee no lo to; scagaa no, gon to ganle zha mban no, ga blu ne nli diidzli nac grë miñe noseed no miech. Ni golsoladz ganle zha biaadbannie no to i, bdzioxco no bdziuun no xyudar to, sac ne nligaa rleynie no to.

⁶ Scagaa to, pseed to wban to zigne mban no, ni zigne wban meñ ndzon ne rnabey ne. Laa to pcaania xtiidz me, blozh ga, niicle nroob guielnë ne bded to, per bneedz Espiritu Sant guielbley lo to, ib peet güeynied guic to.

⁷ Grëse zha ne rliadz Jesús nëz Macedon, nëz Acay, zeene bin zho zha mban to, yeque zho laa zho pseed mban zho zigne mban to.

⁸ Ni ne squi ndzinli mban to, nzianraa zaatne rzeet miech Xtiidz Ndzon Jesús, led loxaque gropdse lugar rii. Zaatne ziotaa no, zhoob diidz ne squitaa dib zdoo to rliadz to Dios, rquiindraa ne no gzodiidza lo zho.

⁹ Zhale rzodiidz grëse zha biaad no lo to i, zha scataa niow blëzlo to no len dze co, ni zha psaan to grë zhiwseed xmengol to, grë ncuuañe nac mdio lo to, laa to bliladz meñ ne nacpaa Dios ne nguiamban, ni laa to zienal miñe rnabey me.

¹⁰ Ni rzodiidz zho zha zienie guic to ne ible zdziñ dze quiet Jesús gbaa guiaad me stib, ni quiambëz to gdziñ dze co. Xpëed Dios nac Jesús, Dios bleeban me lo guielgut, ni me psilaa ne lo guielnëdodox ne ziaadyob guiaad.

2

Zha güeyseed Pabl zho

¹ Bets, bzian, nanle to ganle zeene biaad no lo to i biaad-zhlëd no, brieelo pseed no to.

² Niicle ne wriin psacsi zho no guiedz Filip hor co, per laa no bii biaad ladz to i, ni niicle igaaw bioxtseebaque no, per ib bdziebd no laa no pseed to Xtiidz Ndzon Jesús; sac ndion no Dios nacnie no.

³ Ni diidzli nac miñe pseed no to, choot biaeate par nquidiee no to, niicle biaeategaa no par dien pe niaadla no lo to.

⁴ Xtiidz Dios bnee no, me bzo no gnee no lo miech zha laa zho lo dol, ni miñ co nac dziin ne quiadziuun no. Nli nzian zha ne rlëeniew, per laa no bii rdziuun dziin co; sac zionald no gac miñe rdziladz miech, sinque laa no zionald gac miñe rdziladz Dios, meñ ne nan ganle pe rza zdoo ne.

⁵ Gon to ganle, bneed no pe diidz niow lo to par nquidiee no to, niicle bguibdgaa no dien zha ndeeda diidz needz to dimi lo no. Dios zobwi rdziuun no miñ co.

⁶ Wlaltaa ib bguibd no dien zha niacnon no lo miech, niicle lo tow, niicle lo stibgaa miecha.

⁷ Laa ne nlu no ganle zha rnabey nac no, sac gon Jesús pxeel no, lel ndooladz goc no lo to. Masaque zigne rleynie meñ wnaa xpëdeyen me, nda nda ran me win; scadaa bleynie no to,

⁸ bio no bdzioxco no pseed no to Xtiidz Dios. Ne nlipaa bleynie no to, telne niaca miñe niedziina haxta mbeeladz no no niet no por to.

⁹ Bets, bzian, rsoladzaxe to ganle ni lalnu ib psodziind no to; blactaa, dze guiel bdziuun no dziin, nozhal bdziniaa ncuuañe pquinn no len dze ne biadseed no to.

¹⁰ Dios zobwi ran me ganle zha nac lo xquielmban no, ni niicle togaaw (ne nac to zha ne ngab lo me) gon to ganle ndzinli wban no zeene biaad no i, bdziuun no ncuuañe mbee no diidz ro miech, sinque laa no bdziuun miñe rdziladz Dios.

¹¹ Masaque rziaac no to zig rzac tib dad xpëed zho, blactaa pchoobladz no zdoo to, bloomley no zdoo to tib tib to;

¹² pso no diidz lo to zaacse gac to, gban to zigne no gban zha ne no xnëz Dios, meñ ne bredz to gdziñ to lo xquielndzon me, zaatne rnabey me.

¹³ Ne nligaa rdeed no xquizh lo Dios, sac zigne biadnee no Xtiidz me lo to, laa to pcaaniaw, bien to Xtiidz me naca, nacda ncuuañe bleebey miech. Ni nligaa Xtiidz Diosa, gacxe waa zha ne rliadz zigne rzac tow niina, rzhixcuaa lo xquielmban zho.

¹⁴ Per zeene laa to bliladza, laa menladz to psacsi to; bded to zigne bdedaque grë zha

Israel ne riladz Jesús, sac tel zhaw psacsi menladz zho zho.

¹⁵ Ni lëëque zha ne psacsi zho ga, zha co bñab psacsi zho Jesús men ndzon ne rnabey, zigne beetaque zho grë zha ne pxeel Dios biadteed Xtiidz me; ni lëëque zho beñcxoon no. Ncuane rbiñladz Dios run zho, rlëënie zho grëse miech,

¹⁶ rtsidil zho pe nacne nonee no lo grë zhazit zha laa zho lo dol. Loxaque quiayunctalraa zho xtol zho, per, jprobsaxe zho, sac guielnëdoh ne ziaadyob cxeel Dios ygaa zho!

Racladz Pabl tsiegan Pabl zho stib

¹⁷ Bets, bzian, nli gard dzianlolsa ne wlal ne wbii no i, per tibaque rsoladz no to; blactaa rnee no tel'paa zha guiaaddzian no to.

¹⁸ Tel naa blactaa gocladz naa nial naa, nialgan naa to. Laa no niaadle, per ptse mendox lo no gon, pca ma xnëz no pasëë no niaad.

¹⁹ Guiabde to togo quiayaanladz no to, sac gon to rnalno no conley zdoon no gal dze ne laa Jesús guiaad stib. To glu nli bdziun no xtsiin me, to glu ne nli rioguijal no ygaa no premio ne gneedz me.

²⁰ Ne nligaa rley no rdzian no zha mban to, haxta riats no zeene raquiet to; sac to rlu ganle ne nli xtsiin Dios nodziun no.

3

¹⁻² Ni ne scataa tibaque nonie to guic no, dzigo mazd pxeelaque no bets ne Timoté biad lo to i, laa no biaan guiedz Aten. (Nanaxe to ganle ye Timoté nacgza no quiazdiun no xtsiin Dios, quiaseed no miech Xtiidz Ndzon Jesús.) Laa no pxeel me biiadgan me to, biadchoobladz me zdoon to, biadnee me lo to lozh sodziits to lo Xtiidz Dios;

³ zeena niicle tel pe guielnë ne noyanta to, ib guiaand zdoon to. Nanle to ganle grëse ne ne riladz ne Jesús, ib laa ne no dzian guielnë.

⁴ Led rsoladz to zeene biiad no i, bneegazh no ne ib laa ne no dzian guielnë; ni gon to ganle scase goca.

⁵ Ne nligaa tibaque bionie to guic naa, nacne mazd pxeelaque no Timoté, biiadso me dien pe bii zienal to mine nac Xtiidz Dios; sac ni naa nend pquii mendox to biire zienal to ncuane rnabey ma, dzigo zhlëse biadseed no to.

⁶ Laa niina ne laa Timoté blanso nu stib, blansonie me diidz, në me niowse mban to, rleyne to grë zha ne nacgrë to, dib zdoon to riladz to Dios. Ni në me rleyne to no, ye to racladz tebaa zha gan to lo no, zigne rziacaque no.

⁷ Min co nagon, bets, bzian, niicle ne nroob zhgab, nroob guielnë ne nodieed no

nu, haxta biiadladz no grë ncuaan co zeene gocndion no dziits zo to lo Xtiidz Dios, mine riladz ne.

⁸ Haxta stib goc zdoon no bdzian no squi tiblique laa to rleyne men ndzon ne rnabey ne;

⁹ ni rdzieldraa no diidz ne gnee no gdeed no xquizh lo Dios por to. Ni ne znutaa bloonley to zdoon no, haxta Dios ran ganle pa lotaa rley no.

¹⁰ Dze, guieel, quianab no lo me gneedz me diidzbey gbiire dzian no lo to stib; zeena lozh cseed no to grëraa mine no gacnan to lo Xtiidz me.

¹¹ Dios men ne nac Pxoze ne, ni Jesús men ndzon ne rnabey ne, me gacnieñ no grieeelo guiaaddzian no to.

¹² Jesús gacnieñ to tsaaraa to biini, zeena gleyneraa to grë zha ne nacgrë to ni grëraa samiech to, zigne rleyne no to.

¹³ Ni rnab no lo me, gacnieñ me to tiblique gac to lo Xtiidz me, zeena ine mbe zdoon to, ni tib dol rapde to zeene laa me gzo to lo Dios men ne nac Pxoze ne, gal dze ne laa me guiaad stib con grë zha ne nacnie me.

4

Guieľmban ne rdziladz Dios

¹ Zig zobwi Jesús men ndzon ne rnabey, laa no rso diidz lo to: zigse zie dze goľsoxcora gban to zigne rdziladz Dios,

² benque nanle to zhaw, sac lëë min co rnabey Jesús no biadseed no to gun to.

³ Sac gon, laa Dios racladz mbe guiaan to lo me, gunde to guielyozh yquiangob to zha ne led tsieelde to.

⁴ Grë zha bgui, zeene laa zho gnee lo tsieel zho, none niowse ndzinli gac zho;

⁵ gund zho zigne run grëraa miech ne nand zha nac Xtiidz Dios; sac tel zha co, rzac zho loxaque par gdeedse guxt xcuerp zho, mincose rquii wnaa.

⁶ Niicle yquiangobde to tsieel sabgui to; sac zha ne sca run, sabgui zho ga rguitnie zho; ni dol co ible tedsod zunquizh Dios zhow. Golsoladz ganle psolen no diidz rii lo to glo, ni na laa no rneequew stib.

⁷ Golguien ganle, bredzdaxe Dios ne waa parne dziun ne grë guielyozh, sinque laa me bredz ne gban ne zigne racladz me.

⁸ Gacxe waa, zha ne zienald wseed rii, gacnan zho ganle xtiidz Dios ga (men ne rdeed Espiritu Sant lo zha ne ngab lo me) noguiits zho, led xtiidz cholze samiech zhow.

⁹ Laa zig nac guielwleyne, nanle to zha no gleyne to grë zha ne nacgrë to. Rquiiind cso no diidz lo to dien zha gun to, sac Dioszhal pseed to zha gleyne to zigtaa zha ne nacgrë tow, zigtagaa grë samiech tow.

¹⁰ Zig nac grē zha bets ne, zha bzian ne, zha ne no xtan zha Macedon, zēēb didz rleynie to grē zha co. Goltsoxco sca, golleynieraa samiech to.

¹¹ Ni stib miñe rso no diidz lo to: niowse golbannie samiech to. Miñe nac xtsiin to tib tib to, miñ co goltsoxco, tozhal goldziniaa ncuaañe yquiin to;

¹² Zeēna peet guñfalte lo to, ni scagaa grē zha ne gard gliladz Xtiiidz Dios, haxta gzee zdoo zho gan zho zha mban to. Goltsoxadz ganle psole no diidz rii lo to glo.

Ib ziaad Jesús stib

¹³ Bets, bzian, nu na ganle laa naa gzodidz lo to zha gac grē zha ne ret, zha ne ngable lo Dios; zeēna tsoe to guieñē zig rzac grē miech ne gard guien gnalo Jesús.

¹⁴ Ne, ne dib zdoo ne riladz ne ni gut Jesús ni bleeban Dios me; scaquegaa none gliladz ne ible zbeeban Dios grēse zha ne dib zdoo riladz Jesús, zeēne laa Dios cxeel me guiaad me stib.

¹⁵ Goltsoxco sca ganle, znu gon nac xtiidz me: Grēse zha ne ngab lo me, zha ne bii zomban gal dze co (gal dze ne guiaad Jesús) tednerd zho lo grē zha ne gutle.

¹⁶ Zeēne laa me guiet gbaa, redz ro ne yquia, zlu zēēb tsi tib zha ne quianabey, tsi tib anjl ne nonraa, ni tsi zhitrompet Dios; hor co laa me guiet gbaa, laa grē zha ne ngab lo me, zha ne gutle, laa zho grieeban.

¹⁷ Dzigo tipse gac zho grē zho zha ne bii zomban ga, laa zho soquia laglaa lo xcow tsiedzieelo zho me; dzigosi gdziñdraa dze ne gbiche zho lo me.

¹⁸ Nana sca miñe rne naa nu, goltsoxidza lo grēse zha ne nacgrē to; zeēna conley to zdoo zho.

5

¹ Bets, bzian, nana par gni naa lo to dien pe guidze te guieel guiaad me, choot ndionda.

² Goltsoxco ganle, lega nacle zeēne gan miech laa me ziaadle, zig nac zeēne rzēēb ngbaan yu guieel, cho dien nanpaa pa hor sēēb ngbaan?

³ Zeēna laa grē miech guiab: “Nasi wen ndxie ne, peet guieñēxtseeb nodraa”, tibaque zeēne guien zho laa dze ne nitlo zho bdziñle, ni gasi grieelodraa cho csilaa zho. Sac zig znuse rnaaz yoob meñ wnaa ne bdziñle dze gap xpēēd; scadaa gdziñ dze co.

⁴ Sangue to, bets, bzian, nacdraa to zha ne nonziaab lo ncow, tel pa hortaa guiaad me nsinle zo to; sacdraa to dze co zig rzac miech ngbaan, lega nacle zeēne ran zho laa ngbaan rdziñ.

⁵ Miech ne nole lo xbiini Dios nac to, niini zo to; nacdraa to zha ne no glowtaa guieel, zha ne no lo ncow;

⁶ gacxe nagon waa, niini goltso, tsienalde to miñe run zha ne zienal guieñēxtseeb; sac nac grē zha co zig nac zha ne nixguies, tibaque guieel no zho.

⁷ Sac tel guieela, guieel raaguies miech, niicle zha ne rzuudzgaaw guieel rzudzho.

⁸ Sangue ne ne nac ne zha ne niini zo, none guien ne pe nac ncuaañe noyac. Tibaque dib zdoo ne gliladz ne Dios, gleynie ne samiech ne, zeēna csaaca ne zig rsaac ncuaañe racw menquuib lo grē ncuaañe gnitlo zho; ni csoladz ne ganle laa Dios psillaale ne lo guieelgut, gotsaa ziaac new zig rzac menquuib pchog ne rzob guic zho rsi-laaw zho lo guieelgut.

⁹ Sac gon bredzdaxe Dios ne waa yгаа ne guieñēndox ne no guiaad, sinque laa me bredz ne csilaa me ne lo guieñē co. Ni lēē miñ co rac zeēne laa ne riladz Jesús.

¹⁰ Zeēne gut Jesús, ga bdiizh me xtol ne; zeēna yase mban ne o gutlegaa ne gal dze ne guiaad me, per me gbannie ne.

¹¹ Nana sca, tib tib to goldeed xfuers zha ne nacgrē to, niapse diidz ne gun xyudar zho choobraa zho lo Xtiiidz Dios, miñ co goltsoxco; zigne quiaayunaque to niina.

Rso Pabl diidz

¹² Bets, bzian, laa no rso diidz lo to: Niowse goltsoxco, niowse goltsoxco lo grē zha ne po Dios noyūn xtsiin me lo to, zig nac zha ne zo lo to, zha ne rnee lo to zha no gban to.

¹³ Golguien ganle cho nac zho, golleynie zho, sac gon led lega nacd dziin ne quiaayun zho lo to. Goltsoxadz sca: ¡Zaacse goltsoxco, tiñniede to samiech to!

¹⁴ Tel cho zha ne nacgrē to i, rsilo quiaay-acgbech, goltsoxco lo zho, zeēna guien zho gun zho dziin. Grē zha ne quiasaan Xtiiidz Dios, goltsoxco lo zho zeēna gleynie zhow stib; grēgaa zha ne gard tsoquicpaa zha naca, goltsoxco xyudar zho tsoquic zhow; niicle grēragaa zha ne nacgrē tow, ib guieed-niede to zho.

¹⁵ Golguien tel pe guieñēxtseeb ne run miech lo to, guiabde to ne scaque gun to zho; sinque mazd goltsoxco tibaque niowse goltsoxco lo grēse miech, niicle lo zha ne nacgrē tow, niicle lo grēragaa miecha.

¹⁶ Tibaque nley goltsoxco zdoo to.

¹⁷ Tibaque goltsoxco diidznie Dios.

¹⁸ Goldeed xquizh lo Dios, niicle zeēne noyan to guieñēw, zeēna nogaa to guieñēbleya, sac sca racladz me gun grēse zha ne no xnēz Jesús.

¹⁹ Goltsoxco miñe rnee Espiritu Sant lo to, ni goltsoxco.

²⁰ Goltsoxco miñe rnee grē zha ne rnee grē diidz ne rsiab Dios guic zho;

²¹ wen wen goltsoxco dien pe nac miñe rnee zho, dzigo miñe rzac to rquiiñraa lo to, miñ co goltsoxco.

²² Go**l**biche lo grëse guie**l**ntseeb ne no.

²³ Dios, me**n** ne rtiche grëse dzeb, grëse zh-gab, mezh**al** csa**n**mbe to lo grë**t**aa guie**l**ntseeb; dib nacse to (zhiesp**í**ritu tow, xalm tow, xcuerp tow) zee**n**a ni tib do**l** rapde to ga**l** dze ne laa Jesús me**n** ndzon ne rnabey ne gbiire guiaad stib.

²⁴ Me bredz to, ni mesi ru**n** me mi**n**e rnee me, gane ndio**n** no ne ib zu**n** me mi**n** rii.

²⁵ Grëse to bets, grëse to bzian, laa naa rnab lo to go**l**siguie**l** go**l**nab lo Dios gacnien me no.

²⁶ Go**l**caania zhibdiuzh no i, i**n**e go**l**xen nia grë zha ne nacgrë to, go**l**lu ne nli rleynie to zho.

²⁷ Me**n** ndzon ne rnabey, me rnabey naa laa naa rso diidz lo to, glab to guits rii lo grëse zha ne nacgrë to i.

²⁸ Jesús, me**n** ndzon ne rnabey ne, me glu lo to gan**le** pa lotaa noxco me to.

Pabl

BROP GUILTS NE PXEEL PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté; laa no rxeel stib guits rii guiedz Tesalónica i, laaw ziaad lo to grëse to ne nac to zha ne nole xnëz Dios, men ne nac Pxoze ne, ni Jesús men ndzon ne rnabey.

² Dios men ne nac Pxoze ne, ni Jesús men ne rnabey, me glu ganle pa lotaa noxco me to, zeena peet zhgab ctsebde to.

³ Bets, bzian, ible rieguiála gdeed no xquizh lo Dios ne squitaa noneedz me guielbiini lo to; sac gon zigse zie dze dib zdooaraa to riladz to Xtiiidz me, ni rleynieraa to samiech to.

⁴ Zaatne rdzintaa no lo grë zha ne nole xnëz me, ne nligaa rley no rzodiidz no lo zho zha squitaa dziits zo to, tibaque dib zdoo to riladz to me niicle maase rtsidil miech to, niicle maase nroob guielnë ne quiaded to.

⁵⁻⁶ Nli nroob guielnë noyan to, per scagaa laaw noyan to zeena tsieguiäl to gdziñ to zaatne rnabey me. Nu rlu ganle, Diossi zeene run me guielwxtis, zigne no gaca sca run mew. Zig nac niina, grë zha ne squi nosacsi to i, ib zгаа zho guielnëdox ne csiaab me.

⁷ To ne nac to zha ne quiaded grë guielnë qui, golgona ganle, gal dze ne guiet Jesús gbaa guiaad me stib, ible zгаа ne descans ne gneedz me. Gal dze co, laa me guietnie grë xanjl me, zha ne rapraa poder;

⁸ masaque tib beldox ne guietnie me, sac dzigosi laa me guiaad csiaabzi me grëse zha ne nëd niunbey Dios, grëse zha ne nëd nquiaadiag Xtiiidz Ndzon me.

⁹ Grëse zho laa me gnabey guey zho lo guielnëdox, zaatne gdziñdraa dze griee zho. Lëë bichele zho lo me ga, ib gdziñd dze gan zho lo xquielndzon me, gangaa zho grëtaa poder ne rap me.

¹⁰ Dze co, grëse zha ne no xnëz me laa zho goolnie me, gunnon zho me. Grëse zho see zdoo zho gan zho me; ye to gacgrë zho, sacne biladz to Xtiiidz me mine biadseed no to.

¹¹ Gacxe waa, tibaque laa no quianab lo Dios gacnieñ me to griee lo gban to zigne racladz me; zeena glu ganle led zhlëd bzooblo me to. Ni rnab no lo me gneedz me xpoder me lo to, zeena griee lo gun to grëse ncuaañe rquiabladz to, zeena grieequia grëse dziin ne quiayun to porne riladz to me.

¹² Zeena sca cxobneñ to ganle pa lotaa men nroob nac Jesús, men ndzon ne rnabey

ne; ni niicle megaaw, zunnon me to. Sac zigtaa mew, zigtagaa Diosa, noxco me to.

2

Ziaad Jesús stib

¹ Bets, bzian, ib laa Jesús men ndzon ne rnabey ne no guiaad, ni laa ne gbannie me.

² Zeene gon to laa miech gnë laa dze co bdziñle, niicle gnë zho Espiritu Sant bneew lo zho, gangaa to palo nonee zhow zaatne ndxie nzian miech, o cxeelgaa zho pe tib guits lo to zig nac zeene no pxeela; gliladzde tow. Laa no rso diidz lo to, peet tsienied guic to, gdziebde to.

³ Ib gdeete to diidz yquidie zho to. Sac gon ansraa ne gdziñ dze co, ib none grieequia grë miech ne gacntseeb lo Dios; lozh ga, laa tib mgui ne nacie menox grieequiaque, zacntseeb me lo Dios, per gabil ga nitlo me.

⁴ Lëë zha co ctsidil grëse zhiwseed Dios, grëse ncuaañe naclay lo miech; ni haxta zie zho ziesob zho zaatne nac len xyadoo Dios, guiab zho zha nac Dios.

⁵⁻⁶ Per no tib men ne notse lo zho niina, laga gdziñ dze ne laa zho guiaad. Goļsoladz ganle, blactaa bzeet naa min rii lo to len dze ne blëz naa i.

⁷ Grëse ncuaañe no guic zha ntseeb co gun zho, laaw rsilole; loxaque runfalt gdeed men ne notse lo zho ga diidz guiaad zho.

⁸ Zeene laa zho guiaad, hor co laa Jesús guiaadaque con grë xquielndzon me, dzigo me ne griee ro me gloozh me zho, gnitlo me zho.

⁹ Masaque menox gnabey zha ntseeb co, niapse xpoder ma gap zho, nzian ncuaañe glu zho; zun zho grë ncuaañe gzee zdoo miech, per led ncuaañe nliida.

¹⁰ Zun zho grë ncuaañe lozh yquidie zho grë zha ne nole nëz ne nitlo, zha ne ib bzhiguielndziladz mine nac diidzli. Tel niaca mine nliidz zhow, nleynie zhow, nsilaa Dios zho.

¹¹ Saan Dios tsienal zho grë ncuaañ co, ni ziladz zhow zig nac zeene diidzliw;

¹² per ib siaabzi Dios zho, sac laa ne gliladz zho mine nac diidzli, lel mazdraa gleynie zho grë guielntseeb.

Zha ne bdediaale lo dol

¹³ Bets, bzian, golguien sca tibaque golgotsaa gdeed ne xquizh lo Dios; sac gon tel to padzeelale bzooblo me to csilaa me to lo dol. Nacle diidz zeene laa to gliladz Xtiiidz me, mine nac diidzli, laa Espiritu Sant csanme to lo me.

¹⁴ Min co nagon nacne pxeel me no biadseed no to xtiiidz me, guien to zha laa to lo dol; zeena gdziñ to zaatne nac lo xquielndzon Jesús, men ndzon ne rnabey ne. Gacxe waa, zha nziiu nac to lo me.

¹⁵ Golguien sca, dziits golso, ib csaande to grë miñe pseed no to len dze ne biaad no i, niicle miñe rneegaa no lo to lo guits ne rxeel no.

¹⁶⁻¹⁷ Ni Jesúsaque, men ndzon ne rnabey ne, ni Dios men ne nac Pxoze ne, me gneedz xfuers to dziits so to; zeena grëse miñe gnee tow, miñe gun tow, wen grieequaw. Me blu ganle pa lotaa rleynie me ne, laa me bneedz tib guiebley ne gdziñd dze lozh lo ne, ni psan me diidz pe nac miñe naraa no yгаа ne. Ga rlu ganle pa lotaa noxco me ne, niicle ne rioguiald new.

3

¹ Bets, bzian, nu ne laa no csiaalle, laa naa rnab lo to golnab lo Dios gacniën me no, zeena znuse znuse diiz no Xtiidz Ndzon men ne rnabey ne; ni zha ne gontaaw, guien zho ycaania zhow zigne pcaania tow.

² Ni golnab lo me csilaa me no lадznia grë zha ntseeb, zha ne run miñe notaa guic; sac gon led grëd miech rilaldz Xtiidz Dios.

³ Dios men ndzon ne rnabey, miñe rnee me run mew; gacxe waa, ible zacniën me to dziits so to lo Xtiidz me, ni squianap me to tsobede to lадznia men dox.

⁴ Ndiön no ne me noyacniën to noyün to grë miñe pso no diidz lo to, ni scagaa me gacniën to bii gun tow.

⁵ Me gacniën to grieele gleynie to samiech to zigne rleynie Dios ne, ni guiuude to lo guieñe, sinque golgac zigne been Jesús.

None gun zho dziin

⁶ Bets zig zobwi Jesús, laa no rso diidz lo to: Tel cho zha ne nacgrë to i, nëdraa yquia dziin gdziniaa zho ncuaañe gow zho, ib ctsieelsade to zho; sac gon pseele no to min co.

⁷ Tel no, gon to ganle zha wban no zeene bliiaz no lo to i; ni sca gon none gban to. Ib bdeddzed no,

⁸ biod dze ne lega ndioow zhlë no xcuun miech, blactaa haxta guieel bdziuun no dziin bdziniaa no pe pquiin no; ib psodziind no lo to.

⁹ Niicle ne ib rieguiald nab no lo to needz to ncuaañe nquiin no, per choot peet bnabd. Miñe bdziuun no pquiaa no dziin bdziniaa no pe pquiin no, par gan to ganle zha nonguiel gban to.

¹⁰ Led rsoladz to len dze ne bliiaz no i, pso no diidz rii lo to: Zha ne nëd gun dziin, scagaa nodne gow zho.

¹¹ Laa niina laaw rzetaque naa stib, sac zidzion no no bla zha ne nacgrë to i, mbe rundraa zho dziin scase quiaaded dze zho; loxaque nëzrii nëzrec no zho rzëeb zho lo grë ncuaañe rieguiald zho.

¹² Zig zobwi Jesús men ne rnabey ne, laa no rso diidz lo zha ne sca run: none gun zho dziin gdziniaa zho ncuaañe yquiin zho.

¹³ Bets, bzian, ib guieete to, tibaque goltoxco golgun niapse grë ncuaañe yquiin lo samiech to.

¹⁴ Tel cho zha ne nacgrë to i nëd gon diidz gban zho zigne rso no diidz nu, golwi dien chow, dzigo ctsieelsadraa to zho; zeena sca ctoladz zho.

¹⁵ Per gunde to zho zig run zha ne rlëene samiech, sinque golnee lo zho gac-wen zho; golguien ganle bets to grë to.

¹⁶ Jesús nac men ne rtiche grëse zhgab, grëse guiełtseeb, me cuee to lo grëse zhzhgab to, lo grëse guiełtseeb gzataa dze. Me gacniën to grëse to.

¹⁷ Naa gon nac Pabl, naazhal pquia bdiuzh rii rxel naa lo to; naazhal pquia lë naa nu. Golgan ganle lëe xletr naa nu.

¹⁸ Jesús men ndzon ne rnabey ne, me gacniën to, me glu lo to ganle pa lotaa noxco me to.

Pabl

GUILTS NE GLO PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios men ne psilaa ne lo dol, ni Jesús men ne rnaló ne, me bnabey quiayun naa dziin rii.

² Laa naa rxeel guits rii lo luu, rzaac naa luu zig tib xpéed naa ne squi dib zdoó luu rililadz luu Jesús. Dios men ne nac Pxoó ne, ni Jesús men ndzon ne rnabey ne, me yquia zdoó luu, me tsoxco grê zhizhgab luu zeena peet tsienied guic luu. Min co racladz naa, ni min co rnab naa lo Dios.

³ Zigne psoque naa diidz lo luu len dze ne laa naa za nêz xtan zha Macedon ga, laa luu biaan Efés i; scagaa niina laaw rneque naa lo luu stib: Sca no luu i, bnee lo bla zha ne squi no i, cseetraade zho miech grê zhwiseed zho, sac ncuuaane paat rquiinda.

⁴ Bnee lo zho, csaan zho grê cuent gox qui, zhale noyunroobraa goon dien zharaa, peraa been grê xmengol ne. Ncuuaane paat rquiind ga, loxaque runctildiidza miech; mazd lo lal ne nodildiidz zho, tsoxco zho cseed zho miech ganle pe nactaa grê guielnzaac ne rgaa grê zha ne rquiabladz dib zdoó rililadz Jesús.

⁵ Laa naa rso diidz rii lo luu, sac racladz naa guiaaambe zdoó grêse miech qui, guiaaambe xquielrien zho ni dib zdoó zho gliladz zho Dios; zeena scagaa grieelo gleynie zho samiech zho.

⁶ Sac gon, no bla zha ne quiasaanle Xtiidz Ndzon Jesús mine nac diidzli, le lo grê cuent ncuuaane paat rquiind co no zho.

⁷ Racladz zho zha cseed miech zha nac xley Dios, ni niicle zha riend zha naca; zeene rseed zho miech ni zha riendaque dien pe rnee zho.

⁸ Ndionle ne ganle nli wen ley ne psan Dios, per telniaca mine yquuin miecha zigne psan me yquina.

⁹⁻¹⁰ Golguien ganle, biaand ley par gnabeya grê miech ne nole xnêz Dios, sinque laaw biaan par gnabeya grê:

zha ne racndaan lo Dios,
zha ne rond xtiidz Dios,
zha ntseeb,
zha ngoopdol,
zha ne rzacdraa ne men nroob nac Dios,
zha ne rguitnie lê Dios,
zha ne rut pxoó,
zha ne rut xníaa,
zha ne rut samiech,
zha ne rionie zha ne led tsieeld,
zha ne nac mrabh,

zha ne rban samiech riéto zho zho stib nêz,
zha ne rquidie,

zha ne rzeet lê Dios par gliladz miech xtiidz zho, ni nanpaa zho led diidzlid rnee zho.

Par grê zha rii nagon biaan ley; grê zha ne mband zigne nac Xtiidz Ndzon Dios;

¹¹ wseed ne rlu ganle zha laa miech lo dol. Ni lêe wseed co gon pso Dios naa none naa lo miech.

Pquia zdoó Dios Pabl

¹² Rded naa xquizh lo Jesús men ndzon ne rnabey ne, porne bzooblo me naa gon naa xtsiin me, ni noyacnien me naa ne laaw quiayun naa.

¹³ Ne nligaa rded naa xquizh lo me, sac glo ntseeb goc naa, bneenê naa me, ptsidil naa grê zha ne no xnêz me, ntseeb goc naa lo zho. Ni niicle ne scataa nac grê ncuuaane ben naa, per pquia zdoó me naa; sac len dze co gard gliladz naa cho nac Jesús, lega lo xquieln xen naa ga sca ben naa.

¹⁴ ¡Pa lotaa pquia zdoó Dios naa! Ga blu me ganle zha noxcoata me naa, pxobnia me guic naa bliladz naa cho nac Jesús, ni zig nac niina dib zdoó naa rleynie naa me.

¹⁵ Mine rne naa nu niina, diidzliw, ni racladz naa grêse miech gliladz zho ganle, ible laa Jesús biaad lo guidzliu, biaadsilaa me grêse miech lo xtol zho; ni naapaa gon goc tib zha ne mazdraa ngoopdol.

¹⁶ Gacxe waa pquia zdoó Dios naa, niicle ne scataa miech ngoopdol naa per psilaa Jesús naa. Ga blu ganle pa lotaa paciens ne rap me; ni ga gwi grêraa miech ganle, zha ne gliladz me, zgaa zho tib guielmban ne gdzind dze lozh.

¹⁷ ¡Tibaque sca golgotsaa dziuunnon ne me, golgotsaa gnee ne grê diidz ndzon lo me, zigtaa niinaw zigtagaa len grêraa izdoó ne ziaada! Sac gon, me nac men nroob ne rnabey, men ne gdzind dze ne nitlo. Sca rieguiala.

¹⁸ Timoté, xin, laa naa rso diidz lo luu gon: Tibaque dziits bzo, ib guiaand zdoó luu; psoladz ganle scaque nac diidz ne bnee grê zha bets ne zeene psiaab Dios guic zho bzeet zho pe nac grê mine pso Dios luu gon luu.

¹⁹ Bien tibaque dib zdoó luu bliladz Jesús, ib gon luu ncuuaane nan luu ndzinlid, zeena ine mbe xquielrien luu; sac gon no zha ne niicle rienpaa zho pa min nac ncuuaane ndzinlid, ni laa zho runa. ¡Min cocxe waa, grê zha ne sca nac, rsaanga zho mine bliladz zho!

²⁰ Zig nac Himené grop Lejandr, sca been zho; per laa zho bzonzle naa sca tsie zho xnêz mendox telne sca racladz zho; zeena guien zho ganle nodne gneenê zho Dios.

2

Gac-wnab lo Dios por grê miech

¹ Laa naa rso diidz lo to: Golguien none gnab to lo Dios por grêse miech ne ndxie lo guidzliu, golnab lo me gunlay me zho, gacniën me zho; ni goldeed xquizh lo me por grêtaa ncuane run me.

² None gnab to lo me gacniën me grêse zha ne nac wxtis, grêse zha ne rnabey, gdeed me guielbiini lo zho zaacse gun zho guielwxtis, zaacse gnabey zho; zeena tibliladz cue miech, ine gban ne zigne racladz me, sin choot peet glisquid lo ne.

³ Sca nagon nonguiel dziuun ne, ni scagaa rdziladz Dios, men ne pxeel Jesús bиаadsilaa grêse miech lo dol;

⁴ men ne racladz grêse miech sëeb xnêz Jesús, gacnan zho mine nac diidzli.

⁵ Guien zho ganle ne tibaque Dios no, ni tibaque men ne zac gdzinie grêse miech lo me: lêe men co nac Jesús, men ne goc miech bиаad lo guidzliu;

⁶ sac gon Jesús nac men ne bdeed xquielmban, beet zho me, bdiizh me xtol miech. Min rii nagon racladz Dios gacnan miech len dze rii.

⁷ Ni laa me pxeel naa none naaw lo grêse zha ne nacd zha Israel, noseed naa zho grêse mine nac diidzli, zeena guien zho dib zdoos zho gliladz zho Dios. (Mine rne naa nu diidzliw, rquidieed naa.)

⁸ Laa naa racladz sca, zaatne notaa zha ne dib zdoos rliadz Dios, grêse zha bgui none gzodiidznie zho Dios. Ni zeene gzodiidznie zho me, none ine mbe zdoos zho, choot lo zha rlêed zho, choot zha nodilnied zho.

⁹ Laa grê men wnaa, racladz naa tsoxco zho zaacse gacwxab zho, niowse, tibliladzse gac zho. Sac grê men wnaa ne rliadz Dios, par gluniow zho rquiind ne goon dien paraa xixcuuaa guitsguic zho, dien pe quie rbebni, pe or gac xnil zho, gac zhibguiaa zho, pe lar niazh ne gacwgaa zho.

¹⁰ Par gluniow zho, rquiin zaacse gbannie zho samiech zho, zig none gban zha ne nole xnêz Dios.

¹¹ Zig nac len yadoo, none tibliladzse gac zho, dzese sob zho yquiaadiag zho tel pe nac wseed ne noyac;

¹² gnedzd naa diidz ne zha so cseed miech, o zhagaa gnabey lo mgui. None dzese sob zho,

¹³ sac gon zeene psan Dios miech lo guidzliu, glose bzaa me Adán, dzigoraa bzaa me Ev.

¹⁴ Ni stiba, pquidied mendox Adán, sinque laa ma güeyquidie Ev; ni porne bliladz Ev xtiidz ma, ga bdiits Ev xtiidz Dios.

¹⁵ Per silaa Dios wnaa lo xtol zho, telne dib zdoos zho gliladz zho me, tsoxco zho gban zho zigne racladz me, guien zho gun zho

mine rieguial wnaa, gap zho xpêed zho ni cchoob zho win.

3

Zha ne so lo grê zha ne ngab xnêz Dios

¹ Zha ne racladz so gnabey zho lo grê zha ne no xnêz Dios, tib dziin wen ga rquiabladz zho gun zho. Sca zêeb diidz rnee miech; ni nligaaw.

²⁻⁴ Per ga nagon rquiin:

tib zha ne zaacse mban,

zha ne mbannie loxaque wnaa ne nacse tsiel zho,

zha ne tibliladz,

zha ne nixbiini, rien pe run,

zha ne mbe lo, choot lega gzhidznied zho,

zha ne ine nley rac, rbêzlo zho miech lidz zho;

zha ne rien zha rseed miech,

zha ne rquiad lo nziu,

zha ne rleynied dil,

zha ne wen zdoos,

zha ne zaacse mbannie samiech,

zha ne rzonal dimi,

zha ne zaacse mban lidz,

zha ne rrieelod rnabey lidz, rnabey xpêed,

zha ne nguzobdiidz nac xpêed, rbeed mêed xquielto zho.

⁵ Sac tel zha ne rrieelod gnabey lidz, gnabey xpêed; zpe lel ne so zho gnabey zho lo grê zha ne no xnêz Dios dzigo grieele zho?

⁶ Niicle tib zha ne griinpa psilo bliladz Xtiidz Dios grieeleod gac zho dziin co; sac nend lêeque lêe zho gunnon zho, lozh ga lêeque zha yguib guiabdee zho. Golsoladz ganle zha bzhaac mendox.

⁷ Ni ye rquiin tib zha ne zêeb xtiidz ne miech ndzini nac zho, haxta lo zha ne nod xnêz Dios; zeena tsod lega pe glisqui miech lo zho, sca gleyd mendox gac mine racladz ma.

Zha ne gun yudar len yadoo

⁸⁻¹² Scaquegaa zha ne so gun xyudar zha ne gnabey ga, ga rquiin:

tib zha ne zaacse mban,

zha ne rnee niapse diidzli,

zha ne rleynied guielgonziu,

zha ne zienald dimi,

zha ne dib zdoos rliadz grêse mine zho bnee lo Xtiidz Dios (mine rliadz ne, mine nac diidzli),

zha ne mbe lo,

zha ne mbannie wnaa ne nacse tsiel zho,

zha ne rrieelod rnabey lidz,

zha ne rrieelod rnabey xpêed.

Ni stiba, antes ne so zho none glugazh zho dien pe nli zrieelo gun zho dziin co. Zig nac tsiel zhow, none gac me:

tib wnaa ne zaacse mban,

wnaa ne rleynied diidzguizh,

wnaa ne rleynied nziu,

wnaa ne rquidied.

¹³ Sac zha ne zaacse guṅ dziin co, zianṅziuraa zho lo grē zha ne ngab lo Dios, ni scagaa ine mbe lo zho haxta no ro zho gnee zho lo miech zha nac ne laa zho rlladz Jesús.

Mine rlladz zha ne ngab lo Dios

¹⁴ Ib laa guic naa no guialniob naa i, guialgaṅ naa luu; per laa naa rxel diidz rii lo luu,

¹⁵ Zeena telne grieelod guialniob naa, per laa luu nanle naganle cho gzo luu yquiaanap grēraa zha ne ngab xnēz Dios nguiamban; zha ne runbey miṅe nac diidzli, ni rlu zho ganle ne nli diidzliu.

¹⁶ Ne nligaa nroobdoo nac wseed ne ziaad lo Xtiidz Dios, miṅe rlladz ne, ngan guien miech zha naca. Nu raquiet miṅe been me: Goc Jesús miech biaad me lo guidzliu, ni blu Espiritu Sant ganle ne nli Xpēēdpaa Dios nac me;

ni gon grē anjl me.
Brieets bliaal Xtiidz me grē guiedz, ndaldoo miech ne bliladz ganle cho nac me, blozh ga biire zey me lo guielndzon ne no me gbaa.

4

Zha ne rsaan Xtiidz Dios

¹ Ib laa Espiritu Sant rneele ne len dze ne ziaadyob guiaad Jesús stib, ndal grē zha ne rlladzle Xtiidz me, laa zho csaana laa zho tsienal grē miṅe rnee zha ne rquidie, grē miṅe nac zhiwseed menṅox.

² Grē zha ne guiaadnie wseed co, ni lalnu yquiad zdoos zho zeene laa zho yquidie miech.

³ Haxta stsidil zho ctsieelna miech, znabey zho ycuee ncuaaṅe gow miech; zig nac zeene led Diosd psan ctsieelna miech, zig nac zeene led med psan grē ncuaaṅe gow zho. Me psana grēsew, zeena grēse zha ne ngab xnēz me (zha ne beenbey diidzli), zeene laa zho yquiina gdeed zho xquizh lo me.

⁴ Sac grēse ncuaaṅe psan Dios, wena; zig nac grē ncuaaṅe rac wagw, peet nacda yquiin new, totsaque gdeed ne xquizh lo me zeene laa ne yquiina,

⁵ ni gnab ne gunlay mew; sac zeene rdeed ne xquizh lo me ni rnab ne gunlay mew, rsaṅmbe mew.

None gun Timotē xtsiin Jesús

⁶ Zeene cseed luu grē zha bets ne, zha bzian ne i, pseed zho grē miṅe rne naa lo luu nu, tibaque miṅe nac zhiwseed Dios gūeynal; sac sca no guṅ zha ne squi zo quianap grē zha ne ngab lo Dios.

⁷ Ib yquiaadiagd luu grē cuent gox, grē cuent nxen ne paat rquind; sinque Xtiidz Dios bioxco, miṅ co bloonie guic luu.

⁸ Gzoob ne zha ne rguit, wguit ne run zho, nli rquiina lo zho par gac macis xcuerp zho; per zig nac Xtiidz Dios, mazdraa rquiin dzioxco new; sac mincosi squiina lo ne zigtao lo guielmban riiw, zigtagaa lo guielmban ne naraa dzian new.

⁹ Ne nligaa sca rieguial guṅ miech, ni grēse zho none tsoxco zhow!

¹⁰ Ni gacxe waa, laa ne quia dien zha gliladz zhow, niicle ne nroob grē guielnē ne quiazian ne; sac ible Dios nac men ne rnalo ne, men nguiamban ne rsilaa grēse miech lo dol; sac grēse zha ne dib zdoos rlladz me, rsilaa me zho.

¹¹ Bioxco sca pseed zho grē miṅe rne naa lo luu nu, ni bnee lo zho guṅ zhow.

¹² Nli lēē tib zha nguiegse nac luu, per blu lo zho ganle zha none gban zho: Zeene gnee luu, niowse bguib diidz ne gnee luu, zaacse goc, ine bleynie samech luu, tibaque dib zdoos blu bliladz Xtiidz Dios, ine ndzinli wban; zeena gan zho ganle niicle ne zha nguieg luu, per nixbiini luu.

¹³ Laga gaḷ dze ne glanso naa i, bioxco blab Xtiidz Dios lo grēse zha bets ne, zha bzian ne i, bnee lo zho zha naca, bnee diidz ne conley zdoos zho; zeena ine nguieel gac zho.

¹⁴ Ib csaand luu grē guielbiini ne bneedz Dios lo luu i (guielbiini ne bgaa luu zeene psiaab me guic grē zha ne rnabey lo grē zha ne no xnēz me, pxobnia zho guic luu).

¹⁵ Grēse miṅe rne naa lo luu nu, bioxco; zeena gan grēraa miech ganle zigse zie dze laa luu quiyabiniraa lo Xtiidz Dios.

¹⁶ Bien zaacse goc, bien miṅe nac Xtiidz Dios, miṅ co pseed miech, ib csaand luuw; zeena tedlaa luu lo grētaa guielnē ne no guiaad, ni scagaa haxta grē zha ne rquiaadiag wseed ne rlu luu ni rban zhow, ye zho zlaa zho lo guielnē co.

5

Men wnaa ne gutle tsieel

¹ Grē zha bgui gol ne nac bets ne i, zeene zha rxin zho, bien gactoxd luu lo zho, sinque zaacse bnee lo zho zig nac zeene lo pxoz luu nonee luu; niiclegaa zha nguiega, zaacse goc lo zho, been zho cuent zig tib bets luu.

² Scaque grē men wnaa ne nac zhagol, ndooladz bnee lo me, been cuent lo xnial luu ga zo luu; lo grē wnaa nguiega, ndzinli goc, niowse bnee lo zho, bien ganle rriequia tib bzian luu ga.

³⁻⁶ Grē men wnaa ne gutle tsieel, men ne nliipaa choṅt rapd, to none cteedlo me; totsaque nli Diosse rnalo me, dze guieel tibaque nozodiidznie me Dios. Sac no zho mban zigne notaa guic zho, laa zho zienal loxaque grē ncuaaṅe gdeed guxt xcuerp

zho; zha ne sca ruṅ, rriequia gutle zho ga. Laa tel meṅ wnaa ne scaque gutle tsieel, ni no xpëéd me, no xiag me, dzigo zha none cteedlo me; none cseed zho gaṅ zho menlidz zho, gaṅ zho pхоз zho, gaṅ zho xniaa zho, sac goṅ me pchoob zho. Sca nonguiela, ni scagaa rdziladz Dios.

⁷ Pso diidz rii lo grè zha ne nacgrè to i, zeena cseed zho sca gban zho, ni scagaa tsod pe nace gneenè miech zho.

⁸ Sac zha ne tsoxcod gaṅ zha ne nacgrè zho, ni miṅe mazdraa telne niicle menlidz zho tsoxcod zho gaṅ zho, rdzieeld dzigo guiab zho laa zho riladz Dios, haxta mazdraa nac xtoṅ zho que tib zha ne gard gliladz me.

⁹⁻¹⁰ Ni stiba, grè meṅ wnaa viud qui zha ne rquiablaz guṅ pe xtsiin Dios, bien zha ne psale tsongaṅ iz zha co psëèb lo list. Ni wen wen gocnaṅ telne:

bionie me stib mguì zeene bii zomban tsieel me,
zaacse mban me,
zaacse pchoob me xpëéd me,
dib zdoo me rbèzlo me miech lidz me,
ndooladz rac me lo grè zha ne no xnèz Jesús,
ruṅ me xyudar grè zha ne no lo tib guielné;
ni ruṅ me niapse ncuaaṅ wen ne rquiin lo samiech me.

¹¹⁻¹² Laa grè zha ne bii nguieg, ib yquiaad luu lè zho lo list co; sac nac wnaa nguieg, zeene sob guic zho ctsieelnia zho, laa zho ctsieelnia stib. Loxaque guṅctal zho xtoṅ zho ga, telne glo rquiablaz zho guṅ zho xtsiin Dios ni lozh ga laa zho csaanaquew.

¹³ Ni ye nac wnaa nguieg, rdziladz zho rquiandè zho; ni telne peet dziin guṅd zho, racgbech zho; ni stiba, zeene sca guieṅd pe guṅ zho dzigo laa zho rzhixcuua diidzguizh, laa zho rzëèb lo grè cuent ne rieguiaṅdraa zho.

¹⁴ Gacxe waa, racladz naa grèse wnaa nguieg ne sca ret tsieel, mazd ctsieelnia zho stib; zeena yquiaanap zho xpëéd zho, yquiaanap zho ro lidz zho. Sca yguibd zho tso grè zha ne rlëèniele Xtiidz Jesús, gneenëraa zho zha ne riladza.

¹⁵ Sac goṅ, blale wnaa ne sca gut tsieel zieriee xnèz Dios, leṅ laa zho zienal grè miṅe rnabey menṅox.

¹⁶ Psoladza ganle, tel cho tib zha bets ne, tib zha bzian ne i raclidz tib meṅ wnaa ne gutle tsieel, none zha gaṅ me, laa ne gnalo zho ne to yguib dien zha gdiooṅ me; zeena grè ncuaaṅ ruṅlo to i, zgaaw yquuin grè meṅ ne nlipaa guieṅd cho gan.

Mine rieguiaṅ zha ne zo lo zho

¹⁷ Grè zha ne zo rnabey lo grè zha ne ngab xnèz Dios, zha ne zaacse noyūṅ dziin co, zig nac zha ne tibaque rnee Xtiidz Dios lo miech, zha ne rseedga miech zha naca, tel

palal ncuaaṅ rcaa zho, ible rieguiaṅ ycaa zho chop lalgaw.

¹⁸ Gotsaa gwi ne ganle zha quia lo Xtiidz Dios, rneew: “Code to guieṅ ro xma to, zeene no ma ye noguiits ma zhoxbxtil; jgolsaan gow ma!” Laa stib lugar rnee: “Zha ne ruṅ dziin, ib none ycaa zho miṅe non xtsiin zho.”

¹⁹ Bien goṅ Timoté, zeene guiaad zho lo luu, guiaad-zo zho tib meṅ ne rnabey lo to, ib yquiaadiagd luu miṅe rnee zho, telne gzod zho chop tson zha ne goṅ ne nli been me miṅe rquiaqui zho me.

²⁰ Telne bind me diidz, bii noyūṅ me doṅ co, dzigo squi ndxie grè zha ne nacgrè to, goctox lo me; zeena sca gdzieb grëraa zho guṅscad zho.

²¹ Zig zobwi Dios, zig zobwi Jesús grè xanjil me, laa naa rso diidz lo luu, been miṅe rne naa lo luu nu. Gdzieebd luu, yquiaad zdoo luu, bnee lo zho tel chotaa nac zho.

²² Zeene gzo luu zha ne guṅ xtsiin Dios, guṅd luu ne lega tel chotaa gzo luu; sac goṅ, nend lëèteṅ zha ne rap pe tib falt gzooblo luu, dzigo laa miech guiab nanpaa luu zha nac zho ni rlisquid luu lo zho. Ible gdeete luu diidz guṅ luu ncuaaṅ guṅctal xtoṅ luu.

²³ (Gnid naa togo ible grielodraa guie luu vin, zac guie luu niipyeena maase poc poc, laa ne guie luu niab nis; zeena glunëdraa zdoo luu.)

²⁴ Sac grè zha ne no lo doṅ, no doṅ co znuse rzhoobnen; nogaaw, haxta gaṅ dze ne laa zho gacredz lo Dios, dzigora xoobneṅa.

²⁵ Scaquegaa zha ne ruṅ guieṅwen, no ncuaaṅ co znuse glu; nogaaw, niicle ne rluda niina per ible zdziṅ dze ne laaw glu.

6

Zha ne quiazho xtsiin ben

¹ Grè zha bets ne, zha bzian ne, zha ne lega ruṅ xtsiin ben, none gon zho xtiidz meṅ ne quia zho xtsiin; zeena yguibd zho gneenè miech Dios, gneenè zho Xtiidz me miṅe noseed ne miech.

² Scaquegaa grè zha ne ruṅ xtsiin meṅ ne riladzle Xtiidz Dios, none gon zho miṅe rnabey me zho; led guiabd zho por bets zhow, guṅ zho miṅe racladza zho. Ni gale none tsienie guic zho wenraa grieequia grè dziin ne noyūṅ zho; sac goṅ lo tib meṅ ne no xnèz Dios ga, lo tib meṅ ne rleynie zho ga yquuin xtsiin zho.

Grèse miṅe none naa lo luu nu, pseed grè miech quiw, ni pso diidz lo zho guṅ zhow.

³ Zriequia zha ne guiaadnie stib wseed, miṅe ni nacdraa Xtiidz Jesús; sac zhiwseed Jesús rlu zha gban grè zha ne no xnèz Dios.

⁴⁻⁵ Zha ne sca rlu stib wseed, lega:

tib miech niats ga nac zho,
ible peet riend zho,
ruṅbeyd zho miṅe nac diidzli,

rdziladz zho rdilidiidznie zho miech; ga rlan,
 laa miech rdilla,
 laa miech rlëëlsa,
 laa miech rbidzgolza; rlozh ga,
 rililadzdraa zho pe rnee samiech zho.
 Masaque nan zho telne sëëb zho xnëz Dios,
 nroob dimi ne gunlo zho.

¡Bien ib ctsieelsad luu zha co!

⁶ Parga nli zha ne rzëëb xnëz Dios, zeene
 rzac zdoo zho mine rzoladztaa Dios lo zho,
 tib guielnzaac nroob ga rga zho.

⁷ Ni sca nonguiela, sac gon zeene rlanse ne
 lo guidzliu, peet rlansonied ne; ni scaque-
 gaa zeene laa ne gbi, peet grieelod güey ne.

⁸ Gacxe waa, none sac zdoo ne ni gley ne
 totsaque gneedz Dios ncuaañe gow ne, ni
 ncuaañe gacwxab ne.

⁹ Sac grë zha ne rzoobladz xen nroob
 dimi, no zho rquiiil mendox zho run zho
 ncuaañe ndzinlidraa par gdziniiaa zho dimi
 co; rlozh ga rzhin lo xquielmban zho, haxta
 rnitlo zho.

¹⁰ Sac nac dimi, zeene rzoobladzdox
 miecha, ga rzobni ne laa zho run grë
 guielntseeb. Ndal zha ne ziesaan Xtiiadz
 Dios, sac laa zho zianañ dieñ zha xen zho
 nroob dimi; per rlozh ga, stib stib guielñe
 ne ziedziñ lo zho.

Dib zdoo Timoté gililadz Timoté Dios

¹¹ Sangue luu gon, bien ganle xnëz Dios
 no luu, gund luu grë ncuaañ co. Bioxco
 zaacse wban, tibaque bioxco gban luu
 zigne racladz Dios, dib zdoo luu bliladz
 me, bleyne me ni bleyne samiech luu,
 ndooladz goc lo zho, ni lalnu ib guiaañd
 zdoo luu.

¹² Bleeladz luu been grë dziin ne run zha
 ne dib zdoo rililadz Dios, zigne run zha ne rie
 lo dil, rbeeladz zho zho. Gon ganle, laa luu
 nole nëz ne yгаа luu guielmban ne gdziñd
 dze lozh, ib csaand luu nëz co; sac niicle Dios
 ible min co bzooblo me luu. Psoladz ganle,
 squi ndxie miech bleero luu ne dib zdoo luu
 rililadz luu Xtiiadz Jesús.

¹³ Dios (men ne rdeed xquielmban grëtaa
 ncuaañe no), ni Jesús (men ne ni lalnu
 bdziebd zeene güeyzo zho me lo Pons Pilat,
 bnee me cho nac me); me zobwi ganle

¹⁴ laa naa rso grë diidz rii lo luu, bioxco
 beena zigne no gaca. Tibaque bioxcow
 haxta gal dze ne gbiire guiaad Jesús, men
 ndzon ne rnabey ne.

¹⁵ ¡Ib laa me no guiaad! Ni Dios cxeel me
 zeene laa dze co gdziñ. Dios men nroob ne
 rnabey, men ne rnabey lo grëtaa zha ne nac
 rey, lo grëtaa zha ne rnabey.

¹⁶ Mesi ib gdziñd dze guet me, lo biini
 ne no mew, tsod zha ne glëb gdziñ ga; ni
 tib miech lo guidzliu rii gard gan me, ni
 grieelodgaa gan zho me. ¡Gacxe waa, ible me

none dziuunnon ne, sac gon men non, men
 rnabey nac me! Min co nagon no dziuun ne.

¹⁷ Grë zha ne rapchen, bnee lo zho cseed
 zho gdaannied zho grë ncuaañ rap zho, ib
 gnalod zho grë ncuaañ co; sac gon ncuaañe
 tib rded ga. Dios none gnalo zho, ni mesi
 rneedz me grëtaa ncuaañe wen ne rquiiin ne.

¹⁸ Gudz lo zho gacmbidzd zho, none gon
 zho grë ncuaañe yquiiin lo samiech zho,
 ycad zho ncuaañe quianie zho, ine gon zho
 xyudar zha ne peet quianied.

¹⁹ Zha ne sca gun, tib guielnzaac nroob
 ne yгаа zho; lëë guielnzaac co gan zho len
 dze ne ziaadraa. ¡Ni haxta zгаа zho tib
 guielmban ne gdziñd dze lozh!

²⁰ Timoté, laa naa rbire rso diidz lo luu nu
 gon: ib csaand luu dziin ne bneedz Dios lo
 luu i. Yquiaadiagd luu grë wseed yozh ne
 ziaadnie stib miech, wseed ne rneenë Xtiiadz
 Dios, niicle ne rnee zha ne ziaadniew zha
 rac nac zho, per nliid ne diidzli rnee zho.

²¹ Sac gon, blale zha ne ziesaan mine nac
 diidzli, laa zho zianañ wseed co; per rienñ
 zho lej znu rziaabnëz zho ga.

Dios men ndzon ne rnabey, me noxco
 luu, me gzhixcuaa lo grë zhizhgab luu. Me
 gacniñ luu peet tsienied guic luu.

Pabl

BROP GUITS NE PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiseed naa miech diidz ne rdeed guielmban lo zha ne rzëëb xnëz Jesús.

² Laa naa rxel stib guits rii lo luu i gon xin; xin rne naa lo luu sac rzaac naa luu zig tib xpëëd naa. Miñe racladz naa ni rnab naa lo Dios men ne nac Pxoaz ne, ni lo Jesús men ndzon ne rnabey ne, yquia zdoo me luu, ni me tsoxco grë zhizhgab luu; zeene peet tsienied guic luu.

³ ¡Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacniën me luu! Dib zdoo naa noxco naa zanañ naa miñe rnabey me, zigne bioxcoque grë xmengoldoo naa güeynañ zhow.

⁴ Zeene rsoladz naa blactaa roon luu zeene wbi naa i, zoot naa tebaa zha ganniob naa luu stib; zeena tsonley zdoo naa.

⁵ Ni rsoladz naa scataa dib zdoo luu rliladz luu Dios; lëëdaaque xnanit luu Loid, ni xniaa luu Eunis, ni nanpaa naa scataque dib zdoo luu rliladz luu me.

⁶ Gacxe waa, laa naa rso diidz lo luu pquiin grëse guielbiini ne bneedz Dios lo luu zeene pxobnia naa guic luu, ni bnab naa beenlay me luu. ¡ib csaand luuw!

⁷ Sac gon, laa Dios rneedz zhiEspíritu me lo ne, parne sodziebdraa ne, parne dziapraa ne xfuers me, gleynieraa ne samiech ne, ni tsabiiniraa ne.

⁸ Gacxe nod pe nacne gdzieeb luu, bnee lo miech ganle zha nac Xtiidz Ndzon Jesús; ni niicle gdzieebdgaaluu ne znu nioogyu naa nu, loxaque ne rliladz naa me. Sinque bloo zdoo luu ne ib laa luu no gan grë guielñë rii, loxaque ne quiseed ne miech Xtiidz me, diidz ne rlu ganle zha laa zho lo dol. Ga nagon rquiin fuerz ne rneedz Dios lo ne.

⁹ Gotsaa gwi ne ganle laa me psilaa ne lo grëtaa xtol ne, ni bredz me ne gban ne zigne racladz me. Ni nacda por pe guielwen ne bdziuuñ ne, sac haxta zeene gard cue guidzluu, laa me psañ diidz ne laa me glu ganle pa lotaa rleynie me ne.

¹⁰ Ni niina ne laa me pxeel Jesús (men ne rsilaa miech lo dol), laa me blu ganle ne nli nquialadz me ne. Jesús nac men ne biaadtiche poder ne rap guielgut, ni biaadlu me ganle parne ygaa miech tib guielmban ne gdziñd dze lozh, none gliladz zho Xtiidz Ndzon me.

¹¹ Ible min co nagon nacne bzo Dios naa gne naa Diidz Ndzon rii lo miech, pxeel me naa ga naa grë guiedz zaatne nodraa zha Israel, gaseed naa zho zha naca;

¹² mincoxe waa znutaa grë ncuaañe nodeed naa. Per ni lalnu ib rtoladz naa, sac wen wen nan naa cho nac men ne rliladz naa, ni nan naa mesi zrielo yquiaanap me naa nitnëzd naa haxta gal dze ne laa me guiaad.

¹³ Bien, güeynañ grë miñe pseed naa luu, sac gon min co nac miñe rquiin. Tiblique bliladz Dios, iñe bleynie samiech luu zigne no dziuuñ ne ne nac ne zha ne no xnëz Jesús.

¹⁴ Espiritu Sant men ne nacnie ne, me yquiaanap luu, me gacniën luu ib csaand luu zhiwseed Dios, ib csaand luu dziin ne bzo Dios luu guñ luu.

¹⁵ Nanlaxe luu ganle zha been zha Asia, grëse zho bzozit lo naa; zig nac Figel, zig nac Hermoj, mbe psaan zho naa.

¹⁶ Sangue Onesifr, rnab naa lo Dios yquia zdoo Dios me grë menlidz me, sac blactaa biadchoobladz me zdoo naa. Niicle ne znu nioogyu naa nu, per ib beend me ne ntoladz me niaadgan me naa;

¹⁷ sinque zigne blanso me lad guiedz Roma nu, pquiaguib me naa haxta bdziel naa lo me.

¹⁸ Ni zoladzaxe luu ganle, pe zhistaa been me xyudar ne zeene no ne guiedz Efés i; rnab naa lo Dios yquia zdoo Dios me gal dze ne laa grëse miech gacredz lo Dios.

2

Dziits so Timoté lo Xtiidz Dios

¹ Xin, sangue luu gon tibaque squi dziits bzo lo Xtiidz Dios, gon ganle Jesús noxco grëse zhizhgab luu.

² Grëse miñe gon luu pseed naa miech, scagaa niina bioxco bneew lo zha ne rgobey luu grielo tsie tsieneew lo stib miech.

³ Ib gacmband luu zeene noyan luu grë pe guielñë, sinque bioxco been xtsiin Jesús zigne no gon luuw, masaque been cuent xmenguiib me nac luu.

⁴ Sac gon, tib zha ne nac menguiib, grielod sëëb zho pe stib lo cuent ne nacd xtsiin menguiib, sac none nsin so zho gon zho tel pe nac miñe rnee men ne rnabey zho.

⁵ Bioxco been miñe rnee men ne rnabey ne, zig run zha ne rie tib lo wguut; sac zha co telne tsoxcod zho quit zho zigne nacpaa lo wguut, ycaaniad zho premio.

⁶ Been xtsiin me zigne no gaca, zig run zha ne ran; gon ganle zha ne rioxco ran, zha glopaa rquiin guielnzaac ne rac zaatne ran zho.

⁷ Miñe blozh bzet naa nu, blooniew guic luu, ni Jesús nac men ne gneedz guielbiini lo luu guien luu zha naca.

⁸ Tibaque psoladz ganle cho nac Jesús, zha briequia me lo xtií rey David, ni zha brieaban me; zig nac naa miñ co rzet naa lo miech zeene rseed naa zho Xtiidz Ndzon me, par laa zho lo xtoi zho.

⁹ Ni ne nonecxe naa Diidz Ndzon rii waa, gane nroob guielñe ne noyan naa; zig nac niina, laa naa ngadoo zaatne niogyu naa nu zootne cho zha dox. Ni niicle ne znu niogyu naa nu, sangue Xtiidz Dios led yeda niogyu.

¹⁰ Laa naa quiaxecw miñe quiaeedtaa naa, zeena grése zha ne bzooblote Dios gliladz Jesús, grieelo yquiaadiag zho zha laa zho lo dol, ni zha yгаа zho tib guielmban ndzon ne gdziñd dze lozh.

¹¹ Ni znu gon naca:

Telne xnézle me no ne zeene laa ne guet, ib zгаа ne guiobannie ne me.

¹² Niicle nroob guielñe dzian ne porne rililadz ne me,

scagaa ible dzdiñ ne zaatne gnabeynie me ne;

telne guiab ne runbeyd ne me, scaquegaa me ziab me runbeyd me ne.

¹³ Niicle telne riaanladz ne me, sangue me riaanladz me ne;

miñe rnee me run mew, sac mesi rtsëed me xtiidz me.

Tsoxco Timoté grieequia xtsiin Timoté

¹⁴ Bien, beencsoladz gré zha bets ne i, zha bzian ne i gré miñ rii. Zig zobwi Dios ganle laa naa rso diidz lo luu, gudz lo zho tildiidziedraa zho miech gré godiidz ne paat rquiind; led ncuaañe ndzinlida, loxaque rungüeta guic zha ne rquiaadiaga.

¹⁵ Tibaque bioxco zaacse grieequia xtsiin Dios, miñe noyan luu, zeena wen grieequia luu zeene laa luu gdziñ lo me. Zigne nace Xtiidz me, sca pseed miecha.

¹⁶ Yquiaadiagd luu gré wseed yozh, ncuaañe ni lalnu paat rquiind; zha ne zienal wseed co, zig zie dze laa zho rrozitraa lo Dios.

¹⁷ Lega nac zhiwseed zho zig nac gré guielguidzdox; sac tel guielguidzdoxa, znuse rded miecha ni zha ne glana ible zet zho. Zig nac Himené grop Filet, wseed co rleynie zho,

¹⁸ sac tel zha zienaldraa zho miñe nac didzli; rnee zho bleebanle Dios gré mengut. No palal zha ne rililadzle Xtiidz Dios, zeene ron zho miñ co, rienndraa zho dien pa miñe gliladz zho.

¹⁹ Sangue zha ne nlipaa no xnéz Dios, tsod pe nace griee zho xnéz me sac lole me ngab zho; zigne zhubneeque lo Xtiidz me zaatne rnee: "Runbey Dios cho nac zha ne

nlipaa no xnéz me"; ni rneequew: "Gré zha ne nlipaa ngab xnéz Jesús, none csaan zho grése guielntseeb."

²⁰ Zaatne nac lidz tib zha ricw lëe, no gré xtsiin rotie zho miñe niaa or, miñe niaa plat, ni noquegaa miñe niaa yag, miñe niaa ben. Miñe mazdraa niazh, miñ co rquiin zho rio ncuaañe row miech; laa miñe beelze niaa, ga rgo zho ncuaañe row ma.

²¹ Nac lo guielngueg, ndal gré ncuaañe ndzinlid rio guic miech run zho, sangue luu gon tsienied gré ncuaañ co guic luu, bioxco zaacse wban, dib zdoo luu bnalo Dios, ine bleynie grése samiech luu, tilnied luu zho; gré zha ne squi nli mbe zdoo, rbedz zho Dios, zaacse wbannie zho.

²² Nac lo guielngueg, ndal gré ncuaañe ndzinlid rio guic miech run zho, sangue luu gon tsienied gré ncuaañ co guic luu, bioxco zaacse wban, dib zdoo luu bnalo Dios, ine bleynie grése samiech luu, tilnied luu zho; gré zha ne squi nli mbe zdoo, rbedz zho Dios, zaacse wbannie zho.

²³ Ib yquiaadiagd luu gré godiidz ne paat rquiind, sac gon loxaque runctila miech.

²⁴ Zha ne squi run xtsiin Dios, nodne tso zho dien pe tildiidz zho; sinque none wen gac zho lo grése miech. None guien zho zha cseed zho miech; ib guieednied zho miech,

²⁵ ndooladz gac zho gnee zho lo zha ne rlëenie Xtiidz Dios. Ni scagaa Dios cxobnia guic gré zha co, yguudz zdoo zho csaan zho gré xquielntseeb zho, gacnañ zho miñe nac diidzli;

²⁶ zeena tsaa zho biini griee zho ladznia mendox, zaatne ngadoo zho.

3

Len dze ne ziaadyob nitlo guidzliu

¹ Ni none gacnañ luu ganle, zeene laa dze ziaadyobpaa nitlo guidzliu, nroob nac guielñe ne gan gré zha ne no xnéz Dios.

² Zrieequia gré zha ne: gacladz tebaa lose zho yquuin grëtaa ncuaañe no,

loxaque dimi gleynie zho,

niats gac zho,

zdaannie zho ncuaañe ni rapd zho,

znenë zho Dios,

gond zho xtiidz pxoz zho, xtiidz xnias zho;

sacd zdoo zho miñe gon miech lo zho,

laa zho gban zigne notaa guic zho, ib yquiaadiagd zho Xtiidz Dios.

³ Gacnañdraa zho pe nac guielwleynie, ib yquiad zdoo zho,

loxaque diidz gzhixcuaa zho,

lëbd zho gnabey zho xcuerp zho,

sacsi zho samiech zho,

stdidil zho grése ncuaañe rquiin,

⁴ zgo zho zha ne ndzieeldiidz zho nia zha ne quin zho,

ni lalnu guielto tsod lo zho,

loxaque dien zha gdeed guxt xcuerp zho tso zho, laa ne yguib zho xnéz Dios.

⁵ Squiaalo zho ye zho riladz Dios, per lo grē ncuuaṅe guṅ zho, ga glu ne riladzd zho me.

Biṅ, ib ctsieelsad luu grē miech ne sca nac.

⁶ Sac lēē zha ne nacgrē zho ga, rzēēb yu rietsitnie grē wnaa yozh ne zienal ncuuaṅe gdeedtaa guxt xcuerp.

⁷ Tibaque no zho dieṅ peraa rseed zho, per ib rioguicd zho miṅe nac diidzli.

⁸ Zigne been chop zha ne biṅ diidz dox padzeela, Janes grop Jambres, gocndaan zho lo Moisés; scaque ruṅ zha co niina, rlēēniedox zho miṅe nac diidzli. Miech yozha, ndzinlidraa nac guic zho, nacd zho zha ne gliladz Xtiidz Dios;

⁹ per gacdaquew xtse, zeṅe laa diidz guiṅ gaṅle pe clas miech nac zho, dzigo lēēque grē ncuuaṅe yozh ne ruṅ zho cuee xquielto zho; zigne bzhaacaque zha ne sca blēēnie Moisés.

Csaand Timoté miṅe pseed me

¹⁰ Saṅue luu, naṅle luu gaṅle zha nac grē miṅe pseed naa luu. Wen wen naṅ luu gaṅle zha mban naa, pe no guic naa guṅ naa, zha dib zdoo naa riladz naa Dios, zha dib zdoo naa rleynie naa samiech naa, riednied naa zho.

¹¹ Naṅle luu gaṅle zha rneedz Dios xfuers naa, rlēēb naa grētaa miṅe rteed miech naa, zig been zho naa guiedz Antioqui, guiedz Icon ni Listr; blactaa pquianal zho naa; per tibaque gocnie Dios naa, psilaa me naa lo grētaa guielxtseeb co.

¹² Ni scagaa naca, grē zha ne rquiabladz gban zigne rnabey Jesús, ible squianal miech zho.

¹³ Per probsaxe grē zha ne sca quiaayunctal xtoṅ, zha ne sca noquidie miech, zig zie dze laa zho noteedquie zho nēz ne nitlo zho. Quiaquitnie zho miech, ni quiaquitniegaa menḁox zho.

¹⁴ Saṅue luu goṅ, csaand luu grē miṅe pseed luu. Naṅween luu gaṅle diidzliw, ni ruṅbeygaa luu cho nac grē zha ne bneew lo luu.

¹⁵ Ni stiba, zigne ziadroob luu psilo quiaaseed luu Xtiidz Dios, ni lēēw bdixbiini guic luu gocnaṅ luu ne Jesús none gliladz miech parne laa zho lo doṅ.

¹⁶ Dib nace Xtiidz Dios, Espiritu Sant psi-aaba guic zha ne pquiaaw, laaw biaan: rseeda ne miṅe nac diidzli,

rsoew diidz lo ne guien ne pa lo quiaxiṅ ne, rseeda ne zaacse gban ne.

¹⁷ Zeṅa sca grēse zha ne no xnēz Dios, grieelo wen wen cseed zho, ni guiṅ zho zha guṅ zho grēse dziin ne rquuin, dziin ne rieguial zho guṅ zho.

4

None gnee Timoté Xtiidz Dios

¹⁻² Zig zobwi Dios, zig zobwi Jesús men ndzon ne rnabey ne, laa naa rso diidz lo luu, bnee Xtiidz Dios lo grēse miech. (Jesús nac men guṅquizh miech grētaa ncuuaṅe been zho, zigtaa zha ne mbana zigtagaa zha ne gutlew, zeṅe gdziṅ dze ne laa me guiaad gnabey me.) Bioxco tel pa hortaa bneew lo zho, niicle zeṅe rzac luu riobda. Bloo guic zho gliladz zhow, bnee lo zho zeṅe gan luu pe falt ne noyūṅ zho, ni scagaa bloonley zdoo zho. Bioxco tibaque pseed zho, ib guieednied luu zho.

³ Sac goṅ, zdziṅ dze ne siguielḁraa miech yquiaadiag zho miṅe nac diidzli; sinque laa zho yquiaaguib zhaase zhaase dieṅ cho cseed zho tel pe nac ncuuaṅe rdziladzse zho yquiaadiag zho.

⁴ Gleynied zho Xtiidz Dios, laa ne yquiaadiag zho miṅe nac xtiidz me, lel laa zho tsoxco yquiaadiag zho grē miṅe nac zhiwseed miech guidzliu.

⁵ Saṅue luu goṅ, nsin bzo gdeete luu diidz gungüet zho luu. Zaacse been grē miṅe pso Dios luu guṅ luu, bnee lo miech zha laa zho lo doṅ; niicle tel pe nactaa guielḁne ne noded luu, gacmband luu.

⁶ Rien naa ziaadyoble ne laa naa gbi lo guidzliu rii, zhile gdziṅ dze ne laa zho gut naa.

⁷ Leṅ ngbidz ne wban naa, tibaque dib zdoo naa bliladz naa Dios; xtsiṅ mew, laaw beṅ naa zigne bnabey me naa, ni laaw psiaalḁaa naa niina. Zigne ruṅda grē menḁuub ne rie lo diṅ, sca bleeladz naa naa beṅ naa xtsiṅ me;

⁸ laa na nagon, miṅe quiambēzse naa nac premio ne no gneedz me lo naa. Lēē premio co gneedz me gaṅ dze ne guiaad me guiaadguṅ me guielwxtis; ni led loxaque naadse ygaaw, sinque grēse zha ne rleynie me, grē zha ne dib zdoo quiambēz gdziṅ dze ne guiaad me stib, grēse zha co ygaa premio co.

Tsieniob Timoté

⁹ Bzhiguiel guiaadniob luu guiaadgaṅ luu naa nu;

¹⁰ sac zig nac Demas, laa me bichele lo naa. Psaṅaque me naa nu laa me zie nēz Tesalónica; sac mazdraa nonie grē ncuuaṅe lo guidzliu rii guic me. Bay zig nac Crescent, laa me brieē zie me nēz Galás; Tit na, zieegaa nēz Dalmás; laa zho zie zaatne nacle diidz tsie zho.

¹¹⁻¹² Niicle Tic guienḁ nu, sac laa me pxel naa zie me Efés. Loxaque Lucse biaan lo naa nu.

Psoladz goṅ tsieguib luu Marcw, zeṅe laa luu guiaad nēz rii bzhiguiel guiaadnie

luu me; sac rquiin me nu gun me xyudar naa lo xtsiin Dios.

¹³ Ni psoladzpa guiaadnie luu lar ne rbiix naa, mine psan naa guiedz Troas lidz Carp; ni guiaadnie luu grè xquits naa. Ib guiaanladz luu mine nac grè guits nroob ga.

¹⁴ Tel gan luu ganle nzian ncuaane nonguiel draa been Lejandr naa, men ne nac wncadzguiib ga; per Diostaa nan zha gunquizh me Lejandr grè mine been Lejandr ga.

¹⁵ Ni niicle luugaa gon, nsinaque bzo lo me; sac ne nlipaa rlëenie me wseed ne nolu ne lo miech nu.

¹⁶ Zeene glopaa gocredz naa lo wxtis, choot bzëd nriee xfavor naa, grëse zho biche lo naa; rnab naa lo Dios gunquizhd me zho mine been zho, sca psaan zho naa.

¹⁷ Sangué men ndzon ne rnabey ne psaand me naa, me pchoobladz zdoo naa, haxta bdeeda diidz bnee naa Xtiidz me lo grè zha zit rii. Sca gocnien me naa, gun naa cuent role meedz psilaa me naa;

¹⁸ ni niicle niinagaa, nanle naa ne ib silaa me naa lo grëtaa ncuaane racladz miech cteed zho naa, ni me yquiaanap naa haxta gal dze ne laa me gdziñnie naa zaatne rnabey me gbaa. ¡Me riegual guiaan non gzataa dze, niicle nadzew, gzhew, ni grëragaa len izdoo ne ziaada!

¹⁹ Bzhiguiel bdeed tib zhibdiuzh naa lo Aquil i grop Priscil, ni lo grè zha ne no lidz Onesifr.

²⁰ Gacnan to ganle, laa bets ne Rast biaan Corinth, laa Trófimo biaan guiedz Milet, sac rzacné me.

²¹ Bioxco gon guiaadniob luu, zeena blansole luu nêz rii zeene laa mëe nal sëeb. Pcaania zhibdiuzh Eubul, zhibdiuzh Pudent, zhibdiuzh Lin, zhibdiuzh Claud; ni grëragaa zha bets ne, zha bzian ne, zha ne no nêz rii, laa zho rxeel bdiuzh lo luu.

²² Jesús men ndzon ne rnabey, me gacnie luu. Dios glu lo to ganle pa lotaa noxco me to. ¡Me gunlay to grëse to!

Pabl

GUTS NE PXEEL PABL LO TIT

†Diuzh Tit!

¹ Naa nac Pabl, tib ngundziin win nac naa lo Dios, tib zha ne pxeel Jesús nonee Xtiidz Ndzon me lo miech. Laa naa none xtiidz me, zeena grëse miech ne bzooblote Dios, gliladz zho me, gacnan zho zhapaa nac wseed ne zional ne (wseed ne rnee zha none gbannie miech Dios),

² wseed ne rlu ganle ible laa ne quiambi-aaz yгаа ne tib guielmban ne gdziindraa dze lozh. Ansrāa ne tsaa guidzliu, laa Dios bzeetle ne laa me gneedz guielmban co, ni mesi gon led yed me rquidie.

³ Ni niina ne laa dze co bdziin, laa me blu lo ne ganle zha nac xtiidz me, mincopaa nagon bzo me naa none naa lo miech. Lëe me ga nac Dios ne psilaa ne lo dol.

⁴ Laa naa rxeļ guts rii lo luu gon Tit. Rzaac naa luu zig tib xpëed naa, sac nan naa nli dib zdoo luu rililadz luu Dios zigne rililadz naa me.

Rnab naa lo Dios men ne nac Pxoz ne, ni lo Jesús men ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

⁵ Rsoladzaxe luu ganle, zeene psan naa luu lo guidzliu win ne lë Cret i, laa naa psan luu zeena lozh gon luu grëraa dziin ne no gac i, ni psan naa diidz lo luu zha gzo luu zha ne so gnabey lo grë zha ne rililadz Jesús, tib tib guedz qui.

⁶ Bien sca, zeene gon luu zha co, ga rquiin: tib zha ne zaacse mban, zeena peet glisquid miech lo zho;

tibaque wnaa ne mbannie zho, men ne nacse tsieel zho,

zaacse quiachoob zho xpëed zho, rililadz mëed Dios (zëëbd diidz pe guielntseeb ne noyan mëed, o rondgaa mëed diidz).

⁷ Sac zha ne sca so lo grë zha ne no xnëz Dios, ib none gac zho tib zha ne ndzinli mban, sac gon xtsiin Dios ga gon zho. Nodne gac zho:

zha nlëëguic,
zha ngonziu,
zha nad ron diidz,
zha nguibdil,
zha ne rzonaļ dimi.

⁸ Sinqe none gac zho tib zha ne: ndzinli nac guic,

ine niowse rdeed zho zaatne rbëz miech ne rdziinta lidz zho,

rioxco zho run zho niapse ncuane rquiin lo samiech zho,

zianaļ zho gac niapse mine nac diidzli,

rioxco zho run zho niapse mine rnabey Dios,
rrieelo zho rnabey zho guic zho, rnabey zho xcuerp zho.

⁹ Ni none tibaque tsienal zho mine nac Xtiidz Jesús, mine pseed zho; zeena guien zho zha gnee zhow lo grë zha ne gard tsoguic zha naca, ni grieelo zho glu zho lo grë zha ne rlëenie Xtiidz Jesús, guien zha co nonguielga glëenie zhow.

¹⁰ Sac no ndal grë zha ne nëd gon Xtiidz Jesús niina, ncuane paat rquiind rseed zho miech, rquidie zho; ni lëepaa zha ne sca run nac zha Israel.

¹¹ Gacxe waa, ib none guioog ro zho; sac gon par cueexlëse zho dimi no zho noseed zho miech grë ncuane paat rquiind; zaatne no tib yu miech, grëse zho rquidie zho.

Bien sca gon nsin bzo lo grë zha Cret i. Sac gon,

¹² tib menladzaxe zho, tib men rac lo zho bzeet ganle zha nac zho zeene znu bnee me: “Nandraaque zha Cret, loxaque noquidielsa zho samiech zho. Masaque mban zho zigne mban grë ma ntseeb ne no guix; loxaque gowse zho zienie guic zho, rbech zho gon zho dziin.”

¹³ Ni nligaa sca nac zho. Gacxe waa, bien gdziguend luu grë mine run zho, goctox lo zho zeena sodziits zho lo Xtiidz Ndzon Jesús mine no gliladz zho.

¹⁴ Bnee lo zho yquiaadiagdraa zho beelze pe grë godiidz ne rbeebey zha Israel, ni niicle yquiaadiagdga zho grë mine rnabey zha ne rlëenie Xtiidz Ndzon Jesús.

¹⁵ Golgan ganle, grë miech ne ndzinli nac guic, zha ne mbe xquielrien, ncuane notaa, mbe naca lo zho; sangue zha ne rililadz Xtiidz Dios, zha ne ndzinli nac guic, tsod tib ncuane mbe glulo lo zho; sac desde zdoo zho, desde xquielrien zho mbed.

¹⁶ Rnee zho runbey zho Dios, per rlu nli da sac ndzinli mban zho. Zha yozha, xquielndaan yozh zho zienie zho, led zha ne guiabd ne gon ncuane yquiina.

2

Znu nac Xtiidz Ndzon Jesús

¹ Sangue luu gon, none gnee luu lo grë miech qui zigne nacse Xtiidz Jesús.

² Grë men bgui ne nac zha gol lo to i, bnee lo zho:

tibililadz gac zho,

gund zho ncuane cuee xquielto zho,

quix zho biini, ncuane ndzinli tsienal zho gon zho;

tiblique gac zho lo Xtiidz Jesús,

gleynie zho samiech zho, ni

dziits so zho tel pe nactaa grë guielne ne noyan zho.

³ Scaquegaa grè meṇ wnaa ne nac zhagol, bnee lo zho:

gban zho zigne no gban zha ne nole xnēz Dios,

gzhixcuaad zho diidzguizh,

gzudzd zho.

None zaacse gac zho,

⁴ zeena zha glu lo grè wnaa nguieg zha gban zho. Cseed zho grè wnaa nguieg:

gan zho tsiel zho,

gan zho xpēèd zho,

⁵ gac zho tib wnaa nix biini,

quitnied zho tsiel zho;

zaacse guṇ zho xtsiin zho,

niowse gac zho, niowse gnee zho,

gon zho xtiidz tsiel zho; zeena tsod pe nacne gneenē miech Xtiidz Dios.

⁶ Ni scaquegaa bnee lo grè zha bgui nguieg, gac zho zha nix biini.

⁷ Luuzhal zaacse beṇ grēse ncuuaṇe no guṇ luu, zeena ga gwi zho ganle zha none gban zho. Zeene cseed luu zho, iṇe tibiladz goc, guṇd luu ne quitnie luu zho.

⁸ Bguib diidz ne gnee luu, zeena choot peet glisquid lo luu; ni scagaa, grè zha ne rliēnie Xtiidz Jesús, stoladz zho zeene gan zho guieṇd pe glisqui zho lo ne.

⁹ Grè zha ne lega ruṇ xtsiin beṇ, pso didz lo zho gon zho xtiidz meṇ ne quia zho xtsiin, niowse gac zho, niowse gnee zho, yquiabrod zho lo me.

¹⁰ Ib cuand zho, sinque iṇe ti miech mbe lo gac zho; zeena ga gan miech ganle zha niowtaa nac lo xquielmban zha ne zianal Xtiidz Dios, meṇ ne psilaa ne lo dol.

¹¹ Grè diidz rii nagon pso lo zho. Got-saa gwi ne ganle zha noxcotaa Dios miech, gacxe psilaa me ne lo dol waa;

¹² sac laa me racladz csaan ne grēse guielntseeb, csaan ne grētaa ncuuaṇe rleynie zha ne nod xnēz me, guieṇ ne ndzinli gban ne, tibaque gwi ne dieṇ pa miṇ wen, pa miṇgaa wend, iṇe dzioxcō ne gban ne zigne racladz me.

¹³ Sca none gban ne, haxta dzianlo ne gdziṇ dze ne laa Jesús guiaad stib, zigne psanle Dios diidz; gal dze co, laa me guiaad con grè xquielndzon me. Me nac Dios ro ne riladz ne, me psilaa ne lo dol.

¹⁴ Sac gon, me bgaadz guielgut ne nioguaial ne, me bdiizh grētaa guielntseeb ne bdziuuṇ ne, psanmbe me ne lo grētaa ncuuaṇe bdziuuṇ ne; gane niina, lo me ngab ne, ni none dzioxcō ne gban ne zigne rnabey me.

¹⁵ Grè miṇ rii nagon pseed grè miech qui, bnee lo zho gban zhow. Zeene riegala gdziebd luu goctox lo zho, sac gon luu rieguaial gnee lo zho. ¡Sca beṇ, zeena choot quitnied luu!

3

Znu rieguiaḷ gban zha ne no xnēz Dios

¹ Beṇcōsoladz zho ganle none gon zho miṇe rnee grè zha ne nac wxtis, gac zho tib zha nguzobdiidz, ni ib soliaadzdz zho guṇ zho grè tel pe ncuuaṇe yquiiṇ lo samiech zho.

² Guieṇ zho gneenēd zho samiech zho, iṇe zaacse gbannie zho samiech zho, niowse gac zho, niowse gnee zho, ni zeene cho lo gnee zho none ndooladz gac zho, ndooladz gnee zho.

³ Sac gon haxta ne, ib peet riend ne glo, ntseeb goc ne, bdiits ne grè miṇe rnabey Dios; laa ne ziole nēz ne nitlo ne hor co, masaque bgadoo ne lo grētaa ncuuaṇe racladz xcuerp ne, lo grētaa ncuuaṇe ndzinlid ne bley ne bdziuuṇ ne. Niapse guielntseeb bional ne, nē rac zdoo ne rdzian ne ncuuaṇe quianie, ncuuaṇe ruṇ stib miech; zigtaa row rzhiih zdoō zho gon zho ne, scaque ne, zha ne rdziantaa ne, row rzhiih zdoō ne bdzian ne zho.

⁴ Per bdziṇ dze, zeene laa Dios (meṇ ne psilaa ne lo dol) blu ganle pa lotaa nac xquielwen me, pa lotaa nquialadz me miech,

⁵ laa me psilaa ne; per guiabd ne togo por pe ncuuaṇe wen ne bdziuuṇ new, sinque porne pquia zdoo me new. Psanmbe me ne lo grētaa xtol ne, rrieequia gol ne ga stib, ni bzhixcuaa Espiritu Sant lo xquielmban ne.

⁶ Niapse por Jesús meṇ ne psilaa ne ga, laa Dios pxeel Espiritu Sant rneedz me grēse guielbiini ne rquiiṇ lo ne.

⁷ Por miṇe beṇ Jesús ni miṇe beṇ Espiritu Sant laa ne biaanwen lo Dios; ni porne noxcō me ne gane bnabey me sca goca. Gane niina, ndion ne ib zгаа ne tib guielmban ne gdziṇd dze lozh, sac ib sca nac xtiidz me.

⁸ Miṇe rne naa lo luu nu, diidzliw. Racladz naa tibaque gnee luuw lo grè zha qui, zeena grēse zho ne nac zho zha ne riladz Dios, tsoxcō zho guṇ zho niapse grè ncuuaṇe ndzinli; sac gon, miṇ co nac miṇe nonguiel, ni miṇcogaa rquiiṇ lo grēse miech.

⁹ Biche lo zha ne racladz tildiidznie luu grè ncuuaṇ paat rquiind, zig nac grè godiiz dieṇ pe beṇ grè mengol padzeela, dieṇ pe nonguiel tsienal ne ley, te nonguielda ye. Ncuuaṇ paat rquiind ga, loxaque runctila miech; ni lalnu rieguiaḷd gaquieta.

¹⁰ Tel cho zha ne rsilo rgodiḷ grè zha ne riladz Dios, blisquiw lo zho. Bnee lo zho tib, tel gan luu rond zhow, bnee lo zho stib; telne rondaque zhow, dzigo bzonēz zho gan zho dieṇ pa nēz tsie zho.

¹¹ Zha ne sca ruṇ, gase rlu ne zienedraa guic zho gon zho miṇe rnabey Dios; sac nanpaa zho dol ga, ni laa zho ruṇa.

¹² Laa naa no cxel tib zha ne guiaad i, yase cxel naa Artem o cxeelgaa naa Tic.

Zeene glanso zho i, siguieel luu guiaad luu Nicópolis ga gdieel ne; sac ib ga ni naa cuéz naa len mée nal ne ziaad nu.

¹³ Laga no luu i, bioxco zaatne grieelotaaw been xyudar Apol grop me licenciad Zenas. Bdeed grê tel pe ncuane yquiin zho nêz; zeena peet gunfalte lo zho, grieelo gdziñ zho zaatne no tsie zho.

¹⁴ Grêse zha ne nacgrê ne ne riladz ne Jesús, none cseed zho gun zho xyudar zha ne no liaadz; glu zho ganle rquiin zho, led zhléd mban zho.

¹⁵ Grêse zha ne no lo naa nu, laa zho rxeel bdiuzh lo luu i. Bzhiguiel bdeed tib zhibdiuzh no lo grêse zha ne rleynie no i; sac ye zho riladz Jesús.

Guiaanne Dios to sca dien. Peet tsienied guic to, me gacniñ to; sac gon me noxco grêse zhizgab to.

Pabl

GUITS NE PXEEL PABL LO FILEMÓN

¡Diuzh Filemón!

¹ Naa nac Pabl, laa naa no ladzguiib nu loxaque ne quiayun naa xtsiin Jesús; grop no Timoté laa no rquia guits rii.

Laa no rxeela lo luu gon Filemón, ne nli-gaa rleynie no luu squi ye luu noyun xtsiin Jesús.

² Laaw ziaad lo to i gza to bzian ne Apia, bets ne Arquip tib zha ne noyunaque dziin rii, ni gréaa zha bets, zha bzian ne rcaalsa lidz luu i.

³ Dios, men ne nac Pxoze, ni Jesús men ndzon ne rnabey, me glu ganle pa lotaa noxco me to, zeena peet zhgab ctsebde to.

⁴ Ib riaanladz naa luu, zeene rzodiidznie naa Dios, tibaque rded naa xquizh lo me squitaa noneedz me guielbiini lo luu.

⁵ Sac ziyonle naa squitaa dib zdoo luu riladz luu Jesús, rleynie luu me, ni scaque rleynie luu gré zha ne ngab lo me.

⁶ Rnab naa lo Dios, grése mine noseed luu gré zha ne no i, tsoguc zhow, zeena yгаа zho grése guelz naac ne rdeed Jesús lo gré zha ne ngab lo me.

⁷ Rley naa gon bets, sac zigtaa naa zig-tagaa gréaa zha ne ngab lo Diosa, blactaa ziechoobladz luu, zigonley luu zdoo no, rlu luu ganle nli rleynie luu no.

⁸ Niicle ne rieguiala gnabey naa luu mine racladz naa gun luu, sac gon Jesús bzo naa none naa Xtiidz me,

⁹ per gnabeyd naa luu, sinque laa naa rnab lo luu yquiaadiag luu ganle zha racladz naa; sac gon ndion ne zigne rleynie naa luu, scaque luu rleynie luu naa. (Gon ganle, meŋgol ne nac Pabl nu nonee lo luu, laa naa nioogyu nu loxaque ne quiayun naa xtsiin Jesús.)

¹⁰ Niina gon ne laa Onésimo glanso lidz luu i stib, bzhiguel zaacse pcaania me, gon ganle rrieequia mēed nac me lo naa niina, sac nu len ladzguiib nu bne naa Xtiidz Dios lo me, xquizhgaa Dios bliladz mew.

¹¹ Nli glo tib zha peet xtsiind nac me lo luu, sangue niina gon, zigtaa lo luuw zigtagaa lo naaw nroob yudar ne gun me.

¹² Laa me biire ziaad lo luu i, niowse pcaania me; masaque been cuent naa i zial i.

¹³ Gocladz naa mbéz me lo naa nēz rii, zeena me niun dziin lo naa nu xcuent luu, ne znu nioogyu naa nu loxaque ne noseed naa miech Xtiidz Ndzon Jesús.

¹⁴ Per gocladz naa niunga naa mine no guic naa, ni nand naa dien pe gné luu; gane

ni naa mazd telne zrieelow, per zdoo luu gala.

¹⁵ Nli laa Onésimo biche lo luu palal dze; per niina ne laa me glanso lo luu stib, lēē guiaaŋle me lo luu i.

¹⁶ Per bien gon, sacdraa luu me niina zig tib zha ne runse xtsiin luu, gon ganle rrieequia tib bets luu i, tib zha ne nziuu lo luu i nac me. Tel naa, sca rzaac naa me, gacxe waa none gleynie luu me; sac gon tel niina, led loxaque tib ngundziindse nac me lo luu, sinque ye tib bets luu nac me, sac gon ye me ngab lo Dios.

¹⁷ Telne nlipaa rzac luu naa zig tib bets luu, porne tibaque men ne riladz ne, nana sca been cuent naa i zial i, pcaania me zig nac zeene naa glanso lidz luu.

¹⁸ Ni tel no pe guielqui ne been me lidz luu, tel pe zēēbgaa me lo luu, lo naa bnaba.

¹⁹ Wi ganle, naazhal pquia diidz rii nu: Naa quizha. ¡Zig nac luu, gon ganle zēēble luu lo naa, ni haxta nroobraa zēēb luu! Sac gon, naa bnee Xtiidz Dios lo luu laa luu bgaa guelmban ndzon ne gdziind dze lozh.

²⁰ Sca gon bets gaca, bzhiguel been guelz naac co; bloonley zdoo naa, bien ganle tibaque lo men ne ngab ne.

²¹ Laa naa pxel guits rii lo luu, sac rien naa ible zon luu mine rne naa lo luu nu, rgobey naa haxta nroobraa mine gun luu lo mine rnab naa.

²² Lēē nēzle nu rnabaque naa lo luu, siguiel luu gneedz luu lidz luu cuéz naa zeene laa naa guial i; sac rien naa ib zun Dios mine quianab to lo me, zneedz me diidz guial naa guialgan naa to.

²³ ¡Dios guiaaŋnie luu sca! Pcaania zhib-diuzh Epafir, men ne nioogyunie naa len ladzguiib nu loxaque ne rdziun no xtsiin Jesús.

²⁴ Scaquegaa zla zha ne quidziungza no dziin, zig nac Marcw, Ristarc, Demas ni Luc, gza zho laa zho rxeel bdiuzh lo luu.

²⁵ Jesús men ne rnabey ne, me glu ganle pa lotaa noxco me luu. ¡Me gunlay luu!

Pabl

GUITS NE BEY LO GRĒ ZHA ISRAËL

¹ Padzeela, ndal vuelt bnee Dios lo grĕ pxozgoldoo ne, pxeel me grĕ zha ne biadteed xtiidz me lo zho, bnabey me grĕ zha co zhaase zhaase mod ne bnee zho.

² Sangue niina, Xpĕĕdpaa me Jesús pxeel me biadnee xtiidz me lo ne. Jesús men ne bzaagrop me grĕtaa ncuaaŋe no, ni men ne bzo me gnabeya grĕsew.

³ Zeene biaad Jesús lo guidzliu, me blu ganle zha ndzontaa Dios, zhapaa nac Dios, sac Dios nac me; me naaz grĕtaa ncuaaŋe no, ni por xtiidz me laaw quiaayun dziin. Ni zeene blozh bdiizh me xtol ne, dzigo laa me biire zey gbaa bzob me cue Dios, zaatne rieguial me ne nac me men ne rnabey.

⁴ Ga rlu ganle men nroob nac Jesús, led lega lĕd me Xpĕĕd Dios; men nroob nac me lo grĕ anjl.

⁵ Ni tib lo anjl bneed Dios zigne bnee me lo Jesús, zeene rĕb me: "Xpĕĕd naa nac luu. Desde nadze laa zho gunbey ne Xpĕĕd naa nac luu." Stib vuelt zeene bzeet me Jesús, rĕb me: "Xpĕĕd naa nac me, naa nac Pxož me."

⁶ Ni zeene biaad Jesús lo guidzliu; men ne nac Xpĕĕdpaa me ga, rĕb me: "Grĕse xanj naa, none yquitsgzhib zho lo me."

⁷ Zaatne raquiet anjl, rneew: Tib mandadse nac zho lo Dios, pale zigne rzhooŋ me sca rzhooŋ zho rie zho zaatne rnabey me zho; me rnabey rlu zho zigne rlu bel.

⁸ Sangue zaatne raquiet Xpĕĕd me, rneew: Dios, luu nac men ne zobnabey, ni gdzind dze ne griece luu; zeene ruŋ luu guielwxtis, zigne rieguiala sca ruŋ luuw.

⁹ Ni palal rdziguiend luu grĕ guielntseeb, niapse ncuaaŋe ndzinli, ncuaaŋe nonguiel, min co rleynie luu; min co gane bzooblo Dios luu, nac luu men ne rnabey, luu nac men ne mazdraa nroob guielbley bgaa.

¹⁰ Laa stib lugar rnee: Men rnabey nac luu, luu bzaa guidzliu, luu bzaa gbaa dib nacsew.

¹¹ Nli zdziŋ dze nitlo grĕ ncuaaŋ co, grĕsew zlozha zigne riozh grĕ lar,

¹² dzigo laa luu ctibĕda, zig rdibĕd grĕ lar, laa luu cuee stib min cub; zigne ruŋ zha ne rtsĕĕxab.

Sangue luu, tibaque nac luu, nacd luu men ne nitlo, nacd luu men ne lozh xquielmban.

¹³ Haxta rĕb Dios lo me:

Cue naa nĕz derech, nu bzob, nieeda lozh gnaz naa zha ne rĕĕ lo luu, csan naa zho ladznia luu.

Nligaa men nroob nac me lo grĕ anjl, sac ni tib lo anjl bneescad Dios.

¹⁴ Lo me ga sca bnee Dios, sac gon grĕ anjl, mese nac zho ruŋ zho dziin lo Dios, rxeeel me zho rquianap zho zha ne nacle diidz laa lo grĕtaa guielnĕ ne csaab me.

2

¹ Gacxe nagon waa, gotsaa guien ne ganle ib none dzioxcō ne wen wen gwi ne zha nac Xtiidz Ndzon Jesús mine zidzion ne; zeene gnitnĕzd ne.

² Sac gon, niicle zeene xanjlse Dios biadteed xtiidz me lo miech padzeela, ni gonnona; grĕse zha ne güeynalda, pteed Dios zho caxtigw ne rieguial zho.

³ ¿Pe lelque niina dzigo ne Jesús zhal biadnee zha laa ne lo dol? ¿Zha dien tedlaa ne lo caxtigw, telne dzioxcod ne mine rnee me? Nli zha ne binlew zha co biadneew lo ne, per me nac men ne psilo bneew;

⁴ niicle Diosgaa, blactaa grĕ ncuaaŋe quialu me, blactaa grĕ milagr ne ruŋ me, rlu me ganle ne nli diidzli biadseed zho ne; ni zhaagaa grĕ guielbiini ne ral zdoo me rdeed Espiritu Sant lo grĕ zha ne dib zdoo rnaló Jesús.

Jesús nac men ne grieelo gdzinnie miech lo Dios

⁵ Zig nac lo guidzliu cub ne ndion ne naraa gneedz Dios, psanđ me ne anjl gnabey low.

⁶ Lo Xtiidz me zhoobnee ganle zeene znu rĕb David lo me:

¿Cho nac miech ne squitaa noxcō luu zho? Zig nac tib men qui, ¿pe nacne squitaa ruŋnon luu me?

⁷ Tib blase dze psanwin luu me palal lo grĕ anjl; na laa luu psanglaa me stib, beennon luu me, bzo luu me mele gnabey.

⁸ Grĕtaa ncuaaŋe no, laa luu psana ladznia me.

Nli gard gac grĕ mine bnee David ga,

⁹ per ndionle ne ganle zha psanwin Dios Jesús lo grĕ anjl tib bla dze, ni blozh ga zeene laa me gut xcuent ne grĕse ne, hor co laa Dios biire psanglaa me, laa Dios biire beennon me. Ni nligaa noxcō Dios miech, nquialadz me ne, gane bdeed me diidz gut Jesús psilaa me ne lo grĕse xtol ne.

¹⁰ Ible sca gocladz Dios, men nroob ne bzaa grĕtaa ncuaaŋe no, ible me bdeed diidz scataa grĕ guielnĕ ne gon Jesús; gane niina, Jesússe nac men ne grieelo ner lo grĕtaa miech guizhiu ne no ygab lo me, gdzinnie Jesús zho lo guielndzon ne no me.

¹¹ Grĕse ne ne nac ne zha ne psanmbe Jesús ngab ne lo Dios, yele ne nac meĕd lo Dios.

Gacxe waa, rley Jesús rnee me bets me nac ne;

¹² no tib lugar lo Xtiidz Dios zaatne raquiet zeene znu rëb me:

Zne naa lo grë bets naa, gacnan zho ganle cho nac luu;

ni zeene ycaalsa zho grë zho, tipse dzioolnie no luu.

¹³ Stib vuelt rëb me:

Dios nac men ne rnalo naa.

Ni rëb me:

Laa naa nu, quiaacnie naa grë zha ne nac xpëed Dios.

¹⁴ Min co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psanwin me mendox, sac glo masaque ladznia ma no miech par gnitlo ma zho.

¹⁵ Sca psilaa me grë miech ne ngadoo lo guielgut; rrieequia ngadoo zho, sac tibaque nonie xtseb guielgut guic zho.

¹⁶ Ni wen wen ndion ne ganle, zeene biaad Jesús, biaate me par gacnie me grë anjl, sinque laa me biaad par gacnie me grë zha ne no ygab lo Dios.

¹⁷ Gacxe waa, goc me zig nac miech, zigne nac ne ne nac ne bets me; ni parne scagaa grielo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grëtaa xtol ne;

¹⁸ nroob nac grë guielnë ne bded me, pquianal mendox nquii ma me niab me lo dol. Ni ne mezhal bded grë min co, nanpaa me zha rzac zha ne nodeda, gane ible zacnien me zho.

3

Gunndipde to zdoo to

¹ Bets, bzian, to ne nac to zha ne bredz Dios ngab to lo me; golguien cho nac Jesús, men ne pxeel me biadteed xtiidz me lo miech, men ne bzo me nac pxoz nroob ne rnalo ne niina.

² Tib men nguzobdiidz brieequia Jesús lo Dios, zigne nguzobdiidzaque brieequia Moisés zeene pquianap me grë zha Israel.

³ Per Jesús nac men ne non, sac gon lo me ngab grë miech co, laa Moisés loxaque pquianap me zho.

⁴ Zig nac zha ne rzhixcuaa tib yu, nli non zho, per mazdraa non men ne bzaa grëtaa ncuaa ne; ni lëe men co nac Dios.

⁵ Nli bin Moisés diidz been me xtsiin Dios, per laa me gocse zig tib ngundziin pquianap me grë zha Israel co, ni pteed me xtiidz Dios lo zho.

⁶ Sangue Jesús, Xpëed Dios nac me, ni me rnabey grëse zha ne ngab lo Dios. Ni grëse ne, ne nac ne zha ne no xnëz me, lo Dios ngab ne; totsaque ine nley gac ne dib zdoo

ne yquiambiaaz ne gac grë mine nacle diidz gneedz me lo ne.

⁷ Ndionle ne sca ganle, men ro nac Jesús, gacxe waa gotsaa gwi ne ganle zha raquiet lo Xtiidz Dios rnee Espiritu Sant lo ne, rnee me:

Telne gon to gnee me lo to nadze,

⁸ gunndipde to zdoo to,

gunde to zigne been grë pxozgol to, gocntseeb zho lo Dios, zeene sca mban noded zho, no zho grë dan ngan co.

⁹ Ga raquiet ganle zeene znu rëb Dios:

Ncuaa ne lëbdraa guic naa been zho, per dipse len choo iz, blactaa ncuaa ne gon zho ben naa.

¹⁰ Zeene gon naa scataa nac zho,

laa ne gon zho diidz tsie zho nëz ne rlu naa lo zho, lej zhaa ncuaa ne run zho;

nacne nli benngulëe zho guic naa.

¹¹ Lo guielblëe co, bdetee naa diidz ndziin zho zaatne nded naa ndziiladz zho.

¹² Bets, bzian, golguien sca ganle ib gunndipde to zdoo to, zeena sozite to lo me ne nac me Dios nguiamban.

¹³ Gzataa dze, golnee lo grë zha ne nacgrë to (nasraa laga rdeeda diidz), zeena ni tib tsienald grë ncuaa ne runctal xtol miech, lozh ga lëew yquiaaqui gacntseeb to lo Dios.

¹⁴ Sac gon, par gdziin ne zaatne no Jesús, ib none tibliche gac ne, tibaque gnalo ne Dios zigne bnalo ne me zeene psilo bdziunbey ne me.

¹⁵ Ni nadzegazh none dzioxco ne min co. Golsoladz ganle zha rnee lo Xtiidz me:

Telne gon to gnee me lo to nadze,

gunndipde to zdoo to,

gunde to zigne been grë zha ne sca gocntseeb lo me ga.

¹⁶ Ni lëe min co gon bzhaac zha ne güeybee Moisés Egipt. Bin zho bnee Dios lo zho ni blozh ga gocntseeb zho lo me,

¹⁷ beenctal zho xtol zho. Dipse len choo iz ne sca bio zho dan co, bleednie me zho.

¹⁸ Zeene gon me rond zho xtiidz me, nacne bnee me lo zho rëb me gdziin dze ne gdziin zho zaatne nded me ndziiladz zho.

¹⁹ Ni nligaaw bdziin zho, grëse zho gut dan co; sac sca beenndip zho zdoo zho, ib bliladz zho mine rnee me.

4

¹ Sca nagon bzhaac grë miech co. Gacxe nagon waa, zig nac niina ne laa me rnee ganle laa me gneedz lugar ne gdziiladzgaa ne, none ndzinli gac ne, zeena ni tib choot sacd zig bzhaac grë zha co.

² Sac zigne nagon nonee Dios lo ne niina dien zha gdziin ne zaatne gneedz me ga, znuque bnee me lo zho; per zhlëse bin zhow, ib bliladz zhow dib zdoo zho.

³ Sac loxaque zha ne dib zdoose riladz xtiidz Dios, zha cose zrieelo gdziin zaatne

nacle diidz ga gdeed me gdziiladz zho. Mincoocxe waa, zeene gon me bliladz zha co xtiidz me, bdeete me diidz ndziñ zho ga.

Niaale zaatne gdziiladz zho ga, nolew zeene blozh bzaa Dios grëtaa ncuuañe no.

⁴ Sac gon rnee lo Xtiidz me: “Xoop ngbidz bzaa me grëtaa ncuuañe no, laa zeene gol ngbidz gadz laa me bdziiladz.”

⁵ Niaalew nagon, sinque ne gocntseeb zho lo me gane bdeete me diidz ndziñ zho.

⁶ Grë zha ne glo gochnan xtiidz me ga, brieelod ndziñ zho; per zig nac niina, laa me bii quiambëz sëëb grëraa zha ne no sëëb.

⁷ Gacxe waa, laa me biire pso stib dze ne yгаа zho guielnzaac co. Lëë min co ga znu bzeet David, zeene rëb me: “Telne gon to gnee me lo to nadze, guñdipde to zdoo to.” Ndaldoole iz sca bzhaac grë zhagol co, dzigoraa znu bzeet David;

⁸ ga nagon rlu no stib lugar ne gdziiladz miech. Nacdraaw zaatne bdziinne Josué grë zha ne biaan zeene blozh gut grë zha ne gocntseeb ga; sac telne lëële lugar co ga, nsodraa Dios stib dze ne yгаа miech guielnzaac co.

⁹ Min co nagon, ndion ne ible no stib lugar co, ni ga gdziñ grëse zha ne ngab lo Dios.

¹⁰ Grëse zha ne gdziñ ga, gasi laa zho gdziiladz lo grëtaa xtsiin zho, zigne bdziiladzaque Dios zeene blozh bzaa me grëtaa ncuuañe no.

¹¹ Gacxe nana sca, golgotsaa dzioxcu ne dziuuñ ne mine rnabey Dios, zeena gdziñ ne ga; dziuuñd ne zigne been grë zha wladz ne sca bind xtiidz me.

¹² Sac Diossi gon, diidz ne rnee me, nona. Zeene rnee me, rien ne grëse mine nac ne. Nan me pe no guic ne, pe rza zdoo ne; niicle ncuuañe rzac ne mazdraa nguetsa, nan mew.

¹³ Tsod ncuuañe tsongueets lo me. Grëse ncuuañe rac, me rana; ni tib tib ne, lo me cuero ne grëse tel zha mban ne.

Lëë pxoz nroob ga nac Jesús

¹⁴ Per zig rne naa ga, rdziaap ne tib pxoz nroob niina, ni pxoz cosi men ne bzoquia gbaaw. Lëë me ga nac Jesús, men ne nac Xpëed Dios, me none gnalo ne; none tiblrique gac ne.

¹⁵ Sac gon mesi rquia zdoo me ne, csaand me ne zeene zootle laa ne guiable lo dol, sac tel me gonle me zha nac lo guidzliu rii, gonle me grëtaa mod ne rquii mendox ne par gunctal ne xtol ne. Bzhaac me zigne rziaaacute ne niina, lëëraasi biabd me lo dol.

¹⁶ Gacxe nagon waa, ine tibiladz golgotsaa gbig ne lo Dios, ndion ne ganle ible squia zdoo me ne, ni ible zacnieñ me ne zeene rquiinpa ne gun me xyudar ne, sac ne nligaa noxcu me ne.

5

¹⁻³ Ible Jesús nac zhipxoz nroob ne niina. Gotsaa gwi ne ganle, men ne rгаа rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grë gon ne rgon miech lo Dios, xchen ma ne rut zho par guiooglo lo xtol zho, me riesaṅa lo pcoog; ni scaquegaa riesaṅ me mine guiooglo lo xtol me; sac gon, miech guidzliuque nac me. Ye me rzac zigne rzac grëraa miech, gane rien ne rquia zdoo me grë zha ne peet rienḁ, grë zha ne mazdraa ngoopdol.

⁴ Ni zha ne sca rac pxoz nroob, led zhald zho rzëëb zho rac zho dziin co, sinque Dioszhal rzooblo zho zigne bzooblo Dios Aarón, men ne gloopaa goc pxoz nroob.

⁵ Zig nac Jesús, Dioszhal bzooblo me ne laa me nac zhipxoz nroob ne; men ne znu rëb lo me: “Xpëed naa nac luu. Desde nadze laa zho gunbey ne Xpëed naa nac luu.”

⁶ Ni rëb me:

Luu nac pxoz nroob, gdziñd dze ne gdzëë luu,

luu gac zig pxoz Melquisedec.

⁷ Zeene bii zo Jesús lo guidzliu rii, tib vuelt mban rac me zig zet me lo guielnë, haxta roon me, nguiedz bnee nac bñab me lo Dios csilaa Dios me lo guielgut co; scagaa Dios psilaa Dios me, sac tib men nguzobdiidz nac me.

⁸ Niicle ne Xpëed Dios nac me, per tib men nguzobdiidz goc me, maase mincopaa pquiaqui nroob guielnë ne bded me.

⁹ Ni ne sca bin me diidz been me grëse mine bnabey Dios me, gacxe waa grëse miech ne gban zigne nac xtiidz me, me gdeed tib guielmban ne gdziñdraa dze lozh lo zho;

¹⁰ ni bzo Dios me nac me pxoz nroob niina, zigne gocaque Melquisedec pxoz nroob.

Gacde to zig cho mëdyeen

¹¹ Racladz naa gneraa naa lo to nu pe run zhipxoz nroob ne, zha nac me, per ne squi rac to peet nëde to yquiaadiag to, ngan gne naa lo to zha naca.

¹² Lo lal dze ne psilo rnalo to Jesús, haxta none tole cseed miech niina, per na gon lel rquiin to dien cho gbiire csilo cseed to stib. Rac mëdyeen to i gon, laa ne gow to ncuuañe row zha brooble lel racladz to tibaque nidz guie to.

¹³ Sac gon, mëdyeen rie nidz, ni rienḁ win dien pe nac ncuuañe ntseeb, pegaa nac ncuuañe wen.

¹⁴ Sangue grëloraa guielwagw, min co rquiin grë zha gol, ni zha co niinile zho, rien zho pe nac ncuuañe wen, pegaa nac ncuuañe ntseeb.

6

¹ Gacxe waa, none tsoxco to gac to tib zha gol. Gunde to ne miñe pseedse to glo zeene psilo bnalto to Jesús, lo miñ co ib grieede to. Laa to pseedle ganle:

zha none csaan to guielntseeb gbig to lo Dios, zha none gnalo to Dios,

² zha cxobnia to guic stib zho, gnab to lo Dios por zha,

zha nac wrobnis,

zha cueeban Dios grē mengut,

zha guñ Dios guielwxtis ne gloozh grētaa guielntseeb.

³ Grēle miñ rii nañ to. Laa niina telne zneedz Dios diidz, laa to cseed miñe nora gacnañ to.

⁴ Sac gon, no ncuaañe grieelod gac telne gneedz Dios diidz gaca. Zig nac zha ne squi bienle zha nac Xtiidz Ndzon Dios, bley zho gon zho gol zdoo Dios psilaa me zho, bdeed Espiritu Sant guielbiini lo zho,

⁵ bien zho zha wentaa nac xtiidz me, zha grielo sēeb zho zaatne ziaadyob gdziñ zho (zeene glu Dios grē poder ne rap me),

⁶ ni lozh ga csaan zhow, tsienal zho guielntseeb stib; grieelod nose co guic zho gbiire sēeb zho xnēz Dios. Ni zha ne gon sca run, rriequia noquiaa zho Jesús lo cruz ga stib, gbiire gzhidznie miech me.

⁷ Zig nac tib lē liu ne rgaa grēse nisguie ne riab, zeene rriequia grē ncuaañe ran zho low, runlay Diosa;

⁸ laa telne niapse yag guiets, niapse grē guizh guiets roob low, paat rquiinda; ib tedsod zdzibdee Diosa, ni lozh ga znabey me tseca. Scaque nagon nac miech ne runbey Xtiidz me.

⁹ Bets, bzian, laa naa rne miñ rii lo to, per guiabde to togo miñe run to rzet naa. Tel to, rien naa brieete to lo grē guielntseeb, lole Dios ngab to niina.

¹⁰ Nanle to ganle, Diossi ncuaañe rieguial tib tib miech, miñ co rdeed me lo zho. Grētaa ncuaañe noyun to niina ne rleynie to me, grē tel zha rquia zdoo to been to xyudar grēraa zha ne no xnēz me, ni noyungaa tow niina; grēsew ible guiaanladz mew.

¹¹ Miñe rzoobladz naa, tibaque squi nguieel gac to, zeena scagaa zgaa to grē ncuaañe nacle diidz gneedz Dios lo to.

¹² Sac dzigosi guieete to, ib gbechde to; masaque laa guic to tsienie ycaania to grētaa miñe bneele me gneedz me lo ne; zigne been grē zha ne nlipaa bnalto me.

Miñe rnee Dios run mew

¹³⁻¹⁴ Golsoladz ganle, zeene psañ Dios xtiidz me lo Abraham been mew zigne bneese mew. Lēē hor co rēb me laa me gunlay Abraham, ni ndal gun me lo xti Abraham. Ni lēēque lē me bzeet me, par glu ne ible zun me miñe bnee me.

¹⁵ Scagaa Abraham, tiblique billadz me ne laaw gac; lēē gdib pquiambēz me bdziñ dze co.

¹⁶ Zig nac miech, par glu ne zun zho miñe rnee zho, dzigo rzeet zho lē tib men ne mazdraa non lo zho; ni deque sca run zho ga rlu ne gdzēēdraa xtiidz zho.

¹⁷ Scagaa Dios, laa me bzeet lē me sac guindraa stib men ne mazdraa non lo me. Ga blu me ne ible zun me miñe bnee me ga.

¹⁸ Zeene sca rsañ Dios diidz, ni rzeet me lē me, choot grieelodraa ctsēē miñe rnee me, ni niicle megaaw nacd me men ne rquidie. Gacxe waa, grēse ne ne nac ne zha ne wbig lo me, none ine nley gac ne, sac ndionpaa ne ne ible zneedz me miñe psañ me diidz ygaa ne.

¹⁹ Miñ co nagon, none tiblique gac ne zig tib barcw ne dziits zob lo nis, sac no ncuaañe naaza len nis; ndion ne ganle, ible dzziñ ne len yadoo nroob ne zob Jesús.

²⁰ Laa me bner bdziñ me ga nonab me lo Dios por ne. Me nac pxoz nroob niina, ni gdziñdraa dze ne gdzēē me; laa me nac zig goc pxoz Melquisedec.

7

Pxoz nroob ne lē Melquisedec

¹ Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Golsoladz ganle, zeene znu wbirele Abraham güeygunxoon me zha ne no grē guiedz ne rlēē lo me, Melquisedec goc pxoz ne güeydzieelo me, beenlay Melquisedec me.

² Dzigo lo grēse ncuaañe bla me lo grē zha co, been mew tsii lal, bdeed me tib lalgaw lo Melquisedec.

Melquisedec nac zig nacne rnee ne “guielwxtis”, miñ co nac ne rnee zho me “rey ne run guielwxtis”; ni rneequo zho me “rey ne rcuēēz lo diñ”, sac Salem (guiedz ne goc me rey ga) nac diidz co zig nac ne rnee ne “zaatne guieñ diñ”.

³ Ib raquiete dien cho goc pxoz me, dien cho goc xniaa me, dien cho gocga xmengol me; niicle raquietegaa dien zha blanso me lo guidzliu, dien pe gutgaa me. Ziaad gac me zig Xpēd Dios, men ne nac zhipxoz nroob ne, men ne gdziñ dze gdzēē.

⁴ Rlu men non goc Melquisedec; sac gon:

a) Golsi ganle, haxta pxozgol ne Abraham bdeed palal ncuaañe bla me ga, lo Melquisedec.

⁵ Nana, telne niac Melquisedec zha xti Levi guiab ne por miñ co pcaa mew, sac zeene laa ley bbaad rnabeya ne grēse zha Israel, tel pe nactaa ncuaañe quianie zho run zhow tsii lal rdeed zho tib lala lo zha xti Levi, sac zha co nac pxoz; ni tibaque dii ne nac zho.

⁶ Laa Melquisedec, niicle ne led zha xtiid Leví nac me, per bñab me bdeed Abraham tib lal grè ncuuan co lo me.

b) Me beenlay Abraham; ni laa Abraham biaanñiele diidz pe nac miñe gdeed Dios lo Abraham.

⁷ Ni ndion ne ganle men nroob nac zha ne runlay.

⁸ c) Grè pxoz ne sca rcaania gon co, rdziñ dze ne laa zho ret; sangue Melquisedec, zigne raquiet me lo Xtiidz Dios rlu ne mban me.

⁹ d) Rrieequia ye grè pxoz ne brieequia lo zha xtiid Leví ye zho ga bdeed gon lo Melquisedec, zeene sca bdeed Abraham gon co lo me.

¹⁰ Sac niicle ne gard gal Leví hor co, per racle Leví cuent ga, sac xpèèdaque Abraham goc Leví.

¹¹ e) Grè pxoz ne brieequia lo xtiid Leví ga, zig nac Aarón; zha co nac zha ne blu ley lo menguedz Israel; per brieelod zho mbee zho miech lo dol, gane laa ne nxeel Dios stib pxoz ne ziaad lo xtiid Aarón, mazd pxeel me tib pxoz zig pxoz Melquisedec.

¹² Zeene sca ptsèè Dios lo dii ne ziaad pxoz, hor co nacne bdzèèque grè xley pxoz.

¹³⁻¹⁴ Ndion ne ganle, Jesús men ne nac pxoz cub niina, lo xtiid Judá brieequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz.

¹⁵ Ga nagon rlu ne nli grèw bdzèè. Sac gon, Jesús men ne nac pxoz niina, men ne nac zig pxoz Melquisedec,

¹⁶ nacd mew porne ziaad me lo xtiid Leví, sinque porne nac me tib men ne gdziñ dze lozh xquielmban.

¹⁷ Zigne raquietaque me, zaatne rnee: Luu nac pxoz nroob, gdziñ dze ne gdzèè luu,

luu gac zig pxoz Melquisedec.

¹⁸ Gataa laa grè xley pxoz biaan tib lad, sac grèse miñe bnabey pxoz hor co run miech, paat pquiinda.

¹⁹ Ni lalnu brieelod nsanwena miech lo Dios; sangue niina, mazdraa wen zio ne, sac ndionpaa ne Jesús nac men ne csanwen ne lo Dios, sac me nac men nroob ne rnalno ne.

²⁰ Dioszhal rëb Jesús gac tib pxoz ne gdziñ dze gdzèè, ni haxta bzeet me lë me parne glu ne ctsèèd me xtiidz me;

²¹ laa grèraa pxoz ne ziezo, ni beend me ne sca nzeet me lë me. Sac gon, lose Jesús znu rëb me:

Luu nac pxoz nroob, gdziñ dze ne gdzèè luu,

luu gac pxoz nroob zig Melquisedec.

Naa rnew, ni naasi ctsèèd naa xtidz naa.

²² Miñcoccxe waa ndion ne, diidz ne biaanñie Dios miech ga gdziñ dze ne gdzèèw; sac gon, por Jesús laaw noyac.

²³ Glo, ndaldoo zha ne goc pxoz, sac grèse zho miech nac zho, rdziñ dze ne laa zho ret, zeene laa tib zho ret laa stib zho rzo.

²⁴ Sangue Jesús, led yed me griee par dien cho stib so, sac mesi gdziñ dze ne guet me.

²⁵ Gacxe waa, grèse ne ne nac ne miech, zha ne gbigtaa lo me parne ycaania Dios zho, ible silaa me zho lo dol, ni lèè blaale zho ga. Tibaque laa me gnab lo Dios por zha, sac gdziñ dze ne guet me.

²⁶ Jesús nac tib men ne nlipaa mbe, ni tib dol rapd me, ib rdzigiend me guielntseeb; gacxe waa, beennon Dios me, ni lèèpaa pxoz nroob co nagon rquiin me.

²⁷ Led yed me nac zigne goc grèraa pxoz nroob ne bio glo. Grè pxoz co, gzobse dze rut zho ma ne rgogon zho lo Dios, parne csanmbe me zho lo xtol zho; ni rutaque zho ma ne riogon lo Dios parne guiaanmbe grèraa menguedz; sangue Jesús, tibaque vuelt bdeed me gon co, ni mezhaz goc gon co.

²⁸ Stiba, glo, zha ne rgaa rac pxoz nroob zigne rnabey ley, ye zho runctal zho xtol zho; sangue niina ne laa Dios psan stib xtiidz me, laa me bzo Jesús nac me zhipxoz nroob ne, mesi tib men mbe nac me, ni gdziñ dze ne gdzèè me.

8

Jesúsle nac men ne rteed xtiidz ne

¹ Lo grè miñe quiane naa nu, miñe racladzpaa naa gacnan to nac miñ rii: Jesús nac zhipxoz nroob ne, ni zaatne zob Dios, men nroob ne rnabey, ga zob me.

² Gbaa no me, ga quiayun me dziin zaatne nacpaa yadoo, Dios bzaa yadoo co, led yedraa miñ co bzaa miech.

³ Ndion ne ganle, zha ne rac pxoz nroob, laa zho rzo, zeene grè ma, grègaa ncuane rgogon miech, zha rdeeda lo Dios; scaquegaa Jesús, ye me bdeed me gon lo Dios.

⁴ Tel niaca miñe bii no me lo guidzliu niina, grielod gac me pxoz nroob, sacne nole pxoz nroob ne rdeed grè gon co lo Dios, zigne rnabey ley.

⁵ Grè dziin ne run grè zha ne rac pxoz nroob lo guidzliu rii, lega nacsew zig zhimlè grè miñe rac gbaa; yadoo ne rio zho lo guidzliu riiw, lega nacsew zig zhimlè yadoo ro ne zob gbaa. Golsoladz ganle, zeene laa Moisés gzaa yadoo, rëb Dios lo me: "Zëb gon bluse naa lo luu guic gui ga, sca none gzaa luuw."

⁶ Gacxe waa, tel Jesús men ne nac zhipxoz nroob ne niina, mazdraa non dziin ne quiayun me; sac gon, zeene pso Dios me gac me pxoz nroob, psan Dios diidz stib zha grielo ygaa ne grè guielnzaac nroob ne gneedz Dios lo ne, ni me gunctsiñ ne lo Dios.

⁷ Wenraa nac diidz ne psan Dios ga, sac telne niaca nlëb diidz ne biaan glo ga zeene rëb me zha guiaanwen miech lo me, dzigo nod pe nacne mbiire nsañ me stib xtiidz me.

⁸ Ni bzeetlegaa me ne laa me csañ stib xtiidz me, sac grë zha ne biaan nie xtiidz me glo, loxaque beenctal zho xtoł zho. Min co ga raquiet lo Xtiidz me, zaatne znu rnee:

Rnee men ndzon ne rnabey: Zdziñ dze ne gbiire guiaan no diidz grë no zha Israel, ni zha Judá.

⁹ Per gacdraaw zig diidz ne biaan no grë no xmenğol zho,

zeene rrieequia bzheen naa nia grë zha gol co, blee naa zho lo caxtigw ne noded zho Egipt;

sac ni lalnu güeynalđ zho diidz ne biaan no ga,

nacne niicle naagaaw, psaanladz naa zho.

¹⁰ Zeene gdziñ dze co, znu nac diidz ne guiaan no grë no zha Israel: Grëse xley naa, nis nis gacnan zhow, zig nac zeene haxta len zdoo zho, len guic zho zhubneew.

Dzigosi laa zho gunbey naa ne naa nac xDios zho,

ni niicle naagaaw, laa naa gunbey zho ne lo naa ngab zho.

¹¹ Dzigosi yquiindraa tso zho gnee zho lo menlıdz zho, lo menladz zho: "None gunbey luu Dios gon."

Sac len dze co, grëse zho runbeyle zho naa, niicle zha ne mazdraa wina, niicle zha ne mazdragaa nona.

¹² Tel pe nactaa xquieIntseeb zho, zun naa zhow perdon;

gdziñdraa dze csoladz naa grë falt ne been zho lo naa.

¹³ Zeene sca bzeet me ne laa me csañ stib xtiidz me, ga rlu ne rquiindraa mine biaan glo ga; sac nac grë ncuiaan gox rquiindraaw, laaw nole par nitlow.

9

Yadoo ne no gbaa

¹ Zeene glo biaan Dios diidz ga grë me zha Israel, hor co biaan diidz lo zho zha tsiegan zho me, ni zha tsaá yadoo ne gac zaatne tsiegan zho me.

² Dzigo bzaa zho tib yu mantiad ne goc yadoo co, groltaa len yu co pquiaancaan zho tib lar nroob, goc len yu co chop len. Tib lena, mine riaan nêz ro yadoo, ga nac zaatne Nda, ga rzo tib candler ne niaa niapse or, ni rzo tib mezh ne rbib quietxtıl ne naclayle.

³ Laa stib lena, mine riaan nêz zhıts lar co, ga nac zaatne Ndadoo;

⁴ ga rzo tib yag ndiaab niapse or lada, dzigo lo co rec yaal; leen coque zhoob tib guın scaque niapse or ndiaab lada. Len guın co no grop lë quie lag ne pquia ley ne

pcaania Moisés, ga no bar ne bzhen Aarón, bar ne bdzib ben ga; leen coque no tib guies win niaa niapse or, len guies co no palal maná, quietxtıl ne bguiaan Dios grë mengol co. Lëe guın co biaan par csoladz zho zha nac diidz ne biaan nie Dios zho.

⁵ Zhıts guın co zoli chop anıl ne bzaa zho, masaque rbebel grop anıl co rtsiig me xiıl me rtse me zhıts guın co, zaatne rliaal xchen grë ma ne riogon lo Dios, par guiooglo lo xtoł menguedz. Par gne naa zha nacraa grë ncuiaan co, rneedzraaw diidz nu niina.

⁶ Sca nagon biaa yadoo co, dzigo grë zha ne rac pxoz tıbaque rzëeb zho zaatne Nda ga; ga rıegun zho dziin ne rnabey ley zho gun zho.

⁷ Laa stib lena, zaatne Ndadoo ga, loxaque men ne nacse pxoz nroob rrieelo rzëeb ga, ni tıbaque vuelt tib len iz rzëeb zho. Zeene rzëeb zho, rienie zho xchen ma ne rgogon zho par guiooglo lo xtoł zho, ni guioogloogaa lo grë xtoł menguedz, dol ne biend zho been zho.

⁸ Gase na ganle rlu Espıritu Sant lo ne, gacđ sëeb grëraa miech zaatne Ndadoo ga, laga bıi sca chop len nac yadoo.

⁹ Golğotsaa gwi ne niina na ganle zha naca: Glo, niicle ne scataa rıesañ zho gon, scataa rut zho ma ne rgogon zho, per brieelod grë ncuiaan co nsañmbew zdoo zho;

¹⁰ sac hor co, laa zho güeynal grë ncuiaane laglaase, rio zho dien pe zac gow zho, dien pe zac guie zho, dien zha gaz zho, dien zha tsar nia zho par guiaanmbe zho. Laa zho been min co, sac hor co gard gacncub diidz ne biaan nie Dios zho ga.

¹¹ Sanguie niina ne laa Jesús biaad, niina ne mele nac pxoz nroob, por me laa miech yгаа grë güelınzaac ne bneele Dios ga. Bdziñ dze laa me bzëeb yadoo ro ne zob gbaa (yadoo ne mazdraa non, yadoo ne mazdraa nzıhıxcuaa, yadoo cosi led yeda bzaa miech),

¹² zeene bzëeb me, bzëebnıed me pe xchen chıv yeen, pe xchen ngon yeen, zıgne been grëraa pxoz nroob; sıncue xchenpaa me bzëebnıe me zaatne Ndadoo ga; tıbaque vuelt bzëeb me, ni lëe psanmbele me ne lo grëtaa xtoł ne ga.

¹³ Nana, telne scataa pquın zho xchen ngon yeen, xchen chıv yeen, rio zho rzëeg zho tib vac yeen rliaal xquıdie co lad zha ne rap falt, par gbıche dol co guiaanmbe zho lo Dios.

¹⁴ ¿Pe leł xchen Jesús dzigo? Mazdraa gon nac xchen me, ıble sañmbew ne lo grëtaa ncuiaane paat rquıind ne bdziıun ne glo, niınası zrıeelo dziıun ne mine rnabey Dios nguiamban. Sac gon, tel Jesús ni tib dol rapđ me, ni Espıritu Sant bloo zdoo me bdeed me me goc me tib gon mbe.

¹⁵ Gacxe waa, Jesúsle nac men ne gdziinne ne lo Dios, niina ne laa Dios psan stib xtiidz me. Zeene gut me, ga bdiizh me grëtaa xtol miech, zigtaa zha ne biaanannie diidz glo cow, zigtagaa zha ne nobedz me len dze riiw; niinasi grëse zho zrieelo yгаа zho guielmban ne gdziind dze lozh ga, zigne nacle xtiidz me.

¹⁶ Gotsaa gwi ne ganle, xtiidz miech, mine rсан zho par dien zha gac grë ncuaaane rap zho zeene laa zho guet, laga bii mban zho grieelod gacnon diidz co;

¹⁷ sinque haxta ret zho, dzigo laa diidz co racnon.

¹⁸ Scaque nagon, zeene psan Dios xtiidz me glo, gutgazh ma ne brieen ren bzhiee dzigoraa laa diidz co psilo gacnon.

¹⁹ Golgotaa csoladz ganle, zeene blozh bnee Moisés lo menguedz zha nac diidz ne psan Dios ga, laa xchen ngon yeen, xchen chiv yeen ndxiembëzle notsa nis; dzigo bzoob me tib lë guits mëcwxiiil rna nizhnie tib guic bar, blozh bar, psëeb mew lo ren co blaaj me ren co lo guits ne quia grë diidz co, ni blaaj mew lad grëse miech co,

²⁰ ni rëb me lo zho: "Laa ren rii bzhiee, zeena gacnao to desde nadzetaa laa diidz ne psan Dios lo to nu csilo gacnon, none gun to mine rnabeya."

²¹ Blozh ga, blaalaque me ren co gdipse len yadoo, ni blaaj mew grëse lad ncuaaane racdziin len yadoo.

²² Sca nagon nac ley co, grëse ncuaaane no guiaanmbe, ib ren rсанmbew; scaque miech, haxta rzhiee xchen ma ne riogon dzigoraa riooglo lo xtol zho.

²³ Mincoxe waa, sca pxiee Moisés xchen ma biaanmbe yadoo co ni grë ncuaaane racdziin lena (nacse yadoo co zig zhimlë yadoo gbaa); sangue yadoo gbaa, ga pquiiin ren ne mazdraa non lo xchen ma, ni lëe ren co goc xchen Jesús.

²⁴ Zeene bzëeb Jesús zaatne Ndadoo güeynee me lo Dios por ne, güeyd me len yadoo ne bzaa miech, sinque len yadoo gbaa güey me; sac gon, nacse mine no lo guidzliu rii zig zhimlë mine no gbaa.

²⁵ Grë pxoz nroob, gzob iz rie zho zaatne Ndadoo rienie zho xchen ma; sangue Jesús, xchenpaa me güeynie me, ni tibaque vuelt güeylogon me me.

²⁶ Telne ye me niun zig run grëraa pxoz co, pe zhistaale vuelt na ziyet me wla ne bre guidzliu, iper na, led yed me! Zeene laa dze bdzin, laa me baaad, xchenpaa me bzhiee, ni tibaque vuelt bzhieew psanmbew ne lo dol grëse ne ne nac ne miech.

²⁷ Zigne biaan tibaque vuelt ret miech, lozh ga zeene laa Dios gun guielwxtis, laa zho none gacredz lo me;

²⁸ scaquegaa tibaque vuelt gut Jesús bdiizh me xtol grëse miech; ni zdziin ne guiaad me stib, per guiaatraa me par biire quizh

me xtol miech, sinque laa me guiaadsilaa grë zha ne quiambëzlo me, zeena gand zho grëtaa guielnë ne csiaab Dios.

10

Tibaque vuelt goc Jesús gon

¹ Grë mine rnabey ley run pxoz, lega nacsew zig tib zhimlë grëtaa mine been Jesús por ne. Horco niicle gzobse iz rienie grë miech co gon zigne rnabey ley, per brieeloda nsanmbew zho lo dol.

² Tel niaca mine gon cose nsanmbe zho, dzigo tibtaa vuelt ne niesan zhow lëe ni-aanmbele zho ga; niicle zhagaaw, nienpaa zho ne laa zho mbele.

³ Per na, gzobse iz zeene laa zho riesan gon co rsoladz zho ne bii no zho lo dol.

⁴ sac gon, grieelod ne xchense ngon yeen, xchense chiv yeen guiaanmbe miech lo dol.

⁵ Mincoxe waa, zeene laa Jesús baaad lo guidzliu, pe led znu rëb me lo Dios:

Grë xchen ma, grë ncuaaane riaadlogon zho lo luu, racladzdraa luuw; gane bnabey luu goc naa miech, zial naa lo guidzliu.

⁶ Grë ncuaaane rzëeg zho, grë ren ne rxiee zho, par guiaanmbe zho lo dol; racladzdraa luu gan luuw.

⁷ Gane niina, laa naa zial nu Dios, zeena gun naa mine gnabeytaa luu; zigne zhobnee lo Xtiidz luu gac naa.

⁸ Gotsaa gwi ne ganle, blozhse rëb me racladzdraa Dios tso zho pe ncuaaane tsielogon zho lo me, tso zho cxiee zho xchen ma, gzëeg zho ma par guiaanmbe zho (niicle ne lo ley sca rnabey gun zho);

⁹ dzigo rëb me: "Dios, laa naa zial nu zeena gun naa mine gnabeytaa luu." Gase nagon rlu ptiche me diidz ne psan Dios ga glo, laa stib diidz cub ne biaannie Dios miech ga psilo noquuin.

¹⁰ Ni nligaa been me mine bnabey Dios, bdeed me me gut me lo cruz; ne sca nagon been me mine bnabey Dios, ga psanmbe me ne lo dol. Tibaque vuelt sca goc me gon co, ni lëe psanmbele me ne ga.

¹¹ Grë pxoz, gzobse dze rio zho len yadoo rdziib zho grë gon ne riesan miech; blactaa iz tibaque sca nodziib zho grë gon co, per brieeloda nsanmbew miech lo dol;

¹² sangue Jesús gon, tibaque vuelt bzhiee xchen me goc me gon psanmbe me miech lo dol. Laa niina, cue Dios nëz derech ga zob me,

¹³ quiambëz me gdziin dze zeene grëse zha ne rlëe ran me, laa zho guiaanwin lo me.

¹⁴ Tibaque gon ne bdeed me ga, psanmbegazh me grëse zha ne nodziinne me lo Dios.

¹⁵⁻¹⁶ Ni nligaa scaw, haxta Espiritu Sant, zeene blozh bzeet me zha rëb Dios guiaannie

me zha Israel diidz stib, zha nis nis gacnaŋ zho xley Dios, zig nac zeene haxta len zdoo zho, haxta len guic zho zho bneew;

¹⁷ Dzig bzeet me zeene znu rëb Dios: "Tel pe nactaa xquieŋntseeb zho, tel pe nactaa xtoŋ zho, gdzindraa dze ne csoladz naaw."

¹⁸ Golgotsaa gwi ne sca ganle, rsoladzdraa Dios xtoŋ ne sac laa Jesús bdiizhlew; gacxe waa, nodraa dzio ne dien pe gon ne gdeed ne par csaŋmbe me ne.

None gbig ne lo Dios

¹⁹ Bets, bzian, glo loxaque men ne nacse pxoz nroob rzëeb len yadoo zaatne Ndadoo ga; sangue niina, haxta zaatne Ndadoo len yadoo gbaa zrieelo gdziŋ ne, sac xquizh xquieŋnzaac Jesús, bdeed me me bzhiee xchen me psanmbe me ne.

²⁰ Zeene sca gut Jesús, rrieequia tib nëz cub ga pxal me par gdziŋ ne zaatne ygaa ne guieŋmban; lëe nëz co ga bzhiäl zeene sca briez lar ne quia len yadoo ga.

²¹ Ni ne me nac zhipxoz nroob ne no me yadoo gbaa,

²² niinasi zacŋe gdziŋ ne haxta lo Dios. Nana sca, dib zdoo ne golgotsaa gbig ne lo Dios, dib zdoo ne golgotsaa gnalo ne me, beŋque laa me psanmbele ne lo grëtaa ncuaaŋe yozh ne rza zdoo ne, rza guic ne; rrieequia bgaz me ne tib nis mbe.

²³ Tiblique sca golgotsaa gac ne, beŋque ndioŋ ne ganle ible zdziŋ dze ne gac miŋe riladz ne; sac Dios psan diidz co, ni ndioŋ ne rquidied me.

²⁴ Golgotsaa dzioxc co ne cseedŋa ne gleyŋie ne zha ne nacgrë ne, ni dziuun ne ncuaaŋe yquiiŋ lo ne grë ne.

²⁵ Dze ne nacŋe diidz ycaals ne dzioolnie ne Dios, ible none ycaals ne grëse ne, guionald ne miŋe run grë zha ne rzozit. None cso ne diidz lo grë zha ne nacgrë ne, conley ne zdoo zho dziits so zho lo miŋe riladz ne; xco co none dzio ne niina ne laa dze ne guiaad Jesús ziaadgaxle.

²⁶ Zha ne beenbeyle zha nac diidzli, ni lozh ga xtsiinpaagunŋctal zho xtoŋ zho, tsodraa gon ne csaŋmbe zho lo dol co;

²⁷ lëëtaa miŋe tsieguial zho nac guieŋnëdox ne ygaa zho zeene laa Dios gun guieŋwxtis; dze co laa me cxeel zho lo guidox, zaatne nitlo grëraa zha ntseeb ne gocndaan lo me.

²⁸ Gotsaa gwi ne ganle, niicxe ley ne na pcaania Moisés padzeela ga, zha ne rguiits miŋe rnabeya, ni tel ne chop tsoŋ zha ne gon ne nliw, niicŋe mazdraa mban rac zho ib rdedaad zho rut zho zho.

²⁹ Nana, ÷pe lëgue zha ne dzigo quiits miŋe rnabey Jesús? Mazdraa gon nac guieŋnë ne ygaa zho, sac noguitnie zho xchen Jesús ga, rzhidznie zho Espiritu Sant ga sca gun zho. Noguitnie zho ren co, ni lëëw bzhiee biaanmbe zho lo dol, lëëw bzhiee

zeene psan Dios stib xtiidz me zha gbig miech lo me; rzhidznie zho Espiritu Sant, ni men co no zhixco zho.

³⁰ Zha ne sca gun, ible nroob guieŋnë ne ygaa zho; sac ndioŋ ne ganle zha nac xDios ne, me znu rac zho: "Naa raguial gun guieŋwxtis; naa gded miŋe rieguial tib tib miech." Ni zho bneeeque lo Xtiidz me: "Grëse miech, lo me cueero zho grë ncuaaŋe been zho."

³¹ Ne nligaa ncuaaŋe gdzieb ne ted grë zha ntseeb ne sca guiaab ladznia Dios, men nguiaamban!

³² Sangue to, golsoladz ganle zha bded to zeene griinpaagun psilo bnalo to Jesús, niicŋe ne scataa nroob guieŋnë ne gon to, per beenŋctalde to xtoŋ to.

³³ Blactaa bdiiztne miech to, squi ndxie zha ne nowi laa zho nosacsi to; ni blactagaa gon to nosacsi zho zha ne nacgrë to.

³⁴ Grë zha ne biab ladzguuib, mbanse rac zdoo to ran to zha rac zho; niicŋe zeene biaad zha ne biaadla grë ncuaaŋe nacchen to, psaan to ptiche zhow, peet güeynedaque guic to; sac nanle to mazdraa nac guieŋnzaac ne ygaa to gbaa, ni miŋcosi gdziŋd dze ne nitlow.

³⁵ Nana sca, scaque dziits golso; sac telne tibaque gnalo to Dios, ible zgaa to guieŋnzaac ne gneedz me.

³⁶ Ible guiaand zdoo to, tibaque dziits golso golgun miŋe rnabey me; zeena ygaa to grë ncuaaŋe bneeŋe me gneedz me lo to.

³⁷ Golsoladz ganle, znu zho bneee lo Xtiidz me:

Ible ile ziaad men ne nacŋe diidz guiaad ga, led nroobdraaw, laa me glansole.

³⁸ Grë zha ne ziaaŋ miŋe nac diidzli, ible zban zho sac rnalo zho naa; laa telne guiaand zdoo zho sozit zho lo naa, ni lalnu gleyŋied naa zho.

³⁹ Sangue ne gon, nozozite ne lo Dios, sinque dib zdoo ne rnalo ne me. Grë zha ne sca rzozit lo me, nëz ne nitlo zho ga zie zho; laa ne gon, ible zgaa ne tib guieŋmban ne gdziŋd dze lozh, sacne znu dib zdoo ne rnalo ne me.

11

Zhapaac nac ne dib zdoo ne gnalo ne Dios

¹ Znu nac ne dib zdoo ne gnalo ne Dios. Zha ne dib zdoo rnalo Dios, tiblique zienie guic zho ne ible zgaa zho miŋe quiambëz zho gdeed me lo zho; niicŋe ncuaaŋe gard gan zhow, per rzac zho zig nac zeene ranle zhow.

² Zig nac grë xmëngol ne, ne scacxe waa bnalo zho Dios gane bleyŋie me zho.

³ Scagaa niina, ne dib zdoo ne rnalo ne Dios, gane riladz ne me bzaa guidzliu ni grëragaa ncuaaŋe no, zeene rnabey me bi-aaw, niicŋe ne peet guieŋd hor co.

⁴ Gotsaa gwi ne ganle lëë bla zhagol ne dib zdoo bnalod Dios nu:

Zig nac Abel, ne dib zdoo me bnalod me Dios, gane bleynie Dios gon ne bdeed me, lëdle gon ne bdeed bets me Caïn. Ne sca bnalod me Dios, gane pcaania Dios me zig tib zha ne peet xtołd, ni pcaania Dios gon ne bdeed me ga; gacxe waa, haxta lo nadze, niicle ne gutle me, bii raquiet ganle pa lotaa dib zdoo me bnalod me Dios.

⁵ Scaque Enoc, ne dib zdoo me bnalod me Dios, gane gute me, zomban me zeynie Dios me gbaa, choot gondraa me. Zeene bii zomban me lo guidzliu, blu Dios ne rdziladz Dios zha mban me.

⁶ Sac zha ne rnalod Dios dib zdoo, grieelod gban zho zigne rdziladz Dios. Zha ne racladz gbig zho lo Dios, none dib zdoo zho gliladz zho ne nli no me, ni gliladz zho ne nli rcaania me zha ne nli paa rio liaadz rbig lo me.

⁷ Zig nac Noé, ne dib zdoo me bnalod me Dios, gane bliladz me xtiidz Dios zeene rëb Dios lo me pe nac ncuane ziaadyob gac; bin me diidz bzaa me tib barcw nroob, ni leñ barcw co bio me gza xpëed me ni tsiel me, blaa zho lo guielnë co. Ni ne sca bnalod me Dios, gane ible zgaa me grë miñe gdeed Dios lo grë zha ne biaanmbele lo Dios; laa grë zha ntseeb co, ib bnalod zho Dios, gane sca bnitlo zho.

⁸ Zig nac Abraham, ne dib zdoo me bnalod me Dios, gane zeene bredz Dios me ycaania me zaatne gdeed Dios lo me, binga me diidz brieë me zie me, niicle ne nanđ me zha nac dan co.

⁹ Ni ne sca rnalod me Dios, gane niicle bdzin me lo liu co, laa me wbanse ga zig tib menzit. Lega nacse leñ grë yu mantiad bio me grop me Isaac, scaquegaa Jacob; sac ye grop zha co biaan diidz nachen liu co.

¹⁰ Scase bio Abraham ga, sac nanpaa me no tib guiedz ndzon ne bzaa Dios, ni ga nac zaatne gdeed Dios gdzin me.

¹¹ Scaque Sar, wnaa ne goc tsiel Abraham, ne dib zdoo me bnalod me Dios gane gop me mëed, niicle ne nacd me wnaa ne gap mëed, ni lala gol-le me; laa me gop win, sac zeene rëb Dios lo me laa me yquanie win, dib zdoo me bliladz me ible zun Dios miñe bnee me ga.

¹² Ye Abraham, mengol-le me, men ne yquaniemdraa mëed nac me, ni zeene laa Sar gop mëed co, mieh guizhiu ne brieëquia lo dii co; pale mel ne ndziib gbaa, yuzh ne ndxieгаа ro nisdoo.

¹³ Gza zha ne blozh goquiet nu, gardaque yгаа zho grë miñe bnee Dios gdeed me lo zho, laa zho gut; zeene bii zomban zho lo guidzliu rii, dib zdoo zho bnalod zho me gane bliladz zho ne ible zgaa zhow, rzac zho zig nac zeene ranle zhow. Bien zho ne tib

ziaadtedse zho lo guidzliu rii, nacse zho zig tib menzit.

¹⁴ Ni ne sca bien zho tib ziaadtedse zho lo guidzliu rii, ga rlu ne dzigoraa gdzin zho zaatne gacpaa ladz zho.

¹⁵ Sac telne niend zho ne scaw, znuse mbire zho ney zho zaatne brieë zho ga.

¹⁶ Tibaque laa guic zho güeynie ne ib zdzin zho zaatne gacpaa ladz zho gbaa; gacxe waa, rtoladz Dios ne nac me Dios ne rliladz zho, laa me bzhixcuaale guiedz ne gac ladz zho ga.

¹⁷ Zeene been Dios Abraham prueb dien pe nli rnalod Abraham me, rëb me cogon Abraham xpëed Abraham Isaac; ne dib zdoo Abraham rnalod me Dios gane niicle tibaque mëed ga lo me, per bleeladz me mëed co, laa me niutle win niac win gon.

¹⁸ Ni laa xtiidz Dios nac ne win gunctal lo xtii me!

¹⁹ Laa me niut win, sac nanpaa ne nroob poder ne rap Dios, telne niet win nrieelo mbeeban Dios win; ni nligaa rrieëquia gut win ga ni biire brieëban win tib.

²⁰ Niiclegaa Isaac, ne dib zdoo me bnalod me Dios, gane zeene bnan me gunlay Dios grop xpëed me, Jacob ni Esaú, bzeet me zha gac lo xquielmban zho.

²¹ Scaque Jacob, ne dib zdoo me bnalod me Dios, gane niicle laa me nole guet me bnan me gunlay Dios grop xpëedbgui José, bzeet me zha gunlay Dios zho; mengol-le nac me, yagale zhoob me per tibaque rleynie me Dios.

²² Scaque José, ne dib zdoo me bnalod me Dios, gane zeene laa me merle guet bzeet me ne ib zdzin dze grieë zha Israel Egipt; haxta psan me diidz güey zho xtsit me zeene laa zho grieë ga.

²³ Zig nac pxoz Moisés, xniaa Moisés, ne dib zdoo me bnalod me Dios, gane bloolan me mëed niow yeen co lidz me tson mëë; ib bdziebd me miñe bnaney rey Egipt.

²⁴ Niiclegaa Moisés, ne dib zdoo me bnalod me Dios, gane zeene laa me broob bdeetraa me diidz niunbyg zho me zig xpëedmiag rey;

²⁵ laa ne niaan me lidz rey nleynie me grë ncuane niunctal xtol me, mazd bleeladz me me psaci zho me grë menladz me.

²⁶ Bien me ne nonguelraaw ted me guielnë zig pteed zho Jesús, lëdle niaanme me grë ncuane non ne no Egipt; sacne miñe mazdraa nonie guic me nac guielnzaac ne gdeed Dios lo me.

²⁷ Ne sca rnalod me Dios, gane bdziebd me xquieldox rey, tiblique been me guic me brieë me Egipt; sac nanpaa me niicle ranđ me Dios, per Dios nacie me.

²⁸ Ne scaque rnalod me Dios, gane bnaney me been zha Israel Ini Pascw, ni bnaney me bdiaab xchen carner yeen grëse ro lidz zho, zeena guete xpëed glo zho wdze co.

²⁹ Grë zha Israel co, ne dib zdoos zho bnalo zho Dios gane wbiig lo Nisdoo Nizhnie, bzhial tib nëz mbidz bded zho; laa zeene gocladz grë xmenguiib rey Egipt nded zho, znuse bdzieel lo nisdoo co stib, grëse zho gut.

³⁰ Ne scaque dib zdoos zho bnalo zho Dios, gane bliaal biedz nroob ne ndze igo guiedz Jericó, zeene bza gadz ngbidz noyecw zho igo biedz co.

³¹ Zig nac Rahab, wnaa ro nëz ne bio guiedz Jericó, ne dib zdoos me bnalo me Dios, gane peet gocd me dze ne bnitlo grëse menladz me, sacne bnalod zho Dios; me ga bdeed zaatne blëz zha ne glole pxeel zha Israel güey wleets ga.

³² Ni noragaa zha ne sca dib zdoos bnalo Dios, haxta tiemple ygaad gzet naa zho. Zig nac Gedeón, zig nac Barac, Sansón, Jefte, zig nac David, zig nac Samuel, ni grëragaa zha ne biadteed xtiidz Dios lo miech.

³³ Ne sca dib zdoos zho bnalo zho Dios, no zho beenchen grë guiedz nroob, no zho bnabey grë guiedz zigne nonguiela, no zho gonlo grë mine bzeet Dios gdeed me lo zho, no zho role meedz bdedlaa zho;

³⁴ no zho lo beldox bio zho ni peet gocd zho, no zho lo spadle bdedlaa zho, no zho gzhe gzhele rac zho per bdaan zho; no zho biablode lo dil ni biire pcaa zho fuerz stib, haxta benxoon zho zha zit ne nodilnie zho.

³⁵ Grë men wnaa, no zho gonlo brieaban menlidz zho.

Nzian grë zha ne sca bnalo Dios, no zho psacsixuu miech zho, per ib bdeete zho diidz niun zho mine racladz miech, mazd bleeladz zho zho beet miech zho; sac nanle zho mazdraa ndzon guielmban ne yгаа zho zeene laa zho grieaban.

³⁶ Nogaa zho bgaa beennguzee miech zho, bdiñ zho zho, bzoob zho zho lo caden, ni bloo zho zho ladzguuib;

³⁷ no zho bdeedquie miech zho haxta gut zho, no zho bgaa bloosier miech zho, no zho bgaa gut zho lo spad. Nogaa zho mbanse rac, pquianguzhoon zho lo miech, nëzrii nëzrec zie zho, mbanse rac zho guiend pe gow zho, guiend xab zho, tib lëse guid mëcwxii, tib lëse guid chiv nriel zho.

³⁸ Miech wen nac zho, ni rieguaald grë miech guidzliu rii guiaadban zha co lo zho, per scataa bded zho. Niapse grë dan bidz, grë dan gui, bio zho; zaatne blëz zho grë len blë, zaatne blëz zho grë len bliee.

³⁹ Ni golganac ganle, niicle nli bianzuii zho lo Dios ne sca dib zdoos zho bnalo zho me, per gardaque yгаа zho guielnzaac ne psan me diidz ga yгаа zho;

⁴⁰ sacne laa Dios racladz tipse ygaanie ne zho guielnzaac ne psanle me diidz gneedz me lo ne niina, sac min co nac mine mazdraa nroob.

12

Choot gbiched lo Jesús

¹ Nziandox grë zha ne sca dib zdoos bnalo Dios. Ni niina, grëse zha co laa zho ndxiewi lo ne; sac rrieequia tib lo prueb no ne noquiaa ne corr. Gacxe waa, golgotsaa csaan grë ncuaaane runctal xtol ne, zeena ycadraaw parne grieelo tiblrique dzio ne nëz gdziñ ne zaatne no gdziñ ne.

² Tibaque golgotsaa guionie guic ne laa ne gdziñ lo Jesús ga, men ne zo lo ne grëse ne ne rnalo ne Dios, ni me lozh gzdziits ne. Tel me gon, niicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guielbley ne gan me zeene lozh ga. Ncuaaane mbeeguielto ga zeene sca quia me lo cruz, per ptoladz me.

Ni nligaa, zig nac niina cue Dios nëz derech ga zob me gbaa.

³ Golguien sca, zeene racmban zdoos to, zeene racladz guiaan zdoos to, ib gdeete to diidz; golsoladz ganle, zha pxecw Jesús bded me grëtaa mine pteed grë miech ngoopdol co me.

⁴ Parga nli, në noded to noxco to gunctalde to xtol to, per gard guiab ne yгаа to ne gut miech to.

⁵ Golsoladz ganle zha rnee Dios lo grë zha ne nac xpëed me. Znu raquiet lo xtiidz me, zaatne rnee:

Xin, zeene rso Dios diidz lo luu gundraa luu grë ncuaaane nonguield, none sac zdoos luuw;

niicle zeene gactoxgaa me lo luu, gacmband luu.

⁶ Sac gon zha ne sca rso me diidz lo, ga rlu ne rleynie me zho;

zha ne ractoxgaa me lo, ga rlu ne nli xpëed me nac zho.

⁷ Golguien sca, gacmbande to tel pe caxtigw ne cteed Dios to. Golgan ganle, niicxe miech na, ractox zho lo xpëed zho zeene rond win diidz.

⁸ Nana, tel ib peet glisquidgaa me lo to, gase dzigo rlu ne led xpëete me nac to; sac gon, zha ne nac xpëed me, rlisqui me zeene rond zho xtiidz me.

⁹ Golsoladz ganle, zeene rac ne mëedlas rlisqui pxoz ne zeene rdziuiun ne ncuaaane nonguield; scagaa ne, rien ne ne me rnabey lo ne. Nana, çpe lel Pxoz ne dzigo men ne zob gbaa gnabeyd me ne? Ni none gon dzion ne xtiidz me, zeena yгаа ne guielmban.

¹⁰ Gotsaa gwi ne ganle, zig nac pxoz ne, rquia me rlisqui me zeene rdziuiun ne ncuaaane nonguield, sac racladz me zacse gban ne, ni chop tsonaque dze nac lo guielmban rii; sangue Dios gon, laa me noseed ne par gac ne tib miech mbe zdoos, zig me; ni lëe min co nonraa.

¹¹ Parga nli, tsod zha ne gley zeene noded zho caxtigw, sinque në rzac zhow; per zeene rded ga, zha ne rienpaa rquiina haxta wen riaan zdoo zho, sac rseed zho zaacse rban zho.

Nodne gbiche miech lo Dios

¹² Nana sca, telne bdzagle to, golgun ndip nia to, golgun ndip ni to stib,

¹³ zaacse golsë, tib nêz goltso zeena gzi-aabnêzde to; dzigo scagaa zrieelo gacnie to zha ne lega noyobe.

¹⁴ Goltsoxco niowse golbannie samiech to, ib guncaldel to xtol to; sac zha ne mbed zdoo, grieelod gdziñ zho lo Dios.

¹⁵ Tibaque goltteedolsa zha ne nacgrë to, golguien ganle racladz Dios gacnie me to, napa na lel nozozit to lo me. Sac zha ne rrozit lo Dios, zeene laa mine nac zho rzhooobnen, nzian zdoo zha ne rsan zho, rlozh ga grëse zha co runctal xtol.

¹⁶ Ib gunde to grë ncuane tsod zdoo Dios, ib quitniede to guielnzaac ne bneedz Dios lo to; gunde to zigne been Esau, tel Esau, por tib plat nis scuaan psaan me guielnzaac ne bga me ne nac me mëëdgl;

¹⁷ ni nanwen to ganle, zeene laa me goclazd nab pxoz me niunlay Dios me zig mëëdgl, brieelodraaw. Dzigoraa rquia zdoo me, haxta roon me rnab me ygaa me guielnzaac co stib, per pe xtsiinraaw.

¹⁸ Golguien sca ganle, nroob nac guielnzaac ne bneedz Dios lo to niina! Led yede to ndziñ pa tib cho gui, zig bdziñ xmengol to cho Gui Sinai padzeela. Grë xmengol to, zeene ndxie zho zhan Gui Sinai, beldox ne gon zho rso guic gui co, ni goc tib ncow, lala rio bi ratsie nguzi ni rrie me;

¹⁹ ni lala nguiedz rcuedz trompet, ni nguiedz zëëb tsi Dios rnee me lo zho. Zeene gon zho scataa nguiedz rnee me, bdzieb zho; dzigo bnab zho lo me gneedraa me.

²⁰ Bdzieb zho bin zho rëb me, zha ne tsep cho gui co none gdeedquie zho zho, gliz lanzgaa zho zho haxta guet zho; scaque grë ma.

²¹ Ncuane gdziebdoo ne gon zho ga; haxta Moisés rzhidz lo dzeb co.

²² Sangue to, rrieequia haxta Jerusalén, zaatne no Dios nguiamban gbaa bdziñ to, zaatne ndxie grë anjl guizhiu ne roolnie Dios;

²³ zaatne ndxie grë zha ne glopaa bzëëb xnëz me, grë zha ne zhooble lë gbaa ga. Laa to bdziñle lo Dios, men ne run guielwxtis; zaatne ndxie grë zha ne psanme Dios biaan zho zig tib zha ne peet xtol.

²⁴ Laa to bdziñle lo Jesús, men ne rdziñnie miech lo Dios niina ne laa Dios psan stib xtiidz me; laa to bdziñle zaatne rrieequia bliaa xchen Jesús len yadoo gbaa, lë ren co mazdraa non lëdle xchen Abel.

²⁵ Miñ co nagon, golguien ganle, zha bnitlo grë zhagol ne sca ib bind xtiidz me, ni tib miechse pteed xtiidz me lo zho. ¿Pe lel na dzigo ne mezhal quianee lo ne? Ib diedlaad ne gon telne dziond ne mine rnabey me.

²⁶ Zeene bnee me lo grë zhagol co, haxta beencxidz me guidzliu, ni rnee me: “Zbire naa guncxidz naa guidzliu stib, haxta ye gbaa guncxidz naa.”

²⁷ Gase na ganle rlu, lo grëse ncuane bzaa me zdziñ ne laa me csiniw, dzigo laaw nitlo; lozh ga, guiaan mine gdziñdraa dze nitlo;

²⁸ ni ga nagon gneedz me gbiaaz ne. Gacxe waa, golgotsaa dziuun ne mine rnabey me, golgotsaa gdeed ne xquizh lo me, guien ne men nroob nac me; ni scagaa me zley me.

²⁹ Golguien ganle, tel me ne nac me Dios ne rililadz ne, nac me zig nac tib beldox ne peet rdedlaad lo.

13

Golban zigne racladz Dios

¹ Bets, bzian, golleynie grë zha ne nacgrë to, golguien ganle tibaque men ne nac Pxoz to.

² Goldeed zaatne cuëz grë menzit ne zo nêz. Blac zha ne sca bdeed lidz blëz zha ne zo nêz, no hor biend zho haxta xanjl Dios blëz lidz zho.

³ Golt siegan grë zha ne niogyu ladzguiib, goltso xliaadz zho zig nac zeene ye to nogrë zho ga. Golgacnie grë zha ne nosacsi miech, nanle to ganle zha rzac ne zeene no ne tib lo guielnë.

⁴ To ne nac to zha ne ptsieelniale, sacde to guieltsieel zig beelze pe wguil, ib yquidiede to tsieel to; sac zha ne yquiangob tib zha ne nonguield tsonie zho o yquiangobgaa zho tib zha ne nole tsieel, ib tedsod zunquizh Dios zho dol co.

⁵ Tsienalde to loxaque dien zha gunlo to dimi; sinque golley totsaque no mine yquian to. Golsoladz ganle, led znu rnee Dios lo ne: “Tibaque gacnie naa to, ib csaand naa to.”

⁶ Gacxe waa, nod pe nacne ctseb zhgab ne, none tibaque dzionie guic ne dzieets ne: Dios nac men ne nacnie naa, ¿pe nac nadien gdzieeb naa?

¿Peet grieelod gun miech naa!

⁷ Golsoladz zha goc men ne bzo lo to pseed to Xtiidz Dios, ni dib zdoo to golnalo Dios zigne bnalo me Dios.

⁸ Golguien ganle, gdziñd dze ne gdzëë Jesús, zigne goc me padzeela, scaque nac me niina, ni scaquegaa gac me grëtaa len iz ne guiaadraa.

⁹ Ib gliladzde to grë wseed ne ziaadnie stib miech sca, wseed ne ni nacdraa Xtiidz Jesús. Diosse nac men ne lozh godzziits ne lo mine rililadz ne; nacda por tsienal to dien pe gow

to, pegaa gowde to; sac zha ne zianaḽ minḽ co, paat yquinda lo zho.

¹⁰ Grēse zha ne guiab tsienalḽ minē rnabey ley parne ycaania Dios zho, tib ladle rsaḽ zho minē been Jesús ga. Rrieequia no tib lo pcoog, ni nese zrieelo yquini gon ne ndziib lo co; laa grē pxoz ne zienalḽ minē rnabey ley, grieelod yquini zho gon co.

¹¹ Glo, zeene ret ma ne rigon lo Dios, rlozhse rielaaḽ pxoz nroob xchen ma zaatne Ndadoo parne guiooglo lo xtolḽ menḽguedz, dzigo rienie zho xcuerp ma ro guiedz, ga rzēeg zhow.

¹² Scaque Jesús, zeene bzhiee xchen me psanḽmbe me miech lo dol; ro guiedz ga güeysacsi zho me gut me.

¹³ Scagaa ne niina, golḽgotsaa griee ne lo grē ncuaaḽne lo guidzliu rii, golḽgotsaa cueeladz ne ne guionaḽ ne zhits Jesús dzianḽ ne grē guielḽnē, telḽne no dzianḽ new.

¹⁴ Benque ndionḽ ne ganḽle, nacd lo guidzliu rii zaatne gbiaazpaa ne, sinque laa ne zionaḽ yгаа ne zaatne naraa gneedz Dios gbiaaz ne.

¹⁵ Laa ne ndionḽle ganḽle, Jesús nac menḽ ne gunḽctsiḽ ne lo Dios; gacxe waa, golḽgotsaa gleynie ne Dios, golḽgotsaa gdeed ne xquizh lo me. Lēē minḽ co gac zig tib gon ne gdeed ne lo me.

¹⁶ Golḽsoxco golḽgunḽ grē ncuaaḽne yquini lo samiech to, ncuaaḽne rgaa lo to, golḽdeed palala lo grē zha ne guiendḽ pe yquini; sac rrieequia lēē stib gon ga gdeed to lo Dios, ni minḽcogaa rleyḽnie me.

¹⁷ Golḽgonḽ xtiidz zha ne zo lo to noseed to Xtiidz Dios, golḽguienḽ zha rnabey lo to, sac gonḽ zha quianap to ni zha gdeed cuent lo Dios zha pquianap zho to. None gon to xtiidz zho, zeenaḽ inē gley zho yquiaanap zho to; sac gonḽ, telḽne lelḽ nogoguelḽnē to zho, lēda ga gunḽ to.

¹⁸ Golḽnab lo Dios gacniēḽ me no tibaque znu dzioxco no dziuunḽ no minē racladz me, me naḽ ganḽle mbe zdoo no, mbe xquielḽrien no.

¹⁹ Ni minē rsopaa naa diidz lo to, golḽsoladz golḽnab lo Dios gneedz me diidz gbiire guialḽniob naa i, guialḽganḽ naa to.

²⁰ Jesús nac menḽ ne quianappaa ne, zig rquianap baxtor xpēcwxiiḽ zho; me gut bzhiee xchen me zeene psanḽ Dios diidz stib zha gdziḽḽ miech lo me; ni diidz cosi gdziḽḽdraa dze ne gdzēēw.

Dios menḽ ne bleeban Jesús, menḽ ne racniēḽ miech peet zhḽgab rtsebd zho,

²¹ me gneedz guielḽbiini lo to grieeḽlo to gunḽ to minē rnabey me. Jesús sca golḽnalo, zeena grieeḽlo gban to zigne rdziladz Dios. Dios nac menḽ ne rieguialḽ dziuunḽnon ne, zigtaa ninaw, zigtagaa grēraa lenḽ izdoo ne guiaada. Scaw nagonḽ.

²² Bets, bzian, laa naa rnab lo to ib glēēd guic to, golḽcaania palalse diidz ne pso naa lo to nu.

²³ Racladz naa gacnaḽ to ganḽle, laa bets ne Timotē brielee ladzguiib; telḽne zlansoniob me lo naa nu, grop no me guiaad lo to i.

²⁴ Golḽsiguielḽ golḽdeed tib zhibdiuzh naa lo grē zha ne zo lo to i, ni lo grēragaa zha ne nacgrē to ngab to lo Dios. Ye grē zha ne no nēz Italia nu, laa zho rxeelḽ zhibdiuzh zho lo to.

²⁵ Guiaanne Dios to sca. Me glu ganḽle pa lotaa noxco me to.

GUITS NE PQUIAA SANTIAGW

¡Diuzh to grëse to!

¹ Naa nac Santiagw, tib zha ne quiayun xtsiin Dios, tib zha ne quiayun xtsiin Jesús, men ndzon ne rnabey. Laa naa rquiaabduzh to grëse to ne nac to zha ne ziaad lo xti Israel, tel pa lotaa nac guidzliu ne no to.

² Bets, bzian, ndal ncuuaane rded ne parne glu dien pe nli dib zdoo ne rnalo ne Dios. Tel pe nactaa ncuuaane noded to i, ib gacmbande to, sinque golley.

³ Sac gon, zeene squi ran ne grë pe guielnë, ga rseed ne tibliladz rac ne tel petaa noded ne.

⁴ Golseed sca tibliladz golgac. ¡ib guiaand zdoo to tel petaa nac guielnë ne gan to! Sac zeene sca cseed to gan to guielnë, zac to tib zha ne dziits so lo Xtiidz Dios, tib zha ndzinli, tib zha ne ib peet gdziebd.

⁵ Zha ne racladz yгаа guielbiini co, zac gnab zhow lo Dios, ni mesi gon zdeed mew; sac guielbiini ne gnabtaa ne lo me zneedz mew. Led yed me yca, led yed me glisqui pe nacne pe gnab ne lo me.

⁶⁻⁸ Lëëraasi dib zdoo ne none gnab new, nodne gacchop guic ne; sac zha ne racchop guic, gdzind dze yгаа zho mine rnab zho. Nac zho, tib dze dib zdoo zho rliladz zho zгаа zho mine rnab zho, stibgaa dze na rliladzdraa zhow, ib ractiblid guic zho; masaque nac zho zig nac grë mtsiin ne rbib lo nisdoo, sac tel mtsiin co loxaque nëzrii nëzrec zienie mew.

⁹ No zha bets ne, zha bzian ne, quianied zho ncuuaane yquiin zho, par miech peet nond zho; per none gon ine gley zho sac nroob non zho lo Dios.

¹⁰⁻¹¹ Scagaa zha ne rapchen, none ine gley zho niina ne biaanwin zho, sac nëz lo Dios grë ncuuaane rap zho nonda. None guien zho niicle ne nroob rapchen zho, zeene laa zho gbi lo guidzliu rii nuque guiaan grë ncuuaane rap zho. Masaque nacse zho zig nac guieen grë guizh ye, tel guiee cow, zhixtsëese ngbidz rcuuidz guizh ne zoba lo, rlozh ga rli-aalgaw, gataa rnitlo xquielniowa.

¹² Dichos zha ne ib rzozite lo Dios niicle no nzian ncuuaane rcheep zho gunctal zho xtol zho, per rund zhow; sac zha cosi zгаа zho tib guielmban ne gdzind dze lozh, guielmban ne bneele Dios gdeed me lo grëse zha ne rleyynie me.

¹³ Zeene sca no ncuuaane rcheep ne gunctal ne xtol ne, guiabd ne togo Dios noquuil ne gun new; sac gon led yed Dios rzoobladz ncuuaane ndzinlid, ni niicle rquiidgaa me miech gon zhow.

¹⁴⁻¹⁵ Grë ncuuaane ndzinlid ne rzoobladz ne, grë ncuuaan yozh ne rionie guic ne, min co nac mine rquuil ne. Lëew nac mine rcheep ne runctal ne xtol ne, ni ndionle ne ganle, lëë gdib mine gdeed dol lo miech nac guielnëdoox ne yгаа zho.

¹⁶ Bets, bzian, gac-wete to sca.

¹⁷ Golguien ganle, ncuuaane rquiin, ncuuaane ndzinli, min co nac mine rneedz Dios. Tibaque nac me, led yed me rdzëë par guiab ne meque rnabey rac guielntseeb. Me nac tib biini ne gdzind dze guiuu, ni tib lë guielcow guient zaatne no me.

¹⁸ Zdoo me gola bneedz me tib guielmban ndzon lo ne niina ne laa bliladz Xtiidz me, masaque rrieequia ne nac mëëdglo lo me.

Nacda yquiaadiagse miech Xtiidz Dios

¹⁹ Bets, bzian, ne nac to zha ne rleyynie naa: Golgacnan ganle, ne ne nac ne zha ne no xnëz Dios, none dzioxcorraa ne yquiaadiag ne, zeene gnee ne none guien ne pa lotaa gnee ne, ni gund ne ne rnadse pew laa ne glëële.

²⁰ Sac gon, zeene rlëë ne, grieelod gun ne ncuuaane rdziladz Dios.

²¹ Golguien sca, golsaan grëtaa ncuuaane ndzinlid ne ziyun to, golbiche lo grë guielntseeb ne znutaa quiayac niina. Ine ndooladz golgac, golleyynie Xtiidz Dios, diidz ndzon ne peedle to; sac gon lëew rlu zha laa to lo dol.

²² Per guiabde to togo loxaque yquiaadiagse to Xtiidz Dios lëëlew ga; sinque ib none gban to mine rquiaadiag to, sac tel ib gbande tow lëëque to noquidie to ga.

²³ Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan:

²⁴ Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne.

²⁵ Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grëtaa ncuuaane gun zho.

²⁶ Gacxe waa, zha ne rnee xnëz Dios no zho ni rgobeyd zho pe rnee zho, lëëque zha noquidie zho ga, ga rlu nlid ziana zho mine rnabey Dios.

²⁷ Sac gon, par Dios men ne nac Pxož ne, zha ne no xnëz me none tsie zho tsiegun zho xyudar grë mëëdbziab, tsiegun zho xyudar grë wnaa ne ret tsieel, ni tsoxco zho zaacse gban zho, ib tsienald zho ncuuaane ndzinlid ne run grëraa miech.

2

Lëda ga run zha ne rbe

¹ Bets, bzian, guṇde to ne ncueese lo miech ne gnee to, sac zha ne sca run, zha dien guiab zho xnēz Jesús no zho.

²⁻³ Ron naa, zeene rlanso tib zha ricw zaatne rcaalsa to i, nacw zho xab niazh zho, no grē xnil or zho nia zho, lēlēd rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: “Ise bzo, telne racladzga luu sob luu, lo liuse i bzob.”

⁴ ¿Pe sca na rac zha ne no xnēz Jesús? Zha ne goṇ sca run, ga rlu zho niapse guielntseeb no guic zho.

⁵ Lēda ga goṇ bets, lēda ga goṇ bzian. Golgacnaṇ gaṇle, ible Dios ble miech ne peet rapd lo guidzliu rii, zeena dib zdo zho gnalo zho me, zeena yгаа zho zaatne bneelee me gdeed me cuēz zha ne noxco rleynie me. Gotsaa gwi ne sca gaṇle, zha ricw nac zho nēz lo Dios;

⁶ laa to goṇ, no to rlozhd gzhidznie to zho. ¿Pe ib riende to, grē zha ricw co nac zha ne rsacsi to? Rgobniu zho to, riego zho to lo wxtis;

⁷ haxta rdzibdee zho Jesús, men ndzon ne nacie to niina.

⁸ Ib none gban ne zigne rnabey Xley Dios, lo xley me zhobnee: “Bleynie samiech luu, zigne rleynie luu luu.”

⁹ Golguien goṇ, doḷ i noyun to squi rbe to dien cho nac zha ricw, chogaa nac zha mban; sac Xley Dios i quiaguuits to.

¹⁰ Golgacnaṇ gaṇle, zha ne rguuits tibaque xley Dios, niicle maase zienal zho grēraaw, laa zho beenctal-le xtoḷ zho ga, rzacaque zho zig zha ne noguuits grēw.

¹¹ Sac tibaque men ne psana grēsaw. Gacxe waa, tel zha ne zienal mine rnee: “Gute luu samiech luu”, per rguuits zho mine rnee: “Yquiangobd luu zha ne led tsieeld luu”, laa zho beenctal-le xtoḷ zho ga.

¹² Niowse sca golgac, niicle zeene gneegaa tow, niowse goḷnee; sac goṇ, zdziṇ dze cxob-doḷ ne dien pe wban ne zigne rnabey Jesús, te wband new ye.

¹³ Grē zha ne ni lalnu rquiad zdo samiech, gaḷ dze co scaque ni lalnu yquiad zdo Dios zho; sangue zha ne rquia zdo samiech, ible zdedlaa zho lo guielnēdox ne cxeel me.

Zha ne rnalo Dios none glu zhow

¹⁴ Bets, bzian, ¿pa dien rquiin guiab ne dib zdo ne rnalo ne Dios, xnēz me no ne, ni tel rund ne xyudar samiech ne? ¿Niacle scase laa Dios csillaale ne?

¹⁵ Gzoob ne no zha ne nacgrē to i, yase tib bets tow, tib bzianгаа tow, ranlo to guind xab zho, niicle quaniem zho ncuaane gow zho;

¹⁶ ni guiab to lo zho: “Csacsid luu luu, got xabnal luu, dow ncuaane racladz luu”,

per loxaque diidz sca guiab to, ni gdeete to ncuaane run falt lo zho. ¿Pa dien yquiin diidz co?

¹⁷ Scadaa nagon paat rquiinda guiab ne rnalo ne Dios, ni tel rund ne mine rieguial ne gun ne.

¹⁸ Gacxe waa, zha ne rnalo Dios ni run zho mine rieguial zho, no zho gnē lēda i run zha ne rnee lēlew ga totsaque gnalo ne Dios. Ni rap zho rson, sac grielod glu ne rnalo ne me, telne rund ne mine rieguial ne.

¹⁹ Nli wena run zha ne riladz tibaque Dios no, per grielod guiab zho lēlew ga, sac goṇ zig nac mendox ye ma riladz tibaque Dios no, per led por mincod laa ma lo guielnē ne cxeel me, sinque haxta rdzieb ma me.

²⁰ Nadzpaaxen zha ne sca rzac, pe ni lalnu riend zho paat rquiinda guiab zho riladz zho Dios ni telne rund zho mine rieguial zho.

²¹ Golgan gaṇle, zig nac pxozgol ne Abraham, porne been me mine rieguial me gane pcaania Dios me zig tib zha ne peet xtoḷ. Led rsoladz to gaṇle, zeene rēb Dios lo me tsielogon me xpēed me, güey me zaatne pxeel Dios me.

²² Gotsaa gwi ne gaṇle, zeene been Abraham mine bnabey Dios me ga, ga blu ne nli rnalo me Dios, ni hor co mazdraa dib zdo me bnalo me Dios.

²³ Lo Xtuidz Dios zhobnee ne scataa dib zdo Abraham bnalo me Dios, gane pcaania Dios me zig tib zha ne peet xtoḷ; zēeb diidz, tib zha ndzieeldiidz Dios goc me.

²⁴ Golgacnaṇ sca gaṇle, led loxaque gliladzse miech Dios, laa me ycaaniale zho; sinque none glu zho nli riladz zho me, gun zho mine rnabey me zho.

²⁵ Golsoladz gaṇle, scaque wnaa ro nēz ne brielē Rahab, por been me xyudar samiech me, gane pcaania Dios me zig tib zha ne peet xtoḷ; sac zeene goṇ me noxtseeb zha ne pxeel Josué zie wleets ga, bdeed me zaatne biolan zho, ni blu me stib nēz ne wbiere zho, bgaad zho.

²⁶ Gase na gaṇle rlu, paat rquiinda guiab ne riladz ne Dios ni tel rund ne mine rieguial ne, nacle ne dzigo zig tib xcuerp ngutoo, tel cuerp cow, ¿pa dien yquiina?

3

Ncuaane run ludz miech

¹ Bets, bzian, guiabde to lega tso to glisqui to ncuaane run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech, per gacnaṇ zho gaṇle zha ne rseed miech, mazdraa nroob ncuaane tsasqui lo zho gaḷ dze ne laa zho gacredz lo Dios.

² Grēse ne nzian mod ne rxin ne lo samiech ne. Teļ niaca miņe no tib zha ne grieelo ycuēz ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow.

³ Gotsaa gwi ne ganle zig nac guay, con tib lē win guib ne rgo miech ro ma rrieelo rnabey zho ma, rienie zho ma nēz ne racladzta zho.

⁴ Scaque barcw, niicle ne nrooba, no hor rriee medox lo nis rcheepa, per con tib lē yag lag win ne rsē miecha, rrieelo rienie zhow nēz ne racladzta zho.

⁵ Scapaa nagon nac ludz ne; niicle ne winsew, per nroob guielqui ne ruņa. ĩRan to ganle tib bzhil yeense name rzobgui dan!

⁶ Ni teļ ludz ne gon, rriequia tib bel ga naca. Tib lē win xcuerp ne naca, per guielqui nroob ne ruņa, runctala xtoļ miech. Gun ne cuent tib lē gui ne brīee gabil naca; ni dipse lo xquielmban miech noxtseeb zho low.

⁷ Golwi ganle, rrieelo miech runndoo zho grē ma ne rsiibe, grē ma ne rzēleņ liu, haxta grē ma ntseeb, haxta grē ma ne no nisdoo, rnabey zho ma.

⁸ Per guieņd zha ne gon grieelo gnabey ludz; ncuaaņe ntseeb naca, choot grieelod gnabeya; masaque laaw no par gnitlow miech, zigne ruņ grē guiz ncuaan.

⁹ Lēew name rquiin ne roolnie ne Dios meņ ne nac Pxož ne, ni rlozh ga lēēqew rdzibdee ne samiech ne, ni lalnu riēņd ne me bzaa zho, bīaan zho zigne rlu me.

¹⁰ ĩPe ga nadien, ro ne roolnie ne Dios, ni roque ne rgodee ne samiech ne?

¹¹ Bets, bzian, led scada gon. Zig nacse tib zhlian, ĩniacxe zaatne rlanaque nis nex gaque rlan nis yuzed?

¹² Tib yag nexgaaw, ĩniacxe rquia xnex yag oliv lo yag guigw, yquiaagaa guigw lo lbē uv? Naņle to ganle racd miņ co.

Zha ne nixbiini

¹³ Lo grē zha ne nacgrē to i, teļ no zha ne rzac zha nixbiini nac zho, none glu zhow iņe zaacse gbannie zho samiech zho, gac zho tib miech ndooladz zig none gac tib zha nixbiini.

¹⁴ Per teļ tibaque nē rac zdoo zho raņ zho zha ne stib noded, tibaque noguib zho csaņwin zho samiech zho; gacnaņ zho ganle, led scad rac zha nixbiini. Ni lalnu rieguiald tso zho csaņziuu zho zho.

¹⁵ Led scad nac guielbiini ne rdeed Dios, sinque lēē zhiwseed mendox ga, lēē miņ co zienal grēraa miech guidzliu.

¹⁶ Zeene sca nē rac zdoo miech raņ zho cho stib noded, zeene sca tibaque no zho dieņ zha guianglaa zho lo samiech zho, lox-aque dil, loxaque grē guielntseeb rzobni zho ga.

¹⁷ Zha ne nli rap guielbiini ne rdeed Dios, ruņd zho miņ co, laa zho zienal;

ndzinlise gban zho,

rleynied zho dil,

rguib zho zaacse rnee zho lo miech,

wen rac zho lo grēse miech,

rquia zdoo zho samiech zho,

ruņd zho cue zho zha ne mazdraa gacnie zho,

ncuaaņe ruņ zho dib zdoo zho ruņ zhow, niapse ncuaaņe ndzinli rioxco zho.

¹⁸ Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdziņ dze ne raņ zho zeene laa grē miech co rac tib miech wen.

4

Zha ne rleynie guielntseeb

¹ Ne squi tibaque rlēēsa to, tibaque quiadiļ to, lēē miņ qui gon riegāl por grē guielntseeb ne rio guic to.

² Rio to rlogui to ncuaaņe grieelod yquianie to, rlozh ga, haxta rut to samiech to parne yquianie tow. Nē rac zdoo to raņ to cho zha quianie ncuaaņe quianiede to, zeene raņ to rrieelod yquianie tow laa to rlēēnie zho, haxta rdilnie to zho. Rrieelod yquianie to ncuaaņe racladz to, sacne rnabde tow lo Dios.

³ Niicle teļ rnabgaa tow lo me, rneedzd mew, sacne laa guic to zienie yquianie tow loxaque par gdeedguxt zdoo to, gdeedguxt xcuerp to.

⁴ ĩQue tal ntseeb to! ĩPe ib riende to, Dios gon rlēēnie to zeene squi rio to rleynie to grē guielntseeb? Sac miech ne squitaa rleynie guielntseeb, lo Dios ga racntseeb zho.

⁵ Golgan ganle, zha rnee lo Xtiidz Dios: “Espiritu Sant, meņ ne pxeļ Dios nacnie ne, rleynie me ne, ni racladz me zhaa ncuaaņe gleynie ne laa ne gleynie ne me.”

⁶ Ni teļ Dios gon, noxco me ne, ib zacnie me ne griee ne lo guielntseeb; sca rnee lo Xtiidz me, zaatne rnee: “Zacniēn Dios grē zha ndooladz, sangue grē zha niats, rdzigiueņd me zho.”

⁷ Golguiēņ sca, iņe ndooladz golgac, golgon miņe rnabey Dios. Gdeetraa to diidz yquil mendox to, sca golgun zeena zhal ma gbiche ma lo to.

⁸ Dib zdoo to golsēēb xnēz Dios, zeena scagaa me zacnie me to. Goltsoxo guiaaņmbe to lo grētaa xtoļ to, golnab lo me csaņmbe me zdoo to, mese gnalo to, gacchopdraa guic to.

⁹ ĩGolguiēņ ganle, ndzinlid i squi mban to! ĩMban golgac, goltso guielnē, golgoon, laa ne tso to gzhidz to, laa ne tso to gley to!

¹⁰ ĩNdooladz golgac lo Dios, zeena cuee me to lo grē ncuaaņe nac to, csaņglaa me to!

¹¹ Bets, bzian, ib gneenēde to zha ne nacgrē to. Zha ne rneenē bets zho, bzian zho, beļ zho, ni rdziibdoļ zho zho, Xley Dios ga

rguiits zho. Laa ne so zho gacladz zho zha gun guielwxtis, mazd tsoxco zho gban zho zigne rnabey ley.

¹² Golguien ganle, Dios psan ley, ni mese rieguial gun guielwxtis, me nan zho cuibdol, chogaa csilaa me; per to nadien, zcho nac to par gdziibdol to samiech to?

¹³ Togaa ne nac to zha ne rnee: "Na gzhe widz dien pa tib guiedz ne guioo ne, guio-biaaz ne ga tib iz, ga dziuun ne wzi dziuun ne wto, dziuunlo ne dimi", golquiaadiag min gne naa lo to ganle.

¹⁴ Ne sca rnee to, ipe wen wen nan to dien yo to gzhe widz col. iPe rande to lega nacse xquielmban ne zigne nac xcow las ne rbe ral sil? Zhisaque rbew, zeene rlozh ga rludraa dien yow.

¹⁵ Mazd golguiab: "Telne zneedz Dios diidz gbanraa ne, min rii, min rii dziuun ne."

¹⁶ Led tsoede tibaque guielniats qui zienie guic to, golguien guielntseeb ga run zha ne rac niats.

¹⁷ Ni golsoladza ganle: Grëse zha ne nanppaa pe nac ncuuaane ndzinli ne no gun zho ni rund zhow, xtol zho ga runctal zho.

3

Zha ricw ne zienal guielntseeb

¹ iGrë zha ne rapchen, zha ne zienal loxaque guielntseeb, golquiaadiaga ganle! Golgoon, golquiaadan redz niina, sac gon nroob nac guielnë ne gan to.

² Grë ncuuaane beenlo to i, peet nonda, lega naca zig nac grë ncuuaane biodzle; grë xab to i, rrieequia ncuuaane dowle mxila.

³ Grë guuib or, grë guib plat ne squitaa quianie to, rrieequia noloozhle bioochena; ni scadaa gon nitlo to, masaque gac to zig tib ncuuaane riab lo gui.

Laa to beenlo grëtaa dimi qui, rzac to lëew yquiin to len dze ne ziaad, ni nande to gon laa dze ne nitlo to ziaadyoble.

⁴ Lëe grë dimi qui gon zëeb to lo grë zha ne quia xtsiin to, noquidie to zho rguizhde to xtse zho. Per golgacnaa ganle, grëse redz ne rquiaa zho zeene mban rac zho squi rsacsi to zho, laa Dios binlew.

⁵ Lo grëtaa iz ne mban to lo guidzliu rii, loxaque grë ncuuaane gdeed guxt zdoo to, grë ncuuaane gdeed guxt xcuerp to noxco to, ncuuaane yozh ne riaabtaa guic to laa to runa, ib riende to laa dze ne nitlo to ziaadgaxle. iLëe to noyun xcuent ma ne noro par guet ma!

⁶ Pe zhistaa guielntseeb ne quiayun to, haxta zha ne peet xtol, zha ne nand glis nia lo miech, rquiaqui to zho ncuuaane rund zho, rnabey to ret zho.

Nodne guieed zha ne rmalo Dios

⁷ Bets, bzian, sangue to gon tiblrique golgac haxta gan to gdziin dze ne laa Jesús guiaad

stib, tel petaa run miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tiblrique rac zho gdipse len mëe guie, rquiambëz zho haxta rdziin dze ne rlaap zho.

⁸ Tiblrique sca golgac, ijb guiaannd zdoo to, sac gon zhile gdziin dze ne laa men ndzon ne rnabey ne guiaad stib!

⁹ Ib tsoede to guieednie to grë zha ne nacgrë to, zeena gunctalde to xtol to; sac zhile gdziin dze ne laa men ne no gun guielwxtis guiaad.

¹⁰ Golsoladz ganle, grë zha ne biadteed xtiidz Dios padzeela, niicle nroob guielnë gon zho, per tiblrique goc zho.

¹¹ Zig nac Job, nanaxe to ganle zha nactaa guielnë ne gon Job, per ib bieete me, ni blozhse gon me guielnë co nroobraa guielnzaac ne bdeed Dios lo me. Ga rlu ganle, zha ne sca rdeed me diidz ran guielnë, led lega rannd zhow; sac nquialadz me miech, rquia zdoo me zho. Dichos grë zha ne sca nac.

¹² Bets, bzian, zeene tsiegala glu to diidzli rnee to, tsoede to gzeet to gbaa, gzeet-gaa to guidzliu par gliladz miech xtiidz to; guiab to: "Lëpaa gbaa qui", "lëpaa guidzliu rii", dien peragaa gzeet to. Tib diidz ne nliw, golguiab: "Nliw", tib diidz ne nliwgaaw, golguiab: "Nlida", zeena gunctalde to xtol to; sac gon zha ne runctal xtol, ible zгаа zho guielnë ne csiab Dios.

¹³ Lo grë to, zha ne no pe tib lo guielnëw, gnab zho lo Dios gacnie me zho. Zha ne no pe tib guielbleya, goonie zho me.

¹⁴ Zha ne rzacnëgaaw, gnabey zho gacredz bla zha ne zo lo to, zha co quëeb nceit guic zho gnab zho lo Dios guiac zho.

¹⁵ Telne dib zdoo zha co gnab zhow lo Dios, zunguiac Dios zha rzacnë co. Zlische me zho lo xquielguidz zho, ni tel por pe falt ne beengaa zho lo me sca rzacnë zho, zun me zhow perdon.

¹⁶ Gacxe waa, tib tib to zeene run to pe tib falt, yqueetsde tow, golzodiidza lo zha ne nacgrë to, lozhse ga glnab lo Dios gun me to perdon, zeena guiaanmbe to lo me. Sac tib zha ne biaanwenle nëz lo Dios, zeene sca pe rnab zho lo me run mew, niicle ncuuaane mazdraa ngana.

¹⁷ Golsoladz Lí ganle, men ne biadteed xtiidz Dios lo miech padzeela, samiechaque new, per dib zdoo me bnal me Dios. Tib dze bnab me lo Dios csiabnd Dios nisguie, ni scase goca, dipse len tson iz groi ni tib lab nis guie biabd;

¹⁸ haxta bnabraa me lo Dios guiba stib, dzigoraa biaba, laa guidzliu biire bdeed guielnzaac.

¹⁹ Bets, bzian, tel cho tib zha ne nacgrë to i sozit lo Xtiidz Dios, ni grieeolo cho tib to ctsire zho nëz yozh ne zie zho ga;

²⁰ gołgacnan gaṇle, ladzniale guielgut ga
rsilaa zho zho, grëse xtoł zha co zuṇ Dios
zhow perdon.
Santiagw

GUITS NE GLO PQUIAA PEDR

Bets, bzian, jdiuzh to grëse to!

¹ Naa nac Pedr, tib zha ne rxeel Jesús nonee Xtiidz Ndzon me lo miech. Laa naa rxeel tib guits rii ziaad lo to grëse to ne nac to zha Israel, no to stib ladz ben: zig nac nëz Pont, nëz Galás, nëz Capadós, nëz Asia ni nëz Bitin.

² Dios men ne nac Pxoze ne, ible me bzooblo to mazd padzeela, sac nanle me laa to gac xpëed me. Bdzin dze, zeene laa me pxeel Espiritu Sant bleexto to laa to ngab xnëz me, zeena gban to zigne rnabey me, ni lozh csanbe Jesús to; sac ible min co nacne bzhiee xchen me. Dios glu ganle pa lotaa noxco me to, zeena peet zhgab ctebde to.

³ Xquizh xquielnzaac Dios, Pxoze Jesús men ndzon ne rnabey ne, sac gon pquia zdoo me ne ptsëe me lo xquielmban ne, rrieequia gol ne stib. Xquizh me bleeban me Jesús, sac gon ga rlu ib zгаа ne guielnzaac nroob ne no diidz gneedz me lo ne,

⁴ guielnzaac cosi ncuuaane mbe naca, nacda ncuuaane nitlo, nacda ncuuaane gdzëelo, ni gbaa ga quianie mew.

⁵ Ne squi dib zdoo to rnalo to me niina, gane quianap me to con grëtaa poder ne rap me, parne yгаа to guielnzaac co. Zeene laa dze co gdzin, zanlo to ganle zeene laa me ycaania to.

⁶ Gacxe waa ine nley golgac. Nli zan to grë pe guielnë, per ncuuaane tib rded ga.

⁷ Ib none gan to grë guielnë, parne ga glu dien pe nli dib zdoo to rnalo to Dios. Zig nac guieb or, parne glu dien pe nli ora, none teda lo gui; scaquegaa to, none gan to guielnë parne glu to nli dib zdoo to rnalo to Dios; ni zig nac or, ncuuaane rnitlo ga. Grëse zha ne tibaque gnalo me, niicle mazdraa guielnë ne gan zho, gal dze ne guiaad Jesús stib, ine zunnon Jesús zho, sanglaa me zho, zley me gan me zho, sac blu zho nli dib zdoo zho rnalo zho me.

⁸ Me i squitaa rleynie to, me i squitaa rnalo to, niicle ne gonde to me, niicle ne rande to me. Tib guielbley nrooba lo to, tib guielbley ndzona, nacda ncuuaane grieeelo gnee to zha naca;

⁹ sac gon, ne squi dib zdoo to rnalo to me, ib scaania me to.

¹⁰ Grë zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dien zhapa gun me.

¹¹ Zeene bdeed zhiEspiritu Jesús guielbiini lo zho bzeet zho ne ib laa Dios cxeel me, pe nac guielnë ne ted me, ni pe nac guielndzon

ne guiaadnie me; gocladz zho niacnan zho dien cho nac men co, pa hor gac min co.

¹² Nacne blu Dios lo zho gocnan zho nacda ncuuaane gac len dze co, sinque haxta nele yгаа dziana. Sangue niina, nanwen to ganle laa grë min co gogle, lëe diidz cub co i gocnan to niina, gbaa biet Espiritu Sant bdeed me guielbiini lo zha ne biadnew lo to. jNcuuaane ndzona, haxta grë anjl racladz tebaa zha gacnanraa zho dien zha naca!

None gban ne zigne racladz Dios

¹³ Golquix biini xquielrien to sca. Tiblique golgun guic to ne laa to yгаа grëtaa mine ral zdoo Dios gneedz me lo to, zeene laa Jesús guiaad stib.

¹⁴ Zig grë mëed ne ron xtiidz pxoz, sca nguzobdiidz golgac lo Dios; gundraa to grë ncuuaan ndzinlid ne been to zeene gard gunbey to me ga.

¹⁵ Goltsoxco golban zigne racladz me, zeena ine mbe guiaan to lo dol; sac gon tel me, men mbe nac me, nacd me men ne rdziguien dol.

¹⁶ Zigne zhoneeque lo Xtiidz me, zaatne rnee: "None guiaanbe to lo dol, sac gon men mbe nac naa."

¹⁷ Pxoze to nac me, me rnalo to, nanle to zeene laa me gun guielwxtis, led yed me cue; mine been tib tib miech, zunquizh me zhow. Golguien sca, golgon xtiidz me gzataa dze ne gbanse to lo guidzliu rii.

¹⁸ Golsoladz me blee to lo grë wseed ndzinlid ne psan grë xmengol to; nanwen to gozh brieet to ga; per pquind me ncuuaane rnitlo zig nac pe dimi or, pe dimi plat;

¹⁹ sinque laa me pquini xchen ndzon Jesús. Ren ne bzhiee goc zig tib gon, zigne rgogon miech carner yeen ne mazdraa niow, carner yeen ne mazdraa ndaan parne guiaanwen zho lo Dios.

²⁰ Padzeelale, haxta zeene gard cue guidzliu bzo Dios me gac me gon co, ni nligaa zeene laa dze co bdzin laa me biaad, biaadsanwen me to lo Dios; laa Dios been min co sacne rleynie me to.

²¹ Gacxe waa, zrieelo dib zdoo to gnalo to Dios, mese none gliladz to. Me nac men ne bleeban Jesús, blu me ne men non nac Jesús.

²² Ni niina ne laa to mban zigne nac Xtiidz Dios, mine nac diidzli, laa zdoo to biiaanbele lo dol; nasi zrieelo gleynie to zha ne nacgrë to. Dib zdoo to sca golleynie zho,

²³ golguien ganle, tib guielmban cuble rap to niina, rrieequia gol to stib; per nacdraaw zigne gol to glo, sinque lëe guielmban qui bgaa to zeene bliladz to Xtiidz Dios, diidz ne rneedz guielmban, diidz ne gdzin dze nitlo.

²⁴ Zigne zhoneeque low, zaatne rnee:

Grëse ne nac ne miech, dzin dze ne lozh ne, lega nacse ne zig nac grë guizhye,

grê xquielndaan ne, lega nacsew zig nac guieen guizh co.

Sac tel guizhyew, zeene laaw rbidz, laa guieena rliaalaque;

²⁵ sangue Xtiidz Dios, gdziind dze ne nitlow.

Ni lëe diidz co ga gon biadseed zho to, lëew rlu zha laa miech lo grê xtol zho.

2

¹ Nana sca:

gundraa to grê guielntseeb,
yquidiedraa to samiech to,
gundraa to ne laglaase glu to guielwen,
gacnêd zdo to gan to cho zha stib noded,
gzhixcuaadraa to diidzguizh.

² Sinque Xtiidz Dios goltsoxco, zeena lozh tsotibli guic to dziits so to low. Zig rzac mëdyeen ne wriin ral, nidzpaar dziladz win quie win; scadaa golsac Xtiidz me, zeena ygaade to grê guielnêdox ne csiaab me.

³ Laa to gonle ganle zha wentaa zdo me, Xtiidz me sca goltsoxco.

Jesús nac zig tib quie mban

⁴ Golbig lo Jesús, golgan ganle lëe me nac zig tib quie ne rio squin yu, per tib quie mban. Ib bleyndie miech me, sangue Dios, men non, men nziuu nac me lo me.

⁵ Golbig lo me sca, zeena ye to gac quie mban ne tsaa xyadoo me. To gac grê pxoz ne nliipaa mbe zdo, gun to dziin len yadoo co; golban zigne rdziladz Dios, zeena guielmban co gac zig tib gon ne gdeed to lo me, ne nac to zha ne ngab lo Jesús.

⁶ Zigne zhubneeque lo Xtiidz Dios, zaatne znu rnee:

Men ne bzo naa cxel naa Jerusalén,
me gac zig tib quie nroob ne gnaaz dziits xyadoo naa,

ni lëe yadoo co nac grê zha ne ngab lo naa.
Men non nac me, ni grêse zha ne gnalo me,
ible csaand naa zho.

⁷ Ne nligaa tib men non nac me lo ne, sangue grê zha ne rililadz me cholze miech rzooob zho me; zigne zhubneeque lo Xtiidz Dios, zaatne rnee:

Quie ne sca bron zho tib lad zeene quiazaa zho yu,

laaw bron zho sac rzac zho paat rquiinda,
ni niina lëepaaw nac quie ne nlibdziits xcox yu.

⁸ Ni ziaad stib zaatne znu rnee:

Quie co griel ni miech, quie co gron zho.
Grêse zha ne nêd gliladz Xtiidz me zaatne rnee cho nac me, scapaa sac zho me, ni ib zhubneeque ne min co yгаа zho.

⁹ Sangue to, lo Diosle ngab to, me ble to, zigne rnee lo Xtiidz me: tole nac zhipxoz me, tole nac zha non ne quiyun xtsiin me; miech ne mbele lo dol nac to lo me, mele rnabey to sac me bredz to laa to briece lo guielcow bzëeb to lo xbiini ndzon me;

zeena gnee to lo miech ganle zha nactaa grê ncuuaane run me.

¹⁰ Glo peet nonde to, sangue niina non to sac gon lo me ngab to; glo nande to pa lotaa rquia zdo me to, sangue niina rley to ran to ganle squitaa rquia zdo me to.

Tibaque golgun mine racladz Dios

¹¹ Bets, bzian, rleynie naa to. Ndiön ne ganle, nacse xquielmban ne lo guidzliu rii zig zha ne tibrded stib ladz ben; gane rso naa diidz lo to, ib gzoobladzde to gun to grê ncuuaane ndzinlid ne racladz xcuerp to; sac min co rsacsi xalm miech.

¹² Golguien zaacse golgac lo grëraa zha ne gard gunbey Dios; niicle ne gneenê zho to niina, sac zho to zig cho grê zha ntseeb, per zeene gan zho ne ndzinli nac grê ncuuaane run to, haxta zleynie zho Dios gal dze ne laa Jesús guiaadgun guielwxtis.

¹³ Golgon xtiidz grëse men ne nac wxtis lo guidzliu rii, sac sca rdziladz Dios: zigtaa presidenta, ne nac me zha nonraa,

¹⁴ zigtagaa grê zha ne nacnie me dziina, sac zha run guielwxtis, rdeed zho caxtigw ne rieguial grê zha ntseeb, ni scagaa runnon zho grê miech ne run ncuuaane rquuin.

¹⁵ Ible laa Dios racladz zaacse gac to, zeena grê zha nxen, grê zha yozh ne riend pe rnee, haxta ni ro zho tsod pe gneenê zho to.

¹⁶ Gollu ne peet lo ngadoodraa to, per guiabde to ne peet lo ngadoodraa to laa to gun grê ncuuaane ndzinlid ne gacladztaa to. Led scada gon, mine racladz Dios min co golgun, gollu mele rnabey to niina.

¹⁷ Zaacse golgac lo grê samiech to, golguien cho lo zo to. Golleynie grê zha ne nacgrê to, ndooladz golgac lo Dios, golguien ne men ro nac me; ni scagaa golgon xtiidz grê zha ne nac wxtis nroob.

¹⁸ Bets, bzian, to ne nac to zha ne quia xtsiin ben, golgon mine rnabey men ne rree to; tel zhataa nac zho, zigtaa men wena, zigtagaa men ne ntseeba.

¹⁹ iNley golgac, goldeed xquizh lo Dios, tel porne noyun to mine rnabey me, laa zho rsacsi to!

²⁰ Sac gon, telne nosacsi zho to por xquielntseeb to, niicle paraa cxcw to paat yquiinda; sangue tel rxcw to nosacsi miech to porne noyun to ncuuaane rdziladz Dios, dzigosi zleynie me to.

²¹ Golgacnan ganle, ible none ted to min co ne nac to zha ne ngab lo Dios; sac gon, niicxe Jesús, blactaa guielnê ne bded me bdiizh me xtol ne. Glo me sca bded, nana negaa ible none sca dieed ne.

²² Tel me ni tib dol beend me, ni tib miech pquidied me.

²³ Niicle zeene blooredz zho lo me, ible ptsired me lo diidz co; niicle zeene quiasac-sile zho me, ib gocntseebd me lo zho; sinque grêsew psan me ladznia Dios, men co gun guielwxtis zigne no gaca.

²⁴ Masaque Jesús bgaadz grêse xtol ne, blactaa psacsi zho me pquia me lo cruz bdi-izh mew; laa me been min co, zeena griello griee ne ladznia dol, gban ne zigne rdziladz Dios. Ne scataa psacsi zho xcuerp me, ga bi me grêse xquielnê ne.

²⁵ Glo lega nac to zig nac grê mēcwxiiil ne zonziaab, sangue niina mele quianap to. Me nac tib baxtor ne rleyniepaa to.

3

Zha gban zha ne ptsieelniale

¹⁻² Bzian, to ne nac to men wnaa ne ptsieelniale, golgon xtiidz tsiel to. Niicle tel nêd zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquialbladz gliladz zhow. Yquindraa ne goon chopaa yquia gnew lo zho.

³ Golguien sca, tsođe to ne goon dien pa xixcuaraa to par gluniow to lo miech; dieen pa xixcuaraa guitsguic to, dieen pe bguiaa or ne yquia diag to, dieen pe grê guib or tso yan to, tso nia to, dieen pe lar niazh ne gacwraa to. Tsienalde to grê guielniow co, sac gon ncuaañ laglaase ga;

⁴ sinque none xixcuaa zdoe to, gac to tib zha tibiladz, tib zha ne ndooladz. Lêe guielniow co nac mine niowraa nêz lo Dios, ni min co gdziñd dze nitlo.

⁵ Lêe guielniow co bioxco grê men wnaa ne biaadban padzeela, zha ne brieel lo dol wban zho zigne racladz Dios; tel zha, dib zdoe zho bnalo zho Dios, ni bin zho xtiidz tsiel zho.

⁶ Zig nac Sar, sca goc me, bin me xtiidz tsiel me Abraham, haxta rêb me masaque Abraham nac men ne rnabey me. Ni scagaa to, telne tsoxco to xixcuaa to, zac to zig goc Sar, dzigosi laa to gac zig xpêed me; haxta ni tsoxtseebde to pe glisqui tsiel to lo to.

⁷ Scaquegaa to bets, ne nac to zha ne ptsieelniale, goltsocxo tsoquic to zha nac tsiel to. Golgan me zigne nonguiela gan to me, golguien ganle nda men wnaa; ni lala, non me lo Dios, sac gon ye me ygaa guielmban ne psan Dios diidz gneezd me lo to. Sca golban, zeena scagaa zeene gnab to lo Dios, squiaadiag me xtiidz to.

⁸ Nana sca, tipse golgac grê to. Ine niowse golleynie zha ne nacgrê to, miech wen, miech ndooladz golgac.

⁹ Zha ne gacntseeb lo to, gunde to ne yeque to gacntseeb lo zho; zha ne corezgaal lo to, gunde to ne yeque to corez lo zho; sinque mazd golnab lo Dios gunlay me zho, zeena

scagaa to, zunlay me to; sac gon, ible min co bredz me to.

¹⁰ Zigne zhoobneeque lo Xtiidz me, zaatne rnee:

Zha ne racladz ine gley zho ne laa zho mban, wen ted zho len ngbidz ne gban zho, none tsoxco zho ycuêêz zho ro zho, gneenêdraa zho, yquidiedraa zho;

¹¹ none csaan zho grêtaa guielntseeb, niapse ncuaañ wen tsoxco zho gun zho, yguib zho cuewen miech, niicle zhagaa wen gac zho lo grêse miech.

¹² Sac grê zha ne sca wen rac nêz lo Dios, tibaque quianap me zho, ni rquiaadiag me xtiidz zho tel pe rnab zho lo me;

sangue grê zha ntseeb, ni lalnu rdziguiend me ncuaañe run zho.

Dichos zha ne mban rded lo samiech

¹³ Golguien sca, ncuaañe yquien golgun; scagaa tsođ pe nacne ctsidil miech to.

¹⁴ Laa telne ncuaañe yquinaquegaa noyun to, ni laa miech rtsidil to, dïchos to ga! Ib gdziebde to grê miech guidzliu, niicle peraa gnê zho gun zho to.

¹⁵ Tibliladz golgac, tibaque golgunnon Jesús men nroob ne rnabey ne, tibaque golconie Xtiidz Dios guic to, zeena nanle to pe guiab to lo zha ne gnabdiidz dien zha nacne rnalo to Jesús; ine niowse golgac, diidz ndooladz golne lo zho.

¹⁶ Zaacse sca golban, zeena grê zha ne rneenê to porne nac to zha ne no xnêz Jesús, zdziñ tib dze ne ctoladz zho, zeene guien zho lega bnexuu zho to.

¹⁷ Wen zie zha ne ran guielnê, telne Dios rnabey gan zhow zeene noyun zho ncuaañ wen; lêde gan zhow por xquielntseeb zho.

¹⁸ Golgan ganle niicxe Jesús, zha nactaa grê guielnê ne gon me. Niicle ne ni tib dol beend me, per haxta beet miech me bdiizh me grêse xtol ne nac ne miech ntseeb, psanwen me ne lo Dios. Nli gut xcuerp me, per zhiespîritu me gutew;

¹⁹ gane güeyted me zaatne nioogyu zhiespîritu grê zha ne wban padzeela, güeynee me lo zho.

²⁰ Lêe grê zha co ib bzhiguield nililadz Xtiidz Dios, niicle ne dipse len dze ne nozaa Noé barcw nroob co pquiambêz Dios niacwen zho. Nanlaxe to ganle, noaque nac zha ne bdedlaa lo nis co.

²¹ (Lega rriequia goc nis co zig nis ne rrobnis ne. Zeene rrobnis ne, ga rlu ne laa ne brieel ladznia dol, ygaadraa ne guielnêdox ne tsieguial zha ngoopdol, sac gon por mincopaa gut Jesús ni brieeban me; ni guiabd ne togo nis co rsanbe ne lo xtol ne, sinque ga rxobnen ne ne laa ne rnab lo Dios ctsêe me lo xquielmban ne.)

²² Saṅgue niina gbaa ga no Jesús, ga zob me cue Dios nêz derech, grêse anjî non, grêse zha non ne no gbaa, rquitsgzhîb zho lo me ni ruṅ zho mine rnabey me zho.

4

¹ Golguieṅ gaṅle, zha nactaa grê guielṅê ne bded Jesús bdiizh me xtolṅ ne; nana sca, scaque to gdziebde to golcueladz to gaṅ to guielṅê. Ib rquiin guielṅê, sac zha ne no tib lo guielṅê, rioguid zho grê ncuaaṅe guṅctal xtolṅ zho,

² zêeb rguib zho gban zho zigne racladz Dios.

³ Grêtaa ncuaaṅe ndzinlid ne ruṅ grêraa miech, golguiaanladza. Golguiaanladz zeene scataa ptsieelsa to zho, bzudz to, lega dowcho, lega gocho to nziu, haxta bionie to zha ne nacd tsieel to; bio to lo grê lni, bleynie to grê mdio.

⁴ Grê zha co, rienṅ naa rlêe zho ranṅ zho rtsieelsadraa to zho lo grê ncuaaṅe ndzinlid co, gane haxta rneenê zho to.

⁵ Per golsaan zho, benque zha quizha zeene gacredz zho lo meṅ ne guiaadguṅ guielṅwxtis, gaṅ dze ne gdeed me miṅe tsieguialṅ tib tib miech, zigtaa zha mbana, zigtagaa zha ne gutlew.

⁶ Sac niicle zha ne gutlew, no zho gonaṅpaa zho zha nac Xtiidz Dios zeene bzomban zho. Ible rquiinpaa Xtiidz me, sac zha ne rquiaadiaga, niicle ne zetaque zho, per nêz lo Dios mban zhiespîritu zho.

Golganie zha ne nacgrê to

⁷ Zhile gdziṅ gdze ne laa grê ncuaaṅe rac lo guidzliu rii nitlo; golquix biini zaacse golban, tibaque golzodiidznie Dios.

⁸ Ine golleynie grê zha ne nacgrê to, sac zeene nliṅpaa rleynie ne samiech ne, telṅ pe falt ne guṅtaa zho zrieelo cteed new zdoo ne.

⁹ Zha ne guiaad lidz to, goldeed zaatne cuêz zho; ine golcuêzlo zho, guieedniede to zho.

¹⁰ Tib tib to bneedzse Dios tib guielṅbiini lo to. ¡Golquiina sca, golguṅlsa xyudar zha ne nacgrê to! Ib ga rquiin guielṅbiini co bneedz mew lo to.

¹¹ Zha ne rseed miech Xtiidz Dios, none gnee zhow zigne racladz me. Zha ne ruṅгаа pe stib xtsiṅ Dios, ib yquiad zdoo zho none guṅ zhow dib nace guielṅdaan ne rdeed Dios lo zho. Ncuaaṅe guṅtaa to, goltsienie guic to ne laaw guṅ to par csanṅon to lê Dios. Ga glu ne xtsiṅ Jesús quiayunṅ to, meṅ ndzon ne rnabey, meṅ ne gdziṅd dze gdzêe. Sca rieguiala.

¹² Bets, bzian, ne nligaa rleynie naa to. Golsoladz sca, telṅ pe guielṅetaa gaṅ to porne no to xnêz Jesús, peet tsienied guic to, sac ib scale no gaca.

¹³ Mazd ine golley; sac gonṅ ye Jesús sca gonṅ guielṅê, ni scagaa nroob guielṅley ne tso to gaṅ dze ne glu gaṅle zha nactaa guielṅdzon ne rap me.

¹⁴ Zeene rgodee miech to, rquiaago zho to loxaque ne no to xnêz Jesús, nley golgac; wen zie to ga, sac gonṅ zhiEspîritu Dios nacie to.

¹⁵ Guielṅtow sca csacsi miech to, telṅe bgaa to laa to beet, laa to wban, laa to bzêeb lo cuent ne rieguialṅdraa to, pe stib guielṅntseeb ne noyunragaa to.

¹⁶ Saṅgue telṅe rsacsi zho to loxaque ne no to xnêz Jesús, led guielṅtod ga. Laa ne ctoladz to, igoldeed xquizh lo Dios, sac gonṅ tib guielṅzaac nroob bgaa to ngab to lo me!

¹⁷ Golganṅ gaṅle, grêse ne ne nac ne zha ne ngab lo Dios, lenṅ dze rii laa ne csilo dzian guielṅê. Nana, telṅe ye zha ne ngab lo me ted guielṅê, zha naczhe miṅe ted grêraa zha ne nêd gliladz Xtiidz me, gaṅ dze ne laa me guṅ guielṅwxtis?

¹⁸ Zigne zhubneeqe lo Xtiidz me, zaatne rnee: “Niicle zha ne wenle nêz lo Diosa, nroobaque nac guielṅê ne ranṅ zho haxta gdziṅ dze ne ycaania me zho, zpe lelṅue grê zha ne dzigo racntseeb lo me?”

¹⁹ Gacxe nagonṅ waa, niicle telṅ pe nactaa guielṅê ne gnabey Dios ted to, tibaque golban zigne rnabey me, golsaṅ xquielṅmban to ladznia me; sac gonṅ me nac meṅ ne rneedz xquielṅmban to, ni mesi ib csaand me to.

5

Golgon xtiidz zha ne rnabey lo to

¹ Laa niina nagonṅ, laa naa cso choplan diidz lo to, ne nac to zha ne rnabey lo grê zha ne no xnêz Jesús. Ye naa, dzinṅ co nac naa, naa nac tib zha ne gonṅpaa zha psacsi zho Jesús, ni nanṅpaa naa zgaa naa lo guielṅdzon ne no me, zaatne rnabey me, gaṅ dze ne laa me guiaad.

² Rso naa diidz lo to gonṅ, zaacse golquianap grê zha ne bgaa to noquianap to. Dib zdoo to golṅuṅ dziinṅ qui, sac sca racladz Dios, ib tsienied guic to guiab to dienṅ zha lega cob to dimi lo zho.

³ Gunde to ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho.

⁴ Scagaa, zeene laa meṅ nroob ne quianap ne guiaad, zgaa to lo guielṅdzon ne gneedz me, lugar co gac tib premio ne gdziṅd dze lozh lo to.

⁵ To ne nac to zha nguieg, golgon xtiidz grê zha ne zo rnabey lo to. Tib tib to, golgon xtiidz zha ne nacgrê to, sac gonṅ: “Grê zha niats, rdziguendi Dios zho, saṅgue grê zha ndooladz, racniṅ me zho.”

⁶ Telṅe guiaanwinṅ to lo meṅ ro ne nac Dios, ine ndooladz gac to lo me, scagaa me zuṅnon me to zeene laa dze co gdziṅ.

⁷ Tel pe nactaa grë zhizhgab to, grë xli-aadz to, ladznia me golsana, sac gon me quianap to, noxco me to.

⁸ ¡Nsin golsa lo mendox, sac gon tibaque quiana! ma gnitlo ma ne! Masaque rac ma zig rac grë meedz ne rgobeedz quiaguib ma ne gow.

⁹ Dziits golsa gdeete to diidz yquuil ma to. Tibaque dib zdoo to gonalo Dios. Nanle to ganle dipse lo guidzliu, zha ne notaa xnëz me, scaque quiaaded zho.

¹⁰ Tel pe nactaa guielnë ne noyan to, ible csaand Dios to sacne rleyniedox me to, zeena laa dze co gza, hor co laa me gzhix-cuaaraa lo xquielmban to, gzodziits me to, guntibli me guic to. Me nac men ne bredz ne ygaa ne lo guielndzon ne no me grop me Jesús, guielndzon ne gdziind dze nitlo.

¹¹ Mese nac men ne rnabey grëtaa ncuaane no, ni gdziind dze ne gdzëë me. Nligaa sca nac me.

¹² Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdoo me rleynie me Dios. Mine rne naa lo to lo guits rii, laaw rne naa sac racladz naa guien to ganle pa lotaa noxco Dios to, pa lotaa rleynie me to; zeena tiblique gac to gbichede to lo me.

¹³ Grëse zha ne rililadz Jesús Babiloin nu, zha ne bzooblo Dios gac xpëed me zigne bzoobloque me to, laa zho rxeel bdiuzh lo to; scaque Marcw, men ne rzaac naa nu zig tib xpëed naa, ye me laa me rquiaabdiuzh to.

¹⁴ Laa naa rnab lo to, golquiaabdiuzh grëse zha ne nacgrë to, ine golveñ nia zho.

Dios gacniën to peet zhgab ctsebdë to, nac to zha ne no xnëz Jesús.

Pedr

BROP GUITS NE PQUIAA PEDR

Bets, bzian, jdiuzh to grëse to!

¹ Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxel naa lo to, ne nac to zha ne squitaa ndzonse dib zdoo rnaló meñ nroob ne zob gbaa, zigne rnalóque no me. Xquizh Jesús meñ ne rsilaa miech, meñ ne nac Dios ne rliladz ne, sac gon me gocniñ to squi rnaló to me niina; sac mesi miñe nonguiel gac, miñ co ruñ me.

² Zigse zie dze, gołtsoxco lozh gunbey to zha nac Dios, zha nac Jesús meñ ne rnabey ne, zeena scagaa zig zie dze zunlayraa me to, zacniñraa me to, parne peet zhgab ctsebde to.

³ Sac zeene gunbey to zha nacraa me, con grëtaa poder ne rap me, zneedz me guiel biini lo to parne tibaque gban to zigne racladz me, tibaque gleynie to me. jGotsaa gwi ne ganle zha nactaa ncuaañe ro, ncuaañe gzee zdoo ne beñ me parne gbig ne lo me!

⁴ Ni psañ me diidz pe nac grë ncuaañe ndzon ne gneedz me lo ne. Psañ me diidz, ib laa me cuee ne lo grëtaa guiel yozh ne rac lo guidzliu rii, parne gac ne tib miech mbe zigne nac me.

⁵⁻⁷ Nli laa to rnalole Dios, per parne yгаа to miñ co, none tsoxco to:

zaacse golban,

gołtsoxco guien to zha nac Dios,

golseed gnabey to xcuerp to,

guieete to,

tibaque gołtsoxco golgun mine racladz Dios,

ine niowse golbannie grë zha ne nacgrë to,

golsac zho zig tib menlidz to;

golleyne samiech to.

⁸ Nana, telne tsoxco to znu gban to, dzigosi mazdraa tsoguic to miñe racladz Dios, dzigosi zlu ruñ to miñe rnabey Jesús meñ ndzon ne rnabey ne, led loxaque runbeydse to me.

⁹ Sac zha ne tsoxcoda, rrieequia rchool lo zho ga, rrieequia rcowle guic zho ga, sac gon rsoladz zho zha nactaa lo grë dol ne blee Dios zho.

¹⁰ Bets, bzian, golguien sca, niina ne laa Dios bzooblóle to, laa me bredzle to ngab to lo me, gołtsoxco sca golban, parne guiabde to lo dol stib.

¹¹ Niicle par gdzingaa to zaatne rnabey Jesús, meñ ne psilaa ne lo dol, meñ ne rnabey ne, tsod pe yca lo to, ine nzhial nêz zaatne ted to gdziñ to ga.

¹² Nli nanle to grë miñe rne naa nu, nli dziitsle zo to lo Xtiidz Dios, per ib none guncsoladz naa tow.

¹³⁻¹⁴ Laa Jesús meñ ndzon ne rnabey ne, blule lo naa zhile gdziñ dze ne laa naa ghi lo guidzliu rii, gane niina laga bii mban naa rgobey naa ible nonguiela znu cso naa diidz lo to;

¹⁵ zeena niicle wBILE naa lo guidzliuw, tibaque csoladz tow.

Gonpaa Pedr Jesús

¹⁶ Grëse miñe bnee no lo to zeene pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me

¹⁷⁻¹⁸ guic gui ne scataa pxobnen Dios ne meñ non, meñ ro nac me. Binpaa naa zëeb tsi Dios gbaa hor co, nê me: "Lëe Xpëed naa i gon, rleynie naa me, nziuu me lo naa."

¹⁹ Ga nagon rlu ne diidzli nac grë miñe bzeet grë zha ne biadteed Xtiidz Dios lo miech padzeela; gacx waa, zig nac to ible nonguiel guien to zha naca. Masaque lëew quiazini lo to niina, zig rziini tib biini guieel, haxta riini liu zeene laa Mel Ngol rlan; ni lëe Mel Ngol co nac Jesús.

²⁰ Per scagaa, racladz naa gacnan to ganle, grielod ne lega tel zha guiaabtaa guic miech, guiab zho sca nac miñe bzeet zha ne biadteed Xtiidz Dios,

²¹ sac gon tel zha co, bneed zho ncuaañe biaabtaa guic zho; sinque laa zho bnee miñe bnabey Dios psiaab Espiritu Sant guic zho.

2

Zha ne rquidie

(Judas 4-13)

¹ Grë zha ne biadteed Xtiidz Dios padzeela, miñe bnabey me zho miñ co bnee zho; per brieequiaque zha ne pquidie rëb zho Dios pxeel zho, ni nlida. Ni scaquegaa niina, grë zha ne rseed to, zrieequia zha ne yquidie lad co. Dzega dzega csilo zho glu zho grë zhiwseed yozh zho, ib gunbeydraa zho meñ ndzon ne rnabey ne, meñ ne psilaa zho lo xtol zho; per nanđ zho zha nactaa guielnëdóx ne yгаа zho, tibaque zeene guien zho laa zho nole lo caxtigw co.

² Ndal miech ne grieequia tsienal grë ncuaañ yozh ne gun zho, niapse por zha laa grëraa miech csilo gneenë Xtiidz Dios.

³ Zha yozha, laa zho tsienal loxaque dien zha gunlo zho dimi, zguib zho yquidie zho to gdeed to dimi lo zho. Per ib tedsod zguzh zho miñ co, sac bzeette Dios ganle zha nactaa lo guielnëdóx ne yгаа zho;

⁴ sac Diossi gon, mine ruñ grë zha ntseeb, csand mew scase. Golgan ganle, niicxe grë anjl ne sca been falt lo me, gonzed me zho, bleegez me zho gbaa, bnabey me bioogyu zho tib lo ncowdoo, ga niogyu zho nieeda gal dze ne laa me gunquizh zho miñe been zho.

⁵ Padzeela zeene wban Noé, grë miech ntseeb ne bnéd nion xtiidz me niicle ne bneepaa Noé lo zho, scaque gonzed me zho, psiaab me tib guiedox bnitlo zho grëse zho; loxaque Noé ni zgadz menlidz Noé psilaa me lo nis co; sac wban Noé zigne racladz me.

⁶ Scaque len dze ne wban Lot, bdziguiend me grë miech yozh ne bio guiedz Sodom ni guiedz Gomorr, blaaj me gui grop guiedz co, bnitlo me zho grëse zho, xquidiese biaan. Laa me been min co, zeena ga gan grëraa zha ntseeb ganle pe nac mine tsieguaj zho telne csaand zho xquielntseeb zho.

⁷⁻⁸ Lotse psilaa me, sac bioxco Lot mine rnabey me. Gapaa no Lot, ranpaa me zha run grë miech co; haxta mban rac zdoo me, ran me gzataa dze loxaque grë guielyozh noyun zho.

⁹ Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa grë zha ne rsaand guielntseeb, ib tedsod zho lo guielnedox ne cteed me zho gal dze ne laa me gun guielwxtis.

¹⁰ jZig nac zha ne guiaadquidie to ga, mincopaa yгаа zho! Ni lalnu gandzed Dios zho; sac gon, laa zho ziena loxaque grë guielyozh ne gdeed guxt xcuerp zho. Miech nad, miech niats nac zho, rhidznie zho mine rnabey Dios, ni lalnu dzeb guiend lo zho rdzibdee zho grë men non ne no gbaa.

¹¹ Per ni grë anjl, niicle ne zha nroob nac anjl, niicle ne rap anjl poder, per rdzind anjl lo Dios gdzibdee anjl zho.

¹² Per zha, lo xquielyozh zho ga, haxta ncuaañe riend zho zha nac, rdzibdee zho. Lëédaa grë ma nac zho, tel ma laa ma ralse par yгаа ma nitlo ma; guienndraa xquielrien zho, ncuaañe racladzttaa zho run zho. Per dzin dze ne nitlo zho, zigne rnitlodaque grë ma,

¹³ por grëtaa guielntseeb, grëtaa guielyozh ne squitaa rley zho run zho haxta zobna ngbidz.

Miech mbixladza, miech ngubeeguieutow, rquiaalose zho miech wen nac zho zeene riaadsobnie zho to lo zhilni to.

¹⁴ Wnaa ne gantaa zho, pe na gzoobladz zho tsonie zho wnaa co, tibaque quiaayunctal zho xtol zho. Rio zho rquuil zho grë zha ne gard sodziits lo Xtiidz Dios; rienle zho zha gla zho ncuaañe rquiin lo zho. Miech ndziibdeele nac zho,

¹⁵ sac laa zho psaanle xnëz Dios, nëz ne nitlole zho no zho; lëe zho run xcuent Balam, xpëed men ne lë Beor. Tel Balam, haxta mine nonguieldraa been me par gun me gan dimi;

¹⁶ per bdzin tib dze zeene laa Dios blisqui lo me grëtaa ncuaañe quiaayun me ga. (Bnabey Dios lëeque xpurr Balam bnee, dzigora bien Balam psaan me xquielyozh me ga.)

¹⁷ Masaque nac zho zig nac grë bie ne bidzle nis, zig nacgaa xcw bidz ne nëzrii nëzrec zienie me; ni lalnu paat rquind zho. jLaa zho nole guey zho lo guielcowdoo ne rieguaj zho, zaatne gdzindraa dze griee zho!

¹⁸ Niats rzë xtiidz zho, per ncuaañe paat rquind rnee zho. Mine mazdraa mban run zho, rio zho lëeque lo grë guielyozh ne rdeed guxt xcuerp zho rquuil zho grë zha ne pense brieel lo dol, rlozh ga rbiire riab zha co lo grë dol co stib.

¹⁹ Rnee zho zac tel zhataa gban ne, nodne gnabey xley Dios ne. Rzac zho na choot rnabeyd zho, ni riend zho dol quianabey lo zho; sac grëse zha ne gadraa csaan tel pe grë guielyozh ne run zho, lëele grë ncuaañ co rnabey lo zho.

²⁰ Tib zha ne sca brieel lo grëtaa ncuaañe ndzinlid ne no lo guidzliu rii (porne biladz zho Jesús, men ndzon ne rnabey, men ne rsilaa miech lo dol), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaan zho.

²¹ Lëda ga gon, telne gocnanle zho zha racladz Dios gban zho, ni lozh ga csañ zho xtiidz me tib lad, gbiire zho tso zho lo grë ncuaañ yozh ne been zho glo. Nroobdox caxtigw ne gan zha co, mazd zhi mine yгаа zha ne gocnand zha nac xtiidz me.

²² Zha copaa nagon run mine rnee diidz ne znu rëb: "Nandraaque mëcw, ncuaañe bdzible ma rbiire ma row maw"; ni stib mine znu rnee: "Ngutszhe, rlozhle raz ma nis mbe, ni rlozh ga riegaque ma lo nis ben."

3

jZha nacne gard guiaad Jesús?

¹ Bets, bzian, golgan ganle lëele guits rii raca chop zixel naa. Gropse low, rso naa diidz lo to tsoxco to zaace gban to, ine niini gac guic to.

² Golsoladz ganle, zha nac grëse mine bnee grë zha ne biadteed xtiidz Dios padzeela; golsoladz zha nac grë mine rnabey Jesús, mine biadseed no to. (Jesús, men ndzon ne rnabey ne, men ne psilaa ne lo grëtaa xtol ne.)

³ Racladz naa gacnan to ganle, len dze ne ziaadyob guiaad Jesús, zrieequia zha ne gzhidznie xtiidz me, csilo zho gun zho grëtaa guielyozh ne gzoobladz zho;

⁴ guiab zho: "jPe gliladz ne nazho guiaad Jesús! Telne nli rëb me laa me guiaad, jyo me na? Grë xmengol ne, zha ne scataa pquiambëz me, laa zho gutle, jcho na zho guiaad? Znutaque nac lo guidzliu wlal ne brew."

⁵⁻⁶ Squiaalo zho rsoladz zho zha bnitlole guidzliu tib vuelte, ni zhagaa nitlo mine no niina. Wen wen nan zho ganle zha bnabey

Dios bīaa guīdzliu, me bnabey brieew lo nis, ni masaque lo nis now; mīncocxe waa nis bnitlow glo.

⁷ Scaque, nacle xtiīdz Dios, zigtaa gbaaw, zigtaa guīdzliu ne no niinaw, laaw nitlo, per lo guile nitlow; ni lo gui co nagon yгаа grēse zha ne ruṅ guieṅtseeb ted zho caxtigw.

⁸⁻⁹ Zha ne rzac quiayaanladz Jesús diīdz ne psan me ga, per led quiayaanladz mew; sinque laa me quiambēz tebaa grēse miech gac-wen lo me. Laa me racladz, grēse zho csaan xquieṅtseeb zho, zeena ni tib zho nitlod. Bets, bzian, nanle to ganle led yed me ngab xtse. Sac tel me, ncuaane guṅ ne tib milraa iz, tib dzeque guṅ mew; nroob rzac ne tib mil iz, per par me rzacse mew, lal ne rzac ne tib dze.

¹⁰ Ib laa me no guīaad, per choot nanḍ dien pa horpaa guīaad me; laa me guīaad zig rzēēbse tib ngbaan yu, tibaque zeene gan miech laa me ziaadle. Grēse ncuaane no, hor co laaw lozh; bidox ne gdzieb ne tso zeene laa gbaa nitlo; grē mel ne ndziib gbaa, masaque gazbel ma; haxta guīdzliu, dib nacsew laaw tsec.

¹¹ Scataa nagon nitlo guīdzliu rii, ni grēraa ncuaane rdzian ne niina, igolguieṅ sca golban zigne racladz meṅ ndzon ne rnabey ne, guṅctaldraa to xtol to!

¹² Tibaque golconie guic to ne ib laa me no guīaad; tibaque ndzinli golban, gollu ne quiambēz to gdziṅniob dze ne sca gazbel grē ncuaane ran ne gbaa, dze ne sca tib guīaalse grē ncuaane nīaaw.

¹³ Horco nagon laa ne dzian tib gbaa cub, laa ne dzian tib guīdzliu cub ne psanle me diīdz yгаа ne; zaatne tsodraa guieṅtseeb.

¹⁴ Bets, bzian, nligaa goltsoxco ndzinli golban, guṅctalde to xtol to; niowse golbannie samiech to, zeena gal dze ne laa Jesús guīaad, ine gleynie me to gan me mban to zigne racladz me.

¹⁵ Golsoladz ganle, porne quiambēz me gbig grēraa miech lo me csilaa me zho lo dol, mīṅ co gane gard guīaad me.

Ye bets ne Pabl, meṅ ne nziuu lo ne, lo grē guieṅbiini ne rdeed Dios lo me rquiaa me grē guits ne zixeeṅ me, zineeṅ me lo to grē mīṅ none naa nu.

¹⁶ Parga nli no mīṅ nee me ga, ngan guieṅ ne zha naca; grē zha ne rdziinpaar racladz ctsēē Xtiīdz Dios, zeene laa zho rneew, laa zho rneeṅw zigne racladz zho; zigne ruṅaque zho grēraa mīṅ zhoḅnee lo Xtiīdz Dios. Zha ne sca ruṅ, lēēque zha noguib nitlo zho ga.

¹⁷ Laa naa rzet grē mīṅ rii lo to nu, zeena nsin so to, ib gdeete to diīdz cho grē zha ntseeb ne sca nac guīaadquīdie to, yquīil zho to csaan to mīṅ nac diīdzli, csaan to nēz ne ziele to i.

¹⁸ Goltsoxco zig zie dze guieṅraa to pa lotaa rleynie Dios to, ni guieṅraa to cho nac Jesús, meṅ ndzon ne rnabey ne, meṅ ne psilaa ne lo dol.

Me nac meṅ non, me nac meṅ nziuu, ible me rieguīal guṅnon miech, zigtaa niinaw, zigtagaa grē izdoo ne ziaadraaw. Sca rieguīala.

Pedr

GUITS NE GLO PQUIAA JUAN

jDiuzh to!

Laa naa gzodiidznie to ganle cho nac Jesús.

¹ Jesús nac Diidz Ndzon ne rdeed guielmban. Notaque me, nole me zeene bre guidzliu. Bdziñ dze biaad me lo guidzliu; grop diag no bdzion no grè mine bnee me, grop lo no bdzion no grè mine been me; sac bdzionpaa no zha rac me, zha rnee me, haxta bzhiieñ no nia me.

² Ni niina laa no quianee lo miech ganle cho nac me; golgacnan ganle, me rneedz tib guielmban ne gdziñ dze lozh. Zaatne no Dios men ne nac Pxoze ne, ga no me; zeene biaad me lo guidzliu dzigo bdziunbey no me.

³ Gacxe waa, mine rnee no lo to led lega rneed now; nozhal bdziona, nozhal bdziona. Laaw rnee no lo to, zeena tipse gac ne grè ne, gacnie to no zigne nacie Dios no (men ne nac Pxoze ne), zigne nacie Jesús no, men ne nac Xpëed me.

⁴ Laa naa rnee grè min rii lo to lo guits ne rxel naa nu, zeena zigne nonley zdoo no scauegaa to tsonley zdoo to.

⁵ Znu nac mine bdzion no pseed Jesús miech, rëb me: Nac Dios zig nac tib biini, ni tib lë guielcow guieñd zaatne no me; laa grè dol, masaque naca zig nac guielcow. Ni mincoque gon rnee no lo to.

⁶ Gacxe waa, telne rnee ne naciele ne me, ni rlozh ga tibaque lo guielcow co no ne, rquidie ne ga dzigo.

⁷ Telne nliipaa mban ne lo xbiini me, zigne mban Jesús lo biini co, dzigosi haxta tipse nac ne grè ne; ni scagaa, xchen Jesús nac mine csanmbe ne lo grëtaa xtol ne.

⁸ Nana tel guiab ne: Tel naa ib peet dol rapd naa. Lëëque ne noquidie ne ga, rneelid ne ga zha nac ne.

⁹ Sangue telne cxobdol ne grëse xtol ne lo Dios, ible tedsod silaa me ne lo grëtaa dol co, sanmbe me ne lo grëtaa guieñtseeb ne zidziun ne; sac ible laa Jesús gut par csanmbe me ne.

¹⁰ Telne sca guiab ne rapd ne dol, rrieequia dzigo rzoob ne Dios zig tib men ne rquidie; sac tel me, nanpaa me grëse ne miech ngoopdol nac ne.

2

¹ Xin yeena, laa naa rso diidz lo to: Gunctaldræa to xtol to; telne nandgaa new cho tib to zha been pe tib dol, golsoladz ganle no tib men ne quianab lo Dios men ne nac Pxoze ne yquia zdoo me ne, lëë men co nac Jesús, lo me golbig (tel me ni tib dol rapd me).

² Sac me bded grëtaa guieñe ne rioguañ ne ndieed ne por grëtaa xtol ne, psanwen me ne lo Dios; me goc zig tib gon ne pcaania Dios gozh grëse xtol ne, ni xtol grëraa miech ne ndxie dibdoose lo guidzliu.

Golleynie samiech to

³ Golgona ganle: Telne run ne grëse mine rnabey Dios, gase rien ne ne nli xnëz me no ne.

⁴ Laa tel zha ne rnee: "Xnëz me no naa", ni rlozh ga rund zho grè mine rnabey me, rquidie zho ga.

⁵ Sac zha ne nli rleyne Dios, rioxco zho rban zho zigne nac xtiidz me; ni tel ne, ndion ne ganle nli xnëz me no ne.

⁶ Gacxe nagon waa, zha ne rnee xnëz me no zho, ib none zaacse gban zho, zigne wban Jesús zeene biaad me lo guidzliu.

⁷ Bets, bzian, golgacnan ganle, none gleyne to samiech to. Guiabde to togo ncub mine rne naa lo to nu gon to, laa naa rzet mine binle to glo zeene psilo pquiaadiag to Xtiidz Dios. Niicle ne padzeelale zhozneew, niicle ne pquiaadiagle tow,

⁸ per rrieequia ncuba niina; sac gon zeene biaad Jesús, me blu ganle zha none gleyne ne samiech ne. Ni scagaa niina ne laa to zienala, laa to noriee lo guielcow ne no to glo, laa to nozëeb nëz lo xbiini Dios.

⁹ Ga nagon, tel zha ne rnee lo biini co mban zho ni rlëenie zho samiech zho, rquidie zho ga; bii lo guielcow ga mban zho.

¹⁰ Zha ne rleyne samiech, zha cosi nli lo biini co mban zho, noxtseebd lega tsoobe zho, sac ranpaa zho pa lo zie zho;

¹¹ sangue zha ne rlëenie samiech, lo guielcow ga no zho. Masaque nac zho zig zha ne rold lo, niicle zha riend dien pa nëz tsie zho, sac guielcow co quiantse lo zho.

¹² Xin yeena, laa naa rne grè min rii lo to, sac gon, tel to laa Jesús bdiizhle tel pe nactaa grë xtol to.

¹³ To ne nac to dad, laa naa rxel diidz rii lo to, porne nac to zha ne riladzle Jesús, nanle to ganle notaque me, nole me zeene bre guidzliu. Togaa ne nac to zha nguieg, laaw rxel naa lo to, sacne nligaa dzits to to, rrieelodraa mendox yquii ma to. To ne nac to mëedlas, xin yeena laa naa rxel diidz rii lo to, porne nac to zha ne nole xnëz Dios men ne nac Pxoze ne.

¹⁴ Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaania Xtiidz Dios dib zdoo to, ne nac to zha ne lëbdraa mendox yquii,

¹⁵ golguien, gleyniede to grè ncuane rap to, gleyniede to grè ncuaan ndzinlid ne rac lo guidzliu rii. Zha ne rleyne grè ncuaan co, lid rleyne zho Dios men ne nac Pxoze ne;

¹⁶ sac grêse ncuuaane rac lo guidzliu rii (zig nac zha ne zienal ncuuaane gdeedguxt xcuerp, zha ne rzoobladz yquianie ncuuaane rdziladzataa, zha ne racniats lo samiech), grêse ncuuaan co led Diosd rnabeya, sinque lëë mine rzonal grêraa miech lo guidzliu ga.

¹⁷ Ni na tel zig nac guidzliu, zig zie dze laaw quialozh grëw grë ncuuaane rleynie miech low; sangue zha ne mban zigne rnabey Dios, laa zho bgaale tib guielmban ne gdziind dze lozh.

Zha ne rlëënie Jesús

¹⁸ Xin yeena, zhile gdziind dze ne laa guidzliu nitlo. Led binle to ganle ib zrieeguia tib zha ne glëënie zhiwseed Jesús, ni nligaa niina len dze rii ndal-le zaatne norieeguia grë zha ne rsilo quiatsidil Xtiiidz me; gane ndion no ne laa dze co ziaadgaxle.

¹⁹ Nli ladaque zha ne nacgrë ne brieë grë zha co, per nliid naciepaa zho ne; sac tel niaca mine nlipaa nacie zho ne, nrieextsod zho. Ga nagon blu zho ne nliid nacgrë zho ne.

²⁰ Sangue to, nacle to zig nac grë zha co, sac nacie Espiritu Sant to, bneedz me guielbiini lo to runbey to mine nac diidzli.

²¹ Guits ne rxel naa lo to nu, nacdä par cseed naa to mine nac diidzli, sac runbeyle tow ni haxta rien to pa min nac guielwquidie; sinque laaw ziaad lo to par gacnan to ganle zha nac zha ne noquidie i.

²² Grë zha ne rnee i nliid lëë Men ne zëëble diidz cxeel Dios lo guidzliu ga nac Jesús, noquidie zho miech ga. Ni zha ne sca ru, rlëënie zho me ga; ni ne sca riladzd zho cho nac me, yele Pxoz me ga riladzd zho.

²³ Sac zha ne rlëënie men ne nac Xpëëd Dios, ga rlu ne nliid riladz zho cho nac Dios; sangue zha ne rxobnen cho nac Xpëëd me, zha cosi nli riladzd zho cho nac me.

²⁴ Laa naa rso diidz lo to sca: Goltsienal grë mine pseed to zeene glopaa psilo bliladz to Xtiiidz Dios, zeena zigtäa Dios, zigtäga Xpëëd mew, tibaque gbannie to me.

²⁵ Golsoladz ganle, laa Jesús psanle diidz ne ib zgaa ne tib guielmban ne gdziind dze lozh; lëë guielmban co yгаа grêse zha ne nacie me.

²⁶ Laa naa rzet min rii lo to, sac ne squi no grë zha ne ziaad racladz yquidie to.

²⁷ Sangue to laa Jesús pxeelle Espiritu Sant nacie to, rquiind ne goon choraä cseed to; sac Espiritu Santzhal rneedz guielbiini lo to rien to zha nac grêraa ncuuaane no gacnan to, ni mesi gon mine nac diidzli min co rseed me to, led yed me rquidie. Golguien sca, Jesús golbannie, golbannie me zigne noseed Espiritu Sant to.

Zha ne nac xpëëd Dios

²⁸ Xin yeena, nanle to sca sozite to lo Jesús, sinque tibaque golangnie me; zeena

ine tibiladzd gac to gal dze ne laa me guiaad. Sac zha ne sozit lo me gban zho zigne gacladzataa zho, zeene laa me guiaad mban gac zho; sac guielto ne guiaan zho lo me.

²⁹ Nanle to ganle, mesi zigne rieguial gac guielwxtis sca ru mew; gacxe waa, grêse zha ne nac xpëëd me ible zdeed me mine rieguial zho.

3

¹ Golwi ganle pa lotaa rleynie Dios ne, laa me rneedz diidz laa ne gac mëëd lo me. ¡Ni nligaa tel ne, xpëëdle me nac ne! Grêraa miech riladzd zhow, sacne runbeyd zho cho nac me.

² Bets, bzian, ne nligaa xpëëdle Dios nac ne. Nli ndiond ne niina dien zha glu ne gal dze ne laa Jesús guiaad, per mine ndionpaa ne, zeene gal dze co laa ne gac zigne nacpaa me; ni dzigosi laa ne dzian me grop lo ne.

³ Ni grêse zha ne zienie guic yгаа guielnzaac co, tibaque rioxco zho zig zie dze nosaan zho ncuuaane runctal xtol zho, sac tel Jesús randzed me dol.

⁴ Grë zha ne runctal xtol, xley Dios ga rguiits zho, sac grêse dol ne runtaa miech ga rlu ganle ne rond zho mine rnabey me.

⁵ Per nanle to ganle, laa Jesús biaad lo guidzliu, biaadsilaa me miech lo grëtaa xtol zho; ni mesi ni tib dol rapd me.

⁶ Gacxe waa, zha ne nlipaa nacie me, zienaldraa zho ncuuaane gunctal xtol zho; laa grë zha ne tibaque noyuncal xtol, gase rlu ne gard guien zho cho nac me, gard gunbey zho me.

⁷ Xin yeena, ib gliladzde to mine rnee zha ne racladz guiaadquidie to. Golgan ganle, zha ne mban zigne rdziladz Dios, lëë zha co nli mbe zdoo, zigne men mbe nac Dios;

⁸ sangue grë zha ne tibaque quiaayuncal xtol, xnëz mendox ga ngab zho; sac tel mendox, desde padzeela tibaque guielntseeb quiaayun ma. Ni min co nagon nacie biaad-paa Xpëëd Dios lo guidzliu, biaadnitlo me grëtaa ncuuaane run ma.

⁹ Zha ne nac xpëëd Dios, rdeetraa zho diidz gunctal zho xtol zho, sacne laa guic zho zienie gban zho zigne racladz Espiritu Sant, men ne nacie zho; rienle zho nodne gunctal zho xtol zho, sac laa zho nacle xpëëd Dios.

¹⁰ Nieenpaa cho nac xpëëd Dios, chogaa nac xpëëd mendox, sac grêse zha ne run guielntseeb, grêse zha ne rleynied samiech, led xpëëte Dios nac zho;

¹¹ sac gon, desde dze ne psilo bliladz to Xtiiidz Dios, bingazh to ib none gleynie ne samiech ne.

¹² Zig nac Caïn, xnëz mendox ngab Caïn, gane beet me bets me loxaque ne ndzinli mban bets me, laa me niapse guielntseeb run me. Ib gunde to mine been Caïn.

¹³ Gacxe waa, bets, bzian, zeene gan to laa grëraa miech rlëënie to, ib tsode to zhgab guiab to pe nacne sca run zho.

¹⁴ Sanguë ne rleyne ne samiech ne, gane ndion ne noxtseebdraa ne guioo ne gabil, laa ne bgaale tib guielmban ndzon ne gdziñdraa dze lozh; sac zha ne rleynied samiech, nêz ne nitlo zho ga zie zho.

¹⁵ Grë zha ne sca rlëënie samiech, rrieë quia rut zho ga, ni nanle to ganle zha ne rut samiech, gard yгаа zho guielmban ndzon ne gdzind dze lozh ga.

¹⁶ Ndion ne zha gleynie ne samiech ne, sac Jesús zhal blu zhaw zeene sca bleeladz me me gut me bdiizh me xtol ne. Gacxe waa, zha ne nlipaa rleyne samiech, none cueeladz zho zho, cueeladz zho ncuaañ rap zho, gacnie zho samiech zho.

¹⁷ Gzoob ne, tib zha ne rnee xnêz Dios no zho, nroob rapchen zho, ranlo zho rcaalsad pe yquiiñ tib zha ne nacgrë zho, per ib rdeete zho palal pe yquiiñ zha co. ¿Niacxe na nli rleyne zha co samiech zho ga?

¹⁸ Xin yeena, golgacnañ sca ganle, led loxaque diidzde, led loxaque laglaadse gnee ne rleyne ne samiech ne; sinque none glu ne nli rleyne ne zho.

¹⁹ Sca nagon none dziuun ne, dzigo niicle new ndionpaa ne nli xnêz Dios no ne, ni scagaa tsod pe nacne pe dzeb tsonie zdoo ne zeene laa ne gbig lo me.

²⁰ Tel zha ne rdzieb zdoo, sac rien zho noyund zho miñe rnabey Dios, ib tedsod zlisqui Diosa lo zho; sac tel me grësew nan me.

²¹ Xin yeena, laa zha ne desde zdoo zho nan zho noguiitsd zho miñe rnabey me, scagaa tibliladzse gbig zho lo me;

²² hor cosi ncuaañe gnabtaa zho lo me squiaadiag mew, sacne mban zho zigne rnabey me, ni noxco zho noyund zho ncuaañe rdziladz me.

²³ Ni lëë miñ rii rnabey me: Grëse miech, none dib zdoo zho gliladz zho Jesús men ne nac Xpëed me, ni gleynie zho samiech zho zigne psanle me diidz ga.

²⁴ Grë zha ne ron diidz run miñ co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espiritu Sant nacnie ne.

4

¹ Bets, bzian, zha ne gnë zhiEspiritu Dios nacnie zho, goon ye zho quianee Xtiidz me lo miech; ib gunde to ne lëëlëd gliladz to xtiidz zho, sinque golwigazh dien pe nli zhiEspiritu Dios nacnie zho. Sac ndal grë zha ne quianzë lo guidzliu, rquidie zho rnee zho Xtiidz Dios noteed zho.

² Parne guien to dien pe nli zhiEspiritu Dios nacnie zho, golwi dien zha rzac zho

Jesús: Tel zha ne riladz ne nli zig tib miech goc me biaad me lo guidzliu, ga rlu ne nli zhiEspiritu Dios nacnie zho.

³ Laa tel riladzd zho ne nli sca biaad me, nlid dzigo zhiEspiritu Dios nacnie zho; sinque lëële espiritu ne rtsidil Jesús ga nacnie zho. Laa to binle ganle ib laa espiritu co guiaad; ni lëële espiritu ntseeb co nacnie grë zha ne squi quianzë lo guidzliu niina.

⁴ Xin yeena, sange to xnêzle Dios ngab to, yquidiedraa zha co to, sac gon mazdraa nroob poder rap men ne nacnie to, lëdle espiritu ne nacnie grë zha ne sca zienal grë wseed yozh ne no lo guidzliu.

⁵ Grë zha co, ncuaañe rac lo guidzliu rii nonie guic zho; gacxe waa, niapse lëew rnee zho, ni gagaa grëque zha ne rleyne grë ncuaañ co, zha co riladz zhiwseed zho.

⁶ Sanguë ne xnêz Dios no ne. Ni scagaa zha ne runbey Dios, zha co rquiaadiag miñe rnee ne; laa grë zha ne runbeyd me, rquiaadiagd zhow. Gase na ganle rlu cho zha nacnie zhiEspiritu Dios, ni cho zhagaa nacnie espiritu ne ziaadquidie miech.

Rleyne Dios miech

⁷ Bets, bzian, golgotsaa gleynie ne samiech ne, sac gon, tel Dios grëse ne rleyne me ne. Gacxe waa, zha ne rlu nli rleyne zho samiech zho, gase rlu ne nli xpëed Dios nac zho, nli runbey zho me.

⁸ Laa grë zha ne rleynied samiech, runbeyd zho Dios ga gane sca run zho; sac gon ib Dios rneedz guielbiini lo ne gleynie ne samiech ne.

⁹ Gotsaa gwi ne ganle, pa lotaa rleyne me ne: Tibpaa Xpëed me, ni pxeel me me biaad-tizh me xtol ne, zeena yгаа ne tib guielmban ndzon ne gdziñd dze lozh.

¹⁰ Led guiabd ne togo glo miech bleynie Dios gane rleyne me zho niina; led scada, sinque ible zdoo me gola rleyne me ne. Ne nligaa gotsaa gwi ne ganle zha pxeel me Xpëed me, goc me zig tib gon ne gozh grëse xtol ne. Ga nagon rlu pa lotaa rleyne Dios ne.

¹¹ Bets, bzian, zigne scataa rleyne Dios ne, scaquegaa ne nagon none gleynie ne samiech ne.

¹² Gard tso tib zha ne gan Dios, per zha ne rleyne samiech, me ga nacnie zho; ni zigse zie dze dib zdoora zho rleyne zho samiech zho.

¹³ Me nac men ne pxeel zhiEspiritu me nacnie no, parne glu nacnie me no, ni scagaa no nacnie no me.

¹⁴ Ni stiba, grop lo no bdzion no biaad Xpëed me biaadsilaa me miech lo dol; ni miñ co nonee no lo miech niina.

¹⁵ Grëse zha ne riladz Xpëed Dios nac Jesús, ni rnee zhow lo miech, ga rlu ne

nacnie Dios zho, ni scagaa zha nacnie zho me.

¹⁶ Ndiõn ne ganle nli rleyniedox Dios ne, sac rienpaa ne rleynie me ne, ni riladz ne zeene rnee me pa lotaa rleynie me ne. Ible niaa me par gleynie me, me rdeed guielbiini lo miech gleynie zho samiech zho, zigne rleynie me zho; gacxe waa, zha ne rleynie samiech, ga rlu nacnie zho Dios, ni scagaa me nacnie me zho.

¹⁷ Zig nac ne, niina ne laa ne nacniele Jesús, zig zie dze laa ne lozh cseed gleynie me me, ni gleynie ne samiech ne zigne racladz me; ni scagaa tsod pe nacne ctoladz ne, pe nacne gdzieb ne gdziñ dze ne laa me guñ xquielwxtis me; sinque haxta gley ne dzian ne me gal dze co.

¹⁸ Nod pe nacne gdzieb ne me, sac gon ndiõn ne pa lotaa rleynie me ne. Led yedraa niina pe dzeb ne dzio ne, sac grëse dzeb rbiche zeene rien ne rleynie me ne. Zha ne rdzieb, zienie guic zho pe nac grë guielnë ne gan zho, ga rlu zho gard guien zho ne rleynie me zho, ni gardгаа guien zho gleynie zho me.

¹⁹ Gotsaa guien sca ganle, nli laa ne rleynie Dios, laa ne rleynie samiech ne, per glo me blu ganle pa lotaa rleynie me ne.

²⁰ Tel zha ne rnee, rleynie zho Dios, ni rlozh ga rlënie zho samiech zho, rquidie zho ga. Sac gon, tel nand zho gleynie zho samiech zho, zha ne ranlopaa zho, ðpe lel Dios dzigo gliladz ne nli rleynie zho, ni nac me men ne ranð zho?

²¹ Sac gon, znu nac xtiidz Jesús: Zha ne rleynie Dios, zigne rleynie zho me, scaque none gleynie zho samiech zho. Ni min rii rnabey me dziuun ne.

5

Zac csaan ne ncuaane runctal xtol ne

¹⁻² Grëse zha ne dib zdoõ riladz ne ible lëë Men ne zëëble diidz cxeel Dios lo guidzliu ga nac Jesús, grëse zha co xpëed Dios nac zho.

Grëse zha co, par guien ne dien pe nli rleynie ne zho, none guien ne dien pe nli rleynie ne Dios, dien pe nli run ne mine rnabey me. Nac cuent rii, zig nac tib yu miech, zha ne rleynie pxoz mëed, scaque-gaa rleynie zho mëed.

³ Sac zeene rleynie ne Dios, zun ne grëse mine rnabey me. Ni grë mine rnabey Dios, nacda ncuaane guiab ne grielod gun ne;

⁴ sac grëse zha ne nacle xpëed Dios, tot-saque rnalo zho ne Jesús gun xyudar zho, gac-wetraade zho lo grë ncuaane gunctal xtol zho.

⁵ Gõlgacnañ sca: zha ne dib zdoõ riladz Xpëed Dios nac Jesús, zrieelo zho csaan zho grëtaa ncuaane runctal xtol zho.

⁶ Tel ne, ndiõn ne ni riladz ne ganle nli Xpëed Dios nac Jesús, sac zeene biaad me horne norobnis me, horne nolozh me, ga blu ganle cho nac me. Ni ye Espiritu Sant nolu ganle ne scaw, ni mine rnee me diidzliw.

⁷⁻⁸ Gotsaa gwi sca ganle, tson mod rlu cho nac Jesús: Tiba por mine nolu Espiritu Sant, stiba por mine blu zeene norobnis me, ni stiba por mine blu zeene nolozh me. Zigtaa mine nolu Espiritu Santa, zigtaa zeene brobnis mew, zigtagaa zeene nolozh mew, blu ganle Xpëed Dios nac me.

⁹ Mine rnee Dios, none gliladz new. Xtiidz samiech ne name riladz ne, ðpe lel mine rnee Dios dzigo gliladz ne?

¹⁰ Zha ne gliladz mine rnee Dios, rriequia rzoob zho me ga zig tib zha ne rquidie; sangue zha ne gliladz mine rnee me, zien zho ganle nli Xpëed me nac Jesús.

¹¹ Laa me bneele ganle: zha ne gnalo Xpëed me, zгаа zho tib guielmban ndzon ne gdziñd dze lozh; sac Xpëedse me rdeed guielmban co.

¹² Gacxe waa, zha ne rnalo Xpëed me, laa zho bgaale guielmban ndzon co; sangue zha ne rnalo Xpëed me, gard yгаа zhow.

Bgaale to guielmban ne gdziñd dze lozh

¹³ To ne nac to zha ne rnalole Xpëed Dios, laa naa rzet min rii lo to zeena gacnañ to ganle laa to bgaale guielmban ne gdziñdraa dze lozh ga.

¹⁴ Ni scagaa, ndiõnpaa ne rquiaadiag Dios xtiidz ne, zeene ncuaane rio zdoõ me rnab ne lo me;

¹⁵ ni zigne ndiõn ne rquiaadiag me xtiidz ne, scaquegaa none gliladz ne ib zneedz me ncuaane rnab ne.

¹⁶ Zig nac zeene gan to cho tib zha ne nacgrë to been pe tib dol, ni rlu nacda dol ne gnitlo zho, zac gnab to lo Dios gun me zho perdon; ni gacnañ to ganle, ible zun me zho perdon. Sac gon no dol ne rnitlo, ni zha ne gun dol co, nodne gnab to lo Dios gun me zho perdon.

¹⁷ Nli grëse guielntseeb dol naca, per no mine rnitlod miech.

¹⁸ Ni ndiõn ne ganle, zha ne nacle xpëed Dios rundraa zho ne lega gunctal zho xtol zho; sac Jesús men ne nac Xpëed Dios, men co quianap zho, grieelodraa lega pe gun mendox zho.

¹⁹ Zig nac ne, ndiõnpaa ne xnëz Dios no ne. Nli ndalraa zha ne zienañ ncuaane rnabey mendox,

²⁰ sangue ne, laa Xpëed Dios biaad bdxibiini me xquielrien ne bdziuunbey ne men ne nacpaa Dios. Niinasi laa ne ngable lo men ne nacpaa Dios ga, ni lëë me ga nac Jesús. Me nac Dios nguamban, ni me nac men ne rdeed guielmban ndzon ne gdziñd dze lozh.

²¹ Xin yeena, golguien Diosse nac men ne
gleynie to; gunde to ne lel grè ncuaape no lo
guidzliu rii gleynie to, laa ne gleynie to Dios.
Juan

Juan

BROP GUITTS NE PQUIAA JUAN

¡Diuzh to grêse to!

¹ Laa tib zhagol rii rxeel tib guits rii ziaad lo to i, ne nac to zha ne no xnêz Jesús. Dios bzooblo to, bredz me to ne laa to ngab xnêz me.

Ne nlipaa rleynie naa to gon, ni led naad-seгаа, sinque ye grêraa zha ne runbey diidzli ne nac Xtiidz Dios.

² Rleynie no to sacne tibaque nac diidzli ne riladz ne, ni tsod dze ne csaan new.

³ Dios ni Jesús men ne nac Xpêéd me, me glu ganle pa lotaa noxco me to, zeena peet tsienied guic to, ni yquia zdoo me to; ni zunpaa mew, sac rleyniedox me to.

⁴ Ne nlipaa gon bleydoo naa zeene gon naa nzian zha ne nocaania Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxož ne.

⁵ Bets, bzian, laa naa rnab lo to, golgotsaa gleynie ne samiech ne. Guiabd ne togo ncub mine rne naa lo to nu gun to; sac gon, lëëquew ga bdzion ne zeene psilo bliladz ne Xtiidz Dios.

⁶ Telne nli rleynie ne Dios, dzigo none gban ne zigne rnabey me; gacxe waa, none niowse gban ne, ine gleynie ne samiech ne, sac gon min co rnabey me.

⁷ Ndal zha ne quianzë lo guidzliu niina, noquidie zho miech, rnee zho nlid goc Jesús zig tib miech zeene biaad me lo guidzliu. Nsin golso lo zho, sac gon notsidil zho mine nac diidzli ga, rlëënie zho Jesús ga sca run zho.

⁸ Golguien, ib gdeete to diidz guiaadquidie zho to, zeena dziin ne quiaayun to i gacda zhlëse. Goltsoxco tiblque golgac, zeena yгаа to grêtaa guielnzaac ne no gneedz Dios lo to.

⁹ Sac gon, zha ne csaan mine nacpaa zhiwseed Jesús, led xnêzdraa Dios ga no zho; ni scagaa, zha ne zienalpaaw zigne naca, zha cosi xnêz Dios ga, xnêz Xpêéd me Jesús ga no zho.

¹⁰ Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuëz zho, ib tsode to gnee to pe diidz ne csannziuu to zho;

¹¹ sac telne sca gun to, rrieequia yele to rleynie grë zhiwseed yozh zho ga.

¹² Ndal grë ncuane no gne naa lo to, per racladzd naa gzet naaw lo guits rii. Laa guic naa no guialgan naa to i, dzigo mazd hor co naazhal gnew lo to; zeena nroob guielbley ne dzio ne grë ne.

¹³ Grë zha rii, zha ne bzooblo Dios bredz me zigne bredzaque me to bzëeb to xnêz me, laa zho rxeel bdiuzh lo to grêse to.

BION GUTS NE PQUIAA JUAN

¡Diuzh bets!

¹ Laa zha gol rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

² Bets, rnab naa lo Dios zigne squi wen mban luu nêz lo me, scaque zaacse grieequia grêtaa ncuaañe gun luu, ni gneedz me guieñdaan lo luu.

³ Ne nlijaa bley naa, zeene biaad bla zha bets ne nu, bzodiidz zho lo naa squitaa ndzinli mban luu, tibaque noxco luu zienal luu mine nac diidzli.

⁴ Ne nligaa, nodraa pe stib conley zdoonaa zigne rleytaa naa zeene ron naa ine niowse mban grê zha ne biane naa xtiidz Dios lo, zienal zho mine nac diidzli.

⁵ Bets, ziyon naa squitaa tibaque noxco luu run luu xyudar grê zha ne nacgrê ne, ni mazdraa zeene nac zho zha ne ziaad stib guiedz. ¡Wen ga!

⁶ Squi ndxie grêraa zha ne rliiladz Jesús, rzodiidz zho squitaa nquialadz luu zho. Bzhiguieñ sca, bioxco tibaque squi been xyudar zho zeena grieelo gdziñ zho zaatne no tsie zho. Sca rdziladz Dios.

⁷ Sac gon, niapse porne rleynie zho Dios, laa zho briece ziegun zho xtsiin Jesús, ni ib rziguieñd zho ycaania zho ncuaañe rdeed grê miech ne rliiladz Xtiidz Dios.

⁸ Min co nagon, ib none ne yquiambiaazlo zho, ne none gdeed ncuaañe yquiin zho, zeena dziuun ne xyudar zho ygaaz Xtiidz Dios.

⁹ Pxelle naa tib guits lo grêse zha ne no xnêz Dios i, per zig nac Diótrefes gon, men ne racladz so gnabey lo to i, rond me mine rnee no.

¹⁰ Gacxe na, telne laa naa guial i, dzigo laa naa glisqui lo me dieñ pe nacne quianeene me no.

Ni tebaa mincose, na haxta run me ib rbêzlod me grê zha bets, zha bzian ne rlanso i; niicle rdeetegaa me diidz cho gdeed zaatne cuêz zho. Zha ne rund mine racladz me, rbee me zho lad grê zha ne nacgrê zho.

¹¹ Bets, sangue luu gon ib tsienald luu mine run grê zha ne sca run guieñtseeb, sinque bioxco güeynal ncuaañe ndzinli. Sac gon, zha ne run niapse ncuaañe ndzinli, xnêz Dios no zho; laa grê zha ne run ncuaañe ntseeb, gard sëeb zho xnêz Dios.

¹² Zig nac Demetr, grêse miech rnee ganle zaacse mban Demetr. Ni rlugaa nliw, sac gon tibaque zienal me mine nac diidzli. Niicle nogaaw, mincoque rnee no, ni nan luu ganle led yed no rquidie.

¹³ Ndalraa ncuaañe no gne naa lo luu, per racladz naa gzodiidz naaw lo luu lo guits rii;

¹⁴ sac laa guic naa no guialgan niob naa luu i, dzigo hor co ziodiidz ne grop ne.

¹⁵ Guiaañie Dios luu sca; peet tsienied guic luu. Grêse xamigw luu zha ne runbey luu nu, laa zho rxeeñ bdiuzh lo luu. Scagaa bzhiguieñ bdeed tib zhibdiuzh naa lo tib tib zha ne nac xamigw ne nêz qui.

Juan

GUTS NE PQUIAA JUDAS

¹ Naa nac Judas, bets Santiagw; xtsiin Jesús quiaayun naa.

Laa naa rxel guits rii lo to, grèse to ne nac to zha ne bredz Dios bzëëb xnëz me. Ne nligaa nquialadz me to, ni haxta quianap Jesús to.

² Dios glu ganle pa lotaa rquia zdoo me to, pa lotaa rleynie me to, ni pa lotaa noxc me to zeena peet tsienied guic to.

³ Bets, bzian, miñe gocladz naa nzet naa nu ganle zha nactaa miñe been Dios psilaa me ne lo xtol ne; per na rgobey naa nonguelraaw cso naa diidz lo to, ib gandzede to grè zha ne rtsidil miñe rililadz ne. Dios bneedz diidz gocndion new, ne nac ne zha ne brieie lo dol bziaab ne xnëz me.

⁴ Sac gon, blalaa zha ne rquiaalo rililadz Dios, ngeets zhliian laa zho bzëëb lad to i. Miech yozha, niapse lo dol no zho, rnee zho zac gun ne ncuuañe guiaabtaa guic ne, sac nquialadz Dios ne; ib rililadz zho Jesús, Meñ ro, Meñ nroob ne rnabey ne. Padzeelale goquiet, ne grèse miech ne sca nac, lëëque lo xtol zho nitlo zho.

⁵ Golsoladz ganle zha bzhaac grè zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz tow: Zeene psilaa Dios grèse menladz ne lo guielnè ne noded zho Egipt ga, zha ne brieiequia ib bnëd niunbey me, ib gonzed me zho, bnitlo me zho.

⁶ Scaque grè anjl ne biche lo me, psaan zho dziin ne pso me zho; bdziuiend me zho, laa me nsioogyu zho tib lo guielcawdoo, ga quiaadoo zho haxta gdziñ dze ne laa me gun guielwxtis.

⁷ Rsoladz to ganle zha goc guiedz Sodom, guiedz Gomorr, ni grëraa guiedz las ne bre gax ga. Grè miech ne bio grè guiedz co, laa zho güeynal miñe nacdreaa guieltsieel, tel chotaa pquiangob zho, bionie zho haxta grè mrash; grèse zho, lo gui ga bnitlo zho. Ga rlu ganle, grèse zha ne csaand xquientseeb, no tib lo guidox ne gdzind dze guiuu, ni ga nitlo zho.

⁸ Ni zha ne gon blanso lo to i, scadaa run zho; sac tel zha, niapse guielyozh zienal zho, laa zho nosanbeed xcuerp zho, ib rond zho miñe rnee zha ne rnabey, haxta rdzibdee zho grè men non ne no gbaa.

⁹ Per ni anjl Miguel, anjl rnabey ne bdilnie mendox zeene güeyla me xcuerp Moisés, ib beend me ndziibdee me mendox; lëë gdib rëb me: "¡Dios nac men ne gunquizh luu miñe run luu!"

¹⁰ Laa grè zha qui, haxta grè ncuuañe run Dios, ncuuañe ni rioguicd zho zha nac, laa

zho rdzibdeew; masaque mban zho zigne mban grè ma, laa zho run ncuuañe rdeedtaa guxt xcuerp zho; lëëque zha nonitlo zho ga.

¹¹ ¡Probsaxe zho! Sac gon, nëz ne zey Cain ga zienal zho. Lo guielblè dimi, laa zho brieie xnëz Dios zigne brieie Balam; ni zigne gut Coré zeene gocntseeb me lo Moisés, scaque nitlo zho.

¹² Zeene riaad zho lo guielwagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dien chora a no gow; ni lalnu guielto guieñd lo zho. Nëzrii nëzrec quianzè zho, masaque nac zho zig nac xcow ne ziaadniec nisguie, loxaque nëzrii nëzrec rienie mew; zig nac tib yag bgoöl ne guieñd nex lo, len dze ne no yquia nex low. Laa zho bnitole ga, masaque nac zho zig tib yag bidz ne bliadzle dib lo; sac tel yag bidza, gdzindraa dze ne yguiaaw.

¹³ Zigne nëzrii nëzrec rchoon nisdoos grè mtsiin beed ne ndziib low, scadaa nëzrii nëzrec nolu grè ncuuañe mbeeguieñto ne quiaayun zho. Laa zho ziele nëz lo guielcawdoo ne rieguial zho, zaatne gdzindraa dze grieie zho; zig tib mel gbaa ne bnitnëzle, laa ma nonziaabse lo guielcow.

¹⁴ Lëële zha qui ga bzeet Enoc (men ne brieiequia lo dii ne rac xoop xtii Adán), zeene psiaab Dios guic me, rëb me: "Gołwi ganle laa Dios ziaad, pe zhidaa grè anjl ne ziaadnie me,

¹⁵ ziaadgun me guielwxtis. Grèse miech ntseeb, laa me gunquizh zho grëtaa dol ne been zho, grëtaa diidz dox ne brieie ro zho bneenè zho me."

¹⁶ Ni nligaa sca nac grè zha qui, ib nod ncuuañe tso zho conform, tibaque wlisqui no zho; laa zho zienal grëtaa guielyozh, ncuuañe racladzttaa xcuerp zho. Rto zho guielzdin, rlozhd dieen pa rac zho, rio zho pe diidz wen ne rnee zho lo miech, loxaque ne dien zha yquidie zho miech, gun zho miñe racladz zho.

Laa naa rso diidz lo to

¹⁷ Sangue to bets, bzian, golsoladz miñe bnee grè zha ne pxeel Jesús bnee Xtiidz me, zeene biadseed zho to;

¹⁸ led znu rnee zho: "Zeene zhile gdzin dze ne laa guidzliu rii nitlo, zrieiequia grè miech ntseeb ne gzhidznie zhiwseed Jesús, laa zho gban zigne nactaa grè zhgabyozh ne guiaib guic zho."

¹⁹ Ni nligaa ran to niina ganle sca quiaayaca, lëë grè zha co i squi nogodil grè zha ne no xnëz Jesús. Nacnieed zho Espiritu Sant, gane niapse grè ncuuañe dol ne racladz xcuerp zho, min co run zho.

²⁰ Bets, bzian, golguieñ sca tibaque dziits gols o lo Xtiidz Dios miñe rililadz to.

Gołzodiidznie Dios, zigne csiaab Espiritu Sant zdoo to.

²¹ Sozite to lo Dios, gołguien ganle zha rleynietaa me to; gołquiambéz dzian ne gal dze ne yгаа ne guielmban ne gdziñd dze lozh, miñe ndionpaa ne gneedz Jesús men ne rnabey ne, porne rquia zdoo me ne.

²² Tel cho zha ne racchop guic lo Xtiidz Dios, gołnee lo zho biire sodziits zho stib.

²³ Zha ne bii no lo dol, gołnee lo zho guien zho csaan zhow; gołcuee zho lo gui ne noxtseeb zho yгаа zho ga; scagaa grëraa miech, gołquia zdoo zho, per ib cxende to lo zho. Ni lalnu gdziguiende to grë dol ne ruñ zho, gołsaca zig rzac to tib ncuaane rbixnë zdoo to ran to.

²⁴⁻²⁵ Tibaque Dios no, me psilaa ne lo dol, ni megaa csilaa grëraa miech. Men nroob nac me, ni zrieelo gacniën me to guiabde to ladznia dol stib; zeena ine mbe to, ine rley to laa me gdziñnie to zaatne nac lo guielndzondoo ne no me. Niina ne laa ne rdziuunbeyle Jesús, zrieelo dziioolnie ne me, mese nac men nroob, men ndzon, men ne rap guielrnabey. Tibaque nac me, niicle mazd glow, niicle niinaw, ni gdziñd dze ne gdzëë me.

Judas

MIÑE BDEED DIOS DIIDZ GOÑ JUAN

¹ Nu raquiet grè ncuaañe ziaadyoble gac. Dios bnabey Jesús glu mew lo grè zha ne no xnèz me. Ycaania pxeel Jesús tib xanj me biaad biaadluw lo ngundziin win ne nac naa nu, parne sca gacnañ zhow.

² Grèse miñe goñ naa, grèse miñe bin naa ga, laaw gne naa zigne gonse naaw, zigne binse naaw. ¡Diidzliw!

³ Dichos grè zha ne glab lo guits rii, ni dichos grè zha ne yquiaadiag grè miñe zhobnee low nu, ycaania zhow ni gliladz zhow; sac goñ xtiidz Diosa, ni laa dze ne gac grè miñe rzeeta nu, ziaadgaxle.

⁴ Naa nac Juan, laa naa rquia guits rii rxel naa ziaad lo to i, ne nac to zha ne ngab xnèz Jesús, zigne nose to gza gadz guiedz ne ndxie nèz Asia i.

Dios meñ ne no padzeela, meñ ne no niina, meñ ne nacle diidz guiaad, me gacniñ to lo grè zhizhgab to, me cchoobladz zdoos to peet tsienied guic to; me ni Espiritu ne zo lo me zaatne nac lo xcan ndzon ne zob me; Espiritu ne rlu zha nac gadz guielbiini ne rap me;

⁵ ni Jesús meñ ne rnee niapse diidzli, meñ ne glopaa brieaban lo guielgut, meñ ne rnabey lo grèse zha non ne rnabey lo guidzliu.

¡Gotsaa dziuunnon ne Jesús! Sac goñ pa lotaa rleynie me ne, bleeladz me me bzhiee xchen me psanmbe me ne lo grètaa xto! ne,

⁶ tibaque beñ me ne, psannon me ne; bzooblo me ne gac ne pxoz ne gun dziin lo Dios meñ ne nac pxoz me. ¡Mese nac meñ ne rap guielndzon, mese rap grètaa guielrnabey! ¡Tsod cho stib zig me, ni gdziñd dze ne nitlo xquielrnabey me! Sca nac me.

⁷ ¡Bii zanaque to ganle zeene laa Jesús ziadzèeb lo xcow! Grèse miech zan zho me, zig nac zha ne sca bdiñ me, zha ne sca bliz lanz cue me, zanlo zho me; dibdoo guidzliu, hor co mbanse gac miech, haxta zoon zho, haxta zdieb zho. Ible sca none gaca.

⁸ Znu rnee Dios, meñ nroob ne rap grèse guielrnabey: “Grèse ncuaañe notaa, naa psilow ni naa csiaa!a; naa nac zigne nac letr “a” ni letr “z” lo grèse letr; “a” rsilow, “z” riala, zigne nac naa niina sca goc naa padzeela, ni scaque gac naa zeene laa naa guial stib.”

Goñ Juan Jesús

⁹ Naa nac bets to Juan, tibaque nac ne niina grè ne, sac ye naa no xnèz Jesús; ye naa nodeed grè guielnè ne noded to. Zigne rneedz me paciens lo to lèb to lo grètaa guielnè ne no gan to, scaque racniñ me

naa; ni ye naa gdziñ lo me, zaatne no gdziñ to.

Sodiidz naa lo to ganle zha bzhaac naa. Lèètaaque no naa lo guidzliu win ne lè Patmos, ga ngoguiu zho naa loxaque ne noseed naa miech Xtiidz Dios, miñe biaadlu Jesús zeene biaad me lo guidzliu.

¹⁰ Tib dze, lèètaaque nacie Espiritu Sant naa nozodiidznie naa Dios, tibaque zeene nguiedz zèeb tib tsi meñ co, pale tsi tib trompet;

¹¹ nè me lo naa:

—Grètaa ncuaañe ran luu nu niina, pquiaaw tib lo guits pxeela lo grèse zha ne ngab lo naa, grè zha ne no gza gadz guiedz rii nèz Asia: Efés, Smirn, Pérgamo, Tiadir, Sardis, Filadelf, ni Laodicé.

¹² Ptsire lo naa ni naa gwi naa dien cho ga sca rnee lo naa. Zeene bui naa, goñ naa gadz candeler niaa niapse guuib or.

¹³ Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdziina haxta yan ni me, ni ndxie tib cinch niaa niapse guuib or ngali ro zdoo me.

¹⁴ Ine bie rna guitsguic me, zootle zhiil nquits, zootgaa luu guieg, masaque riaazbel bziaalo me.

¹⁵ Ni mew, masaque rquiabniw zigne rquiabni guuib brons zeene rlozh rianmbew, zeene rrieenèzgaaw lo gui; tsi mew, masaque rio bi rnee me zig rio bi grè guiuabee nroob ne zhoob naal nis.

¹⁶ Nia me miñe nèz derech, nzhen me gadz mel gbaa; ni zob tib spad ro me, zigtaa nèz zhits spad cow zigtaa nèz low, gropsè nèza ndox. Masaque biindoo ne rriee lo me, zigne rlu lo ngbidz zeene lega recye lo ngbidz.

¹⁷ Zeene goñ naa me, mbe biaab naa zhan ni me zig tib zha ne gutle. Dzigo blis me nia derech me pxobnia me guic naa, nè me lo naa:

—¡Gdzieebd luu! Naa psilo ni naa csiaa!, naa psan grètaa ncuaañe no, ni naa gnitlow;

¹⁸ ni mban naa. Nli gut naa per brieabaan naa, mban naa niina, ni gdziñdraa dze ne guet naa; ladznia naa no guielgut. ¡Gdzieebd luu sca!

¹⁹ Grèse ncuaañe noyan luu nu niina, pquiaaw lo guits grèsew, niicle miñe noyaclew, miñe naragaa gaca.

²⁰ Znu goñ nac miñe blozh goñ luu ga: gadz mel gbaa ne goñ luu nzheen naa ga con nia derech naa, tib tib mel co nac tib tib zha ne quianap yadoo ne no gza guiedz co; laa ga gadz candeler co, nac tib tib yadoo co.

2

Diidz ne bnee Jesús lo zha Efés

¹ Blozh ga nè me lo naa:

—Mīne gni naa lo luu nu niina, pquiaaw pxeela Efés, lo zha ne quianap grē zha ne ngab xnēz naa ga, gudz lo zho: “Znu nac xtiidz meṇ ne nzhēn gza gadz mel gbaa co, meṇ ne zodeed vuelṭ lo gza gadz candeler ne nīaa niapse guiib or ga, rnee me:

² Naṇ naa zha mban to, naṇ naa pa lotaa noxco to ruṇ to xtsiṇ naa, ni nacde to zha ne lega znuse guiaaṇ zdo; stiba, ib ranzede to grē zha ntseeb. Grē zha ne ziyaad i rnee zho Dios pxeel zho ziadnee zho xtiidz me, per pquia to beēn to zho prueb, haxta gocnaṇ to rquidie zho.

³ Naṇ naa zha nactaa guielnē ne noded to loxaque ne riladz to naa; per niicle scaw tibaque dziits to to, ib rīaanḍ zdo to.

⁴ Loxaque naca no tib ncuaaṇe glisqui naa lo to: ¡Rleyniedraa to naa niina, zigne rleynietaa to naa glo, zeene glopaa bliladz to xtidz naa!

⁵ Golsoladz pa lo pxin to. Golbiire golgac stib zigne nac to glo zeene psilo bliladz to xtidz naa; sac goṇ, telne gac-wende to, ible zial naa i zialtichee naa xcandeler to zaatne zow.

⁶ Nli rleyniedraa to naa scataa, per rley naa ran naa ib rdzigiende to grē ncuaaṇe ndzinlid ne ruṇ zha Nicolait, sac tel naa, ni lalnu ib rdzigiend naa ncuaaṇe ruṇ zho.

⁷ Zha ne rioguicle godiidz rii, yquiaadiag zho gaṇle zha rnee Espiritu Sant lo grē zha ne no xnēz naa, rnee me: Grēse zha ne gdeete diidz gac-wet zho lo ncuaaṇe gunctal xtol zho, zha co ygaa gow xnex yag ne rdeed guielmban ga, mīne zob len huert ndzon ne rap Dios ga.”

Diidz ne bnee Jesús lo zha Smirn

⁸ Blozh ga nē me lo naa:

—Pquiaa mīne gni naa lo luu nu, pxeela Smirn, lo zha ne quianap grē zha ne ngab xnēz naa ga, gudz lo zho: “Znu nac xtiidz meṇ ne psilo grētaa ncuaaṇe no, meṇ ne csiaala, meṇ ne gut ga ni brieegan me, rnee me:

⁹ Raṇ naa zha nactaa grē guielnē ne noded to. Raṇ naa mban rac to guieṇ grē ncuaaṇe yquii to (nligaa peet rapde to lo guidzliu, per guielnzaac ne bgaa to i ngab to lo Dios, nroob nona). Raṇ naa, grē zha ne rnee i xpēed Dios zho sac zhasi zha Israel nac zho, no zho rneenē zho to; per nliḍ goṇ xpēed Dios nac zho, sac zhiwseed menḍox zianaḷ zho.

¹⁰ Nroob grē guielnē ne ziaadyob gaṇ to, per gdziebde to. Squiil menḍox miech, gnab zho tso to ladzguuib; ga nagon glu to dien pe nli dib zdo to riladz to naa. Nli nzianlaa to guiab ladzguuib, per tib tsiise ngbidz sca yquiaanaḷ zho to. Laga mban to lo guidzliu sca, ible csaaṇde to zhiwseed naa, zeena ycaania to guielmban ndzon ne gnedz naa lo to.

¹¹ Zha ne rioguicle godiidz rii, yquiaadiag zho gaṇle zha rnee Espiritu Sant lo zha ne no xnēz naa, rnee me: Zha ne tiblīque tsoxco guṇ mīne rnabey Dios, led yedraa zha co tsoxtseeb guey gabil.”

Diidz ne bnee Jesús lo zha Pérgamo

¹² Blozh ga, nēque me lo naa:

—Mīne gni naa lo luu nu, pquiaaw pxeela Pérgamo, lo zha ne quianap grē zha ne ngab xnēz naa ga, gudz lo zho: “Znu nac xtiidz meṇ ne nzobro tib spad lots ne ndox gropse nēz, rnee me:

¹³ Naṇpaa naa masaque menḍox rnabey lad guiedz ne no to i, per raṇ naa tiblīque dib zdo to rnalō to naa, niicle goṇ to zha psacsi zho Antip, beet zho me i, meṇ ne scataa bioxco bnee xtidz naa lo miech.

¹⁴ Per no chop ncuaaṇe goṇ glisqui naa lo to: Lēda i ruṇ to ranzede to grē zha ne squi ruṇ zigne beēn Balam, meṇ ne pquii Balac bloo Balac guic grē zha Israel beēnctal zho xtol zho, dow zho xpēel grē ma ne biogon lo mdio, ni pquiangob zho zha ne led tsieeld zho.

¹⁵ Lēē tiba ga, laa stiba, ranzede to zha ne bii zianaḷ zhiwseed yozh zha nicolait; tel naa, ni lalnu rdzigiend naa wseed co.

¹⁶ Laa naa rso diidz lo to: goṇab perdon, ni goṇee lo grē zha co csaan zho grē ncuaaṇe ndzinlid ne ruṇ zho; sac goṇ, telne gond zho diidz, ible zial naa zialtilnie naa zho con spad ne zob ro naa nu.

¹⁷ Zha ne rioguicle godiidz rii, yquiaadiag zho gaṇle zha rnee Espiritu Sant lo grē zha ne no xnēz naa, rnee me: Zha ne gdeete diidz lo grē ncuaaṇe gunctal xtol zho, zded naa guielwagw ne rap naa gbaa yquii zho; ni zded naa tibga quie nquits lo zho, lo quie co quia lē cub zho, ni zhase gacnaṇ zha nac lē co zho.”

Diidz ne bnee Jesús lo zha Tiatur

¹⁸ Blozh miṇ co, nē me:

—Ye lo zha ne quianap zha ne no xnēz naa guiedz Tiatur, pxeel diidz rii, gudz lo zho: “Znu nac xtiidz xpēed Dios, meṇ ne masaque riaazbel bziaalo, meṇ ne masaque rquiaabni ni zigne rquiaabni guuib brons ne tibaque riar; rnee me:

¹⁹ Naṇ naa grēse zha mban to; raṇ naa pa lotaa rleynie to naa, dib zdo to riladz to cho nac naa, noxco to quiaayṇ to xtsiṇ naa, tiblīque rac to dziits to to lo xtidz naa; raṇ naa noxcoraa to quiaayṇ to xtsiṇ naa niina.

²⁰ Per no tib ncuaaṇe no glisqui naa lo to: lēda i goṇ ruṇ to ranzede to wnaa ne lē Jezabel i, rnee me Dios rsiaab guic me grē ncuaaṇe rnee me, per nliḍa; sac goṇ, loxaque noquidie me grē zha ne no xnēz naa, noquiiḷ me zho rquiangob zho grē zha ne led tsieeld zho, ni row zho xpēel grē ma ne riogon lo mdio.

²¹ Blactaale pquiambéz naa nab me perdon, ntsèè me lo xquielmban me; per néd me csaan me grè guielyozyh ne run me i.

²² 'Gacnan to sca ganle, laa naa gnabey glan me tib guielguidzdox, tsiechedraa me lo caxtigw co; scaque grèse zha ne zienal zhiwseed me, nroob guielnè ne gnabey naa ted zho, tel laa zho csaand grè guielyozyh co.

²³ Ni haxta zut naa zho, zeena sca gan grèse miech ne no xnèz naa ganle, naasi nan naa pe rza guic miech, pe rza zdoo zho; gacxe waa, tel pe ncuaaane run zho, zdedse naa mine rieguial zho tib tib zho.

²⁴ 'Sangue to grè to zha ne zienald guielyozyh ne rlu wnaa qui (wseed ne rnee zho i rdeed nroob guielbiini, per nan zho gon zhiwseed mendoxa), peet glisquidraa naa lo to.

²⁵ Per none gon tiblque golgac, zeena ine dib zdoo to rnalo to naa gal dze ne laa naa guial stib.

²⁶⁻²⁸ Sac gon, grèse zha ne gdeete diidz lo grè ncuaaane gunctal xtol zho, sinque tibaque tsoxco zho gban zho zigne rnabey naa, haxta gdziñ dze ne nitlo guidzliu, zded naa tib mel gbaa lo zho, mel ne rlan ral sil, ni so naa zho gnabey zho grè guiedz. Naa gded guielrnabey co lo zho, zigne bneedz Pxozy naaw lo naa; ni lalnu yquiad zdoo zho, grèse miech ntseeb, zunquizh zho zho grètaa guielntseeb ne beñ zho.

²⁹ 'Grèse zha ne rioguicle godiidz rii, yquiaadiag zho ganle zha rnee Espiritu Sant lo grè zha ne no xnèz naa!"

3

Diidz ne bnee Jesús lo zha Sardis

¹ Blozh ga, nè me:

—Mine gni naa lo luu nu, pquiaaw pxeela guiedz Sardis, lo zha ne quianap grè zha ne ngab xnèz naa, gudz lo zho: "Znu nac xtiidz men ne nzhen gadz mel gbaa, men ne nacie zhiEspiritu Dios, Espiritu ne rdeed gadz guielbiini, rnee me:

'Nan naa gon pe nac grè ncuaaane run to, niicle zèèb diidz mban to, per par naa miech gutle nac to.

² 'Golcuae zhimcaalo to sca! Golsodziits lo spalalse xtiidz naa mine rsoladz to, sac gon zhile laa to lozh guiaanladza. Ne nligaa, ran naa quiaayunde to xtsiin Dios zig none gaca.

³ Golsoladz ganle zha nac grè wseed ne gocnan to, grè wseed ne bin to; dzigo goltsienala, ni golnab lo Dios gun me to perdon. Sac gon, telne tsienalde tow, zeene laa naa guial, lega nacle zeene gan to laa naa zole lo to; zig rzacz zha ne rzèèb ngbaan lizd.

⁴ 'Sca nac to, per lo to i gon no bla zha ne bii mbe zdoo, sac zienald zho grè ncuaaane run to; rrieequia rdeete zho diidz guiacheed xab nquits zho ga. Ni zha co

nagon rieguial sènal zhits naa, sac gop zho xab zho cuidad.

⁵ 'Golgona ganle, grèse zha ne gdeete diidz lo grè ncuaaane gunctal xtol zho, scaania zho tib lar nquitsbie gacw zho; lè zhow, lè quialew lo guits ne quia lè grè zha ne ygaa tib guielmban ndzon ga; haxta zanie naa zho lo Pxozy naa ni lo grè xanj me, guiep naa: Lèè zha rii gon no xnèz naa.

⁶ 'Zha ne rioguicle grè godiidz rii, yquiaadiag zho ganle zha rnee Espiritu Sant lo grè zha ne ngab xnèz naa."

Diidz ne bnee Jesús lo zha Filadelf

⁷ Blozh ga nè me:

—Mine gni naa niina, pquiaaw pxeela guiedz Filadelf, lo zha ne quianap grè zha ne ngab xnèz naa, gudz lo zho: "Men mbe ne rapd ni tib dol, men ne rnee niapse diidzli, men ne rnabey zigne bnabey rey David; zaatne rxal me, tsod zha ne grieeo csiooga, zaatne csioogga mew, tsod zha ne grieeo cxala; znu nac xtiidz me, rnee me lo to:

⁸ 'Nan naa grèse zha mban to; niicle ne squi bii nsis rac to, per rioxco to ron to xtidz naa, ni rqueetsde to ne nli riladz to naa. Gacxe waa, rrieequia laa naa rxal tib puert ted to, ni choot grieelod csioog puert co.

⁹ Bii zan to ganle, zeene laa naa cxel gza zha ne ngab lo mendox i, guiaad zho guiadquitsgzhil zho lo to, zha ne noquidie i rnee zho xnèz naa no zho. Ga gan zho ganle nli rleynie naa to.

¹⁰ Ne squi tiblque rac to ron to xtidz naa, peet güeynied guic to niicle pquianal miech to, ible squianaap naa to, gande to guielnèdoh ne gan grè miech ne ndxie lo guidzliu.

¹¹ 'Golsoladza ganle, merle guial naa. Golguien csaande to xtidz naa mine nanle to, zeena tsod stib zha ne ctiche mine rieguial to gnedz naa lo to.

¹² Grèse zha ne gdeete diidz lo grè ncuaaane gunctal xtol zho, so naa zho gac zho zig grè pilar nroob ne zo len xyadoo ro Dios, ni gdziñdraa dze ne griee zho ga; cho pilar co, ga yquia naa lè Dios, ga yquia naa tib lè cub naa. Laa zho ngable guiedz ne rnabey Dios ga; lèè guiedz co nac Jerusalén cub ne gnabey me guiet gbaa.

¹³ 'Zha ne rioguicle godiidz rii, yquiaadiag zho ganle zha rnee Espiritu Sant lo grè zha ne no xnèz naa."

Diidz ne bnee Jesús lo zha Laodicé

¹⁴ Ni nè me:

—Mine gni naa niina, pquiaaw pxeela guiedz Laodicé, lo zha ne quianap grè zha ne ngab xnèz naa ga, gudz lo zho: "Men ne rnee niapse diidzli, men ne run grèse mine rnabey Dios, men ne bzo Dios psan grèse ncuaaane no, znu nac xtiidz me, rnee me lo to:

15 'Nan naa grëse zha mban to. Raṅ naa noxcode to grë miṅe rnabey naa to, ni niicle rsaandгаа tow; nac to zig nac tib ncuaaṅe loxaque ndzëyopse, niicle niagda ni niicle nlëëdгаа. jTebaa nac to zig tib nis yag, zig tib nis lëëгаа!

16 Per na gon ne squi nac to zig tib nis ndzëyopse, ni lalnu rdziguiend naa ncuaaṅe ruṅ to. jZhile gon laa to gunctsiḅ naa!

17 'Rnee to grëse ncuaaṅe rquiin to laaw quianiele to, ible peet liaadz racdraa lo to, jni rienḁe to gon ni lalnu peet nonde to! To nac miech ne mazdraa mban, peet rapde to, ni lar ne ctse lad to guiend, rrieequia haxta ni lo to roldraa.

18 Laa naa rso diidz lo to: Teḁne racladz to nḁipaa gapchen to, goltë lo naa, naa cto guiḁ or ne mazdraa wen lo to; xab tow, naa cto lar ne mazdraa nquits gacw to, zeena ctoḁadzniedraa to ne to squi guiend pe ctse lad to; haxta nis rmed ne tso bziaalo to, naa gnedza, zeena gbiire gaṅ to stib.

19 'Grë zha ne rleynie naa, rḁisqui naa grë ncuaaṅe nonguielḁ ne ruṅ zho, rteed naa zho tib caxtigw parne cseed zho ndzinli gban zho; gacxe waa goḁac ndzinli stib, goltsoxco miṅe rnabey naa.

20 Laa naa quiambëz to gon gbiire gbig to lo naa. Rrieequia ro lidz to zo naa, quiabedz naa to. Zha ne yquiabladz cxal ro lidz sëëb naa, zdeed naa, ni haxta sobnie naa zho diowxtsee no grop no.

21 Grëse zha ne gdeete diidz lo grë ncuaaṅe gunctal xtoḁ zho, zded naa diidz sob zho cue naa, zaatne sob naa gnabey naa; zigne zoob naa cue Pxoḁ naa niina nonabey no; sac teḁ naa, bdeḁe naa diidz niuṅ naa miṅe rnabey menḁox.

22 'Zha ne rioguicḁe godiidz ri, yquiaadiag zho gaṅle zha rnee Espiritu Sant lo grë zha ne no xnëz naa."

4

Roolnie zho Dios gbaa

1 Zeene bui naa stib, gon naa laa tib puert quia zhan gbaa, nzhialse puert co. Horco biire bin naa tsi men ne bnee lo naa ga glo, men ne nac tsi ga zig tsi tib trompet, në me: —Biep, dë nu ganle, zeena glu naa lo luu zha nac grë ncuaaṅe ziaadyob gac.

2 Zigne sca në me, hor co blu Espiritu Sant lo naa, gon naa laa tib xcan zo gbaa, tib xcan ne rzob men ne rnabeya. Lo xcan co, ga zob tib men co,

3 masaque rbebni me zigne rbebni quie ne rnee zho jasp, quie ne rneegaa zho cor-nalin. Igose xcan co quia tib guitye, rbe-niw zigne rbebni quie ne rnee zho smerald;

4 ni zo zgalptap xcan igow, tibga mengol zob tib tib lo xcan co, dib nquitsbiese rna xab me, ni zob tibga coron or guic me.

5-6 Masaque riab belye, ratsie rnee nguiz, ni zëëb tsi miech zaatne zo xcan ne rianḁ glowtaa ga. Zaatne nac delant lo xcan co, masaque rluw zig rlu lo nisdoo ni rbe-bela zig rbebel quie zed; ni noquia gadz biini nroob ga, lëë gadz biini co nac gadz guielbiini ne rap Dios.

Igo xcan co, ga zo tap bult mban, tibgaw zo tib nëz; nëz low, nëz zhitsaquew zob bziaalow.

7 Tiba rlu zig rlu meedz, stiba rlu zig rlu tib ngon yeen; laa schop mine rianḁ ga, tiba rac lo zig rac lo miech, laa stiba rlu zig rlu tib msi nroob ne quiaisiibe.

8 Tib tiba zob xoopga xiila, ndziib bzi-aalow zhits xiila, len xiila ne; tibaque nguiedz zëëb tsiw, rneew:

jMeṅ ndzondoo nac Dios!
jMeṅ rnabey nac me, nroob poder ne rap me!

Notaque me, me ga no padzeela, me no niina, ni lëëque me ga no guiaad.

9 Gza tap bult mban co, roolniew men ne zob lo xcan co, (men ne gdzind dze guet) rsanḁnona me, ni rdeeda xquizh lo me. Zigse sca ruṅ gza bult co,

10 scasaque gza galptap mengol ne zob ga, rquitsgzhib me lo men ne zob lo xcan ro co, gzase me, rgob me xcoron me rguix mew nëz lo men ne zob lo xcan co, ni rnee me:

11 Luu nac xDios no, luu nac men ne rnabey no.

Luuse nac men ne rieguialḁ dziuṅnon no, ni gnee no grë diidz ndzon lo luu.

Nroob poder ne rap luu, sac grëtaa ncuaaṅe no, luu bzaaw;

laaw biaa sac ible sca gocladz luu, ni laaw niaagaa niina, sac ible sca racladz luu.

5

Tib guits ne nzhidoo gadz lë cint

1 Zeene bui naa stib, gonpaa naa men ne zob lo xcan ro co, nose tib guits nroob nia derech me. Gropse nëz guits co quia, ndibëdsew, nzhidooḁaw gadz lë cint.

2 Ni gon naa tib anjḁ, tib men macis rlu me, nguiedz zëëb tsi me, bnabdiidz me rëb me:

—jCho rieguialḁ cchug cint ne nzhidoo guits qui, cxal zho low?

3 Ni tib choot pxald lo guits co, niicle gbaaw niicle lo guidzliuw, niicle zhan guid-zliugaaw, brieequiad tib zha ne nchug cint co, nwi zho lo guits co.

4 Mban goc naa, psilo naa nguiedz roon naa, gon naa sca brieequiad tib zha ne rieguialḁ nxlal lo guits co, nlab zho low.

5 Dzigo bnee tib mengol ne zo gax lo xcan co, në me lo naa:

—Goond luu. Lëz ganle, men ne brieequia lo xtiḁ Judá, lo xtiḁ rey David, me cchug gza gadz cint ne nzhidoo guits qui, me cxal low.

Ible me rieguia¹la, sac go²n psiaablo me grēse zha ne rlēē lo me; rrieequia nac me zig tib meedz.

⁶ Horco bui naa zaatne nac lo xcan ro co, go²n naa glowtaa lo gza bult mban co ni lo gza mengol co, ga zo tib Carner yeen. Rlupaa zha psacsi zho ma, zeene beet zho ma. Zob gadz zhoz ma, ni zob gadz bziaalo ma, rrieequia gza gadz bziaalo ma ga, min co nac gadz guiel³biini ne rdeed zhiEspiritu Dios.

⁷ Dzigo wbig men ne nac Carner yeen co, bnaaz me guits ne no nia derech men ne zob lo xcan ro co.

⁸ Zigne bnaaz me guits co, laa gza bult mban co, ni gza galptap mengol co pquits-gzhib lo me. Tib tib mengol co nzhen se me tib arp ni tib ptsigui or, rso tib gox ndzon len⁴ ptsigui co (rrieequia gox co nac grē diidz ndzon ne rnee grē zha ne no xnēz Dios zeene rzodiidznie zho me).

⁹ Dzigo psilo gza mengol co biil⁵ me tib cant cub. Znu rnee lo cant co:
i⁶ble luu rieguial⁷ ycaania guits qui, luu rieguial⁸ chchug gza cint ne nzhidooow i!

Sac luu bded grētaa guiel⁹ne co psacsi zho luu, haxta bzhiee xchen luu;
sca psilaa luu grēlose dii miech,
tel¹⁰ pa guiedztaa nac zho, tel¹¹ pa diidztaa rnee zho, tel¹² pa naciontaa ngab zho.

¹⁰ Laa luu bzhii no grē no gac no tib guiedz cub,

guiedz ne gnabey Dios;
no gac pxoz ne gu¹³n dziin lo me,
masaque tipse gban no zeene gnabey me lo guidzliu.

¹¹ Zeene bui naa, go¹⁴n naa anj¹⁵l guizhiu ne ndxie zaatne zo xcan ro co, led zha ne grielod glab new.

¹² Nguiedz zēēb tsi zho grē zho gza bult mban co, ni grē mengol co, rnee zho:
i¹⁶Men non nac men ne nac Carner yeen ne squi rlu beet zho!

Me rieguial¹⁷ gnabey, men ro nac me, choot grielod csiaablo me.

Ladznia me no grēse guiel¹⁸naac, me rap grētaa guiel¹⁹rien,

Men ndzon nac me, me none dziuun²⁰non ne, me none dziool²¹nie ne.

¹³ Horco grēse miech, grēse ma, grēse ncuane bzaa Dios, zigtaa gbaaw, zigtagaa lo guidzliuw; zigtaa zhan guidzliuw, zigtagaa lo nisdoow; nguiedz zēēb tsi zho, rnee zho:

i²²Nliw, men ne zob lo xcan ro qui, ni men ne nac Carner yeen qui,

ible rieguial²³ dziuun²⁴non ne grop me!
i²⁵Me rnabey, lo me none gnee ne grētaa diidz ndzon;

nadzew, gzhew, ni grēragaa izdoo ne zi-aadraaw!

¹⁴ Pquiab gza tap bult co, rēb zho:

—i²⁶Scaw, sca no gaca!

Dzigo gzase mengol co, laa zho pquits-gzhib lo men ne zob lo xcan ro co; psilo zho rnee zho grē diidz ndzon lo me.

6

Gza gadz sell co

¹ Blozh ga, go²npaa naa zeene laa men ne nac Carner yeen co pchug primer cint ne nzhidoo guits co. Horco laa tib bult mban co bnee; masaque nac tsiw zig rio bi rnee nguzi, nēw lo naa:

—i³Dē ganle gwi luu!

² Dzigo wbig naa, go⁴n naa tib guay nquits. Zhits guay co zob tib men co nzhen me tib yag arcw ne rquiaa zho flech; blozhse pcaania me tib coron ne rzob guic zha rnabey, dzigo laa me briece. Ine zob nze me lad guay co, laa me zie ziegun me gan lo grē zha ne rlēē lo me.

³ Blozh ga, laa men ne nac Carner yeen co pchug stib cint ne nzhidoo guits co. Dzigo bredz stib bult co naa.

⁴ Dzigo bia naa, go⁵n naa laa stib guay nizhnie briece, zob stib men co lad ma. Blozhse pcaania me tib spad nroob, ni pcaa me didzbe⁶y tsielodil me miech lo guidzliu, zeena gutlsa zho; laa me briece ga, laa me zie.

⁵ Zeene laa men ne nac Carner yeen co pchug bion⁷ cint ne nzhidoo guits co, dzigo bredz stib bult co naa, nēw lo naa:

—i⁸Dē ganle gwi luu!

Dzigo go⁹n naa tib guay ngas, scasaque zob stib men co lad ma, nzhen me tib zhiguiib.

⁶ Ni grol¹⁰taa zaatne zo gza bult mban co, zēēb tsi tib men co, rnee me:

—Tib kiltaa zhobxtil go¹¹n ycaa zha ne gu¹²n dziin tib dze; tel¹³ zhobgaaw, tsontaa kila ycaa zho; sangue nceit ni vin ib ygaald luuw.

⁷ Laa zeene goc cint co tap ziechug men ne nac Carner yeen co, dzigo laa stib bult mban co bredz naa.

⁸ Horco, zeene bui naa, go¹⁴n naa tib guay nguets; lad guay co zob tib zha co lē Guielgut; zhiits co nal¹⁵ stib zho lē Gabil. Lo tap lal ne nlē miech ne ndxie lo guidzliu, pcaa grop zha co diidzbe¹⁶y tsiegut zho tib lal grē miech co; zha ne guet lo dil, zha ne guet lo gbin, zha ne guet lo guiel¹⁷guidz, zha ne guetgaa lo grē ma ntseeb.

⁹ Dzigo pchug men ne nac Carner yeen co stib cint co, goca gaay. Horco, zaatne nac zhan mezh ne nac mezh lo pcoog, ga go¹⁸n naa grēse zha ne psacsi miech, beet miech zho loxaque ne bnee zho Xtiidz Dios, ni dib zdoo zho bliladz zhow.

¹⁰ Nguiedz zēēb tsi zho rnee zho:

—Luu ne nac luu men nroob ne rnabey, luu ne nac luu men ne rnee niapse diidzli, i²⁷pa hor dzigo cuedz luu grē miech ne ndxie

lo guidzliu, zha ne scataa psacsi no? ¿Pa hor gunquizh luu zho grëtaa miñe been zho ga?

¹¹ Dzigo bdeed me lar nquits got zho; rëb me lo zho no cuëz zho zniip, sac grëraa zha ne nacgrë zho ngab zho lo Jesús, no spalal zha ne naraa scacsi miech zigne psacsi miech zho; haxta gza zho dzigo laa me guñ guie|wxtis.

¹² Blozhse ga, laa Carner yeen co pchug stib cint co, goca xoop; hor co laa tib zhodox bni. Gonpaa naa zeene laa lo ngbidz pcow, zig nac zeen tib lar ngas pquia lo ngbidz; laa mëe zig rludaa ren, sca nizhnie rlu lo mëe;

¹³ grë mel ne ndziib gbaa, masaque bliaal ma lo guidzliu zig rliaal grë guigw yeen zeene rriee medox.

¹⁴ Znuse bdibëd gbaa, goca zigne racse grë guits ne rdibëd; grë gui, grë guidzliu win ne no lo nisdoo, nëzrii nëzrec biaaṅa.

¹⁵ Dzigo grëse zha ne nac zha rnabey lo guidzliu, grë zha ne nac zha non, grë zha ne rapchen, grë zha nroob ne rnabey lo men|guiib, grë zha nroob ne non xtiidz, ni grëragaa miech, niicle grë zha ne ruñ xtsiin beṅa, niicle grëgaa zha ne ruñ xtsiin zhala, grëse zho biolan, zha ne biolan leṅ grë bliee, zha ne biolangaa leṅ grëraa quie ne no dan;

¹⁶ nguiedz roptsie zho rnee zho lo grë gui co, lo grë quie co:

—jGolliaal lad no, golcolan no, zeena gandraa meṅ ne zob lo xcan ro co no! jGolcolan no, zeena dзиаṅ no grëtaa guie|në ne cxeel meṅ ne nac Carner yeen co!

¹⁷ jSca nasi laa dze ro co bdziṅ! jLaa guie|nëdoox co ngon ziaadle! jNcuaaṅe lëëbd no low!

7

Zha ne pcuee lo grëse zha Israel

¹ Bded ga, gon naa tap anjl. Lo gza tap lad guidzliu, tibga anjl co zo tib lad nocuëz me me. Wdzeepaaw, per ni tib zhiblag yag rmidraa, niicle lo nisdoo dzese biaca; sac ni palal rriedraa me lo guidzliu.

² Tibaque zeene brieequia stib anjl nëz ne rlan ngbidz, neyse me xsell Dios; nguiedz bnee me lo gza tap anjl co (anjl ne pcaa diidzhey ga guñ guie|qui lo guidzliu ni lo nisdoo) rëb me:

³ —jGolcuëz zniip! Gunde to guie|qui lo guidzliu niina, niicle lo nisdoo, niiclegaa grë yaga; sac naraa lozh guioquiaa no xsell xDios ne quia grë zha ne ruñ xtsiin me.

⁴⁻⁸ Zeene blozh pquia sell co quia grë miech co, bin naa lo grë zha ne ziaad lo xti zha Israel, rgaa zho tib gayoo chooptap mil: Tsiipchop mil zha xtií Judá, tsiipchop mil zha xtií Rubén, tsiipchop mil zha xtií Gad, tsiipchop mil zha xtií Aser, tsiipchop mil zha xtií Neftalí, tsiipchop mil zha xtií Manasés,

tsiipchop mil zha xtií Simeón, tsiipchop mil zha xtií Levi, tsiipchop mil zha xtií Isacar, tsiipchop mil zha xtií José, tsiipchop mil zha xtií Benjamín.

⁹ Zeene bui naa zaatne zo xcan ro co, zaatne zo meṅ ne nac Carner yeen co, miech guizhiu ne gon naa ndxie ga; grë lose dii miech ne ndxie dib lo guidzliu. Ne nligaa miech guizhiu, led miech ne lëbd ne glab new; grëse zho niapse lar nquits nacw zho, ni no tiblëga zin nguia nia zho;

¹⁰ nguiedz zëëb tsi zho, rnee zho: Dios, meṅ ne rdziuunbey ne, meṅ ne zob lo xcan ro qui,

me nac meṅ ne psilaa ne lo grëtaa xto|ṅ ne; me ni meṅ ne nac Carner yeen qui.

¹¹ Horco grëse anjl ne ndxie igo xcan ro co, igo zaatne zob grë mengol co, ni zo gza tap bult mban co; grëse zho laa zho pquitsgzhüb nëz lo xcan co, haxta bzooblo zho lo liu, rdeed zho xquizh lo Dios

¹² rnee zho:

jScaw! Luu none dzioolnie no, none tibaqua gneedz no xquizh lo luu, luu rieguia|dziuunnon no; sac luu nac xDios no.

Luu nac nac meṅ ne rienraa, meṅ ne rap poder;

gacxe waa luu none ycaania grëse diidz ndzon,

gzataa dze, niicle nadzew, gzhew, ni grëragaa izdoo ne ziaada. jSca none gaca!

¹³ Dzigo bnabdiidz tib mengol co, në me lo naa:

—¿Pe naṅ luu sca cho nac grë zha ne nacw lar nquits qui? ¿Pe naṅ luu pa nëz ziaad zho?

¹⁴ Dzigo rep naa lo me:

—Naṅd naaw. Bzhiguie|bnëw lo naa.

Nëchaa me:

—Lëë grë zha qui gon bded grëtaa guie|nëdoox ne goc lo guidzliu. Laa zho nacw lar nquits qui, sac wbig zho lo Jesús psan|mbe xchen me zho lo dol.

¹⁵ Gacxe waa squitaa ndzon ndxie zho gax lo zhixcan ro Dios, dze guieel quaiyoolnie zho me leṅ xyadoo ro me. Me nac meṅ ne quianap zho grëse zho;

¹⁶ led yedraa niina guet gbin zho, guet nisgaa zho; led yedraa niina ctsuu ngbidz zho, sonëëggaa zho.

¹⁷ Meṅ ne nac Carner yeen ne zo delant lo xcan ro qui, me gdeed ncuaaṅe gow zho, ni zigne rienie baxtor xpëcwxiil zho ro guuu, sca zienie me zho zaatne quida nis ne rdeed guie|mban. Led yedraa niina goon zho.

8

¹ Laa zeene laa meṅ ne nac Carner yeen co pchug stib cint ne nzhidoo guits co, cint

ne naca gadz ga, dzese biac gbaa; xtselaa sca biac dze gbaa.

² Blozh ga, gon naa zeene pcaania gadz anjl ne rzo lo Dios, tibga trompet.

³ Ni briequia stib anjl nzhen tib ptsigui niaa niapse guuib or. Zigne bdziñ me, bzo me delant lo xcan ro co, zaatne zo mezh or ne nac lo pcoog; ga pcaania me nroob yaal parne ctsieel mew grë diidz ne rnee grë miech ne no xnëz Dios zeene rzodiidznie zho Dios.

⁴ Dzigo bzëëg anjl co yaal co, tipse goc gox co grëw xtiidz grë zha ne no xnëz Dios, laaw bdziñ lo Dios.

⁵ Blozh ga, ptop me grë gui ne ndziib lo pcoog co bloo mew len ptsigui ne nzhen me ga, blaal mew lo guidzliu; dzigo psilo masaque rnee nguzi, rio bi, riab belye ne, ni bni tib zhodox.

Pcuedz gadz anjl trompet

⁶ Horco laa gza gadz anjl ne pcaania gza gadz trompet co, laa zho nsinle nzheña, parne ycuedz zhow.

⁷ Zeene laa tib anjl co pcuedz zhitrompet zho, hor co psilo blaal guiequie lo guidzliu ni blaal guilë notsa ren. Gzoob ne telne glë guidzliu tson lal, dzigo masaque tib lala bnitlo, bnitlo grëse yag, grëse lo guizh nguia ne no low.

⁸ Blozh ga, zeene laa stib anjl co pcuedz xquuib, hor co biab tib ncuuan co nisdo, masaque rluw zig rlu tib gui nroob ne quiaayzbel. Gzoob ne tel glë nisdo tson lal, bnitlo tib lala, bialow niapse ren zeene laa ncuuan co biab low.

⁹ Bnitlo grëse ma, grëse guizh ne no lo tib lalga nis co, haxta grë barcw ne no low bnitlo.

¹⁰ Loxaque blozh goc min co, laa stib anjl co pcuedzaque xquuib zho, hor co laa tib mel nroob bringaa gbaa, masaque rso ma bel zig razbel tib lë guier, biab ma lo guidzliu. Lo grë guiubee, lo grë zhlian ne no lo guidzliu, lo tson lal ne gzoob ne naca, pxin ma tib lala.

¹¹ Grëse nis co goc nlayag, ndal miech ne gut low. Nacne bleelë zho mel co Nlayag.

¹² Zeene laa stib anjl co pcuedz xquuib goc zho tap, hor co zigtaa lo ngbidza, zigtagaa lo mëëw, biuu tib niaza, schop niazaquew biaan rziini; grë mel ne ndziib gbaa, gzoob ne lo tson lal ne nac ma, hor co biuu tib lal ma. Rlupaa lega net net rquiaa ngbidz; zaatne nacgaa guieel, ni palal peet rlud.

¹³ Laa naa nowi, tibaque zeene gon naa laa tib anjl bded groltaa zhan gbaa, haxta rlupaa rio bi zie me lo me, nguiiedz zëëb tsi me rnee me:

—jProbsaxe grë miech ne ndxie lo guidzliu! Sac ncuane ntseebraa gac, zeene laa ston anjl qui ycuedz xquuib me.

9

¹⁻² Zeene laa anjl ne nac zho gaay ga pcuedz xquuib, hor co gon naa laa anjl ne brie gbaa padzeela ga pcaania tib liow, pxal zho ro tib guierdoo ro. Zeene laa ro guieer co bhzial, per nli goxdoo ne brie ga, tib psioogsew zhan gbaa, per ni palal rludraa lo ngbidz.

³ Lo gox co, ga brie tiblo metso blaal, bioogse ma gdipse lo guidzliu, grëse ma zob xcots ma, zig zob xcots meegu.

⁴ Nacle diidz, peet gund ma grë guizh nguia, grë yag ne zëëb lo guidzliu, sinque laa ma tsie tsiesacsi ma grëse miech ne quiad xbey Dios quia.

⁵ Yoobdox ne yquia zaatne yquiaaxcots ma, zigne rquia yoob zaatne rquiaaxcots meegu; per gute ma zho, loxaque sca csacsi ma zho dipse len gaay mëë.

⁶ Len dze co, haxta zhal miech yguib zho dien zha guet zho, per grieelod guet zho; soobladznë zho, tebaa zha gdziñ guielgut lo zho, per lel sozita.

⁷ Masaque rac grë metso co zig rac grë guay ne tsienie zho lo dil. Rac lo ma zig rac lo miech, ni zob tib ncuuan co guic ma, rluw zig rlu tib coron or;

⁸ zëëb guitsguic ma zig zëëb guitsguic men wnaa, ni zëëb lay ma zig zëëb lay grë meedz.

⁹ Dipse lad ma ntse tib ncuuan co, rluw zig rlu guib; rio bi rzedz lo xiil ma, pale bi ne rio zeene rded tib dzoon carret ne rgob guay, zie lo dil.

¹⁰ Lëëdaa meegu, sca zob xcots grë metso co lo xcol ma, mine yquiaaxcots ma miech dipse len gaay mëë co.

¹¹ Lëë grë metso co pxeel anjl dox ne rnabey guierdoo co, anjl ne rnee zha Israel Abadón, laa xtiidz zha Gres rnee zho ma Apolión. (Nac diidz co, zig rnee ne xtiitsë ne: Zha ne rnitlo.)

¹² Lëë tib guielnë ne gan miech ga, per bii ziaad schopa.

¹³ Gon naa zeene laa anjl ne nac zho xoop ga pcuedz xquuib, hor co bin naa zëëb tsi tib men co lo mezh or ne nac lo pcoog ne zo lo Dios ga.

¹⁴ Zëëb tsi men co rnee me lo anjl ne blozh pcuedz xquuib ga:

—Güey, güeyxadz gza tap anjl dox ne quiadoo ro guiubee nroob ne nac guiubee Eufrates.

¹⁵ Ible bzole gza tap anjl dox co par gun ma guielqui zeene laa dze co, laa hor co gdziñ; dzigo nac ne hor co laa ma blaa, parne tsiegt ma miech. Gzoob ne telne gac miech ne ndxie lo guidzliu tson tant, masaque tib tant zho gnitlo ma.

¹⁶ Bin naa chop gayoo millon zhaguiib ne gacnie ma, niapse guay sob grë zhaguiib co; masaque ma gnabey lo zho.

¹⁷ Gonpaa naa zha rlu grē zhaguiib co zob zho lad grē guay co. Grēse zho quiantse tib lē guuib gdipse zdoo zho; masaque tson color rbeew, rbeew color nizhnie, color nguia gbaa, ni color guits. Laa grē guay co, niaa guic ma zig niaa guic meedz, masaque rriee bel, rriee gox, rriee zufr ro ma;

¹⁸ lo gza ncuuañ ne sca rriee ro ma, miñ co beet lagla miech co.

¹⁹ Lala rap grē guay co xquieñtseeb ma ga nēz ro ma, ni rapaque maw nēz lo xcol ma; masaque nac xcol ma zig nac grē meel dox, rias xcol ma rquiaa maw lad miech.

²⁰ Niicle scataa nzian miech ne gut, zha ne biaan ib bdziebd zho. Tibaque laa zho no ziegan zho mendox, ziegan zho grē zhimdio zho, mdio ne niaa guuib or, mdio ne niaa guuib plat, mdio ne niaa guuib brons, mdio ne niaa quie, mdio ne niaagaa yag; ncuuañe randa, ncuuañe ronda, ncuuañe rzēda, per laa zho no tibaque ziegan zhow.

²¹ Laa zho no quaiyut zho samiech zho, quianab zho pe sac samiech zho, quiangob zho zha ne led tsieeld zho, tibaque quiaban zho, ñi palal zienied guic zho csaan zho grē guieñtseeb co gbig zho lo Dios!

10

Anjl ne nzhen tib libr win

¹ Blozh ga, gon naa biet tib anjl gbaa, rlupaa tib anjl nona, masaque no me tib lo xcow, ni quia tib guitye glaa guic me. Biinidoo ne rriee lo me, lēēdaa lo ngbidz; scasaque ni me, masaque riaazbela.

² Nzhen me tib libr win, nzhialse lo libr co. Bdzin me lo guidzliu, bzo me ni derech me lo nisdoo, laa miñ revés bzo me lo guidzliu.

³ Ga zo me pquiaa me tib redz nroob, lēēdaa zeene rgobeedz tib meedz; loxaque blozh pquiaa me redz co, zeene laa gadz nguzi bnee, pquiab lo redz ne pquiaa me ga.

⁴ Laa naa zale yquia naa miñe bnee gza nguzi co, tibaque bin naa tsi tib men co gbaa, nē me lo naa:

—¡Coo, yquiaad luu miñe bnee gza nguzi qui! Sac nodne gacnañ miecha.

⁵ Dzigo gon naa blis anjl co nia derech me nēz gbaa,

⁶ bzeet me Dios (men ne gdziñd dze guet, men ne bzaa gbaa, bzaa guidzliu, bzaa nisdoo, ni grētaa ncuuañe no low), rēb me:

—Dios zobwi ganle, nasi gon laa dze co bdzin.

⁷ Grēse miñe bnee me lo zha ne biadteed xtiidz me, laaw gac niina zeene laa stib anjl qui ycuedz xquuib zho. Grēse miñe no guic me gon me ni gocnañd miecha, niina laa zho gana.

⁸ Dzigo wbiire bnee men ne zēēb tsi gbaa ga, nē me lo naa:

—Güey, bnaaz libr win ne nzhen anjl ne squi zo i.

⁹ Nacne bia naa lo anjl co, rep naa lo me gneedz me libr win co, dzigo nēchaa me lo naa:

—Ledaaw nu, per lēēraasi none gow luuw. Zeene laa luu noyowa, nex sac luuw; per zeene gdziña zdoo luu, laaw gacnla.

¹⁰ Dzigo bnaz naa libr win co nia me, dow naaw. Nligaa nex rdioowa now ro naa, per zeene laaw bdziñ zdoo naa, beennēw.

¹¹ Blozh ga, nēchaa men ne bin naa tsi glo ga:

—Naraa gon none gnee luu ganle zha nac ncuuañe ted grēraa miech, zigtaa zha ne no guiedz wina, zha ne no guiedz nrooba, zha ne rnabeygaaw.

11

¹ Dzigo biaad tib men co bneedz me tib yag ne rbix lo naa, rgaaw zig tib metr, bnabey me naa ctix naa xyadoo Dios, ctix naa zaatne nac lo pcoog, ni glab naa dien palal miech ne rie yadoo co riegān zho Dios. Pso me diidz lo naa, nē me:

² —Lēēraasi ctiixd luu nēz ley, sac laa lugar co nole lадznia zha zit; zha gnabeya, zha gnabey guiedz ndzon ne nacchen Dios i; dipse len tson iz groļ ne ziaad nu, gon zhow zigne gacladztāa zho.

³ Gane len dze riique laa naa cxel choj zha ne runbepaa cho nac naa, tib lar beelze gacw zho, zig racwxab zha ne no guieñe; dipse len tson iz groļ co gnee zho ganle pe nac grē ncuuañe ziaadyob gan miech.

⁴ Lēē zha co nac grop zhan yag oliv ni grop biini ne raquietle lo Xtiidz Dios ga zo lo Dios (men ne nac bizhuan guidzliu).

⁵ Zeene laa grop zha co bdziñ, choot brieelod lega nsacsi zho, sac grēse zha ne wbig gocntseeb lo zho, tib biecese zha co lo bel ne brieer zho.

⁶ Bdeed Dios poder lo zho ycuēēz zho nisguie, zrieelo gnabey zho guiabda dipse len dze ne nonee zho lo miech ga, haxta zrieelo gnabey zho tsaalo nis gaca ren; ni horne gacladztāa zho, zrieelo ndalraa grē guieñzi ne gnabey zho gan miech.

⁷ Zeene bzase dze ne bnee zho lo miech ga, hor co laa tib madzabdoo brieer len guierdoo co; ntseeb rac ma lo zho. Mbe blēbd zho lo ma, beet ma zho.

⁸⁻⁹ Tson ngbidz groļ goot xcuerp zho groļ len guiedz ro co, guiedz ntseeb co. Pale Sodom, pale Egipt, sac gon guiedz coque, ga pquiaa miech men ne rnabey zho lo cruz. Ib bdeete miech diidz nguets zho, grēse miech ne no dib lo guidzliu gon sca nix zho ga;

¹⁰ dipse lo guidzliu, masaque tib guieñbleydoos ne bio miech gza dze co, gon zho laa grop zha co gut, sac nroob beñeed

zho miech. Lo guie|bley co, haxta bioxco miech pe ncuaañe bgadlsa zho lo samiech zho.

¹¹ Zeene blozh tson ngbidz grol co, tibaque zeene laa zhiEspíritu Dios bdeed guie|mban lo grop zha co stib, laa zho guche ga; grëse miech ne ndxie lo guidzliu, zeene gon zhow, per nli bdzieb zho, rdzieldraa zho zha gon zho.

¹² Horco nguiedz zëëb tib tsi men co gbaa, bredz me grop zha co. Gonlo grë miech ne rlëë ran zho ga, masaque no zho tib lo xcow, laa zho bzoquia gbaa;

¹³ Loxaque laa zho bzoquia gbaa, zeene laa tib zhodox bni. Gzoob ne telne nlë guiedz ro co tsii tant, tib tanta bnitlo lo zho co; gut gadz mil miech. Grëraa zha ne biaan, mazdraa bdzieb zho, lo dzeb co laa zho psilo roolnie zho Dios.

¹⁴ Sca gan miech stib guie|në co. Lëë bropa ga, per znusaque guiaad stiba.

¹⁵ Sac loxaque blozh ga, zeene gon naa laa stib anjl ne nac zho gadz ga, pcuedzlaque xquiiib; hor co nzian tsi men co zëëb gbaa, nguiedz rnee me:

Nasi nagon,
laa Dios gnabey grëse guiedz ne ndxie lo guidzliu, grop me Men ne pxeel me ga.

Mele gnabeya, grëtaa len izdoo ne ziaad.

¹⁶ Psiloque gza galptap mengol ne zob lo xcan ne zo lo Dios ga, pquitsgzhib zho lo me, haxta bzooblo zho lo liu, rdeed zho xquizh lo me,

¹⁷ rnee zho:
Xquizh xquie|nzaac luu,
sac nasi laa luu glu men nroob nac luu, laa luu csilo gnabey.

Luitaque nac men ne mazdraa nroob.

¹⁸ Grëse guiedz, brieequia zha ne goctseeb lo luu;

per nasi laa dze bdziñ, laa luu glugaa xquie|blëë luu lo zho.

Grëse zha ne gutle,
niina laa luu gdeed mine rieguial zho tib tib zho.

Grë zha ne been xtsiin luu, pteed zho xtiidz luu lo miech,

grë zha ne ngab lo luu, zha ne runnon lë luu, zigtaa zha gola, zigtagaa zha wina, niina laa luu gdeed zhipremio zho;

zha ne na loxaquegaa guie|ntseeb been,
niinataa laa luu gnitlo zho.

¹⁹ Loxaque blozh sca bnee gza mengol co, zeene laa yadoo ne no Dios gbaa bzhal, nieenpaa guin ne notsow quie lag ne pquia diidz ne psan me lo miech. Horco psilo bliaal tib guiequiedox, loxaque nëzrii nëzrec riab belye, ni rio bi ratsie nguzi; guiequiedox co noliaal, zeene laa tib zhodox bniique.

12

¹ Horco gon naa blu tib ncuaañe gzee zdoo ne zhan gbaa. Ga brieequia tib wnaa, masaque igose me riab tib biini, zig riab xbiini ngbidz, ni zob tib coron guic me, quia tsiipchop mel cho coron co; ngali ni me zob mëë.

² Rlupaa zoney me mëëd, rquiaadan me redz, laa me rquiale yoob ne gap me xpëëd me.

³ Tibaque brieequia tib ma ngol, dipse ma rna nizhnie, niaa ma zigne niaa ngutsiets; zob gadz guic ma, ni tsii zhoz ma, tibga coron zob tib tib guic ma.

⁴ Znuse bzieecw ma xcol ma, blaal ma palal mel gbaa lo guidzliu; gzoob ne nlë mel tson tant, masaque tib tant mel co blaal ma. Wbig ma lo wnaa co, quiambëz ma gal xpëëd me, parne gow ma win.

⁵ Per zigne gol mëëd co, znuse bdziñ win nëz lo Dios, zaatne zob me rnabey me; tib mëëdbguiw, nacle diidz tib men ndip xtiidz gac win, win gac men ne gnabey grëse guiedz ne ndxie lo guidzliu.

⁶ Horcogazhaquew bzhoon wnaa co ga, laa me zie tib dan zit, zaatne psanle Dios diidz gan zho me dipse len tson iz grol.

⁷ Nacne bio tib dil gbaa. Psilo anjl Miguel, grë me grëraa anjl ne nacie me, bdilnie me ma ngol co grë ma xanjl dox ma;

⁸ per blëbd ma, benxoon zho ma gbaa.

⁹ Lëë ma ngol co ga nac meel dox ne notaque padzeela, lëë mendox ga, lëë Satanás ga, ma ne scataa tibaque noquidie miech; hor co laa zho bzonëz ma nëz lo guidzliu, grë xanjl dox ma.

¹⁰ Dzigo bin naa, nguiedz zëëb tib tsi men co gbaa, rnee me:

¡Lëëw nagon!
¡Nasi laa dze ne ycaaniapaa Dios zha ne ngab lo me, laa dze co bdziñ!

Nasi laa me blu poder ne rap me,
nasi laa Men ne pxeel me lo guidzliu ga gnabey lo grëse zha ne ngab lo me.

¡Laa me benxoonle mendox!
Ma ne scataa dze guieel nolisqui dien pe run zho,

nac zho zha ne nacgrë ne.

¹¹ Peet brieelod ma niun ma zho,
sac niapse men ne nac Carner yeen ne gut lo cruz ga bnalo zho;

ni lalnu ib bdziebd zho, bnee zho lo miech cho nac me,

bleeladz zho xquie|mban zho, no zho haxta beet miech zho.

¹² ¡Gacxe waa tib guie|bley nroob ne rac gbaa niina!

¡Grëse to ne nac to zha ne no gbaa, golley!
¡Per probsaxe grë zha ne no lo guidzliu, sac laa mendox co tsiesacsi zho!

Ntseeb rac ma laa ma zie nëz co,
rien ma riaandraa nroob dze ne sonlaa ma.

¹³ Zeene gon ma sca bzonéz zho ma lo guidzliu, dzigo ptsidil ma wnaa ne gop mëëdbgui co.

¹⁴ Nacne bzoob zho chop xiil me, lëëdaa xiil msidoo; par grieelo xoon me lo ma, guey me dan zit ne noie diidz gan zho me dipse len tson iz grol co.

¹⁵ Gocladz ma nsilooow ma me, blee ma tib nis naal ro ma, pale tib guiubee ro,

¹⁶ per psaaand guidzliu me, znuse bzhial low psi grëse nis naal co.

¹⁷ Horco mazdraa blëënie ma me, psilo ma noguib ma zha csacsi ma grëraa zha ne ziaad lo xti me. Lëë grë zha co zienal mine rnabey Dios, ni rdziebd zho rlu zho xnéz Jesús no zho.

¹⁸ Nacne güey ma, bzo ma ro nisdoo.

13

Brieequia chop ma ntseeb

¹ Tibaque zeene gon naa laa tib ma nroob brieequia lo nisdoo co, ntseeb niaa ma. Ncuaañe gdzieb ne rlu ma, gadzraa guic ma zob ni zob tsi zhoz ma; tibga coron zob tib tib zhoz ma. Gzase guic ma quia diidznë ne rneenë ma Dios.

² Rna ma zig rna grë meedz rabon, per ni ma niaa zig niaa ni os, laa ro ma niaa zig niaa ro meedz. Dzigo bzo ma nizhnie co ma guiaañ ma xlugar ma co, male gnabey.

³ No tib guic ma no tib mdel nroob, rlu mer niet ma zeene sca goc guic co ma. Min co gon miech, grëse zho psilo zho rleynie zho ma, mine rnabeytaa ma zho, run zhow.

⁴ Horco grëse zho rleynie zho ma nizhnie co, rquitsgzhib zho lo ma, rdeed zho xquizh lo ma bzo ma ma ntseeb co; scasaque rquitsgzhib zho lo ma ntseeb co, rnee zho:

—iTsodraa stib zha zig luu! ¿Cho dien grieelo tilnie luu?

⁵ Dzigo rëb ma nizhnie co lo ma gnee ma grë diidz dox, grë diidznë, gneenë ma Dios; bdeed ma co diidz gnabey ma lo guidzliu dipse len tson iz grol.

⁶ Nacne psilo ma rneenë ma Dios, rdzibdee ma me, rdzibdee ma grë zha no gbaa ne.

⁷ Grë zha ne no lo guidzliu, zha ne ngab xnéz Dios, bdeed me diidz psacsi ma zho, haxta beet ma zho; masaque ma bnabey grëse miech ne ndxie lo guidzliu.

⁸ Laa grëraa miech, güey zho güeygan zho ma, lëë grë zha co quiad lë lo xlibr men ne nac Carner yeen ne gut ga. Haxta zeene biao guidzliu no libr co, lo co quia lë grëse zha ne ygaa guielmban ne gdzind dze lozh.

⁹ Lo grë to ne nac to zha ne rnal Dios, zha ne no liaadz mine none naa nu, golquiaadiag mine gne naa nu ganle:

¹⁰ Zha ne gnaaz to co zho to ladzguuib, yeque zho zio zho ladzguuib; zha ne csacsi-gaa to, tel zha gut zho to, scaque gut miech zho. Gacmbande to sca, sac gon ga glu to nli rnal to Dios, nli zleb to tel pe nactaa guielnë ne gan to.

¹¹ Blozh ga, gon naa brieequia stib ma nroob lo guidzliu, scaque ntseeb niaa ma, zob chop zhoz ma zig zob zhoz carner, per ncuaañe gdzieb ne zeene laa ma roptsie.

¹² Ye ma rap ma poder, squi zo ma ne no mdel nroob co guic rnabey ma tel zha racladz ma; bnabey ma yquitsgzhib grëse miech lo ma co.

¹³ Ncuaañe gzee zdoo miech run ma, haxta brieelo bnabey ma biet gui gbaa bli-aala lo guidzliu.

¹⁴ Ne scataa grë ncuaañ ro ne rrieelo ma run ma, pquidie ma miech, bnabey ma zho bzaa zho tib mdio zig niaada ma ne bdedlaa lo guielgut ga, ma ne scataa nat guic ga gba.

¹⁵ Blozh ga, bdeed ma xquielmban mdio co, parne grieelo gneew. Bnabey ma guet grëse zha ne soliaadz yquitsgzhib low,

¹⁶ ni bnabey ma grëse miech güey zho tib bey, yase yquiw nia derech zho, yquiaa-gaaw quia zho; grëse zho zigtaa zha gola, zigtagaa zha lasa, zigtaa zha ne rapcheña, zigtagaa zha ne peet rapda, zigtaa zha ne run xtsiin beña, zigtagaa zha ne choot rnabeeyda.

¹⁷ Zha ne tsod bey co, grieelod gun zho wzi nuicle grieelodgaa cto zho; sac bey co rlu cho nac zha ne ngab lo ma, lëë lë ma ga, lëë número co rlu zha lë ma.

¹⁸ Tib lë miech nac número co; xoop gayoo tsongal xoop naca. Zha ne ligier, zha ne niini, zien zho cho nac ma co.

14

Biil tib gayoo chooptap mil zho

¹ Tibaque zeene gon naa laa men ne nac Xcarner yeen Dios ga zo guic Gui Sión, miech guizhiu ne zonie me ga; lëë grë zha co nac tib gayoo chooptap mil zha ne quia lë me guic ga, grop me Pxo me.

² Horco bin naa tib bi nroob gbaa, zig rio bi rrieengaa tib nis naal tib ro quie, zig ratsiegaa grë nguzidox, ni bin naa ndal tsi zha co zëëb noyool zho tib cant, rlu niapse arp noyoolnie zho cant co.

³ Tib cant cuba, laa zho noyoola lo men ne zob lo xcan ro co, zaatne zob grë mengol co. Loxaque tib gayoo chooptap mil zha ne pcuee lad grë miech guidzliu ga, zha cose brieelo pquiab lo cant co.

⁴ Sac zha co ib beenctald xtol, rrieequia nac zho zig tib wnaa ne bgaald mgu; tibaque zo zho lo Men ne nac Carner yeen co, zaatne zieetaa me. Masaque nac zho lo

Dios, ni lo men ne nac Carner co, zig tib nex ne gloopaa riet riogon lo me.

⁵ Biod dze ne nquidie zho, mbe zdoos zho, mbe lo zho nêz lo me.

⁶ Horco brieequia tib anjl nosiibe zhan gbaa, ney me Diidz Ndzon ne rdeed guielmban, diidz ne gdziñd dze nitlo ga; laa me ziaad par gnee mew lo grêse miech ne ndxie dipse lo guidzliu.

⁷ Nguiedz zêeb tsi me, rnee me:

—jGolguien golgon mine rnabey Dios, ine golleynie me, sac gon laa dze ne gun me guielwxtis bdziñle! Ine golquittsgzhib lo me, golgan ganle me bzaa gbaa, me bzaa guidzliu, me bzaa nisdoo, me psan grêse zaatne rlan nis.

⁸ Zhits anjl co nal stib anjl, nguiedz rnee me:

—jNasi laa guiedz Babiloin nitlo! jGuiedz nroob ne scataa pquii grêraa guiedz, been grê menguedz co ncuaan ndzab ne beena, pxina guic zho!

⁹ Zhiits co nalaque stib anjl, scaque nguiedz zêeb tsi me, rnee me:

—jGrêse zha ne yquittsgzhib lo ma ntseeb ne brieequia lo nisdoo ga, yquittsgzhib zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaa-gaaw quia zho,

¹⁰ ib tedsod ye zho ygaa lo grêtaa guielnêdox ne csiaab Dios! Squi zobwi grê xanj me, squi zobwi Men ne nac Xcarner yeen me, laa zho guey lo guidox ne rieguial zho, zaatne tibaque quiaayzbel tibo ncuaañe rtsuu lê zufi.

¹¹ Dze guiel cso laan ne tsec guidox co, ni palal gapd zho descans ga; sac sca pquittsgzhib zho lo ma ntseeb co, pquittsgzhib zho lo mdio ne niaa zig niaa ma ga, ni pquia zho xbey ma.

¹² jGa naganle gan grê zha ne ngab lo Dios, zha ne mban zigne rnabey me, zha ne tiblique zienal zhiwseed Jesús, zeena gacmband zho niicle tel pe nactaa grê guielnê ne noyan zho!

¹³ Dzigo bin naa zêeb tib tsi men co gbaa, nê me:

—Pquiaa miñe gni naa nu.

Nêchaa me:

—Dichos grêse zha ne rnalos Jesús, niicle niinaga guet zho.

Pquiabaque Espiritu Sant, rnee me:

—Nligaa dichos zho, sac grê guielnê ne bded zho, nataa laaw blozh; nasi laa zho ygaa guielnzaac nroob ne gdeed Dios lo zho, porne wban zho zigne rnabey me.

¹⁴ Zeene bui naa stib, dzigo laa naa gonle tib xcow nquits; lo xcow co zob tib men co, rlu me zig rlu Men ne pxeel Dios ga biaad lo guidzliu. Zob tib coron or guic me, ni nzen me tib yaguiits nroob.

¹⁵ Dzigo brieet tib anjl len yadoo ro ne zob gbaa, nguiedz bnee me rêb me lo men ne zob lo xcow co:

—jNiinaga blooyaguiits grê zhob ne squitaa zêeb lo guidzliu! jSac gon gol-lew, laa dze ne tsasa bdziñle!

¹⁶ Dzigo pteed men co yaguiits dipse lo guidzliu, ptop me grêse zhob co.

¹⁷ Blozh ga, brieet stib anjl len yadoo ro co nzen me tib guib hoz, rlupaa per nli ndox low.

¹⁸ Loxaque brieet anjl co, laa anjl ne quianap gui ne ndziib lo pcoog brieet; nguiedz bnee me rêb me lo anjl ne nzen hoz ga:

—jNiinaga pchug grêse mzhiig uv ne squitaa zêeb lo guidzliu, sac gon laaw gule!

¹⁹⁻²⁰ Horco znuse pteed anjl co hoz lo guidzliu, pchug me grêse mzhiig uv co, güeycodzêe mew tib len pil nroob ne zob tib lad ro guiedz. Ga güeyzêeni zho grê uv co, ptaadz zhow; dzigo ren naaldox ne brieet zhan pil co, masaque lal ne rzêni miech xoop ngbidz, lal ga wbiig lo ren co igo pil co; tel niaca miñe sêeb tib guay low, dzziña haxta zhan cho ro ma. Rrieequia sca nagon gac miñe gnabey Dios ted grê zha ntseeb.

15

¹ Tibaque zeene gon naa, ncuaañe ro, ncuaañe gzee zdoos ne goc gbaa. Brieequia gadz anjl, tib tib anjl co tibaque guielnê guiaadnie me ted grê miech ne ndxie lo guidzliu; guielnê co lozh cueezhan Dios miech.

² Dzigo gax lo naa gon naa tib dzoos miech, masaque rquiabni, masaque rna gui zaatne zo zho, nêzrii nêzrec rac lo co, pale lo nisdoo. Lêe grê zha co been gon, pquittsgzhibd zho lo ma ntseeb co, pquittsgzhibd zho lo zhimdio ma, niicle biodgaa zho xbey ma. Grêse zho tibaque xarp Dios nzen zho,

³ quiaayool zho zig biil grê zha ne psilaa Moisés Egipt. Rley zho, sac niina laa Xcarner yeen Dios psilaa zho lo ma ntseeb co; rnee zho:

Dios, luu ne nac luu men ne grêsew rrieeloo run,

ncuaañe nroob, ncuaañe gzee zdoos miech, nac grê ncuaañe run luu.

Luu nac men ne rnabey,

lo grêse zha ne ngab lo luu, niapse diidzli rnee luu, niapse miñe nonguiel rnabey luu.

⁴ jZha rna zha ne dien gdzieebd luu?

jZha rna zha ne gleyd goolnie luu?

Sac luuse nac men mbe zdoos, men ne ni tib dol rapd.

Grêse guiedz ne ndxie lo guidzliu, zriee miech guiaad zho yquittsgzhib zho lo luu;

sac nasi laa luu blu zha run luu guielwxtis.

Gadz anjl ne pxeel guielñe lo guidzliu

⁵ Horco gon naa bzhial zaatne nac Lugar Nda len xyadoo Dios gbaa,

⁶ ga briece gza gadz anjl ne guiaadne guielñe ne no guiaad lo guidzliu ga. Ine nquitsbie rna xab gza anjl co, haxta rzëeg lada, ndxiega tib cinch or haxta ncaan len zhw me.

⁷ Dzigo wbig tib bult mban co, bdeeda tibga cop nroob niaa niapse guib or lo tib tib anjl co; len cop co ga nodzë grëse guielñe ne nac xquielblëë Dios, men ne gdzind dze guet.

⁸ Horco grëse xquielndzon Dios, grëse poder ne rap me, biodzë len yadoo co, rluw zig rlu tib gox; choot brieelodraa nzëeb len yadoo co, haxta blozh gon miech gza gadz guielñe ne güeynie gza anjl co.

16

¹ Dzigo bin naa nguiedz zëeb tib tsi men co len yadoo ro co, bnee me lo gza gadz anjl co, rëb me:

—Goltsie, goltsixiee gza guielñe ne nac xian Dios i lo guidzliu.

² Dzigo briece tib anjl co, güey me, güeylaat me xcop me lo guidzliu, hor co grëse zha ne noquitsgzhib lo zhimdio ma ntseeb co, zha ne quia xbey ma ga, psilo bial dipse lad zo, yoobdox ne rquia zho.

³ Güeyaque stib anjl co, bdzin me blaet me xcop me lo nisdoo, zeene laa ncuuaan co bzhiee lo nisdoo, grëse nis co bialo ren ctoo; ni stib ma ne no low biaandraa.

⁴ Laa min co bded, zeene laa stib anjl ne rac zho bion ga güey, güeylaat me xcop me grëse guubee, grëse zaatne rda nis; nacne grëse nis co bialo ren.

⁵ Dzigo bin naa tsi anjl ne rnabey nis, rëb me lo Dios:

—Dios, ible rieguial mine been luu i; luu ne nac luu men mbe ne ni tib dol rapd, men ne tibaque nac, men ne gdzind dze gdzë. Lëew i been luu, squi beenquizh luu grë miech qui mine zëeb zho,

⁶ sac gon blactaa grë zha ne ngab lo luu, blactaa grë zha ne biadteed xtiidz luu psacsi zho, pxiee zho xchen grë zha co. Min qui rquin zho, guie zho grë ren qui na.

⁷ Zëebaque tsi stib men co zaatne nac lo pcoog len yadoo co, rnee me:

—iDios, luu ne nac luu men ne nroob ne grësew rrieelo run, nligaa ible rieguiala squi beenquizh luu grë zha qui mine been zho!

⁸ Blozh ga, briece stib anjl ne rac zho tap ga, güey me güeylaat me xcop me lo ngbidz, hor co gocnlëeraa xbiini ngbidz, ptsuuw miech.

⁹ Niicle scale nodzu grë miech co, per ib biablod zho, laa ne nsaan zho xquielntseeb zho, nleynie zho Dios, lel psilo zho rneenë zho me, pe nacne noxeel me grë guielñe co.

¹⁰ Zeene briece stib anjl co, güey me güeylaat me xcop me zaatne zobnabey ma ntseeb ne briecequia lo nisdoo ga, dzigo znuse goc tib ncowdoo grëse guiedz ne rnabey ma. Lo yoobdox ne rquia grë miech co, haxta rowye zho ludz zho;

¹¹ per niicle scaw, ib psaand zho xquielntseeb zho, lel psilo zho rneenë zho Dios, pe nacne scataa rquia zho yoob, pe nacne scataa quiaaald gdid lad zho.

¹² Zeene laa anjl ne rac zho xoop ga güey, güeylaat me xcop me len guubee Eufrates, hor cogazh wbidz nis naal ne zhoob guubee ro co. Nacne bio nëz ted grë men ne zobnabey grë guiedz ne ndxie nëz ne rlan ngbidz.

¹³ Horco gon naa tson me yozh, niaaw zig niaa mbiich, tiba briece ro ma ngol nizhnie co, tiba briece ro ma ntseeb ne briecequia lo nisdoo ga, laa stiba briece ro zha ne noteed xtiidz ma ntseeb co.

¹⁴ Chen mendox nac gza me co, runa grë ncuuaane nroob ne rzee zdoo miech; dzigo güeya güeyzodiidzniew grëse zha rnabey ne no dipse lo guidzliu, parne tipse gac zho tilnie zho men ro ne nac Dios, gal dze ro ne gdeed me mine rieguial tib tib miech.

¹⁵ Tibaque zeene laa men ne rnabey ne ga bnee, në me:

—Zhile gon laa naa guial. Nsin sca golso, sac zigne racnand bizhuan yu pa hor sëeb ngbaan yu, scaque gacnande to pa horpaa guial naa. Dichos zha ne yquiambëz naa, ine mbe xab zho nacw zhow; sac gon mban tsie zho telne scase zo zho zeene laa naa glanso, ni lala tib guieltdox ga griecequia zho.

¹⁶ Dzigo pcaalsa grë zha rnabey co grë xmenguib zho, zaatne rnee zha Israel Armagedón.

¹⁷ Horco güey anjl ne nac zho gadz ga güeylaat me xcop me lo me ne rriece lo guidzliu; dzigo bnee tib men co zaatne nac lo zhixcan Dios len yadoo gbaa ga, nguiedz zëeb tsi me rnee me:

—iNasi nagon ledaaw blozh bza!

¹⁸ Dzigo psilo nëzrii nëzrec riab belye, loxaque bi rio ratsie nguzi. Lo belye co, lo bidox co, laa tib zhodox psiloque bni; waltaa ne ndxie miech lo guidzliu, gard gni tib zhodox zig min co.

¹⁹ Grë guiedz ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta tson lë gooa. Horco beenquizh Dios zha Babiloin, grëtaa guielntseeb ne zëeb zho; psiaabzi me zho por grëtaa zhian ne pquiaa zho me.

²⁰ Grëse guidzliu win ne no lo nisdoo, rluudraa dien yow; grë gui glaa, loxaque nëzrii nëzrec bliaala.

²¹ Min co blozh, zeene psilo bliaal tib guiequiedox lad grë miech co, tib tib guiequie co nëw maase choo kil. Gon zho

scataa noyab gueique co, laa zho noque rdzibdee zho Dios.

17

Zob tib wnaa yozh lad tib ma ntseeb

¹ Lo gza gadz anjl ne sca blaad grè guielnè co lo guidzliu, lad co brieet tib me blaad, nè me lo naa:

—Dè ganle, zeena glu naa lo luu zha nactaa caxtigw ne ygaa wnaa yozh ne ran luu stui zob lo grèse nis ne no lo guidzliu.

² Lèe wnaa qui pxin guic grèse miech ne no lo guidzliu güeynal zho grètaa guielyozh ne been me; haxta grè zha rnabey, güeynal min co.

³ Sca nolu Espíritu Sant grè ncuuan co lo naa, dzigo güeynie anjl co naa tib dan zit. Ga gon naa laa wnaa co zoble lad tib ma nroob, ntseeb niaa ma co, zob gadzraa guic ma ni zob tsii zhoz ma; gdipse ma rna nizhnie, gdipse lad ma quia grè diidz ntseeb ne rneenè ma Dios.

⁴ Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque grè guib or, grè quie rbební, grè quie perl, ngalguiee lad lar co. No tib cop nroob niaa me, niaaw niapse guib or, rrieequia leen co nodzè grètaa guielntseeb, grètaa guielyozh ne run me.

⁵ Ni quia bla lan diidz quia me, rneew: “Lèe guiedz nroob ne nac Babiloin nu, guiedz ne nac xniaa grèse wnaa yozh, guiedz ne nac xniaa grèse zha ne run ncuuan mbixladz.” Lèe lé me ga, hor coraa bzhoobneñ zha nac lé me.

⁶ Dze rwi naa lo me, dzigo gon naa rac me zig rac zha ne rzudz. Nziandox zha ne no xnèz Jesús beet me, rrieequia grètaa ren ne pxiee me ga sca noyun me. Bzee zdoo naa, ni bdzieeb naa gon naa zha rac wnaa co.

⁷ Dzigo nëchaa anjl co lo naa:
—¿Pe nacne rdzieeb luu? Na ganle gni naa lo luu cho nac wnaa co, cho nac ma ne sca zob me lad ga.

⁸ Padzeela no ma ntseeb co, guien d ma ninapaa, per zhile laa ma griece len guierdoo ne nioogyu ma, laa ma griece ga parne diunavez nitlo ma; grè zha ne quiad lé lo libr ne zhobnee cho nac zha ne ygaa guielmban ga, seedox zdoo zho zeene gan zho laa ma grieequia stib, sac tibaque nan zho gutle ma.

⁹ Wen wen pquiaadiaga ganle: gza gadz guic ma ga, rrieequia lèew nac gza gadz gui win ne zob wnaa co zobnabey me.

¹⁰ Ni rrieequiaque lèe gadz zha ne rnabey ga: gaay zho bnabeyle, tib zho quianabey niina, laa stib zho naraa gnabey; per zeene laa zha co guiaad, zhis dze ne gnabey zho.

¹¹ Lozhse gnabey zha co, laa ma gnabeyaque, ma gac zha rnabey co xon,

niicle ne yelee ma ga goc zha co gadz; gataa laa ma nitlo.

¹² ‘Zhoz ma, rrieequia lèe stii zha ne gnabey ga, gzase zha co naraa gnabey zho, tipse ycaania zho guielrnabey gza zho ma. Zhisaque dze sca gnabey zho,

¹³ dzigo laa gza tsii zha co guiaan diidz gzo zho ma, ma gac zha nroob lo zho.

¹⁴ Zacnie zho ma, grèse zho tsie tsietilnie zho Xcarner yeen Dios, per znuse gun men ne nac Carner yeen co gan lo zho; sac me nac men ne rnabey lo grèse zha ne rnabey, lo grèse zha ne non. Grèse zha ne tsienal zhits me, tsietilnie zho ma co, lèe grè zha co nac zha ne bzoooblo Dios bredz me zho bgab zho xnèz me, ni ib psaaand zho me.

¹⁵ Blozh ga, nëchaa anjl co lo naa:

—Lo grètaa nis ne gon luu sca zob wnaa yozh co, rrieequia lèe nis co nac grèse guiedz, grèse dii miech ne ndxie lo guidzliu.

¹⁶ Per zdziñ dze lèeque ma ntseeb co, tilnie wnaa co, grè ma gza tsii zha ne rrieequia nac zhoz ma ga; zléeniedox zho wnaa co, sanwin zho me, haxta xab me cuee zho, znitlo zho me, seég zho me lo gui.

¹⁷ Ib Dios csiaab guic zho gnitlo zho wnaa co, ni meque csiaab guic zho gzo zho ma co gac ma zha ne gnabey lo zho; laa me gun min co, parne grieequia grèse mine bneelee me no gac.

¹⁸ Laa wnaa co, rrieequia me nac guiedz ro ne rnabey lo grèse guiedz ne ndxie lo guidzliu.

18

¹ Blozh ga, gon naa laa stib anjl ziad-zèeb gbaa, rlu tib anjl nona, dipse lo guidzliu biab biinidoo ne ziaadnie me,

² nguiedz zèeb tsi me rnee me:

—¿Nasi laa guiedz nroob ne nac Babiloin ga nitlo! ¿Loxaque men d ox yquianzè ga, loxaque grè ma guix, loxaque grè ma mbixladz cuew!

³ Laaw nitlo, sac noquilla grèse miech ne ndxie lo guidzliu, grèse zha ne rnabey, quiaayun zho grètaa guielyozh ne ruña. Lo grètaa guielyozh co quiaayun ricua grèse zha ne run wto; quiaxin grè ncuuan co zho, masaque quiaayuna zho zig run nziu.

⁴ Dzigo zèeb stib tsi men co gbaa, rnee me:

—¿Grèse to ne nac to miech ne ngab xnèz naa, golgon diidz, golree guiedz qui! Ib gunde to dol ne quiaayuna; zeena ygaade to grètaa guielnè ne ygaaw,

⁵ sac nroobdox nac grè dol ne quiaayuna, telne niaca ncuane cue monton, rrieequia haxta gbaale rdzin guic monton co; gane ib tedsod zunquizh Diosa grètaa guielntseeb co.

⁶ ‘Gacxe na grèse mine beena miech, mincoque saca. Grèse tel zha psacsiw miech, chop lalga mine teda.

⁷ Zigne squitaa now lo grëtaa ncuaañe racladza; scagaa na guielñëdox ne gana, haxta goona lo grëtaa guielñë co. Niats raca rneew: "Naa rnabey. Nacd naa cho zha ne zotib, zig rzac grë wnaa viud; naasi gdziñd dze ne tso naa guielñë."

⁸ 'Nli squitaa niats raca, per zeene guiaba ladznia guielgut, ladznia gbin, ladznia grëraa guielñë ne gana, tib dzeque lozha. Ni lozh ga, haxta zeca lo gui; ni lalnu gbnabey Dios teda. ¡Me nac meñ ro ne gunquizha grëtaa mine been!

⁹ Grë zha ne rnabey grë guiedz, zha ne scataa bley been grë guieylozh ne runa; zeene gan zho goxdoo ne rso noyeca, mban gac zho, zoon zho zio zho xquielñëw.

¹⁰ Zdzieb zho gan zho grëtaa guielñë ne nodeda ga, lo dzeb co, ni lalnu gbigd zho. Lëë gdib so zho goptsie zho, guiab zho: "¡Probsaxe luu Babiloin, guiedz nroob, guiedz non nac luu! ¡Pa briece guielñë qui squi znuse nitlo luu!"

¹¹ 'Grë zha ne run wto dipse lo guidzliu, ye zho zio zho xquielñëw, mban gac zho guien draa cho si lo zho.

¹² Sac masaque lëew rzi:

guiib or,
guiib plat,
grë quie non,
grë perl,
grë lar niazh,
grë lar sed,
grë lar nizhnie nlaan,
grë yag ne nex rlaa,
grë ncuaañe niaa marfil,
grë ncuaañe niaa grë yag wen,
grë ncuaañe niaa guiib,
grë ncuaañe niaa brons,
grë ncuaañe niaa quie mármol,
¹³ grë blad canel,
grë guizh scuaan,
grë yaal ne ndzon rlaa,
grë guizh, grë nceit ne nex rlaa,
grë nziu,
grë nceit,
grë zhobxtil,
grë rin niazh,
grë ma ne rey yo,
grë mëcwxiil,
grë carret,
haxta grë miech ne runzhoo dziin lo samiech.

¹⁴ 'Zriecequia zha ne guiab lo guiedz co: "¡Bdziñaque dze ne blozh luu, pa sëraa scataa yquianie luu grë ncuaañe rdziladz luu! ¡Grëtaa ncuaañe niazh, grëtaa ncuaañe rap luu, gdziñdraa dze ne gbiire gan luuw!"

¹⁵ 'Grë zha ne run wto ga, zha ne scataa gocricw lo grë wto ne been zho guiedz co, zdzieb zho, zit so zho gan zho grëtaa guielñë ne nodeda. Zio zho xquielñëw, haxta zoon zho

¹⁶⁻¹⁷ guiab zho: "¡Probsaxe guiedz ro qui, squi znuse bnitlow! Biopaa dze goconona, masaque goca zig tib wnaa ne racw grë lar niazh, grë lar nizhnie nlaan; wnaa ne rna grë guie or, grë quie non, grë quie perl, rio yan, rio yan nia."

'Grë zha ne rnabey barcw, grë zha ne rsëew, zha ne no leña, ni grëragaa zha ne run dziin lo nisdoo, zit so zho gan zho tsec guiedz co;

¹⁸ zeene gan zho goxdoo ne rso noyeca, ziab zho: "¡Zha rnaraa dze ne dzian ne stib guiedz nroob zig guiedz qui?"

¹⁹ Mban gac zho, zio zho xquielñëw, zoon zho, squiaadan zho redz, guiab zho: "¡Probsaxe guiedz ro qui squi znuse bnitlow! Lo grëtaa dimi ne pquianiew, blactaa beenricwa ne grë ne grëraa zha ne run dziin rii."

²⁰ 'Sca nagon nitlo guiedz co. Grëse to ne nac to zha ne no gbaa, grëse to ne nac to zha ne ngab lo naa, grëse to ne nac to zha ne pxel naa güeynee xtidz naa, zha ne güeyteed xtidz naa, zeene gan to laa guiedz co nonitlo, golley, sac gon ga gunquizh Dios miech ne no ga grëtaa mine been zho to.

²¹ Masaque blozh bnee meñ co, dzigo gon naa tib anjl, rlu tib anjl macisa, znuse blis me tib quie nroob, niaaw zig niaa quie molin zhobxtil dipse gan bron mew lo nisdoo; blozhse bron mew, nëchaa me:

—Squi nagon nitlo guiedz ro ne nac Babiloin ga, gdziñdraa dze ne gbiire gan miecha.

²² Masaque nroobladzdoo ne raca niina, loxaque di noyac grë ro xnëza, zaatne noyoool zho vihuel, zaatne noyoool zho bzie, zaatne nocuedzгаа zho trompet, nëzrii nëzrec rac miech zie zho lo xtsiin zho, loxaque lo grë quie molin rzedz nozou zho zhob; per gal dze co grësew lozh.

²³ Squitaa biini ne rquiaw niina, squitaa tibaque quiaay guieltsieela, per gal dze co ncowse gnaw, pa sëraa gac lniw. Laaw nitlo, sac blactaa noyungüeta miech ne no grëraa guiedz ne ndxie lo guidzliu lo grë zhiwseed mënox; pe zhidaa noyunricwa grë zha ne run wto por grë wseed co;

²⁴ pe zhidaa miech zëëba. Nzian zha ne ngab lo Dios, nzian zha ne riadteed xtiidz me, rnabeya ret zho.

19

¹ Zeene blozh ga, bin naa zëëb ndal tsi meñ co nëz gbaa, rlu miech guizhiuw, nguiedz rnee zho:

¡Zha ndzontaa xDios ne! Me nac meñ ne rsilaa miech, parne ygaad zho lo cax-tigw.

Me nac meñ ne rap poder;

me nac meñ ne rieguiäl dziuunnon ne;

2 sac gon mesi run me guielwxtis zigne no gaca.

Gacxe waa, sca gunquish me guiedz qui grëtaa guielyozh ne noyuna, grëtaa xchen zha ne ngab lo me, zha ne bnabeya gut;

rrieequia naca zig tib wnaa yozh, quiauyungüeta miech quiauyunctal zho xtol zho.

3 Blozh ga, biire bin naa tsi zho, rnee zho: jZha ndzontaa Dios! jMin qui nagon rieguiala, gdzind dze ne lozh csow gox!

4 Horco laa gza galptap mengol co, ni gza tap bult mban co pquitsgzhib lo Dios lo xcan ne zob me ga, haxta bzooblo zho lo liu, beennon zho me, rnee zho: "jNliw! jLuuse nac men ne ndzon!"

5 Zëëbaque stib tsi men co zaatne nac lo xcan co, rnee me:

jGrëse to ne nac to zha ne quiauyun dziin lo me,

zha ne rien men non nac me, zigtaa zha wina, zigtagaa zha nona, golgoolnie me!

6 Dzigo wbiire bin naa tsi grë miech guizhiu co nëz bgaa, rio bi zëëb tsi zho, pale zeene rio bi nisdoo, zeene riogaa bi rnee grë nguzidox, rnee zho:

jGolgotsaa dzioolnie ne me!

jMe nac xDios ne, me nac men nroob ne rnabey!

7 Golgotsaa gley ne, golgotsaa dziuunnon ne me,

sac gon laa dze bdzin laa Carner yeen ne nac Xpëëd me ga ctsieelnia;

grë zha ne ngab lo me, zha ne rrieequia nac ndzooop ne ctsieelnia Carner yeen co, laa zho nacwxable.

8 Masaque rlu zho zig tib ndzooop ne ctsieelnia,

ine nquitsbie, ine rbebni lar niazh ne nacw zho;

me bdeed diidz got zho lar co,

ga rlu ganle mban zho zigne racladz me.

9 Dzigo rneechaa anjl ne sca bron quie co lo nis:

—Wen zie grë zha ne bredz Dios tsie lo xquieltsiel men ne nac Carner yeen co.

Bnabey me naa pqia naa diidz co, blzhse ga, nëchaa me lo naa:

—Xtiidz Dios ga gon, me rneew.

10 Horco pquitsgzhib naa lo anjl co ni naa gunnon naa me, per bzhiguield me.

—jCoo! —në me lo naa—. jGuso i! Gocnan ganle ye naa tib ngundziinse nac naa lo Dios, zha naa zigne nacaque luu grë luu grëraa zha ne squi noxco zienal mine nac zhiwseed Jesús. Dios none gunnon luu, sac gon tib ngundziinse nac naa bzet naa min co, lëë gdib bne naa ganle zha nac xtiidz Jesús.

11 Dzigo hor co gon naa bzhal zhan bgaa, ga brieequia tib men co zob me lad tib

guay nquits, zëëb diidz niapse diidzli rnee me, sac run me guielwxtis zigne no gaca, ni rdiñnie me zha ne rieguial tilnie me.

12 Masaque rbebel bziaalo me, nzian xcuaa coron zob guic me, ni quia stib lë me quia me, loxaque mese nan dien zha nac lë co me.

13 Rnadraa xab me di ren, lëë me ga rnee zho: Xtiidz Dios.

14 Ndal grë menguiib ne no bgaa nal zhits me, ye zho niapse guay nquits zob zho; niapse lar niazh nacw zho, ine nquitsbie rna grë lar co.

15 Rlu choot grieelod gacndaan lo me, masaque zob tib spad lots ro me, laa me nzobro spad co parne tilnie me grë guiedz ne gactseeb lo me. Masaque me gnabey grëse guiedz, ndip gac xtiidz me, ni tib choot quitsd mine gnabey me; zeene laa me gunquish miech grë xquielntseeb zho, cxeel me zhian ne csiaab Dios yгаа zho, zun me zho zigne run miech uv zeene rzëëni zhow.

16 Lad lar ne nacw me ga, ni tib cho cor me, ga quia cho nac me, rneew: "LËË MEN RII NONRAA LO GRËSE ZHA NON, ME RNABEY LO GRËSE ZHA NE RNABEY."

17 Blozh ga gon naa zo tib anjl lo ngbidz, nguiedz zëëb tsi me rbedz me grëse maxiil ne row grë magut, rnee me:

—jLigier golcaals! jGoltë zeena yquuin to guielwagw ne gneedz Dios lo to niina!

18 Goltë zeena gow to grë zha ne rnabey grë guiedz, grë zha ne rnabey lo menguiib, grë zhaguiib ne zëëb diidz nac zha valor; goltë gow to grë guay, gow to grë zha ne rzob lad ma. Goltë gow to grëse miech, zigtaa zha ne runcunzho miech dziina, zigtagaa zha ne choot rnabeyda, zigtaa grë zha ne nac zha nona, zigtagaa grë zha wina.

19 Dzigo gon naa ma nroob ne brieequia lo nisdoo ga, ma ne scataa ntseeb rlu ga, psilo ma ptop ma grëse zha ne rnabey grë guiedz ne ndxie lo guidzliu. Pcaalsa zho grë xmenguiib zho, zha guizhiuw, laa zho brieë zietilnie zho men ne zob lad guay nquits co grë xmenguiib me.

20 Lo dil co, ga bgaa ma nroob co, ni bgaa zha ne pteed xtiidz ma lo miech; zha ne scataa squi zo ma been zho grë milagr co pquidie zho miech, bio guic zho bio zho xbey ma, ni beennon zho mdio ne rlu zig rlu ma ga. Zigtaa maw, zigtaa zha ne pteed xtiidz ma ga, nguia mban zho laa zho biab tib lo guidox zaatne noyec zufr.

21 Laa grëraa zha ne scataa gconie ma ga, grëse zho gut lo spad ne nzobro men ne zob lad guay nquits co, hor co bdzinbe grëse maxiil ne row magut, güeytow ma grëse ngutoo co haxta biel ma.

20

Bnabey Jesús tib mil iz

¹ Blozh ga, tibaque zeene gon naa laa tib anjl biet gbaa, nzhen me tib liow, ni nzhen me tib caden.

² Dzigo bnaaz me ma ngol ne rna nizhnie ga, meel ne notaque padzeela ga, ma ne nac mendox ga, ma ne nac Satanás ga, bzoob me ma caden co;

³ con liow ne nzhen me ga pxal me tib ro guierdoo, psëeb me ma len guierdoo co. Blozh ga dziits dziits psi oog mew, zeena grieelod griee ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma na griee ga, sonlaa ma zniip.

⁴ Horco gon naa laa grè zha ne bzo Dios cobey pe nac xtol tib tib miech, laa zho bzob lo xcan ne rieguial sob zho. Gonaque naa xalm grè zha ne psacsi miech, bga zho yan zho, beet zho zho loxaque ne no zho xnèz Jesús ni bnee zho xtiidz me lo miech; gon naa grè zha ne bzhiguield nquitsgzhib lo ma ngol ne brieequia lo nisdoo ga, bzhiguield zho niunnon zho mdio ne rlu zig rlu ma, niicle bzhiguield zho nio zho xbey ma. Gon naa brieegan zho grèse zho, par gbannie zho Jesús, gnabey me grè me zho dipse len tib mil iz.

⁵ Lèe grè zha co nac miech ne glopaa grieeban, laa grèraa mengut, zha co grieeban zeene laa tib mil iz co gza.

⁶ Dichos grè zha ne glo grieeban ga; lo Diosle ngab zho ga, noxtseebdraa zho guey zho gabil, masaque lo Dios, lo Jesús gun zho dziin, gac zho zig tib pxoz lo me; tipse gnabey me grè me zho len tib mil iz co.

⁷ Zeene blozh tib mil iz co, dzigo gon naa laa mendox briece zaatne niogyu ma ga,

⁸ güey ma güeyquidie ma zha Gog, güeyquidie ma zha Magog, grèse guiedz ne ndxie lo guidzliu güeyquidie ma miech, tipse been ma zho grèse zho parne tilnie zho Dios. Miech guizhiuw, miech ne lèb ne glab new, gun ne cuent yuzh ne ndxie ro nisdoo,

⁹ ntseeb rac zho, grèse zho laa zho bdzin zaatne ndxie guiedz ne rleyne Dios, zaatne no grè zha ne ngab lo me ga; par zeene laa zho ndxiele igo guiedz co parne gnitlo zhow, hor co bnabey Dios bliaal gui lad zho, bzèega zho grèse zho.

¹⁰ Laa mendox, bnabey me bga ma bey ma lo guidox ne nac gabil, zaatne nole ma ngol ne sca brieequia lo nisdoo, grop ma co zha ne pteed xtiidz ma ga. Lo guidoxa, niapse zufr noyec lugar co, ga tsu ma dze guieel, gdzindraa dze ne griee ma ga; caxtigwdox ne ted ma.

Beenquizh Dios miech mine been zho

¹¹ Blozh ga, gon naa tib men co zob me tib lo xcan ro, dib nquitsbiese rna xcan co.

Zigtaa guidzliu, zigtaa gbaaw, zeene gona me znuse bichew, per bdziel pa niolana lo me.

¹² Grèse zha ne brieeband glo ga, zigtaa zha nona, zigtaa zha wina, laa zho bdzin lo me. Laa zho ndxie ga, zeene laa lo bla libr co bzhal, ni bzhalaque lo mine quia lè zha ne bga guielmban cub ne rdeed Dios ga; hor co bgaase zho mine rieguial zho tib zho tel zha zhobnee lo libr co wban zho.

¹³ Grèse zha ne biaan len nisdoo, blieequia nisdoo zho, grè zha ne bioliu blieequia baa zho; grèse zho blieequia guielgut zho.

¹⁴⁻¹⁵ Blozh ga, zigtaa guielguta, zigtaa zha ne quiad lè len libr ne no lè zha ne bga guielmban ga, laa zho biobe lo guidox ne nac gabil; lèe guielgut brop ga.

21

¹ Dzigo gon naa tib gbaa cub, ni tib guidzliu cub; sac zigtaa gbaa ne rdziunbey ne, zigtaa guidzliuw, zigtagaa nisdoo grèsew bnitlo.

² Grop lo naa gon naa laa Jerusalén, guiedz ne nacchen Dios ga, ziad-zèeb zhan gbaa brieew zaatne zob me; tib guiedz cuba. Tib guiedz nzhixcuaa naca, pale tib ndzooop nguieg dze ne rtsieelnia zho.

³ Dzigo bin naa nguiedz zèeb tib tsi men co zaatne nac lo xcan ro ne zo gbaa ga, rnee me:

—Nasi nagon laa Dios cuèz lo miech, nasi laa me gbannie zho; zanlo zho me, peet gunfaltraade lo zho.

⁴ Led yedraa niina pa glunè zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho gun xyudar zho, led yedraa niina goon zho; grèse nis ne zo lo zho zeene biin zho, niina laa me gunmbew. Grèse ncuuan co, gdzindraa dze gan zhow.

⁵ Zèeb tsi men ne zob lo xcan co, rnee me: —Grèse ncuuaane no niina ncuble naca, ni naa beenncuba.

Blozh ga, nèchaa me lo naa:

—Grèse diidz ne gni naa lo luu nu niina gon, pquiaaw, ib none gacnan miecha, sac ncuuaane no gaca.

⁶ jLèew nagon, grèse mine no gac, laaw blozh ben naa! jNaa psilow, ni naa psiaala, naa nac zigne nac letr “a” ni letr “z” lo grèse letr; “a” rsilow “z” riala!

jZha ne nè rnab zhis, naa gded nis ne rdeed guielmban guie zho, ygad naa nis co lo zho, peet gacnonda!

⁷ Ni golgacnan ganle, grèse zha ne gdeete diidz lo grè ncuuaane gunctal xtol zho, ible zgaa zho grè guielnzaac ne noyaquiet nu, naazhal gbannie zho peet gunfalte lo zho, masaque tib mèed gac zho lo naa.

⁸ Sangue grè zha ne rdzieb gban zigne rnabey naa, grè zha ne rbiche lo naa, grè

zha ne ruṅ grē ncuaaṅ mbixladz, grē zha ne rut samiech, grē zha ne rionie zha ne led tsieeld zho, grē zha ne rleynie guieḷbruj, grē zha ne rleynie grē mdio, grē zha ne tibaque noquidie samiech, grēse zha co miṅe ygaa zho nac lo guidox ne noyec zufr ga; lēē guieḷgut broṅ ga.

Guiedz ne gdziṅ zha ne ngab lo Dios

⁹ Lo gza gadz anjḷ ne bzheṅ cop ne bio grē guieḷnē ne goṅ miech ga, biaadgax tib me lo naa nē me:

—Dē ganḷe zeēna gan luu ndzoop nguieg ne gac tseeḷ meṅ ne nac Xcarner yeēṅ Dios i.

¹⁰ Blozh ga, dzigo güeynie anjḷ co naa tib guic gui nroob, tib guic gui glaa, ga goṅ naa guiedz Jerusalēn stib, guiedz ne naccheṅ Dios ga, goṅpaa naa bieta zaatne zob Dios, laaw ziad-zēēb gbāa.

¹¹ Masaque rbeḷela guieḷndzon ne rap me, lēēdaa grē quie niazḷ ne lē jasp, ni roḷ rṅaw lēēdaa grē vidr.

¹² Rna tib biedz nroob, tib biedz glaa ndze igow, quia tsiipchop puert cho biedz co, tibga anjḷ zo quianap tib tib ro puert co, tib tib puert co neysew tib lē meṅgoldoo ne goc xpēēd Israel.

¹³ Tsoṅ puert co quia nēz ya, tsoṅa quia nēz quiet, tsoṅa quia ngali nēz ne rlan ngbidz, tsoṅa quia ngali nēz ne rzēēb ngbidz.

¹⁴ Lo tsiipchop quie nroob ne zob biedz co, tibga lē xpoxḷ meṅ ne nac Xcarner yeēṅ Dios ga quia lo co.

¹⁵⁻¹⁶ Rlupaa cuadrad niaa guiedz co; dzigo goṅ naa no tib bar ne rbix nia anjḷ co, niaaw niapse guiib or; psilo me ptiix me guiedz co, ptiix me biedz ne ndze igow ga, ni ptiix me xpuerta. Zeēne blozh ptiix mew, tib tib nēza no gaay gayoo choo kilómetro, lal ne rzēni miech tsiipchop ngbidz; lal ne zioola lalga nzhenā, ni lalgaque glaaw;

¹⁷ laa xquieḷnaaḷ biedz co nzhenā lal ne rgaa tsiipchop docen dzit nia ne; ptiix mew zigne rtiixaque ne nac ne miech.

¹⁸ Niapse guiib or niaa guiedz co, zigne rne naa ga, roḷ rṅaw lēēdaa vidr.

¹⁹⁻²⁰ Biedz ne ndze igow ga, niapse quie niazḷ ne lē jasp niaaw; scaque gza tsiipchop quie ne naaz biedz co, niapse quie niazḷ ngalguieew:

tiba ngalguiee quie niazḷ ne lē jasp,
 tiba ngalguiee quie niazḷ ne lē zafir,
 tiba ngalguiee quie niazḷ ne lē ágata,
 tiba ngalguiee quie niazḷ ne lē smerald,
 tiba ngalguiee quie niazḷ ne lē ónice,
 tiba ngalguiee quie niazḷ ne lē cornalin,
 tiba ngalguiee quie niazḷ ne lē crisólito,
 tiba ngalguiee quie niazḷ ne lē beril,
 tiba ngalguiee quie niazḷ ne lē topás,
 tiba ngalguiee quie niazḷ ne lē crisoprás,
 tiba ngalguiee quie niazḷ ne lē jacint,

tiba ngalguiee quie niazḷ ne lē amatist.

²¹ Gza tsiipchop puert ne quiaw ga, tibga quie perl niaa tib tib puert co; nēzyu ne rded groḷ guiedz co, niapse guiib or niaaw, masaque mbe roḷ rṅaw.

²² Ni tib yadoo gond naa, sac dipse lad guiedz co rleynie zho Dios, rleynie zho meṅ ne nac Xcarner yeēṅ me.

²³ Led yedraa ga rquiin xbiini ngbidz, rquiin xbiini mēē, sac masaque xquieḷndzon me, ni xquieḷndzon meṅ ne nac Xcarner yeēṅ me ga nac biini.

²⁴ Grēse miech ne ngab lo me, iṅe gziini biini co lo zho sē zho lad guiedz co; zha ne bnabey grē guiedz ne bre lo guidzliu, bio dze zha goc zha non, per zeēne gdziṅ zho ga ye zho zunṅon zho me.

²⁵ Led yedraa ga ycow liu, tibaque niini gnaw, tibaque gzhial gza xpuerta.

²⁶ Grēse ncuaaṅe mbe ne gocnon lo grē guiedz ne bre lo guidzliu, laaw gdziṅ ga;

²⁷ sangue grē ncuaaṅe mbixladz gdziṅda ga. Zig nac grē miech ne ruṅ grē guieḷntseeb, grē zha ne tibaque noquidie, gdziṅd zhow; loxaque zha ne zhoob lē leṅ xlibr meṅ ne nac Carner yeēṅ co (libr ne no lē zha ne ygaa guieḷmban cub ne gdeed Dios ga), zha cose gdziṅa.

22

¹ Blozh ga, blu anjḷ co tib guiuḷbee lo naa, nē me zha ne guie nis co, zgaa zho guieḷmban; mbe roḷ rṅaw, haxta rbeḷel low. Merse zhan xcan ne zob Dios ni zhan xcan ne zob meṅ ne nac Carner yeēṅ co, ga rriee guiuḷbee co,

² rdeda groḷtaa nēzyu ne rded leṅ guiedz co. Gropse nēz ro guiuḷbee co zēēb yag ne rdeed guieḷmban. gzobse mēē rquia nex low, tsiipchop vuelḷ rdeeda nex tib leṅ iz, haxta ye zhiblaga rquiin grē zha ne no ga, parne sacnēd zho.

³ Led yedraa ga no ncuaaṅe ndziibdee, ga zo zhixcan Dios ni zo zhixcan meṅ ne nac Carner yeēṅ co; grēse miech ne ngab lo me, rleynie zho me ruṅṅon zho me.

⁴ Raṅlo zho me, grēse zho quia lē me quia zho.

⁵ Led yedraa ga yquiin zho pe gziini lo zho, yquingaa zho xbiini ngbidz, sac Dioszhal rziini lo zho, led yed ga ycow liu; ga gban zho gdziṅdraa dze ne griee zho ga.

Ile ziaad Jesús

⁶ Dzigo nēchaa anjḷ co lo naa:

—Grēse ncuaaṅe quiaayan luu nu, ible ncuaaṅe no gaca. Bui ganḷe Dios meṅ ne rdeed guieḷbiini lo grē zha ne rieteed xtiidz me lo miech, rnee zho ncuaaṅe naraa gac, mezhal pxeḷ xanjḷ me ziadnee lo luu, zeēna gacnaṅ grēse zha ne ngab lo me ziaadyoble gac grē ncuaaṅ rii.

⁷ Ible nacle xtiidz meṇ ne rnabey ne, zhile laa me guiaad. ¡Dichos grè zha ne gliladz grè mine noxobnen Dios nu!

⁸ Grop lo naa gon naa grè ncuaan rii, naazhal bin znu bnee anjl co. Nacne pqui-sgzhib naa lo me ni naa gunnon naa me;

⁹ dzigo nëchaa me lo naa:

—Guso i, rieguaald gunnon luu naa, laa naa nile lo luu ye naa tib ngundziinse nac naa lo Dios, nac naa zigne nacaque luu grè luu grè zha ne noteed xtiidz meṇ ne rnabey ne lo miech, ni grèraa zha ne gliladz mine noxobnen me nu. Me none gunnon luu.

¹⁰ Blozh ga, nëchaa me:

—Bien, grèse mine quiayan luu nu, yqueetsd luuw, sac zhile gdziṇ dze ne gaca.

¹¹ Lo spalalse dze ne riaan niina, grè zha ne noyṇ guieṇtseeb, teṇe racladz zho mazdraa guieṇtseeb ne gun zho, maase gun zhow; zha ne runḡaa guieṇyozh, teṇe miṇcotaa rleynie zho, maase gunraa zhow. Sangue grè zha ne noxco gun mine rnabey Dios, none tsoxcoraa zhow; zha ne ngable-gaa lo me, none gunraa zho mine racladz me, gbiched zho lo me.

¹² Horco bin naa tsi meṇ ne nac Carner yeṇ co, në me:

—Psoladza sca gon, ible ziaṇniob naa; zeene laa naa guial, hor co gded naa mine rieguaṇ tib tib miech, teṇ zha wban zho.

¹³ Notaque naa, zig nac grè ncuaan rii naa psilow ni naa csiaala; nac naa zig nac letr “a” ni letr “z” lo grè letr, “a” rsilow, “z” riaṇa.

¹⁴ Dichos grè zha ne noxco guiaanmbe zho nëz lo Dios, sac rrieequia xab zho ga nosanmbe zho, parne grielo ted zho ro puert ne quia guiedz cub ne nac Jerusalén ga; gdziṇ zho ga ine gow zho xnex yag ne rdeed guieṇmban ga.

¹⁵ Sangue grè miech ne racntseeb lo Dios, zha ne rleynie guieṇbruj, zha ne rionie zha ne led tseield, zha ne rut samiech, zha ne rleynie grè mdio, zha ne loxaque noquidie samiech, ni tib zha co grielod ted ro puert co.

¹⁶ Naa gon nac Jesús, naa pxelṇ xanjṇ naa ziaadlu grè ncuaan rii lo luu, zeena grèse zha ne no xnèz naa gacnaṇa. Naa ga brieequia lo xtii rey David, per naa psan grèse xmengol me. Rrieequia naa nac mel ngol ne rziini raṇ sil.

¹⁷ Zigtaa Espiritu Sant, zigtaa grè zha ne no xnèz me, zha ne rrieequia gac tsiel me ga, laa zho quiambèz me; niicle zha ne gacnaṇragaa laa me no guiaad, none yquiambèz zho me. Zha ne në rnab zhis, teṇe gacladz zho zac gbig zho lo me, me gdeed nis ne rdeed guieṇmban guie zho; ygad me nis co lo zho, peet gacnonda.

¹⁸ Grèse zha ne gon grè mine pxobnen Dios nu, laa naa rso diidz lo zho: Gneed zho ncuaane nacda, sac zha ne gdziibraa diidz zeene gnee zhow, scagaa me, lo grè guieṇne ne raquiet nu yгаа miech, dzziibraa me mine yгаа zho;

¹⁹ zha ne ctichegaa palala zeene gnee zhow, scaque stiche me lè zho lo libr ne zhobnee cho nac zha ne yгаа guieṇmban ne gdeed me, grieelodraa gdziṇ zho guiedz ne blozh goquiet nu, ygaadraa zho yquiin zho xnex yag ne rdeed guieṇmban ga.

²⁰ Meṇ ne blozh bnee lo naa ga, ible ziaad-niob me rnee me. Gacxe waa, dib zdoe naa laa naa rne lo me nu:

—¡Scaw gon Jesús! ¡Dè, laa no quiambiaaz luu!

²¹ Me nac meṇ ne gacniē to grèse to, me gunṇay to.

Juan